

Bulu Ntam Pɔpwe

Nkonya



in cooperation with
Ghana Institute of Linguistics,
Literacy and Bible Translation

Illustrations on pages 3, 124, 140, 253, 256, 279, 302, 336 used by permission of the © 1978 David C. Cook Publishing Co.

Illustrations on pages 46, 93, 132, 212, 271 by Darwin Dunham,
© United Bible Societies, 1989.

Illustrations on pages 55, 149, 190, 222, 434, 459, 516 by Louise Bass
© The British & Foreign Bible Society, 1994.

Illustrations on pages 57, 59, 111, 114, 263, 490, 495, 498, 518, 534, 549,
595, 631, 632 by Horace Knowles
© The British & Foreign Bible Society, 1954, 1967, 1972, 1995.

Illustration on page 247 by Horace Knowles revised by Louise Bass
© The British & Foreign Bible Society, 1994.

Illustrations on pages 66, 80, 86, 230 by Graham Wade,
© United Bible Societies, 1989.

Illustrations on pages 181, 324 by John Lear
© 1960 American Bible Society. Used by permission.

The New Testament
The Nkonya language
Ghana, West Africa
First Printing
2009 2M

© Wycliffe Bible Translators, 2009

www.ScriptureEarth.org

Creative Commons License

Attribution-Noncommercial-No Derivative Works 3.0 Unported



You are free to:

Share — to copy, distribute and transmit the work

Under the following conditions:

Attribution — You must attribute the work in the manner specified by the author or licensor (but not in any way that suggests that they endorse you or your use of the work).

Noncommercial — You may not use this work for commercial purposes.

No Derivative Works — You may not alter, transform, or build upon this work.

With the understanding that:

- **Waiver** — Any of the above conditions can be waived if you get permission from the copyright holder.
- If you copy or distribute this work, you must include the terms of this license agreement.
- **Other Rights** — In no way are any of the following rights affected by the license:
 - Your fair dealing or fair use rights, or other applicable copyright exceptions and limitations;
 - The author's moral rights;
 - Rights other persons may have either in the work itself or in how the work is used, such as publicity or privacy rights.

<http://creativecommons.org/licenses/by-nc-nd/3.0>

Bulu Ntam Pɔpwe Nwulú

Mateo	Mat.	1
Marko.	Mar.	82
Luka	Luk.	134
Yohane	Yoh.	218
Gyumagyihe	Gyu.	281
Romafɔ	Rom.	357
Korintofɔ Gyankpapu	1 Ko.	390
Korintofɔ Nyɔɔsi	2 Ko.	418
Galatiafɔ	Gal.	438
Efesofɔ	Efe.. . . .	449
Filipifɔ	Flp.. . . .	460
Kolosefɔ.	Kol.	467
Tesalonikafɔ Gyankpapu	1 Te.	474
Tesalonikafɔ Nyɔɔsi	2 Te.	480
Timoteo Gyankpapu.	1 Ti.	484
Timoteo Nyɔɔsi	2 Ti.	493
Tito	Tito	499
Filemon.	Flm.	503
Hebrifɔ	Heb.	505
Yakobo	Yak.	530
Petro Gyankpapu	1 Pe.	538
Petro Nyɔɔsi	2 Pe.	548
Yohane Gyankpapu	1 Yoh.	554
Yohane Nyɔɔsi	2 Yoh.	562
Yohane Saasi	3 Yoh.	564
Yuda	Yuda	566
Atɔ Lesúnáhé	Atɔle.. . . .	569
Asún Hiánhe Asɩ Suná		603
Asun Dunkáhé		621
Amáapu.		631

Introduction to the New Testament

This is a translation of the New Testament into the Nkonya language. The Nkonya people are located in the Volta Region of Ghana just north of the town of Kpando, beside Lake Volta. There are about 30,000 speakers of the Nkonya language.

What is the book about?

It is the history of the life and teaching of Jesus Christ, His apostles and the first church. Although Jesus lived a long time ago, His teaching is still very important for us today. It is so important that God commanded it to be proclaimed all over the world. It is the story of how God loves people. He became a man and gave Himself as a sacrifice to redeem the world from the power of Satan, the king of this world. Through faith in Jesus Christ, the Son of God, we are saved from the wrath of God which will come upon this world. Through Him we have peace with God and eternal life in His kingdom. By the power of the Holy Spirit which is God's gift to those who believe in Him, we are able to live the kind of life which is pleasing to Him until He will come again.

Who wrote this book?

The 27 books making up the New Testament were written in the Greek language. Most of the writers had seen Jesus, even lived with Him. Jesus had promised them, "The Holy Spirit will teach you everything and make you remember all that I have told you" (John 14:26). Truly the Holy Spirit reminded them and they wrote His message down. At all times there were people who accepted their message not as man's message but as the Word of God which indeed it is (1 Thessalonians 2:13). By accepting this word you too can be saved (1 Peter 1:23). Since it

is God who is speaking to us in this book we may not understand everything the first time we read it. For God's thoughts are different from man's thoughts. The New Testament is a book which we have to study over and over prayerfully. As well, we will need the Holy Spirit to teach us. God has promised that everybody who asks for the Holy Spirit and obeys God will receive Him. So ask, and you will be given (Luke 11:13).

Some other matters:

Sometimes it is necessary to explain something in the text. We have put a small raised letter in the text that looks like this ^a. At the bottom of the same page we have put the explanation with the same letter ^a and the verse number beside it. Here is an example from Matthew 1:2:

^a 1:2 *Apio yinhé* – amúgyí Israel abusuan dúanyo ámu anáin ni.

The books we have translated are copies of what was written down. Sometimes there are small differences between the different copies. Sometimes we have explained these differences with a letter and explanation at the bottom of the page. Sometimes we have put the text in square brackets, []. This means that the text inside the brackets is in some copies but not all. You can see an example of this in John 8:1-11.

There are also some words or names that have special meaning in the New Testament. At the back of the New Testament we have given an explanation of the special meanings of these words. The first few times that these words appear, we put an asterisk in front of them. An example of this is in Matthew 1:1 – *Dawid and *Abraham.

Ɖwulú Ánfuto Asún Iwɪ Atosunáhé

Amansu Ɖwulú Ánfi Déblí?

Idetóí tsú aní Wíe Yesu Kristo nkpatsiá pú mu atosunáhé, mu sumbí ayɔpú pú ɔpasua gyankpapu amu iwɪ. Iwu mótó aní oletsiá ɔyító lawá ɔpá, táme mu atosunáhé amu utráa bu labi há aní nde. Mú sù Bulu léblí ɔbéé, budá mú ɔkan fia ɔyí ní. Igyi asún aní ilebláa aní alá Bulu ɔɔwé anyánpúsa, alá Yesu lóɔɔwe nyankpusa, ɔɔpu mu iwɪ lé mbusuo aní nwunso, pú mu obugya gyóra aní lé aní tsú ɔyí ánfuto owíe Ɖbunsám túmi asu. Bulu mu Bi Yesu Kristosu hógyi su á, Bulu lédinkí mu ɔbláá íbéba ɔyítósú lé anisú. Mú su ania munyɔ anitsie iwilwiitɔ, abétsiá nkpa aní utamatátó mu iwíe ogyíkpa unu. Ɖɛe Wankíhé túmi ámúbú igyi Bulu atokiehé há ahá aní bohɔ mu gyi lahá abétalí tsíá nkpa aní ilegyi mu ansí kpéfun bréá ɔbésankí bá.

Ma Lówanlín Ɖwulú Ánfi?

Griiki ɔblítɔ ɔwanlín nwulú adwanyɔ-sienó (27) ánfi ulɔɔwe Bulu Ntam Pɔpwe anfi. Mú awanlínú amu ɔɔɔɔɔ bowun Yesu, mua amúnycɔ betsiá. Yesu lébláa amú yáí ɔbéé, “Ɖɛe Wankíhé amu obósuná mli tógyító. Ɖbéha mlékaín tógyítóá nebláa mliú.” (Yoh. 14:26). Lélé Ɖɛe Wankíhé amu lékaín amú ɔwanlín tógyító tswi. Ahá bohogyi aní megyí anyánpúsa asun blíhé keke igyi, mboún Bulu Asún igyi lélé (1 Tes. 2:13). Ní fú é fɔhɔ asún ánfusu gyi a, fénya nkpahóɔ (1 Pet. 1:23). Ínía Bulu détoí kplá aní ɔwulú ánfuto su á, fíalí animéetalí nú mú fée asu, otse gyankpapuvá abékla mú. Tsúfé Bulu agywun igyí ɔtsan há nyankpusa klé. Mú su Bulu Ntam Pɔpwe anfi igyi ɔwulú aní abétsiá kláa, súan mótó asún púɔ́ mpái ekekegyíeke. Múá idun a, ilehián aní Ɖɛe Wankíhé amu ɔbékpa aní. Bulu léhie aní yáí ɔbéé, mɔpu Ɖɛé ámu há ɔhagyíɔha aní otobú mu, kúlí mu Ɖɛé ámu. Mú su opió, kulí Bulu, ɔbéha fú (Lk. 11:13).

Asún Ání Itráa Dehián

Ibu aláá béle asún kuá ibu ɔwulú ánfító asi. Anilapú asúnbi kuá igyi alí ^a wá asún iku aná asi. Anilalé asún ámu asi wá ɔwulú amu ayasi, pú asúnbi ámu kén fí mú asi. Mú iku ibu Mateo 1:2, igyi alí.

^a 1:2 *Apio yinhé* – amógyí Israelfɔ abusuan dúanyɔ ámu anáin ni.

Nwulú ámú anilalé wá Nkonyatɔ ámu igyi múá bɔwanlín tswi. Mútɔ aku ɔtsun ɔtsan há aba bré ikuɔ. Anilalé mú asi, púwá dáka [] ánfí odutɔ. Idesuná ání asún ámú ibu dáka ámutɔ ámu ibu nwulú ámu akutɔ, táme megyí mú féétɔ. Mlétalí wun mú iku Yohane 8:1-11ɔ.

Asvanku ntée adá aku é bu ɔwulú ámutɔá ihíe ibu asi. Anilópu ɔtínéá asún ámu ibubu Ntam Pɔpwe anfitɔ wá ɔwulú ámu ɔma, pú * fi asún ámu asi. Mú iku ibu Mateo 1:1, igyi *Dawid pú *Abraham.

Asun Wankláán Ání

Mateo

Lówanlín

Yesu Anáin Ulínto
(Luka 3:23-38)

1 ¹Yesu Kristo, Owíe *Dawid mu na, *Abraham mu na ámu ulínto ní.

²Abraham lókwú Isak. Isak lókwú Yakob. Yakob lókwú Yuda mua mu apio yinhé^a. ³Yuda lókwú Peres mua Sera. Amú yín gyí Tamar. Peres lókwú Hesron. Hesron lókwú Ram. ⁴Ram lókwú Aminadab. Aminadab lókwú Nahson. Nahson lókwú Salmon. ⁵Salmon lókwú Boas. Boas mu yin gyí Rahab. Boas lókwú Obed. Obed mu yin gyí Rut. Obed lókwú Yisai. ⁶Yisai lókwú Owíe Dawid.

Owíe Dawid lókwú Salomo. Salomo mu yin gyí ɔtsi ɔkwá teki ogyi Uria mu ka. ⁷Salomo lókwú Rehabeam. Rehabeam lókwú Abia. Abia lókwú Asa. ⁸Asa lókwú Yehosafat. Yehosafat lókwú Yoram. Yoram lókwú Usia. ⁹Usia lókwú Yotam. Yotam lókwú Ahas. Ahas lókwú Hiskia. ¹⁰Hiskia lókwú Manase. Manase lókwú Amon. Amon lókwú Yosia. ¹¹Yosia lókwú Yekonia mua mu apio yinhé. Mu brésú bektá Israelfo, híe amú bee buyétsiá *Babilon ɔmátó ní.

¹²Amú Babilon yɔtɔ á, Yekonia lókwú Sealtiel. Sealtiel lókwú Serubabel. ¹³Serubabel lókwú Abihud. Abihud lókwú Eliakim. Eliakim lókwú Asor. ¹⁴Asor lókwú Sadok. Sadok lókwú Akim. Akim lókwú Elihud. ¹⁵Elihud lókwú Eleasar.

^a 1:2 Apio yinhé ánti gyí Israel abusuan dúanyo ámu anáin ní.

Eleasar lókwú Matan. Matan lókwú Yakob. ¹⁶Yakob lókwú *Yosef, Yosef létsiá *Maria. Maria lókwú Yesu. Yesu gyí *Kristo, (ɔhá ámú Bulu ladá mu ofúli amu) ni.

¹⁷Mú su tsú Abrahamsu bɔtu Owíe Dawidsu bugyi anáin ulínto dúana. Tsú Dawidsu bɔtu bréá bɔyɔ Babilon ɔmátɔ é bugyi anáin ulínto dúana. Asa tsú amú Babilon yɔtɔ bɔtu Kristo, (ɔhá ámú Bulu ladá mu ofúli amu) kwíúsú é bugyi anáin ulínto dúana.

Yesu Kristo Kwí

(Luka 2:1-7)

¹⁸Ɔkpa ánfísv Yesu Kristo kwí lɔtsun ni. Bɔpu *Maria há *Yosef bæe otsiá. Táme asa bétsiá, abɔfia ɔtsi múa oyin á, bowun ání Maria dé ɔmé *Ɖɛ Wankíhé túmitɔ. ¹⁹Mu kulu Yosef a, mu asún da ɔkpa, táme omekle ání ɔbɔwa mu pélitɔ. Mú su ɔɔbwe agywun ání obékiná mu ñaintɔ. ²⁰Táme bréá ɔde mú agywun bwe á, kí, *Bulu-ɔbɔpu ɔku léle iwi ɔwan súná mu okudetɔ, bláa mu ɔbé, “Yosef, *Dawid mu na, mánya péli ání fékpa fú ká Maria ba fú wá, tsúfé ɔmé ámú ɔde ámu itsú Ɖɛ Wankíhé túmitɔ. ²¹Ɖbɔkwí obiyímbi, bédinká mu dá Yesu. (Mú asi gyí, ‘Ɖlepú.’) Tsúfé mu ɔbéle mu ahá tsú amú lakpantɔ ní.”

²²Íni léha Bulu asún ámú ɔleblí tsun mu ɔnɔsú ɔtɔipúsv ámu ileba mútɔ. ²³Ɖbé, “Kí, obitebí ání ɔmɔkúyɔ oyin wá kí obénya ɔmé. Ɖbɔkwí obiyímbi, bédinká mu dá Imanuel.” (Mú asi gyí, “Bulu bu aní wá.”)

²⁴Bréá Yosef létsinkí á, olegyi asún ámú Bulu-ɔbɔpu amu lébláa mu amúsv. Oletsíá Maria, kpáín mu. ²⁵Táme ɔmɔpu ibi da Maria, kpéfun bréá ɔɔkwí mu bi yínhé gyankpapu, ɔledinká mu dá Yesu.

Anyansapu Aku Bá

2 ¹Bréá Owíe *Herode dé iwíe gyí Yudea ɔmátɔ ɔkwí Yesu wúlu kvá butetí mú Betlehem, ibu Yudea ɔmátɔ unv. Mú ɔma a, anyansapu akvá butowun atɔ ntsrakpabitɔ botsu owí ɔdalíkpa ɔmá kvɔ ba Yerusalem wúluto. ²Befité



*Anyansapv lówun mv osúna ání igyi ɔsrakpabi
owí ɔdalíkpa unv. Mú sv bebá bosúm mv. (Mateo 2:2)*

bee, “Nkúnú bakwíi *Yudafɔ owíe amu? Anlówun mv osúna ání igyi ɔsrakpabi owí ɔdalíkpa unv. Mú sv abá bosúm mv.”

³Owíe Herode lónu asún ánfu á, opúni letsíi mva Yerusalemfɔ fée. ⁴Mú sv ɔletɪ Yudafɔ Bulu *igyí ahapú dehen pú Mose *mbla asunápú fée fía, fíté amú ɔtínéá bókwií *Kristo, (ɔhá ámú Bulu ladá mv ofúli amu).

⁵Bebláa mv bee “Betlehem wúluá ɪbu Yudea ɔmátɔ. Alí Bulu *ɔnɔsɔ ɔtɔɪpú ɔku lówanlín tswɪ nɪ. ⁶Ɔbee,
‘Fú Betlehem, Yudea wúlu,

fumegyí wúlu túkúríbí ɔkpagyíɔkpasu Yudea awúlu yilé ámutɔ.

Tsúfé ɔmású ogyípú ɔku ɔbédalu tsu fútsá,
ɔbékpa Bulu ahá Israelfɔ.’ ”

⁷Mú su Owíe Herode létí anyansapu amu nkule, fíté amú bréá bowun osúna ɔtsrakpabi amu, bebláa mu. ⁸Múú ɔlɔwa amú Betlehem ɔbéé, buyódunká kebi ámu wankláán. Ní bowun mu a, buyínki bebláa mu, méní mu é móyósum mu.

⁹Olenya bláa amú tá alu benatí. ɔtsrakpabi amúú bowun owí ɔdalíkpa amu, lékpa amú alu yélú ɔtínéá kebi ámu bu. ¹⁰Bréá bowun ɔtsrakpabi amu a, ansí lehie gyi amú. ¹¹Bowie wóyítɔ unu á, bowun kebi ámu mua mu yin *Maria, beda akpawunu súm kebi ámu. Besankí amú akentebi, bekie mu sika pepe, ɔhíén pú *ohuam.

¹²Mú ɔma a, Bulu lɔwa mbla há amú okudetɔ ɔbéé, bumáyinkí yótsun Herode wá. Mú su ɔɔtsun ɔkpa bámbású yó amú wúlutɔ.

Yesu Mua Mu Akwúpú Egyipte ɔmátɔ Yo

¹³Bréá anyansapu amu benatí á, *Bulu-ɔɔɔpu léle unu ɔwan súná *Yosef okudetɔ, bláa mu ɔbéé, “Kusu, afukpa kebi ámu mua mu yin sri ya Egyipte ɔmátɔ. Mlutsia unu yófun bréá nébláa fu mbéé mlyínki ba, tsúfé Owíe Herode obódunká kebi ámu, mɔ mu.”

¹⁴Mú su Yosef lókusú onyé-onyé ámu, kpá Maria mua kebi ámu sri ya Egyipte ɔmátɔ. ¹⁵Betsiá unu yófun bréá Herode lówu. Íni léha Bulu asún ání ɔleblí tsun mu ɔnɔsú ɔtɔpú ɔkusɔ leba mútɔ. ɔbéé, “Neti mí bí ámu tsú Egyipte ɔmátɔ.”

Betlehemfɔ Abí Mɔ

¹⁶Bréá Owíe *Herode lówun ání anyansapu amu bamlé mu a, ɔblɔ lehie kítá mú. ɔlɔwa mu ɔsá akɔpú ɔbéé, buyó Betlehem wúlutɔ pú mú nkudasí, abuyɔmɔ abi yinhé ání bahɔ tsú nfinyɔ ba ayasí féé. Tsúfé anyansapu amu bebláa mu beé, begyankpá wun ɔtsrakpabi amu nfinyɔ ní.

17Ínu léha Bulu asún ání ɔleblí tson mu ɔnɔ́sú ɔtɔ́ipú
*Yeremiasu leba mútú. 18Ɖbéé,

“Bonu isú móa olú kvá umeká tin Rama wúluto.

Rahel dé mu abí sú. Omotsulá ání bukpáta mu,
tsúfé butráa buma unv.”

Yesu Mva Mu Akwúipú Yinkí Tsú Egypte

19Owíe Herode lowu ɔma a, Bulu-ɔbɔpu léle iwí ɔwan
súná Yosef okudeto Egypte unv, bláa mu ɔbéé, 20“Kusu,
afukpa kebi ámu mva mu yin, amliyinki yɔ *Israel ɔmátú.
Tsúfé ahá ámú bodunká ání bómo kebi ámu, bawú.” 21Mú
su Yosef lókusú kpá kebi ámu mva mu yin, beyinkí yɔ Israel
ɔmátú.

22Táme bréa bowie unv á, olonu ání Arkelao latsiá mu
si *Herode obiású, ɔde Yudea ɔmású gyí. Mú su olenya
ifú ání ɔbɔpu kebi ámu ya unv. Bulu lélawá mbla há mu
okudeto ɔbéé, ɔpú mu ya Galilea ɔmátú. 23Mú su ɔɔyɔ
yétsiá Nasaret wúluto. Ínu léha Bulu asún ámú ɔleblí tson
mu ɔnɔ́sú atɔ́ipúsu ɔbéé, “Béti mu Nasaretyin” amu ileba
mútú ní.

Asú Ɖbɔpú Yohane Bulu Asún Ɖkanda

(Marko 1:1-8; Luka 3:1-18; Yohane 1:19-28)

3 1Bré kvɔ á, Asú Ɖbɔpú Yohane léba ɔde Bulu asún
ɔkan da Yudea *dimbísú. 2Ɖbéé, “Mlɔdamli klvntɔ,
amlisi lakpan bwe, tsúfé *Bulu iwíegyí lawíé wóyí tá.”
3Yohane iwí asún *Bulu ɔnɔ́sú ɔtɔ́ipú *Yesaia lówanlín
ɔbéé,

“Ɖku dékplɔn dimbísú ɔbéé,

‘Mlɔla aní Wíe ɔkpa.

Mlɔswii ikpa ha mu’ ” amu ni.

4Yohane lówa *kpɔ́s-imi atadɛ, ɔɔpu ɔwɔlɔ-kpákpá
ɔfé klí músú. Atsantsanku pú ɔkwén otegyi. 5Ahá botsu
Yerusalem wúluto, Yudea ɔmátú pú Yordan bunkpa ɔnɔ́
awúlu féésú ba bonu mu asun blíhé. 6Bele amú lakpan blí,
ɔɔɔ amú *asú Yordan ntsutso.

7Táme bréá *Farisifo pú *Sadukifo tsotsɔtsɔ beba beɛ, ɔbɔɔ amú asú á, ɔlefíté amú ɔbéɛ, “Abe abí-aná, ntu gyá mli, mliśrí Bulu usbutí ámúb íbá ámu? 8Mómú mliświe abía íbósuná ání lélé mliladámli klvntɔ. 9Mlumáki mliaa, mli náin gyí *Abraham. Mú su Bulu méébutí mli usu. Nde mli bláa mbéɛ, Bulu ɔbétalí há abwi ánfɩ íbédamlí Abraham abí-aná. 10Séi á, Bulu lapú efé yi nyí-atsitsitɔ. Oyígyíoyí ání imoswie abi wankláán á, bókun mú dá, wá mú féé ogyá. 11Mí mú á, ntsu ndepubó mli asú púsúná ání mliladámli klvntɔ. Táme ɔkúvá ɔdun mi bu ɔma ɔbá. Mmɔfun ání nɔsvrá mu ntukvta kúrúá. Mu ɔbɔpu *Dɛɛ Wankíhé pú ogyá bó mli asú ní. 12Dde mu ilín, ɔbɔpufúní ntéte lé ayó ámutɔ. ɔbékpa ayó ámu wá mu odudutɔ. Táme ɔbéféí ofuníkpa unu wankláán, kpá ntéte amu wá ogyá ání itamaduntɔ.”

Yesu Asúbɔ

(Marko 1:9-11; Luka 3:21-22)

13Yesu lótsu Galilea ɔmátɔ ba Yordan ntsu ɔnɔ Yohane wá ɔbéɛ, ɔbɔ mu asú. 14Teki Yohane mótsulá ání ɔbɔbɔ mu asú. Íni su ɔlebláa Yesu ɔbéɛ, “Mí ilehián ání fɔbɔ asú. Nkálí ígyi sù faba fee mí ɔbɔɔ fú asú?”

15Yesu lébláa mu ɔbéɛ, “Séi á, ha atsu mú alɩ asa, tsúfé ilehián ání abɔbwe tógyítáá ida ɔkpa Bulu ansítɔ.”

Mú su Yohane lótsulá. 16Bréá ɔbɔbɔ Yesu asú tá, Yesu lédalɩ ntsu ámutɔ alɩ nwlótáa lefinkí, olowun Bulu Dɛɛ deklí fé abróduma, ilobogyonká musu. 17Inu ɔme kv lotsu ɔsúsú ɔbéɛ, “Óni gyí mí Bía ntɔdwé mu, mi ansí tehié gyi mu iwɩ ní.”

Yesu Isóki

(Marko 1:12-13; Luka 4:1-13)

4 1Inunu *Dɛɛ Wankíhé amu lékpa Yesu ya *dimbísú, méni ɔbunsám ɔbɔɔ mu ki. 2Oletsíá unu *klí ɔnɔ nke advana (40), onyé advana (40). Mú su akún lehuɛ kítá mu. 3Inu ɔbunsám lóɔ mu ki, bláa mu ɔbéɛ, “Ní Bulu mu Bi fúgyi á, múmú ha abwi ánfɩ idamli bwe bodobodo.”

4 Yesu léle mú ɔ́nɔ́ ɔ́bée, “Bɔ́wanlín wá Bulu asún ámutɔ́ bée, ‘Megyí atogyihe wule nyankpusa obégyi tsiá nkpa, táme ɔ́pú Bulu asun blíhé é tsiá nkpa.’ ”

5 Ɖbunsám lékpa mu ya Yerusalem, wúlu wankíhé amutɔ́, ɔ́ɔ́pɔ́ mu yéluí *Bulu ɔ́tswékpa obu ámu ɔ́tántra. 6 Inu ɔ́lebláa Yesu ɔ́bée, “Ní Bulu mu Bi fúgyi lélé á, tu kpayi. Tsúfé bɔ́wanlín wá Bulu asún ámutɔ́ bée,

‘Bulu ɔ́béha mu abɔ́pɔ́ békpatá fú ibutɔ́,
méni fú yabi méeda ibwi kukusu.’ ”

7 Yesu léle mú ɔ́nɔ́ ɔ́bée, “Betrá wanlín bée, ‘Mákapú fú Wíe Bulu kí.’ ”

8 Mú ɔ́ma a, Ɖbunsám lópu mu ya ibu fúáhé kusu, olosuná mu ɔ́yítɔ́ iwíe ogyíkpa fée, pú mú numnyam. 9 Mú ɔ́lebláa mu ɔ́bée, “Ní féda akpawunu súm mí á, nópu íni fée há fú.”

10 Yesu lébláa mu ɔ́bée, “Ɖbunsám, nati tɛi mísú! Tsúfé bɔ́wanlín wá Bulu asún ámutɔ́ bée, ‘Da akpawunu ha fú Wíe Bulu. Mu nkule fu súm.’ ”

11 Inu Ɖbunsám lénatí mu wá, *Bulu-abɔ́pɔ́ beba beki musu.

Yesu Gyumagyihe Asutsuá Galilea Ɖmátɔ́

(Marko 1:14-15; Luka 4:14-15)

12 Mú ɔ́ma a, Yesu lónu ání bakítá Yohane tswi obu, oleyinkí ba Galilea ɔ́sulúsu. 13 Olotu tsú Nasaret wúlutɔ́ yó Kapernaum, wúluá ibu mantáa Galilea ɔ́pu ɔ́nɔ́, Sebulon múa Naftali ɔ́sulúsu. 14 Mu inu yɔ́ léha asún ámúbú Bulu *ɔ́nɔ́sú ɔ́tɔ́pú *Yesaia léblí ámu uleba mútɔ́. Ɖbée,

15 “Sebulon pú Naftali
ɔ́sulúvá ida Yordan bunkpa ɔ́nɔ́, mantáa Galilea
ɔ́pu.

Galilea ɔ́mátɔ́ ɔ́má bámbásúfɔ́ butsie.

16 Ahá ánfí butsie oklúntɔ́ ánfí
bawun wanki kɔ́nkɔ́nkɔ́nkɔ́nti ku.
Butsie ɔ́sulúvá lowu dé iwíe gyí músú.
Wanki ku lawánkí wúlí amósú.”

17 Tsú inu Yesu léfi asi ɔ́de Bulu asún ɔ́kan da, blí ɔ́bée, “Mlɔ́damli kluntɔ́, *Bulu iwíegyí lawíe wóyí tá.”

Akasípú Abaná Le
(Marko 1:16-20; Luka 5:1-11)

18 Eke ɔkuá Yesu ná Galilea ɔpu ɔnɔ á, olowun apíó abanyɔ aku. Simon ání butetí mu Petro mua mu gyama Andrea, bude asawu tswí, tsúfé aye alepú bugyi. 19 Múú ɔlebláa amú ɔbéé, “Mlɔba bobuo mi. Nɔ́bwe mli anyánkpúsa alepú.” 20 Inunu besi amú asawu aná tswi, kplá buo mu.

21 ɔlenatí yɔ nkpá kpalobí, olowun apíó abanyɔ aku é, Yakobo mua mu gyama Yohane. Amúa amú sí Sebedeo bubu ɔkluntɔ, bude amú asawu bíun, Yesu létí amú. 22 Inunu amú é benatí sí amú sí mua ɔklun amu bobuo mu.

Yesu Atósuná, Mu Asún ɔkanda Pú Ulotsa
(Luka 6:17-19)

23 Yesu léki Galilea ɔmátɔ féé, súná atɔ Yudafɔ *ofíakpa. ɔleda Bulu iwíegyí ámu iwɔ *asun wankláán ɔkan. ɔletsa ɔhétɔ múa awútɔ ulɔ kugyíku. 24 Inu su mu iwɔ asún leklei yɔ Siria ɔmátɔ féé. Bɔpu alɔpu tsúa ntíné-ntíné ba mu. ɔletsa ulɔ kugyíku, ahá ání bude iwɔsun wúun, amúa *ɔhɛ laláhe dé amú háan, amúa ulɔ dídahe bu amúsú pú abubúpu aná féé. 25 Mú su ɔɔm kɔnkpɔnkpɔnti bobuo mu. Ahá ání botsú Galilea ɔmátɔ pú Dekapoli^b awúlu amusu, Yerusalem wúlutɔ, Yudea ɔmátɔ pú Yordan ntsu ɔbin ɔsulúsu féé.

Ibusu Atosunáhé

5 1 Bréa Yesu lówun ɔɔm amu a, ɔlɔdu yɔ ibu kusu yétsiá asi, mu *akasípú amu beba mu wá. 2 Inu olosuná amú atɔ ɔbéé,

Oyúla Asún
(Luka 6:20-23)

3 “Bulu layúlá ahá ání amú ansí medín tɔtɔsu dun mu Bulu,

^b 4:25 Dekapoli asi gyí awúlu dú.

tsúfé amúbú mu *iwíegyí ámu ni.

4 Bulu layúlá awireho agyípú,
tsúfé obólwií amú klvn.

5 Bulu layúlá iwiasí abápu,
tsúfé amú obégyi ɔsulúv amu ni.

6 Bulu layúlá ahá ání mu apébwe akún múa ɔmewóli
de amú,
tsúfé ɔbéha amú bómwe.

7 Bulu layúlá nwe awúnpu,
tsúfé obówun amú nwe.

8 Bulu layúlá ahá ání amú kluntɔ lowankí,
tsúfé amú obówun mu ni.

9 Bulu layúlá ahá nsiné alapú,
tsúfé ɔbéti amú ɔbéé mu abí.

10 Bulu layúlá ahá ání budin amúsú mu apébwe sv,
tsúfé amúbú mu *iwíegyí amu ni.

11 “Bulu layúlá mli, ní buɔe mli sia, budin mli sv, buɔe afunu wa dínká mli sv. 12 Ansí igyí mli, iwí ɔsanki mli, tsúfé mli ɔkɔká tɔɔ ɔsúsú. Alí ɔɔbwe Bulu ɔnósú atɔ́pú agyankpapu amu ni.

Nfólí Múa Wanki

(Marko 9:50; Luka 14:34-35)

13 “Mligyí ɔyítɔ nfólí ni. Ní nfólí itá ɔdwe á, ntɔ bélapúwá mú ɔdwe? Itráa ma ale há tɔtɔtɔ bwe. Tsei butetséí mú tsítsá, ahá butetsátsa músú tsun.

14 “Mligyí ɔyítɔ wanki é ní. Wúluá idin busu tamanjáín. 15 Butamanywé ɔkandíe, pú ɔlɔ bun músú. ɔfvákpa butɔpúbían, méni ibówankí há ahá ání butsie wóyí ámutɔ féé. 16 Mú sv mliha mli bwehé iwanki alí, méni ahá bówun mli bwehé wankláán ámu, fówun békanfú mli Sí ámutú ɔb ɔsúsú ámu.

Mose Mbla Iwí Atosunáhé

17 “Mlimáki mliaa, neba Mose Mbla ntée Bulu ɔnósú atɔ́pú amu atosunáhétɔ ɔkakpá. Mmeha mútɔ ɔkakpá, mboún neba

bɔɔbwe mú ifun. ¹⁸Ɔɔɔkwali nde mli bláa, ɔsú mba asi bómɔ ɔɔɔ, táme itoduáhé ntée asúnbi kule kúrää uméedali Mbla ámutɔ, yɔɔfun bréá mútɔ asún féé laba mútɔ. ¹⁹Ɔhagyíɔha ání omobu mbla ámutɔ túkúrííbi ku, olosuná mu aba é ɔbée bumábu mú á, bétu mu kebi túkúrííbi ɔsúsú iwíe ogyíkpa unu. Táme ɔhá ání olegyi mbla ámu féésú, súná mu aba ání bugyíi músú á, bétu mu ɔha yilé ɔsúsú iwíe ogyíkpa unu. ²⁰Mú su nde mli bláa mbée, ní mlimɔɔbwe Bulu apé dun Mose *mbla asunápú pú *Farisifo ámu a, mlimóowie *Bulu iwíegyí amutɔ ekekekeke.

Ɔblɔ lwi Atosunáhé

(Luka 12:57-59)

²¹“Mlilanú ání bebláa mli anáin atutɔ ámu beɛ, ‘Mámɔ ɔha. Ɔhagyíɔha ání ɔmɔ ɔha a, Bulu obégyi mu asún, há mu ipón.’ ²²Táme mí mú nde mli bláa mbée, ɔhagyíɔha ání olenya ɔblɔ wa mu ba á, Bulu obégyi mu asún. Ɔhá ání olesia mu ba ɔbée, ‘Ɔhakpan!’ á, obégyi ipón *Yudafɔ asún agyípú ansítɔ. Ɔhagyíɔha ání ɔlebláa mu ba é ɔbée, ‘Raka!’^c a, obégyi ipón yɔ isubutí ogyá ání itamaduntɔ. ²³Íni su ní fotsu atɔ hahé fɔyɔ afɔɔɔɔ ɔɔɔkpa, fekaín ání fapú asun laláhe ku gyi fú bá á, ²⁴si fú atɔ amú yai *afɔɔɔɔ-asubwisu unu. Yɔ fúa munyɔ amlila mli nsiné, asa afuba ɔɔɔ afɔɔɔ ámu ha Bulu.

²⁵“Ní ɔku ɔsáma fu á, wa ɔsa ha abvyobwíi ipa ha mu asa asún ámu ogyíké ifun, méni fú onyabá ámu ɔméeha asún agyípú bumɔɔpu fú ha obu adípúsú ɔkípu, ɔwa fú obu. ²⁶Mbláa fu ɔɔɔkwali, nkétu faká ɔku ámu féé tá asa féɔɔɔ unu.

Otsiába Ɔmadali lwi Atosunáhé

²⁷“Mlilanú ání bebláa mli beɛ, ‘Mákke ɔku tsiába.’ ²⁸Táme mí mú nde mli bláa mbée, oyingyíoyin ání olowun ɔtsi, ɔɔɔbwe mu klé lwi agywun á, alatɔ mbua dodo mu kluntɔ.

^c 5:22 Raka asi gyí “Ɔbwu!”

²⁹Mú su ní fú gyɔpi nsíbi tehá fútɔbwé lakpan á, loti mú le, tswi tsalífwí. Ibu aléá fú iwí ɔtineku má unu, dun ání bótswí fú nyankpusa-oyí ámu féé wá ɔsubutí ogyá ání utamaduntɔ. ³⁰Mú su ní fú gyɔpi ibi tehá fútɔbwé lakpan á, ka mú tswi tsalífwí. Ibu aléá fuma ibi kule, dun ání bótswí fú nyankpusa-oyí ámu féé wá ɔsubutí ogyá ání utamaduntɔ.

Ɔkákíná Iwí Atosunáhé

(Mateo 19:9; Marko 10:11-12; Luka 16:18)

³¹“Betrá bláa mli beɛ, ‘Ɖhagyíɔha ání obékiná ɔká á, ɔwánlun ɔkákíná ɔwulú ha mu asa.’ ³²Táme mí mú nde mli bláa mbée, ní oyin okíná mu ka ání ɔmɔkúdáli mu ɔma a, muláhá su ɔtsi ámu ɔbédali mu ɔma. Oyingyíoyin ání ɔtsiá ɔtsi ánti mu kulu lakíná mu anfi é latɔ mbua.

Ntamka Iwí Atosunáhé

³³“Mlilétrá nu ání bebláa mli anáin atutíɔ ámu beɛ, ‘Máka ntam kpaali. Mboún bwe dinka ntam amúú feka há Bulu ámusu.’ ³⁴Táme mí mú nde mli bláa mbée, máka tɔtɔtɔ kúrää. Mápɔ ɔsúsú ká ntam, tsúfé Bulu owíe obíá igyi. ³⁵Mápɔ ɔsulúv ká ntam. Bulu ayabi oyíkpa igyi. Mápɔ Yerusalem wúlu ká ntam. Awíetɔ Owíe wúlu kpɔnkpɔnti ní. ³⁶Mlumápɔ mli nwun ká ntam, tsúfé mluméetalí bwé imi kule futútú ntée bíbi. ³⁷Mboún fú ‘Iin!’ ibwée ‘Iin!’ Fú ‘Ó-o!’ é ibwe ‘Ó-o!’ Kugyíkvá fétrá blí tsíá mótɔ itsú Ɖbunsám wá.

Lalahe Ikwaka Iwí Atosunáhé

(Luka 6:29-30)

³⁸“Mlilanú ání beblí beɛ, ‘Ɖha obwíe mu ba nsíbi a, bubwíe mu é mu kle ka kwɔ. Ɖha ɔtsíi mu ba iyín é á, butsíi mu kle ka kwɔ.’ ³⁹Táme mí mú nde mli bláa mbée, mlímáklá ɔha laláhe. Mboún ní ɔha ɔdá fú ɔsvɔ á, damli nyɔɔsi é ha mu ɔdáa. ⁴⁰Ní ɔha dékléá ɔbésamáa fu, ho fú atadie á, pu fú tati é ha mu. ⁴¹Ɖhá ání ɔdun fu ɔhíe fú ɔbée, fúsóra mu atɔ máli kule ha mu a, svra mú máli anyɔ. ⁴²Ɖha ɔkúlí fú atɔ á, ha mu. Ní ɔku é ɔbée fupáan mu tɔku á, mákiná.

Alupódwe lwi Atosunáhé*(Luka 6:27-28, 32-36)*

43“Mlilónuá beblí beε, ‘Dwe fú bá, afulu fú olupú.’
 44-45Táme mí mú nde mli bláa mbée, mli dwe mli alupú.
 Mlibo mpái ha ahá ání budin mlisu, méni mlóbwe mli Sí
 á múú obo osúsú ámu abí. Tsúfé mutéhá owí telin, otehá
 nyankpu é itotswie wulí aha wankláán pú aha laláhe
 féésú. 46Ní fú adwepú nkule futodwé á, upán momu fénya?
 *Lampoo ahópu kúráá butobwé ali. 47Ní fú anyawie nkule
 futowá onó á, nto fakuku bwe dubi? Ali kén omátófo butobwé
 ní. 48Iní su mlifun fé alá mli Sí á múú obo osúsú ámu lófun.

Yilé bwe lwi Atosunáhé

6 1“Mluki wankláán ání mli móbwe mli yilé ahá ansító.
 Ní mlóbwe mú ali á, mli ménya ikoká mli Síá obo
 osúsú wá.

2“Mú su ní fóbwe yilé há ohíani á, máda mú okan fé
 alá apinabwebí abwepú butobwé Yudafo *ofiakpa pú dunsu,
 méni ahá békanfú amú. Onokwali nde mli bláa mbée, Bulu
 laká amú oko dodo. 3Táme ní fóbwe yilé há ohíani á, máha
 fú buna obo tóá gyopi labwé. Bwe mú náinto, 4méni fú Sí
 oklúnto ató owúnpu amu obéka fú oko.

Mpáibo lwi Atosunáhé*(Luka 11:2-4)*

5“Ní mlóbbo mpái á, mli mábwe fé apinabwebí abwepú.
 Amú tekle Yudafo ofiakpa pú dunsu lí bó mpái, méni
 ahá bówun amú. Onokwali nde mli bláa mbée, Bulu laká
 amú oko dodo. 6Táme ní fóbbo mpái á, bitíwíé fú obutótó,
 afufin obu wa lwi, bo mpái ha fú Sí náinto. Fú Sí náinto ató
 owúnpu amu obéka fú oko.

7“Ní mlidé mpái bo á, mli mátsiá plá mútó há mú iwa swí
 fé omátófo. Butosusu beε, ní bobó mú iwá swí asa Bulu obónu
 mú há amú. 8Mli mábwe fé amú, tsúfé mli Sí Bulu yín tóá ide
 mli hián asa mlidé mu kulí. 9Mú su mlibo mpái mlíaa,

‘Ani Síá fúbu ɔ́súsú.

Ahá bubúu fú dá.

10 Ba begyi iwíe.

Ahá bubwée fú apé ɔ́sulósu, fé aláá butɔ́bwé mú ɔ́súsú.

11 Ha aní atogyiheá íbófún aní nde.

12 Si aní lakpan kie aní,

fé aláá anitesíkíe ahá aní butɔ́pú ílá gyi aní.

13 Mákpa aní wá ísókító, mboún le aní tsu

ɔ́bunsám íbitó.’^d

14“Tsúfé ní mlesí ahá lakpan kíe amú á, mli Sí á mú ɔ́bu ɔ́súsú ámu é obési mli klé kíe mli. 15Táme ní mli mliésikíe ahá a, mli Sí ámu é oméesikíe mli.

ɔ́nókíe íwí Atosunáhé

16“Ní mli d́e *ɔ́nókíe á, mli mliábwe mli íwí búmbláán fé aláá aku butepina bwé. Aláá ahá bówun aní bude ɔ́nókíe sù butɔ́bwé íwí alí. ɔ́nókwalí nde mli bláa mbée, Bulu laká amú íkó dodo. 17Mboún ní mli d́e *ɔ́nókíe á, mli mbie ntsu, amlifunya nwan, 18ḿenú ahá bumóowun aní mli d́e ɔ́nókíe. Táme mli Sí oklúntó ató owúnpu amú mú obówun mli, ká mli íkó.

Atonyahé Puyáí ɔ́súsú

(Luka 12:33-34)

19“Mli mliákíe ató yáí ɔ́sulósu anífu. ɔ́tíné aní atéple butɔ́wí ató, íkó aná tɔ́wí nkanu yíntá, awikplu é butobwíe wíe obuto wí ató aní. 20Mboún mliákíe ató yáí ɔ́súsú. lnu mú á, atéple butamawí ató, ítamawí nkanu, awikplu é butamabwíe wíe obuto wí ató. 21Tsúfé ɔ́tínéá fú siadié bu a, unó fú agywun tetsiá.

Nyankpusa-oyí ɔ́kandíe

(Luka 11:34-36)

22“Ansíbi igyi ɔ́kandíe há nyankpusa-oyí. Ní fú ansíbi bu alé á, fú nyankpusa-oyí ámu féé bówankí. 23Táme ní

^d6:13 Ínì bu nwuló dada amu akotó: *Tsúfé fóbú iwíegyi, túmi pò iwíwanki bré féétó. Amen.*

fú ansíbi ma ale a, fú nyankpusa-oyí ámu fée ibu oklúnto. Ní ɔkandíe ámúú ibu futɔ ámu idun a, múmú fawíe oklún kɔnkpɔnkpɔntɔ.

Bulu Mwa Atonyahé Iwɪ Atosunáhé

(Luka 16:13; 12:22-31)

24“Ɔhaa méetalí súm awie anyɔ. Ɔbódwe ɔkule, lú ɔkule. Ntéé obóbu ɔkule, omóobu ɔkule. Fuméetalí súm Bulu, súm kɔba.

25“Mú sv nde mli bláa mbée, mli máhan iwɪ tɔ́a mlégyi, tɔ́a mlónu tsiá nkpa pú tɔ́a mlédídá sv. Mbée, nkpa medéhián dun atogyihé? Ntéé ɔyɔlúv medéhián dun atɔ didáhé? 26Mliki mbubwi, butamadú, butamasíétí wá ɔdantɔ, táme mli Sía ɔbu ɔsúsú tehá amú atogyihé. Mli má labi dun amú? 27Mliɔ ma ɔbétalí han iwɪ pú bré kpalobí tsiá mu nketo?

28“Ntogyi sú mli dé iwɪ háan mli atɔ didáhé sv? Mliki alíá putɔ-oyí ntswítswɪ tedan. Itamayɔ agyúmá ntée lú atati. 29Táme nde mli bláa mbée, Owíe *Salomo, mu inya féeɔ́t a, ɔmetalí híhie iwɪ, wá akíle fé oyí ntswítswɪ anfitɔ kuku. 30Ní Bulu dé ifá ání nde ulí, ɔke ulawú, bawá mú ogyá tati didá á, ntogyi sú ɔméetalí didá mli atati dun mú? Mli hógyi mɔtsɔ!

31“Mú sv mli máhan iwɪ fíté mli aa, ‘Ntɔ abégyi?’ ntée ‘Ntɔ abónu?’ ntée ‘Ntɔ abédídá?’ 32Íni aná ɔmátɔ́ɔ butesrí gya ni. Mli Sí ámúú ɔbu ɔsúsú ámu yin ání íni fée de mli hián. 33Itɔ́a mli gyánkpa dunka gyí, Bulu iwíegyi pú mu yilébwe, fówun Bulu ɔbɔpu íni fée tsiá mútɔ́ há mli. 34Mli másusúu ɔke iwɪ. Ɔketo asún igyi ɔke klé. Ekekegyíeketo asun wunhe ɔ́tɔ́ há eke ámu.

Ulále

(Luka 6:37-38, 41-42)

7 1“Mli mále ahá ulá, méni Bulu ɔméele mli ulá. 2Tsúfé alí ámúú mli dé ahá ulá le ámu a, alí Bulu ɔbéle mli ulá ní. Itɔ́a ɔpúsúsu ha fú bá á, mú kén Bulu ɔbɔpúsúsu ha fú é ní. 3Ntogyi sú fúde ipí túkúríbi wun fú bá nsíbisu, táme

fumedé ogyakpatín ání idun fú klésv mú wun? ⁴Ntée ntogyi sù fúde fú bá bláa fée, ‘Ha mí andínki ipí fú nsíbisu?’ bréá ogyakpatín dun fú klésv? ⁵Apinabwebí ɔbwepú! Gyankpa dínki ogyakpatín ámu fú nsíbisu, méni fówun ató wankláán, tálí dínki ipí ámu fú bá klésv.

⁶“Mlumápu Bulu atɔ wankíhé há ahá ání bugyi fé akíai, Bulu asón tamawá amú ogyá. Bénya ɔbló dámlí dun mli. Alí kén mlumápu mli abutó wulhe há ahá ání bugyi fé mprákuo ní. Tsúfé bétsatsáa músú, tsíá mú wá ɔdibatɔ.

Atókulí Tsú Bulu Wá

(Luka 11:9-13)

⁷“Mlikoli Bulu, ɔbéha mli. Mlidunka, mlówun. Mlida mu klunsv, obéfínki mú há mli. ⁸Tsúfé ɔhá ání ɔɔkúlí ató tenyá. ɔhá ání otodúnká ató towun. ɔhá ání ɔtedá klunsv bútefínki há. ⁹Ma búv mlitɔá mu bi ɔkúlí mu bodobodo a, obótsu íbwi wá mu ibutɔ? ¹⁰Ntée ní ɔkúlí mu iye a, ɔbékutá iwɔ wá mu ibutɔ? ¹¹Mli lakpan abwepú kúráá mlyin alíá butɔpú atɔ wankláán há mli abí. Ntogyi sù mli Sí ámuú ɔbu ɔsúsú ámu mú mɔɔpu atɔ wankláán há ahá ání bude mu kulí.

¹²“Bwe ha ahá alíá fudeklé fée bubwée ha fu. Íni Mose Mbli pú Bulu ɔnósú atɔípú amu atosunáhé deblí ní.

ɔkpa Kplanhe Múa Teíhé

(Luka 13:24)

¹³⁻¹⁴“Mlitsun ɔkpa kplanhe amusu, mlóyɔ nkpa ání utamatátó. Ahá kpalobí pé tebí mú. Táme ní mlɔtsun téíhé ámuú ibu atsúnle amusu á, mlóyɔ ɔhikpá. Ahá tsɔtsɔɔtsɔ tótson músú.

Oyí Pú Mú Abi Swiehé

(Luka 6:43-44)

¹⁵“Mliki wankláán ahá ání butɔwá afunu bée, Bulu ɔnósú atɔípú bugyisu. Butepina bwe iwí fé akúfa ba mli wá, táme nkpatakuá bubu iyin búgyi. ¹⁶Amú bwehé mlópubí amú. Butamakpótí kankaba okplóto oyísú, butamakpótí tsɔkpon é

tunkpa uflasu. ¹⁷Oyi wankláán toswié abi wankláán. Oyi laláhe é toswié abi laláhe. ¹⁸Oyi wankláán méetalí swié abi laláhe. Ali kén oyi laláhe é méetalí swié abi wankláán ní. ¹⁹Oyíá utamaswié abi wankláán á, kún butokun mú dá, wá mú ogyá. ²⁰Mú ali su á, ɔ́nósú atɔ́pú afunupu anfi bwehé mlópubí amú.

Bulu Iwíegýí Ámvtɔ Awiepú

(Luka 13:25-27)

²¹“Megýí ɔ́hagyíɔ́ha ání ɔ́tetí mí ɔ́bé, ‘Mí Wíé, mí Wíé’ obówie Bulu iwíegýí ámvtɔ. Mboún ɔ́há ání ɔ́ɔ́wé mí Sí ámúbú ɔ́bu ɔ́súsú ámu apé ɔ́ɔ́yɔ́ unu. ²²Bulu asún ogyíké amu a, ahá tsɔ́tsɔ́tsɔ́ béfité mí beé, ‘Mí Wíé, megýí fú dátó anuléblí Bulu ɔ́n asún, gya *ɔ́ɔ́e laláhe lé ahátɔ, bwé ofúla é ní?’ ²³Unu néle bláa amú mbéé, ‘Mmeyín mli ɔ́kpagyíɔ́kpasu. Mlinati teti mísú, mli lakpan abwepú!’

Butású pú Osublúto Obuyíi

(Luka 6:47-49)

²⁴“Mú su ɔ́hagyíɔ́ha ání olonu mí asun blíhé anfi, olegyi músú á, ogyi fé ɔ́tiansipɔ ɔ́kuá oleyi mu obu dínká butású. ²⁵Nyankpu lótswié, ntsu lóbulá wa mú, atsufú lótsun wulí músú, táme imobwie. Tsúfé oleyi mú dínká butású.

²⁶“Táme ɔ́hagyíɔ́ha ání olonu mí asun blíhé anfi, omegyi músú á, ogyi fé ɔ́ha mimláhe ání oleyi mu obu osublúto. ²⁷Nyankpu lótswié, ntsu lóbulá wá mú, atsufú é lótsun wulí músú. Obu ámu lobwie, ɔ́leda asi gbloo!”

Túmiá Yesu Bu

²⁸Bréá Yesu léblí asún ánfí tá á, mu atosunáhé leha ɔ́nó lobwie ɔ́ɔ́m amu. ²⁹Tsúfé olosuná amú ató túmisu. Omosuná mú fé Mose *mbla asunápú amu.

Ulo Pepe ɔ́lɔpú ɔ́ku Tsa

(Marko 1:40-45; Luka 5:12-16)

8 ¹Bréá Yesu lékplí tsú ɔ́bu ámussu á, ɔ́ɔ́m kɔ́nɔ́kɔ́nɔ́kɔ́nti bobuo mu. ²Unu á, *ɔ́lo pepe ɔ́lɔpú ɔ́ku

léba beda akpawunu mu ayabito, kókóli mu obée, “Owíé! Ní fótulá á, fétalí há mí wí béli.”

³Mú Yesu létunkí ibi da mu, bláa mu obée, “Natsúlá, fú wí uplí!” Inunu mu wí lépli. ⁴Mú Yesu léda mu olá obée, “Mábla ohaa asún ánfí. Nati laa afupu fú wí yosuná Bulu igyí ohapú, afuha mu wígyurátó amúb Mose mbla losuná tsú ilo pepetsa wí ámu. Igyi adánsie suna ahá ání fú wí laplí.”

Romafó Isá Akópú Ohande Osúmpú Oku Ilo Tsa
(Luka 7:1-10)

⁵Yesu lówie Kapernaum wúluto. Romafó isá akópú ohande oku léba mu wá, bóbwií ipa há mu obée, ⁶“Owíé, mí osúmpú délo. Alasin tsukole, oda wóyító ode iwosun wúun dubi.”

⁷Mú Yesu lébláa mu obée, “Néba betsa mu ilo.”

⁸⁻⁹Táme ohande amu lébláa mu obée, “Owíé, mmofun ání féba mí wóyító. Fú mú bli asvanku, wí bówa mí osúmpú amu onlun. Tsúfé mí é mbu ahande aku asi, isá akópú aku é bubu mí asi. Nelé onó mbée amútó oku onátí á, otenátí. Ní mbée obá é á, oteba. Tógyítóá nebláa mí osúmpú mbée obwée á, otobwé.”

¹⁰Bréá Yesu lónu asún ánfí á, onó lobwie mu, oledamí bláa ahá ámúb bubuo mu amu, obée, “Onokwali nde mli bláa, mmokówun oha ání obu hógyi kponkponi ánfí odu Israelfoto kúráá ku!” ¹¹Nde mli bláa mbée, “Ahá tsotsotsoto bótsu owí odalikpa pú owí okplíwíékpá ba, betsiá ató ogyíkpá Bulu iwígyí ámutó, amúa aní anáin *Abraham, *Isak pú *Yakob aná bówa ibi gyi ató. ¹²Táme béle Israelfo ámúb teki bugyi Bulu iwígyí ámutó atsiápú amu lé unu, tswi amú wá oklúntó. Inú isú múa kpisii bu ni.” ¹³Mú oledabláa isá akópú ohande amu obée, “Nati, ibá mótó ha fu fú hógyi onó.”

Ali bré ámutó pépéépé osúmpú amu wí lówa mu onlun.

Alapu Tsotsotsoto Tsa
(Marko 1:29-34; Luka 4:38-41)

¹⁴Yesu lóyo Petro wóyító. Oloyo á, owísó lakítá Petro mu sia tsíhé, oda. ¹⁵Mú oleyékutá otsi ámu ibi. Inunu owísó amu lókusú musu, olobwe Yesu afóto.

16 Mú ntúpwesu á, bɔpu ahá tsɔtsɔtsɔcá *ɔɲe laláhe dé amú háan ba Yesu. Ɖɔtɔí gya ɔɲe laláhe amu, tsá alɔpu amu féé. 17 Ɔni léha asún ámú *Bulu ɔnɔsú ɔtɔípu *Yesaia lébli ámu leba mútɔ. Ɖbéé, “Múlétsa anu ɔɔ, tsú ipian kúsú anusu.”

Ahá Ání Bɛ Bóbwe Yesu Abúopu

(Luka 9:57-62)

18 Yesu lówun ání ɔɔm babomlí mu, ɔlebláa mu *akasípu amu ɔbéé, “Mliha afa Galilea ɔpu yɔ mú ɔɔn.” 19 Ɔnu Mose mbla osunápu ɔku lébá mu wá, bebláa mu ɔbéé, “Osunápu, nóbuo fu yɔ ɔtínegyíɔtíneá fýɔ.”

20 Yesu lébláa mu ɔbéé, “Awíá bubu mbɔ, mbubwi é bubu asia, táme mí, Nyankpusa-Mu-Bi áni mú mma ɔtíneá nópu mí nwun tswi.”

21 Ahá ámú bubu mu amɔɔ ɔku lébláa mu ɔbéé, “Owíé, ha mí anyopulá mí sí asa ambobuo fu.”

22 Táme Yesu lébláa mu ɔbéé, “Bobuo mi, afusi awupu abupula amú afúli.”

Atsufú Asibá

(Marko 4:35-41; Luka 8:22-25)

23 Yesu lówie ɔklɔntɔ, mu akasípu amu é bowie buo mu. 24 Bréá bɔyɔ á, afú kɔɔnkɔɔnkɔntu ku lówa tsúun bi. Mú su ntsu deda wíé ɔklɔn amɔɔ, ideklé ɔme, táme Yesu mú da ɔɔɔɔɔɔ. 25 Akasípu amu betsinkí mu, bláa mu bɛɛ, “Anu Wíé le anu. Anidé ntsu wie!”

26 Mú ɔlefuté amú ɔbéé, “Ntogyi sú mlidé ifú nya ali? Mli hógyi ɔtɔsɔ!” Ɔnu ɔɔkɔsú lé ɔnɔ wa afú múa ntsu ámu, unu féé ɔɔɔɔ.

27 Ifú lehie kítá amú, befuté aba bɛɛ, “Nyankpusa ɔmɔmu ni, afú múa ntsu kúráá tonú mu ɔme ali?”

Ɖɲe Laláhe Gyáa Le Agbedépu Abanyótɔ

(Marko 5:1-20; Luka 8:26-39)

28 Bréá Yesu lówie Galilea ɔpu ɔɔn, Gadarafo ɔsulúsu á, ayin abanyót akuá ɔɲe laláhe bu amótɔ bedali tsu afúli

opulákpá befia mu. Amú iyin su ɔhaa tamatálí tsun ɔkpa ámusu. ²⁹lnonu bɔkplón fité Yesu beɛ, “Bulu mu Bi, amansu igyi? Febá beputí anɪ atɔ asa Bulu ɪsɔbitíbu ɪfɔn?”

³⁰Mprákuo tsɔtsɔɔtsɔ aku budegyí unu fún. ³¹Mú su ɔɛ laláhe amu bokokóli Yesu beɛ, “Ní fégya anɪ lé ahá ánfɪtɔ á, ha ayowie mprákuo ánfɪtɔ.”

³²Yesu lébláa amú ɔbéɛ, “Mhɔɔ.” lnonu bedali ayin ámutɔ yówie mprákuo ámutɔ. Amú féé besrí kplí okúku ku wíé ɔpu amutɔ, wúwu.

³³Mprákuo ámu akpapú besrí yɔ wúlutɔ, yébláa ahá tógyítɔá ulaba ahá ámúú teki ɔɛ laláhe bu amúú ámusu. ³⁴Mú su wúlu amutɔ ahá féé bedali ba Yesu wá. Bréá bowun mu a, bokokóli mu beɛ, ɔdálɪ amú ɔsulúsu.

Tsukule Osínpu Tsa

(Marko 2:1-12; Luka 5:17-26)

9 ¹Mú su Yesu léyinkí wíé ɔklvntɔ, fá ɔpu amu yɔ wúlu amúú otsie mútɔ ámusu^e. ²lnu á, aku bɔsɔrá tsukule osínpu akpasu ba mu. Bréá Yesu lówun ání bahɔ mu gyi a, ɔlebláa tsukule osínpu amu ɔbéɛ, “Mí bí, klun idí fú asi. Nasí fú lakpan kíé fú.”

³lnu Mose *mbla asunápú akvá butsie unu, beblí wá nwuntɔ beɛ, “Oyin ánfɪ labɔ mbusuo.”

⁴Yesu lébi amú agywun. Mú su ɔlefíté amú ɔbéɛ, “Ntogyi sù mlidé inu odu gywún? ⁵Mɔmu bówa ablílé dun? ‘Nasí fú lakpan kíé fú.’ ntéé ‘Kusu tsu fú akpa afunati?’ ⁶Táme ndekléá mlibú ání mí, Nyankpɔsa-Mu-Bi ánfɪ mbu túmi ɔyí ánfɪtɔ sí ahá lakpan kíé amú.” lnu ɔlebláa tsukule osínpu amu ɔbéɛ, “Nde fú bláa mbéɛ, kusu. Tsu fú akpa afunati yɔ wóyítɔ!”

⁷lnu ɔɔkɔsú náti yɔ wóyítɔ. ⁸lnu lówa amú féé wánwan, bekanfú Bulu ání alapú túmiá igyi alɪ há anyánkpɔsa.

^e9:1 Mu wúlu gyí Kapernaum. Kɪ 4:13.

Mateo Ti*(Marko 2:13-17; Luka 5:27-32)*

⁹Bréá Yesu lópu ɔ́y á, olowun *lampóo ɔ́hópu ɔ́kuá butetí mu Mateo tsie lampóo ɔ́hókpa. Múy ɔ́lebláa mu ɔ́béé, “Bobuo mi.”

lnunu Mateo lókusú buo mu.

¹⁰Mateo létí Yesu mua mu akasípú ató ogyíkpá mu wóyító. Lampóo ahópu pú lakpan abwepú tsɔtsɔɔtsɔ beba ató ámu ogyíkpá. ¹¹*Farisifo ámu benya wun amú alí, befíté mu akasípú amu beé, “Ntogyi sù mli osunápú mua ahá ánfí odu butɔwá íbí gyi ató?”

¹²Yesu lónu asún ánfí, ɔ́lebláa amú ɔ́béé, “Alɔpu léhián ílɔ ɔtsapú, megyí ahá ání íwí bu amú ɔnlín. ¹³Mliyo amliyefíté Bulu asún ánfí bɔwanlín tswí anfi así. Beé, ‘Nwewúun ntekle, megyí igyíha.’ Mmɛba aha wankláán ɔtikpá, lakpan abwepú ɔtikpá neba.”

Ɔnókí lwi Asun Futéhé*(Marko 2:18-22; Luka 5:33-39)*

¹⁴Ɛke ɔku Asú Ɔbɔpú Yohane akasípú beba Yesu wá befíté mu beé, “Ntogyi sù ania Farisifo *anuteklí ɔnó, táme fú akasípú mú butamaklí ɔnó?”

¹⁵Yesu léle mú ɔnó ɔbéé, “Ɖtsi ɔkpaínpú anyawíeá bobu mu wá bégyi awírehɔ? Ɛkekeke! Táme Ɛke ku béba ání békpa ɔká ɔtsiápu amu náti sí amú. Alí nke ámutɔ béklí ɔnó ní.”

¹⁶“Ɖhaa tamapú tati pɔpwe tan tati dada. Tsúfé tati pɔpwe amu békpikpú tsíí dáda amu ku lé, há ɔtánkpa unu bélatéí tsía. ¹⁷Alí kén butamapú nta pɔpwe wá ɔwulú-kpákpá kente wuhétó ní. Nta pɔpwe amu íbófu fá kente amu, tsítsá, íbéyintá kente amu é. Íni su ɔwulú-kpákpá kente pɔpwetɔ búɔpú nta pɔpwe wá, méní mú anyɔ ámu féé bétsiá.”

Ɖhande Ɖku Mu Bi Mva Ɖtsi Ɖku Ílɔ Tsa*(Marko 5:21-43; Luka 8:40-56)*

¹⁸Bréá Yesu détoí á, Yudafɔ *ofíakpa ɔhande ɔku léba beda akpawunu mu ayabitɔ, kókóli mu ɔbéé, “Mí bí tsíhé

lawú sésééséi, táme ba afubɔpu ibi dínka musu onya nkpa.”

¹⁹Mú su Yesu lókúsvú, mua mu akasípú bobuo ɔhande amu.

²⁰Ɔtsi ɔkuá obugya de mu wulí nfi dúanyɔ ní lótsun yɔ Yesu ɔma, pú ibi da mu tati osiebí. ²¹Tsúfé ɔleblí wá mu nwunto ɔbéé, “Ní nɔpú ibi da mu tati kpán á, ɔlɔ bési mí.”

²²Yesu lédamlí kɪ mu, bláa mu ɔbéé, “Mí bí, klun ɪdí fú asɪ. Fú hógyi latsá fú ɔlɔ.” Inonu ɔtsi ámu ɪwɪ lówa mu ɔnlun.

²³Bréá olowie ɔhande amu wóyítɔ a, olowun ɪkpe afulípú, nú awɪrehɔ agyípú amu okitikíti. ²⁴Olegya amú ɔbéé, “Mlɪdalɪ nfi! Otsibi amu mókúwú, didí ɔde.” Ahá ámu ɔmɔsɪ mu. ²⁵Bréá amú fée bedalɪ ba wunsunésú a, Yesu lébitíwíé obu ámú ɔtsibi amu da mútɔ ámutɔ yéktá mu ibi, ɔlɔkúsvú. ²⁶Asún ánfɪ lékleí wá ɔmá ámutɔ fée.

Ansibi Abwiepú ɔlɔ Tsa

²⁷Yesu lédalɪ ɔyɔ á, ansibi abwiepú abanyɔ aku bobuo mu, bude okitikíti surá kpólí mu beɛ, “Owíé *Dawid mu na, wun anɪ nwe!”

²⁸Bréá olowie wóyítɔ a, ansibi abwiepú ámu beba mu wá. Yesu léfité amú ɔbéé, “Mlɪlahogyi mlɪaa, nétalí há mlɪ ansíbi bóbwií?”

Bele mú ɔnɔ beɛ, “Anɪ Wíé, Ee!”

²⁹Mú ɔlɔpu ibi dada amú ansíbi, bláa amú ɔbéé, “ɔbá mútɔ ha mlɪ, mlɪ hógyi ɔnɔ.” ³⁰Inu ɔɔwa atɔ wun bɪ. Yesu léda amú ɔlɔ ɔbéé, bumábláa ɔhaa.

³¹Táme bréá bedalɪ ɔyɔ á, beda mu ɔkan ɔmá ámu féeɔtɔ.

Omúmu ɔlɔ Tsa

³²Benya nátí alɪ, ɔɔpu oyin ɔkuá *ɔɔɔ laláhe bu mutɔ, su alatɔ omúmu ba Yesu. ³³Olenya gya ɔɔɔ laláhe amu lé oyin ámutɔ alɪ, ɔlɔwa tɔí bɪ. Ahá ámu fée bowun, su ɔnɔ lobwie amú. Mú su beblí beɛ, “Anɪmókúwun ínɪ odu Israelfɔtɔ kɪ!”

³⁴Farisifɔ ámu beblí beɛ, “ɔɔɔ laláhe owíé túmɪ ɔdepuɔɔya ɔɔɔ laláhe lé ahátɔ.”

Ahá Nwewúun

³⁵Yesu léki awúlu pú nkuda fée asi, súná ató Yudafó ofiákpa. Ɖleda Bulu iwíegyí ámu iwí *asun wankláan ɔkan. Ɖletsá uló kugyíku fée. ³⁶Bréá olowun ɔdɔm amu a, amú asún lówa mu nwe. Bugyi fé akúfa ání buma ɔkparú, tsúfé asún de amú háan, buma tɔtɔ bwetó. ³⁷Mú su ɔlebláa mu akasípú ɔbéé, “Ató kpótíhé amu itsɔ, táme mú akpótípú bumɔtsó. ³⁸Mú su mlíkokoli ndɔ mu wie, ɔwa ató akpótípú tsɔtsɔ abuba bɔkpótí ató ámu.”

Akasípú Amu Adá

(Marko 3:13-19; Luka 6:12-16, 9:1-6)

10 ¹Yesu létí mu *akasípú dúanyɔ ámu, ɔleha amú túmi ání bugyíi ɔhe laláhesu. Bugyáa amú lé ahátɔ, abutsa uló mba iwɔsun kugyíku. ²*Sumbí ayɔpú dúanyɔ ámu adá ní: Ogyankparu gyí Simon ání butetí mu Petro mua mu pio Andrea. Yakobo mua mu pio Yohane ání bugyi Sebedeo abí; ³Filipo, Bartolomeo, Toma, *lampóo ɔhópu Mateo, Alfeo mu bi Yakobo, Tadeo, ⁴Simon ání ogyi iwisutsiá adunkápú ɔpasuato ɔha pú Yuda Iskariot ání ɔlele Yesu há.

Akasípú Dúanyɔ Ámu Sumbíwa

(Marko 6:7-13; Luka 9:1-6)

⁵Ɖɔwa *sumbí ayɔpú dúanyɔ ámu sísí, wá mbla há amú ɔbéé, “Mlumáyo ahá ání bumegyí *Yudafó ɔsulúv pú *Samariafó awúlu kukusu. ⁶Mboún mliɔ Israelfó wá. Bugyi fé akúfa ání bafwí. ⁷Ní mliɔy á, mlída asún ámu ɔkan mlíaa, ‘Bulu iwíegyí amu lawíé wóyí tá.’ ⁸Mlitsa uló, amlitsinki afúli. Mlitsa *uló pepe alɔpú, amligya ɔhe laláhe le ahátɔ. Mlumáhɔ amú tɔtɔ. Mlúbwe mú pukie amú, fé alá napúkíé mlí. ⁹Mlumátsu sika kukuuku wá mlí akentetɔ. ¹⁰Mlumátsu akpankogyo ání mlópu ató wá mútɔ há ɔkpa ámu tu. Mlumátsu atadie nyɔɔsi, ntukuta pú oyi yíahé. Tsúfé agyómá ɔyɔpú butehá atogyihe.

¹¹“Ní mliɔyɔswí wúlu kugyíkusu á, mlíduka ɔha wankláan, amliswu mu wá. Mlitsia unv kpɛfun ekeá mlénatí.

12-13 Ní mlowié wóyító unu á, mliha amú itsiá mlihaa, ‘Bulu ɔhá mli iwilwii.’ Ní wóyí ámutɔfɔ bɔhɔ mli á, mli oyúla amu isín amúsú. Táme ní bumɔhɔ mli á, múmú mli oyúla amu isánki ba mli su. 14 Ní bumɔhɔ mli, ntée nú mli asún á, mlidali wóyí ntée wúlu amutɔ, amlɔkpakpa mli ayabito-isi wuli unu. 15 Ɖnɔkwali nde mli bláa mbée, Bulu ɔbébutí amú isu dun Sodom múa Gomorafɔ mu asún ogyíké amu.”

Ɔwɔsun Ání Ibéba Sumbí Ayɔpú Ámusu

(Marko 13:9-13; Luka 21:12-17)

16 Ɖletrá bláa amú ɔbé, “Mlibi ání nde mli wa fé akúfa ání bɔyɔ nkpatakutɔ. Mlifwifwi ansí fé awɔ, amlha mli iwɔ itun fé abróɔuma. 17 Mliki mli iwɔ wankláán anyánkɔpúsasu. Tsúfé békítá mli ya asún ogyíkpa, nwén mli ató amú *ofiakpa. 18 Mí su békpa mli ya ɔmású agyípú pú awie ansító, méni mlégyi mí iwɔ adánsɛ súná amúa ɔmátófɔ. 19 Ní bekítá mli ya a, mli mágywíun asún ání mléblí pú alá mléle mú ɔnɔ. Bópu asún ání mléblí bré ámutɔ wá mli ɔnɔ. 20 Tsúfé megyí mli ɔbótɔí. Mli Sí Ɖɔé ámu ɔbótɔí tsun mli su.

21 “Apíó béle amú apíó há lowu. Abí así béle amú abí há. Abí é bókusú líí amú akwípúsu, há bómo amú. 22 Mí su ahá féé bólu mli, táme ní mlétalí wá klɔn líí kínkíinkín yɔfun mú ɔnɔmo á, Bulu ɔbɔhɔ mli nkpa. 23 Ní budun mli su wúlu kutɔ á, mli sɔrɔ yɔ wúlu bámbátó. Ɖnɔkwali nde mli bláa. Mli méeki Israel awúlu amu féésú tá asa mí, Nyankɔpsa-Mu-Bi ání náyinkí ba.

24 “Okasípú tamadun mu osunápú. Osúmpú é tamadun mu wie. 25 Ibwá alé ní ɔkasípú ɔbɔbwe fé mu osunápú, osúmpú é ɔbɔbwe fé mu wie. Ní batálí bude wóyí mu wie amu ti bee, ‘Ɖbunsám’ ntée ‘*Beelsebul’ a, múmú ida laláhe mɔmu bumɔɔputí mu wóyító atsiápú mú?

Ɖhá Ání Abénya Ifú

(Luka 12:2-7)

26 “Táme mli mánya ifú. Tɔtɔ má unvá babun ató músú ání bumóobwíí músú. Tógýító é ma unvá ileŋain ání iméelin

ɔwan. ²⁷Ní nelé ató súná mli onyé á, mlikplun bli mú ɔpa. Mluda asún ání nébláa mli nklobító é ɔkan. ²⁸Mlumánya nyankpusa ifú. Ɖbétalí mós mli ɔyulúv, táme ɔméetalí mós mli ɔkláa. Mboún ɔhá ání mlunyá ifú gyí Bulu. Mu ɔbétalí yíntá ɔyulúv múa ɔkláa amu féé usbutí ogyá ání itamaduntó. ²⁹Megyí káple butefé akénsire anyɔ kéké? Táme amútó ɔkuku tamakpádá ɔsulúv ání mli Sí ámu méyín mú wí. ³⁰Tsúfé Bulu yin mli nwunsv-imi kóráá klátó. ³¹Mú sv mlumánya ifú, tsúfé mlibu ibiá dun akénsire tsɔtsɔtsɔ.”

Adánsiegyí Pú Asónkiná

(Luka 12:8-9)

³²“Ní ɔku létalí gyi mí wí adánsie ahátó á, mí é négyi mu wí adánsie súná mí Sí ɔsúsú. ³³Táme ní ɔku lékiná mí ahátó á, mí é nékiná mu mí Sí ansító ɔsúsú.

Ipián Yesu Lóɔɔba, Megyí Iwilwii

(Luka 12:51-53; 14:26-27)

³⁴“Imábwe mli fé iwilwii ɔɔɔba ɔsulúv anftsu. Megyí iwilwii, mboún ɔdayí ɔya anyɔ ɔɔɔba. ³⁵Tsúfé abi yinhé múa amú así nsiné báyintá. Abi tshé múa amú ayín é nsiné báyintá. Osia tshé múa mu sia tsíhényɔ é nsiné báyintá. ³⁶Ɖha alupú bótsu mu wóyító.

³⁷“Ɖhá ání ɔtɔdwé mu si ntée mu yin dun mi mófun ání ɔbɔbwe mí ɔkasípú. Ɖhá ání ɔtɔdwé mu bi tsíhé, ntée mu bi yinhé dun mi é mófun ání ɔbɔbwe mí ɔkasípú. ³⁸Ɖhá ání omotsu mu *oyikpalíhe bobuo mi é mófun ání ɔbɔbwe mí ɔkasípú. ³⁹Ní ɔku léprí mu nkpa á, ɔbɔhulí mú. Ní ɔku é lɔhulí mu nkpa mí sv á, obénya mú.

Yilébwe Iwí Ikwá

(Marko 9:41)

⁴⁰“Ɖhá ání ɔlɔɔ mli laɔɔ mu. Ní ɔku lɔɔ mu é á, alahó mí Sí ámúv ɔlɔɔa mí ámu. ⁴¹Ní fɔɔ *Bulu ɔnósú ɔtɔípú ɔfɔv á, Bulu ɔnósú ɔtɔípú oyúla fénya. Ɖhá ání ɔlɔɔ yilé ɔbweɔv é ɔfɔv obénya yilé ɔbweɔv oyúla. ⁴²Ɖnɔkwali nde mli bláa.

Ɔhagyíɔha ání ɔleha mí *akasípúɔ ɔkusv kúráá ntsu-owebi ɔɔ olonu a, ɔmóɔhulí mu ipán.”

Yesu Mva Asú Ɖɔɔpú Yohane

(Luka 7:18-35)

Mat

11 ¹Bréá Yesu lópu agyómá ánfí wá mu akasípú dúanyo ámu ibitɔ tá á, ɔɔɔyɔ yéki Galilea awúlusu, súná ahá ató, dá asún ámu é ɔkan.

²⁻³Asú Ɖɔɔpú Yohane da obu, olonu *Kristo bwehé. Mú sv ɔɔwa mu akasípú abanyó sísí Yesu ɔbéé, buyéfité mu bée, “Fúgyí ɔhá ámuú ɔbéba amu ni, ntée akí ɔha bambá ɔkpa?”

⁴Yesu lébláa amú ɔbéé, “Mlyinki yebláa Yohane asún ání mlɔlabonu pú atɔ́á mlɔlabowun. ⁵Mlɔlabowun ání ansibi abwiepú buɔe ató wun, abɔ buna. *Uɔ pepe alɔpú iwí deplí. lsv atínpu buɔe asún nu. Afúli budetsinkí, ahíánfɔ é buɔe *asun wankláán ámu nu. ⁶Bulu obóyulá ɔhá ání mí bwehé mɔkusú líí musv.”

⁷Bréá Yohane akasípú ámu beyinkí ɔyóy á, Yesu lówa tɔí tsú Yohane iwí súná ɔɔɔm amu bi. Ɖbéé, “Bréá mlɔléɔalɔ yɔ *dimbísu inu á, ntɔ ɔkíkpa mlɔlɔyɔ? Fítáa ání afú de mú tsúvun lóó? Ekekeke! ⁸Ní megyí mú á, ntɔ kóún ɔkíkpa mlɔlɔyɔ? Ɖhá ání ɔɔɔdíd ntsrim? Ekekeke! Awíe wóyí atati ámu odu adídápú butetsiá. ⁹Mlɔbla mí! Bulu ɔnɔ́sú ɔɔɔpú mlɔléɔalɔ yéki? Ee, Yohane ni. Ɖɔvun Bulu ɔnɔ́sú ɔɔɔpú. ¹⁰Mu iwí asún Bulu léblí ɔɔwanlín mú tswi bée, ‘Kí, nde obí wa gya fu nkpa. Mu ɔbéla ɔkpa há fú ní.’ ¹¹Ɖnɔkwali nde mlɔ bláa mbée, ɔhagyíɔha ání ɔha tsihé laken kwí mófɔn Asú Ɖɔɔpú Yohane, táme mu é ɔmɔfɔn Bulu iwíegyi ámuɔ ɔkusv kúráá. ¹²Tsú Yohane brésú ɔɔvun nde á, ahá buɔe Bulu iwíegyi ámu prí ɔwunlínú. Awunlínú buɔe mú prí. ¹³Tsúfé Bulu ɔnɔ́sú atɔ́pú amu pú Mose Mbla ámu ɔɔvun Yohanesu féé ɔɔvú tsú Bulu iwíegyi ámu iwí. ¹⁴Ní mlɔhɔ asún ámu gyi a, múmú mlébi ání mugyi *Elia. Mu ɔbéba ni. ¹⁵Ɖhá ání ɔvun asu onúu.

¹⁶“Séi ánfí á, amendi nɔ́pu ndemba-abí ánfí kápú? Bugyi fé nyebíá butsie dinsv buɔe aba kpolí, ¹⁷blí bée, ‘Anɔlpléí

ansigyísú, mlimétsa. Mú su anlalá wá awireho ulu, táme mlimósu.’ 18Mligyí fé nyebí ánfí, tsúfé Yohane léba á, oletsíá klí ɔnó, omonu ntá, táme mliaa, ‘Ōŋe laláhe bu mutó!’ 19Táme mí, Nyankpusa-Mu-Bi ánfí mú naba nde ató gyí, nde ntá núu. Mú é mliaa, ‘Mlíki opotsuapu pú nta ɔbɔpú, lakpan abwepú pú *lampóo ahópú onyawíe.’ Táme Bulu ɔha tsiátó telé mu nyánsa ɔwan.”

Ahá Ání Bumedamlí Kluntɔ Asúngyí

(Luka 10:13-15)

20Yesu lópu ɔbló tóí tsú awúlu aku iwí. Awúlu amvá ɔɔbwe ofúla akpɔnkpɔnti mútó, táme bumedamlí kluntɔ ámu. 21Ōbéé, “Korasinfo, mligyɔwi. Betsaidafɔ, mligyɔwi ní. Ní Tiro pú Sidon awúlu laláhe amutɔ nɔbwe ofúla akpɔnkpɔnti ánfí nɔbwe mlitɔ á, teki bedamlí kluntɔ dododo. Teki buda akpekpetɔ, bakpá nsúó wá nwuntɔ púsúná ání badámli kluntɔ. 22Mlíbi ání Bulu ɔbébutí mlí isu mu asún ogyíké dɔn Tiro múa Sidonfɔ. 23Mlí Kapernaumfɔ, mlídeklé mliaa mlótsu iwí fúá alu yówo ɔsúsú? Ekekeeke! Bulu ɔbéba mlí así yówie afúlitɔ. Tsúfé ní Sodom wúlutɔ nɔbwe ofúla akpɔnkpɔnti ánfí odu á, teki wúlu amu itráa bu unu ɔɔtu nde. 24Mlíkaín ání Bulu obówun Sodomfɔ nwe asún ogyíké amu dɔn mlí.”

Mlíbeda Ɔkpúnú Mí Wá

(Luka 10:21-22)

25Alí bré ámutɔ á, Yesu lóbo mpáí blí ɔbéé, “Mí Sí, ɔsú mu así Owíé! Nedá fú ipán ání falé tóá fɔpuŋáín anyansapu pú asún abípú ɔwan súná ahá ání bumeyín ɔlala, bugyi fé nyebí. 26Ee, Mí Sí! Alí fudeklé fɛe íbá mútó ní.”

27“Mí Sí lópu tógyító wá mí íbutɔ. Ɔhaa méyín Obí ámu, nkéti Ɔsí ámu nkule. Ɔhaa méyín Ɔsí ámu é, nkéti Obí ámu pú ɔhá ání Obí ámu latsúlá ání ɔbéle mu súná mu.”

28“Mlíba mí wá, mlí ahá ání ilapíán mlí, mlí atɔ suráhé de mlí dúɔn. Néha mléda ɔkpúnú. 29Mlíba iwíasi ha mí, amlusuan mí, tsúfé neba iwíasi, nolwíí, méní mlénya iwílwíi.

30Tsúfẹ mí wá tsiá bu atsiálé. Mí ato suráhé é mójodun mli surá.”

Ɔkpónú Ɔdaké Mu Wie
(Marko 2:23-28; Luka 6:1-5)

Mat

12 ¹Yesu mua mu akasípú bɔtsun ayó ndɔ kutɔ *ɔkpónú ɔdaké. Akún de akasípú amu, su bɔpusáa ayó ámu ku wí. ²Farisifɔ aku bowun amú, bebláa Yesu beɛ, “Kí, fú akasípú amu buɔde tɔ́a mbla meha ɔkpa bwe ɔkpónú ɔdaké!”

³Yesu léfité amú ɔbéɛ, “Mlumókúkla nu tɔ́a Owíe *Dawid lɔ́bwe bréa akún de mua mu abúopu kí? ⁴Olebitíwíé Bulu osúmka yótsu bodobodoá bapúhá Bulu igyí ba, mua mu abúopu amu begyi. Bulu igyí ahapú nkule beha ɔkpa, butegyí alí bodobodo amu. ⁵Mlilakla Mose Mbla, nú ání Bulu igyí ahapú ámu butɔ́yɔ́ agyómá *Bulu ɔtswékpa unu ɔkpónú ɔdaké, táme butamahá amú ipón. ⁶Nde mli bláa mbéɛ, ɔhá ání ɔɔun Bulu ɔtswékpa amu búv nfi á. ⁷Bulu asún lɛblí ɔbéɛ, ‘Nwewúun ntekle, megyí igyíha.’ Ní mlyin mú asi á, teki mluméeha ahá ántfi amú asún da ɔkpa ántfi ipón. ⁸Tsúfẹ mí, Nyankpusa-Mu-Bi ántfi gyí ɔkpónú ɔdaké mu wie nu.”

Uɔtsa Ɔkpónú Ɔdaké
(Marko 3:1-6; Luka 6:6-11)

⁹Yesu lénatí unu, ɔɔyɔ́ Yudafɔ ofiákpa. ¹⁰Olowun oyin ɔkúá mu ibi kule lawú unu. Farisifɔ ámu buɔde Yesu tée. Mú su befité mu beɛ, “Mbla leha ɔkpa ání butsáa ulɔ́ *ɔkpónú ɔdaké?”

¹¹Múú Yesu léfité amú ɔbéɛ, “Ní mliɔ ɔku bu kufa, alakpáda wíé ibúntɔ́ ɔkpónú ɔdaké á, ɔméele mu? ¹²Yée nyankpusa bu labi dun kufa a? Mú su mbla leha ɔkpa ání ɔha ɔbɔ́bwe yilé ɔkpónú ɔdaké.” ¹³Múú ɔlebláa oyin ámúú mu ibi lawú ámu ɔbéɛ, “Tɔ́nki fú ibi amu.”

Olenya tɔ́nki mú alí pé, ɔhé lowie mútɔ́ fé nyɔ́ɔsi amu. ¹⁴Táme mú ó á, Farisifɔ ámu bedalí yékitá agywun alíá bɔ́bwe bómu Yesu.

Osúmbi Ání Bulu Léle

15 Yesu lébi amú agywun. Mú su ɔlenatí unv. Ɖɔɔm bobuo mu, ɔletsá amú́tɔ́ alɔpu féé ulɔ. 16 Mú́ ɔleda amú ɔlá ɔbéé, bumáha ahá abubi mu. 17 Ínu léha asún amú́ Bulu ɔnósú ɔtɔ́pú *Yesaia léblí yáí ámu léba mútɔ́ ní. 18 Ɖbéé,

“Kí, mí osúmpóá nalé ní.

Ntɔdwé mu, mi ansí tegyi mu iwɪ.

Nópu mí Ɖɛ Wankíhé wá mutɔ.

Ɖbébláa ɔmátɔ́fɔ ɔbéé, ‘négyi amú asún ɔnɔkwalsu.’

19 Omégyi nwéén, ɔmɔ́ɔkplún.

Ɖhaa móonu mu ɔnɔ brɔnusu.

20 Obénya klun há ahá ání amú hógyi ɔnɔ ma ɔnln, bábwé fé oyíá ɪlatá bia tá.

Ɖbówa awɪtɔle há ahá ání buma ɔwunlín,

bábwé fé ɔkandíéá nfo latá mútɔ́,

yɔ́fun bréá bébi ání ntegyi asún ɔnɔkwalsu.

21 Ahá ání bumegyí Yudafo bópu ansí dínká musu.”

Yesu Mva Beelsebul

(Marko 3:20-30; Luka 11:14-23)

22 Inu bɔpu oyin ɔku ba Yesu, ɔɛ laláhe bu mutɔ. Mú su ɪleha mu ansíbi lobwie; álatɔ́ omúmu é. Yesu létsa mu ulɔ, ɔde atɔ́ wúun, ɔdetɔ́í é. 23 Ɖnɔ́ lobwie ahá ámu féé, befité beé, “Megyí Dawid mu na ámu ni?”

24 Táme Farisifo ámu bonu asún ánti á, beblí beé, “Ɖɛ laláhe owíe *Beelsebul túmi ɔdepuɔɔya ɔɛ laláhe lé ahátɔ.”

25 Yesu lébi amú agywun. Mú su ɔlebláa amú ɔbéé, “Iwíe ogyíkpá ání ɪlaye anyɔ, buɔe aba kɔ bédɪda. Alí kén wúlu ntée wóyí oduá mútɔ́ atsiápú buɔe aba kɔ é itobwíé ní. 26 Mú su ní Ɖbunsám dé mu iwɪ gyáa a, mu iwíegyí bédɪda. 27 Ní Beelsebul túmi ndepuɔɔya ɔɛ laláhe lé ahátɔ á, mómú ma túmi mli abí é buɔepuɔɔya ɔɛ laláhe lé ahátɔ? Mli abí ámu onutó obégyi mli asún. 28 Táme ínúá Bulu Ɖɛ ndepuɔɔya ɔɛ laláhe su á, mliabi ání Bulu iwíegyí ámu laba mli wá dodo.”

29 Ɖhaa méetalí wíe ɔwunlínpu wóyító yókulá mu ató, nkéti alagyankpá kíklí mu tswi, asa ɔbétalí kúlá mu ató fée.

30 Ɖhá ání omobuo mi dé mí lu. Ɖhá ání ɔmedé mí tsa akpa ahá ba Bulu é dé amú gyáa teía mi. 31 Ínu su nde mli bláa mbée, Bulu obési ahá lakpan pú abususu kugyíku kíe amú. Táme ní ɔku ɔblí *Ɖɔɔe Wankíhé amu iwí abususu a, Bulu méesikíe mu ekekeke. 32 Ní ɔku léblí mí, Nyankpusa-Mu-Bi ánti é iwí asun laláhe a, Bulu ɔbétalí sikíe mu. Táme ní ɔku léblí Ɖɔɔe Wankíhé amu iwí asun laláhe mú á, Bulu méesikíe ɔhá ámu nde ɔyi kehe, ntée bré ámúú íbá ámutó.

Tsiátó Itsú Ukluntó

(Luka 6:43-45)

33 Oyi abí butɔpúbí mú. Oyi wankláán toswié abi wankláán. Oyi laláhe é toswié abi laláhe. 34 Mli awɔ abí-aná! Nkáli mli aha laláhe mlétalí blí asun wankláán? Tsúfé tóá idun ɔha klun a, mútédálí tsu mu ɔnó. 35 Ɖha wankláán teblí asun wankláán tsú mu kluntó, ɔha laláhe é teblí asun laláhe tsú mu kluntó.

36 Nde mli bláa mbée, ɔhagyíɔha ɔbéle asun laláhe kugyíkúá ɔleblí ɔnó Bulu asún ogyíké amu. 37 Tsúfé ɔha asun blíhé Bulu ɔbópohá mu asu ntée ipón.

Bodunká Ofúla

(Marko 8:11-12; Luka 11:29-32)

38 Múú Farisifo pú Mose mbla asunápú amu aku bebláa Yesu bee, “Osunápú, anidéklé aníaa fubwée osúna ku suna aní.”

39 Ɖlebláa amú ɔbéé “Mli ndemba-abí laláhe ání mliladálí Bulu ɔma. Mlidé osúna dunká amluwun, táme mluóowun kukukukú dun Bulu ɔnósú ɔtɔ́pú *Yona osúna amu. 40 Alí ámúú Yona létsiá bonsu iwíto nkensá, ɔpa múa onyé ámu a, alí mí, Nyankpusa-Mu-Bi ánti é nétsiá ɔsulúú ɔtɔ́tɔ́ nkensá, ɔpa múa onyé ní. 41 Niniwefo é bókusú Bulu asún ogyíké amu, há mli ndemba-abí ánti ipón. Tsúfé bréá Yona léda

Mú su ɔɔɔwú wíé ɔkluntɔ, yétsiá ɔpu amusu, ahá ámu é bulí ɔpu ɔnɔ nu. ³Lnu olosuná amú atɔ tsɔtsɔɔtsɔ ayébitɔ ɔbéé, “Ɔɔɔɔɔpu ɔku lóyɔ atɔ-abí owunyákpa. ⁴Bréá ɔde mú wunyáa a, iku lówulí ɔkpatɔ, mbubwi beba bɔtswetswée mú fée. ⁵Iku é lówulí abutású, ɔtínéá usi kpalobí din. Mú su ulowa ɔsa kwe, ⁶táme bréá owí lelun a, ulɔɔ mú mɔ, tsúfé mú nlín mɔyɔ ɔtɔtɔ. ⁷Abí ámu ku lobun awutɔ, awu ámu lobulá kítá mú. Mú su umedan. ⁸Táme abí ámu ku é lobun ɔsulɔb wankláánsú, ulɔkwe, dan, swie abí. Iku lafa (100), iku aduesie (60), iku é advasa (30).”

⁹Yesu lómɔ mu asún ɔnɔ ɔbéé, “Ɔha ání ɔbu asu onúu!”

Tɔ́á Svá Yesu Lótɔ́í Ayébisu

(Marko 4:10-12; Luka 8:9-10)

¹⁰Mu akasípú amu beba befité mu beé, “Ntogyi sù fude amú asún bláa ayébisu?”

¹¹Mú ɔlele mú ɔnɔ ɔbéé, “Mli mú á, Bulu lahá mli ɔkpa ɔbéé, mlibí mu *iwíegyí ámu iwí asun ñáínhé, táme ɔmeha amú mú ali. ¹²Tsúfé ɔhá ání odekléá obónu mí atosunáhé amu asi á, Bulu ɔbɔpu iku tsía mútɔ há mu, méni ɔbétra bi tsía mútɔ. Táme ɔhá ání omedékléá obónu mú asi á, Bulu ɔbɔswí mu kpalobí ámú alabí ámu kúráá. ¹³Tɔ́á svá nde amú asún bláa ayébisu gyí, bude mú nu, táme bumédé mú asi nu. Bude mú wúun, táme bumédé mú bi. ¹⁴Ahá ání sù Bulu ɔnɔsú ɔtɔ́ípú *Yesaia asún ání ɔleblí tswí laba mútɔ ní. Ɔbéé,

‘Bónu lánú, táme bumóonu mú asi.

Béki láki, táme bumóowun mú.

¹⁵Tsúfé amú agywun lawú.

Batílá asu, bun ansíbi é.

Íni su bumóonu, bumóowun é.

Ní megyí ali á, teki bówun atɔ,

bónu asún, amú agywun bóbwií,

bédamlí ba mí wá, nétsa amú ulɔ.’

¹⁶“Táme mli mú á, Bulu layúlá mli. Mlétalí pú ansíbi wun atɔ, pú asu nú asún. ¹⁷Ɔnɔkwali nde mli bláa. Bulu ɔnɔsú

atɔ́pú pú yilé abwepú tsɔtsɔɔtsɔ bekleá bɔ́pu amú ansíbi wun atɔ́ ánfí, abupu amú asu nu asún ánfí mlídenu, táme bumenya mó alí.

Atɔ́-abí Owunyápu Yébi Amu Así
(Marko 4:13-20; Luka 8:11-15)

18“Mlínú atɔ́-abí owunyápu yébi amu así ngýa. 19Ahá ání bonú Bulu iwíegýí iwí asún ámu, táme bumonú mó así á, bugýí fé abí ámúú ilobun ɔkpatɔ́ ámu. ɔbunsám teba bele asún ámúú bodu wá amú kluntɔ́ ámu náti. 20Abí ámúú ɔlowulí abutású amu gyí ahá ámúú bonú asún ámu pé, baho mó ansigyísú, 21táme íniá buma nlín su á, itamatsíá amúú yó. Mú su ní budín amúú ntée iwɔɔsɔn ku itú amú asún ámu su á, ununu butedída. 22Abí ámúú ɔlowulí awutɔ́ ámu gyí ahá ámúú bonú asún ámu a, baho mó, táme ɔyí ánfítɔ́ atɔ́ hiánhe iwí gywíín pú mútɔ́ atonyahé iwí ɔnsípe tegýí Bulu asún ámu su. Íni su butamaswíé abí. 23Abí ámúú ɔlowulí ɔsulúú wankláánsú amu gyí ahá ámúú butonú asún ámu, nú mó así. Íni su itehá butɔ́bwé yilé fé alíá atɔ́-abí ámu loswie, íku lafa (100), íku aduesie (60), íku é advasa (30) ámu.”

Atɔ́-abí Wankláán Pú Ifa Laláhe Iwí Yébi

24Yesu létrá ha ahá ámu yébi ku ɔbéé, “Bulu iwíegýí ámu igýí fé ɔdɔ́ɔpu ɔkuá oloyódu ayó wankláán mu ndɔ́ɔ. 25Táme onyé, bréá ahá bedí á, mu olupú lóyódu ifa laláhe ání ilelian ayó ámu wá mútɔ́, ɔlenatí. 26Bréá ayó ámu lédan, idekwí á, ifá ámu é lelín ɔwan mútɔ́. 27ɔdɔ́ɔpu amu apafɔ́ botsu ndɔ́ ámutɔ́ ba befíté mu beé, ‘Aní wíé, megýí ayó fodu wá fú ndɔ́ ámutɔ́? Nkúnú ifa laláhe é itsú mútɔ́?’ 28Múú ɔlebláa amú ɔbéé, ‘Mí olupú bwehé ní.’ lnu bebláa mu beé, ‘Ní fót sulá á, ha ayetsitsíi mú le ayó ámutɔ́.’ 29ɔlebláa amú ɔbéé, ‘Ó-o! Mlíha mú itsia. Ní mlídé mú tsií á, mlétsíi mí ayó ámu é ku tsítsá. 30Mlísi mú féé ilu yófun mú tɔ́nbí. Ní ifun a, nébláa mú atínpu mbéé, bugyánkpa saun ifa laláhe amu, abuklí mú tswí ha mú ogyá wa, asa abutún ayó ámu yɔ́wa mí odudutɔ́.’ ”

Takyí-akpin Ibí Yébi

(Marko 4:30-32; Luka 13:18-19)

31 Yesu létrá ha amú yébi ɔbéε, “Bulu iwíegyí ámu igyi fé takyí-akpin ibí, oyin ɔku lódu wá mu ndɔtɔ. 32 Múgyí túkúríibi nyí-abí féé́tɔ nu, táme ní idan a, utɔbwé ífá fúáhé dun ífá kugyíku. Mú abámbi tekpíkpli, mbubwi butogyónká mósú.”

Bodobodotu-afá Yébi

(Luka 13:20-21)

33 Yesu létrá ha amú yébi ku ɔbéε, “Bulu iwíegyí ámu igyi fé bodobodotu-afá ání ɔtsɪ ɔku lóputsiá bodobodo nfúó kente kulε, íleha mú lotu.”

Yesu Lótóí Ayébisu

(Marko 4:33-34)

34 Ayébi anfi odu tsɔtsɔɔtsɔ oletsíá públáa ɔɔɔm amu asún ní. Ɔmebláa amú asún kukvá imegyí ayébi ɔlɔputsí. 35 Ínu léha asún ámú Bulu ɔnósú ɔtɔípú ɔku lébli yáí ámu léba mútɔ. Ɖbéε,

“Nótóí ayébisu

pólé asún ání Bulu lópuhín tsú ɔyí asitsuábi ɔwan.”

lfa Laláhe Yébi Amu Asɪ

36 Yesu lénatí ɔɔɔm amu wá ba wóyítɔ. Múú mu akasípú amu bɔyɔ mu wá yébláa mu beε, “Le ndɔ ámutɔ ífa laláhe ɪwɪ yébi amu asɪ suna anɪ.”

37 Múú Yesu léle mú ɔnɔ ɔbéε, “Mí, Nyankpusa-Mu-Bi ánti gyí atɔ-abí wankláán odupú ámu nu. 38 Nɔɔ ámu gyí ɔyí ánti. Atɔ-abí wankláán ámu gyí Bulu iwíegyí ámutɔ abí. lfa laláhe amu gyí Ɖbunsám abí. 39 Olupú ámú olodu ífa laláhe abí ámu gyí Ɖbunsám. Atótunbi amu gyí ɔyí ɔnómɔké. Ató atínpu amu é gyí Bulu-abɔpu.

40 “Alí ámúú besáin ífa laláhe amu, wá mú ogyá ámu a, alí kén íbéba ha aha laláhe ɔyí ɔnómɔké ámu nu. 41 Mí,

Nyankpusa-Mu-Bi ánfí n'ówa mí ab'opu békpa tógyít'á itehá ɔha t'ɔbwé lakpan pú lalahé abwepú f'éé lé mí iwíegyí amutɔ. ⁴²B'ótswi amú f'éé wá ogyá k'pɔnk'pɔntitɔ. Inú isú m'úa k'pisií bu ni. ⁴³Táme yilé abwepú mú b'ówankí fé owí amú Sí Bulu iwíe ogyík'pá unu. ɔhá ání ɔbu asu onúu."

Siadɛ Méntíhé lwi Yébi

⁴⁴Yesu létrá ha amú yébi ku é ɔbéé, "Bulu iwíegyí ámu igyi fé siadɛ kuá bopulá ɔsulúv kusu. Oyin ɔku léyémentí mú, lánjáin mú. Mú lwi ansigyí su á, ɔleyéfe mu at'ó f'éé p'úb'ɔhɔ ɔsulúv amu."

Abutó Wólíhe lwi Yébi

⁴⁵Bulu iwíegyí ámu utráa gyi fé ibiá ogyípú ɔkuá ɔna ɔde abutó wólíhe dunká ɔhɔ. ⁴⁶Bréá olowun butóbi wólíhe kule péá thíé bu ibiá á, ɔlefe mu at'ó f'éé p'úy'ɔhɔ butóbi amu.

Asawu lwi Yébi

⁴⁷Bulu iwíegyí ámu léla igyi fé asawu ání b'ɔtswi wa ɔputɔ lé aye ɔtsan-ɔtsan. ⁴⁸Bréá aye l'ɔbulá mú á, aye alepú ámu bebitíá mú ba ɔpu ɔn'ó. Betsiá asi, t'ósí gyíhe amu wá blanwét'ó, tswi m'úá butamagyi tsítsá. ⁴⁹Alí íb'éba ɔyí ɔn'óm'óké ámu ni. Bulu-ab'opu b'éba b'ɔt'ósí aha laláhe lé aha wankláánt'ó. ⁵⁰F'ówun batswi aha laláhe amu wá ogyá k'pɔnk'pɔntitɔ. Inú isú m'úa k'pisií bu ni.

Atonyahé P'ɔpwe M'úa Dáda

⁵¹Yesu léfité mu akasípú ɔbéé, "Mlulanú mú f'éé asi?"

Bee, "Ee, anlanú mú asi."

⁵²M'úú ɔlebláa amú ɔbéé, "M'úmú mbla osunápú oduá alakásí Bulu iwíegyí ámu lwi asún é bí á, ogyi fé w'óyí mu wie oduá ɔtelé at'ó p'ɔpwe m'úa dáda f'éé tsú mu at'ó ɔyaík'pá."

Bum'ɔhɔ Yesu Mu Wúluto

(Marko 6:1-6; Luka 4:16-30)

⁵³Yesu lénya m'ó mu ayébi amu ɔn'ó alí, ɔlenatí unu. ⁵⁴Oleyinkí y'ó mu onutó wúluto Nasaret, oloyósuná at'ó

Yudafɔ ofiakpa. Mu atosunáhé leha ɔ́nɔ lobwie ahá ámu féé. Mú su befité aba bæ, “Nkúnú olenya nyánsa múa ofúlabwe túmi ánfɔ é tsú? ⁵⁵Megyí ató osrépú mu bi ámu ni? Megyí mu yin gyí *Maria, mu apio yinhé gyí Yakobo mua *Yosef pú Simon mua Yuda? ⁵⁶Yéé ania mu apio tshé tsie nfi á? Múú nkúnú olenya íni féé tsú?” ⁵⁷Íni su mu asún lókusú líí amúsú.

Yesu lébláa amú ɔ́béé, “Ahá butobú Bulu ɔ́nɔsú ɔ́tɔ́pú ɔ́tínegyíɔ́tíne, táme mu onutó wúlutɔ́fɔ pú mu wóyítɔ́ ahá mú butamabú mu.” ⁵⁸Íniá bumɔ́hɔ mu gyi su á, ofúla kpalobí ku pé ɔ́ɔ́bwe inu.

Asú Ɖɔ́pú Yohane Lowu

(Marko 6:14-29; Luka 9:7-9)

14 ¹Galilea ɔ́má́sú ogyípú *Herode lónu Yesu iwɔ asún ali bré ámutɔ. ²Múú ɔ́lebláa mu asúmpú ɔ́béé, “Asú Ɖɔ́pú Yohane amu ni. Múlákúsú tsú afúlítɔ. Mú sú ɔ́de ofúla anfi odu bwe ní.”

³⁻⁴Bré kutɔ á, Yohane létsiá bláa Owíe Herode ɔ́béé, mbla meha ɔ́kpa ání otsiá mu pio Filipo mu ka Herodia. Íni su Herode léha bekitá Yohane, wá mu ikan, pú mu wá obu. ⁵Ɖɔ́bwe agywun ání ɔ́bómɔ Yohane, táme olenya ahá ámu ifú, tsúfé butobú Yohane ání Bulu ɔ́nɔsú ɔ́tɔ́pú ogyi.

⁶Táme eke ɔ́kuá Owíe Herode dé mu ɔ́kwíké gyí a, mu ka Herodia mu bi tshé lóbowie ɔ́buntɔ tsa Herode mua mu ahande ansítɔ. Mu utsáa amu lówa owíe amu ansigyí. ⁷Mú su ɔ́leka ntam ɔ́béé, ɔ́béha mu tógyítá odeklé.

⁸Otsibi amu mu yin léha mu ɔ́lebláa Herode ɔ́béé, “Ndekléá fupú Asú Ɖɔ́pú Yohane nwun dunka ulínsú ha mi sésééséi.”

⁹Asún ánfɔ léhie han Herode, táme mu ntam amú ɔ́leka, pú ahá amúú bubu inu ámu su á, ɔ́leha mu ahá ɔ́tínpu ɔ́kpa ɔ́béé, ɔ́bwéé tɔ́a otsibi amu lafité ha mu. ¹⁰Ahá ɔ́tínpu amu léyetɔ́n Yohane nwun obu ɔ́dikpá inu. ¹¹Múú ɔ́ɔ́pu nwun ámu dínká ulínsú ba otsibi amu, mu é ɔ́ɔ́puya mu yin Herodia. ¹²Asú Ɖɔ́pú Yohane akasípú beba botsu mu satin yópulá. Mú ɔ́ma a, ɔ́yɔ́ yébláa Yesu asún ání ulaba.

Ahá Mpím-nu Atogyihe Ha

(Marko 6:30-44; Luka 9:10-17; Yohane 6:1-14)

13 Yesu lénya nú asún ámu alí, olowie ɔkluntɔ, fá ntsu yétsiá ɔtineku mu nkule. Táme ɔɔm ámu bebu ɔtínéá ɔyɔ. Mú su benatí ayabitɔ tsú amú awúlusu gya mu nkpá. 14 Bréá ɔlekplí dalí ɔklun amutɔ, wun ɔɔm kpɔnkpɔnkpɔntí á, amú asún lɔwa mu nwe. Mú su ɔletsá amútɔ alɔpu.

15 Owí lɔpɔn a, akasípú amu beba mu wá bebláa mu beɛ, “Dimbísú nfi gyí, owí é deta. Mú su ha amú abuyɔ awúluá ibu bomlí nfi así ɔɔhɔ tɔku gyí.”

16 Táme Yesu léle mú ɔnɔ ɔbéɛ, “Imehián ání bóyɔ. Mludunka tɔku ha amú abugyi.”

17 Mu akasípú amu bebláa mu beɛ, “Tɔ́á anibu féé gyí bodobodo apin anu pú ntsutso iye bwáhé anyɔ pé.”

18 Yesu lébláa amú ɔbéɛ, “Mlitsu ba mu.” 19 Múú ɔleha ahá ámu betsiatsiá ifa ɔɔbwe amusu. Inu olotsu bodobodo anu pú ntsutso iye bwáhé anyɔ ámu. Inu olotsu ansí fúá kí ɔsúsú, ɔleda Bulu ipán. Múú olebiabía bodobodo amutɔ há akasípú amu, amú é beye mú ha ahá ámu féé. 20 Amú féé begyi mwe sian. Akasípú amu ɔtɔsí síanhe amu. Uɔbulá alakpá dúanyɔ. 21 Ayin ání begyi atɔ́ ámu nkule bugyi fé mpím-nu (5,000). Bumekla atsi múa nyebí mú.

ɔpusu Natí

(Marko 6:45-52; Yohane 6:15-21)

22 Múú Yesu léha akasípú amu ɔbéɛ, bowíe ɔkluntɔ, abugyankpa fa ɔpu amu ɔɔ mú ɔbun. Mu mú olesin ɔma sí ahá ámu ɔkpa. 23 Bréá olesi amú ɔkpa tá á, ɔɔɔdu yɔ busu yɔɔɔ mpái. Mu nkule oletsíá inu yɔ́fun owi tahé. 24 Alí bré ámutɔ á, ɔklun amu lawíé ntsu nsiné. Ilefia afú kpɔnkpɔntí ku, ɔpu amu lɔwa dabi.

25 Bake-bake a, Yesu lénatí ntsu ámusu ayabitɔ buo amú. 26 Bréá bowun mu, ɔna ɔpu amusu á, benya ifú súra okitikíti, blí beɛ, “Fúli ogyi.”

27Táme ɔlɔwa ɔsa bláa amú ɔbéε, “Mlɔwa klun. Mí ní. Mlɔmánya ifú.”

28Petro lébláa Yesu ɔbéε, “Mí Wíé, ní fú ní mú á, ha mí é annati ɔpu amusu ɔtu fú.”

29Yesu lébláa mu ɔbéε, “Nati ba.” Petro lédalɔ ɔklun amuto ɔna ɔpu amusu ɔyó Yesu wá. 30Táme bréá olowun alíá afú ámu ɔnó bu ɔnlun á, ifú lowie mu ayeto. Mú su ɔlɔwa me bi. Múú ɔlɔkplón kpolí Yesu ɔbéε, “Mí Wíé, ho mi!”

31Inunu Yesu létunkí ibi kítá mu, bláa mu ɔbéε, “Fú hógyi mɔtsó. Ntogyi sù fúde nwéen gyí?”

32Benya dú wíé ɔklun amuto alɔ, afú ámu léka itin. 33Inu ahá ámúú bubu ɔklun amuto ámu beda akpawunu Yesu ayabito, blí beε, “Lélé, Bulu mu Bi fúgyi.”

Genesaretɔ Alɔpu Tsa

(Marko 6:53-56)

34Yesu mua amúnɔɔ befa ɔpu amu yési Genesaret osubúnɔ. 35Bréá unfo bebi ání mu ni á, ɔɔwa abí ya amú awúlu féésú, há amú ɔɔpu alɔpu féé ba mu. 36Bokokóli Yesu beε, ɔhá alɔpu amu abupu ibi da mu atadie ɔdanú kpán. Amúá ɔɔpu ibi da mú féé benya ulɔtsá.

Atitifo Amándié

(Marko 7:1-13)

15 1Mú ɔma a, Farisifo pú Mose mbla asunápú aku botsu Yerusalem ba Yesu wá, befuté mu beε, 2“Ntogyi sù fú akasípú amu butamagyi anɔ anáin amándíésú. Butamafwí ibi amándié ɔkpasu asa butegyí ató?”

3Yesu léle mú ɔnó ɔbéε, “Ntogyi sù mli é mli anáin amándié su mlimédé Bulu mbla ámusu gyí? 4Mose lówanlín wá Bulu mbla ámuto ɔbéε, ‘Bu fú sí mua fú yín,’ ɔletrá wanlín ɔbéε, ‘Ní ɔku léblí asukpan tsú mu si ntée mu yin iwí á, bumóɔ mu?’ 5-6Táme mli mú mliáa, ɔha ɔbétalí bláa mu si ntée mu yin ɔbéε, ‘Tóá teki nópohá fú á, napóhá Bulu. Imehián ání nétrá ki fu.’ Mli anáin amándié su mlútráa

mlumédé Bulu mblasu gyí. ⁷ Apinabwebí abwepú! Dnɔkwali Bulu ɔnɔ́sú ɔtɔ́pú Yesaia léblí tsú mli iwɪ tswɪ ɔbé,

⁸ ‘Ahá ánti budepu amú ɔnɔ́ bú mí,
táme amú klɔn bu ifó mí wá.

⁹ Kpaali bude mí sum,
tsúfé basí Bulu mbla tswɪ, yó bude anyánkpósa
mbla suná.’ ”

Tsá Itɔkpóí Ōha Bulu Ansító

(Marko 7:14-23)

¹⁰ Yesu létrá ti ɔdɔm amu ba mu iwɪ wá, ɔlebláa amú ɔbé,
“Mliyaa asu, méni mlónu íni asu. ¹¹ Megyí tsá ŋha tegyi tɔkpóí
mu Bulu ansító, mboún múá itedáli tsu mu ɔnɔ́ tɔkpóí mu.”

¹² Inu mu akasípú amu beba mu wá befité mu be, “Fuyin
ání fú asun blíhé anfi lawɔ Farisifo ámu?”

¹³ Yesu léle mú ɔnɔ́ ɔbé, “Bópulí oyígyíoyí ání megyí mí
Sí ámúɔ ɔbu ɔsúsú ámu lóswíe tsítsá. ¹⁴ Mlisi Farisifo ámu
asún. Ansibi abwiepú bugyi, bude ansibi abwiepú kpa. Ní
nsibi obwiepú dé nsibi obwiepú kpa á, ɔbótó amú abanyó
butekpá wíe.”

¹⁵ Mú Petro lébláa mu ɔbé, “Le yébi amu asu suna anu.”

¹⁶ Yesu léfité amú ɔbé, “Mú su mli é mlutamanú asún asu?
¹⁷ Mluméyín ání tsá iwíé ŋha ɔnɔ́ á, mu iputo itowíé, ɔteyéle
mú wá ɔkpuntɔ? ¹⁸ Asúngyíasún ání itedáli tsu ŋha ɔnɔ́ á,
mu kluntɔ itedáli tsu. Múɔkpóí mu Bulu ansító ní. ¹⁹ Tsúfé
ŋha kluntɔ ágywun laláhe tedáli tsu. Mútéhá ɔtɔmɔ ŋha, ɔtɔtɔ
mbua, ɔtɔwá atsi múa ayin asún, otowí ató, ɔtɔwá afunu,
otetsii ŋha. ²⁰ Inu aná tɔkpóí ŋha, támé ní ŋha mófwi ubi
amándié ɔkpasu asa olegyi ató á, itamakpóí mu Bulu ansító.”

Otsi Ōkúá Omegyí Yudayin Hógyi

(Marko 7:24-30)

²¹ Yesu lénatí unu yó Tiro múa Sidon nsáuntɔ.
²² *Kanaanyintse ɔkúá otsie unu léba Yesu wá. Ɖde okitikíti
surá, olokokóli Yesu ɔbé, “Dawid mu na, wun mi nwe! Ɖɛ
laláhe bu mí bí tsíhétó. Iɛ mu háan dubi.”

23Táme Yesu mékpla mu. Inu mu akasípú amu bobwií ipa há mu bee “Ha ɔtsi ámu ɔnati, tsúfé obuo aní ɔde okitikíti surá dɔbi.”

24Yesu lébláa ɔtsi ámu ɔbéé, “Israel akúfa fwihé pé wá Bulu lówa mí.”

25Táme ɔtsi ámu léda akpawunu mu ayabito, bláa mu ɔbéé, “Mí Wíé, gyi mi buale.”

26Yesu lébláa mu ɔbéé, “Ima alá fóswií nyebí atogyihe púhá akíai.”

27ɔtsi ámu léle mú ɔnó ɔbéé, “Owíé, ibu mútɔ alí, táme akíai é butegyí atogyihe mpupubi ání utekpákpa bun amú wíe ɔpúnúasi.”

28Múy Yesu lébláa mu ɔbéé, “ɔtsi, fú hógyi lomóní. lbá mútɔ ha fu alá fudeklé.” Inunu iwí lówa mu bi ámu ɔnlín.

Ahá Tsɔtsɔtsɔ Uɔ Tsa

29Tsú inu á, Yesu lótsun Galilea ɔpu ɔnó, dú yétsiá okúku kusu. 30Ahá tsɔtsɔtsɔ bɔpu abubúpu, ansibi abwiepú, abɔ, amúmu pú uɔ bámbá alɔpú bobun Yesu ayabiasí, ɔletsá amú féé. 31Ahá ámu ɔnó lobwie amú bréá bowun amúmu budetɔí, abubúpu iwí lawá amú ɔnlín, abɔ buna, ansibi abwiepú é bude ató wúun, bekanfú *Israel Bulu ámu.

Ahá Mpím-na Atogyihe Ha

(Marko 8:1-10)

32Yesu létí mu akasípú, bláa amú ɔbéé, “Ahá ánfí asón de mí nwe wa. Nde eke sáásí ɔpá bubuo mi, butráa buma tɔtɔá bégyi. Ní nehá amú bɔpú akún nátí á, ansítɔ béyebi amú ɔkpatɔ.”

33Mu akasípú amu befité mu bee, “Nkúnú abénya atogyihe há ɔɔm anfi *dimbí ánfusu?”

34Yesu léfité amú ɔbéé, “Bodobodo afinu mlibu?”

Bele mú ɔnó bee, “Asienó pú aye pútúpútú kpalóbí ku.”

35Yesu léha ɔɔm amu betsiá asi. 36Múy olotsu bodobodo asienó pú aye amu, dá Bulu ipán, olebiabía mútɔ há akasípú amu, beye ha amú. 37Amú féé begyi mwe. Bɔtɔsí síanhe amu

búlá alakpá yílé asienó. ³⁸Ayin ání begyi ató ámu nkule bugyi mpím-na (4,000). Bumekla atsi múa nyebí.

³⁹lnu Yesu lési ahá ámu okpa, olowie okluntó fá ɔpu yó Magadanfó ɔsulósu.

Farisifo Bodunká Ofúla

(Marko 8:11-13; Luka 12:54-56)

16 ¹Eke ɔku *Farisifo pú *Sadukifo aku beba Yesu ɔsókikpa. Mú su bebláa mu beɛ, ɔbwéɛ osúna pusuna amú ání lélé otsú Bulu wá. ²Yesu lébláa amú ɔbéɛ, “Ní owí ɔpon, nsantó ipé á, mliteblí mliaa, ‘Oke nsantó bédu.’ ³Ní nyankpu obílá tuun nyanki a, mliteblí mliaa, ‘Nde nyankpu obótswie tsun afú.’ Mlitetálí kí nsantó, bí t́á íbéba. Ntogyi sù mlumétálí nú t́á mlidéwúun séi ánfí mú asi.⁸ ⁴Mlú ndemba-abí laláhe ání mliladáli Bulu ɔma, mlidé osúna dunká amluwun, táme mlímóowun kukukuku dun Bulu ɔnósú ɔtɔ́pú Yona osúna amu odu.”

Ínu su ɔlenatí sí amú.

Farisifo Pú Sadukifo Bodobodotu-afá

(Marko 8:14-21)

⁵Yesu akasípú amu bumekain tsú bodobodo kítá asa befa ɔpu amu yó ɔbun. ⁶Yesu léda amú ɔlá ɔbéɛ, “Mluki wankláán Farisifo pú Sadukifo Bodobodotu-afású.”

⁷Akasípú amu befuté aba beɛ, “Bodobodo amú anumédé ámu sù ɔde asún ánfí blí lóó?”

⁸Yesu lónu asún ání budeblí. Mú ɔlebláa amú ɔbéɛ, “Óo, mli hógyi mót́sú. Ntogyi sù mlidéblí mliaa bodobodo ámú mlumédé ámu su? ⁹Imókúwánkí mli kí? Mlilatan bodobodo apin anu ámú neha ahá mpím-nu (5,000) begyi amusu? Alakpá afinu lésían mlilót́sú? ¹⁰Ntéɛ mlilatan bodobodo apin asienó ámú neha ahá mpím-na (4,000) begyi amusu? Alakpá afinu lésían mlilót́sú?” ¹¹Ntogyi sù imókúwánkí mli ání megýí bodobodo ɔwí asún ndeblí? Bláa

⁸ 16:2-3 Mót́ yée 2 múa 3 uma nwulú dada amu akuto.

nde mli bláa mbée, “Mliki wankláán Farisifo pú Sadukifo Bodobodotu-afású.”

12 Inu asa ulwankí amú ání megyí Bodobodotu-afású ɔde, mboún amú atosunáhé.

Ɔhá Ání Yesu Gyí

(Marko 8:27-30; Luka 9:18-21)

13 Bréá Yesu lówie Kaesarea Filipi nsáuntɔ á, ɔlefuté mu akasípɔ ɔbée, “Ma ahá bee mí, Nyankpusa-Mu-Bi ánti ngyi?”

14 Bele mú ɔnɔ bee, “Aku bee, fúgyí Asú Ɖɔɔpú Yohane. Aku bee, Bulu Ɖnɔsú Ɖtɔípú *Elia. Aku é bee, *Yeremia ntée Bulu ɔnɔsú ɔtɔípú bambá ɔku.”

15 Mú ɔlefuté amú ɔbée, “Mli é mé? Mliá mígyí ma?”

16 Simon Petro léle mú ɔnɔ ɔbée, “Fúgyí Kristo, (ɔhá ámú Bulu ladá mu ofúli amu) ni. Bulu Ɖkɔankpawu amu mu Bi.”

17 Inu Yesu lébláa mu ɔbée, “Bulu layúlá fú Simon, Yona mu bi, tsúfé megyí nyankpusa ɔkuku léle ɔnɔkwali anfi ɔwan súná fú. Mí Sí ámú ɔbu ɔsúsú ámu ni. 18 Inu su mí é nde fú bláa mbée, fú dá gyí Petro. Mú asi gyí, ‘Butá. Butá ántisu néyi mí ɔpasua dínká ní. Lowu túmi méetalí gyí músú ekekeeke. 19 Nɔpu Bulu iwíegyí ámu asáafi wá fú ibtu. Asúngyíasún ání fékiná ɔsulú anfi su á, Bulu é obékiná mú ɔsúsú. Múá fótsulá á, Bulu é obótsulá músú ɔsúsú.”

20 Inu ɔleda amú ɔlá kpákpáákpa ɔbée, bumábláa ɔhaa ání mugyí Kristo amu.

Yesu Iwɔsun Pú Mu Lowu Iwɔ Asún Blí

(Marko 8:31–9:1; Luka 9:22-27)

21 Tsú bré ámu su á, Yesu léfi asi ɔde asúntɔ le súná amú ɔbée, “Ilehián ání mɔyɔ Yerusalem yówun iwɔsun tsɔtsɔtsɔ Yudafo ahande, Bulu *igyí ahapú dehen pú Mose mbla asunápú ibtu. Bómɔ mu, táme Bulu ɔbélakúsúa mu eke sáásí tsú afúlito.”

22 Mú su Petro létu mu ya utsétɔ, yéka mu itin ɔbée, “Mí Wíé, Bulu ogyáa mú téi ya fú iwɔ. Inu mába fusu ekekeeke.”

²³ ɪnu ɔledamlí bláa Petro ɔbéɛ, “*Satan, nati tei mísú! Fude mí ɔkpa tíin. Megyí t́á Bulu dégywúin fudegywúin, anyánkpusa klé fudegywúin.”

²⁴ Múú ɔlebláa mu akasípú amu ɔbéɛ, “Ní ɔku dékléa obóbuo mi á, osíi t́á otekle bwe, otsu mu *oyikpalíhe bobuo mi. ²⁵ Tsúfé ní ɔku lépru mu nkpa á, ibóhulí mu. Táme ní ɔku lési mu nkpa há mí su á, ɔbélanya nkpa ání itamatá. ²⁶ Ní ɔku onyá ɔyít́ ət́ f́éé, táme ɔhúli mu ɔkláa a, labi mɔmu ulowa há mu? Ntéɛ ntu ɔha ɔbétalí pútse mu nkpa? ²⁷ Tsúfé mí, Nyankpusa-Mu-Bi ání ńba mí Sí numnyamtɔ, mía mu abɔpu. ɪnú ńka ɔhagyíɔha iku alá mu tsiát́ gyi ní. ²⁸ Ɖnɔkwali nde mli bláa. Aku bubu mlitɔ nfi ání bumóowu, ýfun bréá bawun ání mí, Nyankpusa-Mu-Bi ání ńba mí iwíe ogyíkpa.”

Yesu lwutsée

(Marko 9:2-13; Luka 9:28-36)

17 ¹ Nkensié ɔma a, Yesu lékpa Petro mua Yakobo pú mu pio Yohane, bɔdu ý ibu kusu. ² Amú ansít́ ɪnu á, Yesu ɪwi letse. Mu ansít́ lówankí fé owí, mu atadiɛ é ledamlí fútútúútú. ³ ɪnu mu akasípú abasá ámu bowun ání Mose mua *Elia bele ɪwi ɔwan, amúa Yesu budetóí. ⁴ Múú Petro lébláa Yesu ɔbéɛ, “Mí Wíé, ibu alá abétsiá nfi. Ní fót́sulá á, ha ada abú asa. Fú klé kule, Mose klé kule, Elia é klé kule.”

⁵ Bréá ɔde asún ání blí á, agyinde wánkíhé ku lobobun amúsú. ɪnu ɔme ku ledali tsu agyinde ámutɔ ɔbéɛ, “Ɖni gyí mí B́i ɔdwepúá olegyi mi ansí ní. Mlunu mu ɔme.”

⁶ Ifú lehie kítá amú bréá bonu asún ání. Mú su ɔɔwa ɔsa mlí bun ɔsulótɔ. ⁷ Múú Yesu léba ɔɔpu ibi dada amú, bláa amú ɔbéɛ, “Mluku su, mlumánya ifú.” ⁸ ɪnu ɔɔwa ansí kɪ a, bumetrá wun ɔhaa dɔn Yesu nkule.

⁹ Bréá bude ibu ámu kplí á, Yesu léda amú ɔlá ɔbéɛ, bumábláa ɔhaa t́á bayówun, ýfun ekeá Bulu ɔb́kusúa Nyankpusa-Mu-Bi ámu tsú afúlito.

¹⁰ Mu akasípú amu befíté mu beɛ, “Ntogyi ś Mose mbla asunápú amu beɛ, ilehián ání Elia obéyinkí bá asa Kristo amu ɔbéba?”

¹¹Ɔlele mú ɔnɔ ɔbéɛ, “Ɔnɔkwali igyi. Elia obégyankpá bá bela tógyítɔ yái wankláán. ¹²Nde mli bláa mbéɛ, Elia layínkí bá dodoodo, táme ɔhaa mébu mu. Bɔwa mu amumuyɔ. Alí kén mí, Nyankpusa-Mu-Bi ánfɔ é nówun iwɔɔsun amú ibɔtɔ ní.”

¹³ɒnu á, ulɔwankí akasípú amu ání Asú Ɔbɔpú Yohane iwɔ asón ɔdeblí.

ɒnu Dídahe Ɔbɔpú Tsa

(Marko 9:14-29; Luka 9:37-43a)

¹⁴Bréá beyínkí kplí bowie ɔɔm amu wá á, oyin ɔku léba beda akpawunu Yesu ayabitɔ, bláa mu ɔbéɛ, ¹⁵“Mí Wíé, wun mí bí ánfɔ nwe, tsúfé ulɔ dídahe de mu háan. Otetsiá dida wíé ntsu múa ogyátɔ. ¹⁶Nɔpu mu ba fú akasípú amu, táme bumetalí tsá mu ulɔ.”

¹⁷Yesu léle mú ɔnɔ ɔbéɛ, “Ndemba-abíá mli má hógyi, mli tsiátɔ ma ale. Alí nétsiá mli wá yɔ ekekegyíeke ní? Nnyá klun ha mli yɔfun ɔmenke? Mlikpa kebi ámu ba mi!” ¹⁸ɒnu ɔɔkplón gya ɔɔe laláhe amu. Uledali kebi ámutɔ, iwɔ lówa mu ɔnlun.

¹⁹Mú ɔma a, akasípú amu befité Yesu utsétɔ beɛ, “Ntogyi sú anɔ mú animétalí gya ɔɔe laláhe amu dáli kebi ámutɔ?”

²⁰⁻²¹Mú ɔlebláa amú ɔbéɛ, “Mli hógyi mɔtsɔ kúráá. Mbláa mli ɔnɔkwali. Ní mli hógyi lomoní fé takyí-akpin ibí á, tekɔ mlétalí bláa ibu ánfɔ mli aa ipúli. Lélé ibópulí, tɔtɔtɔ mɔɔɔɔn mli bwe.”^h

Yesu Lowu Iwɔ Asón Blí Otse Nyɔɔsi

(Marko 9:30-32; Luka 9:43b-45)

²²⁻²³Bréá akasípú amu féé beba befia Galilea ɔmátɔ á, Yesu lébláa amú ɔbéɛ, “Béle mí, Nyankpusa-Mu-Bi ánfɔ há adón bómo mí, táme Bulu ɔbɔkɔsúba mi eke sáásí.”

Asón ánfɔ lehɛ han akasípú amu.

^h 17:21 Mútsɔ yéɛ 21 bu nwulú dada amu akutɔ: Táme ɒnu odu mú á, nkéti mpá múa ɔnɔklí pé mlétalí pógya mú.

Bulu ɔtswékpa Ofí Iko

24 Yesu mva mu akasípú beba Kapernaum wúluto. Iwu
*Bulu ɔtswékpa ofíko ahópu aku beba befité Petro be, “Fú
wíe teká Bulu ɔtswékpa ofí iko?”

25 Petro lébláa amú ɔbé, “Ɖteká.”

Bréa Petro lóyo wóyító a, Yesu légyankpá fíté mu ɔbé,
“Simon, nkáli gyí fú agywun? Amendi téká dúte mba
lampoo há awíe? Afóó ntée wúlu awíe?”

26 Petro lébláa mu ɔbé, “Afóó teká.”

Mú Yesu lébláa mu ɔbé, “Yéé múmú wúlu awíe bagyi
wu ní? 27 Táme mmedéklé mbée, abókusú líí amúsú su á,
tsu odadwa afuyó ɔpu ɔnó yotswi. Ki klemetí gyankpapu
ání féle ɔnótó. Fénya kóba ání ibófun aní abanyó ofíko ámu
ka. Le mú, afuyeka ha amú.”

Ma ɔbówe ɔhande?

(Marko 9:33-37; Luka 9:46-48)

18 1 Beba Kapernaum wúluto, akasípú amu beba Yesu wá
befité mu be, “Ma gyí ɔhande Bulu iwíegyí ámutó?”

2 Yesu létí kebi ɔku belí amú ansító, 3 ɔleblí ɔbé,
“Ɖnɔkwali nde mli bláa. Ní mli métse, bwe wu fé nyebí á,
mlumóowie Bulu iwíegyí ámutó. 4 Ɖhagyíoha ání ɔleba
wiasí fé kebi ántí á, mgyí ɔhande Bulu iwíegyí ámutó ní.
5 Ɖhagyíoha ání ɔlɔho kebiá ogyi ali mí dátó laho mi.

Ɖha Kpa Wá Lakpantó

(Marko 9:42-48; Luka 17:1-2)

6 “Ní ɔku léha ahá ántí bumɔkúdan mísú hógyito ántíto ɔku
lóbwe lakpan á, ní beda nfúókwebu síán mu ɔmetó, tswi mu
wá ɔpu okluklúkpá, mó mu pó á, ibu alé dun. 7 Ɖyító atsiápú
bugyówi ní. Tsúfé itóá itehá ɔha ɔbwe lakpan bu wu. Ibéba
ali, táme ɔhá ání una musu mu ba lóbwe lakpan ɔgyówi ní.

8 “Mú su ní fú ibi ntée fú yabi téhá futedida hógyito á, ka
mú le, afutswi mú tsalifwi. Iwu aléá fópu ibi kule ntée yabi
kule nyá nkpa ání utamatá, dun ání fópu ibi anyo ntée ayabi

anyo wíe ogyá ání utamaduntɔ. ⁹Ní fú nsíbi téhá fútɔbwé lakpan á, loti mú le, afutswi mú tsalífwí. Ibo aláá fɔpu nsibi kule nyá nkpa ání utamatá, dɔn ání fɔpu ansibi anyo wíe ɛsubití ogyá ání utamaduntɔ.

Kufa Fwihé
(Luka 15:3-7)

¹⁰⁻¹¹“Mlíki wankláán ání mlíméeki nyebí pútúpútú ánfito ɔkuku ansító kótíkótí. Nde mli bláa mbéé, bubu Bulu-abɔpu ání butɔkósi pú amú asún ya mí Sí ɔsúsú.ⁱ

¹²“Mliyo asún ánfito amlíki. Ní ɔku bu akúfa lafakule (100), amúto ɔkule ɔfwí á, nto ɔhá ámu tɔbwé? Megyí si otesí adukwebá-kwebá (99) atráhe amu líi okúku amusu, yódunká ɔkule pé ámú alafwí ámu? ¹³Ɔnɔkwali nde mli bláa. Ní owun mu a, mu ansí bégyi mu iwí dɔn adukwebá-kwebá atráhe amú bumɔfwí ámu. ¹⁴Alí kén mli Sí ámú ɔbu ɔsúsú ámu médékle ɔbéé, nyebí pútúpútú ánfito ɔkuku é ɔfwí ní.

Ní Fú Bá Ɔpú Ilá Gyi Fu

¹⁵“Ní fú bá ohógyipu ɔpú ilá gyi fu á, yo mu wá, mli abanyó pé amlíbi mú. Ní olonu iwiasí á, falányá opió. ¹⁶Táme ní omonu iwiasí á, kpa ɔbakúle ntée abanyó manta iwísu amlíyo mu wá, méni bégyi asúngyiasún ání mléblí iwí adánsíe fé alí Bulu asún leblí. ¹⁷Ní omonu amú asún é á, pu asún ámu ya mli ɔpasuafɔ. Táme ní omonu amú asún é á, múmú bu mu ɔmátóyín ntée lampóo ɔhópu.

Asúnkiná Pú Músó Tsulá

¹⁸“Ɔnɔkwali nde mli bláa. Asúngyiasún ání mlékiná ɔsulúv anífu á, Bulu obékiná mú ɔsúsú. Múá mlótsulá á, Bulu obótsulá músó ɔsúsú.

ⁱ18:11 Mótó yée 11 bu nwulú dada amu akuto: *Tsífé mí, Nyankpusa-Mv-Bi ánfí nɛba ání nɔhɔ ahá ámú bafwí ámu nkpa.*

19“Ntráa ndeblí mbée, ní mli abanyó mlɔbwé agywun kule ɔsulúv anfisv kúlí tɔkv á, mí Sí ámúv ɔbv ɔsúsú ámv ɔbɔbwe mú há mli. 20Tsúfé ɔtínegyíɔtíne ání ahá abanyó-abasá befia mí dátv á, mbv amú wá.”

Osúmpú Owuntɔlɔnv lwi Yébi

21Múv Petro léba befité Yesu ɔbée, “Mí Wíé, tsefinv nsíkíe mí bá ní ɔpú ulá gyi mv? Tse sienó lóó?”

22Yesu lébláa mv ɔbée, “Ó-o, megyí tse sienó fésikíe mv, tsé aduesienó (70) aku asienó. 23Ínv sv Bulu iwíegyí ámv igyi fé asún ánfí. Owíe ɔkv lɔbwe agywun ání mvv asúmpú bóbu akúnta. 24Bréá olefí mú así á, mv asúmpú bekpa amútv ɔkvá ɔde mv ɔkv mpím-mpímtv ba mv. 25Táme osúmpú amv má tɔtɔá ɔbɔpvká ɔkv ámv sv á, owíe amv léha ɔbée buféev mvv ka, mv abí pv mv atv fée pvkítá ɔkv ámvv. 26Ínv á, osúmpú amv lɔkusú dá akpawunu owíe amv ayabítv, bwíí ɔpa há mv ɔbée, ‘Mí Wíé, nya klvn ha mv. lbwé néka fú ɔkv ámv fée.’ 27Mv asún lɔwa mv wíe amv nwe. Mú sv olesí ɔkv ámv fée kíe mv, há mv ɔlenatí.

28“Táme bréá osúmpú amv lédatí unv á, ɔlɔyɔtv mv osúmba ɔkvá ɔde mv ɔkv kpalobí kv. ɔlekítá mv ba ámv ɔmetv



*ɔlekítá mv ba ámv ɔmetv kínkínkín, bláa mv ɔbée, ‘Pv mí kɔba ha mv!’
(Mateo 18:29)*

kínkínkín, bláa mv ɔbée, ‘Pv mí kɔba ha mv!’ 29Mv osúmba amv é léda akpawunu bwíí ɔpa há mv, bláa mv ɔbée, ‘Nya klvn ha mv. lbwé néka fú kv.’ 30Táme osúmpú anfv mú mótsulá. ɔleha ání bupúv mv yɔwa obu yɔfvn ekeá ɔbéka mv ɔkv ámv. 31Mv asúmba bowun tɔá alapúgyi mv ba ámv a, ilowie amú iwítv. Mú sv bɔyɔ yébláa amú wíe asún ámv fée. 32Múv amú wíe amv léha betí osúmpú amv ba, ɔlebláa mv ɔbée, ‘Osúmpú

owuntɔlnpu, fú ipabwií su nesi ɔkɔ tsɔtsɔɔtsɔ ámuú fúde mí ámu fée kíe fú. ³³Uma alá fú mú fówun fú bá ámu nwe fē alá nowun fu nwe?’ ³⁴Ɖbls lekitá owíe amu. Mú su ɔleha ɔbé, buwáa mu obu, abupiti mu ató yófun ekeá ɔbéka ɔkɔ ámu fée.

³⁵“Alí mí Sí ámuú ɔbu ɔsúsú ámu ɔbóbwe mlito okugyíɔkuá omesi mu ba lakpan kíe mu tsú mu klontɔ ní.”

Ɖkákíná lwi Atosunáhé

(Marko 10:1-12)

19 ¹Bréá Yesu lótoí tá á, ɔlenatí Galilea ɔmátó yó Yudea ɔmátó Yordan ntsu ámu ɔbun. ²Ɖɔm kɔnkpɔnkpɔnti bobuo mu, ɔletsá amú ɔlɔ unu.

³Farisifo aku beba mu wá ɔɔɔ mu ki, fíté mu be, “Anu Mbla léha ɔkpa ání oyin ɔbétalí kíná mu ka ɔkpagyíɔkpasu?”

⁴Yesu lébláa amú ɔbé, “Mlunókókla Bulu asún ámu ki ání bré ámuú Bulu léfi ɔyí asi á, ɔtsi múa oyin ɔlɔbwe? ⁵Bulu léblí ɔbé, ‘Ínu su oyin obótu sí mu si mua mu yin yémantá mu kasu, amú abanyó ɔbóbwe ɔyulúv kole ni.’ ⁶Mú su nde mli bláa mbée, butráa bumegyí abanyó, táme babwé ɔbakúle. Ahá ání Bulu labwé amú ɔkule a, ɔhaa mámaín amú abasu.”

⁷Farisifo ámu befíté mu be, “Ntogyi sú Mose lówa mbla ɔbé, oyin ɔbétalí wánlín ɔkákíná ɔwulú pókíná mu ka?”

⁸Yesu lébláa amú ɔbé, “Mli klontɔ odwin sú Mose léha mli ɔkpa ɔbé, mlíkína mli aká, teki megýí alí Bulu lóbwe mú bréá olefi ɔyí ámu asi ní. ⁹Táme nde mli bláa mbée, ní oyin okíná mu ka láyétsiá ɔtsi bámbá á, alató mbua. Ɖkpa oduásúá oyin ɔbétalí kíná mu ka pé gyí aladál mu ɔma.”

¹⁰Múú mu akasípú amu beblí be, “Ní alí okúlu mua ɔká abatsiátɔ asún igyi ní mú á, múmú uma aláá oyin mua ɔtsi bétsiá aba pó.”

¹¹Yesu lébláa amú ɔbé, “Megýí ahá fée ɔbétalí ho atosunáhé anfi. Nkétí ahá ání Bulu lópuhá amú pé. ¹²Tsúfé una ɔkpa tsɔtsɔɔtsɔsu ayin aku butamatsiá aká. Ayin ámu aku á, alí ɔkwí amú ní. Aku é anyánkpúsa láflo amú. Aku é basin kpanku Bulu iwíegýí ámu su. Ɖhá ání ɔbétalí á, ɔhó mí atosunáhé anfi.”

Nyebí Yulá

(Marko 10:13-16; Luka 18:15-17)

13Aha aku bekpa nyebí ba Yesu bee, ɔpúu ibi dinka amúsú, ɔkuli Bulu oyúla ha amú. Táme akasípú amu bowa tɔɔn wá amú. 14Múú Yesu lébláa akasípú amu ɔbéé, “Mliha nyebí ámu ɔkpa abuba mí wá. Mlumátin amú ɔkpa, tsúfé ahá ánfí odu bú Bulu iwíegyí ámu ni.”

15Múú ɔɔpɔ ibi díndínka amúsú, ɔlenatí unu á.

Atonyahé Iwi Atosunáhé

(Marko 10:17-31; Luka 18:18-30)

16Eke ɔku oyin ɔku léba Yesu wá befité mu ɔbéé, “Osunápú, yilé mɔmɔ nóbwe asa nénya nkpa ání itamatá?”

17Yesu léfité mu ɔbéé, “Ntogyi sù fude mí yilé iwi asún fité? Ɖbakúle pé gyí ɔha yilé. Mugyí Bulu. Táme ní fudekléa funyaá nkpa ání itamatá á, múmú gyi Bulu mbla asún ámusu.”

18Oyin ámu lélafité mu ɔbéé, “Múts mɔmɔ?”

Yesu lébláa mu ɔbéé, “Mámɔ ɔha, máts mbua, máwi ató, máka asún dínká fú bású. 19Bu fú sí mua fú yín, afudwe fú bá fé fú iwi.”

20Ɖyasubi ámu lébláa Yesu ɔbéé, “Ntegyi mú féésú. Nto é ntráa bwe?”

21Yesu lébláa mu ɔbéé, “Ní fudekléa fófɔn mú á, yefe fú iwisu ató féé, afuye kóba amu ha ahiánfɔ, méní fénya siadié ɔsúsú. Fɔbwé mú tá á, ba afubobuo ni.”

22Bréa ɔyasubi ámu lónu asún ánfí á, ulehíe han mu, ɔlenatí díín, tsúfé ɔhíé ɔbu ató.

23Múú Yesu lébláa mu akasípú ɔbéé, “Ɖnɔkwali nde mli bláa mbée, ibéhíe wá ɔnlun asa iwi onyapú obówie Bulu iwíegyí ámutɔ. 24Ntráa nde mli bláa mbée, ɔɔpɔn ha *kpósó ání ɔbótsun ɔbun-atɔ ɔbótó, dun ání iwi onyapú obówie Bulu iwíegyí ámutɔ.”

25Akasípú amu bonu asún ánfí á, ɔnó lobwie amú. Ɔni su befité bee, “Mómú ma mee Bulu ɔbóhɔ nkpa?”

26 Inu Yesu lélí kí amú alu. Múú ɔlebláa amú ɔbéé, “Anyánpúsato mú á, ɔhaa méetalí bwé ínu, táme Bulu mú tetálí bwé tógyító.”

27 Múú Petro léfité mu ɔbéé, “Íniá anulasí tógyító tswi bobuo fu á, nto abénya tsú fú búoto?”

28 Yesu lébláa amú ɔbéé, “Ɖɔɔkwali nde mli bláa. Bréá Bulu ɔbwé ɔyí ɔɔpwe amu, mí, Nyankpusa-Mu-Bi ánti netsiá mí numnyam owíe obíá ámusu á, mli ahá ánti mli buo mu ánti é mlétsiá awíe mbíá dúanyɔsu, gyi *Israel abusuan dúanyɔ ámu asún. 29 Ɖhagyíɔha ání alanátí sí mu wóyí, mu apíó, mu si mua mu yin, mu abí ntée ɔsulúv mí su á, Bulu ɔbéla há mu mú tsé dú tsé lafa, trá lahá mu nkpa ání itamatá. 30 Táme agyankpawu aku béba bemlí amawu, amawu amu aku é bébemlí agyankpawu.”

Nɔɔto Agyómá Ayɔpú lwi Yébi

20 1 Yesu létrá bláa amú ɔbéé, “Mú su Bulu iwíegyí ámu igyi fé asún ánti. Ɖɔɔtoɔpu ɔku létsiá. Eke ɔku ɔɔkusu nyanki-nyanki ɔyɔ ipa agyípu odunkákpá, abuyɔyɔ agyómá mu ndɔto. 2 Mwa amúnyɔ begyi bíá ání ɔbéka amú alíá butɔɔ ekewóle, ɔɔpu amú sísí agyómá ámu ɔyɔkpá. 3 Dokwebátɔ a, ɔledali yɔ dɔnsu, oloyówun aku é bulí, bumédé tɔto bwe. 4 Olotsu amú é ɔbéé buyɔyɔ agyómá mu ndɔto ha mu. Ibwé ɔbéka amú tɔá iɔ alé. Mú su ɔyɔ. 5 Dódúanyɔ pú ɔɔsato é á, ɔletrá pu aku sísí ndɔ ámutɔ. 6 Ntúpwe donuto, bréá ɔledali a, ɔletrá wun akwá bulí kpaali. Múú ɔlefité amú ɔbéé, ‘Ntogyi sú nde féé mlíí nfi, mli médé tɔto bwe?’ 7 Bebláa mu beɛ, ‘Ɖhaa mɔkúbɔ amu ipa.’ Múú ɔlebláa amú ɔbéé, ‘Múú mli é mli ɔtsun yɔyɔ agyómá mí ndɔto.’

8 “Bréá owí lɔpon a, ɔɔtoɔpu amu léti mu agyómású ɔkípu bláa mu ɔbéé, ɔtí ipa agyípu ámu féé, ɔkáa amú akɔ. Ɖkáa amú tsu amawu amusu alu ɔto agyankpawu amu. 9 Bréá ipa agyípu amu beba a, agyómású ɔkípu amu léka ahá ámutɔ ɔyɔ donuto ámu alíá butɔɔ ekewóle. 10 Bréá ɔto agyankpawu amu a, buki beɛ bénya dun alí, táme alí kén

ɔleka amú é ní. ¹¹Mú su ɔleka amú ako tá á, agyankpawu amu bowa tɔtɔi ɔɔɔɔɔɔ amusu bi. ¹²Beblí bæ, ‘Amapu anfi mú á, ɔɔnhwírí kule pé bowo agyómá. Aní mú anilalí owí krankpli ánfisu yó agyómá, táme faká ania amúnyno féé ako kule.’

¹³“Ɔɔɔɔɔɔ amu lébláa amúɔ kule ɔbé, ‘Agya, yé mɔkútafá fu o! Megyí itó amúú mía funyo aniléblí ámu napúhá fú á? ¹⁴Pu fú ató nati. Mídéklé mbé, néha amapu amu alá naká fú. ¹⁵Mma ɔkpa ání nópu mí kóba bwé tóá ndeklé? Ntéé mí awitɔlewa dé fú iwitɔ wie?’

¹⁶“Alí amapu bóbwé agyankpawu, agyankpawu é bóbwé amapu ni.”

Yesu Lowu Iwí Asón Blí Otse Saasi

(Marko 10:32-34; Luka 18:31-34)

¹⁷Bréá Yesu ɔyó Yerusalem a, ɔlekpa akasípú dúanyo ámu ya itsétó bláa amú ɔbé, ¹⁸“Mlunu! Ayó Yerusalem. Inu á, béle mí, Nyankpasa-Mu-Bi ánfí há Bulu *igyí ahapú dehen pú Mose mbla asunápú. Béha mí lowu ipón. ¹⁹Bópu mí wá ahá ání bomegyí Yudafɔ ibitɔ bóbwé mí ahinlá, bónnwen mí mpli, dá mí mántá *oyikpalíhesu. Táme Bulu ɔbélakúsúa mi eke sáásí tsú afúlito.”

Abí Oyín Ɔku Atɔ Kulíhé

(Marko 10:35-45)

²⁰Múú Sebedeo mu ka lékpa mu abi anyo beba, ɔleda akpawunu Yesu ayabito, kúlí mu ɔbé, ɔbwéé tɔku ha mu.

²¹Yesu léfité mu ɔbé, “Nto fudeklé?”

Ɔtsi ámu lébláa mu ɔbé, “Ha mí abi anyo ánfito ɔkule otsia fú gyɔpɔsu, ɔkule é otsia fú binasu bréá fúde *iwíe gyí.”

²²Yesu lébláa amú ɔbé, “Mluméyín tóá mludékulí.” Ɔlefuté Yohane muwá Yakobo ɔbé, “Mlétalí wun iwɔsun amúú nebá bowun amu?”

Bebláa mu bæ, “Ee, abétalí.”

²³Múú ɔlebláa amú ɔbé, “Mlówun iwɔsun ámu mú, táme mma túmi ání néle ahá ání bétsiá mí gyɔpɔsu ntéé mí

binasu. Otsiákpá unu ida gyo ahá ámúú mí Sí Bulu lalá unu yáí há ámu.”

24Bréá akasípú dú atráhe amu bonu asún ánfí á, Yakobo mva Yohane iwí lówa amú ɔbló. 25Múú Yesu létí amú, bláa amú ɔbéé, “Mliyin ání ɔmátófosu agyípu butehíé amú ahá, amú ahande é butenyá túmi amúú. 26Táme mlitɔ mú á, umába alí. Dhagyíɔha ání odekléá ɔɔbwe mlitɔ ɔhande a, ɔbwée mu iwí osúmpú ha mu aba atráhe. 27Dhá ání odekléá ɔɔbwe mli nkpa ogyápu ɔbwée mli ɔkpábi. 28Alí kén mí, Nyankpusa-Mu-Bi ánfí é mmeba mbée, busúm mí ní. Ahá osúmkpá neba, ampu mí nkpa ho ahá tsɔtsɔɔtsɔ nkpa.”

Ansibi Abwiepú Abanyó Uo Tsa

(Marko 10:46-52; Luka 18:35-43)

29Bréá Yesu mva mu akasípú buɔɔɔɔɔɔ Yeriko wúlutɔ ɔɔyó á, ɔɔɔm kpɔnkpɔɔnkpɔntí bobuo amú. 30Ansibi abwiepú abanyó aku butsie ɔkpa ámutɔ, bonu ání Yesu détsúun. Inu ɔkplón blí beé, “Aní Wíé, *Dawid mu na, wun aní nwe.”

31Dɔɔm amu ɔkplón wa amú beé bukpá ɔnó bun. Táme belakplón dun alí beé, “Aní Wíé, Dawid mu na, wun aní nwe!”

32Múú Yesu lési líí, tí amú, ɔlefíté amú ɔbéé, “Ntɔ mlúɔklé mlíaa, mbwée ha mli?”

33Bebláa mu beé, “Aní Wíé, ha aní awun ató.”

34Inu amú asún lówa Yesu nwe, ɔɔɔpu mu ibi dada amú ansíbi. Inunu bowun ató, bekplá buo mu.

Bɔho Yesu Fé Owíe Yerusalem

(Marko 11:1-11; Luka 19:28-40; Yohane 12:12-19)

21 1-2Bréá Yesu mva mu akasípú bebéen Yerusalem wúlu, beta Betfage wúlu ání ibu Nfɔ-nyíbu¹ ámu asu wie tá á, ɔɔwa mu akasípú abanyó gyankpá. ɔlebláa amú ɔbéé, “Mliɔ wúlu anfi ida mli ansító ánfísu. Ní mlowíé

¹21:1 Nfɔ-nyíbu igyi obubwí kuá ibu mantáa Yerusalem, butetí mú Olifbu.

lekítá amú. ¹⁶Mú su befíté Yesu bée, “Fumedénu asún ání nyebí ánfí budeblí?”

Yesu léle mú ɔ́nɔ́ ɔ́bée, “Ndenu. Mlumókúkla asún ání Bulu asún wanlínhé amu léblí? Ɖbée, ‘Fasúná nyebí pú amúá bumókútun nyɔ́pu alá bukánfu fú.’ ”

¹⁷Yesu lédalí wúlu amuto sí amú yó Betania. Inú ɔ́ledí eke ámu ni.

Pɔ́ntɔ́ Oyí Lwí

(Marko 11:12-14, 20-24)

¹⁸Oyi kehe nyanki, bréá Yesu léyinkí ɔ́bá Yerusalem a, akún de mu. ¹⁹Mú su bréá olowun pɔ́ntɔ́ kuá ilí mantáa ɔ́kpa á, ɔ́lebaí yó mú asi. Ɖɔ́yɔ́ á, omowun abí kuku mútɔ́, afítáa sɔ́n bu músú. Inu ɔ́lebláa pɔ́ntɔ́ ámu ɔ́bée, “Tsú nde fúmétrá swie abí ekekekeke!” Inuuy oyí ámu lówu.

²⁰Mu akasípú amu bowun alá oyí ámu labwé á, ɔ́nɔ́ lobwie amú. Mú su befíté bée “Ntogyi sù oyí ánfí lawú ɔ́tsáwule pé alí?”

²¹Yesu lébláa amú ɔ́bée, “Ɖnɔ́kwali nde mli bláa. Ní mlɔ́hɔ́ Bulu gyi, mlumégyi nwéen a, mlétalí bwé itɔ́ ánfí nabwé oyí ánfí pú múá idun mú. Mlétalí bláa ibi ánfí mlíaa, ‘Puli yowie ɔ́putɔ́.’ Ibópulí yó. ²²Ní mlɔ́hɔ́ Bulu gyi, mlókólí mu tógyítɔ́ á, mli ibi béda mú.”

Yesu Túmi lwi Asun Futéhé

(Marko 11:27-33; Luka 20:1-8)

²³Yesu léyinkí bowie Bulu ɔ́tswékpa wunsunésú unu. Bréá ɔ́de atɔ́ suná á, Bulu igyi ahapú dehen pú Yudafɔ́ ahande amu beba mu wá. Befíté mu bée, “Ma léha fú ɔ́kpa, fúde ntobí ánfí bwe? Ma léha fú túmi?”

²⁴Yesu léle mú ɔ́nɔ́ ɔ́bée, “Mí é nfíte mli asun kua kule. Ní mlelé mú ɔ́nɔ́ á, nébláa mli túmi oduá ndepubwé ntobí ánfí. ²⁵Bulu wá Asú Ɖbɔ́pú Yohane lénya túmi púbó ahá *asú, ntée nyankpusa?”

Amú wulewule ɔ́yɔ́ asún ánfítɔ́ bée, “Ní ablí aníaa itsú Bulu wá á, ɔ́béfíté aní ɔ́bée, mú ntogyi sù anímóhɔ́ mu gyi?”

²⁶Ntée ablí aniaa, anyánkprósa wá itsú.” Táme bude tóá ahá tsotsɔtsɔ ámu bɔ́bwe amú ifú nya. Tsúfé amú fée bohogyi ání Bulu ɔ́nsú ɔ́tɔ́pú Yohane gyí. ²⁷Mú su bele mú ɔ́nɔ́ bee, “Ohwée! Anuméyín ɔ́tínéá olenya mu túmi tsú.”

Mú Yesu é lébláa amú ɔ́bée, “Mómú mí é mméébláa mli túmi oduá ndepubwé ntobí ánfí.”

Oyin Ɔku Abi Anyo lwa Yébi

²⁸“Mlyɔ asón ánfito amlíki. Oyin ɔku mua mu abi anyo betsiá. Eke ɔku ɔlyɔ yébláa ɔdéhén ɔbée, ‘Mí bí, nde yɔyɔ agyómá mí ndɔɔ ha mi.’ ²⁹Ɖlebláa mu si ɔbée, ‘Mmɔ́yɔ.’ Mú ɔma a, ɔlelatse mu agywun, yó ndɔ́ ámutɔ. ³⁰Amú sí lénatí yó ɔkusu amu é wá yébláa mu alí kén. Ɖkusu amu lótsulá ɔbée, ‘Mí sí, nɔ́yɔ.’ Táme ɔmɔ́yɔ.” ³¹lwa Yesu léfité ahá ámu ɔbée, “Abi anyo ámutɔ ɔmɔ́mu lɔ́bwe dínká mu si asúnsú?”


Yudafɔ igyí ahapú dehen pú Yudafɔ ahande amu bebláa mu bee, “Ɖdéhén amu.”

Mú Yesu lébláa amú ɔbée, “Ɖnɔkwali nde mli bláa. Lampóo ahópu pú obu-ɔ́nɔ́ atsiápú bówie Bulu iwíegyí ámutɔ sí mli. ³²Tsúfé Asú Ɖbɔ́pú Yohane lóbosuná mli tsiátɔ́ oduá ida ɔkpa Bulu ansítɔ́, táme mliwóhɔ mu gyi. Lampóo ahópu pú obu-ɔ́nɔ́ atsiápú bɔ́hɔ mu gyi. Ɖma mliwóhun ání amú kúráá batse a, mliwétse mli agywun hɔ mu gyi.

Apafɔ Laláhe Aku

(Marko 12:1-12; Luka 20:9-19)

³³“Mliwu yébi iku é. Ɖɔɔɔpu ɔku lóɔɔ *wáun ndɔ. Olegyi iban bómlí mú. Olokwi wáun amu onyimékpá. Ɖɔɔpwe obu fúáhé ku há ndɔ́ ámu agyópu. Mú ɔɔpu ndɔ́ ámu wá apafɔ́ ɔ́bɔ́, olotu ɔkpa yó ɔmá ɔkutɔ. ³⁴Bréá wáun-abí amu kpɔ́tɔ́bɔ́ lófun a, ɔɔwa mu asúmpú apafɔ́ ámu wá ɔbée, buyóhɔ mu ogyíkpá ba mu. ³⁵Táme apafɔ́ ámu bekitá amú, dá ɔkule, mɔ́ ɔkule, dá ɔkule é abwi. ³⁶Nɔ́ mu wie amu létrá wa mu asúmpú bámbá ání butɔ́ dun agyankpapu amu. Apafɔ́ ámu ɔ́bɔ́we amú é alí kén. ³⁷Mú tráhe kúráá á, ɔ́leblí ɔbée, ‘Oo, bóbu mí bí kwíthé mú.’ Mú su ɔɔwa mu é. ³⁸Táme bréá



Mat

Wáun Ndo ní. (Mateo 21:33)

apafɔ ámu bowun mu bi ámu sísí á, bebláa aba bee, ‘Ónu obégyi mu si ató ní. Mlha amɔ mu, méni ndo ámu ibémlí aní klé.’³⁹Mú sv bekítá mu, bítía mu dáli ndo ámuɔ yómɔ mu.”

40“Ní ndo mu wie ɔbá á, nɔ mlilahogyi mlhaa, ɔóbwe apafɔ ánfí?”

41Yudafɔ igyi ahapú dehen pú Yudafɔ ahande amu bele mú ɔnɔ bee, “Ɖbéha aha laláhe anfi bówu lowu sínsín, ɔbélapú ndo ámu wá apafɔ bámbá ibitɔ. Amúá bétsiá pú mu ató-abí ba mu mú kpótíbi.”

42Mú Yesu léfuté amú ɔbéé, “Ntée mlumókúkla Bulu asun wanlínhé amu kí? Bɔwanlín bee,

‘Ibwi ámuú obu ayípu bekiná ámu
lébemlí okonkísóbwi ní.

Bulu lóbwe mú alí.

Ibu wánwan.’

43“Mú sv nde mlí bláa mbéé, Bulu ɔbóho mu *iwíegyí ámu lé mlí ibitɔ púhá ɔmá aní ɔóbwe tóá otekle.

44“Ínu sv ɔhá aní ɔledɔda ibwi ámu sv obébiabía blúblúblúblú. Ní ibwi ámu isúnkí dá ɔkusv é á, ibókwe mu

fíkófíkófíkó fé nfúó.^k 45Bréá Bulu igyi ahapú dehen pú Farisifo ámu bonu Yesu ayébi anfi á, ulowankí amú ání amú ɔde. 46Teki bekleá békutá mu, táme benya ifú, tsúfé ɔɔm amu butobú Yesu ání Bulu ɔnósú ɔtɔírú ogyi.

Ɔtsikpaín Iwí Yébi

(Luka 14:15-24)

22 1-2Yesu létrá bláa Yudafɔ igyi ahapú pú Yudafɔ ahande amu asún yébitɔ ɔbéé, “Bulu iwíegyí ámu igyi fé asún ání. Owíe ɔku dé ɔtsi kpaín há mu bi, 3ɔleti ahá ɔbéé, bubá nke ámu asi. Bréá owíe ámu lóbwe tá á, ɔlɔwa mu asúmpú ɔbéé, buyéti ahá ámu abuba, táme bekiná bá. 4Mú su ɔlɔlawá mu asúmpú bámbá ɔbéé, ‘Mlitra yebláa ahá ámu mliaa, nabwé tógyítɔ tá. Bamó mí nnantswie akɔnkpɔnti ámu pú amúá bawá nfo, níná atɔ ámu féé tá. Mú su bubá ɔtsi ɔkpaínkpá unu.’ 5Táme ahá ámú beyéti ámu bumekplá amú. Benatí sí amú yó amú agyómású. Aku benatí yó amú ndɔtɔ. Aku é benatí yó amú ibiá ogyíkpá. 6Amú atráhe bekitá asúmpú amu, dá amú, mó amú. 7Bréá owíe amu lónu asún ání á, ɔbls léhié kítá mu. Mú su ɔlɔwa mu usá akɔpú, bɔyómɔ ahá ámú bɔmɔ mu asúmpú amu, wá amú wúlu ogyá. 8Múú ɔlebláa mu asúmpú bámbá ɔbéé, ‘Baníná ɔtsikpaín atogyihe amu tá, táme ahá ámú neti ámu bumɔfun ha mí wóyítɔ ba. 9Mú su mliwie awúlutɔ, amliti ɔhagyíɔha ání mlówun, ɔba ɔtsi ɔkpaínkpá unu.’ 10Inu asúmpú amu bowie awúlutɔ. Beti ɔhagyíɔha ání bowun, aha wankláán pú aha laláhe féé. Mú su ahá ɔɔbulá ɔtsi ɔkpaínkpá unu dédéédé.

11 “Táme bréá owíe amu lébeki ahá ámú batí ámu a, olowun oyin ɔkuá ɔmɔwa ɔtsikpaín nketo atadié. 12Múú ɔlefuté mu ɔbéé, ‘Agya, nkáli ulɔbwe fumɔwa ɔtsikpaín nketo atadié asa feba nfi?’ Oyin ámu métalí lé mú ɔnó. 13Múú owíe amu lélabláa mu asúmpú ɔbéé, ‘Mlikli mu ayabi pú mu ibi, amlitswi mu wa oklún amutɔ. Inú isú múa kpisíi bu nu.’”

^k 21:44 Múts yéé 44 uma nwulú dada amu akutɔ.

14 Yesu lómɔ mu asún ɔnɔ ɔbéé, “Bulu tetí ahá tsɔtsɔɔtsɔ, táme ahá kpalobí pé ɔtelé.”

Lampóoka

(Marko 12:13-17; Luka 20:20-26)

15 Farisifo ámu bɔyɔbwe ɔnɔ-ɔkule ání bétetéé Yesu ɔnɔ́tɔ asún nú, abunya mu akutálé. 16 Mú su bɔwa amú akasípú pú Owíe *Herode ahá Yesu wá bee buyéfité mu bee, “Osunápú, anyin ání ɔnɔkwalipu fugyi, fútosúná Bulu asún ámu é ɔnɔkwalisu. Futamahá ɔhaa ɔtse fú agywun, tsúfé futamaku ɔhaa ansítú. 17 Mú su anidé fú fité anu. Aní mbla léha ɔkra ání akáa lampóo ha Roma owíe dehen Kaesare, ntée anumáka?”

18 Táme Yesu lówun amú agywun laláhe amu. Mú su ɔlefité amú ɔbéé, “Apinabwebí abwepú, ntogyi sú mlidé mí sɔ́ɔ kí? 19 Mlitsu kóba amúú butɔpóká lampóo amu iku ba mi anki.”

Bɔpɔba mu, 20 ɔlefité amú ɔbéé, “Ma nwun pú mu dá dín mósú?”

21 Bele mú ɔnɔ́ bee, “Kaesare.”

Mú ɔlebláa amú ɔbéé, “Múmú mlipu t́á igyi Kaesare klé ha Kaesare, amlipu ḿá igyi Bulu klé é ha Bulu.”



Lampóoka kóba ni.
(Mateo 22:19)

22 Yesu mbuai ánfí lóbwie amú ɔnɔ́. Mú su benatí.

Kusú Tsú Afúlitɔ lwi Asun Futéhé

(Marko 12:18-27; Luka 20:27-40)

23 Eke ámu kén á, *Sadukifo aku beba Yesu wá. Bugyi ɔpasua kvá buteblí bee, kusú tsú afúlitɔ má unu. Befité mu bee, 24 “Osunápú, Mose lówanlín tswi aní ɔbéé, ‘Ní ɔku mu mu ka bumɔkwí asa olowu sí mu ka ámu a, mu pio otsú mu ka ámu tsia, féki ɔkwu ha owupú ámu.’ 25 Oyin ɔkule abí abasiénɔ́ aku betsiá. Amótɔ́ ogyankpapu létsiá

ɔká, táme ɔmɔkwí asa olowu. Mu pio lótsu ɔsurapuka amu tsía, ²⁶táme mu é ɔmɔkwí. Ɔsaasi lótsu ɔtsi ámu tsía. Mu é ɔmɔkwí. Alu yótu osienósí amu. ²⁷Ɔma-ɔma a, ɔsurapu mu é lóbowu. ²⁸Afúli ɔkusóké a, amótɔ ɔmɔmu ɔbóbwe mu kulu? Tsúfé amó abasiénó ámu féé betsiá mu.”

²⁹Múú Yesu léle mú ɔnɔ ɔbéé, “Megyí mli ológyi. Mluméyín Bulu asun wanlínhé amu ntée Bulu túmi. ³⁰Ní afúli ɔkúsú á, ɔbóbwe fé Bulu-abɔpu. Buméetsiá aká mba akúlu. ³¹Mlumókókla asún ání Bulu onutó lébláa mli tsú afúlikusú iwɛ? ³²Bulu asun wanlínhé léblí ɔbéé, ‘Mígyí mli anáin *Abraham mba *Isak pú *Yakob Bulu ámu ni.’ Ɔni su megyí awupú Bulu ógyi, akɛankpapu Bulu ógyi.”

³³Bréá ɔɔm amu bonu asún áni á, mu atosunáhé anfi leha ɔnɔ lobwie amó.

Bulu Mbla Ámuto Múá Ɔɔn

(Marko 12:28-34; Luka 10:25-28)

³⁴Bréá Farisifo bowun ání Yesu lalé Sadukifo ámu asún ɔnɔ, asún lawú wá amó ɔnɔ á, bekpa aba ya Yesu wá. ³⁵Amótɔ ɔkuleá ogyi mbla osunápú léfuté Yesu asún, ɔpusɔ mu ki. ³⁶Ɔlefuté Yesu ɔbéé, “Osunápú, Bulu mbla ámuto mɔmu dún?”

³⁷Yesu lébláa mu ɔbéé, “ ‘Pɔ fú klɔn, fú ɔkláa pú fú agywun féé dwe fú Wíe Bulu.’ ³⁸Ɔni gyí mbla ámuto gyankpapu áni Ɔɔn mú féé ní. ³⁹Nyɔɔsi é igyi fé mú. ‘Dwe fú bá fé fú iwɛ.’ ⁴⁰Mose Mbla pú Bulu ɔnɔsú atɔpú amu atosunáhé féé luí mbla anyɔ ánfisu.”

Ma Gyí Kristo Amu?

(Marko 12:35-37; Luka 20:41-44)

⁴¹Ɔníá Farisifo ámu bebefia sí bulí su á, Yesu léfuté amó ɔbéé, ⁴²“Nkálí mlidé Kristo, (ɔhá ámú Bulu ladá mu ofúli amu) iwɛ gywíin? Ma mu na ní?”

Bebláa mu beé, “Owíe Dawid mu na ní.”

⁴³Ɔlelafuté amó ɔbéé, “Mú ntogyi sú Ɔɔe Wankíhé léha Owíe Dawid létu mu ɔbéé ‘Mí Wíé?’ Tsúfé Owíe Dawid léblí ɔbéé,

44 ‘Ani Wíe Bulu lébláa mí Wíe ɔbée,

Tsia mí gyɔpɩsu nfi

yɔfun bréá néha fétsatsáa fú alupósú?’

45 Ní Owíe Dawid onutó létí ɔhá ánfí Bulu ladá ofúli anfi ɔbée, mu wie a, nkáli sù ɔtráa ogyi mu na?”

46 Amútó ɔkuku métalí lé mú ɔnó. Tsú eke ámu a, ɔhaa métrá wa klɔn futé mu asvansu.

Mose Mbla Asunápú Pú Farisifo Tsiátó

(Marko 12:38-39; Luka 11:43, 46; 20:45-46)

23 ¹Asún ánfí ɔma a, Yesu lébláa ɔɔm amu pú mu akasípú amu ɔbée, ²“Mose mbla Farisifo pú Mbla asunápú amu budesuná. ³Mú su mligyi amú asun blíhé féésú, táme mlumátsiá amú atsiábi. Tsúfé butamagyi amú onutó asun blíhésu. ⁴Butɔpú atɔ dwindwín súra ahá, táme amú onutó butamapú osrebi ɔkule kúráá tsá amú tsu. ⁵Butɔbwé amú tógyító ahá ansísú. Butɔwánlín Bulu asún dínká tati téihésu, púklí amú ɔsukpi pú amú bina ɩbasu. Butɔlú nfé tíntíntín síansían amú atadié ɔnó. ⁶Butekle otsiákpá yilé tsiá nke ogyíkpá pú Yudafɔ Ofiakpa. ⁷Bedáli yɔ dɩnsu á, butekle beé ahá butíi amú beé, ‘Asunápú,’ abubun ha amú itsiá. ⁸Mli féé á, apíó mligyí. Mú su mlumáha abuti mlitɔ ɔhaa osunápú. ɔbakúle pé gyí mli osunápú. ⁹Ali kén mlumáti ɔhaa mli sí ɔsolúu anfisú ní. Tsúfé ɔsí ɔkule pé mlibu, ɔbu ɔsúsú. ¹⁰Tráhetráhe a, mlitɔ ɔhaa máha abuti mu nkpa ogyápu. Tsúfé nkpa ogyápu ɔkule pé mlibu. Mɔgyí Kristo, (ɔhá ámúú Bulu ladá mu ofúli amu). ¹¹Mlitɔ ɔhande ɔbwée mli osúmpú. ¹²Tsúfé



Farisiyin ni. (Mateo 23:5)

fúá fotsu iwí á, Bulu ɔbéba fu asu. Fúá feba iwíasi é á, Bulu obótsu fu fúá.

Apinabwebí Abwepú

(Marko 12:40; Luka 11:39-42, 44, 52; 20:47)

13-14“Mli Farisifo pú Mose mbla asunápú, apinabwebí abwepú, mligyɔwi ní. Mlulatin Bulu iwíegyí ámu ɔkpa wá ahá. Mli onutó mlímédékléá mlówie unu, mludé ahá ání bude mbódí bɔ beɛ bówie unu é ɔkpa tíin.¹

15“Mli Farisifo pú Mose mbla asunápú, apinabwebí abwepú, mligyɔwi ní. Tsúfé mlitefá lun fá ɔpu, dú ibu kplí ibu há ɔha tedámlí kluntɔ. Táme ní ɔdámlí kluntɔ tá á, mlitelábwé mu otemlí usubutí ogyá ání itamaduntɔ ɔyɔpú dun mli onutó.

16“Ansibi abwiepú ání mludé ahá kpa, mligyɔwi ní. Mluteblí mliaa, ‘Ní ɔku ɔká Bulu ɔtswékpa obu ámu ntam a, imehián ání obégyi músú. Táme ní ɔká sika pepe atɔ́a ibu ɔtswékpa obuto unu mú ntam a, ilehián ání obégyi músú.’
17 Ansibi abwiepú! Aha mimláhe! Mútɔ́ mɔ́mu bu labi dun? Sika pepe atɔ́ ámu lóó, ntée Bulu ɔtswékpa obu ámú ulahá sika ámu lamlí Bulu klé amu? 18 Mlitetráa blí mliaa, ‘Ní ɔku ɔká *afɔ́ɔɔɔ-asubwi ntam a, imehián ání obégyi músú. Táme ní ɔká afɔ́ɔɔɔ-abɔ́ɔ́ ámu ntam mú á, ilehián ání obégyi músú.’
19 Ansibi abwiepú! Mútɔ́ mɔ́mu bu labi dun? Afɔ́ɔɔɔ-abɔ́ɔ́ ámu ntée afɔ́ɔɔɔ-asubwi ámú ulahá mú ilamlí Bulu klé amu? 20 Ní feká afɔ́ɔɔɔ-asubwi amu ntam a, faká ibwi ámu pú atɔ́a idun músú féé ntam. 21 Ní feká Bulu ɔtswékpa amu ntam a, faká Bulu mua mu otsiákpá ntam. 22 Ní feká ɔsúsú ntam a, faká Bulu mua mu owíe obíá ntam.

23“Mli Farisifo pú Mose mbla asunápú, apinabwebí abwepú, mligyɔwi ní. Mluteye mli ɔtsutsú pú kpántánkplámá

¹23:14 Mútɔ́ yée 14 bu nwólú dada amu akutɔ́: Mli Farisifo pú Mose mbla asunápú, apinabwebí abwepú, mligyɔwi ní. Mlutebí aháɔ́ b́ mpáú tíntíntín, táme mlitɔ́swílí asvrapv amó wóyí pú amó atɔ́ féé é. Íni su Bulu ɔbébutí mli isv dun aha tráhe.

aná féétó idú, pú *idúsí há Bulu. Táme mlimédé Bulu mbla amúú ihé dehián, igyi asúngyí ɔɔkwalisu, aba nwewúun pú ɔɔkwaliwa ámusu gyi. Múdéhián ni, táme mlimákiná iyétó dúsí amu é ha. ²⁴Ansibi abwiepú ání mludé ahá kpa, mligyowí ní. Mlitɔtsrɔ mbépi lé oputsútó, táme mlitemé mbéwun.

²⁵“Mli Farisifo pú Mose mbla asunápú, apinabwebí abwepú, mligyowí ní. Tsúfé mlitɔfwí mli nwe pú mli nlepe ɔma wankláán, táme atóá mlilapú owi múa ɔnsipe swíí ahá sɔ́n bu mótó. ²⁶Farisifo ansibi abwiepú, mligyankpa fwí nwe múa nlepe ámutó, mú ɔma é bétun.

²⁷“Mli Farisifo pú Mose mbla asunápú, apinabwebí abwepú, mligyowí ní. Mlilabwé fé ntsán ání bakpá mú afá futútúútú, mú iwí lawá akíle. Táme mótó mú á, afúli awú pú ató plóhé sɔ́n bó mú. ²⁸Alí kén mligyí ní. Ahá buteki mli ání mligyí yilé abwepú. Táme mli kluntó mú á, apinabwebíbwé múa lalahébwé sɔ́n bó mú.

Bulu Isobití (Luka 11:47-51)

²⁹⁻³⁰“Mli Farisifo pú Mose mbla asunápú, apinabwebí abwepú, mligyowí ní. Tsúfé mlitɔpwé Bulu ɔ́nsú atóipú pú yilé abwepú ámúú betsiá ámu ntsán, lá mú iwí wankláán, blí mlíaa, ‘Ní anulétsiá aní anáin brésú asa ɔ́mɔ Bulu ɔ́nsú atóipú anfi á, teki anumówa ibi mótó.’ ³¹Mli asun blíhé anfi désuná ání mligyí Bulu ɔ́nsú atóipú amɔpú ámu abí-aná ní. ³²Mliwuna yɔ́ mósú, amlumɔ mli anáin bwehé ámu ɔ́nó. ³³Awɔ́, abe abí-aná! Mlétalí srí sí ipón ámúú Bulu ɔ́béha mli, kpá mli wá isobití ogyá ámúú itamaduntó ámu? ³⁴Mú su nde Bulu ɔ́nsú atóipú, anyansapu pú Mose mbla asunápú wa sísí mli. Táme mlómɔ aku, dá amútó aku mántá oyikpalíhesu. Mlónwen amútó aku mpli mli ofiakpa, dínká akusu tsú awúlusu yó awúlusu. ³⁵Íni su yilé abwepú ámúú mlíaa mli anáin mlílamó tsú *Habelsu bɔ́fun Sakaria, ogyi Barakia mu bi ámúú mlílamó Bulu ɔ́tswékpa obu múa *afɔ́dɛ-asubwi amu nsné ámu féé obugya béba mliu.

³⁶Ɔnɔkwali nde mli bláa. Ínu aná fée su Bulu ɛsubití béba mli ndemba-abí ánfisu ní.

Yerusalemfo lwi Ɔdwe

(Luka 13:34-35)

³⁷“Óo Yerusalemfo, Yerusalemfo! Mlitómó Bulu ɔnósú atɔ́pú, dá abí ání Bulu lawá sísí mli abwi mó ní. Ntekleá nóbun mli abísú brégyíbré, fé alá bate tobun mu abísú, táme mlitamahá mí ɔkpa. ³⁸Mluki, Bulu obési mli ɔtswékpa tswi mli, ibédi kpan. ³⁹Tsúfé nde mli bláa mbée, mli méetrá wun mi ekekeeke, yófun ekeá mléblí mliáa, ‘Bulu oyúla ɔhá ámúú ɔbá mu ɛdátó.’ ámu.”

Bulu Ɔtswékpa Amu Bwie

(Marko 13:1-2; Luka 21:5-6)

24 ¹Bréá Yesu lédalí Bulu ɔtswékpa unu ɔyó á, mu akasípú amu benatí yótu mu, súná mu ɔtswékpa unu mbu ámu. ²Múú ɔlebláa amú ɔbéé, “Mlilawun mbu akpɔnkpɔnkpɔnti ánti fée? Ɔnɔkwali nde mli bláa. Bóbwie mó fée bun. Ibwi kule kúráá méesian dinká mó bású.”

lwiɔsun Múa Iklán

(Marko 13:3-13; Luka 21:7-19)

³Bréá Yesu tsie Nfɔ-nyíbu ámuɔ, ɔde Bulu ɔtswékpa amu kú a, mu akasípú amu nkule befíté mu beɛ, “Bla aní, bré mɔmɔtɔ ínu fée béba? Osúna mɔmu é ɔbéba, ibósuná ání fú bábu pú ɔyí ɔnómóké lafun?”

⁴Ínu Yesu léle mú ɔnó ɔbéé, “Mluki wankláán, ménu ɔhaa méemlé mli. ⁵Tsúfé ahá tsɔtsɔtsɔ bópu mí dá ba beɛ, amúgyí Kristo, (ɔhá ámúú Bulu ladá mu ofúli amu) ni. Bémlé ahá tsɔtsɔtsɔ bófwi ɔkpa. ⁶Ní mlonúá usá ladá mantáa mli ntée ɔtunekú á, opúni mátsíí mli. Tsúfé lehián ání ínu aná fée béba, táme imedésuná ání ɔyí ɔnómóké ámu lafun. ⁷Tsúfé ɔmá bóko aba. Awíe bókusú líí abasú. Akún béba, ɔsulúw békpunkí ntíné-ntíné. ⁸Ínu fée igyi fé lwiɔsun ání ɔtsi towun bréá ikwú de mu dwiín.

9“Alí bré ámutɔ á, mí su ɔmá-ɔmá bólu mli. Bédinká mli, pú mli há bówa mli amumuyɔ, mɔ mli. 10Mli ahá tsɔtsɔtsɔ bédida hógyitɔ. Bólu aba, lé aba há. 11Afunu awapú béblí bæ, Bulu ɔnɔsú atɔ́pú bɔgyi tsɔtsɔtsɔ béba bemlé ahá tsɔtsɔtsɔ, há amú bófwɔ ɔkpa. 12Lalahebwe bómoní. Mú su ahá tsɔtsɔtsɔ buméetrá dwe aba. 13Táme ɔhá ání ɔletalí líí kínkíínkín yɔfun ɔyí ɔnɔmɔké á, Bulu ɔbɔhɔ mu nkpa. 14Mú óó á, ahá béda Bulu iwíegyi ámu iwɔ asun wankláán ánfɔ ɔkan ɔyítɔ féé, ménɔ ahá féé bónu mú, asa ɔyí íbɔmɔ ɔnɔ.

ᐱᐅᐅᐅᐅᐅ ᐅᐅᐅᐅᐅ

(Marko 13:14-23; Luka 21:20-24)

15“Ní mlowun akisítɔá itobwíé ɔmá, ida ɔwankíkpa unu, ɔde Bulu ɔtswékpa unu kpɔ́í, fé alíá Bulu ɔnɔsú ɔtɔ́pú Daniel léblí tswɔ a,—Aklápu, mlinu mú asú!— 16múmú ahá ání bubu Yudea ɔmátɔ busrú yɔ abusu. 17ɔhá ání ɔdɔn obusu mákpli ɔbéé, moyótsu tɔtɔ obuto. 18ɔhá ání ɔbu ndɔtɔ é ɔmáiyínkí ba wóyítɔ botsu mu tati. 19Amenyapú pú abí-ayín ání bɔpia abi ɔɔbwe alí bré ámutɔ, bɔgyɔwɔ ní. 20Mlikokoli Bulu mliaa, mli ɔsríké amu umábwe nyankpu mɔ́a atsalíbí ntée *ɔkpúnú ɔdaké. 21Tsúfé tsú ɔyí asitsuábɔ a, asun wunhe ání íbéba alí bré ámutɔ odu kuku mɔ́kúba kí. Mú odu kuku é méetrá ba ekekeke. 22Ní Bulu médunkí nke ámusu á, tɔkɔ ɔhaa méesian ɔyítɔ. Táme ahá ámutú alalé púbwé mu kle amu su aladínkí nke ámusu.

23“Alí bré ámutɔ á, ní ɔku lébláa fu ɔbéé, ‘Kí, Kristo, (ɔhá ámutú Bulu ladá mu ofúli amu) bu nfi ntée nána’ á, máhogyi. 24Tsúfé ahá ání bæ amógyí Kristo amu pú ahá ání bówa afunu bæ, Bulu ɔnɔsú atɔ́pú bɔgyi tsɔtsɔtsɔ béba ɔyítɔ. Bóbwé ofúla pú osúna akpɔnkpɔntɔ púmlé ahá. Ní bétalí kúráá á, bémlé ahá ámutú Bulu lalé ámu é. 25Mlinu, nde mli ɔlá da yáí asa íba.

26“Ní ɔku ɔbláa mli ɔbéé, ‘Kí, Kristo amu laba ɔbu dimbísú’ a, mli mádalɔ yéki. Alí kén ní béblí bæ, ‘ɔbu obutótɔ’ é mli máhogyi nɔ. 27Tsúfé mí, Nyankpusa-Mu-Bi

ánfi ɔ́báke ɔ́bɔ́wɛ fé alí á múú nyankpu ɔ́fwí ɔ́bi, butowun mú tsú owí ɔ́dalukpa yédali owí ɔ́kplíwíékpa amu.

28“Ɔ́tínéá ɔ́wuhé da a, ɔ́nó alása butefia.

Nyankpusa-Mu-Bi Ámu ɔ́bábi

(Marko 13:24-27; Luka 21:25-28)

29“Ɔ́wɔ́sun wúun amu ɔ́ma a, owí ɔ́béta, ɔ́tsra é ɔ́métrá féi. Ntsrakpabi békpa tsú ɔ́súsú beda. Nwulótáa múa mútɔ́ atɔ́ féé békpunkí. 30Mú ɔ́ma a, mlówun mí, Nyankpusa-Mu-Bi ánfi ɔ́bábi ɔ́súsú. Ɔ́yítɔ́ ahá féé bósu. Ɔ́hagyísha obówun ání mí, Nyankpusa-Mu-Bi ánfi napú túmi múa numnyam kpɔ́nkpɔ́nti mbu nwulótáatɔ́ tsú ɔ́súsú nebá. 31Inu á, ɔ́kpe ku ɔ́bélun kúklúkúú, Bulu ɔ́bówa mu abɔ́pu béyekpa mu ahá á múú alalé ámu tsú ɔ́yí afunka ana ámu féésú.

Ɔ́yí Ɔ́nómɔ́ ɔ́wɔ́ Osúna

(Marko 13:28-31; Luka 21:29-33)

32“Mlɔ́puki ɔ́ntɔ́ ɔ́yí. Ní mú abámbi depɔ́í, ide ate ɔ́pɔ́we le á, mlɔ́tɛbí ání awikpan bré lafun. 33Alí kén, ní mlowun ání ntobí ánfi féé ide mútɔ́ bá a, mlébi ání mí, Nyankpusa-Mu-Bi ánfi ɔ́bábi lafun ta ní. Nawíé wóyí ámu ɔ́nɔ́ tá. 34Ɔ́nɔ́kwali nde mli bláa mbéé, ndemba-abí ánfi féé bumóowu tá asa ínu féé béba mútɔ́. 35Ɔ́sú múa así féé bótsun, táme mí asun blíhé móɔ́tsun ekekekeke.

Nyankpusa-Mu-Bi Ámu Ɔ́báke

(Marko 13:32-37; Luka 17:26-30, 34-36)

36“Ɔ́haa méyín eke ntée bréá ntobí ánfi féé ɔ́béba. Bulu-abɔ́pu bumeyín. Bulu mu Bi ámu é méyín, nkétí aní Sí á múú ɔ́bu ɔ́súsú ámu nkule pé yin. 37Alí á múú ilegyi *Noa brésú amu a, alí ɔ́bégyi mí, Nyankpusa-Mu-Bi ánfi é ɔ́bábi ni. 38Tsúfé asa ntsubulábí amu ɔ́fun a, ahá betsiá búde atɔ́ gyí, bude ntá núu, bude aká tsiá, bude atsi kítá há akúlu alu yófun ekeá Noa lówie mu dáka kpɔ́nkpɔ́nkpɔ́nti ámutɔ́. 39Ɔ́haa mébi tɔ́á ide músú yɔ́, kpéfun bréá ntsu ámu ɔ́bulá

súrá amú fée náti. Alí kén buméebi mí, Nyankpusa-Mu-Bi ánfí íbábi ní. ⁴⁰Alí bré ámutó á, ní ayin abanyó bulí ndó kuletó bude agyómá yó á, Bulu obótsu ɔkule sí ɔkule. ⁴¹Ní atsi abanyó bude nfúó kwe á, Bulu obótsu ɔkule sí ɔkule.

⁴²“Mlídinka ansí iwísu, tsúfé mlíméyín ekeá mli Wíe ɔbéba. ⁴³Táme mlinu asún ánfí. Ní wóyí mu wie yin onyé bréá owikplu ɔbéba mu wóyító a, tekti ologyo mu wóyí, owikplu móbwie wíé, wí mu ató. ⁴⁴Mú su mli é mligyo, tsúfé mí, Nyankpusa-Mu-Bi ánfí néba bréá mli ansí medín mísú.

Osúmpú Wankláán Pó ɔlaláhe

(Luka 12:41-48)

⁴⁵“Ma mee gyí osúmpúá ɔletin ansí, ɔbu ɔnɔkwali? Mu íbitó mu wie tɔpú mu aba atráhe wá, ɔbéé ɔhá amú atogyihe dinka brésú. ⁴⁶Ansí bégyi osúmpú amu, ní mu wie amu ɔbá bowun ání lélé ɔde mú bwe. ⁴⁷Ɔnɔkwali nde mli bláa. Mu wie amu ɔbópu mu ató fée wá mu íbitó. ⁴⁸Táme ní osúmpú laláhe ogyi, ɔleblí wá nwuntó ɔbéé, ‘Mí wíe méeba séi.’ ⁴⁹Ínu su olefi así ɔde mu aba asúmpú da, mva ntá abupú bude ató gyí si amú, bude ntá núu bu á, ⁵⁰mu wie amu ɔbéba bófwie mutó ekeá ɔmedín ansí. ⁵¹Mu wie amu ɔbéhie títi mutó, trá butí mva apinabwebífo ámu asu kékée. Ínú isú múa kpisíi bu ní.

Mbitebí Dú Aku lwti Yébi

25 ¹“Bulu iwíegyí ámu íbóbwe fé mbitebí dú akúá botsu amú nkandíe dálú beyéfia ɔká pɔpwe otsiápu ɔku. ²Amótó abanú bemimláa, abanú é betin ansí. ³Aha mimláhe amu botsu amú nkandíe, táme bumotsu nfo kuku kítá. ⁴Táme atiansipu amu botsu nfo wá atótó kítá. ⁵Ɔká otsiápu amu mókɔsí ba. Mú su mbitebí ámu fée bɔgyɔsí, tsun mútó dídi.

⁶“Ɔyí-nsiné á, ɔku lósurá okitikíti ɔbéé, ‘Ani pi, ɔká otsiápu amu ɔbá o! Mlídali yefia mu!’ ⁷Ínu mbitebí ámu fée bɔkusú nywé amú nkandíe. ⁸Aha mimláhe amu bebláa atiansipu amu bee, ‘Ani nkandíe dedúun. Mú su mlíha ani



Mbitebí ámu féē b̄kvsú nywé amú nkandíe. (Mateo 25:7)

nf̄o kpalobí awa aní kléto.’ 9Múú atiansip̄u amu bebláa amú bee, ‘Ó-o, um̄ots̄. Im̄ó̄f̄un ania ml̄nyo. M̄lyo afep̄ú wá, am̄lyocho ml̄i klé.’ 10Bréa aha mimláhe amu b̄oju ɔkpa b̄oȳ á, ɔká otsiápu amu léba. Amú ámúú beda iw̄isu ámu bobuo ɔká otsiápu amu wíe ɔká otsiákpá unu, oyin ámu asúmpú befin obu ámu.

11“Mú ɔma a, mbitebí atráhe amu é beba belí klun ɔma, blí bee, ‘Ani sí, finki ha aní awie.’ 12Táme ɔká otsiápu amu lébláa amú ɔbée, ‘On̄okwali nde ml̄i bláa, mmeyín ml̄i ɔkpagyíɔkpasu.’ ”

13Yesu lóm̄o mú ɔn̄o ɔbée, “Ínu su ml̄ida iw̄isu, tsúfé mí, Nyankpusa-Mu-Bi ánfi néba bréa ml̄i ansí medín m̄ísú.

Asúmpú Abasá Iw̄i Yébi

(Luka 19:11-27)

14“Nyankpusa-Mu-Bi ámu ibábi b̄óbwe fé ɔkuá ɔde ɔkpa tu, ɔleti mu asúmpú, ye mu ató há amú ɔbée, bukú m̄úsú ya mu. 15On̄oju sika pepe akente anu há ɔkule, pú akente anyo

há onyɔɔsi, ɔɔpu kente kule é há ɔsaasi. Ɖleha okugyɔku mu ɔwunlín ɔnɔ asa ɔlenatí. ¹⁶Osúmpú á múú olenya akente anu ámu lówa ɔsa pú kɔba amu fi ibíágyí asi. Mú su umowa ɔpá kuku, olenya akente anu dínká múú. ¹⁷Onyɔɔsi amu é lédamlí ibi mu sika pepe akente anyɔ ámu su alí kén. Mú su olenya akente anyɔ dínká múú. ¹⁸Táme ɔsaasi amúú olenya kente kule amu mú lóyókwi ɔbɔ, pú mu wie sika pepe amu ɣáín mútɔ.

¹⁹“Uowa ɔpá asa amú wie amu lótsu mu ɔkpa ámu ba, ɔleti amú ɔbéé, mua amúnyɔ bóbu akúnta. ²⁰Osúmpú á múú olenya sika pepe akente anu ámu lótsu múa múú ɔdínka akente anu ámu ba mu wie, bebláa mu ɔbéé, ‘Mí wíé, feha mí sika pepe akente anu. Mí é nanyá akente anu dínká múú. Mú ní.’ ²¹Mu wie amu léda mu ipán, blí ɔbéé, ‘Fabwé atɔ. Osúmpú wankláán fúgyi. Íniá fawá ɔnɔkwali atɔ túkúrííbi ánfuto su á, nɔpu fú yáí mí atɔ tsɔtsɔɔtsɔ ɔnɔ. Ba afubetsiá mí wá, anya ansigyí.’

²²“Osúmpú onyɔɔsi amúú olenya sika pepe akente anyɔ ámu é lébláa mu wie ɔbéé, ‘Mí wíé, sika pepe akente anyɔ feha mí. Mí é nanyá anyɔ dínká múú. Mú ní.’ ²³Mu wie amu léda mu ipán, blí ɔbéé, ‘Fabwé atɔ. Osúmpú ɔnɔkwali pu fúgyi. Íniá fawá ɔnɔkwali atɔ túkúrííbi ánfuto su á, nɔpu fú yáí mí atɔ tsɔtsɔɔtsɔ ɔnɔ. Ba afubetsiá mí wá, anya ansigyí.’

²⁴“Múú osúmpú amúú olenya sika pepe kente kule amu é lébebláa mu wie ɔbéé, ‘Mí wíé, nyin ání fú asún bu ɔnlun. Futɔkpótí atɔ ɔtínéá fumodu; futekpá atɔ-abí ɔtínéá fumefutá. ²⁵Mú su nanya ifú pú fú sika pepe amu ɣáín ɔbɔtɔ. Mú ní, ho fú atɔ.’

²⁶“Inu mu wie amu lébláa mu ɔbéé, ‘Osúmpú laláhe, ɔwuliyɔpú fúgyi. Fuyin ání ntɔkpótí atɔ ɔtínéá mmodu, ntekpá atɔ-abí ɔtínéá mmefutá atɔ. ²⁷Íniá fuyin mú alí á, teki fɔpu yɔtswi sika ɔyaíkpá. Íniá naba a, teki nɔyɔho múa múú abí.’ ²⁸Múú oyin ámu lébláa mu asúmpú amu ɔbéé, ‘Mlusu mu sika pepe kente kule amu ha ɔmuamúú alanyá akente idú ámu. ²⁹Tsúfé ɔhá ání ɔbu tsɔtsɔ á, betrá pu ɔku tsía mútɔ há mu, obénya tsɔtsɔɔtsɔ. Táme ɔhá ání ɔma á,

bóswí mu kpalobíbiá ɔbu, ³⁰amlutswi osúmpú anfi ɔma labi ánfí wa oklúntɔ. Inú isú múa kpisíi bu ni.'

Asúngyí

³¹"Ní mí, Nyankpusa-Mu-Bi ánfí nebá mí iwíe ogyíkpa, Bulu-abɔpu fée bvbuo mi á, nétsiá mí ɔsúsú numnyam owíe obíású. ³²Békpa ɔyítɔ ahá fée befia mí ansítɔ. Inu nótɔsí amótɔ, fé alá mbwi ɔkparú tótɔsí akúfa lé akpalátɔ. ³³Fówun nahá akúfa amu balíi mí gɔɔpɔsu, akpaláa amu é balíi mí binasu. ³⁴Inu mí ánfí ngyi Owíe anfi nébláa ahá ámúbú bulíi mí gɔɔpɔsu ámu mbée, 'Mli ahá ánfí mí Sí layúlá ánfí mliiba, amlibetsiá iwíegyí ámúbú ɔlayáí há mli tsú ɔyí asutsuábi ɔpá ámutɔ. ³⁵Tsúfé akón lekitá mí á, mliléha mí atɔ negyi. ɔmewóli lekitá mí, mliléha mí ntsu nonu. Nɔbwe ɔfɔɔ, mliɔhɔ mi ɔfɔɔ. ³⁶Nenatí yayá, mliléha mí tati nedidá. Nɔɔ, mliléki mi. Nedi obu, mlilébá beki mi.'

³⁷"Inu yilé abwepú ámu béfité mí bee, 'Ani Wíé, ɔmenke anulówun ání akón de fú, anuléha fú atɔ fegyí? ɔmewóli de fú, anuléha fú ntsu fonu? ³⁸Fɔbwe ɔfɔɔ, anulɔhɔ fu ɔfɔɔ? ɔmenke fenatí yayá, anuléha fú tati fedidá? ³⁹ɔmenke fɔɔ, ntée fedí obu, anulébá beki fu?'

⁴⁰"Inu mí ánfí ngyi Owíe ánfí nébláa amú mbée, 'ɔnɔkwali nde mli bláa. Tógyítɔá mliɔbwe há mí apíó ánfí ahá butamabú amú wá ahátɔ ánfítɔ ɔku á, mí mliɔbwe mú há á.'

⁴¹"Inu nébláa ahá ámúbú bulíi mí binasu ámu é mbée, 'Mlikpukpe tei nfi. Bulu lalwíi mli. Mliɔɔ ogyá ámúbú utamadun, Bulu lélayáí há ɔbunsám múa mu abɔpu amutɔ. ⁴²Tsúfé akón lekitá mí, mliíméha mí atogyihe. ɔmewóli lekitá mí, mliíméha mí ntsu annu. ⁴³Nɔbwe ɔfɔɔ, mliúhɔ mi ɔfɔɔ. Nenatí yayá, mliíméha mí tati andida. Nɔɔ, nedi obu; mliíméki mi.'

⁴⁴"Inu amú é béfité mí bee, 'Ani Wíé, ɔmenke anulówun ání akón de fú, ɔmewóli de fú, fugyi ɔfɔɔ, funa yayá, fudelo ntée fuda obu; anumébeke fu?' ⁴⁵Inu mí ánfí ngyi Owíe anfi nébláa amú mbée, 'ɔnɔkwali nde mli bláa. Ali ámúbú mliúɔbwe mú há mí apíó ánfí ahá butamabú amú wá ahátɔ ánfítɔ ɔku á, mí

mlumɔbwe há á. ⁴⁶Bulu ɔbéha amú bóyo iwɔsun ání utamatátɔ, táme yilé abwepú ámu mú bénya nkpa ání utamatá.”

Bektlíú Yesu Nwunsu

(Marko 14:1-2; Luka 22:1-2; Yohane 11:45-53)

26 ¹Bréá Yesu lósuná atɔ ánfɔ fée tá á, ɔlebláa mu akasípú amu ɔbéɛ, ²“Mliyin ání ulasí nkenyɔ bégyi Israelfɔsu *Katsun Nke. Nke ámutɔ á, ɔku ɔbɔpu mí, Nyankpusa-Mu-Bi ánfɔ wá mí alupú ɔbutɔ, béda mí mántá *oyikpalíhesu.”

³⁻⁴Alɔ bré ámutɔ á, Yudafo Bulu igyí ahapú dehen pú amú ahande befia igyí ɔhapú dehen Kaiafa wóyítɔ, kítá agywun ɔkpa ání bɔtsun músú kítá Yesu ɔaintɔ, mɔ mu. ⁵Táme beblí beɛ bumɔɔbwe mú nke ámutɔ, méni kpokiti méeda ɔmá ámutɔ.

Ofobí Fánfánfán Pwólí Yesu

(Marko 14:3-9; Yohane 12:1-8)

⁶Bréá Yesu bu Betania wúlutɔ, Simon ɔkuá alalɔ *ɔlɔ pepe ki wóyítɔ ɔde atɔ gyí a, ⁷ɔtsɔ ɔku léba mu wá. ɔde prentva wankláán kuá ofobí fánfán ání ɔbu bíá bɔ mú, ɔletséí ofobí ámu wólí Yesu nwuntɔ. ⁸Yesu akasípú amu benya ɔblɔ bréá bowun íni. Mú su befité beɛ, “Ntogyi sɔ ɔtsɔ ánfɔ layíntá ofobí fánfán ánfɔ? ⁹Abétalí fé mú íbíá kpékplé, pú kɔba amu há ahiánfɔ.”

¹⁰Yesu lébi ání ɔblɔ lakítá amú. Mú su ɔlebláa amú ɔbéɛ, “Ntogyi sɔ mlɔdé mu háan? ɔtɔ yilé alabwé há mí. ¹¹Ahiánfɔ bétsiá mlɔtɔ ekekegyíeke, táme mí mú mméetsiá mli wá yó. ¹²Alatséí ofobí fánfán ánfɔ wólí mí, pólá mí ɔyulúv yáí há mí opuláké. ¹³Ɔnɔkwali nde mli bláa. Ɔyítɔ ɔtínegyíɔtíneá béda Bulu asun wankláán ámu ɔkan a, beblí tɔ ánfɔ ɔtsɔ ánfɔ labwé ánfɔ púkáín musu.”

Yuda Iskariot Lótsulá Ání Ɔbéle Yesu Há

(Marko 14:10; Luka 22:3-6)

¹⁴Mú ɔma a, mu akasípú dúanyɔ ámutɔ ɔkuá butetí mu Yuda Iskariot lóyo Bulu igyí ahapú dehen amu wá. ¹⁵Ɔleyéfíté amú ɔbéɛ, “Ní nelé Yesu há mli á, ntɔ mléha mí?” Mú su

bekla sika futútú advasa (30) wá mu ibuto. ¹⁶Tsú bré ámutò ɔlɔwa ɔkpa dunká ání ɔbótson músú lé Yesu há amú.

Katsun Atogyihe Gyí

(Marko 14:12-21; Luka 22:7-14, 21-23; Yohane 13:21-30)

¹⁷Israelfò *Bodobodo Mátúhé *Nke ámutò eke gyankpapu a, akasípú amu beba Yesu wá befuté mu beɛ, “Ani Wíé, obu mòmuto ayela ha fu, afugyi Israelfòsu Katsun Nke atogyihe amu?”

¹⁸Yesu lébláa amú ɔbéɛ, “Mliyo asímasi wá wúluto, amliyébláa mu mliaa, ‘Osunápú amu ɔbéɛ, mí bré lafun. Ínu su mía mí akasípú abá begyi Israelfòsu Katsun Nke ámu fú wóyító.’ ”

¹⁹Mú su akasípú amu ɔyɔɔbwe ali ámutú Yesu lébláa amú ámu pépéépe. Bela obu ámutò, bwé Katsun Nketò atogyihe amu yáí nu.

²⁰Bréá nsaintò deklúun a, Yesu mua mu akasípú beba betsiá ɔpúnú ámu asi. ²¹Ató ámu ogyíkpa a, Yesu lébláa amú ɔbéɛ, “Ɔnɔkwali nde mli bláa, mlito ɔkule ɔbéle mí há.”

²²Asún ánfí léhie han akasípú amu. Mú su befi asi buɔde mu futé kulekule beɛ, “Mí Wíé, mí ní lóó?”

²³Yesu lébláa amú ɔbéɛ, “Ɔhá ámutú mía munyo anidé íbu wa ɔlepe ɔkuleto ámu ɔbéle mí há. ²⁴Mí, Nyankpusa-Mu-Bi ánfí nówu fé alíá ɔwanlín tswí, táme ɔhá ámutú ɔbéle mí há ámu ɔgyówu ní. Ní bumetepí kwíí mu kúráá á, teki íbu alé há mu.”

²⁵Yuda Iskariot ámutú ɔlele mu há ámu é léfuté mu ɔbéɛ, “Osunápú, mí ní lóó?” Mú Yesu lébláa mu ɔbéɛ, “Ee, fablí.”

Yesu Ntópwe Atogyihe Tráhe

(Marko 14:22-26; Luka 22:14-20; 1 Korintofo 11:23-25)

²⁶Bréá buɔde ató ámu gyí a, Yesu léle bodobodo ipín, ɔleda Bulu ipán, bíábía mútò púhá mu akasípú amu, blí ɔbéɛ, “Mliho amlgyi. Mí ɔyulúu nu.”

²⁷Ínu olotsu ntá-ewe, ɔleda Bulu ipán, púhá amú ɔbéɛ, “Mli féé mliho amlinu. ²⁸Mí obugya nu. Mú Bulu dépusí

mu ntam^m ání alaká há ahásv ní. Bétseí mú wólí así, méni obési ahá tsɔtsɔwtsɔ lakpan kíé amú. ²⁹Nde mli bláa mbéé, mméetrá nu *wáun-abí ntá ánfí alu yófun ekeá mía mlinyo abélanu mú pópwe mí Sí *iwíegíyí ámutɔ.”

³⁰Benya wá ilu dá Bulu ipán tá alí, benatí yó Nfɔ-nyíbu ámusu.

Petro Ɖbóswí Ɖbéé Mɔmeyín Yesu

(Marko 14:27-31; Luka 22:31-34; Yohane 13:36-38)

³¹Bréá bowie Nfɔ-nyíbu ámusu á, Yesu lébláa amú ɔbéé “Mli féé mléyinkí mí ɔma onyenu. Tsúfé bowanlín wá Bulu asún ámutɔ beé, ‘Néda akúfa ɔkparú ámu lédá, mu akúfa bédasáín.’” ³²Múú ɔletrá blí ɔbéé, “Táme ní Bulu ɔkúsúa mu tsú afúlitɔ á, négya mli nkpa yó Galilea ɔmátɔ. Inu mlɔbɔtu mí ní.”

³³Petro lébláa mu ɔbéé, “Ní amú féé beyinkí fú ɔma kúráá á, mí mú mméeyinkí ekekekeke.”

³⁴Yesu lébláa mu ɔbéé, “Ɖnɔkwali nde fú bláa. Onyenu, asa bate ɔbéle ɔnɔ á, fɔswí pú ibi wá ogyá tse sa fee fɔmeyín mí.”

³⁵Inu Petro lébláa mu ɔbéé, “Ní lowu ígyi kúráá á, mméekiná fú ekekekeke.” Alí kén akasípú atráhe amu é beblí ní.

Mpáibɔ Getsemane

(Marko 14:32-42; Luka 22:39-46)

³⁶Yesu mua mu akasípú bɔyɔ ɔtinekuá butetí unu Getsemane. Bréá bowie unu á, ɔlebláa amú ɔbéé, “Mlitsia nfi, nɔyɔ nkpa yóɔ mpáú.” ³⁷Ɖlekpa Sebedeo abi anyɔ, bugyí Yakobo mua mu pio Yohane pú Petro ya. Inu asún lehié han mu, mu ansí lepe. ³⁸Múú ɔlebláa amú ɔbéé, “Asún ihíé de mí háan, ideklé unɔ mí. Mlitsia nfi, mía mlinyo agyo.”

³⁹Inu ɔlenatí yó nkpa kpalobí, ɔleda akpawunu pú ansítɔ bun ɔsulúɔ, kókóli Bulu ɔbéé, “Mí Sí, ní ibɔwa alé á, ha

^m 26:28 Ntam pópwe bu nwulú dada amu akutɔ.

ntá-ewe ánfí" utsun musu. Táme megyí tóá ndeklé, mboún múbá fudeklé íbá mótó."

⁴⁰Múbú oleyinkí ba akasípú amu wá bowun ání budedídi. Íni su ɔlefíté Petro ɔbéé, "Múbú su mlimétalí tsíá, mía mlinyɔ agyo dɔnhwírí kule kpán? ⁴¹Mlɔgyo amlíkókoli Bulu, méni mlimóowie ɛsókito, tsúfé mli ɔhé deklé, táme nyankpusa-oyí lɔpɔn."

⁴²Yesu létrá yókokóli Bulu ɔbéé, "Mí Sí, ní ntá-ewe ánfí mɔɔtsun musu, íbwé alágyíalíá nónu múbá, múbú tóá fudeklé íbá mótó." ⁴³Ɖletrá yinkí ba bowun ání akasípú amu butráa budedídi, tsúfé dídí de amú bu.

⁴⁴Múbú su ɔlenatí sí amú, trá yókokóli Bulu otse saasi, blí asún ámu kén. ⁴⁵Oleyinkí ba akasípú amu wá, befíté amú ɔbéé, "Mlulatráa si mlída mlídé ɔkpúnú da? Mlíki, bré ámu lafun ání bɔpu mí, Nyankpusa-Mu-Bi ánfí wá lakpan abwepú íbɔɔ. ⁴⁶Mlíkusú ayɔ. Mlíki, ɔhá ámúbú ɔde mí le há ámu ná á."

Yesu Kítá

(Marko 14:43-50; Luka 22:47-53; Yohane 18:3-12)

⁴⁷Yesu ɔnó mesi asa *akasípú dúanyɔ ámutɔ ɔkuleá butetí mu Yuda lóbowie unu. Ɖɔɔm kpɔnkpɔnkpɔntíá bude ndayí pú nkpotí bubuo mu. Bulu igyí ahapú dehen pú Yudafo ahande amu lówa amú. ⁴⁸Yuda amúbú ɔbéle Yesu há ámu lébláa ɔɔm amu yái ɔbéé, "Ɖhá ámúbú nélatá pútá ámu gyí ɔhá ámu ni. Mlíkita mu."

⁴⁹Íni su ɔlenatí laa yéha Yesu itsíá ɔbéé, "Osunápú, tsia ní!" Ɖlelatá mu pútá.

⁵⁰Múbú Yesu lébláa mu ɔbéé, "Agya, bwe tóá ɔbwekpá feba."

Unu ahá ámu benatí tó Yesu, kítá mu kínkíínkín. ⁵¹Unu Yesu akasípú amutɔ ɔkule lɔtswi mu ɔdayí, kpá Bulu igyí ɔhapú dehen osúmbi ɔku ɛsu lé. ⁵²Múbú Yesu lébláa mu ɔbéé, "Yinkia fú ɔdayí wa múbú ɔfletɔ. Tsúfé ɔhá ání ɔtenatí kítá ɔdayí á,

ⁿ 26:39 Ntá-ewe ánfí igyi iwɔsun ání Yesu obówun.

ɔdayí ɔnɔ otesin. ⁵³Fumeyín fɛɛ nétalí kókóli mí Sí ɔbéha mu abɔpu tsɔtsɔɔtsɔ akú dúanyɔ béba bɔkɔ hɔ mi? ⁵⁴Táme ní ibá alí á, nkáli íbɔbwe asa Bulu asun wanlínhé amu íbéba mútɔ?”

⁵⁵ɛnu Yesu léfité amú ɔbéɛ, “Ogyo otswapú ngyi, sù mlulatsú nkpotí pú ndayí mlebá mí ɔkutákpá? Ntsie mli wá Bulu ɔtswékpa unv ekekegyíɛke nde mli atɔ suná, mli mékutá mí ekekeɛɛke. ⁵⁶Táme íni fée laba mútɔ, méni Bulu ɔnɔsú atɔípú asún wanlínhé amu íbéba mútɔ.”

ɛnu akasípú amu fée besrí sí mu.

Yudafɔ Ahande Ansító Lú

(Marko 14:53-65; Luka 22:54-55, 63-71;

Yohane 18:13-14, 19-24)

⁵⁷Mú Yesu akítápú amu bekpa mu ya Bulu igyí ɔhapú dehen Kaiafa. ɛnú mva Mose mbla asunápú pú Yudafɔ ahande amu befia ni. ⁵⁸Táme Petro lépetí obuɔ amú ɔma tsútsúútsú alu bowie igyí ɔhapú dehen wóyítɔ unv. Oleyétsiá amú agyópu wá, méni obówun alá asún ámu íbɔmɔ ɔnɔ. ⁵⁹ɛnu Bulu igyí ɔhapú dehen amu mva Yudafɔ asún agyípú amu fée bodunká ahá ání béka asún dínká Yesusu, méni béli mútú mɔ mu. ⁶⁰Afunupu tsɔtsɔɔtsɔ bedali ba, táme amú fée ɔnɔ ɔtsun ɔtsan. Mú ɔma a, ahá abanyɔ bedali belí ahande amu ansítɔ, ⁶¹blí beɛ, “Oyin ánfí lébli ɔbéɛ, ‘Néталí bwíé Bulu ɔtswékpa amu, lápú nkensá yi mú.’ ”

⁶²Mú Bulu igyí ɔhapú dehen amu lókusú líí fíté Yesu ɔbéɛ, “Fuma ɔnɔ lé? Fuma asvansu bí pólé fú iwí?” ⁶³Táme Yesu móbwíí ɔnɔ. Bulu igyí ɔhapú dehen amu lélabláa Yesu ɔbéɛ, “Neká Bulu ɔkiankpapu amu, ní fúgyí Kristo, (ɔhá á múú Bulu ladá mu ofúli), ogyi Bulu mu Bi ámu a, bláa aní.”

⁶⁴Mú Yesu lébláa mu ɔbéɛ, “Mú fablí á. Táme mli bí ání tsú nde púya a, mlówun mí, Nyankpusa-Mu-Bi ánfí ntsie Bulu Otúmípu gyɔpɔsu ánfí, ndin ɔsúsú nwlótáasu nebá.”

⁶⁵Mú Bulu igyí ɔhapú dehen amu lékutá mu atadiɛ bálí mú kiaan,^o bí ɔbéɛ “Alabɔ mbusuo! Adánsiɛ mɔmu antráa

^o26:65 Ilosuná ání asún ámu lawíé mu twtɔ dubi.

anigyó? Yéé mlilanú abususu ání alablí. ⁶⁶Nkálí gyí mli agywun?”

Bebláa mu beε, “Ilehián ání obówu!”

⁶⁷Ḳnu botutúu atsonó wulí mu ansító, wɔwɔ mu atswε. Aku é bedadáa mu asuto, ⁶⁸fíté mu beε, “Bulu onósú otóipó Kristo, ma ládá fú? Bla aní.”

Petro Lóswú Obéε Mmeyín Yesu

(Marko 14:66-72; Luka 22:56-62; Yohane 18:15-18, 25-27)

⁶⁹Petro tsie wunsinéésú unu, otsibi ɔku lóbotu mu. Obebláa Petro obéε, “Fúá Yesu Galileayin amu nyo ná.”

⁷⁰Támε Petro lówa onólí ahá ámu féé ansító obéε, “Mmeyín asún ání fudeblí ání iwí kukukuku.” ⁷¹Mú ɔma wóyí onó unu é á, otsibi ɔku é lébi Petro. Mú su obébláa ahá ání bulú unu obéε, “Oyin ání muá Yesu Nasaretyin amunyo ténátí.”

⁷²Ḳnu Petro lópu onólí ká ntam, blí obéε, “Mmeyín mu.”

⁷³Mú ɔma a, ahá ámu bulú unu ámutɔ aku beba bebláa Petro beε, “Lélé mú á, anyin ání fúá Yesunyo ná, tsúfé fú tótu de aní suná alí.”

⁷⁴Ḳnu Petro lówa ntam kakáa bi obéε, “Neká tógyító, mmeyín oyin ámu mlidé mu iwí asún blí ámu!”

Ḳnunu bate lóbon. ⁷⁵Petro lékaín ání Yesu lébláa mu obéε, “Fóswú tse sa fεε fómeyín mí asa bate obéle onó.” Ḳnu oledali híé yósu.

Yesu Kpa Ya Pilato

(Marko 15:1; Luka 23:1-2; Yohane 18:28-32)

27 ¹Ɔyi kehe nyanki-nyanki a, Bulu igyí ahapú dehen pú Yudafo ahandε amu bekitá agywun beε, bómo Yesu. ²Mú su beklí mu, pú mu yówa Pilato ibuto. Mogyí Roma ɔhandéá ɔde Yudea ɔmású gyí ni.

Yuda Iskariot Iwí Sián

(Gyumagyihe 1:18-19)

³Yuda ámu ɔlele Yesu há ámu lówun ání bahá Yesu pón. Ulehan mu. Mú su oleyinkía sika futútú aduasa ámu

ya Bulu igyí ÷hapú dehen pú Yudafɔ ahande amu. ⁴Ɔlebláa amú ɔbéɛ, “Nalé ÷há ání ɔmɔkúbwé lakpan kuku há. Mú su nabwé lakpan.”

Mú bɛbláa mu bɛɛ, “Animéyín mú iwɪ kuku. Fú asón igyi.”

⁵Mú su Yuda lótswi sika futútú ámu sísí amú Bulu ɔtswékpa wunsinéso inu, náti yésián iwɪ.

⁶Bulu igyí ahapú dehen amu bɔtɔsí kóba amu, blí bɛɛ, “Ani mbɛla meha ɔkpa ání apúu kóba anfi odu wa Bulu ɔtswékpa kóbatɔ, tsúfé mú iwɪ metin. Obugya kóba igyi.”

⁷Mú su bɔbwe agywun, pú kóba ámu yóho ató ɔpwepú ɔku ɔsulú, pú inu bwé afɔɔ ání bubu Yerusalem opulákpá. ⁸Inu su bɔtu nde butetí inu bɛɛ, “Obugya ɔsulú.”

⁹⁻¹⁰Inu léha Bulu asón ámúú ɔleblí tsun mu ɔnɔsú ɔtɔipú *Yeremiasu ámu léba mútɔ. Ɔbéɛ, “Botsu sika futútú advasa ámúú Israelfɔ begyi mu ibiá, ho mu amu yóho ató ɔpwepú ɔku ɔsulú fé alíá Bulu lébláa mi.”

Yesu Líí Pilato Ansítɔ

(Marko 15:2-5; Luka 23:3-5; Yohane 18:33-38)

¹¹Yesu líí ɔmáso ɔkípu Pilato ansítɔ. Mú Pilato léfuté mu ɔbéɛ, “Fúgyí Yudafɔ owíe amu ni?”

Yesu lébláa mu ɔbéɛ, “Ee, mú fablí á.” ¹²Táme bréá Bulu igyí ahapú dehen pú Yudafɔ ahande amu bɛka asón dínká Yesusu á, ɔmele kuku ɔnɔ.

¹³Mú Pilato léfuté mu ɔbéɛ, “Fumedé asón ánfɪ bakla dínká fúsú ánfɪ nu?”

¹⁴Táme Yesu métepi bwíí ɔnɔ. Mú su ilobwie Roma ÷hande amu ɔnɔ.

Yesu Lowu Ipón Ha

(Marko 15:6-15; Luka 23:13-25; Yohane 18:39–19:16)

¹⁵Ofíígyíofí, ní bude Israelfɔsu *Katsun Nke gyí a, Roma ÷hande amu tesí obu ɔdipú ɔkuleá ɔdɔm amu budeklé há amú. ¹⁶Alí bré ámutɔ á, obu ɔdipú ɔkúvá alahɔ dá, butetí mu Baraba da obu. ¹⁷Mú su bréá Yudafɔ ámu féé bebefia

a, Pilato léfuté amú ɔ́bée, “Ma nsíi ha mli? Baraba lóó, ntée Yesu, butetí mu Kristo amu?”¹⁸ Tsúfě Pilato yin ání Yesu wu olu sù Bulu igyí ahapú dehen pú Yudafɔ ahande amu bakítá mu ba mu.

¹⁹Bréá Pilato tsie ɔ́de Yesu asún ámu gyí a, mu ka lówa obí mu wá ɔ́bée, “Mábwe oyin ánfí mu asún da ɔ́kpa ánfí tɔ́tɔ́. Tsúfě ígye onyé á, nokun okude wun mu, ifú lehié kítá mí.”

²⁰Táme Bulu igyí ahapú dehen pú Yudafɔ ahande amu beha ɔ́ɔm amu ɔ́nɔ́ bée, bukókoli Pilato osi Baraba, abumu Yesu. ²¹Mú su Roma ɔ́handede amu lélafíté ɔ́ɔm amu ɔ́bée, “Ahá abanyɔ́ ánfíto ɔ́mɔ́mu nsíi ha mli?”

Botsu ɔ́nɔ́ bée, “Baraba!”

²²Mú Pilato létrá futé amú ɔ́bée, “Ntɔ́ mbwée Yesu, butetí mu Kristo, (ɔ́há ámú Bulu ladá mu ofúli amu)?”

Amú féé bebláa mu bée, “Ha abuda mu manta oyikpalíhesu!”

²³Pilato léfuté amú ɔ́bée, “Ntogyi su! Tsitsa mɔ́mu alabwé?”

lnu belakplún kúklókú bée, “Ha abuda mu manta oyikpalíhesu!”

²⁴Bréá Pilato lówun ání alabwé kásíán, kpokiti mboún deklé ida inu á, olotsu ntsu fwí ibi amú ansítɔ́ inu, bláa amú ɔ́bée, “Mí ibi anyɔ́ uma oyin ánfí lowutɔ́. Mli asún igyi.”

²⁵Yudafɔ ámu féé bebláa mu bée, “Mu lowu isubítí íbá anu aní abí-anású!”

²⁶lnu Pilato lési Baraba há amú, ɔ́leha mu isá akɔ́pú bepití Yesu atɔ́, ɔ́ɔpu mu wá amú ibitɔ́ ɔ́bée, buyéda mu manta oyikpalíhesu.

Yesu Ahinlá Bwe

(Marko 15:16-20; Yohane 19:2-3)

²⁷lnu ɔ́mású ogyípú amu isá akɔ́pú bekpa Yesu ya mu wóyítɔ́. Beti amú aba isá akɔ́pú atráhe amu féé, beda Yesu ɔ́bun. ²⁸Bɔ́wɔ́ Yesu atadié, pú ligá pepe ku wá mu. ²⁹Bɔ́lu obungyo-awu, bwé mú owíepa bun mu nwun. Bɔ́pu oyí ku wá mu gyɔ́pi ibitɔ́, fé akɔ́nfra. Beda akpawunu mu

ansító, bude mu ahinlá bwe bee, “Yudafɔ Owíe, fú nkpasu ɔnlinsu!” ³⁰Botu atsunó wúlí Yesu, swíí mu oyí ámu púpítí mu nwuntɔ. ³¹Bɔbwe mu ahinlá tá á, bɔwɔí amú ligá pepe amu, yínkía mu onutó atadiɛ wá mu, bekpa mu dálɔ bɔyɔ abuyeda mu manta oyikpalíhesu.

Yesu Da Mántá Oyikpalíhesu

(Marko 15:21-32; Luka 23:26-43; Yohane 19:17-27)

³²Bréá bɔyɔ á, befia Kireneyin ɔkuá butetí mu Simon. Isá akɔpú ámu beka mu híe bee, ɔhɔɔ oyikpalíhe amu sɔra. ³³Boyówie ɔtinekuá butetí unu Golgota. Mú asi gyí, “Nwun Okokobi Otsiákpá.” ³⁴Bɔpu afá kítákítá wá ntátó tin Yesu ɔnɔ bee onúu, táme bréá ɔleda mú ɔnɔ á, olekiná nu.

³⁵Beda mu mántá oyikpalíhe amusu tá á, beye mu atadiɛɔ. Inu bɔtsɔwɔ abi púkɔ ɔhagyíɔha ogyíkpá. ³⁶Besi butsie unu, bude mu iwɔ gyóo. ³⁷Múu bɔwanlín tɔá svá bude mu da mántá oyikpalíhesu, dá mántá mu awunso bee, “YESU, YUDAFɔ OWÍE AMU NI.” ³⁸Beda awikplu abanyó é mántá nyikpalíhesu tsía mutɔ. Ɔkule bu mu gyɔpɔsɔ, ɔkule é bu mu binasu.

³⁹Inu atsunpu bɔkpukpúu nwuntɔ, blí Yesu iwɔ abususu bee, ⁴⁰“Yéé fú fée fétalí bwíé Bulu ɔtswékpa amu, lápwe mú nkensá owító ní? Hɔ fú iwɔ! Ní lélé Bulu mu Bi fúgyi á, kplɔ tsu oyí ámusu aki.”

⁴¹Alí kén Bulu igyí ahapú dehen, Mose mbla asunápú pú Yudafɔ ahande amu é bɔbwe mu ahinlá ní. ⁴²Bebli bee, “Ɖlɔhɔ ahá nkpa, táme ɔmetalí hɔ mu iwɔ. Ní mugyí Israelfɔ owíe amu a, ɔkplíu tsu oyí ámusu, méni abɔhɔ mu gyi. ⁴³Yéé ɔbéé Bulu mu Bi mugyí, mu ansí dun Bulusu. Bulu ɔlé mu séi, aki ání otekle mu asún.”

⁴⁴Alí kén awikplu ámutú beda mántá nyikpalíhesu mu wá ámu é bɔbwe mu ahinlá ní.

Yesu Lowu

(Marko 15:33-41; Luka 23:44-49; Yohane 19:28-30)

⁴⁵Owí leta ɔsulúv amusu féé, tsú dódúanyɔɔ alu yɔfɔn ntúpwe ɔɔsatɔ. Owí metrá lun ɛ. ⁴⁶Ɖɔsa ámutɔ á, Yesu

lókplun kúklókúú *Hebri ɔblítɔ ɔbéé, “Eli, Eli, Lama Sabaktani?” Mú así gyí, “Mí Bulu, mí Bulu, ntogyi sú fakpá mí ɔma?”

47Bréá ahá á múú bulú unv ámutɔ aku bonu asún ánfí á, beblí beé, “Ɔde *Elia kpolí.” 48Unv amúť ɔku lésrí yótsu ɔsapɔ, púdá ntá ɔdáɔ, púyi oyísú, tsú mú fúá, pútín mu ɔnɔ ɔbéé onúu.

49Táme mu aba atráhe amv bebláa mu beé, “Si, alu kí beé Elia ɔbéba ɔhɔ mu.”

50Yesu létrá kplón kúklókúú, ɔlele ɔhé.

51Unv Bulu lébalí tati á múú ɔpuká Bulu Ɔtswékpa obu ámutɔ anyɔ, tsú awunso beyi así kĩaan. Bulu léha ɔsulúv lekpunkí, ɔleha abutá lemamáun. 52Olefinfínki ntsán, aha wankíhé tsɔtsɔɔtsɔ ɔkɔsú tsú afúlítɔ. 53Yesu kúsú tsú afúlítɔ ɔma a, aha wankíhé anfí bakúsú tsú afúlítɔ ánfí ɔyɔ Yerusalem wúlu wankíhé amvɔ, yéle iwí ɔwan súná ahá tsɔtsɔɔtsɔ.

54Bréá isá akɔpú ɔhande pú isá akɔpú á múú bude Yesu iwí gyóo amv bowun ɔsulúkpunkí ámu pú tɔá ide músú yɔ féé á, ifú lehe kítá amú, beblí beé, “Lélé, Bulu mu Bi óyin ánfí gyí.”

55Atsi tsɔtsɔɔtsɔ bobuo Yesu, bude musu kí tsu Galilea ɔmátɔ. Amú é besi lú tsútsúútsú, bude mu kí sisí. 56Amúť aku gyí, Magdalayintse *Maria mua *Maria ání ɔlɔkwí Yakobo mua *Yosef pú Sebedeo mu ka ání ogyi Yakobo mua Yohane aná oyín.

Yesu Pulá

(Marko 15:42-47; Luka 23:50-56; Yohane 19:38-42)

57-58Bréá owí depɔɔn a, Arimateayin iwí onyapú ɔkúá butetí mu Yosef, alamlí Yesu ɔkasípú lóyɔ Pilato wá, yókulí mu ɔbéé, osíi Yesu fúli amv ha mu. Pilato léha ání busíi fúli amv ha mu. 59Mú sv Yosef lópv ɔhráda ání uletin wankláán kíklí fúli amv iwí, 60ɔlɔpv mu yówa ɔbɔ pɔpwe ání aladá butátɔ yái há mu iwí. Múú olemináa ibwi yíléyílé ku tin ɔbɔ ámu ɔnɔ, ɔlenatí. 61Magdalayintse Maria mua Maria nyɔɔsi amv besi butsie unv fún bude ntsán ámu kí sisí.

Yesu Ntsán Gyo

62Yudafɔ ɪwɪsɔ ɔdaké ɔyi kehe, igyi *ɔkpónú ɔdaké á, Bulu igyí ahapú dehen, Farisifɔ ámu féé pú Pilato befia. 63Bebláa mu beɛ, “Owíe, anɪlakáɪn ání bréá ofunupu anfi tsie nkpa á, ɔleblí ɔbéɛ, ‘Nkensá ɔma a, Bulu ɔbélakúsúa mi tsú afúlitɔ.’ 64Mú su ha abuyogyo mu ntsán ámu ɔnɔ wankláán, yɔfun eke sáásí. Ní megyí alɪ á, mu akasípú amu bóyówi mu lé, bemlé ahá beɛ alakúsú. Ibá alɪ á, akasípú amu ahámlé bóɔvɔn mu kle.”

65Pilato lébláa amú ɔbéɛ, “Isá akɔpú ní. Mliha amú abuyogyo unu wankláán alɪá mlétalí.”

66Mú su beyétan ɔbɔ ámu ɔnɔ wankláán, há agyópu bogyo mú asi.

Yesu Kusú Tsú Afúlitɔ


(Marko 16:1-10; Luka 24:1-12; Yohane 20:1-10)

28 1Yudafɔ ɔkpónú ɔdaké ɔyi kehe, igyi Kwasiada bake a, Magdalayintse *Maria muva *Maria nyɔɔsi amu bɔkusú yɔ Yesu ntsán ámu ɔkíkpa. 2Inunɔ á, ɔsolúv lɛkpunkí kúklúkúú, Bulu-ɔbɔpu lékplí tsú ɔsúsú bemináa ibwi yilé ámu lé ɔbɔ ámu ɔnɔ, tsíá músú. 3Mu ansítɔ lehiɛ wankí, ɪɛ ogyá kpa. Mu atadiɛ é lofulí futútúútú fé opuli-mpútɔ. 4Bréá bowun mu a, ifú lehié kítá unu agyópu amu, bekpunkí kpakpakpakpa, dɪda, lwíí fé afúli.

5Bulu-ɔbɔpu amu lébláa atsi ámu ɔbéɛ, “Mlumánya ifú! Nawun ání Yesu amúv beda mántá oyikpalíhesu ámu mlɪdédunká. 6ɔma nfi. Bulu lakúsúa mu fé alɪá ɔleblí yái. Mlibekɪ ɔtíné amúv ɔbɔpu mu tswɪ amu. 7Mliwa ɔsa yebláa mu akasípú amu mliha, Bulu lakúsúa mu tsú afúlitɔ. Alagya mli nkpa ɔyɔ Galilea ɔmátɔ. Inú mlówun mu ni. Asún ání mbu ha mli ní.”

8Ifú lɛkítá atsi ámu, táme ɔbɔpu ansigyí tsíí ɔsrú tsú opulákpá unu ɔyɔ yébláa akasípú amu tɔá bawun.

9Imɔwa ɔpá kvku Yesu léfia amú, há amú ité. Inu beda akpawunu kítá mu ayabi, súm mu. 10Yesu lébláa amú ɔbéɛ,



“Oma nfi. Bulu lakósúa mu fé alíá ɔleblí yáí.” (Mateo 28:6)

“Mlumánya ifú. Mliyebláa mí apíó ámu mliaa, buyó Galilea ɔmátó. Inó bówun mi ní.”

Ntsán Agyópu Amu Asun Klahe

11 Bréá atsi ámu ɔɔpu ɔɔyó á, ntsán agyópu amu aku é ɔɔyó wúluto yébláa Bulu igyí ahapú dehen amu tsá ulaba féé. 12 Inu su Bulu igyí ahapú dehen amu beti Yudafo ahande amu féé fía, kítá agywun. Beha ntsán agyópu amu kóba tsɔtsɔɔtsɔ. 13 Beha amú ɔnó beɛ, “Mliɔli mliaa, ‘Onyé, bréá anidédidi á, Yesu akasípú amu béba bowi mu náí.’

14Ní Roma ɔhande onú á, ania munyo abéblí mú, méni mluṃóowie asúntó.”

15Mú su ntsán agyópu amu botsulá ho kóba amu, begyi dinká Bulu igyi ahapú dehen amu asun blíhé anfisú. Onó ánfu beha amú ánfu lobwie wá Yudafɔ ɔmá ámu féétó bɔfun nde.

Yesu lwɔwanle Súná Mu Akasípú

(Marko 16:14-18; Luka 24:36-49;

Yohane 20:19-23; Gyumagyihe 1:6-8)

16Akasípú dúɔkun ámu benatí yó Galilea ɔmátó, ibu ámú Yesu lósuná amú ɔbéɛ bɔfia mu mósú ámusu. 17Bréá bowun mu a, beda akpawunu súm mu, táme umɔwankí amútó aku ání mu ni. 18Múú Yesu lókpukpé ba amú wá, blí ɔbéɛ, “Bulu lapú ɔsú mba asi túmi féé wá mí ibitɔ. 19Mú su mlyɔ ɔyító féé, amlibwe ahá féé mí akasípú. Mlibɔ amú *asú ɔsí, Obí pú ɔɲe Wankíhé dátó. 20Mlɔsuna amú abugyi mbla ámú nɔwa há mli ámu féésú. Mlibi ání mbu mli wá brégyíbré, yófun ɔyí ɔnómɔ.”

Asun Wankláán Ání

Marko

Lówanlín

Asú Ɖbɔpú Yohane Bulu Asún Ɖkanda
(Mateo 3:1-12; Luka 3:1-18; Yohane 1:19-28)

1 ¹Alí Bulu mu Bi Yesu Kristo ɪwɪ *asun wankláán ámu ilotsuá asɪ ní. ²Uleba mútɔ́ fé alá *Bulu ɔ́nɔ́sú ɔ́ɔ́ɪpú *Yesaia lówanlín wá mu ɔ́wulútɔ́ ɔ́béɛ,

“Kɪ, nde obí wa gya fu nkpa.

Mu ɔ́béla ɔ́kpa há fú ní.

³Ɖku dékplun *dimbísú ɔ́béɛ,

‘Mlɪla anɪ Wíe ɔ́kpa.

Mlɪtswii ikpa ha mu!’ ”

⁴Asú Ɖbɔpú Yohane léba ɔ́de ahá *asú bɔ, ɔ́de Bulu asún ɔ́kan da Yudea dimbísú ɔ́béɛ, “Mlɪdamli klɪntɔ, amlɪsi lakpan bwe. Bulu osikie mlɪ, ambɔ mlɪ asú.” ⁵Ahá botsu Yerusalem wúlutɔ́ pú Yudea ɔ́mátɔ́ féé bá mu wá. Bele amú lakpan blí, ɔ́lɔ́ɔ́ amú asú Yordan ntsutso.

⁶Yohane lówa *kpɔ́sɔ́-imi atadiɛ, ɔ́lɔ́pu ɔ́wulú-kpákpa ɔ́fé klí mútɔ́. Atsantsanku pú ɔ́kwén otegyi. ⁷Oletsiá dá asún ɔ́kan, blí ɔ́béɛ, “Ɖkúá ɔ́ɔ́un mi bu ɔ́ma ɔ́bá. Mmɔ́fun ání nógyonká sánkí mu ntukuta ɔ́fé kúráá. ⁸Mí mú á, ntsu ndepɔ́bɔ́ mlɪ asú, táme mu mú ɔ́bɔ́pu *Ɖɛ Wankíhé bɔ́ mlɪ asú.”

Yesu Asúbɔ Pú Mu Isókɪ

(Mateo 3:13–4:11; Luka 3:21-22; 4:1-13)

⁹Nke ámutɔ́ á, Yesu lótsu Nasaret, wúlúá ɪbu Galilea ɔ́mátɔ́ ba Yohane wá, Yohane lóɔ́ mu asú Yordan ntsutso.

¹⁰Yesu lénya dáli ntsu ámutɔ alɪ, olowun nwulótáa lefinkí, Ɖɛ Wankíhé dékplí dalɪ mótɔ fé abróɔɔma, ulobogyonká musu. ¹¹ɪnu ɔme ku lótsu ɔsúsú ɔbéɛ, “Fúgyí mí bíá ntɔɔwé, mi ansí tehíé gyí fú iwɪ ní.”

¹²ɪnusu Ɖɛ Wankíhé amu lékpa Yesu ya dimbísú. ¹³Oletsíá ɪnu nke advana, *Satan létsíá bɔɔɔ mu ki. Mva putuɔ-mbwi létsíá, *Bulu-abɔɔɔ beba beki musu.

Yesu Gyumagihe Asitsuá

(Mateo 4:12-22; Luka 4:14-15; 5:1-11)

¹⁴Bekítá Yohane tswɪ obu ɔma a, Yesu lóɔɔ Galilea ɔmátɔ, ɔɔɔ Bulu asun wankláán ámu ɔkan da. ¹⁵Ɖbéɛ, “Bré ámu lafun. *Bulu iwíegyí ámu lawíé wóyí tá. Mɪdamli kluntɔ ba Bulu wá, amlɪhɔ mu asun wankláán ámusu gyi.”

¹⁶Ɛke ɔku Yesu ná Galilea ɔpu ɔnɔ, olowun Simon mva mu gyama Andrea. Bude asawu tswɪ, tsúfé aye alepú bugyi. ¹⁷Múy ɔlebláa amú ɔbéɛ, “Mɪba bobuo mi. Nóbwe mɪ anyánkɔɔsa alepú.” ¹⁸ɪnusu besi amú asawu aná tswɪ, kplá buo mu.

¹⁹Ɖlenatí yɔ nkpá kpalobí á, olowun Sebedeo abí, Yakobo mva mu gyama Yohane é. Bubu ɔkluntɔ, bude amú asawu bíun. ²⁰ɪnusu Yesu létɪ amú é, benatí sí amú sí múa mu apafɔ wá ɔklun amutɔ ba bobuo mu.

Yesu Ɖɛ Laláhe Gyáa

(Luka 4:31-37)

²¹Yesu mva mu *akasípú bɔɔɔ Kapernaum wúlutɔ. Ɖɔɔɔ Yudaɔ *ofíakpa yósuná atɔ ɔkɔpúnú ɔɔaké. ²²Mu atosunáhé lobwie amú ɔnɔ, tsúfé olosuná amú atɔ túmisu. Megyi fé Mose *mbla asunápú amu.

²³Oyin ɔku léba ofíakpa ɪnu, *ɔɛ laláhe bu musu. ²⁴Ɖɔɔkplún blí ɔbéɛ, “Yesu Nasaretyin, amansu búv ania funyɔ nsuné? Anɪ ɔhɔkpá febá lóó? Nyin ɔhá oduá fugyi. Fúgyí Bulu Ɖha Wankíhé amu nɪ!”

²⁵Yesu lóɔkplun wa ɔɛ ámu ɔbéɛ, “Kpa ɔnɔ bun, afudali mutɔ.”

26 ɪno ɔɛ laláhe amu lówusúo oyin ámu ɔwunlínso, súra okitikíti kúklókúo, dálu muto. 27 Onó lobwie amú fée, befíté aba be, “Nto ofúla ni? ɪni mú á, atosunáhé pɔpwe ni. Oyin ánfí bu túmi, ɔɔkplún wa ɔɛ laláhe, itobú mu.”

28 ɪni su Yesu idá leklei wá Galilea ɔmá ámutó fée.

Alɔpu Tsɔtsɔtsɔ Tsá

(Mateo 8:14-17; Luka 4:38-41)

29 Yesu mua mu akasípú benya dálu Yudafo ofiakpa unu ali, bɔɔ Simon mua Andrea wóyító. Yakobo mua Yohane é bubu amótó. 30 Bɔɔ á, owísó lakítá Simon mu sia tsíhé, ɔda. ɪnunu bebláa Yesu ɔtsi ámu iwí asún. 31 Múo ɔɔɔ yékítá ɔtsi ámu ibi, tsú mu kúsú. ɪnunu owísó ámu lókusú musu, ɔɔbwe amú afóɔɔ.

32 Mú ntópwe fɔɔn a, bɔpu alɔpu pú ahá ání ɔɛ laláhe de amú háan fée ba Yesu. 33 Wúlu amu fée beba befia wóyí ámu ɔnó. 34 Yesu létá ahá tsɔtsɔtsɔá bude ɔ ɔtsan-ɔtsan ɔ, olegya ɔɛ laláhe tsɔtsɔtsɔ é lé ahátó. ɔmeha ɔɛ laláhe amu abuto, tsúfé amú fée buyin mu.

Bulu Asún ɔkanda Galilea ɔmátó

(Luka 4:42-44)

35 Mú ɔyi kehe bake a, Yesu lédali wúlu amuto ɔ ɔtsétó ɔde mpái ɔ. 36 Táme Simon mua mu aba ɔɔɔ mbódí dúnká mu alu yówun mu. 37 Bréá bowun mu a, bebláa mu be, “Ahá fée bude fú dunká.”

38 Múo Yesu lébláa amú ɔbé “Mliha aɔ awúlu bámbású, anyeda Bulu asún ámu ɔkan unu é, tsúfé ɪni su neba ni.”

39 ɪno ɔɔɔ yéki Galilea ɔmátó fée, ɔde asún ámu ɔkan da Yudafo ofiakpa fée, ɔde ɔɛ laláhe é gyáa le ahátó.

ɪno Pɛpe ɔɔpú ɔku Tsá

(Mateo 8:1-4; Luka 5:12-16)

40 *ɪno pɛpe ɔɔpú ɔku léba beda akpawunu Yesu ayabito, kókóli mu ɔbé, “Owíé! Ní fótsulá á, fétalí há mí iwí béplí.”

41 Mu asún lówa Yesu nwe. Mú su ɔletinkí ibi da mu, bláa mu ɔbéé, “Natsúlá, fú iwí iplí!” 42 Inu nu ɔlɔ pepe amu ɔleta, mu iwí lépli. 43-44 Mú Yesu léda mu ɔlá ɔbéé, “Mábla ɔhaa asún ánfí. Nati laa afɔpu fú iwí yosuná Bulu igyí ɔhapú, afuha mu iwígyurátɔ amú Mose mbla lósuná tsú ɔlɔ pepetsa iwí ámu. Igyi adánsie suna ahá ání fú iwí iplí.”

45 Táme oyin ámu lénya dáli nu alí, ɔlɔwa mú ɔkan da bi. ɔleda asún ámu ɔkan wúlu amú ɔféé fiá. Mú su Yesu métra talí lé iwí ɔwan wíé wúlu kukúɔ, utsétɔ ɔletsíá tsíá. Táme mú ó á, ahá betsíá tsú ntíné-ntíné ba mu wá.

Tsukule Osínpu Tsa


(Mateo 9:1-8; Luka 5:17-26)

2 ¹Nke kpalobí ku ɔma a, Yesu léyinkí yó Kapernaum wúlutɔ. Ahá bonu ání alaba wóyí. ²Mú su ahá tsɔtsɔtsɔ beba ɔɔbulá wóyí ámu. ɔkpa kúráá utráa ma unvá fótson wie mútɔ. Yesu léda Bulu asún ámu ɔkan súná amú. ³Ahá abaná ɔɔsɔrá tsukule osínpu ɔku akpasu ba mu. ⁴Ɖɔm amu su bumenya ɔkpa pú mu wíé Yesu wá. Ínu su ɔyóɔdu obu ámu awunso, dá mú ɔtineku tíí, bekpíá akpa amu tsun ɔbó amú, pú mu tswi Yesu ansítɔ. ⁵Bréá Yesu lówun ání baho mu gyi a, ɔlebláa tsukule osínpu amu ɔbéé, “Mí bí, nasí fú lakpan kíé fú.”

⁶Inu Mose *mbla asunápú akvá butsie nu, beblí wá nwuntɔ beé, ⁷“Ntɔ asún oyin ánfí déblí alí? Megyí mbusuo álabó á? Ma é ɔbétalí sí lakpan kíé ahá dun Bulu nkule?”

⁸Yesu lébi ání bude nwéen gyí amú nwuntɔ. Mú su ɔlefíté amú ɔbéé, “Ntogyi sú mlidé ínu odu gywín? ⁹Mɔmu bówa ablílé ání nébláa tsukule osínpu anfi? ‘Nasí fú lakpan kíé fú’ ntée ‘Kusu tsu fú akpa afunati?’ ¹⁰Táme ndekléá mlibú ání mí, Nyankpusa-Mu-Bi ánfí mbu túmi ɔyí ánfítɔ sí ahá lakpan kíé amú.” Inu ɔlebláa tsukule osínpu amu ɔbéé, ¹¹“Nde fú bláa mbéé, kusu! Tsu fú akpa afunati yɔ wóyítɔ!”

¹²Inu nu ɔlɔkusú, tsú mu akpa, náti amú ansítɔ nu. Ínu lówa amú féé wánwan, bekanfú Bulu blí beé, “Anumókúwun ofúla anfi odu ki.”



*Bekplía akpa amv tsvn ɔb ámvto,
pú mv tswi Yesu ansító. (Marko 2:4)*

Lewi Ti

(Mateo 9:9-13; Luka 5:27-32)

13 Yesu létrá yɔ Galilea ɔpɔ ɔn. Ɔɔm kɔnkpɔnkpɔnti beba mu wá, olosuná amú ató. 14 Bréá ɔkpɔ ɔy á, olowun Alfeo mu bi Lewi tsie mu lampóo ɔhákpa. Mú ɔlebláa mu ɔbée, “Bobuo mi.” Insv ɔkɔsú buo mu.

15 Mú ɔma a, Lewi létu Yesu mua mu akasípú ató ogyíkpá mu wóyít. *Lampóo ahópu pú lakpan abwepú tsɔtsɔtsɔ é bobuo mu ba ató ámu ogyíkpá. 16 Bréá Mose mbala asunápú amvto akúá bugyi *Farisifo bowun ání Yesu mua lakpan abwepú pú lampóo ahópu bude ató gyí a, befuté mu akasípú be, “Ntogyi sú mua lakpan abwepú pú lampóo ahópu bude ɔbi wa gyi ató?”

17 Yesu lónu asún ánfí, ɔlebláa amú ɔbé, “Alɔpu léhián ulɔ ɔtsapú, megyí ahá ání iwɪ bu amú ɔnlun. Mmɛba aha wankláán ɔtikpá, mboún lakpan abwepú ɔtikpá nɛba.”

Ɔnókí lwi Asun Futéhé

(Mateo 9:14-17; Luka 5:33-39)

18 Asú Ɔɔɔpú Yohane akasípú pú Farisifɔ butetsiá *klí ɔnɔ. Eke ɔku aku beba befité Yesu be, “Ntogyi sù Yohane akasípú pú Farisifɔ akasípú buteklí ɔnɔ, táme fú akasípú mú butamaklí ɔnɔ?”

19 Yesu léle mú ɔnɔ ɔbé, “Ní ɔtsi ɔkpáinpu bu mu anyawíe wá á, béklí ɔnɔ? Ekekeke! Íniá ɔbu amú wá ánfí mú á, buméeklí ɔnɔ. 20 Táme eke ku béba ání békpa ɔká otsiápu amu náti sí amú. Alí nke ámutɔ béklí ɔnɔ ní.

21 “Ɔhaa tamapú tati pɔpwe tan tati dada. Tsufé tati pɔpwe amu békpiɔpú tsí dáda amu iku lé, há ɔtánkpa unu bélatéí tsía. 22 Alí kén butamapú nta pɔpwe wá ɔwulú-kpákpá kente wuhétɔ ní. Nta pɔpwe amu ibófu fá kente amu tsítsá, yíntá kente amu é. Ínu su ɔwulú-kpákpá kente pɔpweɔ búɔpú nta pɔpwe wá.”

Ɔkpónú Ɔdaké Mu Wie

(Mateo 12:1-8; Luka 6:1-5)

23 Yesu mva mu akasípú bɔtsun ayó ndɔ kuto *ɔkpónú ɔdaké, mu akasípú bɔpusáa ayó ámu ku wí. 24 Farisifɔ aku bowun amú, befité Yesu be, “Kí, ntogyi sù buɔe tɔá anu mbla meha ɔkpa bwe ɔkpónú ɔdaké?”

25 Yesu léfité amú ɔbé, “Mlímókúkla nu tɔá Owíe *Dawid lɔbwe bréa akún de mva mu abúopu, buma tɔtɔá bégyi kí? 26 Olebitíwíé Bulu osúmka yótsu bodobodoá bapúhá Bulu igyí ba, mva mu abúopu amu begyi, Bulu *igyí ɔhapú dehen Abiata bísu. Bulu igyí ahapú nkole bele ɔkpa bútegyi alí bodobodo amu.”

27 Mú ɔletrá bláa amú ɔbé, “Nyankpusa sù Bulu lɔbwe ɔkpónú ɔdaké ámu. Megyí ɔkpónú ɔdaké ámu sù Bulu lɔbwe nyankpusa. 28 Mú su mí, Nyankpusa-Mu-Bi ánfí gyí ɔkpónú ɔdaké mu wie!”

Ułtsa Ōkpónú Ōdaké

(Mateo 12:9-14; Luka 6:6-11)

3 ¹Yesu létrá yɔ Yudafo *ofiakpa unu á, oyin ɔku tsie unu, mu ibi kule lawú. ²Aha aku buɔe Yesu téé, abuki beé ɔbétsa mu ilo *ɔkpónú ɔdaké ámu, méni bénya mu iwɔ asún blí. ³Yesu lébláa oyin ámúú mu ibi kule lawú ámu ɔbéé, “Kusu belí amú ansító nfi.” ⁴Múú ɔlefíté amú ɔbéé, “Nto anu mbla léha ɔkpa ání abwéé ɔkpónú ɔdaké? Yilé lóó, ntée laláhe. Ahóó ɔha nkpa lóó, ntée amóó mu?”

Táme ɔhaa méle mú ɔnó. ⁵Yesu lópu ɔblí ki amú bómlí. Ułhɔ mu ɔsun, tsúfé kluntɔ bu amú odwin. Múú ɔlebláa oyin ámu ɔbéé, “Tinki fú ibi amu.” Olenya tinki mú ali pé, ɔhé lowie mútú. ⁶*Farisifo ámu bedali yɔ, amúa Owíe *Herode ahá bekítá agywun ununu alíá bóbwe bómo Yesu.

Ahá Tsɔtsɔtsɔ Uł Tsá

⁷⁻⁸Yesu mua mu *akasípú benatí bɔyó Galilea ɔpu ɔnó. Ōɔm kɔnkpɔnkpɔnti bobuo mu tsú Galilea múa Yudea ɔmátú, Yerusalem, Idumea, Yordan bunkpa ɔbun pú Tiro múa Sidon nsáintɔ ba mu wá. ⁹Ahá ámu bɔɔubi. Mú su ɔlebláa mu akasípú ɔbéé, budúnka ɔklun ku yai ha mu, méni bumóoputá mu. ¹⁰Tsúfé alatsá ahá tsɔtsɔtsɔ ilo. Mú su alɔpu amutɔ okugyíku dékléá ɔbópu ibi da mu. ¹¹Ní ahá ání *ɔhe laláhe bu amúsú benyá wun mu ali á, badida mu ayabiasi, súra okitikíti blí beé, “Fúgyí Bulu mu Bi ámu ni!”

¹²Táme ɔleda ɔhe laláhe amu ɔlá kínkíínkín ɔbéé, umáha ahá abubi mu.

Akasípú Amu Adá

(Mateo 10:1-4; Luka 6:12-16)

¹³Yesu lódu yó busu, ɔletɔ ahá ání mu onutó odeklé, bɔyótu mu. ¹⁴⁻¹⁵Múú ɔlele amútú ahá dúanyɔ, ɔletɔ amú mu *sumbí ayɔpú ání mua amúnnyɔ bétsiá, otsia wa amú abuyeda mu asún ɔkan, abugya ɔhe laláhe lé ahátɔ.

16 Ahá dúanyɔ ámu adá gyí, Simon ání ɔledunká mu Petro; 17 Sebedeo abí Yakobo mua mu pio Yohane (ɔledunká amú adá ɔbéɛ, “Boanerges.” Mú asɩ gyí, “Ɖpráda abí.”); 18 Atráhe gyí, Andrea, Filipino, Bartolomeo, Mateo, Toma, Alfeo mu bi Yakobo, Tadeo mua Simon ání ogyi iwɩsutsiá adunkápú ɔpasuato ɔha; 19 pú Yuda Iskariot ání ɔlebele mu há.

Yesu Mua Beelsebul

(Mateo 12:22-32; Luka 11:14-23; 12:10)

20 Bréá Yesu lóyɔ wóyítɔ a, ɔdom betrá ba unu. Mua mu akasípú bumenyá ɔkpa ání bégyi atɔ kúráá. 21 Bréá mu wóyítɔ ahá bonu mu iwɩ asún á, bɔyɔ beyékpá mu, tsúfé buku beɛ mu nwun layíntá.

22 Mose *mbla asunápú akvá botsu Yerusalem ba unu beblí beɛ, “Ɖhe laláhe owíe *Beelsebul tsíe mutɔ. Mu túmi ɔdeɔgya ɔhe laláhe lé ahátɔ.”

23 Mú su Yesu létɩ amú ba mu iwɩ wá, ɔlebláa amú asún ayébitɔ ɔbéɛ, “Nkálɩ Ɖbunsám ɔbétalí gya mu iwɩ? 24 Iwíe ogyíkpa ání ɩlaye anyɔ, bude aba kɔ ɩbédɩda. 25 Wóyí oduá mútɔ atsiápú bude aba kɔ é itobwíé. 26 Mú su ní Ɖbunsám dé mu iwɩ gyáa a, ɔméetalí líí. Mu ɔnɔ ɔmɔkpá ní.

27 “Ɖhaa méetalí wíe ɔwunlínɔ wóyítɔ yókulá mu atɔ, nkétɩ alagyankpá kíklɩ mu tswɩ, asa ɔbétalí kúlá mu atɔ féé.

28 “Ɖnɔkwaltɩ nde mlɩ bláa mbéɛ, Bulu ɔbétalí sí lakpan pú abususu kugyíku kíé nyankpusa. 29 Táme ní ɔku ɔblí abususu *Ɖhe Wankíhé amu iwɩ á, Bulu méesikíé mu ekekeke, tsúfé alabwé lakpan ání sikíé ma mú iwɩ.” 30 Aha aku beblí beɛ, ɔhe laláhe bú Yesutɔ. Mú su ɔde ɩnɩ blí ní.

Yesu Abusuanfɔ Onutó

(Mateo 12:46-50; Luka 8:19-21)

31 Yesu mu yin mua mu apio beba belí kpankpá, bɔwa ɔku beɛ, ɔtí mu ha amú. 32 Ɖdom butsie bomlí mu, bebláa mu beɛ, “Fú yín mua fú apíó bulí kpankpá, bude fú dunká.”

³³Múú Yesu léfuté amú ɔbéé, “Amendi gyí mí yín mua mí apíó?” ³⁴Múú ɔlekɪ ahá á múú butsie bomlí mu amu, blí ɔbéé, “Mlɪkɪ, mí yín mua mí apíó gyí ahá á nfi á! ³⁵Ɔhagyíɔha á ní ɔtɔbwé Bulu apé a, mu gyí mí pío pú mí yín ní.”

Ató-abí Owunyápu lwi Yébi

(Mateo 13:1-9; Luka 8:4-8)

4 ¹Yesu létrá kusú yó ɔde ató suná Galilea ɔpu ɔnó eke ɔku. Ɔɔm amu bobomlí mu. Mú su ɔlɔdu wíé ɔkluntɔ, yétsiá ɔpu amusu, ahá á mu é bulí ɔpu ɔnó mu. ²ɔno olosuná amú ató tsɔtsɔtsɔ ayébitɔ ɔbéé,

³“Mɪnu! Ɔɔtɔpu ɔku lóyɔ ató-abí owunyákpa. ⁴Bréá ɔde mú wunyáa a, ɪku lɔwulí ɔkpatɔ, mbubwi beba bɔtswetswéé mú féé. ⁵ɪku é lɔwulí abutású, ɔtínéá ɪsɪ kpalobí dɪn. ɪlɔwa ɔsa kwe, ⁶táme bréá owí lelun a, ɪlɔtɔ mú mʊ, tsúfé mú nɪn mɔyɔ ɔtót. ⁷Abí á mu ku lobun awutɔ, awu á mu lɔbulá kítá mú, ɪmedan. Mú su imoswie abí. ⁸Táme abí á mu ku é lɔwulí ɔsulɔw wankláánsú, ɪlɔkwe, dan, swie abí, ɪku aduasa (30). ɪku aduesie (60), ɪku é lafa (100).”

⁹ɔno ɔlɔmɔ mú ɔnó ɔbéé, “Ɔhá á ní ɔbu asu onúu!”

Tsá Svá Yesu Lótɔí Ayébisu

(Mateo 13:10-17; Luka 8:9-10)

¹⁰Bréá ilesi Yesu mua *sumbí ayɔpú dúanyɔ á mu pú ahá kpalobí akvá bubuo mu a, bobwíí ipa há mu beɛ, ɔlé yébi anfi asɪ suna amú. ¹¹Múú ɔlebláa amú ɔbéé, “Mɪ mú á, Bulu lahá mlɪ ɔkpa ɔbéé, mlɪbí mu *iwíegyé á mu ɪwɪ asun nɔáinhé. Táme nde aha bambá asún bláa ayébisu,

¹²‘ménɪ bówun lɔwun,
táme buméɛbɪ mú.

Bónu lánú,

táme bumóonu mú asɪ.

Ní megyí alɪ tekɪ bédamlí kluntɔ,

Bulu obési amú lakpan kíé amú.’ ”

Ató-abí Owunyápu Yébi Amu Así

(Mateo 13:18-23; Luka 8:11-15)

13Múy Yesu léfité amú ɔbéé, “Ní mlómónu yébi anfi así á, mú nkált mlóbwe asa mlónu tráhe féé así? 14Ató-abí á múy owunyápu amu déwunyáa amu gyí Bulu asún ámu. 15Abí á múy ɔlɔwulí ɔkpasu ámu gyí ahá á múy benyá nú Bulu asún ámu alí ɔbunsám labele mú lé amú kluntɔ náti ámu. 16Abí á múy ɔlɔwulí abutású amu gyí ahá á múy bonú asún ámu pé, bahɔ mú ansigyísú, 17táme íniá buma nlín su á, asún ámu itamatsiá amútɔ yó. Mú su ní budín amúsú ntée iwɔɔsin ku itú amú asún ámu su á, ununu butedida. 18Abí á múy ɔlɔwulí awutɔ ámu gyí ahá á múy bonú asún ámu a, bahɔ mú, 19táme ɔyí ánfítɔ atɔ hiánhe iwí gywíin, pú mútɔ atonyahé iwí ɔnsípe tegyi asún ámu su. Íni su butamaswíé abí. 20Abí á múy ɔlɔwulí ɔsulúv wankláánsú amu gyí ahá á múy bonú asún ámu a, butegyi músú. Íni su itehá butɔɔwé yilé fé alhá ató-abí ámu loswie, iku advasa (30), iku aduesie (60), iku é lafa (100) ámu.”

ɔkandíe Iwí Yébi

(Luka 8:16-18)

21Yesu léfité amú ɔbéé, “Butonywé ɔkandíe pú ɔlɔ bun músú, ntée púwá mpá ayasi? Megyi ɔfúákpá butɔpúbian? 22Tɔtɔ ma unvá íbénáin, uméelín ɔwan. Asun ɣáinhé kuku é uma unvá buméebi mú. 23ɔhagyíɔha ání ɔbu asu onúu!”

24Múy ɔleblí ɔbéé, “Mlɔyaa asu wankláán mli asún-nutɔ. Itáá mlɔpusúsu ha mli aba á, mú kén Bulu ɔbɔpusúsu mú wankláán, lápú iku tsía mútɔ há mli ní. 25Tsúfé ɔhá ání odekléá obónu mí atosunáhé amu así á, Bulu ɔbɔpu iku tsía mútɔ há mu. Táme ɔhá ání omedékléá obónu mú así á, Bulu ɔbɔswí mu kpalobí á múy alabí ámu kúráá.”

Oyí-ibíá Idedáan Iwí Asún

26Yesu létrá blí ɔbéé, “*Bulu iwíegyi amu igyi fé alhá ɔha todú oyí-ibí mu ndɔtɔ. 27Ní owí itá á, ɔhá ámu tekledi. Ní

oyí ike a, ɔtelákúsbú, táme omeyín alíá itɔbwé asa oyí-ibí ámu itɔkwe dan. ²⁸Ɔsulúbú onutó tɛhá mú tɔkwe. Itegyankpá lé ate, wá ntswítswí, asa itɔbɔbwe abí onutó. ²⁹Táme ayó ámu inyá bli pé, ɔdɔpu amu latsú mu ɔdayí ɔyétn mú, tsúfé mú tɛnbɛ lafun.”

Takyí-akpin Ibí Yébi

(Mateo 13:31-32, 34; Luka 13:18-19)

³⁰Ɔnu Yesu léfuté ɔbéɛ, “Ntɔ Bulu iwíegyí ámu lɛlian? Ntɛɛ yébi mɔmu nópusúná alíá igyi? ³¹Igyi fé takyí-akpin ibí. Múgyí túkúrífibi nyí-abító féé ní. ³²Táme ní idan a, itɔbwé ífá fúáhé dun ífá kugyíku. Mú abámbi tekpíkpli, mbubwi butogyónká mú asi.”

³³Oletsíá pú ayébi anfi odu tsɔtsɔtsɔ súná amú ató, yófun alíá ahá ámu bétalí nú mú asi. ³⁴Ɔmebláa amú asún kɔkɔvá imegyí ayébi ɔɔputóí. Táme ní isí mva mu akasípú nkule a, ɔtelé tógyító asi.

Atsufú Asɛbá

(Mateo 8:23-27; Luka 8:22-25)

³⁵Alí eke ámu ntúpwesu á, Yesu lébláa mu akasípú ɔbéɛ, “Mliha afa Galilea ɔpu yɔ mú ɔbun!” ³⁶Mú bowie ɔklɛntɔ, akasípú amu beplá mú, benatí sí ɔɔɔm amu. Nklɛn bámbá ku é lobuo amú. ³⁷Afú kpɔnkpɔnkpɔntɛ ku lówa tsúbɛn bí. Mú su ntsu dɛda wíé ɔklɛn amutɔ, ideklé ime. ³⁸Táme Yesu mú ɛlín sumuesu ɔklɛn amu ɔma ɔdɛdɛdɛ. Akasípú amu betsinkí mu. Mú befité mu beɛ, “Osunápú, íntá anidé ntsu wie á, fumotsu kuku lé mútɔ?”

³⁹Ɔnu Yesu lókúsú lé ɔnɔ wa afú ámu, ɔlebláa ɔpu amu ɔbéɛ, “Kpa ɔnɔ bun! Dɛ díín!” Ɔnu afú ámu lési tsúbɛn, ɛnu féé lɔlɔá. ⁴⁰Mú ɔlefuté amú ɔbéɛ, “Ntogyi súbú mludé ifú nya alí? Mlímá hógyi?”

⁴¹Ifú lehɛ kítá amú, befité aba beɛ, “Nyankpusa ɔmɔmu ní, afú múa ntsu kóráá tonú mu ɔme alí?”



Mar

Yesu lǎkvsú lé ɔ́nɔ́ wa afú ámv. (Marko 4:39)

Ɔ́ɛ Laláhe Gyáa Le Ogbedéputó
(Mateo 8:28-34; Luka 8:26-39)

5 ¹Bréá Yesu mva mu akasípú amv bowie Galilea ɔ́pu amv ɔ́bin Gerasefo^a ɔ́sulúsv á, ²olenya kplí dáli ɔ́klvntɔ́ ali, oyin ɔ́kvá *ɔ́ɛ laláhe bu mvtɔ́ lédali tsu afúli opulákpá befia mu. ³Oyin ánfɛ lapú afúli opulákpá unv bwé mu otsiákpá. Ɔ́híé ɔ́bv iyin. Mú sv ɔ́haa tamatráa talí bwé mu otsia díín, ntéé wá mu íkan. ⁴Tsúfé tekɪ betsiá wá mu ayabi pú mu ibi íkan, táme oletsiá tin mú, bíábía íkan amv tsálífwí. Ɔ́haa é má ɔ́wvnlín ání ɔ́bétalí pón mu. ⁵Ekekegyíeke ɔ́pa múa onyé féé á, ɔ́bv afúli opulákpá unv múa abvsv, ɔ́de okitikíti, ɔ́depu abwi tsantsan iwí.

^a5:1 *Gadarafɔ* bu nwló dáda amv akvtɔ́.

6 Olenya wun Yesu sísí alí, ɔlesrí yéda akpawunu mu ayabito. 7 Múú ɔɔsura okitikíti kúklókúú ɔbéé, “Ɖsúsúsú Bulu mu Bi Yesu, amansu igyi? Tanu Bulu ání fvméepítí mí ató!” 8 Ɖleblí asún ánfí, tsúfé Yesu lébláa mu ɔbéé, “Ɖɛ laláhe, dali oyin ánfíto.”

9 Inu Yesu léfité mu ɔbéé, “Nkáli butetí fú?”

Ɖlele mú ɔnó ɔbéé, “Mí dá gyí, ‘Ɖɔɔm’, tsúfé anihíé anu tsú.” 10 Inu ɛɛ laláhe amu behie kókóli mu beɛ, ɔmágya amú lé Gerasefo ɔsulúu amusu.

11 Mprákuo tsɔtsɔɔtsɔ aku budegýí okúku kusu unu fún. 12 Ɖɛ laláhe amu bokokóli mu beɛ, ɔhá amú abuyowie mprákuo ámutɔ. 13 Múú ɔleha amú ɔkpa. Bedali oyin ámutɔ yówie mprákuo ání bóbwe fé mpím-anyɔɔ (2,000). Amú féé besrí kplí okúku ku wíé ɔpu amutɔ, wúwu.

14 Mprákuo ámu akpapú besrí yéblí asún ánfí ulaba anfi awúlusu pú nkudasi féé. Ahá bedali beɛ bebá beki tɔá ulaba. 15 Bréá beba bowie Yesu wá á, bowun ání oyin ámúú ɛɛ laláhe betsiá mutɔ ámu ansító ladí, alawá atadie otsie. Uɔwa amú ifú. 16 Ahá ámúú bowun tɔá ulaba oyin ámúú teki ɛɛ laláhe tsie mutɔ ámu pú mprákuo ámusu ámu bebláa amú tɔá ulaba féé.

17 Inu bokokóli Yesu beɛ, ɔdáli amú ɔsulúu.

18 Bréá olowie ɔklun amutɔ á, oyin ámúú teki ɛɛ laláhe tsie mutɔ ámu lókokóli mu ɔbéé, ɔhá amubuo mu natí.

19 Táme Yesu méha mu ɔkpa. Mboún ɔlebláa mu ɔbéé, “Yinki ɔɔ fú apió wá wóyító, afuyeblláa amú ito yiléá aní Wíé Bulu labwé há fú, pú aliá alawun fu nwe.”

20 Mú su oyin ámu lénatí tsuntsun, ɔde ito yilé ámúú Yesu labwé há mu blí Dekapoli^b awúlu amu féétó. Ɖnó lobwie ahá ámu féé.

Ɖhande Ɖku Mu Bi Mva Ɖtsi Ɖku Uɔ Tsa

(Mateo 9:18-26; Luka 8:40-56)

21 Yesu léla fá ɔpu amu yó mú ɔbun. Bréá ɔbu ɔpu ɔnó unu á, ɔɔm kpɔnkpɔnkpɔnti beba bobomlí mu. 22 Inu Yudafɔ

^b 5:20 Dekapoli asi gyí awúlu dú.

*offiakpa ɔhande ɔkuá butetí mu Yairo léba unu. Bréá olowun Yesu a, ɔleda akpawunu mu ayabito, ²³kókóli mu ɔbéé, “Mí bí tsíhé déwu. Ba, afubɔpu ibi dinka musu, mu awútó iwa mu ɔnlun, onya nkpa.”

²⁴Múú muv Yesu benatí bɔyó á. Ɔɔm kpɔnkpɔnkpɔnti bekplá buo mu, kpá pútá mu.

²⁵Ɔtsi ɔku é bu ahá ámutɔ, obugya de mu wulí nfi dúanyo ní. ²⁶Alahíé wun ipian ilo atsapú tsɔtsɔtsɔ ibitɔ, húli mu iwɔsu ató fée, táme ilo ámu imekálá bwé mu. Iyin idewa tsía. ²⁷Bréá ɔtsi ánti lónu Yesu nka á, ɔlɔtsun yɔ mu ɔma, fifítíwíe ɔɔm amutɔ yópu ibi da Yesu atadié. ²⁸Tsúfé ɔleblí wá mu nwuntɔ ɔbéé, “Ní nɔpú ibi da mu atadié kpán á, ilo ámu ibési mí.”

²⁹Olenya pú ibi da mu atadié ámu ali, obugya amu léka itin. Olonu mú nka mu awútó ání ilo ámu lasí mu. ³⁰Unu Yesu lónu mú nka mu awútó mu é ání ɔhé ku ladáli mutɔ. Inunu ɔledamí ki ɔɔm amu, ɔlefíté amú ɔbéé, “Ma lápú ibi da mí atadié?”

³¹Múú mu akasípú amu befité mu beé, “Fú onutó fawun ání ɔɔm bakpá pútá fu. Múú futráa fudefité fée, ‘Ma lápú ibi da mi?’ ”

³²Yesu lówa ansí ki amútó fée, ɔde ɔhá ání ɔlɔpu ibi da mu dunká. ³³Ifú lékitá ɔtsi ámu. Mú su ɔlɔwa kpínkí kpakpakpa bi, tsúfé oyin itóá alanyá. Inu ɔleba beda akpawunu Yesu ayabito, bláa mu ɔnɔkwali amu fée. ³⁴Yesu lébláa mu ɔbéé, “Mí bí, fú hógyi laho fu nkpa. Natí iwilwiitɔ. Fú ilo ámu ita.”

³⁵Bréá Yesu bu músú ɔdetó á, aha aku botsu ofiakpa ɔhande amu wóyító ba bebláa mu beé, “Ɔhande, fú bí tsíhé ámu ɔdikpa mówa alé. Mátepi trá wa osunápú tó.”

³⁶Yesu mékplá asún ámutú budeblí ámu. Mboún ɔlebláa mu ɔbéé, “Mánya ifú. Fú mú hogyi wule.” ³⁷Yesu méha ɔhaa ɔkpa obuo mu dun Petro pú Yakobo muv mu pio Yohane nkule. ³⁸Bréá bowie ɔhande amu wóyító á, Yesu lówun ání ahá babóla unu, budesú, bude okitikíti. ³⁹Olowie unu fíté amú ɔbéé, “Ntogyi sù mlidé ipian wúun, mlidé okitikíti ali? Otsibi amu mókúwú, dúdí ɔde.”

40 Ahá ámu bɔmɔsí mu. Múú olegya amú fée dáli ba wunsiné, ɔleka obi ámu akwípu pú mu akasípu amú bubuo mu amu bebitíwíé obu amúú otsibi amu da mótó ámuɔ. 41 Inu ɔlekitá kebi ámu ibi, bláa mu amú ɔblítɔ ɔbéé, “Talita Kuum!” (Mú asi gyí, “Obitebí, kusu!”)

42 Inusu ɔɔkusú ɔna. (Otsibi amu laho nfi dúanyo.) Ilobwie ahá ámu fée ɔnɔ dáfá. 43 Múú ɔleda amú ɔlá kínkíínkín ɔbéé, bumábláa ɔhaa asón ánfí. Inu ɔlebláa amú ɔbéé, buháa kebi ámu ató ogyi.

Bumɔho Yesu Mu Wúluto

(Mateo 13:53-58; Luka 4:16-30)

6 ¹Yesu mua mu akasípu bedali ɔmá ámuɔ yínkí yó mu wúluto. ²*Ɔkpúnó ɔdaké lenya fun ali, ɔɔyo ɔde ató suná Yudafo *ofiakpa. Mu atosunáhé leha ɔnɔ lobwie ahá tsɔtsɔɔtsá bonu mú. Mú su befité aba bée, “Nkúnú olenya nyánsa múa ofúlábwe túmi ánfí é tsú? ³Megyí ató osrépu amu ni. Megyí mu yin gyí *Maria, mu apio yinhé gyí Yakobo, *Yosef, Yuda pú Simon? Yée ania mu apio tshé é tsie nfi á?” Benya ɔbló musu.

4 Yesu lébláa amú ɔbéé, “Ahá butobú *Bulu ɔnɔsú ɔɔípu ɔtíneyíɔtíné, táme mu wúlutofo, mu abusuanfo pú mu wóyító ahá mú butamabú mu.”

5 Inúá bumɔho mu gyi su ɔmetalí bwé ofúla kuku, dun ahá kpalobí akusu ɔlopu ibi dínká, tsá amú ɔɔ. 6 ɔɔwa mu ifú ání bumɔho mu gyi.

Akasípu Dúanyo Ámu Sumbíwa

(Mateo 10:5-15; Luka 9:1-6)

Yesu léki nkuda ání ibu bomlí unu asi, ɔde ató suná. 7 Inu ɔleti akasípu dúanyo ámu ba mu iwí wá. Múú ɔɔwa amú sumbí abanyó-abanyó. Ɔleha amú túmiá bópu gyi *ɔɔe laláhesu. 8 Ɔleda amú ɔlá ɔbéé, “Mlumátsu toto kítá yó ɔkpa ámu, dun mli oyi yíáhé! Mlumátsu atogyihe ntée akpankogyo, ntée kóba kítá! 9 Mliwa ntukuta, táme mlumátsu atadie nyɔɔsi kítá! 10 Wóyígyíwóyíá mlɔswíí mótó

á, mltsia unv yófun bréá mlédali wúlu amuto. ¹¹Ní mlɔyó wúlu kusu, bumɔɔ mli, ntée bumekleá bónu mli atosunáhé, mlhdédali mótó mlɔyó á, mliɔpakpa mli ayabito-isi wuli unv, isuna ání bumebi bwé.”

¹²Mú sv bɔyɔ yéda asún ámu ɔkan bee, ahá budámli klvntɔ. ¹³Begya ɔɛe laláhe tsɔtsɔɔtsɔ lé ahátɔ, bekpa aloɔpɔ tsɔtsɔɔtsɔ é ofobí, tsá amú ɔɔ.

Asú Ɖɔɔpú Yohane Lowu
(Mateo 14:1-12; Luka 9:7-9)

¹⁴Galilea ɔmású ogyíɔú *Herode lónu Yesu iwɔ asún ánti, tsúfé mu ɔdayilé de ɔtínegyíɔtíne. Aku buɔɔblí bee, “Asú Ɖɔɔpú Yohane lákúsú tsú afúlitɔ. Mú sɔ, ɔɔe ofúla anfi odu bwe ní.”

¹⁵Táme aku é bee, “Bulu ɔnósú ɔtɔɔpú dada *Elia ní.”

Aku é bee, “Bulu ɔnósú atɔɔpú dada amuto ɔku ní.”

¹⁶Bréá Herode lónu asún ámu a, ɔleblí ɔbé, “Yohane amúú neha betun amu látsínkí tsú afúlitɔ.” ¹⁷⁻¹⁸Herode léha bekítá Yohane, wá mu ɔkan, pú mu wá obu. Tsúfé oletsiá bláa Herode ɔbé, mbla meha ɔkpa ání obétsiá mu pio Filipino mu ka Herodia amúú otsia amu.

¹⁹Mú sv Herodia lóhɔ Yohane asún wá iwɔɔ. Ɖɔɔbwe agywun ání ɔbómɔ mu, táme ɔmetáli, tsúfé Herode méhá mú ɔkpa. ²⁰Herode yin ání Yohane asún da ɔkpa, ogyi ɔha wankíhé. Mú sv olenya mu ifú, ɔleɔ mu sv wankláán ání tɔtɔ mɔɔbwe mu. Ibv mótá Yohane asun blíhé tehan Herode, táme otekle mú nu.

²¹Tá Herodia déɔdunká léba ha mu. Eke ɔkuá Herode dé mu ɔkwíké gyí a, ɔɔtswi ɔpúnú, tí ahande pú isá akɔpú dehen pú Galileafɔ ahande ba ató ámu ogyíkpá. ²²Bréá Herodia mu bi tsíhé lóbowie ɔbuntɔ tsa a, ɔlɔwa Herode mu ahande amu féé ansigyí. Herode lébláa mu ɔbé, “Fite mí tógyítá fudeklé, néha fú.” ²³Ivu ɔleka ntam há mu ɔbé, “Néha fú tótógyítá féfité mí. Ní igyi mí iwíe ogyíkpá ifun kóráá.”

²⁴Otsibi amu léɔɔli yéfité mu yin ɔbé, “Ntɔ nfíte?”

Mu yin lébláa mu ɔbéɛ, “Fite Asú Ɖɔɔpú Yohane nwun.”

²⁵Ɖsasɔ otsibi amu léba bebláa Herode ɔbéɛ, “Ndekléá fupú Asú Ɖɔɔpú Yohane nwun dinka ulínsú ha mi sésééséi.”

²⁶Asún ámu léhɛ han owie amu, táme mu ntam amú ɔleka, pú ahá amú bú bubu unu ámu su á, omekleá ɔbótun ntam amu. ²⁷Ununu ɔlɔwa mu ahá ɔtínpu ɔbéɛ, ɔyétun Yohane nwun ba mu. Ɖlɔɔyɔ yétun Yohane nwun obu ɔdikpá unu. ²⁸Mú ɔlɔpu nwun ámu dínká ulínsú ba otsibi amu, mu é ɔlɔpu yáa mu yin Herodia. ²⁹Bréá Yohane akasípú bonu asún ánfɛ á, beba botsu mu satin yópulá.

Ahá Mpím-nu Atogyihe Ha

(Mateo 14:13-21; Luka 9:10-17; Yohane 6:1-14)

³⁰Yesu *sumbí ayɔpú ámu beyinkí bá bebláa mu atɔ́a bayɔ́bwe pú múa bayósuná féé. ³¹Mú ɔma a, ahá buna amú wá alu, bumenyá ɔkpa gyi atɔ́ kúrää. Mú su ɔlebláa amú ɔbéɛ, “Mliha ayɔ itsétɔ́ fléén, ayeda ɔkpúnú.” ³²Unu bowie ɔkluntɔ, pú ɔkpa bɔyɔ́ itsétɔ́ ɔtineku.

³³Táme ahá tsɔtsɔɔtsɔ bowun amú, bí ɔtínéá bɔyɔ́. Mú su botsu awúlu ámu féésú, tsíí ɔsrú gyankpá yówie ɔtíné amú Yesu aná bɔyɔ́ ámu. ³⁴Bréá Yesu lékplí dáli ɔklun amutɔ, wun ɔɔm kɔnɔkɔnɔkɔnɔntɛ ámu a, amú asún lɔwa mu nwe, tsúfé bɔgyi fé akúfa ání buma ɔkparú. Mú su olosuná amú atɔ́ tsɔtsɔɔtsɔ. ³⁵Owí lɔɔn a, akasípú amu beba mu wá bebláa mu beɛ, “Itsétɔ́ nfi gyí, owí é latá. ³⁶Ha amú abuyɔ nkuda múa awúlu ání ibu bomlí nfi asɛ yodunká tɔku gyi.”

³⁷Táme Yesu léle mú ɔnɔ ɔbéɛ, “Mludunka atɔ́ ha amú abuyi.”

Mú ɔ befíté mu beɛ, “Abétalí nyá sika^c ho atɔ́ há ahá ánfɛ féé bégɛyí?”

³⁸Yesu léfíté amú ɔbéɛ, “Bodobodo apin afɛnɛ mlɛbu? Mliɔ amliyekɛ!”

Beyinkí bebláa mu beɛ, “Bodobodo apin anu pú ntsutso iye bwáhé anyɔ bu unu.”

^c6:37 Sika ánfɛ igyi sika futútú lafa-anyɔ (200), igyi ɔha nke lafa-anyɔ (200) ikɔká.

³⁹Yesu lébláa amú ɔ́bée, “Mliha amú abutsiatsia ifá ɔ́ɔ́bwe amusu.” ⁴⁰Betsiá así akúsú-akúsú, aku lafa (100), aku é aduenu (50). ⁴¹lnu olotsu bodobodo anu pú ntsutso iye bwáhé anyo ámu. Múú olotsu ansí fúá kí ɔ́súsú, ɔ́leda Bulu upán. lnu olebiabía bodobodo amu há mu akasípú amu ɔ́bée, buyée ha amú. Oleye iye bwáhé anyo ámu é há amú, ɔ́ɔ́pohá ahá ámu. ⁴²Amú fée begyi mwe sian. ⁴³Akasípú amu ɔ́ɔ́ɔ́sí bodobodo múa iye sianhe amu a, ulɔ́bulá alakpá dúanyo. ⁴⁴Ayin ání begyi ató ámu nkule bugyi mpím-nu (5,000).

Opusu Natí

(Mateo 14:22-33; Yohane 6:15-21)

⁴⁵Benya gyi ató ámu tá alí, Yesu lébláa akasípú amu ɔ́bée, buwíe ɔ́klntɔ́ abugyankpa fa ɔ́pu amu yo Betsaida wúluto. Mu mú olesin ɔ́ma sí ɔ́ɔ́m amu ɔ́kpa. ⁴⁶Bréá olesi amú ɔ́kpa tá á, ɔ́ɔ́ɔ́du yó busu yóɔ́ mpá. ⁴⁷Bréá owí leta, ɔ́klntɔ́ amu lawíe ntsu nsuné á, ilesi Yesu nkule ibu ámusu. ⁴⁸lnu olowun ání ɔ́klntɔ́ amu plá de ɔ́nln wa wá akasípú amu, tsúfée afú kpɔ́nkpɔ́nti detsúun fia amú. Bake-bake a, Yesu lénatí ntsu ámusu ayabito buo amú, odeklé ɔ́tsun amúsú. ⁴⁹Táme bréá bowun mu a, bukí bee, fúli ogyi. Mú su ɔ́ɔ́súra okitikíti. ⁵⁰Opúni letsíí amú fée.

Táme ɔ́ɔ́ɔ́wa ɔ́sa bláa amú ɔ́bée, “Mliwa klntɔ́. Mí ní. Mlumánya ifú.” ⁵¹Múú ɔ́ɔ́ɔ́du wíe ɔ́klntɔ́ amuto, afú ámu leka itin á. Asún ánfí lówa amú wánwan. ⁵²Amú klntɔ́-odwin su bumɔ́kúnýa nú bodobodo twi asún ámu asi.

Genesaretɔ́ Alɔ́pu Tsa

(Mateo 14:34-36)

⁵³Yesu mua amúnycɔ́ befa ɔ́pu amu yési Genesaret osubúnɔ́, ɔ́ɔ́wa ɔ́fée kítá ɔ́klntɔ́ amu. ⁵⁴Benya kplí dálɔ́ ɔ́klntɔ́ amuto alí ahá bowun Yesu, bí mu ɔ́tsáwule pé. ⁵⁵Mú su besrí yótsu amú alɔ́pu súrá akpasu, tsú ntíné-ntíné ɔ́ɔ́tu mu unu. ⁵⁶ɔ́tínegyíɔ́tínéá Yesu lóycɔ́, igyi wúluto ntée akuda ó á, ɔ́ɔ́pu amú alɔ́pu ɔ́ɔ́tswi brɔ́nusu, kókóli mu bee, ɔ́há alɔ́pu amu abɔ́pu ibi da mu atadie ɔ́danú kpán. Amúá ɔ́ɔ́pu ibi da mú fée benya ulotsá.

Atutufɔ Amándíé

(Mateo 15:1-9)

7 ¹*Farisifɔ pú Mose *mbla asunápú aku botsu Yerusalem ba befia Yesu wá. ²Mú bowun ání mu akasípú amu aku bumɔfwɪ ɪbɪ amándíé ɔkpasu asa bude atɔ gyí.

³(Tsúfé *Yudafɔ, títriu Farisifɔ bumɔkúsí amú anáin amándíétɔ. Mú su ní bumɔkúfwɪ ɪbɪ amándíé ɔkpasu á, butamagyi atɔ. ⁴Alɪ kén ní bumɔkúgyóra ɪwɪ á, butamagyi tɔá bɔpɔtsúa bíású ba nɪ. Amándíé bámbá ku aná é bu ɪnu, butráa bude mútɔ tsú nwe núu ntsu, nlɔ pú nlinka ɪwɪ.)

⁵Mú su amúa Mose mbla asunápú befité Yesu beɛ, “Ntogyi sɔ fú akasípú amu butamagyi anɪ anáin amándíésú, bumɔfwɪ ɪbɪ amándíé ɔkpasu asa abugyi atɔ?”

⁶Yesu léle mú ɔnɔ ɔbéɛ, “Ɖnɔkwali *Bulu ɔnɔsú ɔtɔɪpú *Yesaia léblɪ tswɪ tsú mli apinabwebí abwepú ánfɪ ɪwɪ ɔbéɛ, ‘Ahá ánfɪ budepu amú ɔnɔ bú mí, táme amú klun bu ɪfɔ mí wá.

⁷Kpaali bude mí sum, tsúfé basí Bulu mbla tswɪ, yɔ bude anyánpúsa mbla suná.’

⁸“Mlɪlasí Bulu mbla ámu tswɪ, mlɪdé mli anáin amándíétɔ.”

⁹ɪnu ɔlebláa amú ɔbéɛ, “Mlɪlapina si Bulu mbla ámu tswɪ nyánsatɔ, méni mlégyi mli onutó amándíésú. ¹⁰Tsúfé Mose lówanlín wá Bulu mbla ámutɔ ɔbéɛ, ‘Bu fú sí mua fú yin.’ Ɖletrá wanlín ɔbéɛ, ‘Ní ɔku léblɪ asukpan tsú mu si ntée mu yin ɪwɪ á, bumɔɔ mu.’ ¹¹Táme mli mú mlɪaa, ɔha ɔbétalɪ bláa mu si ntée mu yin ɔbéɛ, ‘Tɔá teki nɔpɔhá fú á, napúbwé Koban.’^d ¹²Mlɪlahá ahá bumédé tɔtɔ bwe há amú akwípú. ¹³Mli anáin amándíé su mlɪtráa mlɪmédé Bulu mblasu gyí. Ntóbí tsɔtsɔtɔtɔ é bu ɪnvá mlɪtráa mlɪdébwe tsía ɪntɔ.”

^d7:11 Koban asi gyí, napúkíé Bulu.

Tsá Itokpóí Jha Bulu Ansító
(Mateo 15:10-20)

14 Yesu létrá ti ɔdɔm amu ba mu iwɪ wá, ɔlebláa amú ɔbé, “Mli féé mliyaa asu amlinu íni asi! 15-16 Megyí tsá jha tegyi tókpóí mu Bulu ansító. Mboún múá itedáli tsu mu ɔnó.”

Mar

17 Bréá ɔlenatí sí ɔdɔm amu yó wóyító a, mu akasípú amu befíté mu yébi anfi asi. 18 ɔlele mú ɔnó ɔbé, “Mli é mlutamanú asún asi? Mluméyín ání tsá itowíé jha ɔnó tamakpóí mu Bulu ansító? 19 Tsúfé megyí mu kluntɔ itowíé, mboún mu iputo itowíé, ɔteyéle mú wá ɔkpuntɔ.” (Yesu léle mútɔ púsúná ání atogyihe kugyíku *iwɪ letɪn.)

20 Inu ɔlebláa amú ɔbé, “Tsá itedáli tsu jha kluntɔ tókpóí mu Bulu ansító. 21 Tsúfé jha kluntɔ ágywun laláhe kugyíku tedáli tsu. Mútehá mu ɔtɔwá atsi múa ayin asún, otowí ató, ɔtɔmó jha, ɔtɔtɔ mbua, 22 ɔtɔwá ɔnsipe, ɔtɔbwé laláhe, ɔtemlé ahá, ɔtɔwá hakpan, ɔtɔwá olu, otetsii jha, ototsú iwɪ, ɔtɔbwé mimlála. 23 Jha kluntɔ, atɔ laláhe anfi féé itedáli tsu. Múttókpóí mu nɪ.”

ɔtsɪ ɔkúá Omegyí Yudayin Hógyi
(Mateo 15:21-28)

24 Yesu lénatí unu yó Tiro nsáintɔ. ɔlɔyóswú wóyí kutɔ. Omedéklé ɔbé ahá bubú ání maba unu, táme ɔmetalí njáin mu iwɪ. 25 *ɔɲe laláhe bu ɔtsɪ ɔku mu bi tsíhétó. Olenya nú Yesu nka alɪ, ɔlɔwa ɔsa beda akpawunu mu ayabito. 26 Griikiyintse ɔtsɪ ánfɪ gyí. Bɔkwú mu Siro Foenike ɔsulúsu. Olokokóli Yesu ɔbé, ogyáa ɔɲe laláhe amu le mu bi ámutɔ. 27 Táme Yesu lébláa mu ɔbé, “Ha nyebí ámu abumwe asa, tsúfé uma aleá fósúwú nyebí atogyihe púhá akíai.”

28 ɔtsɪ ámu léle mú ɔnó ɔbé, “Owíé, ibu mútɔ alɪ, táme akíai ání buda ɔpónú ámu asi é butegyɪ nyebí atogyihe mpupubiá itekpákpa bun amú ɔpónúasi.”

é 7:16 Múttó yéé 16 bu nwulú dada amu akutɔ: *Jhagyíjha ání ɔbu asu, oníu!*

²⁹Múú Yesu lébláa mu ɔ́bée, “Fabí lé mú ɔ́nɔ́. Mú su nati, ɔ́ɲe laláhe amu ladálu fú bí tsíhé ámutɔ́.”

³⁰Bréá ɔ́tsi ámu lóyɔ́ wóyítɔ́ a, olowun ání ɔ́ɲe laláhe amu ladálu mu bi ámutɔ́, alasi ɔ́da mpású.

Yesu Létsa Isutin Ɔ́kva Ɔ́tamatóí Wankláán

³¹Yesu lénatí Tiro unu yɔ́ Sidon yóbo mlí kplí ba Dekapolí awúlu amu nsáintɔ́ asa ɔ́leladú yɔ́ Galilea ɔ́ɲu ɔ́nɔ́. ³²Bɔ́ɲu isutin ɔ́ku ba mu, ɔ́tamatalí tóí wankláán. Bokokóli mu bee, ɔ́púu ibi dinka musu. ³³Múú ɔ́lekpa oyin ámu ya ifúntɔ́, pú mu asrebi wá oyin ámu asutɔ́, olotu atsunɔ́ dínká mu osrebisu, púdá oyin ámu ɔ́dandusu. ³⁴Unu olotsu ansí fúá kɪ ɔ́súsú, lún ɔ́ɲé fú. Múú ɔ́leblí ɔ́bée, “Hefata.” *Hebri ɔ́blítɔ́. Mú así gyí, “Finki.”

³⁵Ununu mu asu lefinkí, mu ɔ́dandu é lesankí, ɔ́lɔ́tɔ́í wankláán. ³⁶Múú Yesu léda ahá ámu ɔ́lá kpákpáákpá ɔ́bée, bumábláa ɔ́haa. Táme tsé dúdúúúúá ɔ́leda amú ɔ́lá á, alí kén beda asún ámu ɔ́kan nu. ³⁷Ɔ́nɔ́ lehie bwíé amú, beblí bee, “Alabwé tógyítɔ́ wankláán. Alahá asutin bude asún nu, amúmu é budetɔ́í.”

Ahá Mpím-na Atogyihe Ha

(Mateo 15:32-39)

8 ¹Nke ámutɔ́ á, ɔ́ɔ́m kpɔ́nkpɔ́nkpɔ́ntɔ́ betrá befia Yesu wá. Amú atogyihe leta. Mú su Yesu létɪ mu akasípú, bláa amú ɔ́bée, ²“Ahá ánfɪ asún de mí nwe wa. Nde eke sáási ɔ́pá bubuo mi. Butráa buma tɔ́tɔ́á bégyi. ³Ní nehá amú bɔ́pú akún náti bɔ́yɔ́ wóyí á, ansítɔ́ béyébi amú ɔ́kpatɔ́, tsúfé amúts áku ɔ́kpa bu ifú.”

⁴Múú akasípú amu befité mu bee, “Nkúnú abénya atogyihe há ahá ánfɪ féé bégyi mwe dimbí ánfɪsu.”

⁵Yesu léfité amú ɔ́bée, “Bodobodo afɪnu mlɪbu?”

Bele mú ɔ́nɔ́ bee, “Asienó.”

⁶Yesu léha ɔ́ɔ́m amu betsiá ɔ́sulúɔ́. Múú olotsu bodobodo asienó ámu, dá Bulu ipán, olebiabía múts há

†7:31 Dekapoli así gyí awúlu dú.

akasípú amu beye mú há amú. ⁷Bubu ntsutso iye bwáhé kpalobí ku é. Yesu lóyulá músú, ɔɔɔɔ mú é há akasípú amu, beye ha amú. ⁸Amú fée begyi mwe. Akasípú amu bɔɔɔɔ isíanhe búlá alakpá yilé asienó. ⁹Ahá ámu bóbwe fé mpím-na (4,000), Yesu lési amú ɔkpa. ¹⁰ɔɔɔɔ mu mu akasípú bɔɔɔ wíé ɔklɔntɔ ba Dalmanutafɔ ɔsulúsu.

Farisifo Bodunká Ofúla

(Mateo 12:38-42; 16:1-4)

¹¹Farisifo bonu ání Yesu laba unu, beba bude mu asún fité. Bebláa mu beɛ, ɔbwéɛ osúna pusuna amú ání lélé otsú Bulu wá. ¹²Yesu lólun ɔɔé fú. Múú ɔlefité amú ɔbéɛ, “Ntogyi sú mli ndemba-abí mliɔde osúna dunká amliwun? Mbláa mli ɔɔɔkwali. Mmɔɔbwe osúna kuku súná mli!”

¹³ɔɔɔ ɔlenati sí amú, yó du wíé ɔklɔntɔ, fá ɔpu ámu yó mú ɔbun.

Farisifo Pú Owíe Herode Bodobodotu-afá

(Mateo 16:5-12)

¹⁴Yesu akasípú amu bumekáín tsú bodobodo kítá. Ipin kule pé bu ɔklun amutɔ. ¹⁵Bréá budun ntsu ámusu ɔɔyó á, Yesu léda amú ɔlá ɔbéɛ, “Mliki wankláán Farisifo pú ɔmáso ogyípú *Herode bodobodotu-afású.”

¹⁶Akasípú amu befité aba beɛ, “Bodobodo amúú anumédé ámu sú ɔde asún áníftí blí lóó?”

¹⁷Yesu lónu asún ání budeblí. Múú ɔlefité amú ɔbéɛ, “Ntogyi sú mliɔdeblí mliɔa, mliɔmédé bodobodo? Mú su ɔklɔntɔ bu mli odwin mli é? ¹⁸Mli ansíbi tamawun ató, mli asu é tamanú asún? Mliɔtamakáín asúnsú? ¹⁹Bréá neye bodobodo apin anu ámu há ahá mpím-nu (5,000) á, isíanhe alakpá afɔni mliɔɔɔɔ?”

Bele mú ɔɔɔ beɛ, “Dúanyɔ.”

²⁰“Bodobodo apin asienó ámuú neye ha ahá mpím-na ámu é mé, isíanhe alakpá yilé afɔni mliɔɔɔɔ?”

Bele mú ɔɔɔ beɛ, “Asienó.”

²¹ɔɔɔ Yesu léfité amú ɔbéɛ, “ɔmɔkówánkí mli ki?”

Ansibi Obwiepó ɔku Ansíbi Bwií

22 Yesu mva mu akasípú beba Betsaida wúluto. Aha aku bekpa ansibi obwiepó ɔku ba. Bobwií ipa há mu beɛ, ɔpúv ibi da mu, ɔtsa mu ulɔ. 23 Yesu lékitá ansibi obwiepó ámu ibi, kpá mu dáli wúlu amuto. Inu olotu atsunó dínká oyin ámu ansíbisu, pú ibi dínká musu. Múv ɔlefíté mu ɔbéɛ, “Fude ató wúun?”

24 Ansibi obwiepó ámu lótsu nwun fúá ki, ɔleblí ɔbéɛ, “Nde anyánpúsa wúun, táme bugyi fé nyí buna.”

25 Inu Yesu létrá pu mu ibi dínká mu ansíbisu. Oyin ámu lóbwií ansíbi ki a, mu ansíbi lawá alé, ɔde tógyító wúun wankláán nya. 26 Yesu léyinkía mu sísí wóyító ɔbéɛ, “Natu laa yɔ wóyí. Mátepi wíé wúlu amuto kóráá.”

ɔhá Ání Yesu Gyí

(Mateo 16:13-20; Luka 9:18-21)

27 Yesu mva mu akasípú amu benatí unu bɔyɔ Kaesarea Filipi awúlusu. Bréá buna ɔkpatɔ á, ɔlefíté amú ɔbéɛ, “Ma ahá beɛ ngyi?”

28 Bele mú ɔnó beɛ, “Aku beɛ, fúgyí Asú ɔbɔpú Yohane. Aku beɛ, Bulu ɔnósú ɔtɔípú *Elia. Aku é beɛ, Bulu ɔnósú atɔípú amuto ɔku.”

29 Múv ɔlefíté amú ɔbéɛ, “Mli é mé? Mli mígyí ma?”

Petro léle mú ɔnó ɔbéɛ, “Fúgyí *Kristo, ɔhá amúv Bulu ladá mu ofúli amu) ni.”

30 Inu ɔleda amú ɔlá ɔbéɛ, “Mlumábláa ɔhaa mí iwɛ asún ánfɛ.”

Yesu Iwɛsun Pú Mu Lowu Iwɛ Asún Blí

(Mateo 16:21-28; Luka 9:22-27)

31 Inu Yesu léfi asɛ ɔde asúntó le súná amú ɔbéɛ, “Ilehián ání mí, Nyankpusa-Mv-Bi ánfɛ néhie wun iwɛsun tsɔtsɔwɔtsɔ. *Yudafɔ ahandɛ, Bulu *igyí ahapú dehen pú Mose *mbla asunápú féé bekiná mí beɛ, megyí mígyí Kristo amu. Bómɔ mí, táme Bulu ɔbélakúsúa mi tsú afúlito nkensá ɔma.”

³²Ɔmɔpu asún ánfɛ ɣáín amú. Mú su Petro létɛ mu ya utsétó yéka mu itin ɔbéɛ, ɔmátrá blí alɛ. ³³ɛnu ɔledamlí kɛ akasípú amu, ɔlokplún wa Petro ɔbéɛ, “*Satan, natɛ tɛi mísú! Megyí t́á Bulu dégywúín fudegywúín, anyánkpusa klé fudegywúín.”

³⁴ɛnu ɔletɛ ɔɔɔm amu pú mu akasípú ba mu iwɛ wá. Múú ɔlebláa amú ɔbéɛ, “Ní ɔku dékléá obóbuo mi á, osíi t́á otekle bwe, otsu mu *oyikpalíhe bobuo mi. ³⁵Tsúfé ní ɔku léprɛ mu nkpa á, ɔbóhulú mú. Ní ɔku é lóhulú mu nkpa mía Bulu *asun wankláán ámusu á, Bulu ɔbóhɔ mu nkpa. ³⁶Ní ɔku onyá ɔyító ató féé, táme ɔhúli mu ɔkláa a, labi mɔmu ulɔwa há mu? ³⁷Ntéɛ nto ɔha ɔbétalí pútse mu nkpa? ³⁸Tsúfé ní ɔku onyá mía mí atosunáhé péli ndemba-abí laláheá badámlí ɔma há Bulu ansító á, mí, Nyankpusa-Mu-Bi ánfɛ é nénya mu péli bréá mía *Bulu-abɔpu wánkíhé amu anuná mí Sí numnyamto abá.”

9 ¹Yesu lóyɔ mu t́tsu ɔbéɛ, “Ɔnɔkwali nde mli bláa. Aku bubu mlito nfi bumóowu, ýɔfun bréá bawun ání Bulu iwíegyí amu una túmisu íbá.”

Yesu lwutsée

(Mateo 17:1-13; Luka 9:28-36)

²Nkensíé ɔma a, Yesu lékpa Petro, Yakobo mva Yohane, mva amúnyɔ bɔɔɔ ý ibu kusu amú nkule. ɛnu Yesu létse amú ansító. ³Mu atadiɛ ledamlí futútúútú, ide ogyá kpa. Tɔto ma ɔsulúv anfɛsvá íbétalí bwé mú íbófulí alɛ. ⁴ɛnu *Elia mva Mose beɛ iwɛ ɔwan, amúa Yesu budetó. ⁵Múú Petro lébláa Yesu ɔbéɛ, “Osunápú, íbu aléá abétsiá nfi. Ha ada abú asa. Fú klé kule, Mose klé kule, Elia é klé kule.” ⁶Ifú lehie kítá Petro mva mu aba ámu dubi. Mú su omowun asún ání ɔblí.

⁷ɛnu agyinde ku lobobun amúsú, ɔme ku ledali tsu mútó ɔbéɛ, “Ɔni gyí mí B́i ɔɔwepú ní! Mlyaa asu amlɛnu mu asún!” ⁸ɛnu belaku, táme bumetrá wun ɔhaa dɔn Yesu nkule.

⁹Bréá buɔɛ íbu ámu kplí á, Yesu léda amú ɔlá ɔbéɛ, “Mábláa ɔhaa t́á bayówun, ýɔfun ekeá Bulu ɔbókusúa mí, Nyankpusa-Mu-Bi ánfɛ tsú afúlitó.”

¹⁰Asún ánfí lesin amú nwuntɔ, betsiá fíté aba bæ, “Kusú tsú afúlitɔ ánfí así mé?” ¹¹lnu befíté Yesu bæ, “Ntogyi sù Mose mbla asunápú amu bæ, ilehián ání Elia obéyinkí bá asa Kristo amu ɔbéba?”

¹²Ɔlele mú ɔnɔ ɔbé, “Ɔnɔkwali igyi, ání Elia obégyankpá bá bela tógyítɔ yái wankláán. Mú ntogyi sù Bulu asun wanlínhé amu kén léblí tsú mí iwí ɔbé, mí, Nyankpusa-Mu-Bi ánfí néhie wun ipian, ahá bósúpáa mí? ¹³Nde mli bláa mbé, Elia layínkí bá dodo. Ahá ɔɔbwe mu aliá budeklé, fé aliá ɔɔwanlín wá Bulu asún ámutɔ.”

Uo Dídahe Ɔlɔpú Tsa

(Mateo 17:14-21; Luka 9:37-43a)

¹⁴Bréá beyinkí bowie akasípú atráhe amu wá á, bowun ání ɔɔɔm kpɔnkpɔnkpɔntɔ bafia bomlí amú, Mose mbla asunápú aku bude akasípú amu nwéen gyí. ¹⁵Bréá ɔɔɔm amu bowun Yesu a, ulwa amú wánwan, besrí yéfia mu, há mu aye. ¹⁶Yesu léfíté mu akasípú amu ɔbé, “Amansu mliá amúnɔ mlidébutí?”

¹⁷Ɔɔɔm amutɔ ɔku léle mú ɔnɔ ɔbé, “Osunápú, nekpa mí bí yínhé ba fu mbé afutsa mu ulɔ. Ɔhe laláhe lahá ɔtamatóí. ¹⁸Brégyíbréá ɔhe laláhe amu iba musu á, itɔwúsu mu, fun mu dá ɔsulótɔ. Mu ɔnɔ tɔbwé afu, ɔɔwí ayín, ɔtesínsun. Nebláa fú akasípú mbé, bogyáa ɔhé ámu le mutɔ ha mí, táme bumetalí.”

¹⁹Yesu lébláa amú ɔbé, “Ndemba-abíá mlímá hógyi, alí nétsiá mli wá yó ní? Yófun ɔmenke nnyá klun ha mli? Mlikpa kebi ámu ba mí!” ²⁰Bekpa kebi ámu ba Yesu.

Ɔhe laláhe amu lénya wun Yesu ali, ulwusúu kebi ámu fun mu dá. Odemináa, mu ɔnɔ é ide afu. ²¹Yesu léfíté obí mu sí ámu ɔbé, “Tsú bré mɔmutɔ ulɔ ánfí lefi así?”

Ɔlele mú ɔnɔ ɔbé, “Tsú mu nyebito ɔpá. ²²Itɔtswi mu wá ogyá múa ntsu aná féétɔ, itekleá ɔbómɔ mu, táme ní fétalí bwé tɔku tsú mú iwí á, wun aní nwe afugyi aní buale.”

²³Yesu léfíté mu ɔbé, “Blí fude fæ, ní nétalí? Tógyítɔ lɔpɔn ha ohógyipu.”

24 Inu obí mu si ámu lókpɔlɔn blí ɔbée, “Nohogyi, táme mí hógyi mɔtsó. Gyi mu buale, mí hógyi imoní!”

25 Bréá Yesu lówun ání ɔɔm amu butráa busrí bebá á, ɔɔkpɔlɔn wa ɔɔe laláhe amu ɔbée, “Fú ɔdandubiabía múa isutín ɔɔé, dali kebi ámutɔ. Mátrá wie mutɔ ekekekeke!”

26 ɔɔe laláhe amu lósvrá okitikíti kúklókú, ɔlɔtrá wusúv mu nyányányányáa, ɔledali mutɔ. ɔɔé leta mu. Mú su ahá ámutɔ aku beblí be, “Alawú.” 27 Táme Yesu lékitá mu ibi tsú mu fúá, ɔɔkɔsú líí.

28 Mú ɔma, bréá Yesu mua mu akasípú amu nkule bubu wóyító a, befité mu be, “Ntogyi sú ani mú anumétalí gya ɔɔe laláhe amu dali kebi ámutɔ?”

29 Mú ɔlebláa amú ɔbée, “Inu odu mú á, nkéti mpái^g pé mlétalí púgya mú.”

Yesu Lowu lwi Asún Blí Otse Nyɔɔsi

(Mateo 17:22-23; Luka 9:43b-45)

30 Bréá Yesu mua mu akasípú amu benatí unu á, bɔtsun Galilea ɔsulúsv, táme Yesu mékléá ɔhaa ɔbí ɔtínéá muvu. 31 Tsúfé ɔde akasípú amu ató suná ɔbée, “Béle mí, Nyankpusa-Mu-Bi ánfí há adún bómɔ mí, táme Bulu ɔbélakúsúa mi eke sáásí.”

32 Akasípú amu bumonu mú asi, ifú é de amú ání befité mu.

Ma ɔbóbwe ɔhande?

(Mateo 18:1-5; Luka 9:46-48)

33 Beba Kapernaum wúlutɔ. Bréá bowie wóyító á, Yesu léfité amú ɔbée, “Ntɔ nwéen mlidégýí ɔkpatɔ?”

34 Bekpa ɔnɔ bun músú, tsúfé ɔhande budeprí. 35 Yesu létsiá asi, ɔleti akasípú dúanyɔ ámu, ɔlebláa amú ɔbée, “Ní mlitɔ ɔku dékléá ɔbóbwe mli nkprá ogyápu a, ɔbwée mu iwí ɔma ogyápu pú mli féé osúmpú.” 36 Inu ɔlekpa kebi ɔku belú amú ansító, látá mu pútá, ɔlebláa amú ɔbée, 37 “ɔhagyíɔha

^g9:29 Mpái múa ɔnɔklí bu nwuló dada amu akutɔ.

ání ɔlɔɔ kebiá ogyi ali mí dátɔ laho mi. Ohagyícha ání ɔho mi á, megyí mí ɔlɔɔ, mboún ɔhá ámuú ɔlɔwa mí ámu.”

Ani Obúopu

(Luka 9:49-50)

38Yohane lébláa Yesu ɔbée, “Osunápú, anlówun oyin ɔku dépu fú dá gya ɔɛ laláhe, anléka mu tin, tsúfé ɔma antɔ.”

39Táme Yesu lébláa amú ɔbée, “Mlumáka mu itin! Tsúfé ɔhaa má unvá ɔbɔbwe ofúla mí dátɔ, láblí mí iwí asun laláhe. 40Tsúfé ɔhá ání ɔmɔksú líl anisu buo ani. 41Ɔnɔkwali nde mli bláa mbée, ní ɔku ɔhá mli ntsu-owebi mlonu, mí dá ání ɔdun mli su á, ɔmɔɔhulí mu ipán.

Ɔha Kpa Wá Lakpantɔ

(Mateo 18:6-9; Luka 17:1-2)

42“Ní ɔku léha ahá ánfu bumɔkúdan mísú hógyitɔ ánfutɔ ɔku lɔbwe lakpan á, ní beda nfúókwebu síán mu ɔmetɔ, tswi mu wá ɔputɔ pó á, lɔ alé dun. 43-44Ní fú ibi kule téhá fúɔbwe lakpan á, ka mú le! lɔ aléá fɔpu ibi kule nyá nkpa ání itamatá, dun ání fɔpu ibi anyɔ wíé ɔsubití ogyá ání itamaduntɔ.^h 45-46Ní fú yabi kule téhá fúɔbwe lakpan á, ka mú tswi tsalífwí! lɔ aléá fɔpu yabi kule nyá nkpa ání itamatá, dun ání fɔpu ayabi anyɔ wíé ɔsubití ogyá ání itamaduntɔ.ⁱ 47Ní fú nsíbi téhá fúɔbwe lakpan á, loti mú le. lɔ aléá fɔpu nsibi kule wíé Bulu iwíegyi ámutɔ, dun ání fɔpu ansibi anyɔ wíé ɔsubití ogyá ání itamaduntɔ. 48Ɔtínéá unu anyambi butamawú, unu ogyá é itamadun.

49“Tsúfé bɔpu ogyá tun ohagyícha iwí, fé alíá butɔpú nfɔli tun afɔdɛ iwí.

50“Nfɔli bu ɔdwe, táme ní itá ɔdwe á, ntɔ bélapúwá mú ɔdwe?

^h 9:44 Mútɔ yée 44 múa 46 belian 48, táme uma nwulú dada amu akutɔ. ⁱ 9:46 Mútɔ yée 44 múa 46 belian 48, táme uma nwulú dada amu akutɔ.

“Mliha ɔdwe itsia mlɔ́ ɛ́ nfólɔ́, iwilwii itsia mliá mli aba nsúné.”

Ɔkákíná Iwɔ́ Atosunáhé

(Mateo 19:1-12; Luka 16:18)

10 ¹Yesu lókusú tsú unu yó Yudea ɔmátó, Yordan ntsu ɔbun. Ɖɔɔm betrá befia bomlí mu, ɔletrá suná amú ató ɛ́ alíá ɔtɔbwé yáí.

²Farisifó aku beba mu wá, budekléá bósɔ mu kí. Mú su befité mu beɛ, “Ani Mbla léha ɔkpa ání oyin ɔbétalí kíná mu ka?”

³Yesu léfité amú ɔbéɛ, “Nkálɔ́ anɔ́ náin Mose lówa mbla há mlɔ́?”

⁴Bele mu ɔnó beɛ, “Mose léha ɔkpa ání oyin ɔwánlɔ́n ɔkákíná ɔwulú pukina mu ka.”

⁵Yesu lébláa amú ɔbéɛ, “Mli kluntɔ́-odwin sù Mose lówanlín mbla ánfɔ́ há mlɔ́. ⁶Tsú bréá Bulu léle ɔyí á, ɔtsi múa oyin ɔlɔbwé. ⁷Ínɔ́ su oyin obótu sí mu si mva mu yin yémantá mu kasu, ⁸amú abanyó bóbwe ɔyulúv kule ni. Butráa bumegyí abanyó, mboún babwé ɔbakúle. ⁹Ínɔ́ su ahá ání Bulu labwé amú ikule a, ɔhaa mámaín amú abasu.”

¹⁰Bréá beyinkí ba wóyító a, Yesu akasípú amu betrá fité mu asún tsú asún ánfɔ́ iwɔ́. ¹¹Yesu lébláa amú ɔbéɛ, “Ní oyin okíná mu ka láyétsiá ɔtsi bámbá á, alató mbua. ¹²Alɔ́ kén ní ɔtsi okíná mu kulu láyétsiá oyin bámbá á, alató mbua ní.”

Nyebí Yulá

(Mateo 19:13-15; Luka 18:15-17)

¹³Aha aku bekpa nyebí ba Yesu beɛ, ɔpúv ibi dinka amúsú, táme mu akasípú amu bɔwa iyin wá amú. ¹⁴Bréá Yesu lówun a, ɔbló lekítá mu. Múv ɔlebláa akasípú amu ɔbéɛ, “Mliha nyebí ámu ɔkpa abuba mí wá. Mlumátin amú ɔkpa, tsúfé ahá ánfɔ́ odu bú Bulu iwíegyí ámu ni. ¹⁵Ɖnɔkwali nde mlɔ́ bláa. Ɖhá ání ɔmɔhɔ Bulu iwíegyí amu ɛ́ kebi á, omóowie mótó.” ¹⁶Múv ɔlelatá amú pútá, púv ibi dínɔ́nka amúsú, oloyulá amú á.

Atonyahé lwi Atosunáhé

(Mateo 19:16-30; Luka 18:18-30)

17Bréá Yesu lópu ɔkpa ɔyó á, oyin ɔku lésrí ba beda akpawunu mu ayabito fíté mu ɔbéé, “Osunápú yilé, nto nɔ́bwe asa nénya nkpa ání utamatá?”

18Yesu léfíté mu ɔbéé, “Ntogyi sù fude mí ti ɔha yilé? ɔhaa mégyí ɔha yilé, nkéti Bulu nkule. 19Yéé fuyin Bulu mbla ámu dodo? ɔbéé, mámo ɔha, máto mbua, máwi ató, máka asún dínká fú bású, másisii ɔha, bu fú sí mua fú yín.”

20Oyin ámu lébláa mu ɔbéé, “Osunápú, tsú mí nyebito ɔpá nde íni féésú gyí.”

21Yesu lékti mu díín, mu asún lowa mu ɔdwe. Mú ɔlebláa mu ɔbéé, “Ílasí tokukuleá fɔ́bwe. Yefe fú iwísu ató féé, afuye kɔ́ba amu ha ahiánfo, méni fénya siadiɛ ɔsúsú. Fɔ́bwé mú tá á, ba afubobuo mi.” 22Bréá oyin ámu lónu asún ánti á, wí lowu mu. Mú su ɔlenatí díín, tsúfé ɔhíé ɔbu ató.

23Yesu lékti bomlí, ɔlebláa mu akasípú amu ɔbéé, “Íbéhie wá ɔnlɔn asa wí onyapú obówie Bulu iwígyí ámutɔ!”


24Bréá akasípú amu bonu asún ánti á, ɔnɔ́ lobwie amú. Táme Yesu lélabláa amú ɔbéé, “Mí abí, Bulu iwígyí ámutɔ wie íbéhie wá ɔnlɔn! 25Ílɔpɔn ha *kpósó ání ɔbótɔn ɔbun-atɔ ɔbótɔ, dún ání wí onyapú obówie Bulu iwígyí ámutɔ.”

26Asún ánti leha ɔnɔ́ lehie bwíé amú. Mú su befíté aba beé, “Múmú ma meé Bulu ɔbóho nkpa?”

27Yesu lékti amú díín, ɔlebláa amú ɔbéé, “Tɔ́á idun nyankpusa bwe ɔmɔ́n Bulu, tsúfé Bulu mú tetálí bwé tógyítɔ.”

28Mú Petro lébláa mu ɔbéé, “Yéé aní mú anulasí tógyítɔ tswi bobuo fu o!”

29Yesu lébláa mu ɔbéé, “ɔnɔ́kwali nde mli bláa. ɔhagyíɔha ání olesi mu wóyí, mu apíó, mu si mua mu yin, mu abí ntée mu ɔsulúv ɔmagyáa, mía mí *asun wankláán ámu su á, 30ɔbéłanyá mu wóyí, mu apíó, mu ayín, mu abí pú mu agyapadiɛ ámu odu tsé lafa séi. Bédinká musu é séi,



Akpósó ní. (Marko 10:25)

táme obénya nkpa ání utamatá bré ámúú ibá ámúú. ³¹Táme agyankpapu tsotsótsó béba bemlí amapu, amapu é béba bemlí agyankpapu.”

Yesu Lowu lwi Asón Blí Otse Saasi

(Mateo 20:17-19; Luka 18:31-34)

³²Yesu mua mu akasípú amu bọpu ọkpa bọyọ Yerusalem wúlúú, Yesu gyánkpá. Ułwa amú wánwan, ifú lẹkítá ahá ámúú bubuo amú ámu. Múú ọlẹkpa akasípú dúanyọ ámu ya utsétó, ọlẹtrá bláa amú tóá ibéba musu. ³³Ọbée, “Mlunu! Ní awíé Yerusalem a, béle mí, Nyankpọsa-Mu-Bi ánfí há Bulu *igyí ahapú dehen pú Mose mbla asunápú. Béha mí lowu ipón, pú mí wá ahá ání bumegyí Yudafọ ibitú. ³⁴Bóbwe mí ahinlá, tú atsunó wólí mí, nwén mí mplí, mó mí, táme eke sáásí a, Bulu ọbókusúa mí tsú afúlító.”

Ọhande Osúm Mu Aba

(Mateo 20:20-28)

³⁵Sebedeo abí Yakobo mua Yohane bọkpukpé mantáa Yesu bláa mu bẹ, “Osunápú, anidékléá fubwée tọku ha anu.”

36Múy Yesu léfuté amú ɔbéé, “Nto mlidéklé mliaa mbwée ha mli?”

37Bebláa mu beé, “Ha anito ɔkule otsia fú gyɔpsu, ɔkule é otsia fú binasu bréá Bulu ɔwá fú numnyam.”

38Táme Yesu lébláa amú ɔbéé, “Mliméyín tóá mlidékulí! Mlétalí wun iwɔsun ámúy nebá bowun amu, ntée mlétalí wú lowu ámúy nówu ámu?”^j

39Bele mú ɔnó beé, “Ee abétalí.”

Múy ɔlebláa amú ɔbéé, “Mlówun iwɔsun ámúy nebá bowun amu, wú lowu ámúy nówu ámu é, ⁴⁰táme mma túmi ání néle ɔhá ání obétsiá mí gyɔpi ntée binasu. Ali otsiákpá anfi mú ida gyo ahá ámúy Bulu lalá unv yái há ámu.”

⁴¹Bréá akasípú idú atráhe amu bonu asún anfi á, Yakobo muv Yohane iwí lówa amú ɔbló. ⁴²Yesu létu amú féé ba mu iwí wá, ɔlebláa amú ɔbéé, “Mliyin ání ahá ání butobú amúá bugyi ɔmátɔfɔsu agyípú butehié amú ahá, amú ahande é butenyá túmi amúsú. ⁴³Táme mlito mú á, umába ali. ɔhá ání odekléá ɔɔbwe mlito ɔhande ɔbwée mli féé ɔkpábi. ⁴⁴Ní mlito ɔku é dékléá ɔɔbwe mli nkpa ogyápu a, ɔbwée mli féé ɔkpábi. ⁴⁵Tsúfé mí, Nyankpusa-Mu-Bi anfi é mmeba mbée, busúm mí. Ahá osúmkpá neba, ampu mí nkpa ho ahá tsɔtsɔtsɔ nkpa.”

Ansibi Obwiepú ɔku Ilo Tsa

(Mateo 20:29-34; Luka 18:35-43)

⁴⁶Boyówie Yeriko wúluto. Bréá muv mu akasípú pú ɔɔm kɔnkɔnkɔnti ámúy bubuo mu amu budedali unv á, bowun Timeo mu bi Bartimeo. Mu ansíbi labwíé, otsie ɔkpatɔ ɔde ató kulí. ⁴⁷Bréá olonu ání Yesu Nasaretyin amu détsúun a, ɔlɔwa kplún bi ɔbéé, “Ani Wíe *Dawid mu na Yesu, wun mi nwe!”

⁴⁸Amútsú ahá tsɔtsɔtsɔ bɔkplún wa mu beé, ɔkpá ɔnó bun, támé mu mú ɔlelakplún dun ali ɔbéé, “Ani Wíe Dawid mu na, wun mi nwe!”

^j10:38 Mlétalí wun iwɔsun ... wú lowu ámúy nówu ámu? Ntée Mlétalí nu ntá neba bonu ntée há bɔbɔ mli asú ámúy nebá bɔbɔ ámu?

49 Yesu lési líí, ɔlebláa amú ɔbéé, “Mliti mu ha mi.”

Bokpolí ansibi obwiepú ámu, bebláa mu beé, “Fú klun idí fú asi, afukusu ba. Ɔde fú tí!”

50 ɔnu oyin ámu lótswi mu ɔsúsú atadié tsálífwí, wáan kusú ba Yesu wá.

51 Yesu léfité mu ɔbéé, “Nto fudeklé fee mbwée ha fu?”

ɔnu ansibi obwiepú ámu lébláa mu ɔbéé, “Osunápú, ha mí anwun ató!”

52 ɔnu Yesu lébláa mu ɔbéé, “Nati, fú hógyi latsá fú ɔɔ.”

ɔnunu mu ansíbi lobwií, ɔlekplá buo Yesu.

Bɔho Yesu Fé Owíe Yerusalem

(Mateo 21:1-11; Luka 19:28-40; Yohane 12:12-19)

11 ¹Bréá bowie Betfage múa Betania, awúlu ání ɔbu Nfɔ-nyíbu ámu^k asi, batá Yerusalem wie tá á, ɔɔwa mu akasípú abanyó gyankpá. ²Ɔbéé, “Mliyo wúlu anfí ida mli ansító ánfító. Ní mlowíe wúlu amu ɔnó á, mlówun afrímú kanáhe ɔku da ɔfétó, ɔhaa mókótsiá musu ki. Mlisanki mu, amlíkpa mu ba mi. ³Ní ɔku ɔfíté mli ɔbéé, ‘Ntogyi sù mlidé mu sankí?’ á, mlibla mu mlíaa, ‘Ani Wíe dé mu hián. Obéyinkíá mu ba séi.’”

⁴Bɔyo á, bɔyótu afrímú ibí ámu da ɔfétó wóyí ámu ɔnó ɔkpabáí. ⁵Bréá bude mu sankí á, aha akvá bulú ɔnu befité amú beé, “Ntogyi sù mlidé afrímú ibí ámu sankí.”

⁶Bele mú ɔnó alí ámuú Yesu lébláa amú ámu pépéépé. Besi amú; akasípú amu besankí mú. ⁷Bekpa afrímú ibí ámu ba Yesu. Beyaí amú atati dínká musu, ɔɔɔdu bian musu. ⁸Amótó ahá tsɔtsɔɔtsɔ beyaí amú atati tswi ɔkpatɔ, aku é bebiabía aftíaa bunbun ɔkpa ámusu. ⁹Ahá ámuú bɔgya Yesu nkpá múa ɔma amu bɔsɔrá okitikíti beé, “*Hosiána! Bulu oyúla ɔhá ánfí ɔbá aní Wíe dátó ánfí! ¹⁰Bulu oyúla aní náin *Dawid iwíegyí ámuú ɔbá ámu! Hosiána bu ɔsúsúsú!”

¹¹Bréá Yesu lówie Yerusalem a, ɔɔyo *Bulu ɔtswékpa, ɔɔwa ansí ki tógyító wunsúnésú ɔnu wankláán. Owí lapɔn.

^k 11:1 Nfɔ-nyíbu igyi obubwí kuá ɔbu mantáa Yerusalem, butetí mú Olifbu.

Mú sv mua mu akasípú dúanyo ámu beyinkí yó Betania wúluto.

Pɔnto Oyí Lwú
(Mateo 21:18-19)

12Oyi kehe bréá beyinkí tsú Betania bebá á, akún de Yesu. 13Olowun pɔnto kuá ilahíé pší sísí, ilí mantáa okpa. Olowo yéki bee obénya ku mútó. Táme olowie mú asi á, afitáa són bu músú, tsúfé oyí ámu swiebí mókúfun. 14Inu oledláa oyí ámu obée, “Tsú nde púya a, ohaa méetrá gyi fú abi swiehé.” Mu akasípú amu é bonu asún ánti.

Ibia Agyípú Gyáa Le Bulu Otswékpa Wunsínésú
(Mateo 21:12-17; Luka 19:45-48; Yohane 2:13-22)

15Bréá bowie Yerusalem a, Yesu lóyo Bulu otswékpa wunsínésú. Inunu olowa ató afepú pú ató ahópu amu aná féé gyáa dali unu bi. Olowuwúta kóba atsépu mpónú dá, súnsúnki abródoma afepú mbíá dá. 16Omeha ató ofepú okuku osura mu ató fehé ka tsun Otswékpa wunsínésú unu kúráá. 17Olosuná amú ató obée, “Bumowanlín wá Bulu asun



Pɔnto oyí múa mú abi ní. (Marko 11:13)

wanlínhé amuto beε, ‘Béti mí ɔtswékpa beε, ɔmá fée mpái ɔbɔkpá?’ Táme mlɔlapú unu mlí awikplu ŋaínkpá.”

18Bréá Bulu *igyí ahapú dehen pú Mose mbla asunápú amu bonu tśá alabwé á, bodunká ɔkpa ání bótsun músú mś mu. Benya ifú, tsúfé mu atosunáhé amu leha ɔnś lobwie ɔɔm amu.

19Bréá owí ɔpɔn a, Yesu mua mu akasípú bedali wúlu amuto.

Hógyi ɔwɔ Atosunáhé

(Mateo 21:20-22)

20Bréá budetsúbn nyankɔ a, bowun ání pɔntɔ oyí ámu ɔlawú tsú mú ɔsú beyi asi. 21Unu Petro lékaín asún ání Yesu lébláa pɔntɔ oyí ámu. Múú ɔlebláa Yesu ɔbéε, “Osunápú, kɔ, pɔntɔ oyí ámúú ɔɔlwú ámu ɔlawú!”

22Yesu lébláa amú ɔbéε, “Mlɔhɔ Bulu gyi. 23Ɔnɔkwali nde mli bláa, ɔhagyíɔha ání ɔbébláa ɔbu ánfɔ ɔbéε, ‘Púli yowie ɔputɔ’, omegyí nwéen mu kluntɔ, olohogyi ání asún ámúú mablí ámu ɔbéba mútś á, ɔbópulí yó. 24Unu su nde mli bláa mbée, tógyítśá mlɔkúlí Bulu á, mlɔhogyi ání mlɔlanyá mú dodo. Mli ɔbu béda mú. 25-26Ní mlɔlɔí mlɔdé mpái bɔ, ɔku asún bu mli kluntɔ á, mlɔsi ɔhá ámu lakpan kie mu, ménu mli Sí ámúú ɔbu ɔsúsú ámu é obési mli klé kíé mli.”

Yesu Túmi ɔwɔ Asun Futéhé

(Mateo 21:23-27; Luka 20:1-8)

27Yesu mua mu akasípú amu betrá yinkí ba Yerusalem. Bréá ɔna odeki Bulu ɔtswékpa wunsunésú unu á, Bulu igyí ahapú dehen, Mose mbla asunápú pú Yudafo ahande amu beba mu wá. 28Befité mu beε, “Túmi mɔmu fúdepubwé ntobí ánfɔ? Ma léha fú túmi ámu?”

29Yesu lélé mú ɔnś ɔbéε, “Nfíte mli asun kua kule. Ní mlélé mú ɔnś há mí á, mí é nébláa mli túmi oduá ndepubwé ntobí ánfɔ. 30Bulu wá Asú Ɔbɔpú Yohane lénya túmi púúbó ahá *asú lóó, ntée nyankpusa? Mlɔbla mli!”

¹11:26 Mútś yée 26 bu nwulú dada amu akutɔ: Táme ní mlumésikíé ahá a, mli Sí ámúú ɔbu ɔsúsú ámu é oméesikíé mli.

³¹Amú wulewule bɔyɔ asún ánfɔtɔ beɛ, “Ní ablí aniaa itsú Bulu wá á, ɔbéfité anɔ ɔbéɛ, mú ntogyi sù mlumɔhɔ mu gyi? ³²Ntée ablí aniaa itsú anyánkɔpɔsa wá?” Táme bude ahá ámu ifú nya, tsúfé amú fée bohogyi ání lélé Bulu ɔnɔsú ɔtɔpú onutó Yohane gyí. ³³Mú su bele mú ɔnɔ beɛ, “Ohwée! Anuméyín ɔtínéá olenya mu túmi tsú.”

Mú Yesu é lébláa amú ɔbéɛ, “Múmú mí é mméεbláa mli túmi oduá ndεpubwé ntobí ánfɔ.”

Apafɔ Laláhe Aku

(Mateo 21:33-46; Luka 20:9-19)

12 ¹Yesu lɔwa amú asún bláa ayébitɔ bi. ɔbéɛ, “Oyin ɔku lɔdɔ *wáɔn ndɔ. Olegyi iban bómlí mú. Olokwi wáɔn amu onyimékpá, ɔɔpwe obu fúáhé ku há ndɔ ámu agyópu. Mú ɔɔpu ndɔ ámu wá apafɔ ibɔtɔ, olotu ɔkpa. ²Bréá wáɔn-abí ámu kpɔtíbi lɔfun a, ɔɔwa mu osúmpú apafɔ ámu wá ɔbéɛ, ɔyɔhɔ mu ogyíkpá ba mu. ³Táme apafɔ ámu bekitá mu, dá mu, gya mu sísí ibukpan. ⁴Ndɔ mu wie amu létrá wa mu osúmpú nyɔɔsi amú wá. Apafɔ ámu beda mu é, pílan mu nwuntɔ, súpá mu. ⁵ɔletrá lawá ɔbambá. Mu mú á, bɔmɔ mu. Alɔ kén bɔbwe atráhe é ní. Beda aku, mú aku é. ⁶Ilesi mu onutó mu bi ɔkule péá ɔtamatsúlá musu. ɔkɔ ɔbéɛ, bóbu mu mú. Mú su ɔɔwa mu é. ⁷Táme apafɔ ámu beblí beɛ, “Ónu obégyi mu si atɔ ní. Mliha amɔ mu, méni ndɔ ámu ibémlí anɔ klé.’ ⁸Mú su bekitá mu, mú mú, tswɔ mu dáli ndɔ ámutɔ.

⁹“Ekeá ndɔ mu wie amu ɔbá á, ntɔ mlɔlahogyi mliáa ɔbɔbwe apafɔ ánfɔ? ɔbéha bɔmɔ amú. ɔbélapú ndɔ ámu wá apafɔ bámbá ibɔtɔ. ¹⁰Ntée mlumɔkúkla Bulu asun wanlínhé amu kɔ? Bɔwanlín beɛ,

‘Ibwi ámutú obu ayípu bekiná ámu
lébemlí okonkísúbwi ní.

¹¹ Bulu lɔbwe mú alɔ.
Ibu wánwan.’ ”

¹²Iɔnu Yudafɔ ámu bekleá békitá Yesu, tsúfé bebi ání amú su alahá yébi ánfɔ, táme bude ɔɔm amu ifú nya. Mú su benatí sí mu.

Lampóoka

(Mateo 22:15-22; Luka 20:20-26)

13Ɔma a, bɔwa Farisifo pú Owíe *Herode ahá bee, buyéteéé Yesu ɔnótó asún nu, abunya mu akítalé. 14Bréá beba mu wá á, bebláa mu bee, “Osunápú, anyin ání ɔnɔkwalipu fɔgyi. Futamahá ɔhaa ɔtse fú agywun, tsúfé futamaki ɔhaa ansító. Mboún Bulu asún ámúbú igyi ɔnɔkwali amu fudesuná. Mú su anidé fú fité anu. Aní mbla leha ɔkpa ání akáa lampóo ha Roma owíe dehen Kaesare, ntée anumáka?”

15Yesu lébí ání bukú ansí. Mú su ɔlefuté amú ɔbéé, “Apinabwebí abwepú, ntogyi só mlidé mí sɔ́w kí? Mlitsu kɔ́ba amu iku ba mi anki.”

16Bɔpɔba mu. Múbú ɔlefuté amú ɔbéé, “Ma nwun pú mu idá dín mósú?”

Bele mú ɔnɔ́ bee, “Kaesare.”

17Múbú ɔlebláa amú ɔbéé, “Múmú mlipu tɔ́a igyi Kaesare klé ha Kaesare, amlipu múbá igyi Bulu klé é ha Bulu.”

Mu iwi lówa amú ifú.

Kusú Tsú Afúlitɔ Iwi Ason Futéhé

(Mateo 22:23-33; Luka 20:27-40)

18Ɔpasua kvá butetí mú *Sadukifo aku beba Yesu wá. Bugyi ɔpasua kvá butebli bee, kusú tsú afúlitɔ ma unv. Befité mu bee, 19“Osunápú, Mose lówanlín tswi aní ɔbéé, ‘Ní ɔku mu ka bumɔkwí asa olowu sí mu ka ámu a, mu pio otsú mu ka ámu tsia, féki ɔkwu ha owupú ámu.’ 20Oyin ɔkule abí abasiénó aku betsiá. Amútó ogyankpapo létsiá ɔká, táme ɔmɔkwí asa olowu. 21Mu gyama lótsu ɔsurapuka amu tsia, táme mu é ɔmɔkwí. Ɔsaasi lótsu ɔtsi ámu tsia. Mu é ɔmɔkwí. 22Alu yótɔ osienósí amu. Amútó ɔkuku mɔkwí asa olowu. Ɔma-ɔma a, ɔsurapu amu é lóbowu. 23Afúli ɔkusóké a, amútó ɔmɔmu ɔbɔ́bwe mu kulu? Tsúfé amú abasiénó ámu féé betsiá mu.”

24Múbú Yesu léle mú ɔnɔ́ ɔbéé, “Megyí mli ológyi. Mluméyín Bulu ason wanlínhé amu ntée Bulu túmi. 25Tsúfé

ní afúli bokúsú á, bóbwe fé *Bulu-abɔpu. Buméetsiá aká múa akúlu. ²⁶Táme afúlikusú iwí mú á, yé mɔlakla Mose ɔwɔlú, nú asún ámú Bulu lébláa mu dimbísú bréá olowun oyíbi ku de ogyá tsií, táme imedéhɔ́ amu? ɔ́béé, ‘Mígyí mɔ anáin *Abraham mu *Isak pú *Yakob Bulu ámu ni.’” ²⁷Iwí ɔ́lébláa amú ɔ́béé, “Megyí awupú Bulu ógyi, akɔ́ankpapu Bulu ógyi. Mɔ mú mɔlafwí féé.”

Bulu Mbla Ámuto Múa Iɔwun

(Mateo 22:34-40; Luka 10:25-28)

²⁸Mose mbla asunápú amuto ɔkule lóɔtu amú iwí, olonu asún ání buɔɔbití. Olowun ání Yesu lalé Sadukifɔ́ ámu asún ɔ́nɔ́ wankláán. Mú su ɔ́lefíté Yesu ɔ́béé, “Bulu mbla ámuto mɔmu dún?”

²⁹Yesu léle mú ɔ́nɔ́ ɔ́béé, “Bulu mbla ámuto múa iɔwun ni. ‘Israelfɔ́, mɔni. Bulu ɔkule pé aní Wíe Bulu gyí. ³⁰Mú su pu fú kɔn, fú ɔ́kláa, fú agywun pú fú ɔ́wɔnlín féé dwe fú Wíe Bulu.’ ³¹Mú nyɔɔsi é gyí, ‘Dwe fú bá fé fú iwí.’ Mbla kuku utráa ma iwí iɔwun íni.”

³²Mbla osunápú amu lébláa Yesu ɔ́béé, “Osunápú, fablí ɔ́nɔ́kwali. Aní Wíe Bulu nkule pé bu iwí, ɔ́kuku trá ɔ́ma iwí. ³³Apú aní kɔn, aní agywun pú aní ɔ́wɔnlín féé dwe mu, adwe aní aba fé aní iwí. Iɔwun mbwí tóhé pú afɔ́ɔ́ɔ́ kugyíku.”

³⁴Yesu lówun ání alabí lé asún ámu ɔ́nɔ́ wankláán, ɔ́lébláa mu ɔ́béé, “Fuma iwí Bulu iwígyí ámuto.”

Mú ɔ́ma a, ɔ́haa métrá wa kɔn fité mu aswansu.

Ma Gyí Kristo Amu?

(Mateo 22:41-46; Luka 20:41-44)

³⁵Bréá Yesu dé ató suná *Bulu ɔ́tswékpa nwunsínésú iwí á, ɔ́lefíté ɔ́béé, “Nkálí sù Mose mbla asunápú amu betalí blí beé, Owíe *Dawid mu na gyí *Kristo, (ɔ́há ámú Bulu léda mu ofúli amu)? ³⁶Tsúfé *ɔ́ɔ́ɔ́ Wankíhé léha Owíe Dawid onutó léblí ɔ́béé,

‘Aní Wíe Bulu lébláa mí Wíe ɔ́béé,

“Tsia mí gyɔ́pɔ́sɔ́ nfi

yófun bréá néha fétsatsáa fú alupósú.” ’

37Owíe Dawid onutó létu mu óbée mu wie. Nkálú su ótráa ogyi mu na?”

Asún ánfu lówa ódóm kpónkpónkpóntu ámuú befia bomlí mu amu ódwe, bọpu ansigí nù mu asún.

Mose Mbla Asunápú Tsiátó

(Mateo 23:1-36; Luka 20:45-47)

38Yesu léblí mu atosunáhé amuto óbée, “Mlúki wankláán Mose mbla asunápúsu. Butekle ligá wa náti kí, butekle beé, ahá bubún ha amú itsiá dunsu. 39Otsiákpá yilé butekle tsiá Yudafu *offiakpa pú nke ogyíkpá. 40Butesísi asurapu, swíi amú amú wóyí. Butepina bọ mpái tíntíntín ahátó póbun amú lalahesu. Bulu óbébití amú isu kínkíínkín!”

Osurapu Oku Tswitswi

(Luka 21:1-4)

41Yesu létsiá mantáa tswitswi dáka Bulu ótswékpa unu, óde ahá kí budepv amú tswitswi bọwa mútú. Ahá ání amú íbitu bu odwin budepv kóba akpónkpóntu bọwa. 42Unu ósurapu ókuá óma tótó é lópu mu kóba-ana bọwa dáka ámutu. 43Múú óletu mu akasípú amu ba mu wá, ólebláa amú óbée, “Ónókwalí nde mli bláa, tswitswiá ósurapu anfi óma tótó lawá á, ídun óhagyíóha klé. 44Tsúfé atráhe amu féé á, amú kóba tsótsótsótsó balé kpalobí tsú bọwa. Táme íniá ósurapu anfi mú má tótó su tóá óbu féé alapú bọwa á.”

Bulu Ótswékpa Amu Bwie

(Mateo 24:1-2; Luka 21:5-6)

13 1Bréá Yesu lédali *Bulu ótswékpa wunsunésú unu óyó á, mu akasípú amuto ókule lébláa mu óbée, “Osunápú, kí mbu wankláán pú abwi akpónkpóntu ánfu bọpuyi mú ánfu akíle!”

2Múú ólebláa mu óbée, “Yéé fawun mbu akpónkpónkpóntu ánfu? Bóbwie mú féé bun. Ibwi kule kúrää méesian dinká mú bású.”

lwɔsɩn Múa lkpɩán

(Mateo 24:3-14; Luka 21:7-19)

³Bréá Yesu tsie Nfɔ-nyíbu ámuɔv, ɔde Bulu ɔtswékpa mbu ámu kí a, Petro, Yakobo, Yohane mva Andrea nkule befíté mu bee, ⁴“Bla anɩ, bré mɔmɔtɔ ɩnɩ fée béba? Osúna mɔmɔ é ɔbéba, ibósuná ání mú bré lafun?”

⁵ɩnu Yesu lébláa amú ɔbéé, “Mlɩkɩ wankláán, méni ohaa méemlé mlɩ. ⁶Ahá tsɔtsɔɔtsɔ bópu mí dá ba bee, amúgyí Kristo amu ni. Bémlé ahá tsɔtsɔɔtsɔ bófwɩ ɔkpa. ⁷Ní mlonúá tsá ladá mantáa mlɩ ntée ɔtɩneku á, opúni mátsíí mlɩ Tsúfé lehián ání ɩnɩ aná fée béba, táme imedésuná ání ɔyí ɔnómɔké ámu lafun. ⁸Tsúfé ɔmá bókwɔ aba. Awíe bókusú líí abasu. ɔsulúv békpunkí ntíné-ntíné. Akón é béba. ɩnu fée igyi fé lwɔsɩn ání ɔtsɩ towun bréá lkwú de mu dwiín.

⁹“Mú su mlɩ mú mlɩkɩ mlɩ ɩwɩ wankláán. Tsúfé mí su bópu mlɩ há Yudaɔ asún agyípu, béda mlɩ amú *ofíakpa awúlu-awúlusu. Békpa mlɩ ya ɔmású agyípu pú awíe ansítɔ, méni mlégyi mí ɩwɩ adánsɩe. ¹⁰Táme ilehián ání bégyankpá dá asun wankláán ámu ɔkan súná ɔyítɔ ahá fée. ¹¹Ní bekítá mlɩ ya a, mlumágywún asún ání mléblí. Mlɩbli asúngyíasún ání Bulu ɔbópɔwá mlɩ ɔnɔ alɩ bré ámɔtɔ. Tsúfé megyí mlɩ onutó ɔbótɔí, *ɔɔɔe Wankíhé ɔbótɔí tsun mlɩsu.

¹²“Apíó béle amú apíó há lowu. Abí así béle amú abí há. Abí é bókusú líí amú akwúpús, há bómwɔ amú. ¹³Mí su ahá fée bólu mlɩ, táme ní mlétalí wá klun líí kínkíínkín yófun mú ɔnómɔ á, Bulu ɔbóhɔ mlɩ nkpa.

lwɔsɩn Wúunbɩ

(Mateo 24:15-28; Luka 21:20-24)

¹⁴“Táme ní mlowun akísítɔá itobwíe ɔmá, ida ɔtínéá mlumédín ansí ání íbéba a, (aklápɔ, mlɩnu mú asɩ.) Múmú ahá ání bubu Yudea ɔmátɔ busɩ yɔ abusu. ¹⁵ɔhá ání ɔdɩn obusu mákplɩ botsu tɔtɔ obuto! ¹⁶ɔhá ání ɔbu ndɔtɔ é máyinkí botsu mu tati. ¹⁷Amenyapú pú abí-ayín ání bupia abi ɔɔbwe alɩ bré ámɔtɔ, bugyówɩ ní! ¹⁸Mlɩkokoli Bulu mlɩaa,

mli ɔsríké amu umábwe nyankpu múa atsalubí. ¹⁹Tsúfé asun wunhe ání ibéba alí bré ámutɔ odu mɔkúba tsú bréá Bulu lóbwe ɔyí ɔpá ki. Mú odu kuvu é uméetrá ba ekekekeke. ²⁰Ní Bulu médunkí nke ámusu á, teki ɔhaa méesian ɔyítɔ. Táme ahá ámúb alalé púbwé mu kle amu su aladínkí nke ámusu.

²¹“Alí bré ámutɔ á, ní ɔku lébláa fu ɔbéε, ‘Ki, Kristo, (ɔhá ámúb Bulu ladá mu ofúli amu) bu nfi ntée nána’ á, máhógyi. ²²Tsúfé ahá ání beε amúgyí Kristo amu pú ahá ání bówa afunu beε, Bulu ɔnósú atɔípú bugyi tsɔtsɔɔtsɔ béba ɔyítɔ. Bóbwe ofúla pú osúna púmlé ahá. Ní bétalí kúrää á, bémlé ahá ámúb Bulu lalé ámu é. ²³Táme mlíkí wankláán! Nabláa mli tógyítɔ asa ibéba.

Nyankpusa-Mu-Bi Ámu Ibábi

(Mateo 24:29-31; Luka 21:25-28)

²⁴“Iwɔɔsin wúun amu ɔma a, owí ɔbéta, ɔtsra é ɔméetrá féi. ²⁵Ntsrakupabi békpa tsú ɔsúsú beda. Nwulótáa múa mútɔ ató féé békpunkí. ²⁶ɔhagyíɔha obówun ání mí, Nyankpusa-Mu-Bi ánfí napú túmi múa numnyam kpɔnkpɔnti mbu nwulótáatɔ tsú ɔsúsú nebá. ²⁷Ivu Bulu ɔbówa mu abɔpu béyekpa mu ahá ámúb alalé ámu tsú ɔyí afunka ana ámu féésú.

ɔyí ɔnómɔ Iwi Osúna

(Mateo 24:32-35; Luka 21:29-33)

²⁸“Mlɔpukí pɔntɔ oyí. Ní mú abámbi depɔí, ide ate pɔpwe le á, mltebí ání awikpan bré lafun. ²⁹Alí kén, ní mlowun ání ntobí ánfí féé ide mútɔ bá a, mlébi ání mí, Nyankpusa-Mu-Bi ánfí ibábi lafun ta ní. Nawíé wóyí ámu ɔnó tá. ³⁰ɔnɔkwali nde mli bláa. Ndemba-abí anfi féé bumóowu tá, asa íni féé béba mútɔ. ³¹ɔsú múa así féé bótɔsun, táme mí asun blíhé móɔtsun ekekekeke.

Nyankpusa-Mu-Bi Ámu Ibábi

(Mateo 24:36-44)

³²“Táme ɔhaa méyín eke ntée bréá ntobí ánfí féé ibéba. Bulu-abɔpu bumeyín. Bulu mu Bi ámu é méyín, nkéti aní Sí

ámúú ɔbu ɔsúsú ámu nkule pé yin. ³³Mlídínka ansí iwísw, tsífé míméyín ekeá bré ámu íbófún. ³⁴Igyi fé ɔkúá ɔde ɔkpa tu, olesi mu wóyí wá mu asúmpú íbútu. Ɖleha okugyíɔku agyómá ɔbéé ɔbwéé. Ɖlebláa wóyí ámu ogyópu é ɔbéé, ɔyíru iwí ogyo wóyí ámu wankláán. ³⁵Mú sw mlídínka ansí iwísw, tsífé míméyín bréá wóyí mu wie amu ɔbéba. Fíalí ntúpwé o, ɔyí-nsuné o, bake o, ntéé nyanki. ³⁶Mlídínka ansí iwísw, méni ɔbá bofwie mlíto á, ɔmɔbɔtu mlí ání mlíládídí. ³⁷Asún ánfí nde mlí bláa ánfí kén nde ɔyítú ahá féé bláa. Mbéé, ‘Mlídínka ansí iwísw.’”

Bekiklí Yesu Nwunso

(Mateo 26:1-5; Luka 22:1-2; Yohane 11:45-53)

14 ¹Ilesi nkenyó Yudafo abugyi Israelfosu Katsun *Nke pú *Bodobodo Mátúhé *Nke. Alí bré ámutɔ Bulu igyí ahapú dehen pú Mose mbla asunápú bodunká ɔkpa ání bótsun músú kítá Yesu ɔáintɔ, mɔ mu kokooko. ²Táme beblí beé, “Megyí *Katsun Nke ánfútu abómɔ mu, méni kpokiti mééda ɔmá ámutɔ.”

Ofobí Fánfánfán Pwólí Yesu

(Mateo 26:6-13; Yohane 12:1-8)

³Bréá Yesu bu Betania wúlutɔ, Simon ɔkúá alaló *lɔ pepe ki wóyítú ɔde atú gyí a, ɔtsi ɔku léba unu; ɔde prentua wankláán kúá ofobí fánfán ání íbu íbíá bu mútú. Oletíí mú ɔnɔ, ɔletseí ofobí ámu wúlí Yesu nwuntɔ. ⁴Aku bubu unvá unɔwa amú ɔdwe. Befuté aba beé, “Ntogyi sú ɔde ofobí ánfí yintá? ⁵Teku abétalí fé ofobí fánfán ánfí, mú íbíá bóɔɔn ɔbakúle ofi ɔkule íkɔká ánfí, púhá ahiánfo.” Behie wá iyun wá ɔtsi ámu.

⁶Táme Yesu léblí ɔbéé, “Mlisi mu! Ntogyi sú mlidé mu háan? ltu yilé alabwé há mí. ⁷Ahiánfo bétsiá mlí wá ekekegyíeke. Brégyíbréá mlídéklé a, mlétalí wá awítɔle há amú, támé mí mú mméetsiá mlíto yú. ⁸Alabwé múá ɔbétalí púlá mí ɔyúlúv yái há mí opuláké. ⁹Ɖnɔkwali nde mlí bláa. Ɖyítú ɔtínegyíɔtíneá béda Bulu asun wankláán

ámu ɔkan a, béblí tó ánfí ɔtsí ánfí labwé ánfí pókáín musu.”

Yuda Iskariot Lótsulá Ání Ɔbéle Yesu Há
(Mateo 26:14-16; Luka 22:3-6)

Mar

10Mú ɔma a, mu akasípú dúanyɔ ámutɔ ɔkuleá butetí mu Yuda Iskariot lóyówun Bulu igyí ahapú dehen amu, méni ɔbéle Yesu há amú. 11Bréá bonu asún ánfí á, ilehie wá amú ɔdwe. Behie mu así ání béka mu ɔkɔ. Mú su olodunká ɔkpa ání ɔbótsun mósú lé Yesu há amú.

Katsun Atogyihe Gyí

(Mateo 26:17-25; Luka 22:7-14, 21-23; Yohane 13:21-30)

12*Bodobodo Mátúhé *Nke ámutɔ eke gyankpapuá butɔmó Israelfɔsu Katsun *Nke akúfa lófɔn. Yesu akasípú befité mu beɛ, “Osunápú, obu mɔmɔtɔ ayela ha fu, afɔgyi Katsun Nketɔ atogyihe amu?”

13Múy ɔlɔwa amútɔ abanyɔ, bláa amú ɔbéɛ, “Mliɔ Yerusalem wúlutɔ, mléfia oyin ɔkúá ɔsu ntsu-ɔlɔ, mlibuo mu. 14Wóyí oduátɔ obówie á, mlifite wóyí mu wie amu mliaa, ‘Nkúnú afɔɔ ɔswúkpá bu, ání mía mí akasípú abéba begyi Israelfɔsu Katsun atogyihe amu?’ 15Obósuná mli abansúru yílé kúá balá mútɔ yái. Mlibwe atɔ ámu yai un.”

16Yesu akasípú amu bɔyɔ wúlu amutɔ á, bowun tógyítɔ alí ámúy Yesu lébláa amú ámu pépéépe, bɔbwe Israelfɔsu Katsun atogyihe amu yái un.

17Bréá nsaintɔ deklúun a, Yesu mua mu akasípú beba un. 18Atɔ ámu ogyíkpá a, Yesu lébláa amú ɔbéɛ, “Ɖnɔkwali nde mli bláa, mliɔ ɔkuleá mía munyɔ ibi da ɔlepɔtɔ ɔbéle mí há.”

19Asún ánfí léhie han akasípú amu. Mú su befi así buɔe mu fité ɔkule-kule beɛ, “Mí ní lóó?”

20Yesu lébláa amú ɔbéɛ, “Mli ahá dúanyɔ ánfítɔ ɔkuleá mía munyɔ ibi da ɔlepɔtɔ ɔbéle mí há ní. 21Mí, Nyankpɔsa-Mu-Bi ánfí nówu fé alíá bɔwanlín tswi, táme ɔhá ámúy ɔbéle mí há ámu ɔgyówi ní. Ní bumetepí kwíí mu kúráá á, teki ibu alé há mu.”

Yesu Ntúpwe Atogyihe Tráhe

(Mateo 26:26-30; Luka 22:14-20; 1 Korintofó 11:23-25)

23Bréá bude ató ámu gyí a, Yesu léle bodobodo ipín, ɔleda Bulu ipán, bíábíá mótó púhá amú, blí ɔbée, “Mliho, mí ɔylúv ni.”

23Inu olotsu ntá-ewe, ɔleda Bulu ipán, púhá amú fée bonu. 24Múv ɔlebláa amú ɔbée, “Mí obugya ni. Mú Bulu dépusí mu ntam^m ání alaká há ahásv ní. Bétseí mú wólí así ahá tsɔtsɔtsɔ lakpan sv. 25Ɔnokwali nde mli bláa, mméetrá nu *wáun-abí ntá ántí alu yófun ekeá nónu mú pópwe Bulu iwíegyí ámvto.”



Ɔlebláa amú ɔbée, “Mí obugya ni.” (Marko 14:24)

^m 14:24 Ntam pópwe bu nwuló dada amv akuto.

²⁶Benya wá ulu dá Bulu upán tá alí, benatí yó Nfɔ-nyíbu ámusu.

Petro Ɖbóswí Ɖbé Mmeyín Yesu

(Mateo 26:31-35; Luka 22:31-34; Yohane 13:36-38)

²⁷Mú Yesu lébláa amú ɔbé, “Mli fée mléyinkí mí ɔma. Tsúfé Bulu ɔnósú atɔ́pú amu ɔwanlín wá Bulu asún ámutɔ beɛ, ‘Néda akúfa ɔkpapú ámu lédá, mu akúfa bédasáín.’”
²⁸Táme ní Bulu ɔkósúa mi tsú afúlito á, négya mli nkpa yó Galilea ɔmátó.”

²⁹Petro lébláa mu ɔbé, “Ní amú fée beyinkí fú ɔmá kúraá á, mí mú mméeyinkí ekekekeke.”

³⁰Yesu lébláa mu ɔbé, “Ɖnɔkwali nde fú bláa. Onyeni, asa bate ɔbéle ɔnɔ tse nyɔ á, fɔswí pú ibi wá ogyá tse sa fee fmmeyín mí.”

³¹lnu Petro léfin yabi yi ɔbé, “Ní lowu igyi kúraá á, mméekiná fú ekekekeke.”

Alí kén atráhe amu é fée beblí ní.

Mpáɔ Getsemane

(Mateo 26:36-46; Luka 22:39-46)

³²Boyówie ɔtɔnekuá butetí lnu Getsemane. Mú Yesu lébláa mu akasípú amu ɔbé, “Mlitsia nfi, nɔyɔɔ mpái.”

³³Ɖlekpa Petro mua Yakobo pú Yohane buo iwɔ. lnu asún lehié han mu, mu ansí lepe. ³⁴Mú ɔlebláa amú ɔbé, “Asún ihíe de mí háan. Ideklé mɔ mí. Mlitsia nfi, amligyo.”

³⁵lnu ɔlenatí yó nkpa kpalobí, ɔleda akpawunu kókóli Bulu ɔbé, “Ní ibówa alé á, ha bré ánfɔ itsun misu.” ³⁶Mú ɔleblí ɔbé, “Abba” Mí Sí, futetálí bwé tógyító. Ha ntá-ewe ánfɔ^o itsun misu! Táme megyí tóá ndeklé, mboún múá fudeklé ibá mútó!”

³⁷Oleyinkí bá akasípú amu wá bowun ání buɔɔɔɔɔɔ. lnu su ɔlefíté Petro ɔbé, “Simon, fudeɔɔɔɔ? Fumetalí gyo

ⁿ 14:36 ‘Abba!’ asi gyí, ‘Mí Sí!’ ^o 14:36 Ntá-ewe ánfɔ igyi iwɔɔsun ání Yesu obówun.

dɔnhwírɪ kule kpán? ³⁸Mlɪgyo amlɪkokoli Bulu, ménu mɪmóowie ɪsóktɔ. Tsúfé ɔɣé ámu déklé, táme nyankpusa lóɔn.”

³⁹Ɖetrá yóɔɔ mpái, bláa Bulu asun kua kule amu kén. ⁴⁰Ɖetrá yinkí ba bowun ání akasípú amu butráa budedidi, tsúfé didí de amú bu. Bumetalí bláa mu asvansu.

⁴¹Bréá ɔleba otse saasi a, ɔlefuté amú ɔbéé, “Mlulatráa si mlɪda mlɪdé ɔkpúnú da? Itsía alɪ ngya! Bré ámu lafun ání bóɔvú mí, Nyankpusa-Mu-Bi ántɪ wá lakpan abwepú ibɪtɔ.

⁴²Mlɪkusv ayɔ. Mlɪkɪ, ɔhá ámúú ɔde mí le há ámu ná á!”

Yesu Kítá

(Mateo 26:47-56; Luka 22:47-53; Yohane 18:3-12)

⁴³Yesu ɔnɔ mesi asa akasípú dúanyɔ ámutɔ ɔkuleá butetí mu Yuda lóbowie unv. Ɖɔɔm ání buɔe ndayí pú nkpotí bubuo mu. Bulu igyí ahapú dehen, Mose mbla asunápú pú Yudafɔ ahande amu lówa amú. ⁴⁴Yuda amúú ɔlele Yesu há ámu lébláa ɔɔm amu yáí ɔbéé, “Ɖhá ámúú nélatá pútá ámu gyí ɔhá ámu nɪ. Mlɪkita mu kínkíínkín, amlɪkpa mu natɪ.”

⁴⁵Unv ɔlenatí laa yó Yesu wá, yókpolí mu ɔbéé, “Osunápú!” Ɖlelatá mu pútá. ⁴⁶Unv ahá ámu benatí tó Yesu, kítá mu kínkíínkín. ⁴⁷Táme unv alúpú amutɔ ɔkule lótswɪ mu ɔdayí kpá Bulu igyí ɔhapú dehen osúmbi ɔku ɪsv lé. ⁴⁸Unv Yesu léfuté amú ɔbéé, “Ogyo otswapú ngyi, sù mlulatsú nkpotí pú ndayí mlebá mí ɔkutákpá? ⁴⁹Ntsie mlɪ wá Bulu ɔtswékpa wunsínésú unv ekekegyíeke, nde mlɪ ató suná, mlɪmékítá mí ekekekeke. Inu lahá Bulu asun wanlínhé amu ɪlaba mótɔ.”

⁵⁰Unv mu akasípú amu féé besrí sí mu.

⁵¹Ilesi ɔyasubi ɔkúvá ɔlɔwa ligá nkule. Bekítá mu, ⁵²táme ɔlɔkɔlɪ, sí mu ligá ámu wá amú ibɪtɔ, pú yayá srí.

Yudafɔ Ahande Ansító Lú

(Mateo 26:57-68; Luka 22:54-55, 63-71;

Yohane 18:13-14, 19-24)

⁵³Bekpa Yesu ya Bulu igyí ɔhapú dehen wóyí. Igyí ahapú dehen, Mose mbla asunápú pú Yudafɔ ahande amu féé bafia

inu. ⁵⁴Petro lépetí buo amú ɔma tsútsúútsú, alu yówie wóyítɔ inu. Inu oleyétsiá inu asúmpú wá, ɔde ogyá núu. ⁵⁵Inu Bulu igyí ahapú dehen pú Yudafɔ asún agyípu^p atráhe fée bodunká ahá ání béka asún dínká Yesusu, ménu bélu amú asun blíhésv mɔ mu, táme bumenya. ⁵⁶Tsúfé ahá tsɔtsɔɔtsɔ bɔwa afunu dínká musu, táme amú fée ɔnɔ lɔtsun ɔtsan.

⁵⁷Inu aku bɔkvsú ká asún dínká musu beɛ, ⁵⁸“Anlónuá ɔleblí ɔbéɛ, ‘Nóbwie Bulu ɔtswékpa anfi bapú ibi yi anfi, táme nkensá ɔma a, nélayi pópweá megyí nyankpusa ɔbɔpu ibi yi mú.’” ⁵⁹Táme amú é amú ɔnɔ mɔbwe kule.

⁶⁰Inu Bulu igyí ɔhapú dehen amu lókvsú líí amú fée ansítɔ, ɔlefíté Yesu ɔbéɛ, “Fuma ɔnɔ lé? Fuma asvansu blí púlé fú iwí?”

⁶¹Táme Yesu méle asvansu ɔnɔ. Múú Bulu igyí ɔhapú dehen amu létrá fité mu ɔbéɛ, “Bulu á múú bɔtekánfú ámu mu Bi gyí fú? Fúgyí *Kristo, (ɔhá á múú Bulu léda mu ofúli amu) ní?”

⁶²Yesu léle mú ɔnɔ ɔbéɛ, “Ee! Mí ní! Mlówun ání mí, Nyankpusa-Mu-Bi á nfi ntsie Bulu Otúmípu gyɔpɔsu á nfi ndin nwulótáasu tsú ɔsúsú nebá.”

⁶³Bulu igyí ɔhapú dehen amu lékutá mu atadie bálí mú ktaan.^q Múú ɔleblí ɔbéɛ, “Adánsie mɔmu anitráa anigyó? ⁶⁴Mlilanú abususu ání alablí. Nkálí gyí mli agywun?”

Amú fée botsulá ání olegyi pɔn, bumɔ mu.

⁶⁵Amúɔ́ aku bɔwa atsúnɔ tutúu wulí mu bi. Bɔpu atɔ tin mu ansíbi, bɔfulí mu atswé, bláa mu beɛ, “Bulu ɔnɔsú ɔtɔpú, suna aní ɔhá ání ɔɔfulí fú utswé!” Inu agyópu amu é bedadáa mu asvto.

Petro Lóswú ɔbéɛ Momeyín Yesu

(Mateo 26:69-75; Luka 22:56-62; Yohane 18:15-18, 25-27)

⁶⁶Petro lési otsie wunsúnésú inu, Bulu igyí ɔhapú dehen amu osúmbi tsíhé ɔku léba. ⁶⁷Bréá olowun Petro tsie ɔde

^p 14:55 Yudafɔ asún agyípu anfi bɔteti Sanhedrin Griiki ɔblíto.

^q 14:63 Ilosuná ání asún ámu lawié mu iwuto dɔbi.

ogyá núu a, ɔ̀lekɪ mu díín. Múú ɔ̀lefíté Petro ɔ̀béé, “Fúá Yesu Nasaretyin amu nyo ná.”

⁶⁸Táme Petro lóswú blí ɔ̀béé, “Mmeyín ɔ̀tɔ́ tsú asún ánfí fudeblí ánfí iwí!” ɔ̀lenatí yélu ɔ̀kpa ɔ̀nɔ́, unu bate lósvn.^r

⁶⁹Osúmbi tsíhé ámu létrá yótu mu unu, ɔ̀ɔ̀wa ahá á múbú bulí unu ámu bláa bí ɔ̀béé, “Amú́tɔ́ ɔ̀kule gyí oyin ánfí.”

⁷⁰Táme Petro létrá swú pú ibí wá ogyá.

Uɔ̀bwe kpalobí á, ahá á múbú bulí unu ámu bebláa Petro beé, “Lélé mú á, amú́tɔ́ ɔ̀kule fugyi, tsúfé Galileayin fú é fúgyi?”

⁷¹Unu Petro lówa ntam kakáa bí ɔ̀béé, “Neká tógyítɔ́, mmeyín oyin ánfí mlidé mu iwí asún blí ánfí.”

⁷²Unu bate lóvɔ̀n otse nyɔ̀vɔ̀si. Múú Petro lékaín asún á múbú Yesu lébláa mu ɔ̀béé, “Fóswú tse sa fée fummeyín mí asa bate ɔ̀béle ɔ̀nɔ́ tse nyo.” ámu sv. Múú ɔ̀lekpa isú yi, híé sú woo.

Yesu Pilato Ansító Lú

(Mateo 27:1-2, 11-14; Luka 23:1-5; Yohane 18:28-38)

15 ¹ɔ̀yi kehe nyanki-nyanki a, Yudafɔ́ ahande-ahande amu féé befia kitá agywun. Aku bugyi, Bulu igyí ahapú dehen, Mose mbla asunápú pú Yudafɔ́ ahande atráhe^s. Unu beha beklí Yesu, pú mu yówa Pilato ibtɔ́. ²Pilato léfíté Yesu ɔ̀béé, “Fúgyí Yudafɔ́ owíe amu ní?”

Yesu léle mú ɔ̀nɔ́ ɔ̀béé, “Ee, mú fablí á!”

³Unu igyí ahapú dehen amu beka asún tsɔ̀tsɔ̀vɔ̀tsɔ́ dínká Yesu sv. ⁴Mú sv Pilato léfíté Yesu ɔ̀béé, “Kí asún tsɔ̀tsɔ̀vɔ̀tsɔ́ baká dínká fúsú, fuma mú ɔ̀nɔ́ lé?”

⁵Táme Yesu mele asvansv ɔ̀nɔ́. Mu sv ɔ̀ɔ̀wa Pilato wánwan.

Yesu Lowu Ipción Ha

(Mateo 27:15-26; Luka 23:13-25; Yohane 18:39–19:16)

⁶Katsun Nke kugyíkvtɔ́ á, igyi ɔ̀mású ogyípú Pilato amándié ání obési obu adípútɔ́ ɔ̀kuleá amú onutó budeklé

^r 14:68 unu bate lósvn uma nwulú dada amu akvtɔ́. ^s 15:1 Ahande atráhe anfi butetí Sanhedrin Griiki ɔ̀blíto.

há amú. ⁷Oyin ɔkúá butetí mu Baraba muv mu aba buɔa obu ali bré ámuɔ. Bɔkusú líí ɔmású, kpokiti léda, bɔmɔ ɔha mútú. ⁸Ɔɔm amúú bɔyɔ Pilato wá yóbwií ipa há mu beɛ, osíi obu ɔɔpú ɔkule ha amú ali ámuú otetsiá bwé há amú ámu. ⁹Múú Pilato léfité amú ɔbéɛ, “Mlídéklé mliaa, nsíi Yudafɔ Owíe anfi ha mli lóó?” ¹⁰Ɔléfité amú ali, tsífé olowun ání Yesu iwí olu sú Bulu igyí ahapú dehen amu bakítá mu ba mu.

¹¹Igyí ahapú dehen amu beha ɔɔm amu ɔnɔ beɛ, bukókoli Pilato, osi Baraba mboún ha amú. ¹²Pilato létrá fité amú ɔbéɛ, “Ntɔ mbwéɛ ɔhá ámuú mlídétí mliaa, Yudafɔ Owíe amú?”

¹³ɒnu amú féé bɔsurá okitikítí beɛ, “Da mu manta *oyikpalíhesu!”

¹⁴Pilato léfité amú ɔbéɛ, “Tsitsa mɔmu alabwé?”

Táme belasurá okitikítí kúklúkúú beɛ “Da mu manta oyikpalíhesu!”

¹⁵Pilato dékléá ɔbɔbwe ɔɔm amu apé há amú. Mú su olesi Baraba há amú, ɔleha mu isá akɔpú beputí Yesu mli, ɔɔpu mu wá amú ibutɔ ɔbéɛ, buyéda mu manta oyikpalíhesu.

Yesu Ahinlá Bwe

(Mateo 27:27-31; Yohane 19:2-3)

¹⁶Isá akɔpú ámu bekpa Yesu ya ɔmású ogyípu amu wóyítú. Beti amú aba isá akɔpú atráhe amu féé, beɔa Yesu ɔbun. ¹⁷Bɔpu ligá pepe ku wá mu, bɔlu obungyo-awu, bwé mú owiepa bun mu nwun. ¹⁸ɒnu bɔbwe mu ahinlá, beti mu beɛ, “Yudafɔ Owíe, fú nkpasu ɔnlinsu!” Bɔtswi opé! ¹⁹ɒnu bɔpu oyí sísi mu nwuntɔ, tutúu atsunɔ wólí mu, dá akpawunu mu ansítú. ²⁰Bɔbwe mu ahinlá tá á, bɔwɔí amú ligá pepe amu, yínkíá mu onutó atadiɛ wá mu, bekpa mu dáli beyéda mu mántá oyikpalíhesu.

Yesu Da Mántá Oyikpalíhesu

(Mateo 27:32-44; Luka 23:26-43; Yohane 19:17-27)

²¹Befia Kireneyin ɔkúá butetí mu Simon, ogyi Aleksandro mu Rufo ɔsí. Otsú abú así ɔbá, beka mu híé beɛ, ɔsúra

oyikpalíhe amu. ²²Múú bekpa Yesu ya ɔtunekvá butetí unu Golgota. Mú así gyí, “Nwun Okokobi Otsiákpá.” ²³Bɔpu afá kuá iteba iwɔɔsun así wá ntátó tin Yesu ɔnó bee onúu, táme omonu. ²⁴Beda mu mántá oyikpalíhe amusu tá á, beye mu atadietɔ. Inu bɔtswi abi púki ɔhagyísha ogyíkpá. ²⁵lbɔbwe fé nyanki dokwebátó beda mu mántá oyikpalíhesu. ²⁶Múú bɔwanlín tóá svá bude mu da mántá oyikpalíhe amusu dínká mu awunso bee, “YUDAFɔ OWÍE.” ²⁷⁻²⁸Beda awikplu abanyó aku é mántá nyikpalíhesu tsía mutɔ. Ɔkule bu mu gyɔpɔsu, ɔkule é bu mu binasu.^t

²⁹Inu atsónpu bɔkpukpúu nwuntɔ, blí mu iwɔ abususu bee, “Yéé fú fée, fétalí bwíé Bulu ɔtswékpa amu, lápwe mu nkensá owító ní? ³⁰Hɔ fú iwɔ, afukpli tsu oyí ámusu aku!”

³¹Bulu igyí ahapú dehen pú Mose mbla asunápú amu é bɔbwe mu ahinlá bee, “Ɖlɔhɔ ahá nkpa, táme ɔmetálí hɔ mu iwɔ. ³²Ní muggyí Israelfɔ owíe, Kristo, (ɔhá ámúú Bulu léda mu ofúli) a, ɔkplíu tsu oyí ámusu awun, ahɔ mu gyí!”

Ahá ámúú beda mántá oyísú mu gyɔpɔsu múa binasu ámu é bɔbwe mu ahinlá.

Yesu Lowu

(Mateo 27:45-56; Luka 23:44-49; Yohane 19:28-30)

³³Bréá dódíanyɔ leda á, owí leta ɔsulúu amusu féé alu yófun ntúpwe ɔsato. ³⁴Dɔsa ámutɔ a, Yesu lókplun kúklókúú, blí ɔbéé, “Eloi, Eloi, Lama Sabaktani?” Mú así gyí, “Mí Bulu, mí Bulu, ntogyi sú fakpá mí ɔma?”

³⁵Ahá amúú bulíu unu ámutɔ aku bonu asún ánfu, beblí bee, “Mlunu, ɔde *Elia kpolí.” ³⁶Inu amúú ɔku lésrí tsú ɔsapɔ, púdá ntá ɔdáutɔ, púyi oyísú, tsú mú fúá pútín mu ɔnó ɔbéé, onúu. Múú ɔleblí ɔbéé, “Mlilu aku bee, Elia ɔbéba besieí mu lé oyí ámusu?”

³⁷Inu Yesu lókplun kúklókúú, ɔlele ɔhɛ.

^t15:28 Múú yéé 28 bu nwulú dada amu akutɔ: *Ínu léha Bulu asón ámúú bɔwanlín tswi amu léba múú. Asón ámu gyí, “Bekla mu wá lakpan abwepótó.”*

³⁸ Inunso Bulu lébalí tatiá bɔpuká ɔtswékpa obu ámutɔ anyɔ, tsú awunso beyi asi. ³⁹ Bréá isá akɔpú ɔhandeá ɔlí Yesu ansítɔ ɔdekú lówun alíá Yesu léle ɔhé tráhe a, ɔleblí ɔbéε “Lélé, Bulu mu Bi oyin ánfɔ gyí!”

⁴⁰ Atsi aku é bulú ifúntɔ budekú sisí. Amútɔ aku gyí, Magdalayintse Maria, Salome pú Maria ání ɔɔkwí Yakobo mua mu gyama *Yosef. ⁴¹ Amú é betsiá buo Yesu, tsíá kú musu bréá ɔbu Galilea. Atsi tsɔtsɔtsɔ akvá bobuo mu ba Yerusalem é bobu unu.

Yesu Pulá

(Mateo 27:57-61; Luka 23:50-56; Yohane 19:38-42)

⁴² Eke ámu igyi ekeá Yudafɔ butɔpúlá iwɔ asa butegyí amú *ɔkpúnú ɔdaké. Bréá owí deɔpɔn a, ⁴³ Arimateayin Yosef lówa uklun yɔ Pilato wá yɔkulí mu ɔbéε, osíi Yesu fúli ha mu amɔpula. Yudafɔ asún ogyípu ogyi, butobú mu. Mu é ɔde Bulu iwíegyí ámu ɔkpa kú. ⁴⁴ Uɔwa Pilato wánwan ání Yesu lawúna wu. Mú su ɔletɔ mu isá akɔpú ɔhande, fíté mu ní olowu ulawá ɔpá. ⁴⁵ Bréá isá akɔpú ɔhande amu lótsulá músú á, Pilato lési fúli amu há Yosef. ⁴⁶ Múy Yosef lóhɔ ɔhráda, ɔɔyɔ yésíei Yesu lé oyí ámusu, kíklɔ mu wá ɔhráda ámutɔ, tsú mu yópulá ɔbɔ kvá beda butátɔ, olemináa ibwi yíléyílé ku tin ɔbɔ ámu ɔnɔ. ⁴⁷ Magdalayintse Maria mua Yosef mu yin Maria bowun Yesu opulákpá.

Yesu Kusú Tsú Afúlitɔ

(Mateo 28:1-8; Luka 24:1-12; Yohane 20:1-10)

16 ¹ Yudafɔ ɔkpúnú ɔdaké ámu ulɔtsun a, Magdalayintse Maria mua Yakobo mu yin Maria pú Salome bɔhɔ ofobí fánfán ku beε, beyékpa Yesu fúli amu. ² Kwasiada nyankɔ, bréá owí lopwié a, bɔyɔ Yesu opulákpá unu. ³ Bréá buna ɔkpatɔ á, amú wulewule bude aba fité beε, “Ma abénya obémináa ibwi ámu lé ɔbɔ ámu ɔnɔ há anɔ?” ⁴ Botsu ansí kú a, bamína ibwi ámu lé ɔbɔ ámu ɔnɔ dodo. Ibwi ámu léhie móní. ⁵ Bréá bebitíwíé ɔbɔ ámutɔ á, bowun ání ɔyasubi ɔku lówa ligá futútúútú, otsie ɔbɔ ámu gyɔɔɔsu. Ifú lekitá amú.



Bopolá Yesu ɔ́bɔ́ kvá beda bvtátɔ́. (Marko 15:46)

6 Ɔyasubi ámu lébláa amú ɔ́bée, “Mlumánya ifú. Nawun ání Yesu Nasaretyin amú ɔ́beda mántá oyikpalíhesu ámu mlúdedunká. Bulu lakúsúa mu, ɔ́ma nfi. Mlúki ɔ́tíné amú ɔ́bopolá mu amu. 7 Mlúyeblláa mu akasípú amu pú Petro mlúaa, alagya mlú nkpa ɔ́yɔ́ Galilea ɔ́mátɔ́. Inú mlówun mu fé alú amú ɔ́lebláa mlú ámu nɔ́.”

8 Inu besrí dali ɔ́bɔ́ ámutɔ́, tsúfé opúni letsíí amú, ɔ́nɔ́ é lobwie amú. Mú su bréa bɔ́yɔ́ á, bumeblláa ɔ́haa, tsúfé ifú de amú, buɔ́ekpinkí kpakpakpakpa.

Yesu lwɔ́ɔwanle Súná Magdalayintse Maria

(Mateo 28:9-10; Yohane 20:11-18)

9 [Kwasieda bake, bréa Yesu lókúsú tsú afúlito á, olegyankpá lé ɔ́wɔ́ ɔ́wan súná Magdalayintse Maria amú ɔ́olegya ɔ́ɔ́e laláhe asienɔ́ lé mutɔ́ ámu. 10 Mu é ɔ́leyébláa Yesu abúopu amú ɔ́bude mu sú, buɔ́e awurehɔ́ gyí amu. 11 Táme bréa ɔ́lebláa amú ɔ́bée, Yesu lakúsú, mawun mu a, bumohogyi.

Yesu Iwɔwanle Súná Mu Abúopu Abanyó
(Luka 24:13-35)

12Íni oma a, Yesu léle iwɔ wan ɔkpa bámbású súná mu abúopu abanyó bréá buna bɔyó akuda, táme bumɔkɔsí bí mu. 13Amú é beyinkí yébláa atráhe amu, táme amú é bumohogyi.

Yesu Iwɔwanle Súná Mu Akasípú
(Mateo 28:16-20; Luka 24:36-49;
Yohane 20:19-23; Gyumagyihe 1:6-8)

14Íni fée oma a, Yesu léle iwɔ wan súná mu *akasípú dúɔkun ámu bréá bude ató gyí. Amú klwntɔ-odwin pú amú máhogyi su ɔlɔwa iyin wá amú. Tsúfé bumɔhɔ ahá ámú bowun mu mu kusú tsú afúlito oma amu gyi. 15Múú ɔlebláa amú ɔbéé, “Mliyo ɔyító fée, amliyeda Bulu asun wankláán ámu ɔkan ha ahá fée. 16Oha ání olohogyi, ɔɔɔ mu *asú á, Bulu ɔbɔhɔ mu nkpa, táme ɔhá ání omohogyi obégyi pón. 17Osúna anfi obóbuo ahá ání bohogyi ni. Bégya ɔɔe laláhe mí idátó, béblí ɔblí bámbá, 18békitá awɔ ibitɔ, bónu afá ání itɔmó kugyíku, táme imóɔbwe amú tɔɔ. Bópu ibi dínká alɔpusu, iwɔ bówa amú ɔnlɔ.”

Yesu Ɔsúsú Yo
(Luka 24:50-53; Gyumagyihe 1:9-11)

19Bréá aní Wíe Yesu lébláa amú asún tá á, Bulu lótsu mu ya ɔsúsú, oleyétsiá mu gyɔpɔsu. 20Mu akasípú amu befi asu bude asún ámu ɔkan da ɔtínegyíɔtíne. Aní Wíe Yesu lélí amú oma ɔɔyɔ agyómá. Ɖlɔtsun osúna ání ɔɔbweɔsu, wá asún ámu ɔwunlín.]“

“ 16:9-20 Mútó yée 9-20 uma nwulú dada amu akutɔ.

Asun Wankláán Ání

Luka

Lówanlín

1 ¹Onumnyampu Tiofilo:
Ahá tsɔtsɔtsɔ babó mbódí wanlín tsá ɔleba anɔtsɔ
tsɔwɪ. ²Bɔwanlín tsá ahá ámbú bubu unu tsú mú nfiásí,
bugyi mú asúmpú amu bowun, dá mú ɔkan amu bebláa
anɪ pépéépé. ³Onumnyampu Tiofilo, mí é nabó mbódí kwí
mútɔ wankláán tsú mú nfiásí. Mú su ndekléá nɔwanlín mú
pépéépé há fú, ⁴méni fébiá ató ámbú basúná fú ámu igyi
ɔnɔkwali.

Asú Ɖɔɔpú Yohane Kwí Asún

⁵Bréá *Herode dé iwíe gyí Yudea ɔmátɔ á, Bulu igyi
ɔhapú ɔku létsiá, butetí mu Sakaria. Otsú Bulu igyi ahapú
ɔpasua kvá butetí mú Abiatɔ. Mu ka gyí Elisabet, otsú Bulu
igyí ɔhapú *Aaron abí-anátɔ. ⁶Mua mu ka asún da ɔkpa
Bulu ansítɔ. Butegyí anɪ Wíe Bulu mbla pú mu nhuhé féésú
pépéépé. ⁷Buma obí, tsúfé Elisabet mégyí ɔtsɪ kwíípú. Mua
mu kulu féé bahíé dan.

⁸Èke ɔku ɔlɔtu Sakaria aná ɔpasua ání amú ɔbéha Bulu
igyí. Sakaria lóyɔ ɔbu Bulu ansítɔ ɔde mu agyómá yɔ. ⁹Abi
butɔtsɔwɪ pulé ɔhá ání obébitíwíe Ɖwankíkpa unu yɔwa
ɔhíén ogyá, igyi ahapú ámu amándíé ɔnɔ. Bɔtsɔwɪ a, ileyi
Sakariasu. ¹⁰Bréá ɔde ɔhíén ámu ogyá wa á, ɔɔm ání ɔyɔ
ɔtswékpa unu féé bulú kpankpa bude mpái bɔ.

¹¹*Bulu-ɔbɔpu ɔku lébelí *afɔdɛ-asubwi ámu gyɔpɪsu, lé
ɔwan súná Sakaria. ¹²Bréá olowun Bulu-ɔbɔpu amu a,
ɔɔwan, ifú lowie mu ayetɔ. ¹³Unu Bulu-ɔbɔpu amu lébláa mu

ɔ́bée, “Sakaria, mánya ifú! Bulu lanú fú isú. Fú ká obénya ɔ́mé kwí obi yinhé há fú. Dinka mu dá ‘Yohane.’ ¹⁴Obí ánfu kwí bówa mli ɔ́dwe, wá mli ansigyí. Ibówa ahá tsɔ́tsɔ́tsɔ́ é ansigyí. ¹⁵Tsúfě kebi ámu ɔ́bɔ́bwe ɔ́ha kɔ́nkɔ́nti Bulu ansítɔ́. Nta bvhé kuku máda mu ɔ́nɔ́ ekekekeke. *Oje Wankíhé ɔ́bɔ́bulá mutɔ́ tsú bréá ɔ́bu mu yin iwɔ́tɔ́. ¹⁶Ɖbéha *Israelfɔ́ tsɔ́tsɔ́tsɔ́ bédamlí klɔ́ntɔ́ ba amú Wíe Bulu wá. ¹⁷*Bulu ɔ́nɔ́sú ɔ́ɔ́pú *Elia túmi pú mu ɔ́hě bétsiá mutɔ́. Obégya anu Wíe nkɔ́pá bá. Ɖbéha abí así bóɔ́dwe amú abí, ɔ́bédamlí ahá ání butɔ́kúsú líí Bulusu agywun, ibwe fé yilé abwepú klé, méní ɔ́béla ahá yáí wankláán há anu Wíe.”

¹⁸Sakaria léfité Bulu-ɔ́bɔ́pu amu ɔ́bée, “Ntɔ́ nɔ́pɔ́bí ání asún ánfu ibéba mútɔ́? Tsúfě mía mí ká anɔ́lapɔ́n.”

¹⁹Inu Bulu-ɔ́bɔ́pu amu lébláa mu ɔ́bée, “Mí dá gyí Gabriel. Bulu ansítɔ́ ɔ́lípú ngyi. Muláwá mí ɔ́bée, mbébláa fu asun wankláán ánfu. ²⁰Tsú nde púya ekeá asún ánfu ibéba mútɔ́ á, fɔ́tɔ́ omúmu, tsúfě fumɔ́hɔ́ mí asun blíhé anfi ibéba mú brétɔ́ anfisú gyi.”

²¹Uɔ́bwe alí á, unɔ́wánkí ahá ámúbú bulí bugyo Sakaria amu tɔ́á svá alawá ɔ́pá ɔ́tswékpa obutótɔ́ unu alí. ²²Bréá ɔ́ledali ba a, alatɔ́ omúmu. Mú su bowun ání alawun tɔ́ku obutótɔ́ unu. Iníá ɔ́metálí tɔ́í su á, ɔ́ɔ́pu mu ibi múa mu nwun bláa amú asún.

²³Sakaria létsiá ɔ́tswékpa unu yɔ́fun ekeá ɔ́leha Bulu igyí tá, oleyinkí yɔ́ wóyí. ²⁴Nke ámu ɔ́ma a, Elisabet lénya ɔ́mé, tsíá nǵáin iwí alu tsra anu kéké. ²⁵Elisabet léblí ɔ́bée, “Inu mí Wíe Bulu labwé há mí ní. Alawun mí nwe, dínkí nsópa lé mísú ahátɔ́.”

Yesu Kwí Iwí Asún

²⁶Bréá Elisabet ɔ́mé lohɔ́ tsra asie á, Bulu lówa mu ɔ́bɔ́pu Gabriel wúlu kvá ibu Galilea ɔ́mátɔ́, butetí mú Nasaret. ²⁷Bulu lówa mu obitebí ɔ́kvá ɔ́mɔ́kúdí oyin wá kɪ, butetí mu *Maria wá. Alí bré ámutɔ́ buɔ́epu obitebí ámu há oyin ɔ́kvá butetí mu *Yosef, ogyi owíe *Dawid mu na bée otsiá. ²⁸Bulu-ɔ́bɔ́pu amu léba Maria wóyítɔ́ beha mu itsiá, bláa mu ɔ́bée, “Bulu lagyi fu buale, alahíé yúlá fú!”

29 Asón ánfu lèha Maria légyigyáa, ɔlefíté mu iwɪ ɔbéé, “Ngya nto itsiá odu ɔhá ánfu lahá mí alí?” 30 Bulu-ɔbɔpu amu lébláa mu ɔbéé, “Maria, mánya ifú. Bulu lahié yúlá fú! 31 Kɪ, fénya ɔmé kwíí obi yinhé. Dɪnka mu dá ‘Yesu.’ 32 ɔbɔbwe ɔha yilé. Bétu mu ɔsúsúsú Bulu mu Bi. Anɪ Wíe Bulu ɔbéyaí mu mu nain Owíe Dawid obiású. 33 Obégyi iwíe *Yakob^a wóyísú bré féétó. Mu iwíegyí mɔɔmɔ ɔnó ekekeke.”

34 Maria léfíté Bulu-ɔbɔpu amu ɔbéé, “Nkálɪ ɪbɔbwe asa ɪnɪ ɪbéba mótó, tsúfé mmeyín oyin.”

35 Bulu-ɔbɔpu amu léle mú ɔnó ɔbéé, “ɔɣe Wankíhé ɔbéba fusu. ɔsúsúsú Bulu ámu túmi bóbus fusu. ɪnɪ su ahá bétu Obi wankíhé amúb fɔkwíí ámu beé, ‘Bulu mu Bi.’ 36 Kɪ, fú obusuanyin Elisabet kóráá ɔbá bɔkwíí obi yinhé mu tsidhen anfitɔ. Ahá beé, megýí ɔtsɪ kwíípu ogyi, táme mu ɔmé lahɔ tsra asie dodo. 37 Tsúfé tɔtɔ mɔdón Bulu bwe!”

38 ɪnu Maria lébláa Bulu-ɔbɔpu amu ɔbéé, “Bulu osúmbi ngyi. ɪbá mótó ha mu fé alá fablí.” ɪnu á, Bulu-ɔbɔpu amu lénatí sí mu.

Maria Léyesunáa Elisabet

39 Nke ámutɔ á, Maria lɔkulá ató, wa ɔsa yó Yudea abusu wúlu kutɔ. 40 Múbú olowie Sakaria wóyító há Elisabet itsiá. 41 Elisabet lénya nú itsiá ámu alí kebi ámu lékan iwɪ mu iwɪtɔ, *ɔɣe Wankíhé ɔbulá mutɔ. 42 ɪnu ɔɔkplón blí ɔbéé, “Bulu layúlá fú atsi féétó. Alayúlá fú iwɪtɔ obí ámu é. 43 Iyé! Mí Wíe mu yin onutó lába mí wá á? Ntogyi sù Bulu lawá mí numnyam anfi odu? 44 Kɪ, nenyánú fú itsiá ámu alí obí amúb ɔbu mí iwɪtɔ ámu lékan iwɪ ansigyísú. 45 Bulu layúlá fú, tsúfé fahogyi ání tɔá alahíé há fú ɪbéba mótó.”

Maria Bulu Kanfó ɪlu

46 ɪnu Maria lɔwa ɪlu ɔbéé,

“Mí ɔkláa dé mí Wíe Bulu kanfó.

47 Mí Nkpa ɔhɔpu Bulu lahá ansí de mí gyi.

^a 1:33 Israelfɔ gyí Yakob abí-aná.

- 48 Tsúfé alakáín mí mu osúmbi ání ɔma tɔtɔ
bwetósó, wun mi nwe.
Tsú séi púya a, abí-aná fée béblí bæ, Bulu layúlá
mí.
- 49 Bulu Otúmípu amu labwé ató kpɔnkpɔnti há mí.
ɔɔwankí.
- 50 Otowun ulín kugyíkɔtɔ
ahá ání butenyá mu ifú nwe.
- 51 Alapú mu túmi bwé ató akpɔnkpɔnti,
púdá iwɪ atsupú nwuntɔ asún sáín.
- 52 Alakplí awíe mbíású,
tsú ahá ání buma tɔtɔ bwetó fúá.
- 53 Alahá ahiánfɔ bamlí iwɪ anyapú,
há iwɪ anyapú banátí ibikpan.
- 54-55 Alakpá mu asúmpú Israelfɔ.
ɔmetan ání ɔleblí ɔbéɛ, mówun anɪ anáin
*Abraham
mva mu abí-aná nwe bré fée,
fé alíá ɔlebláa amú.”

Alɪ Maria lómɔ mu ulɔ ámu ɔnɔ ní. ⁵⁶Oletsíá Elisabet wá
fé tsra asa asa oleyinkí yó wóyí.

Asú ɔbɔpú Yohane Kwí

⁵⁷Bréá Elisabet lóɔkwí á, ɔɔkwí obi yinhé. ⁵⁸Mu
abusuanfɔ pú mu aba bonu ání anɪ Wíe Bulu lahté wun mu
nwe. Mú su ansí légyi amú fée.

⁵⁹Obí ámu lénya ndawótswí á, mu iwɪsu ahá beba mu
obuto ɔlekpá, abutin mu *keté, dɪnka mu dá. Tɛkɪ bæ abɔpu
mu sɪ dá Sakaria dɪnka mu, ⁶⁰táme mu yin lébláa amú ɔbéɛ,
“Ó-o! Mlɪdɪnka mu Yohane.”

⁶¹Ahá ámu bebláa mu bæɛ, “Anumókúnú abuti fú
obusuanyin ɔkuku alɪ kɪ.” ⁶²ɪnu ɔɔbwe mu sɪ ibi, fíté mu
alíá butú kebi ámu.

⁶³Sakaria lóɔbwe ibi ɔbéɛ butsúu tɔku ha mu amowanlɪn
mú dɪnka mósú, ɔɔwanlín ɔbéɛ, “Mu dá gyí ‘Yohane.’”
ɪlofwie amú féeftɔ. ⁶⁴ɪnusu mu ɔdandu lesankí, ɔɔtɔɔ kánfú

Bulu. ⁶⁵Ifú lekítá apíó aba ámu féé. Alí asún ánfí lekíléí wá Yudea abusú awúlu amu féétó. ⁶⁶Ḑhagyícha ání olonu asún ánfí léfíté mu iwí ɔbéé, “Ntɔ obí kebi ánfí ɔbóbwe ekékó?” Tsúfé ulwankí amó ání Bulu ibí dín musu.

Sakaria Bulu Kanfó Ulo

⁶⁷Ḑnu á, Ḑje Wankíhé lɔbulá Sakariatɔ, ɔlɔwa asún ání Bulu lapóhá mu blí bí.

⁶⁸Ḑbéé,

“Mliha akanfu aní Wíe Israel Bulu.

Tsúfé alabele mu ahá, há anulagyi iwí.

⁶⁹Alalé Ḑhópu Ḑwonlínpú ɔku

tsú mu osúmpú Owíe Dawid abusuantɔ há aní.

⁷⁰(Fé alíá ɔleblí tsun mu ɔnósú atɔípú wankíhé amusu tswi dodoodo.)

⁷¹Ḑbéé, méle aní tsú aní alupú

pú ahá ání butamafia aní ibitɔ.

⁷²⁻⁷³Ḑbéé, mówun aní anáin nwe.

Ḑméetan mu ntam wankíhé amúú ɔleka há aní náin Abraham amusu.

⁷⁴Ḑbéé, méle aní tsú aní alupú ibitɔ,

méni abétalí súm mu, anuméenya adún ifú.

⁷⁵Ḑbéha abóbwe mu ahá,

bwé yilé mu ansísú aní nkpatɔ féé.

⁷⁶Mí bí, fú mú á, ahá bétí fú beé, ‘Ḑsúsúúsú Bulu ámu ɔnósú ɔtɔípú.’

Tsúfé fégya aní Wíe nkpa,

lá ɔkpa há mu.

⁷⁷Fébláa mu ahá féé, Bulu ɔbétalí hɔ amó nkpa

tsun lakpansikíésú.

⁷⁸Aní Wíe Bulu nwewúun su

Kristo amu ɔbédalí fé owí tsú ɔsúsú ba aní wá.

⁷⁹Ḑbówankí wúlí ahá amúú butsie oklúntɔ pú lowu ɔkpasu ámu féésú.

Ḑbékpa aní tsun iwilwii ɔkpasu.”

Ínu Sakaria lópumó mu asún ɔ́nó ní. ⁸⁰Kebi ámu lédan, nya Ɖhétó ɔ́wonlín. Oletsíá *dimbísú alu yófun ekeá ɔ́lele ɔ́wɔ́ ɔ́wan súná Israelfó.

Yesu Kristo Kwí
(Mateo 1:18-25)

Luk

2 ¹Alí bré ámutó á, Roma owíe dehen Augusto lówa mbla ɔ́bée, bukíáa ahá ání bubu Romafó así féeé, abɔ́wanlun amó adá. ²Múgyí ahákla gyankpapu ni. Alí bré ámutó á, oyin ɔ́kúá butetí mu Kirenio dé Siria ɔ́má sú gyí. ³Ínu su ɔ́hagyíɔ́ha lóyó dá ɔ́wanlínkpá mu onutó wúluto.

⁴*Yosef é lókusú tsú Nasaret wúlu ání ibu Galilea ɔ́mátó dú yó Yudea ɔ́mátó, Owíe *Dawid wúluto Bethlehem. Tsúfé Owíe Dawid mu na ógyi. ⁵Mba *Maria amúbú bapúhá mu bee otsía, ɔ́na odwinsu ámu nyo lóyó dá ámu ɔ́wanlínkpá. ⁶Bréá bubu Bethlehem unu á, ikwí lekkan Maria, ⁷ɔ́lɔ́kwí mu bití, ogyi oyin. Ɖlekíklí mu wá tatidatɔ́, pú mu tswi mbwí atogyihe dákatɔ́, tsúfé bumenya otsiákpá afó ɔ́swíkpá.

Akúfa Akpapú Pú Bulu-abɔ́pu

⁸Alí bré ámutó á, akúfa akpapú aku bubu unu fún dimbító, bude amó akúfa ɔ́wɔ́ gyo onyé. ⁹*Bulu-ɔ́bɔ́pu léle ɔ́wɔ́ ɔ́wan súná amó, Bulu numnyam lówankí wólí amósú. Mú su ifú lehie kítá amó. ¹⁰Ínu á, Bulu-ɔ́bɔ́pu amu lébláa amó ɔ́bée, “Mlumánya ifú! Mlíki, napú *asun wankláán ání ɔ́bówa mli ɔ́yító ahá féeé ansigyí ba mli. ¹¹Nde bakwí nkpa Ɖhópu, aní Wíe *Kristo, (ɔ́há amúbú Bulu ladá mu ofúli amu) há mli Owíe Dawid wúluto! ¹²Tóá mlópubí mu gyí, mlówun kebi bɔ́bwe ɔ́kúá bapú tatida kíklí mu ɔ́wɔ́, ɔ́da mbwí atogyihe dákatɔ́.”

¹³Ɖtsáwule pé á, *Bulu-abɔ́pu tsɔ́tsɔ́tsɔ́ beba betsiá Bulu-ɔ́bɔ́pu amutɔ́, bude Bulu kanfú bee,

¹⁴“Mliha apu numnyam ha Buluá ɔ́bu ɔ́súsúsú! ɔ́wɔ́ ilwii ahá ání Bulu ansí tegyi amó ɔ́wɔ́ ɔ́sulósu.”



*Maria lékiklí Yesu wá tatidatɔ, pú mu tswi
mbwi atogyihe dákatɔ. (Luka 2:7)*

15Bréá Bulu-abɔpu amu beyinkí yɔ ɔsúsú á, akúfa akpapú ámu bebláa aba bæ, “Mliha ayɔ Betlehem, ayekú utɔ ánfí ulaba, Bulu lalé súná aní ánfí.”

16Íni su bɔwa ɔsa yɔ. Lélé á, bowun Maria mua Yosef pú kebi bɔbwe amu, ɔda mbwi atogyihe dákatɔ. 17Bréá bowun kebi ámu a, bele mu iwí asún ámuú bonu ámu blí. 18Akúfa akpapú asún ánfí lówa ahá aní bonu mú féé wánwan. 19Táme Maria mú lékutá asún ámu féé wá nwuntɔ, tsíá gywín mú iwí. 20Bréá akúfa akpapú ámu beyinkí bɔyɔ

á, buna buɗe Bulu adábi da, kánfú mu, asún ámúú bonu pú utó ámúú bayówun fé alí ámúú Bulu-ɓɓɓu amu lébláa amú ámu su.

Yesu Iɗá Dínká

²¹Kebi ámu obuto ɗeké á, betun mu *keté, dínká mu dá Yesu. Iɗá ánfí Bulu-ɓɓɓu amu léha mu asa mu yin lénya mu ɗmé ní.

Yesu Puya Bulu Ɔtswékpa

²²Bréá mu akwípu bógyuráa iwi Mose Mbla ɗón lofun a, ɓɓɓu mu dú yó Yerusalem, pú mu yópu wá Bulu ibtu. ²³(Tsúfé ɓɓɓanlín wá Mose Mbla ámutɔ beɛ, “Ilehián ání Israelfɔ bópu amú bití okugyíɔku há Bulu.”) ²⁴Mú su ɓɓɓɔɓɔ afɔɗie ámu Mbla ámu ɗón. Abróɗuma anyɔ ntée aklobi anyɔ ɓɓɓɔɓɔ alí afɔɗie ánfí há Bulu.

²⁵Alí bré ámutɔ á, oyin dehen ɔku bu Yerusalem, butetí mu Simeon. Yilé ɓɓɓepú ógyi, otenyá Bulu ifú. *Ɔɗe Wankíhé bu musu, otsie ogyo bréá Bulu ɓɓɓu Ɔlepú ba mu ahá Israelfɔ. ²⁶Ɔɗe Wankíhé amu léle súná mu ání omóowu, yófun bréá alawun Kristo, (ɓhá ámúú Bulu ladá mu ofúli amu) asa. ²⁷Ɔɗe Wankíhé amu léha Simeon lóyo *Bulu ɓtswékpa wunsínésú. Alí bré ámutɔ á, Yesu akwípu baba mu amándíé ánfí ɓɓɓekpá fé alíá Mose Mbla ámu léblí.

²⁸ɓnu Simeon lóho kebi ɓɓɓwe amu, ɗekanfú Bulu ɓbéɛ,

²⁹“Mí Wíé! Asún ámúú feblí tswi amu ilaba mútú.

Séi mú á, mí fú osúmbi anfi nétalí wú iwilwiiti
ngya.

³⁰Tsúfé mí onutó napú mí ansíbi wun Ɔlepú ámu.

³¹Fú onutó falá mu bwé ahá féé ansítú.

³²Wanki ogyi, ɓbéle fú súná ahá ání bumegyí
Israelfɔ,

pú numnyam ba fú ahá Israelfɔ.”

³³Asún ánfí Simeon léblí tsú kebi ɓɓɓwe anfi iwi leha ɗón lobwie mu akwípu. ³⁴Simeon lóyulá amú, ɗlebláa obí mu yin Maria ɓbéɛ, “ɓna kebi ánfí su Israelfɔ ɓfan bédida,

ɔfan é bélií. Osúna ogyi tsú Bulusu, ahá bókusú líí musu. ³⁵Íni su Bulu ɔbéha ahá tsɔtsɔɔtsɔ klunsu asún bélin ɔwan. Fú é á, awireho béhie kítá fú klun. Ibóho fu ɔsun fé ɔdayí ɔya anyɔ bakpié yi fu.”

³⁶Ɔtsi dehen ɔkuá ogyi *Bulu ɔnósú ɔtɔípú é bu unu. Mu dá gyí Hana. Mu si gyí Fanuel, ɔtsú Asa abusuantɔ. Ɔtsi dehen anfi mu mu kulu betsiá aba nfinsienó, mu kulu lówu. ³⁷Olosu usura alu bɔfun bréá ɔlɔho nfi adukwe-na (84). Ɔlɔpu Bulu ɔtswékpa wunsunésú unu mlí mu ɔdikpa, ɔde Bulu súm, *klí ɔnó, bó mpái ɔpa múa onyé. ³⁸Mu é ɔledali ba bekanfú Bulu, blí kebi bɔbwe amu iwi asún súná ahá ámúú buɔde Yerusalemfo iwígyí ɔkpa kí amu.

Yesu Yinkía Ya Nasaret Wúluto

³⁹Bréá Yesu akwíúpú bɔbwe amándié ámu tá Bulu mbla ámu ɔnó á, beyinkí kplí yó amú wúluto Nasaret, Galilea ɔsulósu. ⁴⁰Kebi ámu lédan, nyá ɔwunlín, nyá nyánsa, Bulu é lóyulá mu.

Yesu Bu Bulu Ɔtswékpa

⁴¹Yesu akwíúpú butetsiá yó Yerusalem yégyi Israelfɔsu *Katsun Nke ofífiyíofí. ⁴²Bréá Yesu lóho nfi dúanyɔ á, mu amúnyɔ bɔyɔ nke ámu ogyíkpa fé alá butɔyó yái. ⁴³Bréá begyi nke ámu tá beyinkí á, Yesu akwíúpú bumebi ání alasin unu. ⁴⁴Buki bee mu mu abanyɔ ná. Mú su benatí ekewóle owító asa bowa mu dunká apíó abato bi. ⁴⁵Bréá bodunká mu kásíán á, beyinkí yó Yerusalem, yódunká mu. ⁴⁶Eke sáásí a, boyówotíí musu Bulu ɔtswékpa wunsunésú unu. Otsie Mose *mbla asunápú wá, ɔde asu yáa amú asúntó, ɔde amú asún fité. ⁴⁷Ɔnó lobwie ahá ání bubu unu féé, tsú alá ɔde asún ámu así nu pú alá ɔde mú ɔnó le. ⁴⁸Ɔnó lobwie mu akwíúpú bréá bowun mu. Mu yin léfité mu ɔbéé, “Mí bí, ntogyi su fabwé aní alí? Mía fú sínyɔ ansí lapé anidé fú dunká.”

⁴⁹Unu Yesu léfité amú ɔbéé, “Ntogyi su mlidé mí dunká? Ilehíán ání mlébi ání mí Sí wóyító nétsiá.” ⁵⁰Táme mu akwíúpú bumonu asún ání ɔde amú bláa así.

⁵¹Mva amúnyo beyinkí yó Nasaret, oḗba iwiasí há amú. Maria lékitá asún ámu fée wá kpawunuto, tsíá gywiún mú iwí. ⁵²Yesu lédan, wa owunlín, nyá nyánsa, Bulu mba anyánpósa fée ansí legyi mu iwí.

Asú Ọbọpú Yohane Bulu Asún Ọkanda
(Mateo 3:1-12; Marko 1:1-8; Yohane 1:19-28)

Luk

3 ¹⁻²Roma owíe dehen Tiberio iwíegyi ofí dúanusito á, Bulu lébláa mu igyi ọhapú Sakaria mu bi Yohane *dimbísú ọbée, ọdáa mu asún ọkan. (Alí bré ámutó á, Pontio Pilato dé Yudea ọmású gyí. *Herode dé Galilea ọmású gyí. Herode mu dehen Filipino é dé Iturea pú Trakoniti ọmású gyí, Lisania é dé Abilene ọmású gyí. Bulu igyi ahapú dehen ání bubu unu alí bré ámutó é gyí Hana mva Kaiafa.) ³Mú su Yohane léki Yordan bunkpa ọnó, ọde ọkan da bí ọbée, “Mludamli kluntó, amlisi lakpan bwe. Bulu osikie mli, ambo mli *asú.”

⁴*Bulu ọnósó ọtọpú *Yesaia lówanlín Yohane iwí asún wá mu ọwulútó ọbée,

“Ọku dékplun dimbísú ọbée,

‘Mlila aní Wíe ọkpa.

Mlitswii ikpa ha mu!

⁵Mlutin bunkpa kugyíku,

amlibwiebwie abu mba nkúku fée.

Mlitswíi ikpa,

amlila mósú wankláán.

⁶Ahá fée bówun Bulu nkpahó.’ ”

⁷Ọdóm beba Yohane wá be, ọbó amú asú. Ọlefíté amu ọbée, “Abe abí-aná, ntó gyá mli, mlisrí Bulu usbutí ámú ibá ámu? ⁸Múmú mliswie abí oduá ibósuná ání lélé mliladámli kluntó. Mlumáki mlíaa, mli náin gyí *Abraham. Nde mli bláa mbée, Bulu ọbétalí há abwi ánfu ibédamli Abraham abí-aná. ⁹Séi á, Bulu lapú efé yi nyí-atsitsito. Oyígyíoyí ání imoswie abi wankláán á, bókun mú dá, wá mú fée ogyá.”

¹⁰Ọdóm amu befité Yohane be, “Ntó mee abwée?”

¹¹Yohane lébláa amú ọbée, “Fúá fubu atadi anyo á, pu kule ha ọhá ání ọma kuku. Fúá fubu atogyihe é bwe mú alí.”

12*Lampóo ahópu aku é beba asú ɔ̀ɔ̀kpá. Befité Yohane beɛ, “Osunápu, ntu ilehián ání abɔ̀bwe?”

13Yohane lébláa amú ɔ̀bée, “Mlumátswi dinká ahá. Mliho tɔ́a beɛ mliho.”

14Isá akɔ̀pu aku é befité Yohane beɛ, “Ani é mé, ntu abwée?”

Yohane lébláa amú ɔ̀bée, “Mlumápu ɔ̀wɔ̀nlín swíi ɔ̀haa kɔ̀ba, ntée wá afunu dínká ɔ̀haasu. Mli akatua igyí mli ansí.”

15Íniá amú ansí din Kristo amusu, buɛ mu ɔ̀kpa kí su á, umɔ̀wánkí amú ní Yohane gyí Kristo amu. 16Mú su Yohane lébláa amú ɔ̀bée, “Ɖkúá ɔ̀ɔ̀ɔ̀n mi bu ɔ̀ma ɔ̀bá. Mmɔ̀fun ání nésankí mu ntukuta ɔ̀fé kúráá. Mí mú á, ntsu ndepɔ̀bɔ̀ mli asú. Mu ɔ̀bɔ̀pu *Ɖɛ Wankíhé pú ogyá bɔ̀ mli asú ní. 17Ɖɛ mu lín, ɔ̀bɔ̀pɔ̀fúní ntéte lé ayó ámuɔ̀. Ɖbékpa ayó ámu wá mu odudutɔ̀. Táme ɔ̀béfí ofuníkpa unu wankláán, kpá ntéte amu wá ogyá ání itamaduntɔ̀.” 18Yohane léda asun wankláán ámu ɔ̀kan, bláa ahá ámu asún tsɔ̀tsɔ̀tsɔ̀ ɔ̀bée, budámli kluntɔ̀.

19Isu ogyípu *Herode laswí mu dehen Filipino mu ka Herodia tsía, trá bwe lalahe tsɔ̀tsɔ̀tsɔ̀ tsía mútɔ̀. Mú su Yohane lékiná há mu. 20Múá idun kúráá gyí, Herode léha bektá Yohane wá obu.

Yesu Asúɔ̀

(Mateo 3:13-17; Marko 1:9-11)

21Bréa Yohane dé ahá ámu asú ɔ̀ á, Yesu é léba, Yohane lɔ̀ɔ̀ mu asú. Bréa Yesu dé mpáí ɔ̀ á, nwulútáa lefinkí, 22Ɖɛ Wankíhé lédamlí fé abrɔ̀ɔ̀ma, kplí bogyonká musu. Ɖme ku lotsu ɔ̀sɔ̀sɔ̀ ɔ̀bée, “Fúgyí mí bíá ntɔ̀dwé, mi ansí tɛhíé gyí fú twi ní.”

Yesu Anáin Uíntɔ̀

(Mateo 1:1-17)

23Bréa Yesu lɔ̀ho fé ní advasa á, olefi Bulu asún ɔ̀kanda asu. Ahá mú buyin ání *Yosef mu bi ní. Yosef mu si gyí Eli. 24Eli mu si gyí Martat. Martat mu si gyí Lewi. Lewi mu

si gyí Melki. Melki mu si gyí Yanai. Yanai mu si gyí Yosef. ²⁵Yosef mu si gyí Martatia. Martatia mu si gyí Amos. Amos mu si gyí Nahum. Nahum mu si gyí Hesli. Hesli mu si gyí Nagai. ²⁶Nagai mu si gyí Mahat. Mahat mu si gyí Martatia. Martatia mu si gyí Semein. Semein mu si gyí Yosek. Yosek mu si gyí Yoda. ²⁷Yoda mu si gyí Yohanan. Yohanan mu si gyí Resa. Resa mu si gyí Serubabel. Serubabel mu si gyí Sealtiel. Sealtiel mu si gyí Neri. ²⁸Neri mu si gyí Melki. Melki mu si gyí Adi. Adi mu si gyí Kosam. Kosam mu si gyí Elmadam. Elmadam mu si gyí Er. ²⁹Er mu si gyí Yosua. Yosua mu si gyí Elieser. Elieser mu si gyí Yorim. Yorim mu si gyí Martat. Martat mu si gyí Lewi. ³⁰Lewi mu si gyí Simeon. Simeon mu si gyí Yuda. Yuda mu si gyí Yosef. Yosef mu si gyí Yonam. Yonam mu si gyí Eliakim. ³¹Eliakim mu si gyí Melea. Melea mu si gyí Mena. Mena mu si gyí Martata. Martata mu si gyí Natan. Natan mu si gyí Owíe *Dawid. ³²Owíe Dawid mu si gyí Yisai. Yisai mu si gyí Obed. Obed mu si gyí Boas. Boas mu si gyí Salmon. Salmon mu si gyí Nahson. ³³Nahson mu si gyí Aminadab. Aminadab mu si gyí Admin. Admin mu si gyí Arni. Arni mu si gyí Hesron. Hesron mu si gyí Peres. Peres mu si gyí Yuda. ³⁴Yuda mu si gyí Yakob. Yakob mu si gyí Isak. Isak mu si gyí Abraham. Abraham mu si gyí Tera. Tera mu si gyí Nahor. ³⁵Nahor mu si gyí Serug. Serug mu si gyí Reu. Reu mu si gyí Peleg. Peleg mu si gyí Eber. Eber mu si gyí Sala. ³⁶Sala mu si gyí Kainan. Kainan mu si gyí Arfaksad. Arfaksad mu si gyí Sem. Sem mu si gyí *Noa, Noa é mu si gyí Lamek. ³⁷Lamek mu si gyí Metusela. Metusela mu si gyí Enok. Enok mu si gyí Yared. Yared mu si gyí Mehalaleel. Mehalaleel mu si gyí Kenan. ³⁸Kenan mu si gyí Enos. Enos mu si gyí Set. Set mu si gyí *Adam. Adam é mu si gyí Bulu.

Yesu Isóki

(Mateo 4:1-11; Marko 1:12-13)

4 ¹Bréá Yesu léyinkí tsú Yordan ntsu ɔnó á, Ɖɔɛ Wankíhé lɔbulá mutɔ, ilekpa mu ya *dimbísú. ²Bréá ɔbu unu á,

Ɖbunsám létsiá ɔɔɔ mu ki nke advana kéké. Yesu mégyíi ɔɔɔ nke ámuɔ fée. Mú su bréá nke ámu ulɔɔ ɔɔ á, akún híe de mu.

³Ɔbunsám lébláa mu ɔbée, “Ní Bulu mu Bi fugyi á, múmú ha ibwi ánfí idamli bodobodo.”

⁴Yesu léle mú ɔɔ ɔbée, “Bɔwanlín wá Bulu asún ámuɔ bée, ‘Megyi atogyihe wule nyankpusa ogyíi tsia nkpa.’ ”

⁵Ɖbunsám lópu mu ya ibu fúáhé kusu. Olosuná mu ɔyító iwíe ogyíkpa fée ɔtsáwule pé. ⁶Mú ɔlebláa mu ɔbée, “Nópu ɔmá ánfí fée túmi pú amú numnyam há fú, tsúfé mí ibiɔ bapúwá. Ɖhá ání ndeklé a, mu nópuhá. ⁷Mú su ní fosúm mí á, nópu mú fée há fú.”

⁸Yesu lébláa mu ɔbée, “Bɔwanlín wá Bulu asún ámuɔ bée, ‘Da akpawunu ha fú Wíe Bulu. Mu nkule fu súm.’ ”

⁹Ɖbunsám lékpa mu ya Yerusalem, ɔɔpu mu yélí *Bulu ɔtswékpa obu ámu ɔántra. Ɔbunsám léle Yesu ɔbée, “Ní Bulu mu Bi fúgyi lélé á, tu kpayi. ¹⁰Tsúfé bɔwanlín wá Bulu asún ámuɔ bée, ‘Bulu ɔbéha mu abɔpu békí fusu. ¹¹Békpatá fú ibiɔ, méni fú yabi méeda ibwi kukusu.’ ”

¹²Yesu léle mú ɔɔ ɔbée, “Betrá wanlín bée, ‘Mákapú fú Wíe Bulu ki.’ ”

¹³Bréá Ɖbunsám lómu isókí anfi fée ɔɔ á, ɔɔku náti sí mu asa.

Yesu Gyumagyihe Asitsuá Galilea Ɖmátó

(Mateo 4:12-17; Marko 1:14-15)

¹⁴Ɖɔɔ Wankíhé túmi lékpa Yesu, oleyinkí yó Galilea ɔmátó. Mu ɔwí asún leklei wa ɔmá ámu féétó. ¹⁵Oletsíá súná ató Yudafo *ofiákpa, ahá ámu fée bekanfó mu.

Bumɔɔhɔ Yesu Mu Wúluto

(Mateo 13:53-58; Marko 6:1-6)

¹⁶Ɔbunsám léyinkí bá Nasaret, ɔtínéá oletsíá dan. Fé alíá otetsíá bwé á, ɔɔɔ Yudafo ofiákpa *ɔkpúnú ɔdaké. Bréá ɔɔkusu yélí amú ansító ɔbékla Bulu asún á, ¹⁷botsu Bulu ɔɔsú ɔɔɔpú *Yesaia ɔwulú há mu. Ɖlesankí mú á, olowun ɔtinekvá bɔwanlín wá bée,

18 “Ani Wíe Bulu ladá mí ofúli.

Íni su mu ɔ́ɔ́é bu misu.

Alalé mí ɔ́ɔ́é, ndáa *asun wankláán ámu ɔ́kan
suna ahá ání buma tɔ́ɔ́.

ɔ́ɔ́é, mbébláa nkpábi mbéé, masí amú iwí há
amó.

Mí ambia ansibi abwiepú mbéé, mabwíí amú ansíbi.

ɔ́ɔ́é mbébláa ahá ání bude amú ipiantɔ́ wa é
mbéé, malé amú ipiantɔ́.

19 Fówun mí ambli mbéé,
anu Wíe ahá nwewúunbi lafun.”

20 Inu olokuntá ɔ́wulú ámu, yínkíá ha músú ɔ́kírɔ́, ɔ́ɔ́wɔ́
tíá así. Ahá ámúú bubu ofiákpa unv ámu fée besi bude
mu kí díín. 21 Inu Yesu lébláa amó ɔ́ɔ́é, “Nde, Bulu asun
wanlínhé anfi laba mótó. Mú mlílanú á.”

22 Ahá ámu fée bonu asun wankláán ámúú iledali mu
ɔ́nɔ́ ámu. ɔ́nɔ́ lobwie amú, befité bee, “Megyí *Yosef mu bi
ámu ni?”

23 Yesu lébláa amó ɔ́ɔ́é, “Nyin ání mléha mí yébi anfi
mlíaa, ‘Uɔ́ ɔ́tsapú, tsa fú iwí!’ Mlélabláa mi mlíaa, ‘Bwe ató
ámúú anlanú ání fúdebwe Kapernaum amu fú wúluto nfi
é.’ ” 24 Inu oleyinkí bláa amó ɔ́ɔ́é, “ɔ́nɔ́kwali nde mli bláa.
Butamahɔ́ Bulu ɔ́nɔ́sú ɔ́ɔ́ɔ́pú ɔ́kuku asún mu wúluto.

25 “Mlinu, Bulu ɔ́nɔ́sú ɔ́ɔ́ɔ́pú *Elia bísu á, nyankpu
mótswie nfinsa múa ifun kéké. Akún lehie ba Israel ɔ́mátó
fée. Ibu mótó ání asurapu tsɔ́tsɔ́wtsɔ́ betsiá Israel ɔ́mátó alí
bré ámuɔ́, 26 táme Bulu méha Elia ɔ́yɔ́ amótó ɔ́kuku wá.
ɔ́surapu ɔ́kuá ɔ́bu Sarefat wúluto, Sidon ɔ́mátó nkule wá
ɔ́leha mu ɔ́ɔ́yɔ́. 27 *Uɔ́ pepe alɔ́pú tsɔ́tsɔ́wtsɔ́ é betsiá Israel
ɔ́mátó Bulu ɔ́nɔ́sú ɔ́ɔ́ɔ́pú Elisa bísu. Táme ɔ́meha ɔ́kuku iwí
meplí, dun Naaman ání otsú Siria nkule.”

28 ɔ́bls lehie kítá ahá ámúú bubu ofiákpa unv ámu, bréá
bonu Yesu asun blíhé anfi. 29 Bɔ́kusu gya mu dálí amú
wúluto. Wúlu amu idin busu. Begya mu alu yówie wúlu
amu ɔ́nɔ́, bee abuwuta mu wa tsonkolito. 30 Yesu lénatí tsun
amótó yó ɔ́tínéá ɔ́yɔ́.

Yesu Ōṣe Laláhe Gyáa

(Marko 1:21-28)

31 Inu Yesu lékplí yó Kapernaum, Galilea wúlu kuto. Olosuná amú ató amú ofiakpa ɔkpúnú ɔdaké. 32 Mu atosunáhé lobwie amú ɔnó, tsúfé olosuná amú ató túmisu. 33 Oyin ɔku bu ofiakpa unu, ɔṣe laláhe bu musu. Ɖɔkplón blí ɔbé, 34 “Kí mí! Yesu Nasaretyin, amansu bu ania funyo nsuné? Ntée aní ɔhíkpa febá lóó? Nyin ɔhá oduá fúgyi. Fúgyí Bulu Ōha Wankíhé amu ní!”

35 Yesu lókplun wa ɔṣe ámu ɔbé, “Kpa ɔnó bun, afudali mutɔ.” Inu *ɔṣe laláhe amu léfin oyin ámu dá ahá ámutɔ unu, dáli mutɔ. Tɔto mɔbwe mu.

36 Ɖnó lobwie amú féé, befuté aba be, “Amansu ní? Oyin ánfu bu túmi, ɔdekplón wa ɔṣe laláhe, ide mu bu, dáli ahátɔ?” 37 Mu iwí asún leklei wá ɔmá ámu féétɔ.

Alɔpu Tsɔtsɔtsɔ Tsa

(Mateo 8:14-17; Marko 1:29-34)

38 Yesu lédalí Yudafo ofiakpa unu yó Simon wóyítɔ. Ɖɔyo á, owísó lakítá Simon mu sia tsíhé, ɔda kínkíínkín. Bebláa Yesu be, ogyíi mu buale. 39 Yesu lókpukpé tú ɔtsi ámu, ɔkplón wa owísó ámu ɔbé, ikúsu musu. Inunu ulokusu musu, ɔtsi ámu lókusú bwé amú afɔtɔ.

40 Bréá owí deta á, ahá ɔsura amú ahá aní buɔe ilo ɔtsan-ɔtsan lo ba, Yesu lópu ibi dínká amúsú tsá amútɔ okugyíku ilo. 41 Ɖṣe laláhe bu amútɔ akuto. Yesu lókplun wa ɔṣe laláhe amu. Bedali, buɔe okitikíti be, “Fúgyí Bulu mu Bi ámu ní.”

Táme Yesu lówa mbla wá ɔṣe laláhe amu aní bumátɔ, tsúfé buyin aní mgyí *Kristo, (ɔhá amú Bulu ladá mu ofúli amu) ní.

Bulu Asún Ɖkanda Yudafo Ofiakpa

(Marko 1:35-39)

42 Mú ɔyi kehe bake a, Yesu lédalí wúlu amutɔ yó utsétɔ ɔtineku. Ahá bodunká mu alu yótu mu, bokokóli mu be

ománatí sí amú. ⁴³Táme ɔlebláa amú ɔbéé, “Ilehián ání néda *Bulu iwíegýí iwí *asun wankláán ámu ɔkan awúlu atráhe amu ésó. Tsúfé mú ɔbwekpá Bulu lówa mí ní.”

⁴⁴Íni su oleki Yudea ɔmátó féé, dá Bulu asun wankláán amu ɔkan amú ofiakpa.

Yesu Akasípú Gyankpawu Ti

(Mateo 4:18-22; Marko 1:16-20)

Luk

5 ¹Eke ɔku Yesu líí Genesaret paatu^b ɔnó, ahá tsɔtsɔɔtsɔ beba boputá mu ání bónu Bulu asún. ²Olowun nklun anyɔ paatu ámu ɔnó. Aye alepú ámu bakplí yó buɔe amú asawutɔ da. ³Yesu lódu wíé kuleá igyi Simon klétɔ. Múú ɔlebláa Simon ɔbéé, osún mú kpalobí dunka ntsusu. Inu oletsíá mútɔ súná ahá ámu ató.

⁴Bréá ɔɔtɔí tá á, ɔlebláa Simon ɔbéé, “Mlɔpla ɔklun amu ya okluklúkpa, amlɔɔtswi asawu le aye.”



Aye alepú ámu buɔe amú asawutɔ da. (Luka 5:2)

^b 5:1 Genesaret paatu: Mú kén gyí Galilea ɔpu ni.

⁵Mú Simon lébláa mu ɔ́bée, “Owíé, anlóbwe kásíán ígye onyé fée, anuménya tɔtɔ. Táme íniá fée ayó, su nɔ́yɔtswi asawu amu.” ⁶Bréá bɔ́yɔtswi asawu amu a, bele aye tɔɔtɔɔtɔ. Mú su asawu amu lówa tití bi. ⁷lɔ bɔ́bwe ibi tí amú agyómá ayɔ́bá á múú bubu ɔ́klɔn nyɔɔsɔtɔ ámu bée bubétsa amú. Beba betsa amú, bele aye amu búlá nklɔn anyɔ ámu dédééédé, ideklé ɔ́mɛ. ⁸Bréá Simon Petro lówun mú alí á, ɔ́leda akpawunu Yesu ayabitɔ, bláa mu ɔ́bée, “Mí Wíé, mákpukpé mantáa mí! Lakpan ɔ́bwepú ngyi.”

⁹Tsúfée aye amú balé ámu lɔ́wa mu mu aba ámu wánwan. ¹⁰Alí kén ulɔ́wa Sebedeo abí Yakobo mu Yohane, bugyi Simon agyómá ayɔ́bá ámu é wánwan ní.

Mú Yesu lébláa Simon ɔ́bée, “Mánya ifú! Tsú nde púya a, anyánkpúsa féele.” ¹¹Simon mu mu aba ámu benya plá nklɔn amu besi otsubúno alí, besi tógyítɔ tswi, kplá buo Yesu.

Uo Pepe ɔ́lɔpú ɔ́ku Tsa (Mateo 8:1-4; Marko 1:40-45)

¹²Èke ɔ́ku Yesu bu wúlu kusu, *ulɔ pepe ɔ́lɔpú ɔ́ku lówun mu. lɔ ɔ́lebedá akpawunu, pú ɔ́sukpi yi ɔ́sulɔtɔ, kókóli mu ɔ́bée, “Owíé, ní fótɔsulá á, fétalí há mí iwí béplí.”

¹³Yesu létinkí ibi da mu, bláa mu ɔ́bée, “Natsúlá, fú iwí ɔ́plí.” lɔnɔ ulɔ ámu léɔa le mu iwí. ¹⁴lɔ Yesu léda mu ɔ́lɔ ɔ́bée, “Mábla ɔ́haa. Natí laa afɔpu fú iwí yosuná Bulu igyí ɔ́hapú, afɔha mu iwígyurátɔ amúú Mose mbla losuná tsú ulɔ pepetsa iwí ámu. Igyi adánsɔ suna ahá ání fú iwí laplí.”

¹⁵Táme Yesu iwí asún létrá kleí yó ntíné dínká mú sú. ɔ́ɔm beba mu atosunáhé onukpá, ɔ́tsa amú́tɔ alɔpu é ulɔ. ¹⁶Táme oletsiá dáli amú́tɔ bré ku yó *dimbísú ɔ́tneku mu nkule yó́bɔ mpái.

Tsukule Osínpu Tsa (Mateo 9:1-8; Marko 2:1-12)

¹⁷Èke ɔ́ku Yesu dé ató suná. *Farisifo, Mose *mbla asunápú akvá botsú Galilea pú Yudea ɔ́mátɔ pú Yerusalem beba

betsiá asi unv. Bulu túmi bu Yesuto há ulotsa. ¹⁸Unv á, ayin aku bɔsurá tsukule osínpu akpasu ba. Bekleá bópu mu wíé wóyító, pú mu tswi Yesu ansító. ¹⁹Ɖɔɔm amu su bumenya ɔkpa. Inu su bɔyɔɔdu obu ámu awunso, dá mú ɔtɔneku tíí, beklíá akpa amu tswi ahá ámuɔ Yesu ansító unv. ²⁰Bréá Yesu lówun ání bahɔ mu gyi a, ɔlebláa tsukule osínpu amu ɔbéé, “Opíó, nasí fú lakpan kíé fú.”

²¹Mose mbla asunápú pú Farisifo ámu beblí wá nwuntu beé, “Ma gyí oyin ánfɔ ɔde abususu blí ánfɔ? Ma ɔbétalí sí lakpan kíé ahá dun Bulu nkule?”

²²Yesu lébi amú agywun. Mú su ɔlefíté amú ɔbéé, “Ntogyi sù mlidé inu odu gywún? ²³Mɔmu lóɔɔn ha blí? ‘Nasí fú lakpan kíé fú.’ lóó, ntée ‘Kusu tsu fú akpa afunati?’ ²⁴Táme ndekléá mlibú ání mí, Nyankpusa-Mu-Bi ánfɔ mbu túmi ɔyí ánfɔɔ sí ahá lakpan kíé amú.” Unv ɔlebláa tsukule osínpu amu ɔbéé, “Nde fú bláa mbée, kusu. Tsu fú akpa afunati yo wóyí!”

²⁵Unv unv unv tsukule osínpu amu lókusú líí amú féé ansító, tsú mu akpa, ɔɔpu ɔkpa ɔyɔ wóyí ɔde Bulu kanfú. ²⁶Ɖnó lobwie ahá ámu féé. Ifú lowie amú féétó, bekanfú Bulu beé, “Nde anlawun ofúla!”

Lewi Ti

(Mateo 9:9-13; Marko 2:13-17)

²⁷Mú ɔma bréá Yesu lédalɔ unv á, olowun *lampóo ɔhópu ɔkuá butetí mu Lewi, tsie mu lampóo ɔhókpa. Yesu lébláa mu ɔbéé, “Bobuo mi.” ²⁸Unv Lewi lókusú, sí mu tógyító ɔmagyáa, yóbuo mu.

²⁹Mú ɔma a, Lewi lótswi ɔpúnú mu wóyító há Yesu. Lampóo ahópu tsɔtsɔtsɔ pú aha bambá é beba ató ámu ogyíkpá. ³⁰Farisifo pú Mose mbla asunápú ání bubu Farisifo ámuɔ befíté Yesu *akasípú amu beé, “Ntogyi sù mla lampóo ahópu pú lakpan abwepú mlidé ibi wa gyi ató, mlidé ntá nú?”

³¹Yesu léle mú ɔnɔ ɔbéé, “Alɔpu léhián ulɔ ɔtsapú, megyí ahá ání twi bu amú ɔnlun. ³²Mmeba aha wankláán ɔtikpá. Mboun lakpan abwepú ɔtikpá neba, ménu bédamlí kluntó.”

Ɖnóklí lwi Ason Futéhé

(Mateo 9:14-17; Marko 2:18-22)

³³Aha aku bebláa Yesu beɛ, “Asú Ɖbɔpú Yohane akasípú butetsiá *klí ɔnó bɔ mpá. Farisifo akasípú é butɔbwé alí, táme fú *akasípú mú budegyí, buđenúu.”

³⁴Yesu léfité amú ɔbéɛ, “Ɖtsi ɔkpáinpú anyawíe béklí ɔnó bréá ɔbu amú wá? Ekekekeke! ³⁵Táme eke ɔku béba ání békpa mu náti sí amú. Alí nke ámutɔ béklí ɔnó ní.”

³⁶Ínu ɔleha amú yébi ɔbéɛ, “Ɖhaa tamapú tati pɔpwe tan tati dada. Ní ɔbwé mú alí á, alayíntá pɔpwe amu, pɔpwe amu pú dada amu ansí é uméekanáa aba. ³⁷Alí kén butamapú nta pɔpwe wá ɔwulú-kpákpá kente wuhétó ní. Nta pɔpwe amu ibófu fá kente amu tsítsá, yíntá kente amu é. ³⁸Ínu su ɔwulú-kpákpá kente pɔpwetɔ búɔpú nta pɔpwe wá. ³⁹Ɖhaa tamafíté nta pɔpwesu bréá alanu dánhe. Tsúfé ɔteblí ɔbéɛ, ‘Ídánhe amu bu alé ðun.’ ”

Ɖkpúnú Ɖdaké Mu Wie

(Mateo 12:1-8; Marko 2:23-28)

6 ¹Yesu mua mu *akasípú ɔɔtsun ayó ndɔ kutɔ *ɔkpúnú ɔdaké. Mu akasípú amu ɔpɔrúun atɔ-abí ámu ku, ɔpɔpusáa mú wí. ²*Farisifo ámu aku befíté amú beɛ, “Ntogyi sù mlíde tɔ́á aní mbla meha ɔkpa ání bubwéɛ ɔkpúnú ɔdaké bwe?”

³Yesu léfité amú ɔbéɛ, “Mlímɔ́kúkla nu tɔ́á Owíe *Dawid lɔ́bwe bréá akún de mua mu abúopu kí? ⁴Olebitíwíé Bulu osúmka yótsu bodobodoá bapúhá Bulu igyí ba, mua mu abúopu amu begyi. Bulu igyí ahapú nkule bele ɔkpa bútegyi alí bodobodo amu.”

⁵Mú Yesu ɔlɔmɔ mu asún ɔnó ɔbéɛ, “Mí, Nyankpusa-Mu-Bi ánti gyí ɔkpúnú ɔdaké mu wie.”

Uɔtsa Ɖkpúnú Ɖdaké

(Mateo 12:9-14; Marko 3:1-6)

⁶Yesu lóyɔ atɔ́ osunákpá Yudafo *offiakpa *ɔkpúnú ɔdaké bámbá. Oyin ɔkuá mu gyɔpɔ ibi lawú bu unu. ⁷Mose *mbla

asunápu pú Farisifo aku bete Yesu ki bee, obétsa ilo okpónú odaké, méni bénya mu iwí asún, púyénatí musu súná ahande. ⁸Yesu yin amú nwuntó asún. Mú su oledbláa oyin ámúú mu ibi kule lawú ámu obée, “Kusu belí amú ansító nfi.” lnu oyin ámu lókusú belí amú ansító. ⁹Múú Yesu lébláa amú obée, “Nde mli futé, nto mbla ámu léha okpa ání abwée okpónú odaké? Yilé lóó, ntée lalahe? Ahóó oha nkpa lóó, ntée amóó mu?” ¹⁰lnu oledamli ki amú féé fiá. Múú oledbláa oyin ámu obée, “Tinkí fú ibi amu.” Olenya tinki ibi amu ali pé, oje lowie mútú.

¹¹Oblí lekítá amú, befíté aba bee, “Nto kóún abéhié bwé Yesu anfi?”

Akasípú Amu Adá

(Mateo 10:1-4; Marko 3:13-19)

¹²Eke oku Yesu lódu yó ibusu yóbo mpái há Bulu tsú onyé yéha oyi kehe. ¹³Mú oyi kehe a, oleti mu akasípú, olele amútú dúanyó, oleti amú mu *sumbí ayópú. ¹⁴Amúgyí, Simon ání oledunká mu Petro mua mu pio Andrea; Yakobo mua Yohane; Filipo, Bartolomeo, ¹⁵Mateo, Toma, Alfeo mu bi Yakobo, Simon ání ogyi iwítsutsiá adunkápú opasuato oha; ¹⁶Yakobo oku mu bi Yuda pú Yuda Iskariot ání olebele Yesu há.

Yesu Atósuná Múa Ilo Tsa

(Mateo 4:23-25)

¹⁷Yesu mua sumbí ayópú ámu beklí tsú ibu ámusu ba osulúv tantasu. Mu abúopu tsotsotsótsó pú odóm kponkponkponkponntiá botsú Yudea omátú, Yerusalem pú opu onó awúlu Tiro múa Sidonsu beba unu. ¹⁸Beba bee bebá bonu mu asun blíhé, otsa amú ilo. Ahá ání *oje laláhe de amú háan é beba, olegya oje laláhe lé amútú. ¹⁹Amú féé bekleá bópu ibi da mu, tsífé oje dedali mutó, oletsa amú féé ilo.

Oyúla Asún

(Mateo 5:1-12)

²⁰Yesu lótsu ansí ki mu akasípú, oledbláa amú obée,

“Bulu layúlá mlhá mlímá tɔtɔ,
tsúfé mlibú mu *iwíegyí amu ni.

21 Bulu layúlá mlhá akún de mli séi,
tsúfé mléba begyi mwe.

Bulu layúlá mlhá mlidésú séi,
tsúfé mléba bɔmɔsí.

22 “Bulu layúlá mlhá bude mli lu, bude mli gyáa le amútɔ,
síá mli, tí mli ɔda laláhe mí, Nyankpusa-Mu-Bi ánfɔ su.

23 Ansí igyí mli eke ámu, amlɔfuli kpayi ansigyísú, tsúfé
mli ɔkɔká tɔɔ ɔsúsú. Alí amú anáin bɔbwe Bulu ɔnɔsú atɔ́pú
amu ni.

24 Táme mli ání mlɔlanyá ɔwɔ séi, mligyɔwɔ ní.
Tsúfé mli ansigyí féé mlɔlanyá á.

25 Mli ání mlɔlamwé séi, mligyɔwɔ ní.
Tsúfé akún béba bekitá mli.

Mli ání mlidémɔsí séi, mligyɔwɔ ní.
Tsúfé mléba begyi awɔrehɔ, su.

26 “Mli ání ahá féé bude mli kanfú, mligyɔwɔ, tsúfé alí mli
anáin bekanfú Bulu ɔnɔsú atɔ́pú afunupu amu é ní.

Alupódwe

(Mateo 5:38-48; 7:12a)

27 “Táme nde mli ání mlónu bláa mbéé, Mludwe mli
alupú, amlɔbwe yilé ha amú. 28 Mliyula ahá ání butɔlwíí
mli, amlɔbɔ mpái ha ahá ání butesíá mli. 29 Ní ɔha ɔdá fú
ɔtɔtɔ a, damli nyɔɔsɔ é ha mu ɔda. Ní ɔku ɔswíí fú tati á,
wɔɔ fú atadɔe é ha mu. 30 Ní ɔku ɔkúlí fú atɔ́ á, ha mu. Ní
ɔku é otsú fú atɔ́ á, máyɔhɔ mú. 31 Bwe ha ahá alíá fudeklé
féé bubwée ha fu.

32 “Ní fú adwepú nkule futɔdwé á, ipán mɔmɔ fénya?
Lakpan abwepú kúrää butɔdwé amú adwepú. 33 Ní ɔhá ání
ɔtɔbwé yilé há fú nkule fúɔtɔbwé yilé há á, ntogyi sù Bulu ɔdáa
fú ipán? Lakpan abwepú é butɔbwé alí. 34 Ní ɔhá ání fuyin
ání obénya há fú nkule futehá ipán a, ntogyi sù Bulu ɔdáa fú
ipán? Lakpan abwepú óó butɔpú atɔ́ pan amú aba, yínkí hɔ mú
alí. 35 Mú su mludwe mli alupú, mlibwe yilé ha amú, mlɔpan

amú ató, mlimáti amú akó, méni Bulu óbéka mli tko tsotsótsó. Fówun mlilabwé Ósósúsú Bulu ámu abí. Tsúfé óbu awitole há há ání ató tamagyi amú ansí pú aha laláhe féé. ³⁶Mlibwe nwe awúnpu fé alá mli Sí Bulu gyí nwe owúnpu.

Ulále

(Mateo 7:1-5)

Luk

³⁷“Mlumále ahá ulá, méni Bulu méele mli ulá. Mlumáha óhaa ipón, méni Bulu é ómééha mli pón. Mlisi mli aba ulá kie amú, Bulu osi mli klé kie mli. ³⁸Mliha ahá tóá de amú hián, Bulu óbélahá mli. Óbópu ato susúhe wankláán wá mú, wúsúw mú, sílá mú, íbóbulá tsítsá há mli. Tsúfé tóá fópúsúsu ha fú bá á, mú kén Bulu óbópusúsu ha fu ní.”

³⁹Yesu létrá ha amú yébi óbéé, “Nsibi obwiepú óbétalí kpá nsibi obwiepú? Amú féé buméekpa wíé óbótó? ⁴⁰Ókasípú tamadon mu wie, táme ókasípú ókásí bí á, ótóbwé fé mu wie.

⁴¹“Ntogyi sù fúde ipí tókúrííbi wúun fú bá nsíbisu, táme fumedé ogyakpatín ání idun fú klésu mú wúun? ⁴²Ntéé ntogyi sù fúde fú bá bláa fee, ‘Mí píó, ha mí andunkí ipí fú nsíbisu’, táme fumedé ogyakpatín ání idun fú klésu mú wun? Apinabwebí óbwepú, gyankpa dunki ogyakpatín ámu fú nsíbisu, méni fówun ató wankláán, tálí dínkí ipí ámu fú bá klésu.

Oyí Pú Mú Abi Swiehé

(Mateo 7:6-20; 12:33-35)

⁴³“Oyi wankláán méetalí swíé abi laláhe. Alí kén oyi laláhe é méetalí swíé abi wankláán ní. ⁴⁴Tsúfé oyí-íbí butópúbí mú. Butamakpótí kankaba okplóto oyísú, butamakpótí tsókpun é tunkpa iflasu. ⁴⁵Óha wankláán telé tsiátó wankláán ówan tsú mu klwntó, óha laláhe é telé tsiátó laláhe ówan tsú mu klwntó. Tsúfé tóá idun óha klun a, mótédálí tsu mu ówó.

Butású pú Osublúto Obuyíi

(Mateo 7:24-27)

⁴⁶“Ntogyi sù mludé mí ti mlíaa, ‘Mí Wíé! Mí Wíé!’ táme mlutamagyi mí asun blíhésv? ⁴⁷Nósuná mli alá óhá ání

ɔleba mí wá bonu mí asún, gyi dunká músú gyí. ⁴⁸Ogyi fé ɔhá ání ɔbá beyi obu á, olegyankpá kwí mú ntswiasí ɔbó yótu butá, ɔlɔwa ntswiasí ámu dínká músú. Bréá ntsu lɔbulá kítá mú á, umetalí kpínkí obu ámu, tsúfé oleyi mú wankláán. ⁴⁹Táme ɔhagyíɔha ání olonu mí asun blíhé, omegyí músú gyí fé ɔhá ání oleyi mu obu ɔsulúsu keke, ɔmɔwa mú ntswiasí. Bréá ntsu lɔbulá wa mú á, ilobwie dá gbloo ununu, yíntá féé!”

Romafɔ Isá Akɔpú ɔhande Osúmpú ɔku Ilo Tsa

(Mateo 8:5-13; Yohane 4:43-54)

7 ¹Bréá Yesu lébláa ahá ámu asún ánfí féé tá á, ɔlɔyɔ Kapernaum wúluto. ²Romafɔ isá akɔpú ɔhande ɔku bu unu. ɔbu osúmpú ɔkuá ɔtehié kle mu asún. Osúmpú amu délɔ, odeklé owu. ³Bréá isá akɔpú ɔhande amu lónu Yesu nka á, ɔlɔwa *Yudafɔ ahande aku sísí Yesu ɔbéɛ, buyókokóli mu ɔbetsa mu osúmpú amu ilo ha mu. ⁴Ahande amu behie kókóli Yesu beɛ, “Abwíí ipa, ní ɔku léhián fú mbua á, múmú oyin ánfí ní! ⁵Tsúfé ɔɔdwé aní pi. Muléyi aní *ofiakpa kúráá há aní ní.”

⁶Mú su Yesu mua amúnɔyɔ bɔpu ɔkpa. Bréá beta wóyí ámutɔ wie tá á, isá akɔpú ɔhande amu lówa mu anyawíe ɔbéɛ buyéfiá Yesu, abubla mu beɛ, mbéɛ, “Owíé! Máhan fú iwí, tsúfé mmɔfun ání féba mí wóyítɔ. ⁷Nawun ání mí é mmɔfun ání néba fú wá. Fú mú bli asvanku, iwí bɔwa mí osúmpú amu ɔnlɔn. ⁸Tsúfé mí é mbu ahande aku asi. Isá akɔpú aku é bubu mí asi. Nelé ɔnɔ mbéɛ amútɔ ɔku ɔnátí á, ɔtenátí. Ní mbéɛ ɔbá é á, ɔteba. Tógyítɔá nebláa mí osúmpú mbéɛ ɔbwéɛ á, ɔɔbwé.”

⁹Bréá Yesu lónu asún ánfí á, ɔnɔ lobwie mu, ɔledamlí bláa ɔɔɔm amúú bubuo mu amu ɔbéɛ, “Ɔnɔkwali asún, nde mli bláa, mmɔkúwun ɔhá ání ɔbu hógyi kpɔnkpɔnti ánfí odu Israelfɔtɔ kúráá kú!”

¹⁰Bréá abɔpu amúú isá akɔpú ɔhande amu lówa ámu beyínkí yó wóyítɔ a, bowun ání osúmpú amu iwí lawá mu ɔnlɔn.

Ɔsvrapu Ɔku Mu Bi Tsinkí

11 Ɔmowa ɔpá kuku Yesu lóyɔ Nain wúluto. Ɔdom bubuo muva mu *akasípú. 12 Bréá olowie wúlu ɔnɔ á, ɔɔtu aku, busun fúli akpasu bebá. Obi yinhé ɔkule pé ogyi há ɔsvrapu ɔku. Ɔdom kpɔnkpɔnkpɔntiá botsú wúlu amuto é bubuo ɔtsi ámu. 13 Bréá anu Wíe lówun ɔtsi ámu a, mu asún ɔwa mu nwe, ɔlebláa mu ɔbéé, “Másu!” 14 Múú ɔɔyɔpɔ ibi da akpa amu, asvrápú amu besi lí. Inu ɔlebláa fúli amu ɔbéé, “Ɔyasubi, nde fú bláa mbéé, kusu!” 15 Inu fúli amu lókusu tsíá, wá tɔí bi. Yesu lópu mu wá mu yin ibito.

Luk

16 Ifú lekutá ahá ámu féé, bekanfú Bulu beé, “Bulu labɔbúá mu ahá! Mu ɔnɔsú ɔtɔpú kpɔnkpɔnti ɔku lalin anuto!”

17 Yesu iwí asún ánfí lekí wá Yudea ɔmá pú awúlu ání ibi nsiné unu féétó.

Yesu Mva Asú Ɔbɔpú Yohane

(Mateo 11:2-19)

18 Asú Ɔbɔpú Yohane akasípú beyébláa mu asún ánfí féé. Mú su ɔɔwa amúts abanyɔ sísí Yesu ɔbéé, 19 buyéfité mu beé, “Fúgyí ɔhá ámuú ɔbéba amu ni, ntée akí ɔha bambá ɔkpa?”

20 Bréá ahá ámu beba bowie Yesu wá á, bebláa mu beé, “Asú Ɔbɔpú Yohane ɔbéé abéfité fú aniaa, ‘Fúgyí ɔhá ámuú ɔbéba amu ni, ntée akí ɔha bambá ɔkpa?’ ”

21 Yesu létsa ɔɔpu pú ahá ání iwí dé amú ɔsun tsɔtsɔtsɔ ali bré ámu. Olegya *ɔɔe laláhe lé aháto, bwíí ansibi abwiepú tsɔtsɔtsɔ é ansíbi. 22 Inu ɔlele Yohane akasípú asún ámu ɔnɔ ɔbéé, “Miyinki yebláa Yohane tɔá mlɔlabowun pú múa mlɔlabonu. Mlɔlabowun ání ansibi abwiepú bude atɔ wúun, abɔ buna. *Inu pepe ɔɔpú iwí deplí, isu atínpu bude asún nu. Afúli budetsinkí, ahiánfɔ é bude asun wankláán ámu nu. 23 Bulu obóyulá ɔhá ání mí bwehé mɔkusu líí musu.”

24 Bréá abí ámuú Yohane lówa sumbí ámu beyinkí ɔyɔ á, Yesu lówa tɔí tsú Yohane iwí súná ɔdom amu bi. Ɔbéé, “Bréá mlɔlédalɔ yɔ dimbísú unu á, ntu ɔkíkpa mlɔlɔyɔ? Fítáa ání afú de mú tsúun lóó? Ekekeke! 25 Ní megyí mú á, ntu

kóun ɔ́kíkpa mlílóyɔ? Dhá ání ɔ́dídí ntsrim. Ekekeeke! Ahá ání butedídá tati ámu odu gyi ɔ́dwe á, awíe wóyí butetsiá. 26Mhíbla mi! Bulu ɔ́nósú ɔ́tɔ́pú mlilédali yéki? Ee, Yohane ni. Ɔ́dɔn Bulu ɔ́nósú ɔ́tɔ́pú. 27Mu iwɪ asún Bulu léblí ɔ́wanlín mú tswɪ bɛɛ, ‘Kɪ, nde obí wa gya fu nkpá. Mu ɔ́bɛla ɔ́kpa há fú ní.’ ” 28Yesu lóyɔ mu asónsú ɔ́bɛɛ, “Nde mli bláa mbɛɛ, ɔ́hagyíɔ́ha ání ɔ́ha tshé laken kwí mófɔn mu, táme mu é ɔ́mɔ́fɔn *Bulu iwíegyí ámutɔ ɔ́kusv kúráá.”

29Aha ání bonu Yesu asún ánfɪ pú *lampóo ahópu kúráá bowun ání Bulu asún da ɔ́kpa. Botsulá há Asú Ɔ́ɔ́pú Yohane lóɔ́ amú *asú. 30Táme *Farisiɔ́ pú Mose mbla asunápú amu mú bumeha Yohane ɔ́ɔ́ amú asú. Bekiná tɔ́á Bulu léhúhíe ha amú bwɛ.

31Yesu lóyɔ mu asónsú ɔ́bɛɛ, “Séi ánfɪ á, amendu nópukápú ndemba-abí ánfɪ? Ntɔ belan? 32Bɔgyi fé nyebíá butsie dɪnsu buɔɔ aba kpólí, blí bɛɛ, ‘Anulapléí ansigyísú, mlímétsa. Mú sv anulawá awírehɔ́ ulu, táme mlímósú.’ 33Mhígyí fé nyebí ánfɪ, tsúfé Yohane léba á, oletsíá klí ɔ́nɔ́, omonu ntá, táme mlaa, ‘Ɔ́ɔ́e laláhe bu mutɔ!’ 34Mí, Nyankpusa-Mu-Bi ánfɪ mú naba nde atɔ́ gyí, nde ntá núu. Mú é mlaa, ‘Mlíki opotsuapu pú nta ɔ́ɔ́pú. Lakpan abwepú pú lampóo ahópu onyawíe.’ 35Táme ɔ́há ání ɔ́bu Bulu nyánsa á, mu tsíátɔ́ telé mú ɔ́wan.”

Ɔ́tsɪ Lakpan Ɔ́bwepú Ɔ́ku

36Farisiyin ɔ́ku létɪ Yesu atɔ́ ogyíkpá mu wóyítɔ́. Bréá Yesu tsie ɔ́púnú ámu asi á, 37ɔ́tsɪ ɔ́kuá ɔ́bu wúlu amutɔ, ogyi lakpan ɔ́bwepú lónu Yesu nka ání batswɪ ɔ́púnú há mu Farisiyin amu wóyítɔ́. Inu olotsu mu ofobí fánfán ání ibu bíá prentua wankláán ɔ́ɔ́ ba inu. 38Ɔ́lebɛda akpawunu Yesu ayabiasɪ, ɔ́lekpa isú yi woo. Ɔ́ɔ́pu mu ntsú fwí Yesu ayabiasɪ, pú mu nwunsu-imi tsítsi mú. Ɔ́ɔ́kulá Yesu ayabi pútá, tséí ofobí fánfán ámu wúlí mu ayabisu. 39Bréá Farisiyin amú ɔ́letɪ Yesu amu lówun ínɪ á, ɔ́leblí wá nwuntɔ ɔ́bɛɛ, “Ní Bulu ɔ́nósú ɔ́tɔ́pú oyin ánfɪ gyí lélé á, tekɪ alawun ɔ́há oduá ɔ́tsɪ ánfɪ gyí asa ɔ́ɔ́pɔ́ ɪbɪ da mu, tsúfé lakpan ɔ́bwepú ogyi.”

40Yesu lébláa oyin ámu ɔ́bɛɛ, “Simon, mbu asvanku bláa fu.”

Simon léfíté mu ɔ́bée, “Osunápú, amansu igyi? Bla mi.”

41 Yesu lébláa mu ɔ́bée, “Ahá abanyó aku bepan sika oyin ɔ́ku wá. Ɔ́kule lépan bliba-anu (5,000,000), ɔ́kule é lépan mpím lafanu (500,000).^c 42 Bumenyá kóba amu ká. Mú su oyin ámu lésikíé amú abanyó féé. Bla mi, amúts ɔ́mɔ́m ɔ́bódwe oyin ámu dun?”

Luk

43 Simon lébláa mu ɔ́bée, “Nahogyiá ɔ́mɔ́múú mu ɔ́kɔ́ tso dun amu.”

Yesu lébláa mu ɔ́bée, “Ɖɔ́kwalɔ́ igyi.” 44 Inu Yesu léyinkí kɔ́ ɔ́tsi ámu, ɔ́lébláa Simon ɔ́bée, “Fawun ɔ́tsi ánfɔ́? Nɛ́ba fú wóyító a, fɔ́mɛ́ha mí ntsu anfwɔ́ ayabiasɔ́. Táme ɔ́tsi ánfɔ́ mú lapú mu ntsú fwí mí ayabiasɔ́, pú mu nwunsu-imi tsítisi mú. 45 Fumelatá mí pútá, táme tsú bréá nɛ́ba nfi ɔ́pá á, ɔ́tsi ánfɔ́ mókúsí mí ayabi kulá pútá. 46 Fumetséi ofobí wólí mí nwuntɔ́, táme mu mú alatséi ofobí fánfán wólí mí ayabisu. 47 Mú su nde fú bláa mbée, ɔ́dwe tsɔ́tsɔ́tsɔ́ ánfɔ́ alalé súná mí ánfɔ́ idesuná ání Bulu lasí mu lakpan tsɔ́tsɔ́tsɔ́ ámu féé kíé mu. Táme ɔ́há ání Bulu osíi lakpan kpalobí kíé á, ɔ́dwe kpalobí ɔ́telé súná.”

48 Inu Yesu lébláa ɔ́tsi ámu ɔ́bée, “Nasí fú lakpan féé kíé fú.”

49 Ahá ámúú amúá Yesu butsie ɔ́púnúasi ámu, beblí wá nwuntɔ́ beɛ, “Ma gyí oyin ánfɔ́ ɔ́bée muna mude ahá lakpan sikíé amú.”

50 Múú Yesu lébláa ɔ́tsi ámu ɔ́bée, “Fú hógyi laho fu nkpa. Nati iwilwiitɔ́.”

Atsɔ́ Bobuo Yesu

8 1-2 Inu ɔ́pá kuku, Yesu léki awúlu múa nkuda asi, ɔ́de *Bulu iwíegyí ámu iwɔ́ asun wankláán ɔ́kan da. Mu akasípú dúanyɔ́ ámu pú atsɔ́ akvá olegya *ɔ́nye laláhe lé amúts, tsá amú ɔ́ bobuo mu. Atsɔ́ ámu gyí, Magdalayintse *Maria ání Yesu légya ɔ́nye laláhe asienó lé mutɔ́. 3 Owíe

^c 7:41 Sika ánfɔ́ igyi sika futútú lafanu (500) múa aduenu (50), igyi ɔ́ha nke lafanu (500) múa aduenu (50) ikóká.

*Herode wóyísú ɔkípú Kusa mu ka Yohana. Ɔtsi ɔkwá butetí mu Susana pú atsi tsɔtsɔɔtsɔá betsiá pú amú ató kɪ Yesu muva mu akasípúsu.

Ató-abí Owunyápu Iwɪ Yébi

(Mateo 13:1-9; Marko 4:1-9)

4Bréá ɔɔɔm kpɔnkpɔɔnkpɔntɪ botsu awúlu-awúlusu ba befia Yesu wá á, ɔleha amú yébi ɔbéé,

5“Ɔɔɔɔɔpu ɔku lóyo ató-abí owunyákpa. Bréá ɔde mú wunyáa a, iku lówulí ɔkpatɔ, ahá betsatsáa músú, mbubwi é bɔtswetswéé mú f́f́é. 6Iku lówulí abutású, ɔtínéá usi kpalobí dɪn. Uɔwa ɔsa kwe, táme bréá owí lelun a, ulɔɔ mú ḿ, tsífé imenya ntsu. 7Abí ámu ku lówulí awutɔ, awu ámu ɔɔbulá kítá mú, umedan. 8Abí ámu ku lówulí ɔsulúw wankláánsú, dan. Iloswie abí tsɔtsɔɔtsɔ f́é mú ámú olodu ámu odu tsé lafa.”

Yesu lómɔ mu asún ɔnɔ ɔbéé, “Ɔhá ání ɔbu asu onúu.”

Tsá Svá Yesu Lótɔí Ayébisu

(Mateo 13:10-17; Marko 4:10-12)

9Yesu akasípú befité mu yébi anfi asi. 10Ɔlebláa amú ɔbéé, “Bulu lahá mlɪ ɔkpa ɔbéé, mlíbú mu *iwíegyí ámu iwɪ asun ŋáinhé. Táme nde aha bambá asún bláa ayébisu, méni bówun, táme buméebi. Bónu, táme bumóonu mú asi.

Ató-abí Owunyápu Yébi Amu Asu

(Mateo 13:18-23; Marko 4:13-20)

11“Yébi amu asi ní. Ató-abí ámu gyí Bulu asún. 12Abí ámú ulówulí ɔkpatɔ ámu gyí ahá ání butonú asún ámu, táme Ɔbunsám teba bele mú lé amú kluntɔ, méni bumóɔho músú gyi, fówun bénya nkpa ání utamatá. 13Abí ámú ulówulí abutású amu gyí ahá ámú bonú asún ámu pé, baho mú ansigyísú, táme buma nlín. Mú su butamahogyi wa ɔpá. Ní isókɪ ku inyá tú amú pé, badɪda. 14Abí ámú ulówulí awutɔ ámu gyí ahá ání bonú asún ámu a, baho mú, táme ɔyí ánfutɔ atɔ hiánhe iwɪ gywúɪn, pú mótɔ atonyahé iwɪ ansigyí

tegyi asún ámusu. Íni su butamaswié abí dan. ¹⁵Abí ámúú ulowulí ɔsulúw wankláánsú ámu gyí ahá ámúú bonú asún ámu a, butɔhɔ mu wá klun wankláán ání itonú asún, gyi músútú. Íni su butotomi swié abí tsɔtsɔɔtsɔ.

Ɔkandíe lwi Yébi

(Marko 4:21-25)

Luk

¹⁶“Ɖhaa tamanywé ɔkandíe pú ató bun músú, ntée púwá mpá ayasi. Ɖfóákpá ɔtɔpúbian, méni ibówankí há ahá ání béba wóyí ámutɔ.

¹⁷“Tsúfé tɔtɔ má unvá ibéɲáin, uméelun ɔwan. Asun ɲáinhé kuku é ma unvá buméebi mú.

¹⁸“Mluku wankláán mli asún-nutú. Tsúfé ɔhá ání odekléá obónu mí atosunáhé amu asi á, Bulu ɔbópu iku tsía mótú há mu. Táme ɔhá ání omedékléá obónu mú asi á, Bulu ɔbóswi mu kpalóbí ámúú olosusúu ání alabí ámu kúráá.”

Yesu Abusuanfɔ Onutó

(Mateo 12:46-50; Marko 3:31-35)

¹⁹Yesu mu yin mua mu apíó beba mu wá, táme ɔɔɔm amu su bumetalí wíé ba mu wá. ²⁰Ahá ámutɔ ɔku lébláa Yesu ɔbéé, “Fú yín mua fú apíó bulú kpankpá, budekléá bówun fu.”

²¹Yesu lébláa amú ɔbéé, “Mí yín mua mí apíó gyí ahá ání butonú Bulu asún ámu, gyi músú.”

Atsufú Asibá

(Mateo 8:23-27; Marko 4:35-41)

²²Eke ɔku Yesu lébláa mu akasípú ɔbéé, “Mliha afa Galilea ɔpu yɔ mú ɔbin.” Mú su ɔɔpu ɔkpa ɔɔyú. ²³Bréá ɔyú á, Yesu lédidi. Inu afú kɔnɔkɔnɔkɔnɔnti ku lówa tsúun bi. Ntsu ámu ideda wíé ɔklun amutɔ, ideklé me. Uɔtu amú ansí pepe. ²⁴Mú su betsinkí Yesu, bláa mu beé, “Ani Wíé! Anidé ntsu wie!”

Yesu lókusú lé ɔnɔ wa afú múa ntsu ámu, unu fée lɔlɔ. ²⁵Inu ɔlefíté amú ɔbéé, “Mli hógyi me?”

Ifú lekítá amú, ɔ́nɔ́ lobwie amú, befuté aba bee, “Nyankpusa ɔ́mɔ́mɔ́ nɛ, alalé ɔ́nɔ́ wa afú múa ntsu kúraá, banú mu ɔ́me ali?”

Ɖɛ Laláɛ Gyáa Le Ogbedéputó

(Mateo 8:28-34; Marko 5:1-20)

26 Yesu mua mu akasípú befa ɔ́pu tsú Galilea yówie Gerasefo^d ɔ́sulósu. 27 Bréá Yesu dédalɛ ɔ́klɔn amuto á, oyin ɔ́kúá otsú wúlu amuto, ɔ́ɛ laláɛ bu muto lébefia mu. Oyin ánfɛ lékpa ató, tú dálɛ wóyító, yó otsie afúli opulákpa ulawá ɔ́pá. 28 Bréá olowun Yesu a, ɔ́lɔsurá okitikíti, dá akpawunu Yesu ayabito, kplón bí ɔ́béɛ, “Ɖsúsúsú Bulu mu Bi Yesu, amansu igyi? Kókoli, máputí mí ató.” 29 Ali bré ámuto á, Yesu lakplón wa ɔ́ɛ laláɛ amu ɔ́béɛ, idálɛ muto dodo. Mú su oyin ámu léblí ali ní. Ɖɛ laláɛ amu itowíé muto brégyíbré. Mú su butowá mu ibi pú mu ayabi ikan, gyo mu iwɛ. Mú óó á, otebíá ikan amu, ɔ́ɛ laláɛ amu itehá mu ɔ́tesrí wíé aputu.

30 Inu Yesu léfuté mu ɔ́béɛ, “Nkálɛ butetí fú?”

Oyin ámu lélé mú ɔ́nɔ́ ɔ́béɛ, “Mí dá gyí ‘Ɖɔ́m.’ ” Tsúfé ɔ́ɛ laláɛ tsɔ́tsɔ́tsɔ́ bu muto. 31 Ɖɛ laláɛ amu bokokóli Yesu ɔ́béɛ, ɔ́mágya amú yówa ulán klúklúúklúá uma ɔ́kato.^e

32 Mprákuo tsɔ́tsɔ́tsɔ́ aku budegýí okúku kusɛ unu fún. Mú su ɔ́ɛ laláɛ amu bokokóli Yesu bee, ɔ́há abuyowie mprákuo ámuto. Ɖleha amú ɔ́kpa ɔ́béɛ buyó. 33 Inunu bedalu oyin ámuto yówie mprákuo ámuto, amú féé besrí kpáklí okúku amu wíé ɔ́puto, wúwu.

34 Bréá mprákuo akpapú ámu bowun tóá ulaba a, besrí yéblí asún ánfɛ wúluto pú ɔ́má ámuto. 35 Inu ahá beba beki tóá ulaba. Bowun ání oyin ámú tekɛ ɔ́ɛ laláɛ bubu muto ámu ansító ladí, alawá atadie otsie Yesu wá. Ulawa amú ifú. 36 Ahá ámú bowun itó ámú ulaba amu bebláa amú alá oyín ámú ɔ́ɛ laláɛ bubu muto ámu lénya mu ulotsá. 37 Ɖmá ámuto ahá féé bokokóli Yesu bee, ɔ́dálɛ amú ɔ́mátó, tsúfé ifú lehɛ kíta

^d8:26 Gadarafɔ́ bu nwuló dada amu akuto. ^e8:31 ulán klúklúúklúá uma ɔ́ka gyí ɔ́ɛ laláɛ isɛ ɔ́bitíkpa.

ámú. Mú su Yesu lówie ɔklun amuto ɔbéé amvnatí. ³⁸Oyin á múbú tekí ɔɲe laláhe tsie mutɔ ámu lókokóli mu ɔbéé, “Ha mí ambuo fu yɔ.” Táme Yesu méha mu ɔkpa.

³⁹Mboún ɔlebláa mu ɔbéé, “Yinki yɔ wóyí, afuyebháa mli pi toyiléá Bulu labwé há fú.”

Mú su oyin ámu léki wúlu amu fée fíá, ɔde toyilé á múbú Yesu labwé há mu amu blí wúlu amuto fée.

ɔhande ɔku Mu Bi Mva ɔtsi ɔku ɔlo Tsa

(Mateo 9:18-26; Marko 5:21-43)

⁴⁰Bréá Yesu léyinkí yówie ɔpu amu ɔbun a, ɔɔm boho mu atúu, tsúfé bude mu ɔkpa kú. ⁴¹lno oyin ɔkúá butetí mu Yairo, ogyi Yudafo *ofiakpa ɔhande léba beda akpawunu mu ayabito, kókóli mu ɔbéé, ɔbá abuyo mu wóyít. ⁴²Mu bi tsíhé ɔkule péá ɔbu, alaho ní dúanyɔ da odewu.

Bréá Yesu lópu ɔyɔ unu á, ɔɔm amúbú bubuo mu amu bekpá buo mu ye. ⁴³ɔtsi ɔkúá obugya de mu wulí ní dúanyɔ ní, ɔhaa mókótálí tsá mu, alayíntá mú iwísu ató fée ɔlo atsapú ibito bu ahá ámutɔ. ⁴⁴ɔtsi ánfí lótsun yɔ Yesu ɔma, pú ibi da mu tati osiebí. lnuvnu obugya amu leka itin. ⁴⁵Múbú Yesu léfíté ɔbéé “Ma lápú ibi da mi?”

Bréá ahá ámu fée be ɔmɔkúpú ibi da mu a, Petro léfíté Yesu ɔbéé, “Mí Wíé, ɔɔm anfi bupu fú ánfí á, mú fúde asún ánfí fíté?”

⁴⁶Táme Yesu léblí ɔbéé, “ɔku lapú ibi da mi. Nawun ání ɔɲé ku ladáli mitɔ.” ⁴⁷Bréá ɔtsi ámu lówun ání itó á múbú mabwé ámu lalin ɔwan á, ɔledali ba. ɔdekpinkí kpakpakpa, ɔleyéda akpawunu Yesu ayabito, bláa mu ahá ámu fée ansító tóá svá mɔpu ibi da mu, pú alá manyá ɔlɔtsá. ⁴⁸lno Yesu lébláa mu ɔbéé, “Mí bí, fú hógyi latsá fú ɔlo. Nati iwilwiiti.”

⁴⁹Bréá Yesu bu mu tóí anfisú á, ɔku lésrí tsú Yairo wóyít ba bebláa Yairo ɔbéé, “Fú bí ámu ɔdikpa mɔwa alé. Mátepi trá wa osunápú tóí.”

⁵⁰Bréá Yesu lónu asún ánfí á, ɔlebláa Yairo ɔbéé, “Mánya ifú. Fú mú hogyi wule, obénya nkpa.”

⁵¹Bréá Yesu lówie wóyító unu á, ɔmeha ɔhaa obuo mu yɔ obuá kebi ámu da mútɔ́, dun Petro, Yohane, Yakobo pú kebi ámu akwúpú. ⁵²Alí bré ámutɔ́ á, ahá ámu féé budesú, bude okitikíti. Yesu lébláa amú ɔbée, “Mlusi okitikíti surá. Ɖmɔkúwú, didí ɔde.”

⁵³Ahá ámu féé buyin ání otsibi amu lawú. Mú su bɔmɔsí Yesu. ⁵⁴Unu Yesu lékitá otsibi amu ibi, kpólí mu ɔbée, “Obí, kusu!” ⁵⁵Ɖɔ́ɔ́ é lelawíé mu, ɔɔkusu líí ɔtsáwule pé. Mú Yesu lébláa amú ɔbée, “Mludunka tɔku ha mu ogyi.” ⁵⁶Ɖnɔ́ lobwie otsibi amu akwúpú, táme Yesu léda amú ɔlá ɔbée, “Mlumábláa ɔhaa asún ání.”

Akasípú Dúanyɔ́ Ámu Sumbíwa

(Mateo 10:5-15; Marko 6:7-13)

9 ¹Yesu létí akasípú dúanyɔ́ ámu fia, ɔleha amú túmi, há amú ɔkpa ɔbée, buyáa *ɔɔɔ leláhe féé, abutsa ulɔ. ²Ɖɔ́ɔ́wa amú ɔbée, buyéda Bulu iwíegyi ámu ɔkan, abutsa alɔpu. ³Ɖlebláa amú ɔbée, “Ní mlɔyɔ́ á, mlumátsu tɔtɔ. Mlumátsu oyi yiáhé, akpankogyo, atogyihe, kɔ́ba ntée atadi nyɔɔsi. ⁴Wóyigyíwóyítá bɔ́hɔ́ mli á, mlitsia unu yɔ́fun ekeá mlédali wúlu amutɔ́. ⁵Ní bumɔhɔ́ mli wúlu kusu, mlidédali mlɔyɔ́ á, mlɔkpa mli ayabitɔ́-isi wuli wúlu amutɔ́, isuna ání bumebu bwé.”

⁶Benatí kí nsiné unu awúlu féésú, bude asun wankláán ámu ɔkan da, tsá ulɔ.

Herode Légyigyáa

(Mateo 14:1-12; Marko 6:14-29)

⁷Bréá Galilea ɔmá sú ogyípú *Herode lónu tɔ́a ide mósú yɔ́ á, olegyigyáa. Tsúfé aku budebli beɔ, “Asú Ɖɔ́ɔ́pú Yohane lakúsú tsú afúlito.” ⁸Aku é beɔ, “Bulu ɔnɔ́sú ɔtɔ́pú dada *Elia lálé iwɔ ɔwan.” Aku é beɔ, “Bulu ɔnɔ́sú ɔtɔ́pú dada amutɔ́ ɔku lakúsú tsú afúlito.” ⁹Herode lébli ɔbée, “Nahá batɔ́n Yohane. Ngya oyin ɔmɔmu iwɔ asún ntráa ndenu alí?” Mú su ɔɔɔ mbódí ání mówun Yesu.

Ahá Mpím-nu Atogyihe Ha

(Mateo 14:13-21; Marko 6:30-44; Yohane 6:1-14)

10 Yesu *sumbí ayɔpú amu beyinkí bá bebláa mu tʒá bayɔbwe. Ɔlekpa amú buo iwɪ, amú nkule bɔyɔ Betsaida wúluto. 11 Bréá ɔɔm amu bebi ání ɔbu unu á, begya mu ɔkpa yɔ unu. Yesu lɔhɔ amú atúu, ɔlebláa amú Bulu iwíegyi amu iwɪ asún, ɔletsa amúá budelo.

12 Bréá owí depɔɔn a, sumbí ayɔpú dúanyɔ ámu beba bebláa Yesu beɛ, “Ha amú abunati, méni bétalí yɔ awúlu ání ibu mantáa nɔfɔsú yóduká atogyihe múa ɔɔkpa, tsúfé anuméenya tɔtɔ há amú dimbí ánfuto.”

13 Táme Yesu léle mú ɔnɔ ɔbéɛ, “Mludunka atɔ ha amú abugyi.”

Akasípú amu bebláa mu beɛ, “Tʒá anɔbu féé gyí bodobodo apin anu pú ntsutso iye bwáhé anyɔ. Nkétɪ anɔlayɔhɔ atogyihe ba ahá ánfɪ féé.” 14 (Ayin ání bubu unu ɔɔbwe fé mpím-nu (5,000).)

Yesu lébláa akasípú amu ɔbéɛ, “Mliha amú abutsia okútɔ. Iku kule ibwéɛ fé ahá aduenu (50).”

15 Akasípú amu ɔɔbwe dínká músú, ɔhagyíɔha létsiá asɪ. 16 Inu olotsu bodobodo anu pú ntsutso iye bwáhé anyɔ ámu. Inu olotsu ansí fúá kí ɔsúsú, ɔleda Bulu ipán. Múú olebiabía mútɔ púhá akasípú amu ɔbéɛ, buyée mú ha ahá ámu féé abugyi. 17 Amu féé begyi mwe sian. Bréá akasípú amu ɔtɔsɪ isianhe amu a, ɔɔbulá alakpá dúanyɔ.

Ɔhá Ání Yesu Gyí

(Mateo 16:13-19; Marko 8:27-29)

18 Eke ɔku Yesu nkule dé mpái bɔ, mu akasípú amu bubu unu. Múú ɔlefíté amú ɔbéɛ, “Ma ahá beɛ ngyi?”

19 Bele mú ɔnɔ beɛ, “Aku beɛ, fúgyí Asú Ɔɔɔpú Yohane. Aku beɛ, Bulu Ɔnɔsú Ɔtɔpú *Elia. Aku é beɛ, Bulu ɔnɔsú ɔtɔpú dada ɔku lákúsú tsú afúlito.”

20 Múú ɔlefíté amú ɔbéɛ, “Mli é mé? Mliha mígyí ma?” Petro léle mú ɔnɔ ɔbéɛ, “Fúgyí *Kristo, (ɔhá ámuú Bulu ladá mu ofúli amu) ni.”

Yesu Iwɔsin Pú Mu Lowu Iwi Asún Blí

(Mateo 16:20-28; Marko 8:30-9:1)

21 Iwu Yesu léda amú ɔlá kpákpáákpá ɔbée, bumábláa ɔhaa mu iwi asún ánti. 22 Ɔletrá bláa amú ɔbée, “Ilehián ánti mí, Nyankpusa-Mu-Bi ánti néhiε wun iwɔsin tsɔtsɔɔtsɔ Yudafo ahandε, Bulu *igyí ahapú dehen pú Mose mbla asunápú ibito; amú fée békiná mí, há bómo mí, táme Bulu ɔbélakúsúa mi tsú afúlito eke sáásí.”

23 Iwu ɔlebláa ahá ámu ɔbée, “Ní ɔku dékléá obóbuo mi á, osíi t́á otekle bwe, otsu mu *oyikpalíhe ekekegyíeke bobuo mi. 24 Tsúfε ní ɔku lépri mu nkpa á, ɔb́shulíu mú. Ní ɔku é lési mu nkpa há mí su é á, Bulu ɔb́shɔ mu nkpa. 25 Ní ɔku onyá ɔyítɔ at́ fée, táme ɔh́li mu ɔkláa a, labi mɔmu ulɔwa há mu? 26 Ní ɔku onyá mía mí atosunáhé péli a, mí, Nyankpusa-Mu-Bi ánti é nénya mu péli bréá nna mía mí Sí pú mu abɔpu wánkíhé numnyamto nebá. 27 Ɔnɔkwali nde mli bláa. Aku bobu mli to nfi bumóowu asa bówun Bulu iwíegyí amu.”

Yesu Iwɔtsée

(Mateo 17:1-8; Marko 9:2-8)

28 Yesu lébli asún ánti ndawótswí ɔma a, ɔlekpa Petro mua Yohane pú Yakobo buo iwi, bɔdu yó mpái ɔbɔkpá ibu kusu. 29 Bréá ɔde mpái ámu bɔ á, mu ansítɔ letse. Mu atadiε lofulí húnánáná, ide ogyá kpa. 30-31 Iwu á, ahá abanyó ánti batsiá kɪ, bugyi Mose mua Elia beε iwi ɔwan ɔsúsú numnyamto. Amúa Yesu bɔtɔ́i tsú mu lowuá Bulu léhiε tswi mu ánti iḿɔwa ɔpá obówu Yerusalem iwi. 32 Petro mua mu aba ámu bedidi. Bréá bɔwan tsinkí á, bowun Yesu numnyam, ahá abanyó ámu é bulí mu wá. 33 Bréá ahá abanyó ámu budenatí á, Petro lébláa Yesu ɔbée, “Mí Wíé, ibu aléá abétsiá nfi. Ha ada abú asa. Fú klé kule, Mose klé kule, Elia é klé kule.” (Ɔmebi t́á ɔdeblí).

34 Bréá ɔde asún ánti blí á, agyinde ku lobobun amú féesú. Iwu ifu lekitá amú abasá ámu. 35 Iwu á, ɔme ku ledali tsu

agyinde amvto ɔbée, “Ŋni gyí mí Bía nalé ní. Mliyaa asu amlnu mu ɔmɛ.”

36Ɖmɛ amu lótsutsúa ɔbeka tin á, ɔlasí Yesu nkule ɔnu. Akasípú amu bekpa ɔnɔ bun asún ánfisu nke ámvto. Bumebláa ɔhaa ɔtá bayówun.

Uo Dídahe Ɖɔpú Tsa

(Mateo 17:14-18; Marko 9:14-27)

37Mú ɔyi kehe a, Yesu mva akasípú abasá ámu bekplí tsú ɔbu ámusu, ɔɔm amu befia mu. 38Lnu amútsɔ ɔku lókpɔn ɔbée, “Osunápú, kókoli, damli kɪ mí bí ha mi. Obi yinhé ɔkule pé ogyi mí. 39Ɖɔɛ laláhe ku towíé mvto, ɔɔkpɔn. Ɖtedɔda gbla, ɔdekɔ tsikitsiki, mu ɔnɔ ɔɔwé afu. Ipiantɔ asa itesí mu, ɔde mu yintá. 40Nobobwií ɔpa há fú akasípú amu mbée, bogyáa mú le mvto, táme bumetalí.”

41Yesu léle mú ɔnɔ ɔbée, “Ndɛmba-abía mli má hógyi, mli tsiátɔ ma ale. Alí nétsiá mli wá, nyá klun há mli ekekegyíeke ní?”

Lnu ɔlebláa oyin ámu ɔbée, “Kpa fú bí ámu ba mu.” 42Bréa ɔlekpa kebi ámu ɔbá á, ɔɛ laláhe amu léftn mu dá, ɔdekɔ tsikitsiki. Táme Yesu lókpɔn wa ɔɛ laláhe amu, tsá kebi ámu. Lnu oleyinkía mu há mu si. 43Bulu túmi kpɔnkpɔntu ámu leha ɔnɔ lobwie ahá ámu féé.

Yesu Lowu lwi Asún Blí Otse Nyɔɔsi

(Mateo 17:22-23; Marko 9:30-32)

Bréa mu bwehé ɔde ɔhagyíɔha wánwan wa á, Yesu lébláa mu akasípú ɔbée, 44“Mlihe yaa asu amlnu. Béle mí, Nyankpusa-Mu-Bi ánfɔ há adón bómo mí.” 45Táme akasípú amu bomonu mú asi. Bulu lópu mú asunu ɔáin amú. Mú su ɔmɔwankí amú asún ání ɔdeblí. Ifú é de amú ání béfité mu.

Ma Ɖɔɔbwe Ɖhandɛ?

(Mateo 18:1-5; Marko 9:33-37)

46Nwéɛn ku léba akasípú amu nsuné, tsú amútsɔ ɔhá ání ɔɔɔbwe ɔhandɛ lwi. 47Yesu lébi amú agywun. Mú su

ɔlekpá kebi ɔku belí mu iwí wá. ⁴⁸Múú ɔlebláa amú ɔbéé, “Ɖhagyíɔha ání ɔlɔhɔ kebi ánfí mí dátɔ lahɔ mi. Ɖhagyíɔha ání ɔhɔ mi é lahɔ ɔhá á múú ɔlɔwa mí ámu. Tsúfé ɔhá ání ogyi ɔtráhe mlɔtɔ féé gyí ɔdéhen.”

Ani Obúopu
(Marko 9:38-40)

⁴⁹Yohane lébláa Yesu ɔbéé, “Mí Wíé, anulówun oyin ɔku dépu fú dá gya ɔhe laláhe, anuléka mu tin, tsúfé ɔma anitɔ.”

⁵⁰Táme Yesu lébláa amú ɔbéé, “Mlumáka mu tin! Tsúfé ɔhá ání ɔmɔkɔsú líí mlɔsu buo mlí.”

Samariafo Bumɔhɔ Yesu

⁵¹Bréá nkéá Bulu obótsu Yesu ya ɔsúsú dekpukpé ba a, ɔlɔbwe agywun ání ɔbɔyɔ Yerusalem kokooko. ⁵²Ɖlɔwa abí gyankpá yɔ *Samaria wúlu kusu ɔbéé, buyéla unu yai ha mu. ⁵³Táme bumɔhɔ mu wúlu amutɔ, tsúfé Yerusalem ɔyɔ. ⁵⁴Bréá mu akasípú Yakobo mua Yohane bowun ali á, befité mu beé, “Ani Wíé, fudeklé fee ahá ogyá itsu ɔsúsú bɔhɔ amú mɔ?”

⁵⁵Táme Yesu lédamlí, wá iyin wá amú.^f ⁵⁶Múú bɔpu ɔkpa yɔ wúlu bámbású a.

Ahá Ání Beé Bóbwe Yesu Abúopu
(Mateo 8:18-22)

⁵⁷Bréá buna ɔkpatɔ bɔyɔ á, oyin ɔku lébláa Yesu ɔbéé, “Nóbuo fu yɔ ɔtínegyíɔtínéá fɔyɔ.”

⁵⁸Yesu lébláa oyin ámu ɔbéé, “Awíá bubu mbɔ, mbubwi é bubu asia, táme mí, Nyankpusa-Mu-Bi ánfí mú á, mma ɔtínéá nɔpu mí nwun tswí.”

⁵⁹Yesu lébláa ɔha bambá é ɔbéé, “Bobuo mi.”

Táme oyin ámu lébláa mu ɔbéé “Owíé, ha mí anyopulá mí sí asa ambobuo fu.”

^f9:55 Íni bu nwulú dada amu akutɔ: Ɖbéé, “Mluméyín ɔhé oduá ide mlí kpa. Tsúfé Nyankpusa-Mu-Bi ámu méba ahá ɔmɔkpá, nkpa ɔhɔkpa ɔleba.”

⁶⁰Múy Yesu lébláa mu ɔbéé, “Si awupú⁸ abupula amú afúli. Táme fú mú yɔ afuyeda Bulu iwíegýí ámu ɔkan.”

⁶¹Ɔku é lébláa mu ɔbéé, “Mí Wíé, nóbuo fu, táme ha mí anyinki yeklá mí wóyítɔ ahá asa.”

⁶²Yesu lébláa mu ɔbéé, “Ɔhá ání ɔtesrí dámlí kɪ ɔma mófun ha Bulu iwíegýí ámutɔ agyómá yɔ.”

Luk

Akasípú Aduesienɔ-nyɔ Sumbí Wa

(Mateo 10:7-16)

10 ¹Ínu ɔma a, Yesu léle mu akasípú aduesienɔ-nyɔ (72)^h aku é, ɔɔwa amú abanyɔ-abanyɔ ɔbéé bɔgyánkpa yɔ wúlugyíwúluá mu onutó móyɔ mósú. ²Ɔlébláa amú ɔbéé, “Atɔ kpɔtíhé amu itsɔ, táme mú akpɔtípú bumɔtsɔ. Mú su mlíkòkòli ndɔ mu wie, ɔwa akpɔtípú tsɔtsɔ abuba bɔkpɔtí mu atɔ ámu. ³Mlɪnatɪ, mlɪbɪ ání nde mlɪ wa fé akúfabi ɔyɔ adúndutɔ. ⁴Mlɪmátsu sika kente, akpankogyo ntée ntukuta kítá. Ní mlɪná ɔkpatɔ á, mlɪmálú tóntɔn ahá. ⁵Ní mlowíé wóyígýíwóyítɔ́á a, mlɪgyankpa bla amú mlaa, ‘Bulu ɔhá mlɪ iwilwii.’ ⁶Ní wóyí mu wie amu tekle iwilwii a, mlɪ iwilwii bésin wóyí ámuvsu. Táme ní ɔtamakle iwilwii a, íbésankí bá mlɪ wá. ⁷Mlɪtsia wóyí ámúbú bɔhɔ mlɪ mútɔ ámutɔ. Mlɪgyi atɔ, amlɪnu tógyítɔ́á béha mlɪ, tsúfé agyómá ɔyɔpú buteká ɪkɔ. Mlɪmátu láyétsiá wóyí bámbátɔ. ⁸Ní mlowíé wúlu kusu, bɔhɔ mlɪ á, mlɪgyi tɔ́á béha mlɪ. ⁹Mlɪtsa alɔpu ání bubu wúlu amutɔ, amlɪbla wúlu amutɔ ahá mlaa, ‘Bulu iwíegýí lawíé wóyí tá.’ ¹⁰Táme ní mlowíé wúlu kusu, bumɔhɔ mlɪ á, mlɪdalɪ yelí brɔnusu, amlɪblɪ mlaa, ¹¹‘Anidé mlɪ wúlutɔ otútúu amúbú ilawólí anɪ ayabiasɪ amu kúráá kpakpáa wulí. Táme mlɪbɪ ání Bulu iwíegýí ámu lawíé wóyí tá.’ ¹²Nde mlɪ bláa mbée, Bulu ɔbébutí wúlu amutɔ ahá ɪsu dun Sodomfɔ mu asún ogyíké amu.

⁸ 9:60 Awupú gyí ahá ání bawú ɔhétɔ. ^h 10:1 Aduesienɔ-nyɔ (72): Aduesienɔ (70) bu nwulú ámu akutɔ.

Ahá Ání Bumedamlí Klontɔ Asúngyí
(Mateo 11:20-24)

13“Korasinfɔ, mligyɔwɪ. Betsaidafɔ, mligyɔwɪ ní. Ní Tiro pú Sidon awúlu laláhe amɔɔ nɔbwe ofúla akpɔnkpɔntɪ ánfɪ nɔbwe mlɪɔ ánfɪ á, tɛkɪ buda akpekpetɔ, bakpá nsúó wá nwuntɔ púsúná ání badámlí klontɔ. 14Táme mlɪbɪ ání Bulu ɔbébutí mlɪ ɪsu mu asún ogyíké dun Tiro múa Sidonfɔ. 15Mlɪ Kapernaumfɔ, mlɪdɛklé mlɪaa mlótsu ɪwɪ fúá alu yówo ɔsúsú? Ekekekeke! Bulu ɔbéba mlɪ asɪ yówie afúlitɔ.”

16Yesu lébláa mu akasípú amu ɔbéɛ, “ɔhá ání ɔho mlɪ asún lahɔ mi. ɔhá ání olekiná mlɪ asún ho lakíná mí asún ho. ɔhá ání olekiná mí asún ho é lakíná mí Sí ámúó ɔlɔwa mí ámu asún ho.”

Akasípú Aduesienɔ-nyɔ Ámu Yinkí Ba

17Akasípú aduesienɔ-nyɔ ámu beyinkí ba ansigyísú. Bebláa Yesu beɛ, “Anɪ Wíé, ní akplón wa *ɔɛ laláhe kúráá fú dátɔ a, butobú anɪ.”

18Yesu lébláa amú ɔbéɛ, “Nowun ání Satan lékpa tsú ɔsúsú fé alíá nsauntɔ tɔfwí ɪbɪ beda ɔsulúɔ pɔ. 19Mlɪnu! Nahá mlɪ túmi ání mlɪtsatsa awɔ pú nyankpɔkpíesɪ tsun, amlɪgyɪ ɔbunsám túmi féésú. Tɔɔɔɔɔ mɔɔbwe mlɪ. 20Táme ansí mágyɪ mlɪ ání ɔɛ laláhe labú mlɪ. Mboún ansí igyɪ mlɪ ání Bulu lawánlín mlɪ adá tswɪ ɔsúsú.”

Ansí Legyi Yesu

(Mateo 11:25-27; 13:16-17)

21Alɪ bré ámɔɔ á, *ɔɛ Wankíhé léha ansí lehɛ gyɪ Yesu. Múó ɔleblí ɔbéɛ, “Mí Sí, ɔsú mu asɪ Owíé! Nedá fú ipán ání falé tsá fɔpɔɔhín anyansapɔ pú asún abɪpú ɔwan súná ahá ání bumeyín ɔlala, bɔgyɪ fé nyebí. Ee, Mí Sí! Alí fudeklé fɛɛ ɪbá mútɔ ní.”

22Múó ɔlebláa mu akasípú amu ɔbéɛ, “Mí Sí lapú tógyítɔ wá mí ɪbutɔ. ɔhaa méyín ɔhá ání Obí ámu gyɪ, nkétɪ ɔsí ámu nkɔle. ɔhaa méyín ɔsí ámu é, nkétɪ Obí ámu, pú ɔhá ání Obí ámu latsúlá ání ɔbéle mu súná mu.”

23Bréá ɔhaa má amú wá á, ɔledamlí kɪ amú, bláa amú ɔbéé, “Mli mú á, Bulu layúlá mli, mliḍé ató ánfɪ wúun. 24Nde mli bláa mbéé, Bulu ɔnósú atóipú pú awíe tsɔtsɔtsɔ bekle ání bówun ató ánfɪ, abunu asún ánfɪ mliḍénu, táme bumenya mú alɪ.”

Samariayin Awɔtɔlepɔ Ɔku

Luk

25Mose mbla osunápú ɔku lóksú líí fíté Yesu asún ánfɪ púsɔ mu kɪ. Ɖlefíté mu ɔbéé, “Osunápú, ntɔ mbwéé asa anya nkpa ání itamatá?”

26Yesu lébláa mu ɔbéé, “Nkálɪ Mose Mbla léblí? Nkálɪ fonu mú asɪ?”

27Oyin ámu lébláa mu ɔbéé, “Pú fú klun, fú ɔkláa, fú ɔwunlín pú fú agywun fée dwe fú Wíe Bulu, afudwe fú bá fé fú iwɪ.”

28Yesu lébláa mu ɔbéé, “Mú fablí á. Bwe mú, fénya nkpa ání itamatá.”

29Táme oyin ámu lékléá obósuná ání mú asún da ɔkpa. Mú sv ɔlefíté Yesu ɔbéé, “Ma gyí mí bá?”

30Yesu lébláa mu ɔbéé, “Bré kusu oyin ɔku lékplí tsú Yerusalem ɔyó Yeriko. Bréá ɔna ɔkpatɔ á, oleyéfia ogyo atswapú aku. Ahá ánfɪ bekpa mu tati, swíí mu ató fée, dá mu sian mu mɔ, nátí sí mu tswɪ. 31Bulu igyí ɔhapú ɔku ná ɔkpa ámu kénsú. Bréá olowun mu sísí á, ɔlebaí tsun ífúntó nátí sí mu. 32Alɪ kén Lewiyin ɔku é lóɔtɔ mu, báí tsun ífúntó nátí ní. 33Táme *Samariayin ɔkúá ɔná ɔkpa ámusu mú léba bowotií musu. Bréá olowun oyin ámu a, ɔlɔwa mu nwe. 34Ɖlenatí yótɔ mu. Ɖletseí nta kpekplé wólí mu nɔsu, yí ofobí wá mú, klí mú, tsú mu dínká mu afrímúsú, pú mu ya afɔɔ ɔswúkpá yéki musu. 35Mú ɔyi kehe a, Samariayin amu léle sika futútú anyɔ há afɔɔ ɔswúkpá inusu ɔkípu ɔbéé, ‘Kɪ musu ha mɪ. Ní feyintá tɔku tsía a, neyínkí néka fú.’ ”

36Yesu lómɔ mú ɔnɔ ɔbéé, “Fú atɔ kihetɔ á, ahá abasá ánfɪtɔ ɔmɔmu gyí oyin ámúbú olefia ogyo atswapú ámu mu ba?”

37Mose mbla osunápú amu lébláa mu ɔbéé, “Oyin ámúbú olowun mu nwe ámu.” Yesu lébláa mu ɔbéé, “Múmú yɔ afuyɔbwe mú odu.”

Marta Mva Maria Wá Yo

³⁸Bréá Yesu mva mu akasípú buna ɔkpatɔ boyɔ Yerusalem a, bowie wúlu kusu. Ɖtsi ɔkúá butetí mu Marta lɔho mu ɔfɔ, ɔlekpa mu ya mu wóyítɔ. ³⁹Mu pio tshé gyí *Maria. Maria anfi lébetsiá Yesu ayabiasɩ, ɔde mu atosunáhé nu. ⁴⁰Marta nkule dédamlí tsun mútɔ, alíá íbɔbwe ɔbɔbwe amú afɔtɔ. Uɔdon mu. Múú ɔlenatí yɔ Yesu wá, yéfité mu ɔbéé, “Mí Wíé, fawun ání mí píó lasí agyómá ámu féé tswi mi nkulesu? Bla mu ɔbetsa mí.”

⁴¹Yesu lébláa mu ɔbéé, “Óo Marta, Marta! Fude fú iwí háan ntobí tsɔtsɔtsɔ iwí. ⁴²Toku kule pé déhián, Maria lalé múá íbu alé don. Ɖhaa méetalí swíí mu.”

Mpáíbo Iwí Atosunáhé

(Mateo 6:9-13; 7:7-11)

11 ¹Eke ɔku Yesu bu ɔtineku ɔde mpái bo. Bréá ɔbo mpái ámu tá á, mu akasípú amuto ɔkule lébláa mu ɔbéé, “Mí Wíé, suna anu mpái bo fé alíá Asú Ɖboɔpú Yohane lósuná mu akasípú.”

²Yesu lébláa amú ɔbéé, “Ní mlɔbo mpái á, mlibo mú alí.

‘Ani Sí,

ahá bubúu fú dá.

Ba begyi *iwíe.

³ Ha anu atogyiheá íbɔfun anu ekekegyíeke.

⁴ Si anu lakpan kie anu,

fé alíá anutesíkíe ahá ání butɔpú ulá gyi anu.

Mákpa anu wá ísókito.’ ”

⁵Iwo ɔlebláa amú ɔbéé, “Ní mlɔto ɔku bu onyawíe a, ɔbɔkusú yɔ mu wá ɔyínsiné yébláa mu ɔbéé, ‘Mí nyáwíé, pan mi bodobodo apin asa. ⁶Mí nyáwíe ɔku labɔswí mí sésééséi. Mma tɔtɔá néha mu obégyi.’

⁷“Mu nyawie amu ɔbébláa mu sísí ɔbéé, ‘Máwa mí tɔí. Mía mí abí anuladí. Nafin obu, mméetalí kúsú beha fú tɔtɔ.’

⁸Nde mli bláa mbéé, fíalí onyawíe ɔkpasu á, ɔmɔɔkusú há

mu. Táme alíá ɔde mu kokóli kótóó su á, ɔbókusú há mu alíá odeklé.

9“Mú su nde mli bláa mbée, mlikvli Bulu, ɔbéha mli. Mludunka, mlówun. Mlida mu klunsu, obéfinkí mú há mli. 10Tsúfé ɔhá ání ɔtɔkúlí ató tenyá. ɔhá ání otodúnká ató towun. ɔhá ání ɔtedá klunsu bútefinkí há. 11Ɔsí ɔmɔmu bu unu, mu bi ɔkúlí mu iye a, ɔbékítá iwɔ wá mu ibitɔ? 12Ntée ní ɔkúlí mu bɔnɔ a, ɔbékítá nyankpukpíe wá mu ibitɔ? 13Mli lakpan abwepú kóráá mliyin alíá butɔpú atɔ wankláán há mli abí. Ntogyi sù mli Sí ámúbú ɔbu ɔsúsú ámu mú mɔɔpu Ɔɔge Wankíhé há ahá ání buɔe mu kulí?”

Yesu Mva Beelsebul

(Mateo 12:22-30; Marko 3:20-27)

14Yesu légya ɔɔe laláhe lé oyin ɔkuá alató omúmutɔ. Bréá ɔɔe laláhe amu léɔali a, oyin ámu lówa tɔí bi. Mú su ɔnó lobwie ɔɔm amu. 15Táme amútó aku beblí beɔ, “Ɔɔge laláhe owíe *Beelsebul túmi ɔɔepugya ɔɔe laláhe lé ahátɔ.”

16Amútó aku é bekleá bɔsɔ Yesu ki. Mú su bebláa mu beɔ, ɔbwée osúna pusuna ání lélé otsú Bulu wá. 17Táme Yesu lébi amú agywun. Mú su ɔlebláa amú ɔbéɔ, “Iwíe ogyíkpa ání ɔlaye anyɔ, buɔe aba kɔ tedida. Wóyí oduá mútɔ atsiápú buɔe aba kɔ é tobwíé. 18Ní *Satan iwíe ogyíkpa labóí anyɔ, buɔe aba kɔ á, mu iwíegyí bédida. Táme mlidéblí mliaa, Beelsebul dátɔ nde ɔɔe laláhe gyáa le ahátɔ. 19Ní Beelsebul túmi ndepugya ɔɔe laláhe lé ahátɔ á, múmú ma túmi mli abí é buɔepugya ɔɔe laláhe lé ahátɔ? Mli abí ámu onutó obégyi mli asún. 20Táme íniá Bulu túmi ndepugya ɔɔe laláhe su á, mliɔbi ání Bulu iwíegyí ámu laba mli wá dodo.

21“Tsúfé ní ɔwunlínɔpú bu akɔtɔ, ɔde mu wóyí gyo a, mu tɔtɔ tamafwí. 22Táme ní ɔhá ání ɔbu ɔwunlín dun mu ɔbá begyi musu á, ɔtɔswíí mu mu akɔtɔ ámúbú mu ansí dun músu ámu, yée mu atɔá olenya étɔ.

23“Ɔhá ání omobuo mi dé mí lu. Ɔhá ání ɔmedé mí tsa akpa ahá ba Bulu é dé amú gyáa teía mi.

Ŋe Laláhe Yinkí Ba Ŋhato*(Mateo 12:43-45)*

24“Ní ŋe laláhe idáli ŋhato á, iteyéki dimbísú dúnká otsiákpá, táme utamanyá. Inu uteblí ání ibéyinkí yó mú wóyí dadato. 25Ní usánkí yó á, itowun ání baféí mótó, lá mótó wankláán. 26Iteyínkí yékpa mú aba asienó ání butoḅwé laláhe dun mu, buteba betsiá un. Inu ŋhá ámu tsiátó teyíntá dun alíá igyi yáí.”

Oyúla Onutó

27Bréá Yesu dé asún ánífí blí á, ɔtsi ɔku bu ɔdɔm amuto. ɔtsi ámu lótsu ɔme fúá blí ɔbéé, “Bulu layúla opúni amúbú fedí mótó pú nyópu amúbú fɔnyɔpú ámu.”

28Táme Yesu lébláa mu ɔbéé, “Ahá ání butonú Bulu asún, gyí músú mboún Bulu layúla!”

Bodunká Ofúla*(Mateo 12:38-42)*

29Bréá ɔdɔm amu buḅemoní tsíá a, Yesu léblí ɔbéé, “Ndemba-abí laláhe, mlídé osúna dúnká amlíwun, táme mlímóowun kukukuku dun Bulu ɔnósú ɔtáípu *Yona osúna amu. 30Tsúfé alí amúbú Yona lóḅwe osúna há Niniwefo ámu a, alí mí, Nyankpusa-Mu-Bi ánífí é nóbwe osúna há ndemba-abí ní. 31Seba owíe tshé ɔbókúsú líí Bulu asún ogyíké, há mli ndemba-abí ánífí ɔpón. Tsúfé olotsu ɔsaasí ɔmá kuto kéín gya ɔkpa ba, bonu *Salomo nyánsa atosunáhé. Mlíki, ŋhá ání ɔdun Salomo líí nfi á. 32Niniwefo é bókúsú líí Bulu asún ogyíké amu, há mli ndemba-abí ánífí ɔpón. Tsúfé bréá Yona léda Bulu asún ɔkan súná amú á, bedamlí klɔnto ba Bulu wá. Mlíki, ŋhá ání ɔdun Yona onutó líí nfi á.

Nyankpusa-oyí Ŋkandíe*(Mateo 5:15; 6:22-23)*

33“Ŋhaa tamanywé ɔkandíe púnjáín, ntéé pú ɔlɔ bun músú. ɔfúákpá ɔtɔpúbian, méní ɔbówankí há ahá ání béba wóyí

ámuto. ³⁴Fú ansíbi igyi ɔkandíe há fú nyankpusa-oyí. Ní fú ansíbi bu alé á, fú nyankpusa-oyí ámu fée bówankí. Táme ní fú ansíbi ma ale a, fú nyankpusa-oyí ámu fée ibóklun. ³⁵Mú su mlíki ání wanki onutó bú mlíto, megyí oklún. ³⁶Ní fú nyankpusa-oyí ámu lówankí, oklún ma ɔtinetine a, fú iwí fée bówankí fé alá ɔkandíe towánkí wólí fúsú.”

Mose Mbla Asunápú Pú Farisifo Tsiátó

(Mateo 23:1-36; Marko 12:38-40)

³⁷Bréá Yesu lótoí tá á, Farisiyin ɔku léti mu ató ogyíkpá mu wóyító. Mú su Yesu lóyo yétsiá ɔpúnú ámu asi. ³⁸Uowa Farisiyin amu wánwan ání Yesu mófwi ibi púgyúra iwí asa ɔde ató ámu gyí. ³⁹Íni su Yesu lébláa mu ɔbéé, “Mli *Farisifo mlítofwí mli nwe pú mli ablanwé wankláán, táme ɔnsípe mba owuntɔlun sósón lábúlá mli. ⁴⁰Mli aha mimláhe, megyí mótó mba mú ɔma fée Bulu lóbwe? ⁴¹Mlípú mli atonyahé ámu ha ahíánfo, tógyító *iwí bétin ha mli.

⁴²“Farisifo, mligyɔwi ní! Mluteye mli ɔtsutsú pú kpántánkplámá aná féeótó idú, pú *idúsí amu há Bulu. Táme mlimédé Bulu mbla ámuótó ihíe dehián, igyi asúngyí ɔɔkwalisu pú Buludwe ámu su gyí. Múdéhián ni, táme mlimákiná iyéto dúsí amu é ha.

⁴³“Farisifo, mligyɔwi ní! Mlutekle otsiákpá yílé tsiá Yudafo *ofiákpa. Mlutekle mlíaa, ahá bubún ha mli itsiá dunsu. ⁴⁴Mligyɔwi ní! Mlilabwé fé ntsán ání bumehie mú nsuⁱ, ahá butotsun músú bumeyín ání ntsán igyi.”

⁴⁵Mose mbla asunápú amuto ɔkule lébláa Yesu ɔbéé, “Osunápú, ní feblí alí á, fasiá aní é o.”

⁴⁶Yesu léblí ɔbéé, “Mose mbla asunápú, mli é mligyɔwi ní! Tsúfé mlíto pú ató dwindwín súra ahá, táme mlítamapú osrebi ɔkule kúráá tsá amú surá. ⁴⁷Mligyɔwi ní! Tsúfé mlíto púwé Bulu ɔnósú atóipú amúótó mli anáin ɔmɔ ámu ntsán wankláán. ⁴⁸Íni désuná ání mlilatsúlá dínká mli

ⁱ 11:44 Yudafo amándíe ɔnó á, ní fetá ntsánsú a, ifin lada fu. Mú su butekpá mú afá futútú, púhíe mú nsu.

anáin bwehé ámusu ní. Tsúfé mli anáin bɔmɔ amú, mli é mliwapwé amú ntsán. ⁴⁹Mú su Bulu lópu mu nyánsa blí ɔbéé, ‘Nówa mí ɔnɔ́sú atɔ́ípú pú mí *sumbí ayɔpú amú́t. Bómɔ aku, dínká aku ésú.’ ⁵⁰Bulu ɔbéfité mli ndemba-abí ánfí mu ɔnɔ́sú atɔ́ípú ámu obugya amúú ulɔwulí así tsú bréá ɔyí lelun ɔpá ámu. ⁵¹Ɔbéfité tsú *Habel obugyasu alu ɔɔfun Sakaria klésu. Mu bɔmɔ *afɔ́ɔɔie-asubwi múa Bulu ɔtswékpa amu nsuné ní. Ee! Nde mli bláa mbéé, Bulu ɔbéfité mú tsú mli ndemba-abí ánfí wá.

⁵²“Mose mbla asunápú, mliɔwɔ ní! Tsúfé mlidé asúnbi sáafi amu. Mluméfínkí wíé, mliuméhá ahá ɔkpa é abuwie.”

⁵³Bréá Yesu lénatí unu ɔyó á, Mose mbla asunápú pú Farisifo ámu ɔɔpu mu unu ɔbló, yó buɔe mu asún tsɔtsɔɔtsɔ fité púfíni mu yibi, ⁵⁴ki beɔ bénya mu ɔnɔ́tɔ asvanku púkítá mu.

Apinabwebíwwe unu Ɔláda

(Mateo 10:26-27)

12 ¹Igyi alí, bréá ahá mpím-mpím beba befia unu, buɔe aba ayabiasí tsatsáa a, Yesu légyankpá dá mu akasípú amu ɔlá ɔbéé, “Mlíki wankláán Farisifo Bodobodotu-afású,¹ tsúfé apinabwebí abwepú bɔgyi. ²Tɔtɔ má unuá babun ató mú́sú ání bumóobwíí mú́sú. Tógyítɔ é ma unuá ileŋáin ání uméelun ɔwan. ³Béda asún ání mliléblí nklobítɔ ɔkan. Kugyíkúá igyi, unuá bóbon.

Ɔhá Ání Abénya Ifú

(Mateo 10:28-31)

⁴“Apíó aba, nde mli bláa mbéé, mliumánya nyankpusa ifú. Ɔbétalí mɔ́ mli ɔyulúv, táme ɔméetalí bwé mli tɔtɔ mú ɔma. ⁵Nósuná mli ɔhá ání mlunýá ifú. Mɔgyí Bulu. Mu ɔmɔ́ mli ɔma a, ɔbu túmi tswi mli ɔkláa é wá usubutí ogyá ání utamaduntɔ. Ee! Mu mlunýá ifú ní!

¹12:1 Farisifo Bodobodotu-afá gyí amú afunu atosunáhé. Kí Mateo 16:12.

6“Afɪnɪ butɔkukv fe akénsire anu kéké? Megyí kóba ana? Amú kúráá á, Bulu tamatan ɔkukusu, 7ménɪ bee mlá Bulu yin mli nwunsv imi kúráá klátɔ. Mú sv mlumánya ifú. Mlibu ibiá dun akénsire tsɔtsɔtsɔ!

Adánsɛgyí Pú Asónkiná

(Mateo 10:32-33; 12:32; 10:19-20)

Luk

8“Nde mli bláa mbée, ní ɔkv létalí gyi mí iwɪ adánsɛ ahátɔ á, mí, Nyankpusa-Mu-Bi ánfɪ é négyi mu iwɪ adánsɛ Bulu-abɔpv ansítɔ. 9Táme ní ɔkv lékiná mí ahátɔ á, mí é nékiná mu Bulu-abɔpv ansítɔ.

10“Ɖhagyíɔha ání ɔleblí mí, Nyankpusa-Mu-Bi ánfɪ iwɪ asvn laláhe a, Bulu ɔbétalí sikíé mu. Táme ní ɔkv léblí Ɖhe Wankíhé amv iwɪ abususu a, Bulu méesikíé nde, oméesikíé mu ɔke.

11“Ní bekpá mli ya Yudafo *offakpa, ntée ɔmású agyípú pú awíe ansítɔ á, mlumágywún asún ání mléblí púká iwɪ lé ntée alá mléle mú ɔnɔ. 12Tsúfé Ɖhe Wankíhé amv obósuná mli alá mléblí alɪ bré ámvɔ.”

Osikani Mimláhe Ɖkv Iwɪ Yébi

13Ɖɔɔm amvɔ ɔkv lébláa Yesu ɔbée, “Osunápú, bla mí déhen, ɔha mía mvnyɔ aye atɔ́á anɪ sí lési yáí anɔv.”

14Táme Yesu léfité mu ɔbée, “Agya, ma léyaí mí asún ogyípú ntée atɔ́tɔ oyépv há mli?” 15Múv ɔlebláa ahá ámv féé ɔbée, “Mlɪkɪ wankláán ɔnsípewasu, tsúfé nyankpusa nkpa uma atonyahé tsɔtsɔtsɔv.”

16Ivu ɔleha amú yébi ɔbée, “Osikani ɔkv ndɔvɔ atɔ́ lehuwá alé ofi ɔkv. 17Múv ɔlefíté mu iwɪ ɔbée, ‘Nkálɪ nɔ́bwe mí atɔ́-abí? Mma ɔtínéá nɔ́pvayáí.’ 18Ivu ɔleblí ɔbée, ‘Nyin tɔ́á nɔ́bwe. Nóbwie mí idan, láwá akpɔnkpɔntɪ. Múv nɔ́pv mí atíkv pú mí ntóbí ámv wá ní. 19Fówun nabláa mí ɔkláa mbée, ‘Mí ɔkláa, iklvɪn ídɪ fú asɪ. Kɪ, fvbv atɔ́ tsɔtsɔtsɔvá ida ha fú nfí-nfí. Gyɪ, afvnu, ansí igyɪ fv.’ 20Ivu Bulu lébláa mu ɔbée, ‘Ɖha mimláhe! Onyenu nde fú ɔkláa hóv le fú ibvɔ. Ma obégyɪ atɔ́ ánfɪ fakle yáí ánfɪ féé?’ ”

²¹Yesu lómw mú wón wóéé, “Alí wóbwé wá ání olekle ató yáí há mu wí wówólúw anfíw, táme wma tótó Bulu wá ní.”

Ansí Pwóínká Bulusu

(Mateo 6:25-34)

²²Ínu Yesu lébláa mu akasípú wóéé, “Mú su nde mli bláa mbéé, mímáhan wí tóá mlégyi, tóá mlónu pú tóá mlédúdá w. ²³Nyankpusa nkpa dehián dun atogyihe. Mu wówólúw é idun ató dúdáhé. ²⁴Mlíki aklankpa. Butamadú, butamaséti wá idantó. Buma idan ntée ifa, táme Bulu tehá amú atogyihe. Mímá labi dun mbubwi? ²⁵Mlíw ma wóétalí han wí pú bré kpalobí tsía mu nketó? ²⁶Ní míméetalí bwé útó tókúrííbi ánfí kúráá á, ntogyi sù mlidé wí háan tráhe amúw? ²⁷Mlíki alá pututó-oyí ntwítswú tedan. Ítamayó agyómá ntée lú atati. Táme nde mli bláa mbéé, Owíe *Salomo, mu inya féétó a, wmetalí híhíe wí wá akíle fé oyí ntwítswú anfító kúku. ²⁸Ní Bulu dé ífá ání nde ulí, wke ulawú, bawá mú ogyá tati dúdá á, wméetalí dúdá mli atati dun mú? Ntogyi sù mli hógýi wótsó alí?

²⁹“Mú su mímágywún tóá mlégyi ntée tóá mlónu wí, íha mli ansí ípe. ³⁰Tsúfé íni aná wma-wma butesrí gya ni. Mli Sí ámu yin ání ide mli hián. ³¹Ítóá mlígyánkpa dunka gyí Bulu iwíegyí, Bulu wówólúw íni tsía mútó há mli.

Atonyahé Puyáí Wówólúw

(Mateo 6:19-21)

³²“Wpasua tókúrííbi, mímánýa ífú. Tsúfé íbu mli Sí ámu wówólúw ání wówólúw iwíe ogyíkpá amú há mli. ³³Mlífe mli wíwólúw ató, amlípu kóba amú kie ahá ání buma tótó. Mlíbun akenteá íméeyintá ha mli wí. Múgyí, mlíyáí mli siadié wówólúw. Ínu mú á, kúku méedalí mútó, tsúfé awíkplu buma ínu, atéple é butamawí ató ínu. ³⁴Tsúfé wówólúw fú siadié bu a, unú fú agywun tetsía.

Asúmpúá Butogyo

³⁵“Mlíwa atadié, amlínywe mli nkandíe. ³⁶Mlíbwé wíwólúw ífá asúmpúá bude amú wíe wkpá kí, obótsu wká otsiákpá

ba. Féki ní ɔ́bá beda klunsv á, béfinkí há mu. ³⁷Ansí bégyi asúmpú oduá amú wíe ɔ́béba ɔ́tu amú butsie bugyo mu. Ɖɔ́kwali nde mli bláa. Amú wíe amu ɔ́bésabáa tati, há amú bétsiá ɔ́pónúasi, mu onutó ɔ́bɔ́kɔ́nkí atogyihe amu há amú. ³⁸Ansí bégyi amú, ní ɔ́bá ɔ́tu amú butsie bugyo mu, ɔ́yínsiné ntée bake. ³⁹Táme mlinu asún ánfí. Ní wóyí mu wie yin bréá owikplu ɔ́béba mu wóyító a, tɛki omesi wóyí ámu tswi, owikplu móbwie wíe wí mu ató. ⁴⁰Mli é mligyo, tsúfé mí, Nyankpusa-Mu-Bi ánfí néba bréá mli ansí medín mísú.”

Osúmpú Wankláán Pú Ɖlaláhe

(Mateo 24:45-51)

⁴¹Petro léfité mu ɔ́bé, “Ani nkule fude yébi anfi ha lóó, ntée ania ahá ánfí féé?”

⁴²Yesu lébli ɔ́bé, “Ma mæe gyí osúmpúá ɔ́letun ansí, ɔ́bu ɔ́kwali? Mu ibito mu wie ɔ́pú mu aba atráhe wá, ɔ́bé ɔ́há amú atogyihe dunka brésú. ⁴³Ansí bégyi osúmpú amu ní mu wie amu ɔ́bá bowun ání lélé ɔ́de mú bwe. ⁴⁴Ɖɔ́kwali nde mli bláa. Mu wie amu ɔ́bópu mu ató féé wá mu ibito. ⁴⁵Táme ní osúmpú amu lébli wá nwuntó ɔ́bé, ‘Mí wíe ibábi mɔ́kúfon, ɔ́bówa ɔ́pá.’ Inu sv olefi asi ɔ́de mu aba asúmpú atsi múa ayin da, ɔ́de ató gyí si amú, ɔ́de ntá núu bu á, ⁴⁶mu wie amu ɔ́béba bofwie mutó ekeá ɔ́medín ansí. Mu wie amu ɔ́béhie títu mutó, trá butí mva ahá ání ɔ́mɔ́hɔ́ mu gyi isu kékéé.

⁴⁷“Osúmpú oduá oyin tóá igyi mu wie apé, táme ɔ́mela wu bwé yáí á, mu wie ɔ́béhie pítí mu ató wankláán. ⁴⁸Táme osúmpúá omeyín mu wie apé, ɔ́bɔ́we tóá ilehián ha ató putí á, mu wie ɔ́béputí mu kpalobí. Bulu tɛfíté tsɔ́tsɔ́ tsú ɔ́há ání ɔ́leha mu tsɔ́tsɔ́ wá, ɔ́tɛfíté tsɔ́tsɔ́tsɔ́ é tsú ɔ́há ání ɔ́leha tsɔ́tsɔ́tsɔ́ wá.

Ipián Yesu Lópuba, Megyí Iwilwii

(Mateo 10:34-36)

⁴⁹“Ogyá ɔ́dudákpá neba ɔ́sulúv anfitsu. Ní mí nkule sv mu á, tɛki idetsií dodoodo. ⁵⁰*Asúɔ́ ku ida misvá bóbo mí.

Mí klvn méedi mí asi yófun bréá ilamó onó. ⁵¹Imábwe mli fé iwilwii nɔɔɔba ɔsulúv anfisv. Megyí iwilwii, ahá nsiné yintá nɔɔɔba. ⁵²Tsúfé tsú séi púya a, wóyí ání ahá abanú bubu mótó á, abasá bókusú líí abanyósú. Abanyó é bókusú líí abasású. ⁵³Abi yinhé múa amú asi nsiné béyintá. Abi tshé múa amú ayín é nsiné béyintá. Osia tshé múa mv sia tsíhé nsiné é béyintá.”

Brétó Asún Asnu

(Mateo 16:2-3)

⁵⁴Yesu létrá bláa ahá ámu ɔbée, “Ní nyankpu obílá busv á, mlteblí mliaa, nde nyankpu obótswie, lélé ototswie. ⁵⁵Ní nsainto itsú fúá á, mlteblí mliaa, nde owí ɔbélun, lélé utelun. ⁵⁶Apinabwebí abwepú! Mliyin alíá butelé ɔsulúsv pú nwlótáasu ató asi. Ntogyi sú mlimétálí nú utó ánfí ɔdebá séi ánfí mó asi?

Anyabá Nsunéla

(Mateo 5:25-26)

⁵⁷“Ntogyi sú mlutamatalí gyí asún wankláán há mli ɔwí? ⁵⁸Ní ɔkv ɔsáma fv á, wa ɔsa ha amlíblí mú wóyító, méni fú onyabá mɔɔpu fú ya asún ogyíkpá. Fówun asún ogyípú méegyí fú asún, pú fú wá prósiyin íbutó, ɔwa fú obu. ⁵⁹Ní megyí alí á, mméemlé fú, nkéti faká tógyító tá asa fédalí unv.”

Mlɔdamli Uklvntó, Méni Mlimóowu

13 ¹Ahá ámúv bubu unv alí bré ámutó aku bebláa Yesu bée, Pilato lamó Galileafó aku bréá bude afódié bɔ há Bulu, Yerusalem *Bulu ɔtswékpa unv, há obugya lada afódié ámu. ²Yesu léfuté amú ɔbée, “Mlíki mliaa, Galileafó ánfí bugyi lakpan abwepú dun Galileafó atráhe, sú bowun ɔwɔsin ánfí odu? ³Nde mli bláa mbée, megyí alí ígyi! Ní mli é mlimédamli klvntó á, mli féé mlówu fé amú. ⁴Ntée ahá dúkwe ámúv abansúrv lobwie dá mó Siloam ɔmanti ání íbu Yerusalemto ámu mé, mlíki mliaa, lakpan abwepú

bugyi dun aha atráhe ání betsiá Yerusalem alí bré ámutó féé? ⁵Nde mli bláa mbée, megyí alí ígyi. Ní mlumédamlí kluntó á, mli é mlówu fé amú.”

Pɔnto Máswíéhé

⁶Múú ɔleha amú yébi ɔbée, “Oyin ɔku lótswie pɔnto mu ndɔtɔ. Eke ɔku ɔɔyɔ yéki bée, abí ku idun mútɔ. ɔɔyɔ á, kuku medín mútɔ. ⁷Íni su ɔlebláa mu ɔpayin ɔbée, ‘Nfinsa ní, nna oyí ánfí asi. Mmɔkówun kukuuku mútɔ. Ntogyi sù ibétrá lú yíntá ɔsulúv? Kun mú da!’ ⁸Táme ɔpayin amu lébláa mu ɔbée, ‘Mí wíé, fú mú si mú itra lu ofi ɔkule, ampulipuli mú asi, kpa wúna wa mú asi. ⁹Ní offébá iloswie á, ibu alé, táme ní imoswie á, nakun mú dá.’ ”

ɔtsi ɔku ɔlɔ Tsa ɔkpúnú ɔdaké

¹⁰Yesu lóyɔ ɔde atɔ suná Yudafo offiakpa *ɔkpúnú ɔdaké iku. ¹¹ɔtsi ɔkúá ɔhe laláhe lówa mu ɔlɔ nfí dúkwe ní, ilahá mu alaklo, ɔmetálí bwíí nátí bu unu. ¹²Bréá Yesu lówun mu á, ɔletí mu bláa mu ɔbée, “Ani yín, iwí iwá fú ɔnlín!”

¹³Unu ɔɔpɔ ibi da ɔtsi ámu. Ununu olotswíí lí kánfú Bulu.

¹⁴Ofiakpa ɔhande amu lénya ɔblɔ ání Yesu latsá ɔha ɔkpúnú ɔdaké. Mú su ɔlebláa ahá ámu ɔbée, “Nkensíé bu unu há agyómá yɔ. Mlíba nke ámutɔ, abutsa mli ɔlɔ. Megyí ɔkpúnú ɔdaké!”

¹⁵Ani Wíé Yesu lélé mɔ ɔnɔ ɔbée, “Apinabwebí abwepú! Mlíto okugyíɔku tɔwóí mu nnantswie ntée afrímú lé ibantɔ, pú amú ya ntsu onúkpa ɔkpúnú ɔdaké. ¹⁶Mú ima aleá mí mú nésankí



ɔtsiá alaklo, ɔmetálí bwíí nátí. (Luka 13:11)

*Abraham mu na ánfí Ọbunsám lakíkí mu nńí dúkwe kéké ánfí ọkpúnú ọdaké?” 17Mu asun blíhé anfi léha pélu lékutá mu alupú ámu, ansí légyi atráhe amu féé, ofúla kpónkpóntu ámúú ọdebwe ámu su.

Takyí-akpin Ibí Yébi

(Mateo 13:31-32; Marko 4:30-32)

18Inu Yesu léfuté ọbée, “Nto Bulu iwíegyí ámu lẹlian? Ntée nto nọpukápú mu? 19Igyi fé takyí-akpin ibí, oyin ọku lódu wá mu ndọto. Uledan mlí oyi yilé, mbubwi butogyónká mú abámbito.”

Bodobodotu-afá Yébi

(Mateo 13:33)

20Yesu létrá blí ọbée, “Nto mpúkọpọ Bulu iwíegyí ámu? 21Igyi fé Bodobodotu-afá áńí ọtsi ọku lóputsiá bodobodo nńúó kente kule, ọleha mú ilotu.”

Obu-ọńs Kplánhe

(Mateo 7:13-14, 21-23)

22Bréá Yesu ọyọ Yerusalem a, ọlotsun nkudasi pú awúlusu. Ọna ọde amú ató suná. 23Ọha ọku léfuté mu ọbée, “Owíé, ahá kpalobí ku obénya nkpa?”

Yesu lébláa ahá ámu ọbée, 24“Mlubo mbódí amlutsun obu-ọńs kplánhe amuto. Tsúfé ahá tsọtsọtsọ bóbo mbódí áńí bótsun wie unu, táme buméetalí. 25Táme ní wóyí mu wie ọkúsú fin obu ámu, mlebá belí klun ọma, dá klun amusu mlaaa, ‘Owíé, finki ha aní!’ á, ọbéláa mlí ọbée, ‘Mmeyín mlí, mmeyín ọtínéá mlotsú.’ 26Inú mléblí mlaaa, ‘Ania funyo létsiá gyi ató, nú ntá, fetsiá súná ató aní dunsu!’ 27Táme ọbéle mú ọńs ọbée, ‘Mmeyín mlí. Mmeyín ọtínéá mlotsú. Mlunati tei mísú, mlí lalahe abwepú féé!’ 28Ní mlowun *Abraham, *Isak, *Yakob pú Bulu ọńsú atóipú amu féé bubu Bulu iwíe ogyíkpa, táme bumeha mlí mú ọkpa amlíwie unu á, unú mlósu kpisíi ní. 29Ahá bótsu owí ọdalíkpa pú owí ọkplíwíékpa, bunasu múa gyoypisu ba betsiá ató ogyíkpa Bulu

iwíegýí ámuṭo. ³⁰Ɖnɔkwali, amapu aku bémlí agyankpawu. Agyankpawu aku é bémlí amapu.”

Yesu Lósú Ha Yerusalem

(Mateo 23:37-39)

³¹Ɔnu Farisifo aku beba Yesu wá bebláa mu beɛ, “Dali Galilea ɔmátó nfi, tsúfé ɔmású ogyípú *Herode dékléá ɔbómɔ fú.”

³²Yesu lébláa amú ɔbéɛ, “Mliyebláa ɔkpataku ámu mliaa, ‘Négya ɔɛ laláhe lé ahátɔ, tsá ahá ɔɔ nde, gya le ɔke, mó mú ɔnɔ klái.’ ³³Táme ilehián ání nɔyɔ mí ɔnátí amusu nde, ɔke múa klái. Tsúfé ɔkpa má uná bómɔ Bulu ɔnósú ɔtɔ́pú ɔkuku ɔtunetune, dun Yerusalem!

³⁴“Óo Yerusalemfo, Yerusalemfo! Mlitómó Bulu ɔnósú atɔ́pú, dá abí ání Bulu lawá sísí mli abwi mó ní. Ntekleá nóbun mli abísú brégyíbré, fé alíá bate tobun mu abísú, táme mlitamahá mí ɔkpa. ³⁵Mliki, Bulu obési mli ɔtswékpa tswi mli. Nde mli bláa mbéɛ, mli méetrá wun mi ekekekeke, yófun ekeá mléblí mliaa, ‘Bulu oyúla ɔhá ámuó ɔbá mu dátó ámu.’”

Ɖɔpɔ Ɖku Tsa

14 ¹Farisifo ɔhande ɔku létí Yesu ató ogyíkpá mu wóyító *ɔkpúnú ɔdaké. Ahá ɔɔpɔ ansí yi Yesusu, bude mu téɛ. ²Ɔnu oyin ɔkúv́a alapúnyá léba Yesu wá. ³Yesu léfuté Mose mbla asunápú pú Farisifo ámu ɔbéɛ, “Ani mbla léha ɔkpa ání butsaá ɔɔ ɔkpúnú ɔdaké lóó, ntée umeha ɔkpa?”

⁴Amútó ɔkuku móbwíí ɔnɔ. Múy Yesu lékutá oyin ámu, tsá mu ɔɔ, olesi mu ɔlenatí. ⁵Ɔnu ɔlefuté ahá ámu ɔbéɛ, “Mlito ma mu bi ntée mu ɔnanswie ɔbékpadá wíé ibúntó ɔkpúnú ɔdaké, ɔmóɔkɔsí lé mu?”

⁶Bumetalí lé mó ɔnɔ.

lwiasibá

⁷Ɔnu Yesu lówun ání ahá ámuó beti ató ogyíkpá unu ámuṭo aku bude otsiákpá yilé dunká bétsiá. Múy ɔleha amú

yébi ɔbéé, ⁸“Ní ɔku ɔtí fú ɔká otsiákpá a, máyétsiá ɔfvákpá. Fíali ɔleti ɔhande ɔkuá ɔdun fu. ⁹ɛnu ɔhá ámúbú ɔleti mlí ámu ɔbebláa fu ɔbéé, ‘Mí wíé, kusu pu obiá ha ɔhá ánfí.’ ɛnu péli békítá fú, fépetí yódunká ɔtneku tsíá. ¹⁰Mú su ní ɔha ɔtí fú ató ogyíkpá a, yetsiá obiá kusubisu mboún, ɔhá ámu ɔbebláa fu ɔbéé, ‘Mí wíé, betsiá ɔfvákpá nfi.’ ɛni obótsu fú ansító fúá ahá ámu féé ansító. ¹¹Tsúfé ɔhagyíɔha ání ototsú iwí á, Bulu teba mu asi. ɔhagyíɔha ání ɔteba iwíasi é á, Bulu totsú mu fúá.”

¹²Yesu lébláa ɔhá ámúbú ɔleti mu ató ogyíkpá amu é ɔbéé, “Ní ɔtswí ɔpúnú ɔpa onyé á, máti fú anyawíé, fú apíó, fú abusuanfɔ ntée iwí anyapúbá butsie mantáa fú. Ní ɔɔbwé mú ali á, amú é bélatí fú amú kle asi ká ikɔ. ¹³Mboún ti ahiánfɔ, tsukule asínpu, abubúpu pú ansibi abwiepú. ¹⁴Bulu obóyulá fú, tsúfé buma tɔtɔá bɔpuká fú ikɔ. Bulu ɔbéka fú ikɔ ekeá ɔbókusúa aha yilé tsú afúlitɔ.”

Nke Kpɔnkpɔnti Ku Yébi

(Mateo 22:1-10)

¹⁵Ahá ámúbú amúa Yesu butsie ɔpúnúasi ámutɔ ɔkule lónu mu asun blíhé anfi, ɔleblí ɔbéé, “Ansí bégyi ahá ání bégyi ató Bulu ɔpúnú ɔtswíke mu *iwíégyí ámutɔ!”

¹⁶Táme Yesu lébláa mu ɔbéé, “Oyin ɔku lótswí ɔpúnú kpɔnkpɔnkpɔnti ku, ɔleti ahá tsɔtsɔtsɔ. ¹⁷Bréá beniná atogyihe amu tá á, ɔlɔwa mu asúmpú ɔbéé buyébláa ahá ámúbú ɔleti ámu bee, ‘Babwé tá!’ ¹⁸Táme amú féé beblí bee amú ibi de. Ogyankpapu ɔbéé, ‘Nahɔ ɔsulúu ku. Ilehían ání néyéki mú. Mú su mlíkita mútɔ ha ml.’ ¹⁹Onyɔɔsi é ɔbéé, ‘Nahɔ nnantswie yínhé idú, bópulipúli mí ndɔɔ há mí. Neyékapú amú ki. Mú su mlíkita mútɔ ha ml.’ ²⁰ɔbambá é ɔbéé, ‘Nwéen kótóó netsiá ɔká. Mú su mméetalí ba.’

²¹“ɛnu osúmpú amu léyínkí bebláa mu wie. ɔbls lekutá mu wie amu, ɔlebláa mu ɔbéé, ‘Wa ɔsa sri yeki dunsu pú brɔnusu, afukpa ahiánfɔ, tsukule asínpu, ansibi abwiepú pú abubúpu ba.’ ²²ɛmɔwa ɔpá osúmpú amu léba bebláa mu ɔbéé, ‘Mí wíé, nayó sumbí ámu, táme otsiákpá trá da.’ ²³Mu

wie amu lébláa mu ɔ́béé, “Tsun mmuátse múa nkpakwí fée. Ti ɔ́hagyíɔ́ha ání fówun fée ɔ́bá, méni ahá bɔ́bulá mí wóyítɔ́. ²⁴Nekáse, ahá ámuú nehie tí ámuɔ́ ɔ́kuku méeda mí atɔ́ ánfɔ́ ɔ́nɔ́!”

Yesu Búoto Ipian

(Mateo 10:37-38)

²⁵Yesu mva ɔ́ɔ́m kɔ́nkɔ́nkɔ́ntɔ́ ámu ná bɔ́yɔ́. Múú ɔ́ledamlí bláa amú ɔ́béé, ²⁶“ɔ́hagyíɔ́ha ání ɔ́leba mí wá, táme ɔ́de mu si, mu yin, mu otsiába, mu abí, mu apíó, mu onutó kúráá iwɔ́ dwe dun mi á, ɔ́méetalí bwé mí ɔ́kasípú. ²⁷ɔ́há ání omotsu mu *oyikpalíhe bobuo mi mɔ́fun ání ɔ́bɔ́bwe mí ɔ́kasípú.

²⁸“Mlɔ́ɔ́ ɔ́mɔ́mu bú inu, ní obéyi obu kɔ́nkɔ́nkɔ́ntɔ́ á, oméetsiá asɔ́ kɔ́ tɔ́á obéyintá, wun ání mu kɔ́ba bɔ́fun? ²⁹Ní ɔ́meki mú alɔ́, asa ɔ́ɔ́kusú wá obu ámu ntswasi, pwé mú fun ɔ́kpatɔ́, ɔ́metalí mɔ́ mú ɔ́nɔ́ á, obu ámu awúnpu fée bɔ́mɔ́sí mu. ³⁰Béblí beé, ‘Oyin ánfɔ́ lɔ́kusú ɔ́de obu yíi, ɔ́metalí mɔ́ mú ɔ́nɔ́.’

³¹“Ntée owíe ɔ́mɔ́mu bu inuá ní owíe ɔ́ku dé akɔ́pú mpím-advanyɔ́ (20,000) ɔ́bá ɔ́kɔ́ mu a, oméetsiá asɔ́ kɔ́ alɔ́ ɔ́bɔ́bwe ɔ́bɔ́pu mu isá akɔ́pú mpím-dú (10,000) yéfia amú? ³²Ní owun ání ɔ́méetalí á, ɔ́bɔ́wa abí ɔ́sasú bóyókokóli mu há ukulebwe, bréá bumɔ́kúnyá kpókpe ba. ³³Inu su mlɔ́ɔ́ ɔ́há ání omesi mu tóyítɔ́ ɔ́magyáa ɔ́méetalí bwé mí ɔ́kasípú.

Nfólá lma Labi

(Mateo 5:13; Marko 9:50)

³⁴“Nfólɔ́ bu alé, táme ní itá ɔ́dwe á, ntu bélapúwá mú ɔ́dwe? ³⁵lɔ́ráa ma ale há tɔ́tɔ́ɔ́ bwe. Tseí butetséí mú tsítsá wúnasu. ɔ́há ání ɔ́bu asu onúu asún ánfɔ́.”

Kufa Fwthé

(Mateo 18:12-14)

15 ¹Èke ɔ́ku *lampóo ahópu pú lakpan abwepú beba Yesu asun blíhé onukpá. ²Farisífo pú Mose mbla

asunápú amu bowuntí mu bée, “Oyin ánfí mva lakpan abwepú ténátí, butɔwá ibi gyi ató kúráá.” ³Mú su Yesu léha yébi púsúná amú ató ɔbée,

⁴“Mluto ma bú akúfa lafakule (100), ɔkule ɔfwí á, omesi adukwebá-kwebá (99) tráhe wá dimbító unu, yódunká mu alu kpéfún bréá obówun mu? ⁵Nahogyi mbée, ní owun mu a, ansí bégýi mu, obótsu mu wá nkɔnkɔ, ⁶pú mu ya wóyító. ɔbétí mu anyawíe pú mu aba, bláa amú ɔbée, ‘Mliha anya ansigyí. Nawun mí kufa amúbú ɔɔfwí ámu!’ ⁷Alí kén nde mli bláa mbée, ní lakpan ɔbwepú ɔkule pé ɔdamlí kluntó á, ansí béhíe gyi ahá ɔsúsú unu dun alíá ibégýi amú aha wankláán adukwebá-kwebá (99) ání bumetrá hián kluntódamlí iwí.

Kóba Fwihé

⁸“Ntée ní ɔtsi ɔku bu sika futútú dú, mótó kule lafwí á, omóonywe ɔkandíe kíkí mu wóyító wankláán, kpákpá ntobító kí, féí wóyí ámutó wankláán yófun bréá alawun mú? ⁹Ní owun mú á, ɔbétí mu apíó aba, bláa amú ɔbée, ‘Mliha anya ansigyí. Nawun mí sika futútú ámúbú ɔɔfwí ámu. ¹⁰Nde mli bláa mbée, alí ansí béhíe gyi Bulu-abɔpu ní lakpan ɔbwepú ɔkule ɔdamlí kluntó ní.’ ”

Obi Fwihé ɔku

¹¹Yesu létrá ha amú yébi ɔbée, “Oyin ɔku létsiá, ɔbu abi yinhé anyɔ. ¹²ɔkusú amu lébláa mu sí ɔbée, ‘Mí sí, ye fú atótó, afupu mí klé ha mi.’ lnu mu sí lékitá mu atótó ye há amú. ¹³Imegyí nke kuku ɔkusú amu lókulá mu ató féé, olotu ɔkpa yó tsútsúútsú ɔmá kutó. lnu oleyétsiá nkpa laláhe yíntá mu ató ámu féé. ¹⁴Bréá oleyintá ató ámu tá á, akún kpɔnkpɔntí ku léba ɔmá ámutó, ɔɔwa akún di bi. ¹⁵Mú su ɔɔpu iwí yémantá unuyin ɔkusú, oyin ámu lékpa mu yáa mu ibúasi ɔbée, ɔyéki mu mprákuosu ha mu. ¹⁶Teki olekleá obétsiá gyi mprákuo atogyihe amu ku, táme ɔhaa méha mu mú iwí ɔkpa. ¹⁷Bréá mu ansí leyinkí ba mu iwísu á, ɔlefíté mu iwí ɔbée, ‘Apafɔ amɔmu kúráá má mí sí wóyító, bumedé ató gyí sian ekekegyíeke? Mú ntsie nfi, akún de mí mɔ?’

18Nókusú yínkí yó mí sí wá, yébláa mu mbée, mí sí, napú ulá gyí Bulu, púgyi fú é. 19Mmekanáa ání fétrá ti mí fú bí. Pu mí bwée fú apafɔ ámutɔ ɔkule.’ 20Mú su ɔlokusú pú ɔkpa ɔbá mu si wá.

“Bréá olowotií, mu si lówun mu sísí á, ɔlɔwa mu nwe, ɔlesrí yéfia mu, látá mu pútá. 21Inu mu bi ámu lébláa mu ɔbée, ‘Mí sí, napú ulá gyí Bulu, púgyi fú é. Mmekanáa ání fétrá ti mí fú bí.’ 22Táme mu si létu mu asúmpú, bláa amú ɔbée, ‘Mliwa ɔsa yotsu atadie wankláán ámu ɔɔwa mu. Mliwa mu opetia, amlíwa mu ntukuta. 23Mliyele ɔnantswie yínhé kánáhe amú alawá nfo ámu ba, amlibɔmɔ mu, apugyi nke ha mu. 24Tsúfé mí bí ánfu lawú tsínkí. ɔɔfwi, anilawun mu.’ Inu ɔɔwa nke gyí bi.

25“Alí bré ámutɔ á, obi dehen amu bu ndɔɔ. Bréá olotsu ndɔ ámutɔ ɔbá, alata wóyítɔ wie tá á, olonu ání pléi de wóyítɔ nu. 26Mú su ɔletu mu si asúmpú amutɔ ɔkule, fíté ɔbée, ‘Amansu lába?’ 27Osúmpú amu léle mú ɔnɔ ɔbée, ‘Fú píó laba. Mú su fú sí lahá bamɔ ɔnantswie kánáhe amu, tsúfé alayínkí ɔɔtu mu, ɔbu nkpa, ɔbu ɔnlu.’

28“ɔblɔ lekutá ɔdéhen amu. Mú su olesin mmuáa. Mu si lédalí ba bokokóli mu ɔbée, ɔbá wóyítɔ. 29Táme ɔlele mú ɔnɔ ɔbée, ‘Mí sí, kí nfi dúdúbdúá napútsiá fú wá súm fú. Mmókúbwé mábúla kuku kí. Táme fomókúhá mí ɔkpalábi fée mía mí aba apúwa iwí ansigyí kí. 30Táme fú bí ánfu alayintá fú tógyítɔ, mua akipú bayégyi nkpa ánfu mú laba a, famɔ ɔnantswie yínhé kánáhe amú alawá nfo ámu há mu!’ 31Inu mu si lébláa mu ɔbée, ‘Mí bí, yée fú mú fúbu mí wá brégyíbré. Fúbú mí atɔ fée. 32Fú píó ánfu lawú tsínkí. ɔɔfwi, anilawun mu. Mú su lehián ání abégyi mú nke, nyá ansigyí.’ ”

Agyómású ɔkípu Anstínpu ɔku

16 ¹Yesu lébláa mu akasípú ɔbée, “Iwí onyapú ɔku létsiá, ɔbu agyómású ɔkípu. Ahá bowi tsá mu wie amusu bee ɔde mu gyí. ²Iwí su ɔletu oyin ámu, fíté mu ɔbée, ‘Ntɔ asún ndenu tsú fú iwí alí? Bobu akúnta ha mi, tsúfé

fuméetrá kú mí agyómású.’ ³Agyómású ɔkípu amu léfité mu ɛwɛ ɔbée, ‘Nkáli nóbwe? Mí wíe ɔbá begya mi. Mma ɔwɔnlín ání nénatí dɔ ha ahá. Ibu mi péli ání nénatí kúlí ató é. ⁴Ibu alé! Nyin tóá nóbwe, méni ní osí mí á, nénya ahá ání bóho mi wá amú wóyító.’

⁵“Mú su ɔletí ahá ání bude mu wie ɛkɔ kulekule. ɔlefíté ogyankpapu ɔbée, ‘ɛkɔ afinu fúde mí wíe?’ ⁶ɛkɔ ɔkitápú amu léle mú ɔnɔ ɔbée, ‘Nfɔ agbɔngbɔ lafa-anyɔ (200).’ Agyómású ɔkípu amu lébláa mu ɔbée, ‘Tsan fú adánsie ɔwulú ámutɔ, afɔwanlɛn lafakule (100).’ ⁷ɔlefíté ɔku é ɔbée, ‘ɛkɔ afinu fúde?’ ɛkɔ ɔkitápú amu lébláa mu ɔbée, ‘Bodobodo nfúo akente ɔpím-ɔkule (1,000).’ Agyómású ɔkípu amu lébláa mu ɔbée, ‘Tsan fú adánsie ɔwulú ámutɔ afɔwanlɛn lafakwe (800).’

⁸“Osikani ámu lékanfú agyómású ɔkípu anfí ɔma ɔɔkwali ánfí ání alatálí tɛn ansí alí.” Yesu lómɔ mú ɔnɔ ɔbée, “Ndemba-abí ání bubuo ɔyító ató ansítɛn ání ɔɔpu butsie amú abatɔ idɔn amúá buyin Bulu klé.

⁹“Nde mli bláa mbée, mɛpu ɔyító ató bwe apíó, méni ní itá á, Bulu ɔbóho mli wá mu wóyíá ibu ɛnɔ bré féétó. ¹⁰ɔhá ání ɔletalí kítá ató túkúríbí, olegyi ɔɔkwali músú á, mu kén obégyi ɔɔkwali ató kɔɔkɔntɛ ɛsú ni. Táme ɔhá ání ɔmɔwa ɔɔkwali ató túkúríbísisu ɔmɔwa ɔɔkwali ató kɔɔkɔntɛsu. ¹¹Mú su ní mlumá ɔɔkwali ɔyító atósú a, ma mɛɛ ɔbóho mɛisu gyi, pú ɔsúsú ató onutó wá mli ɛbitɔ? ¹²Ntée ní fuma ɔɔkwali ɔku klésu á, ma mɛɛ ɔbópu fú klé há fú?

¹³“Osúmpú ɔkuku méetalí súm awie anyɔ. ɔbódwe ɔkule, lí ɔkule. Ntée obóbu ɔkule, omóobu ɔkule. Fuméetalí súm Bulu, súm Kóba.”

Yesu Asun Blíhé Ku

(Mateo 11:12-13; 5:31-32; Marko 10:11-12)

¹⁴Farisifɔ butɔdwé kóba. Mú su bréá bonu Yesu asun blíhé anfí á, ɔɔbwe mu ahinlá. ¹⁵Ibu Yesu lébláa amú ɔbée, “Mɛtelé ɛwɛ súná ání aha yilé mɛgyí ahá ansító, táme Bulu

mú yin mli kluntɔ. Tsúfé tʒá nyankpusa tekiá ibu labi igyi Bulu akisító.

16“Mose Mbla ámu pú Bulu ɔnʒsú atɔ́pú amu asun wanlínhé loyɔ agyómá alu bɔfun Asú Ɖbɔpú Yohane brésú. Tsú musu bude Bulu iwíegyí ámu iwɪ asun wankláán ɔkan da, ahá é budeprú wie mótó. 17Ɖsú mʒa asi bétalí mʒ ɔnʒ, táme itoduáhé ntée asúnbi ukule kúráá móowu Mose Mbla ámutɔ.

18“Oyin okíná mu ka láyétsiá ɔtsi bámbá á, alató mbua. Oyingyioyin ání otsiá ɔtsi ánfɪ mu kulu lakíná mu é lató mbua.”

Iwɪ Onyapú Ɖku Mva Lasaro

19Yesu lébláa amú ɔbéé, “Iwɪ onyapú ɔku létsiá. Atati wuluhe ɔtedídá, otegyi nkpa wankláán ekekegyíéke. 20Ató ɔkúlíp ɔkuá mu iwɪ letsisií nlo é létsiá. Butetí mu Lasaro. Betsiá pú ohiáni ánfɪ yéyaí iwɪ onyapú ámu ɔkpa ɔnʒ. 21Ɖkiá obénya atogyihe mpupubiá ibékpakpáa bun oyin ámu ɔpónúasi gyi. Akíai létsiá beyintá mu nlo ámu kúráátó.

22“Bréá ohiáni ánfɪ lówu á, Bulu-abɔpu botsu mu ya, oleyétsiá anɪ náin Abraham wá ɔsúsú. Iwɪ onyapú ánfɪ é lóbowu, bopulá mu. 23Ɖloɔyɔ ɔbu isubití ogyá ání utamaduntɔ, ɔde iwɪɔsin wúun. Olotsu ansí fúá, olowun ání Lasaro tsie Abraham wá tsútsúútsú. 24Inu ɔɔkplón ɔbéé, ‘Anɪ sí Abraham-ée! Wun mi nwe, afuha Lasaro ɔyɔpu mu osrebi da ntsutso pubeda mí ɔdandusu, ilwii kpalobí. Nde iwɪɔsin wúun ogyá ánfɪtɔ dubi!’

25“Táme Abraham lébláa mu ɔbéé, ‘Obí, kaun, fú nkpatiátó a, fegyí ɔdwe, Lasaro é letsiá ɔsuntɔ. Séi á, ɔbu ɔdwetɔ, fú é fúbu ɔsuntɔ. 26Ɖma a, ulán kpɔnkpɔnkpɔntɪ ku da ania funyɔ nsiné. Mú su ɔhaa méetalí fá tsú nfi ba fú wá unu, ɔhaa é méetalí fá tsú unu ba anɪ wá nfi.’ 27Oyin ámu lébláa Abraham ɔbéé, ‘Múmú nobwíí ipa, anɪ sí Abraham, wa Lasaro sisi mí sí wóyító. 28Mbu apio yinhé abanú aku unu, ɔyeda amú ɔlá, méni bowú á, buméeba bowun iwɪɔsin ánfɪ odu.’

29“Abraham léle mú ɔ́nɔ́ ɔ́béé, ‘Mose mua Bulu ɔ́nɔ́sú atɔ́ipú amu nwulú bu amú wá, ide amú ɔ́lá da. Bunúu mú, abugyi músú.’ 30Oyin ámu léle mú ɔ́nɔ́ ɔ́béé, ‘Ani sí Abraham, asún ámu nu keke mééha amú abudamli klntɔ́. Mboún ní ɔ́ku ɔ́kúsú tsú afúlitɔ́ ý amú wá á, bédamli klntɔ́.’ 31Táme Abraham lébláa mu ɔ́béé, ‘Ní bumegyí Mose mua Bulu ɔ́nɔ́sú atɔ́ipú amu nwulútsú asún ámusu á, ɔ́ku ɔ́kúsú tsú afúlitɔ́ ý unu kúráá á, bumóonu ɔ́há ámu asún.’ ”

Lakpanbwe

(Mateo 18:6-7, 21-22; Marko 9:42)

17 1Yesu lébláa mu akasípú amu ɔ́béé, “Ibwébwéébwé á, ɔ́ku béha nyankpusa ɔ́bɔ́bwe lakpan, táme ɔ́há ání una musu mu ba ló́bwe lakpan ɔ́gyó́wí ní. 2Ní ɔ́ku léha ahá ánti bumɔ́kúdan mísú hógýitɔ́ ántitɔ́ ɔ́ku ló́bwe



Nfúókwebu (Luka 17:2)

lakpan á, ní beda nfúókwebu síán mu ɔ́metɔ́, tswi mu wá ɔ́pu okluklúkpa pó á, iwu alé dɔ́n. 3Mú su mlíkí mli iwu wankláán.

“Ní fú bá ɔ́pu ulá gyi fu á, wa iyin wa mu. Ní ɔ́ledamli klntɔ́ á, sikie mu. 4Ní ɔ́kpɔ́ ulá gyi fu tse sien^k ekewóle owító, ɔ́lela bobwií ipa há fú á, sikie mu.”

Hógýi

5Yesu *sumbí ayɔ́pú ámu bebláa mu beé, “Ha ani hógýi imoni tsa.”

6Yesu léle mú ɔ́nɔ́ ɔ́béé, “Ní mli hógýi lómoní fé takyí-akpin ibí á, mlétalí bláa keli ánti mlihaa, ‘Puli yelú ɔ́putɔ́.’ Ibwé bínká músú.

^k 17:4 Idesuná ání tsé dúdúá ɔ́kpɔ́ ulá gyi fu.

Osúmpú Gyumagyihe

7“Ní mlto oku bu osúmpúá otɔyɔ agyómá mu ndɔto ntée otɛki mu akúfasu, otsú agyómátɔ ba a, bláa mu wie tɛbláa mu ɔbéɛ, ‘Wa ɔsa bwe afugyi atɔ?’ Ekekekeke! 8Bláa ɔtebláa mu ɔbéɛ, ‘Tsu tati saba, afubɔtswi ɔpúnú ha mi. Belí mí angyi atɔ. Negyi ta á, fayégyi fú klé.’ 9Otedá osúmpú amu ipán ɔbéɛ, alabwé tɔá mɔwa mu bwe? Ekekekeke! 10Inu su ní mli é mlɔbwé tɔá bɔwa mli bwe tá á, mlibli mlíaa, ‘Asúmpú keke anigyí. Tɔá igyi anu bwehé anlabwé á.’ ”

Ulo Pepe Alɔpú Dú Tsa

11Yesu ná Samaria pú Galileafɔ okasu ɔyɔ Yerusalem. 12Bréá ɔleta wúlu kusu wie tá á, *ulo pepe alɔpú dú aku buna bebá befia mu, besi lí tsútsú. 13Inu ɔɔkplón blí beɛ, “Yesu! Owíé! Wun anu nwe.”

14Yesu lótsu ansí ki amú, ɔlebláa amú ɔbéɛ, “Mlɔpu mli twi yosuná Bulu igyi ɔhapú.”

Bréá ɔɔpu okpa ɔyɔ á, amú twi lépli. 15Okule mú lówun ání mu twi laplí a, oleyinkí ɔɔekplón kanfú Bulu kúklókúb. 16Olebemlí bún Yesu ayabitɔ, ɔɔɛ mu ipán da. *Samaraiyin oyin ánti gyí. 17Inu Yesu léfité ɔbéɛ, “Megyí ahá idú natsá? Mú kwebá atráhe mé? 18Mú su amótɔ okuku méba bekanfú Bulu dun Samariayin ɔfɔ́ ánti nkule?” 19Inu ɔlebláa oyin ámu ɔbéɛ, “Kusu natu. Fú hógyi latsá fú ulɔ.”

Bulu Iwíegyi Ámu Ibá

(Mateo 24:23-28, 37-41)

20Farisifɔ aku befité Yesu beɛ, “Omenke Bulu iwíegyi ámu lbéba?” Yesu lébláa amú ɔbéɛ, “Megyí tɔá ɔha ɔɔpɔ ansíbi wun Bulu iwíegyi ámu igyi. 21Ohaa méetalí blí ɔbéɛ, ‘Ki, múbu nfi.’ Ntée ‘Múbu nána á.’ Tsúfé mli kluntɔ Bulu iwíegyi amu bu.”

22Inu Yesu lébláa mu akasípú ɔbéɛ, “Eke oku ibá, mlódunká ání mlówun mí, Nyankpusa-Mu-Bi ánti ekewóle

¹17:14 Abubi ání mli twi laplí Mose mbla okpasu.

pé, táme mlimóowun mú. ²³Ahá bébláa mli bæe, ‘Ōbu nfi.’ ntée ‘Ōbu nána,’ táme mlimásrí buo amú yéki. ²⁴Tsúfé mí, Nyankpusa-Mu-Bi ánti ɔ́báke bóbwe fé alí ámúú nyankpu tɔ́fwí ibi, butowun mú nsaunto féé ámu. ²⁵Táme négyankpá wun iwɔ́sun tsɔ́tsɔ́tsɔ́, ndemba-abí ánti é békiná mí. ²⁶Alí ámúú ilegíi *Noa brésú amu a, alí ibégyi mí, Nyankpusa-Mu-Bi ánti é ibábi ni. ²⁷Ahá betsiá, bude ató gyí, bude ntá núu; bude aká tsiá, bude atsi kítá há akúlu alu yófun ekeá Noa lówie mu dáka kpɔ́nkpɔ́nti ámutɔ́, ntsu lóbulá bɔ́mɔ́ amú féé. ²⁸Alí kén ileba *Lot é brésú ni. Ahá betsiá, bude ató gyí, bude ntá núu, bude ató hɔ́, bude ató fe; bude ató du, bude ibu yíi, ²⁹yófun ekeá Lot lédalí Sodom wúluto, ogyá múa *atonkodu lotswie tsu ɔ́súsú behi amú féé. ³⁰Alí kén mí, Nyankpusa-Mu-Bi ánti iwɔ́wanleké bófwie ahátɔ́ ní.

³¹“Eke ámu a, ɔ́há ání ɔ́din obusu, mu ató ibu obuto ɔ́mákpílí bɔ́tsu tɔ́tɔ́. Alí kén ɔ́há ání ɔ́bu ndɔ́tɔ́ é máyinkí bɔ́tsu tɔ́tɔ́ ni. ³²Mlikaun Lot mu ka asúnsú!” ³³Tsúfé ní ɔ́ku lóduká ání ɔ́bépri mu nkpa á, ɔ́bɔ́hulí mú. Táme ní ɔ́ku lóhulí mu nkpa á, ɔ́bélanyá mú. ³⁴Nde mli bláa mbée, alí eke ámu onyé á, ní ahá abanyó buda ɔ́klan kulesu á, Bulu obótsu ɔ́kule sí ɔ́kule.

³⁵⁻³⁶“Ní atsi abanyó bude nfúó kwe á, Bulu obótsu ɔ́kule sí ɔ́kule.” ³⁷Yesu akasípú amu befité mu bæe, “Ani Wíe, nkónú ibéba?”

Yesu lébláa amú ɔ́bée, “Ōtínéá ito wuhé da a, unú alása butefia ni.”

Ɔ́surapu Mva Asón Ogyípú Ɔ́ku

18 ¹Unu Yesu léha yébi ku púsúná ání bubɔ́ɔ́ mpáú brégyíbré, umákpɔ́n amú. ²Ɔ́lebláa amú ɔ́bée, “Asón ogyípú ɔ́ku létsiá wúlu kusv. Ɖtamanyá Bulu ifú, ɔ́tamanyá ɔ́haa é péli. ³Ɔ́surapu ɔ́ku é létsiá wúlu amutɔ́. Oletsíá

^m 17:32 Bréá omobu Bulu, ɔ́ledamlí ku ɔ́ma a, olemlí nfólúsin. Ki Genesis 19:26. ⁿ 17:36 Múttó yée 36 bu nwulú dada amu akuto: Ní ayin abanyó bude agyómá yɔ́ ndɔ́ kvletɔ́ á, Bulu obótsu ɔ́kule sí ɔ́kule.

bokokóli mu ɔbéɛ, ogyíi mu asún ɔɔkwawisu ha mu, ɔle mu tsu mu olupú ibitɔ! ⁴Teki olekle okina, táme ɔma-ɔma a, ɔlebláa mu iwɛ ɔbéɛ, ‘Ibu mútɔ́á ntamanyá Bulu ifú, ntamanyá ɔhaa é péli. ⁵Táme ali ánfɛ ɔsurapu anfi ná ɔde mí háan anfi su á, négyi mu asún ɔɔkwawisu. Ní megyí ali á, oméesi mí tɔ́i wa. Ɔméesha mméenyá ɔkpa bwé tɔɔ.’ ”

⁶Yesu lóyɔ músú ɔbéɛ, “Mlíki alíá asún ogyípu anfi ɔtamagyi asún ɔɔkwawisu ánfɛ lablí. ⁷Mómú nkáli Bulu mú méegyí mu ahá ámúú alalé, budesú kpolí mu ɔpa-onyé ámu asún ɔɔkwawisu? Obési amú asún wá obiátɔ? Ekekekeke! ⁸Nde mli bláa mbéɛ, obégyi mú ɔɔkwawisu há amú ɔsasú. Táme ndefuté mbéɛ, ní mí, Nyankpusa-Mu-Bi ánfɛ neyínkí bá a, nówun ahógyipu aku ɔsulúv anfisú?”

Lampóo Ɔhɔpu Mwa Farisiyin

⁹Yesu létrá ha yébi ku púsúná amú atɔ tsú ahá ání buteki amú iwɛ yilé abwepú dun amú aba. ¹⁰Ɔleha yébi amú ɔbéɛ, “Ayin abanyɔ́ aku bɔɔɔ yɔ́ mpái ɔɔkpá Bulu ɔtswékpa. Amúɔ́ ɔkule gyí Farisiyin, ɔkule é gyí lampóo ɔhɔpu.

¹¹“Farisiyin amú lókusú líí, bó mpái wá nwuntɔ ɔbéɛ, ‘Bulu, nedá fú ipán ání mmegyí fé aku. Mí mú mma ɔnsípe, ntamasísi ɔha, ntamatɔ́ mbua, mmegyí fé Lampóo ɔhɔpu anfi é. ¹²Nteklí *ɔnɔ́ tse nyɔ́ ndawótswí ikuletɔ. Nteye mí atɔ́ féétɔ́ dú, lé idúsí há fú.’

¹³“Táme lampóo ɔhɔpu amú mú léyelí tsútsú, oloko nwuntɔ wá. Omotsulá tsú ansí kúráá fúá kí ɔsúsú. Ɔɔpu ɔbumáa dá ibitɔ, kókóli Bulu ɔbéɛ, ‘Óo Bulu, wun mi nwe, lakpan ɔbwepú ngyi.’ ” ¹⁴Yesu lómɔ́ mú ɔnɔ́ ɔbéɛ, “Nde mli bláa mbéɛ, asa beyinkí yɔ́ wóyí á, Bulu ansí légyi lampóo ɔhɔpu amú iwɛ dun Farisiyin amú. Tsúfé ɔhá ání ototsú iwɛ á, Bulu ɔbéba mu asú. Ɔhá ání ɔteba iwiasí é á, Bulu obótsu mu fúá.”

Nyebí Yulá

(Mateo 19:13-15; Marko 10:13-16)

¹⁵Aha aku bɔpu amú abí ba Yesu beɛ, ɔpúv ibi dínka amúsú, oyula amú. Mu akasípu bowun amú. Mú su bɔwa

tyin wá amú. ¹⁶Táme Yesu létí nyebí ámu ba mu iwí wá, òlebláa akasípú amu òbée, “Mlha nyebí ámu abuba mí wá. Mlumátin amú òkpa, tsúfé ahá ánfí odu bú Bulu iwíegýí amu ni. ¹⁷Ònòkwali nde mli bláa. Óhá ání òmòhò Bulu iwíegýí ámu fé kebi á, omóowie mótó.”

Atonyahé Iwí Atosunáhé

(Mateo 19:16-30; Marko 10:17-31)

¹⁸Èke òku Yudafo òhande òku lébefíté Yesu òbée, “Osunápú yilé, ntò nóbwe asa nénya nkpa ání utamatá?”

¹⁹Yesu léfíté mu òbée, “Ntogyi sú fude mí tí òha yilé? Óhaa mégyí òha yilé, nkétí Bulu nkule. ²⁰Yée fuyin Bulu mbla ámu o. Múgyí, mátò mbua, mámò òha, máwi ató, máka asún dínká fú bású, bu fú sí mua fú yín.”

²¹Óhande amu lébláa mu òbée, “Tsú mí nyebítò òpá nde mú féésú gyí.”

²²Yesu lónu mu asun blíhé anfi á, òlebláa mu òbée, “Toku kule ulasí ání fóbwe. Yefe fú iwísu ató féé, afuye kóba amu ha ahiánfo, méni fénya siadié òsúsú. Fóbwé mú tá á, ba afubobuo mi.” ²³Bréá oyin ámu lónu asún ánfí á, ulòtò mu klun, tsúfé óhíé òbu ató.

²⁴Yesu lówun ání ulahan mu. Mú su òleblí òbée, “Ìbu ònlun asa iwí onyapú obówie Bulu iwíegýí ámutò. ²⁵Lélé mú á, ulòpòn ha *kpósó ání òbòtsun òbun-atò òbótó, dun ání iwí onyapú obówie Bulu iwíegýí ámutò.”

²⁶Ahá ání bonu asún ánfí befíté bée, “Múmú ma mee Bulu òbòhò nkpa?”

²⁷Táme Yesu lébláa amú òbée, “Tóá nyankpusa méetalí bwé mòdún Bulu bwe.”

²⁸Ìnu Petro lébláa Yesu òbée, “Mí Wíe, kí, anulasí anu wóyí tswí bobuo fu.”

²⁹Yesu lébláa amú òbée, “Ònòkwali nde mli bláa. Óhaa má unvá obési mu wóyí, mu ka, mu apíó, mu akwípú ntée mu abí tswí Bulu iwíegýí ámu su, ³⁰Bulu méelawá mú otsiákpá há mu tsé dú tsé lafa séi, láha mu nkpa ání utamatá bré ámúbú ibá ámutò.”

Yesu Lowu Iwɪ Asún Blí Otse Saasi

(Mateo 20:17-19; Marko 10:32-34)

31 Yesu létɪ akasípú dúanyɔ ámu ya utsétɔ, ɔlebláa amú ɔbé, “Ayɔ Yerusalem. Inú asún amú Bulu ɔnɔsú atɔpú amu bɔwanlín tsú mí, Nyankpɔsa-Mu-Bi ánfɪ iwɪ ámu féé béba mótɔ ní. 32 Bée mí há ahá ání bumegyí Yudafo. Bɔbwe mí ahinlá, síá mí, tú atsvnɔ wólí mí. 33 Bépɪtí mí atɔ, mɔ mí. Mú eke sáásí a, nɔkɔsú tsú afúlitɔ.”

34 Akasípú amu bumonu ínɪ asi, tsúfé Bulu lɔpɔɔjáin amú. Bumebi tɔá ɔdeblí é.

Ansibi Obwiepú ɔku Ilo Tsa

(Mateo 20:29-34; Marko 10:46-52)

35 Yesu léta Yeriko wúlutɔ wie tá á, ansibi obwiepú ɔku tsie ɔkpa ɔnɔ, ɔde atɔ kulí. 36 Ansibi obwiepú ámu lónu ání ɔɔm budetsúun. Mú ɔlefuté ɔbé, “Amansu igyi?”

37 Ahá bebláa mu be, “Yesu Nasaretyin amu détsúun.”

38 Inu ansibi obwiepú ámu lɔkplun blí ɔbé, “Anɪ wie *Dawid mu na Yesu, wun mi nwe!”

39 Ahá amú bugya Yesu nkpa ámu bɔkplún wa ansibi obwiepú ámu be, ɔwáa ɔsa kpa ɔnɔ bun. ɔlelakplún dun ali ɔbé, “Anɪ wie Dawid mu na, wun mi nwe!”

40 Yesu lési lí, ɔleha ɔbé bukpa mu ba mu. Bréa bekpa mu ba a, Yesu léfuté mu ɔbé, 41 “Ntɔ fudeklé fe mbwée ha fu?”

ɔlele mú ɔnɔ ɔbé, “Owíe, ha mí anwun atɔ!”

42 Yesu lébláa mu ɔbé, “Fú hógyi latsá fú ilo. Wun atɔ.”

43 Inunu mu ansíbi lobwií, ɔlekplá buo Yesu, ɔde Bulu kanfú. ɔɔm amu féé bowun ínɪ, amú é bekanfú Bulu.

Yesu Mva Sakeo

19 ¹Yesu déka tsun Yeriko wúlutɔ. ²Lampóo ahópu ɔhande ɔkuá ɔbu kɔba bu wúlu amutɔ, butetí mu Sakeo. ³Oyin ánfɪ dékléá ɔbópu ansíbi wun Yesu, táme ɔma iswí, ahá é bɔdubi. ⁴Mú su ɔlesrí yɔdu pɔntɔ-oyí kuá

Yesu ɔbɔtsun mú asi, ménti obówun mu. ⁵Bréá Yesu lówie oyí ámu asi á, olotsu ansí fúá, wun Sakeo, ɔlebláa mu ɔbéé, “Sakeo, wa ɔsa kplɪ ba. Nde, fú wóyí nɔswú ní.”

⁶Sakeo lówa ɔsa kplɪ, pú ansigyí kpá mu ya wóyítɔ. ⁷Ahá ání bowun mú féé bowuntí beé, “Oyin ánfɪ layɔswú lakpan ɔbwepú wóyítɔ.”

⁸Sakeo lɔkɔsú líí wóyítɔ unu, bláa anɪ Wíe Yesu ɔbéé, “Mí Wíé, kɪ, néye mí atótɔ anyɔ, pú ifun kíé ahiánfɔ. Ní nasísi ɔku é á, nélahá mu mú aku ana.”

⁹Yesu lébláa mu ɔbéé, “Nde Bulu laho wóyí ánfɪ nkpa, tsúfé Abraham mu na ɔni ánfɪ é gyí. ¹⁰Ahá ání bafwí odunkákpa mí, Nyankpɔsa-Mu-Bi ánfɪ neba, anho amú nkpa.”

Asúmpú Kɔba Ha

(Mateo 25:14-30)

¹¹Ahá ámu bude asón amúú Yesu déblí ámu nu. Alɪ bré ámutɔ á, Yesu latá Yerusalem wie tá. Mú su ɔleha amú yébi pútswíí amú, tsúfé budesusúu beé Bulu iwíegyí béfi asi ununu. ¹²ɔleha yébi amu ɔbéé, “lwi onyapú ɔku lɔbwe agywun ɔbéé, mótu ɔkpa yɔ amú owíe dehen wá, ɔyai mu owíe, oyinki begyi iwíe mu ɔmátɔ. ¹³Asa ɔbɔyɔ á, ɔleti mu asúmpú idú, oleye pɔɔnu kulekule há amú féé. ɔlebláa amú ɔbéé buɔpúyɔ agyómá yɔfun ekeá méba. ¹⁴Táme mu wúluto ahá bolu mu, wá abí buo mu beé, bumedékléá ɔbwéé amú owíe.

¹⁵“Táme mú óó á, owíe dehen amu léyai mu iwíe amu, ɔlesankí ba wóyí. Olenya wíe pé ɔleha betɪ mu asúmpú amu, ɔkɪ tɔá banyá dínká kɔba amusu. ¹⁶Ogyankpɔpɔ léba bebláa mu ɔbéé, ‘Mí wíé, nanyá pɔɔnu dú tsía fú klé amutɔ.’ ¹⁷Múú ɔlebláa osúmpú amu ɔbéé, ‘Fabwé atɔ. Osúmpú wankláán fúgyi. Ínɪá fawá ɔnɔkwali utɔ túkúrííbi ánfɪ lwi su á, nɔpu awúlu idú wá fú ibutɔ, fékɪ músú.’ ¹⁸Onyɔɔsi léba bebláa mu ɔbéé, ‘Mí wíé, nanyá pɔɔnu anu tsía fú klé amutɔ.’ ¹⁹Owíe amu lébláa mu ɔbéé, ‘Fú é fékɪ awúlu anusu.’

²⁰“ɔbambá é léba bebláa mu ɔbéé, ‘Mí wíé, fú sika ámu ni. Neda mú wá dúkubi ɔnɔ yái. ²¹Nyin fu. Nde fú ifú nya, tsúfé fú asón bu ɔnlɪn. Futotsú atɔ ɔtínéá fumɔpu tɔtɔ yái,

fútoḱpótí ató é ɔtínéá fumodu toto.’²² Mu wie amu lébláa mu ɔbéé, ‘Osúmpú laláhe. Fú ɔnótó asún nópugyi fu asún. Yéé fuyin ání mí asún ihíé bu ɔnlun, ntotsú ató ɔtínéá mmɔpu toto tswi, kpótí ató ɔtínéá mmodu toto a?’²³ Mú ntogyi sù fumɔpu mí kóba amu yótswi sika ɔyaíkpá. Féki ní neyínkí ba a, nóyɔho mba músú abí?’

²⁴“Inu owíé amu lébláa ahá ání bubu unu ɔbéé, ‘Mlɔswu osúmpú anfi kóba amu ha ɔmvamúú olenya idú ámu.’²⁵ Táme ahá ámu bebláa mu beé, ‘Nanáin, ɔbu pɔɔnu dú dodo o!’²⁶ Owíé amu lébláa amú ɔbéé, ‘Nde mli bláa mbéé, ɔhá ání odekléá obónu mí atosunáhé amu asi á, Bulu ɔbópu iku tsía mótó há mu. Táme ɔhá ání omedékléá obónu mí atosunáhé amu asi á, Bulu ɔbóswuí mu kpalobí ámúú alabí ámu kúráá.’²⁷ Séi á, mlíkpa ahá ámúú bɔkusu líí mísú beé mmágyi iwíé amu ba, amlibɔmɔmɔ́ amú mí ansító nfi!’ ”

Boho Yesu Fé Owíé Yerusalem

(Mateo 21:1-11; Marko 11:1-11; Yohane 12:12-19)

²⁸Yesu léha amú yébi anfi tá á, ɔlɔtsun gyankpá pú ɔyó Yerusalem. ²⁹ɔleta Betfage mba Betania awúluá idun Nfɔnyíbu^o ámusu wie tá á, ɔlɔwa mu akasípú abanyó gyankpá, ³⁰bláa amú ɔbéé, “Mlyɔ wúlu anfi ida mli ansító ánfɔsu. Ní mlowíé wúlu ɔnó á, mlówun afrímú kanáhe ɔku da ɔfétó, ɔhaa mókútsiá musu ki. Mlɔsanki mu ba mi. ³¹Ní ɔku ɔfíté mli ɔbéé, ‘Ntogyi sù mli dé mu sankí?’ á, mlibla mu mlíaa, ‘Ani Wíé dé mu hián.’ ”

³²Akasípú abanyó ámu boyówun afrímú kanáhe ámu fé alíá Yesu lébláa amú. ³³Bréá bude mu sankí á, mu awíé befité amú beé, “Ntogyi sù mli dé mu sankí?”

³⁴Bele mú ɔnó beé, “Ani Wíé dé mu hián.” ³⁵Besi bekpa afrímú kanáhe amu ba Yesu, beyaí amú atati dínká musu, tsú Yesu bian musu. ³⁶Bréá Yesu tsie musu ɔyó á, ahá ámu bekpa amú atati yáí tswi ɔkpatɔ, ɔlenatí músú tsun.

^o 19:29 *Nfɔ-nyíbu* igyi obubwí kuá ibu mantáa Yerusalem, butetí mú Olifbu.

37 Bréá Yesu lówa Nfɔ-nyíbu ámu kplí ɔyó Yerusalem wúluto bi a, mu abúopu amu fée bɔtswi opé kánfú Bulu kóklókúú, ofúla amúú ɔlobwe, bowun amu fée su. 38 Bɛɛ, “Bulu oyúla owíe anfi ɔbá mu dátó ánfí! Iwilwii bu ɔsúsú. Numnyam ibwée Bulu klé ɔsúsúúsú unu.”

39 Farisifo aku bubu ɔɔm amuto. Inu bebláa Yesu bɛɛ, “Osunápú, ka fú abúopu anfi itin!”

40 Yesu lébláa amú ɔbée, “Nde mli bláa mbée, ní ahá ánfí behíé kpá ɔnó bun kúráá á, abwi ánfí bókplɔn kanfú Bulu.”

Yesu Lósú Yerusalem Su

41 Bréá Yesu léta Yerusalem wie tá, olowun wúlu amu sísí á, olosu ha mú. 42 Ɖbée, “Yerusalemfɔ, teki ilehián ání mlébu tóá utɔpú iwilwii ba nde, táme mlumétálí bí mú. 43 Bré ku íbá, mli alupú békafia mli abuntíi, pwé okpó wá mli, sá mli tin ɔkpagyíɔkpasu. 44 Béhu wúlu anfi pú mútó atsiápú. Buméesi íbwi kule dínká mú bású, tsúfé mlumébi bréá Bulu léba mli nkpa ɔhókpa!”

Ibíá Agyípú Gyáa Le Bulu Ɖtswékpa Wunsínésú

(Mateo 21:12-17; Marko 11:15-19; Yohane 2:13-22)

45 Bréá Yesu lówie Yerusalem a, ɔɔyɔ Bulu ɔtswékpa wunsínésú. Olenya wíé unu alí, ɔɔwa íbíá agyípú gyáa bi. 46 Ɖlebláa amú ɔbée, “Bɔwanlín wá Bulu asún ámuto bɛɛ, ‘Béti mí ɔtswékpa bɛɛ, mpái ɔbɔkpá.’ Táme mlilapú unu mlí awikplu ɔhaínkpá.”

47 Oletsíá súná ató Bulu ɔtswékpa unu ekekegyíeke. Bulu *igyí ahapú dehen, Mose mbla asunápú pú Yudafɔ ahande amu bodunká ɔkpa ání bótson mósú mósú mu. 48 Táme bumenya, tsúfé ahá ámu fée bubuo mu asun blíhé.

Yesu Túmi Iwí Asun Futéhé

(Mateo 21:23-27; Marko 11:27-33)

20 ¹ Eke ɔku Yesu bu Bulu ɔtswékpa wunsínésú unu ɔde Bulu asún wankláán ámu ɔkan da, ɔde ató suná. Inu Bulu igyí ahapú dehen, Mose mbla asunápú pú *Yudafɔ

ahande beba bɔtu mu. ²Befuté mu beɛ, “Ma léha fú ɔkpa fúde ntobí ánfɛ bwe? Ma léha fú túmi?”

³Yesu léle mú ɔnɔ ɔbéɛ, “Mí é nfíte mli asun kua kule. ⁴Bulu wá Asú Ɖɔɔpú Yohane lénya túmi púɔ́ ahá *asú lóó, ntée nyankpusa? Mlibla mi.”

⁵Amú wulewule bɔɔɔ asún ánfɛɔ beɛ, “Ní ablí aniaa itsú Bulu wá á, ɔbéfíté anɔ ɔbéɛ, mú ntogyi sù anumóhɔ mu gyi? ⁶Ní ablí aniaa nyankpusa wá é á, ɔɔɔm anfi béda anɔ abwi mɔ́, tsúfé bohogyi ání Bulu ɔnɔ́sú ɔɔɔpú Yohane gyí.” ⁷Mú su bele mú ɔnɔ beɛ, “Ohwée! Anuméyín ɔ́tínéá olenya mu túmi tsú.”

⁸Yesu lébláa amú ɔbéɛ, “Múmú mí é mméébláa mli túmi oduá ndepubwé ntobí ánfɛ.”

Apafɔ Laláhe Aku

(Mateo 21:33-46; Marko 12:1-12)

⁹Ɔnu Yesu létrá ha amú yébi ɔbéɛ, “Ɖɔɔɔɔɔɔ ɔku lóɔɔ *wáun ndɔ, ɔɔɔɔ ndɔ ámu wá apafɔ ibɛɔ, tú ɔkpa yó ɔmá kutɔ yétsiá unu nfi-nfi. ¹⁰Bréá wáun-abí ámu kpɔ́tíbi lɔfun a, ɔɔwa mu osúmpú apafɔ ámu wá ɔbéɛ, ɔyóhɔ mu ogyíkpa ba mu. Táme apafɔ ámu beda obí ámu, gya mu sísi ibikpan. ¹¹Ɖɔɔɔɔɔɔ amu lélawá mu osúmpú nyɔɔsi amú wá. Apafɔ ámu beda mu, sùpa mu, gya mu é sísi ibikpan. ¹²Ɖletrá lawá ɔba sáási. Apafɔ ámu bepilán mu, gya mu lé ndɔ ámuɔ. ¹³Múú ndɔ mu wie amu léblí ɔbéɛ, ‘Nkáli kúráá nɔ́bwe? Nówa mí onutó mí bí ɔdwepú amú wá. Fíali bóbu mu mú.’ ¹⁴Táme bréá apafɔ ámu bowun mu bi ámu sísi á, bebláa aba beɛ, ‘Ɖni obégyi mu si ató ní. Mliha amɔ mu, ménu ndɔ ámu ibémlí anɔ klé.’ ¹⁵Ɔnu bektá mu, bítiá mu dáli ndɔ ámuɔ yóɔm mu.

“Ntɔ mlilahogyi mlíaa ndɔ mu wie amu ɔɔɔbwe apafɔ ánfɛ? ¹⁶Ɖbéba bɔmɔ amú, pú ndɔ ámu wá apafɔ bámbá ibɛɔ.”

Bréá ahá ámu bonu asún ánfɛ á, beblí beɛ, “Ɔnu mú itsúun anɔsu!”

¹⁷Yesu lékɛ amú ansító díín, ɔlefuté amú ɔbéɛ, “Bulu asún ánfɛ asi mé?”

‘Ibwi ámú obu ayípu bekiná ámu
lébemlí okonkísúbwi ní.’

18 ǪhagyíǪha ání Ǫledida ibwi ámúsu obébiabía blúblúblúblú.
Ní ibwi ámu isúnkí dá Ǫkusú é á, ibǪkwe mu fíkǪfíkǪfíkǪ fé
nfúó.”

Lampóoka

(Mateo 22:15-22; Marko 12:13-17)

19 Ǫwankí Mose mbla asunápú pú Bulu igyí ahapú amu
ání amú iwí yébi alahá. Iwu bekleá békítá mu, táme benya
ahá ámu ifú. 20 Mú su bodunká Ǫkpa ání bǪtsun músú kítá
Yesu. Iwu bele ahá bee bupína bwe iwí fé aha wankláán,
abute mu kí bee bónu aswanku tsú mu ǪnǪ, méni béli músú
kítá mu ya ǪmáǪ ogyípu. Mubúv túmi gyi mu asún. 21 Yesu
atépu amu befité mu bee, “Osunápú, anyin ání ǪnǪkwaliwu
fugyi, fútosúná mú é. Futamaki Ǫhaa ansítǪ. Mboún
futosúná Bulu Ǫkpa ámu ǪnǪkwaliwu. 22 Afíte fú! Aní mbla
leha Ǫkpa ání akáa lampóo ha Roma owíe dehen Kaesare,
ntéé anumáka?”

23 Táme Yesu lówun amú agywun. Mú su Ǫlebláa amú
Ǫbéé, 24 “Mliwu kǪba amu ku ba mí anki.” BǪpuba mu. Múú
Ǫlefíté amú Ǫbéé, “Ma nwun pú mu idá dín músú?”

Bele mú ǪnǪ bee, “Kaesare.”

25 Múú Ǫlebláa amú Ǫbéé, “Múúmú mliwu tǪá igyi Kaesare
klé ha Kaesare, amliwu múá igyi Bulu klé é ha Bulu.”

26 Mú su bumetalí líl Yesu asun blíhé anfiwu kítá mu ahá
ámu ansítǪ. ǪnǪ é lobwie amú, bumetalí trá bwií ǪnǪ.

Kusú Tsú Afúlito Iwí Asun Futéhé

(Mateo 22:23-33; Marko 12:18-27)

27 *Sadukifo Ǫpasua buteblí bee, kusú tsú afúlito ma unu.
AmútsǪ aku beba Yesu wá, 28 befité mu bee, “Osunápú, Mose
lówanlín tswi aní Ǫbéé, ‘Ní Ǫku mua mu ka bumǪkwí asa
olowu sí mu ka ámu a, mu pio otsú mu ka ámu tsia, fékí
Ǫkwu ha owupú ámu.’ 29 Oyin Ǫkule abí abasiénǪ aku betsiá.
AmútsǪ ogyankpapu létsiá Ǫká, táme ǪmǪkwí asa olowu.

³⁰Mu gyama lótsu ɔsurapuka amu tsía, táme mu é ɔmɔkwí. ³¹Ɔsaasi é lótsu ɔtsi ámu tsía. Mu é ɔmɔkwí. Alu yótu osienósí amu. Amótɔ ɔkuku mɔkwí asa olowu. ³²Ɔma-ɔma a, ɔsurapu amu é lóbowu. ³³Afúli ɔkusúké a, amótɔ ɔmɔmu ɔbɔbwe mu kulu? Tsúfé amú abasiénɔ́ ámu fée betsiá mu.”

³⁴Múu Yesu léle mú ɔnɔ́ ɔbé, “Ɔyi ánfɔtu ahá tétsía aká múa akúlu. ³⁵Táme iméeba alí bré ámúú íbá ámutɔ. Ahá ámúú ɔɔfun ání bókusú tsú afúlitɔ, tsía nkpa ɔyi ámúú íbéba amutɔ ámu mú buméetsiá akúlu, buméetsiá aká. ³⁶Buméetrá wu, tsúfé ɔbɔbwe fé Bulu-abɔpu. Bulu ahá bugyi, tsúfé bakúsú tsú afúlitɔ. ³⁷Ani náin Mose kúráá lówanlín atɔ tsú afúlikusú iwí. Tsúfé ɔlwanlín ɔbé, eke ámúú olowun oyíbi ku de ogyá tsíi, táme imedéhɔ́ amu a, ɔletí Bulu ɔbé, ‘Abraham mu Isak pú Yakob Bulu.’ ³⁸Megyí awupú Bulu ógyi, akɔnkpapu Bulu ógyi, tsúfé mu ansítɔ́ mú á, amú fée bubu nkpa.”

³⁹Ínu Mose mbla asunápú amu aku beblí be, “Osunápú, fabí lé mú ɔnɔ́!” ⁴⁰Mú su amótɔ ɔkukukuku métrá wa klun fité mu asvansu.

Ma Gyí Kristo Amu?

(Mateo 22:41-46; Marko 12:35-37)

⁴¹Ínu Yesu léfité mbla asunápú amu ɔbé, “Nkáli ulɔbwe asa ahá be, Owíe Dawid mu na gyí Kristo amu? ⁴²Tsúfé owíe Dawid onutó léblí *Israelfɔ́ ulu ámutɔ ɔbé,

‘Ani Wíe Bulu lébláa mí Wíe ɔbé,

Tsia mí gyɔpu,

⁴³ yófun bréá nɔ́pu fú alupú bwé fú ayabi oyíkpa.’

⁴⁴Owíe Dawid létí Kristo amu ɔbé, mu wie. Mú nkáli su ɔtráa ogyi mu na?”

Mose Mbla Asunápú Tsiátɔ́

(Mateo 23:1-36; Marko 12:38-40)

⁴⁵Ínu ɔlebláa mu akasípú ahá ámu ansítɔ́ ɔbé, ⁴⁶“Mluku Mose mbla asunápú anfí wankláán. Butekle ligá wa náti kí. Butekle be ahá bubún ha amú itsiá dunsu. Otsiákpá

yilé butekle tsiá Yudafo offiakpa pú nke ogyíkpa. ⁴⁷Butɔswí asurapu amú wóyí, butepina bɔ mpái tíntíúntín aháto póbun amú lalahesu. Bulu ɔbébití amú ɛsu kínkíínkín!”

Ɔsurapu Ɔku Tswitswi
(Marko 12:41-44)

21 ¹Bréá Yesu tsie mantáa tswitswi dáka ámu Bulu ɔtswékpa unu á, olowun alíá ahá ání amú ɛbitɔ bu odwin buɔɔpɔ kɔba akpɔnkpɔnti bɔwa dáka ámutɔ. ²Unu ɔsurapu ohiáni ɔku é lɔpu mu kɔba ana bɔwa mútɔ. ³Múú Yesu léblí ɔbéɛ, “Ɖnɔkwali nde mli bláa, tswitswiá ɔsurapu anfi, ɔma tɔtɔ anfi lawá á, ɛɔun ɔhagyíɔha klé. ⁴Tsúfé atráhe amu féé á, amú kɔba tsɔtsɔtsɔ balé kpalobí tsú bɔwa. Táme ɔsurapu anfi mú íniá ɔma tɔtɔ su tɔá ɔbu féé alapú bɔwa á.”

Bulu Ɖtswékpa Amu Bwie
(Mateo 24:1-2; Marko 13:1-2)

⁵Yesu akasípú aku buɔɔtɔí tsú alíá bɔpu abwi ání ɛbu bíá yi Bulu ɔtswékpa amu, pú atokiehé wankláán lá mútɔ. Táme Yesu lébláa amú ɔbéɛ, ⁶“Bré ku ɛbá, bóbwie mú féé bun. ɛbwi kule kúráá méesian ɔnká mú bású.”

Ɔwɔsun Múa Ɔklán
(Mateo 24:3-14; Marko 13:3-13)

⁷Múú mu akasípú amu befíté mu beɛ, “Osunápú, bré mɔmɔtɔ íni féé béba? Osúna mɔmu abɔpúbíá bré ámu ɛlafun?”

⁸Unu Yesu lébláa amú ɔbéɛ, “Mlíki wankláán, ménu ɔhaa méemlé mli. Tsúfé ahá tsɔtsɔtsɔ bɔpu mí dá ba beɛ, amúgyí Kristo amu ni. Mú bré lafun ta, táme mli mábuo amú. ⁹Ní mlonúá ɛsá múa kpokiti ladá á, opúni mátsíí mli. Tsúfé ilehián ání íni aná bégyankpá bá, táme ɔyí ɔnɔmɔké ɛméeba unu.”

¹⁰Unu ɔlébláa amú ɔbéɛ, “Ɖmá bɔkɔ aba. Awíe bɔkɔsú líí abasu. ¹¹Ɖsulú ɛbékpunkí ntíné-ntíné. Akún múa ɛlɔ

tsánkíhé é béba ntíné-ntíné. Ntobíá ihíé bu ifú pú osúna akpɔkpɔnti béba tsú ɔsúsú. ¹²Táme asa mú fée béba a, békutá mli, béhie dínká mli, pú mli ya Yudafo ofiakpa yégyi mli asún, wá mli obu. Mí su békpa mli ya awíe pú ɔmású agyípú ansítú. ¹³Íni ɔbéha mli ɔkpa mlétalí gyi mí tɔwí adánsie súná amú ní. ¹⁴Táme mli máhan mli tɔwí susúu alíá mléle tɔwí ɔnó. ¹⁵Tsúfé néha mli nyánsa múa ɔnɔwanki, mli anyabá ámutɔ ɔkuku méetalí gyi mli nwéén. ¹⁶Mli akwúpú, mli apíó, mli wóyítú ahá pú mli anyawíe kúráá béle mli há, bómo mlitɔ aku. ¹⁷Mí su ahá fée bólu mli. ¹⁸Táme mli nwunso-imi kule kúráá mɔɔfwí. ¹⁹Ní mletálí líí kínkín á, mlénya nkpa ání utamatá.

Yerusalem Bwie tɔwí Asún Blí

(Mateo 24:15-21; Marko 13:14-19)

²⁰“Ní mlowun ání ísá akɔpú bakáfía Yerusalem wúlu a, mli búá wúlu amu íbá obwiekpá. ²¹Múmú ahá ání bubu Yudea ɔmátú busrí yɔ abusu. Ahá ání bubu Yerusalem wúlutɔ budáli. Amúá buma wúlu amutɔ é bumáyinkí ba. ²²Tsúfé alí nke ámu íbɔbwe Israelfɔ ísɔbití nke fé alíá Bulu ɔnósú atɔpú amu ɔɔwanlín tswí. ²³Amenyapú pú abí ayín ání bupia abi ɔɔbwe alí bré ámutɔ, bɔgyɔwí ní. Tsúfé asun wunhe amu ɔnó bówa ɔnlun. Íkplán kpɔkpɔnti béba ɔsolúsu, ísɔbití kpɔkpɔnti é íbéba mósú atsiápúsú. ²⁴Amútú aku bésin ɔdayí ɔnó. Békutá amú aku é ndoun ya ɔmá-ɔmátú. Yerusalem wúlu bétsiá ɔmá bámbásúfɔ así, alí yɔfun bréá amú ɔmá ámu asútsiábí lamó ɔnó.

Nyankpusa-Mu-Bi Ámu Íbábi

(Mateo 24:29-31; Marko 13:24-27)

²⁵“Bówun osúna owí, ɔtsra pú ntsrakpabisu. ɔpu béda ífúsú. ɔsolúsu atsiápú bénya ífú, buméebu tóá bubwée. ²⁶Nwulótáa múa mótú atú fée békpunkí. Mú su ahá bénya ífú, tún ñé tóá ídebá su. ²⁷Alí bré ámutɔ á, ɔhagyíɔha obówun ání mí, Nyankpusa-Mu-Bi ánfí napú túmi múa numnyam kpɔkpɔnti mbu nwulótáatɔ tsú ɔsúsú nebá. ²⁸Ní

ntobí ánfí ide mósú yó á, mlikusu lu, amlitsu ansí fua kí, tsúfé mli nkpahóbí lafun.”

Ɔyí Ɖnómɔ lwi Osúna

(Mateo 24:32-35; Marko 13:28-31)

²⁹Yesu léha amú yébi ɔbé, “Mlipukí pɔntɔ múa nyí atráhe. ³⁰Ní ide ate pɔpwe le á, mltowun mú, bí ání awikpan bré lafun ta. ³¹Alí kén, ní mlowun ání ntobí ánfí fée ide mótó bá a, mlibi ání Bulu iwíegyí ámu ulawíe wóyí tá.

³²“Ɖnɔkwali nde mli bláa. Ndemba-abí ánfí fée bumóowu tá, asa íni fée béba mótó. ³³Ɖsú múa asi fée bótsun, táme mí asun blíhé mótótsun ekekekeke.

lwɩsuda

³⁴“Mlíki wankláán, méni opotsuawa, ntábu pú ɔyító ató ɔmagyáa méegyí mli agywunsu, méni mí, Nyankpusa-Mu-Bi ánfí ɔbáke amu méebekítá mli fé yibi. ³⁵Tsúfé íbéba ɔyító ahá féesú. ³⁶Íni su mligyo, amlibo mpái, méni mlénya ɔwɔnlín tálí tsun ofúla amu féesú, belí mí, Nyankpusa-Mu-Bi ánfí ansító.”

³⁷Nke ámvto á, Yesu létsiá yósuná ató Bulu ɔtswékpa unu ɔpa. Onyé á, alanátí yó Nfɔ-nyíbu ámusu. ³⁸Ahá tsɔtsɔtsɔ butɔkúsú ba Ɖtswékpa unu bake, bonu mu asun blíhé.

Bekikí Yesu Nwunsu

(Mateo 26:1-5; Marko 14:1-2; Yohane 11:45-53)

22 ¹Israelfɔ *Bodobodo Mátúhé *Nke, igyi amósú Katsun *Nke ámu gyí íbá ɔofun. ²Bulu *igyí ahapú dehen pú Mose mbla asunápú amu bodunká ɔkpa ání bótsun mósú kítá Yesu njaintɔ, mó mu, tsúfé buɔde ahá ámu ifú nya.

Yuda Iskariot Lótsulá Ání Ɖbéle Yesu Há

(Mateo 26:14-16; Marko 14:10-11)

³Unu Ɖbunsám lówie Yuda Iskariot, ogyi Yesu akasípú dúanyɔ ámvto ɔkuletɔ. ⁴Mú su ɔloyɔ Bulu igyí ahapú dehen pú Bulu ɔtswékpa agyópu dehen wá, bekítá agywun alíá

ɔbée Yesu há amú. ⁵Ansí légyi amú. Mú su botsulá ání béka mu ɔkɔ. ⁶Yuda lótsulá. Mú su olodunká ɔkpa ání ɔbótsun músú híéé lé Yesu há amú, bréá ahá tsɔtsɔtsɔ ámu buma unu.

Katsun Atogyihe Gyí

(Mateo 26:17-19; Marko 14:12-21; Yohane 13:21-30)

Luk

⁷*Bodobodo Mátúhé *Nke ámuɔ ekeá butómó Israelfɔsu Katsun *Nke akúfa ɔfon. ⁸Yesu lówa Petro mua Yohane ɔbée, buyɔbwe Israelfɔsu Katsun atogyihe amu yai ha amú. ⁹Petro mua Yohane befité mu bée, “Ani Wíé, nkónu ayɔbwe mú yai?”

¹⁰Múú ɔlebláa amú ɔbée, “Ní mlowíé wúlu ɔnó á, mléfia oyin ɔkúá ɔsu ntsu-ɔl. Mlibuo mu yɔ wóyít. ¹¹Mlowíé á, mlifite wóyí mu wie amu mliaa, ‘Osunápú ɔbée, afíte fú, nkónu afɔɔ ɔswúkpá bu, ání mía mí akasípú abéba begyi Katsun atogyihe amu?’ ¹²Obósuná mli abansúru yílé kúá balá mútɔ yái. Mlibwe atɔ ámu yai unu.”

¹³Petro mua Yohane bɔpu ɔkpa. Boyówun tógyítɔ alí ámúú Yesu lébláa amú ámu pépéépé, bɔbwe Katsun atogyihe amu yái unu.

Yesu Ntúpwe Atogyihe Tráhe

(Mateo 26:26-30; Marko 14:22-26; 1 Korintofɔ 11:23-25)

¹⁴Atɔ ámu gyíbi ɔfon, Yesu mua mu *sumbí ayɔpú beba betsiá ɔpónú ámu asi. ¹⁵Yesu lébláa amú ɔbée, “Nhíé ndeklé mbée, mía mlunyɔ abégyi *Katsun Nketɔ atogyihe anfi asa mí anwun iwɔsun. ¹⁶Tsúfé nde mli bláa mbée, mméetrá gyi mú ekekekeke yɔfon ekeá itɔ ámúú atogyihe anfi ulí há ámu laba mútɔ Bulu iwíegyí amuɔ.”

¹⁷Unu olotsu ntá-ewe, dá Bulu ipán, ɔlebláa amú ɔbée, “Mliho amlinu ha aba. ¹⁸Tsúfé nde mli bláa mbée, mméetrá nu *wáun-abí ntá ánfi ekekekeke yɔfon bréá Bulu iwíegyí ámu ibéba.”

¹⁹Unu ɔlele bodobodo ipín, ɔleda Bulu ipán, bíábía mútɔ púhá amú, blí ɔbée, “Mí ɔyulúá mli su nasí há ní. Mliutsia

bwe íni pukau nísú.”²⁰ Alí kén, bréá begyi ató ámu tá á, olotsu ntá-ewe ámu há amú, blí ɔ́bée, “Ntá-ewe ánfí gyí Bulu ntam ɔ́ɔpwe ání nétseí mí obugya wólí púsí mósú há mli ní.

²¹ “Íniá ndeblí á, mía ɔ́há ámú ɔ́bée mí há ámu ibi da ɔ́lepe ɔ́kuletɔ. ²² Mí, Nyankpusa-Mu-Bi ánfí nówu fé alíá Bulu léhúe yái, táme ɔ́há ámú ɔ́bée mí há ámu ɔ́gyówu.”

²³ Inu befi asi bude aba fité bee, “Ngya anito ma ɔ́ɔ́bwe íni?”

Ma ɔ́ɔ́bwe ɔ́hande?

²⁴ Nwéengyí léba sumbí ayɔ́pú ámutɔ, amú ɔ́ ɔ́muá ɔ́ɔ́bwe ɔ́hande su. ²⁵ Yesu lébláa amú ɔ́bée, “ɔ́mátɔ́fɔ awíe bubu túmi amú ahásv. Ahá ámu butetí amú ahande bee, ‘Buale agyíú.’ ²⁶ Táme mli ɔ́ mu á, imába alí. ɔ́há ání odekléá ɔ́ɔ́bwe mli ɔ́hande ɔ́bwée mu iwí ɔ́tráhe. ɔ́há ání odeklé ɔ́bée, mɔ́bwe mli nkpa ogyápu é ɔ́bwée mu iwí fé osúmpú. ²⁷ Ma dún mu ba? ɔ́há ání otsie ɔ́púnúasi lóó, ntée ɔ́há ání odesúm ɔ́púnú ámu asi? Megyí ɔ́há ámú ɔ́tsie mú asi ámu dun? Táme mbu mli ɔ́ fé osúmpú.

²⁸ “Mlúswa klun buo mi mí isóki féétɔ ní. ²⁹ Alí ámú mí Sí layái mí owíe amu a, alí mí é nde mli yai ní, ³⁰ méni mlétsiá mí ɔ́púnúasi, gyi ató, nú ntá mí iwíe ogyíkpa unu. Mlétsiá awíe mbíású, gyi *Israel abusuan dúanyɔ́ ámu asún.”

Petro ɔ́ɔ́swí ɔ́bée Mumeyín Yesu

(Mateo 26:31-35; Marko 14:27-31; Yohane 13:36-38)

³¹ Yesu lébláa Simon Petro ɔ́bée, “Simon, Simon! Kí, ɔ́bunsám dé ɔ́kpa kulí ɔ́bée, obófuní mli fé ayó. ³² Táme nakókóli Bulu há fú mbée, fumádúda hógyitɔ. Ní feyínkí ba mí wá á, wa fú aba ámu é ɔ́wunlín.”

³³ Petro lébláa mu ɔ́bée, “Mí Wíé natsúlá, ní obu igyi kúráá mía funyɔ́ abédi. Ní lowu ígyi é á, mía funyɔ́ abówu.”

³⁴ Yesu lébláa mu ɔ́bée, “Petro, nde fú bláa mbée, nde, asa bate ɔ́bée ɔ́nɔ́ á, fúswí pú ibi wá ogyá tse sa fee fumeyín mí.”

Iwuklí Ání Ibéba Ekékó

35 Inu Yesu léfité akasípú amu ɔbéé, “Bréá nɔwa mli sumbí, mlimédé sika akente, mlimédé akpankogyo ntée ntukuta nyɔɔsi a, tɔku lehián mli?”

Bele mú ɔnɔ beé, “Ekekeke! Tɔtɔ mehián anu.”

36 Mú ɔlebláa amú ɔbéé, “Táme séi mú á, fúá fúbu sika kente, ntée akpankogyo a, tsu kita. Ní mlito ɔku má ɔdayí ɔya anyɔ á, ɔfé mu tati puho ku! 37 Tsúfé ilehián ání mí iwí asún ámú ɔbu Bulu asun wanlínhéto ámu ibéba mútɔ. Bɔwanlín beé, ‘Bekla mu wá lakpan abwepútɔ.’ Tsúfé asún ámú ɔbwanlín tsú mí iwí ámu ibá lafun ta.”

38 Akasípú amu bebláa mu beé, “Ani Wíe, ki, ndayí anyɔ ní.”

Mú Yesu lébláa amú ɔbéé, “Ito.”

Mpáɔ Nfɔ-nyíbusu

(Mateo 26:36-46; Marko 14:32-42)

39 Yesu lédalɔ wúluto yɔ Nfɔ-nyíbu ámusu, fé alá otetsiá yɔ inu yái. Mu akasípú é bobuo mu. 40 Bréá bowie inu á, ɔlebláa amú ɔbéé, “Mlikokoli Bulu, méni mlimóowie ɔsókito.”

41 Mú ɔledalɔ amú ɔyɔ nkpa kpalobí fé nfi múa nfi, yéda akpawunu bó mpái ɔbéé, 42 “Mí Sí, ní fótsulá á, ha ntá-ewe ánti^p itsun misu. Táme megyí tɔá ndeklé, múa fudeklé ibá mútɔ.” 43 Inu Bulu-ɔbɔpu lótsu ɔsúsú bá bele iwí ɔwan súná mu, wá mu ɔwunlín. 44 Asún ihíe de mu háan. Mú su ɔɔbɔ mpái kinkíinkín. Uleha mu apípi lemlí fé obugya, ɔdetin da ɔsuloto ta-ta-ta.

45 Bréá ɔɔkusú tsú mpái ámu ɔbɔkpá, yínki ba akasípú amu wá á, olowun ání budedidi. Awireho de amú. Mú su iwí lawú amú. 46 Mú ɔlefíté amú ɔbéé, “Ntogyi sɔ mlidédidi? Mlikusu amlikokoli Bulu, méni mlimóowie ɔsókito.”

^p 22:42 Ntá-ewe ánti igyi iwɔsin ání Yesu obówun.

Yesu Kitá

(Mateo 26:47-56; Marko 14:43-50; Yohane 18:1-11)

47 Yesu ɔ́nɔ́ mesi, ɔ́ɔm bowotíí amó́sú. Akasípú dúanyɔ́ ámvɔ́ ɔ́kuleá butetí mu Yuda gyá amú nkpá. Inu ɔ́lenatí tó Yesu ɔ́béé, amvlata mu puta, 48 táme Yesu léfité mu ɔ́béé, “Yuda, latá félatá mí, Nyankpusa-Mu-Bi ánfí pútá, pólé mí há?”

49 Akasípú amó́ bubu Yesu wá ámu bowun tóá íbá. Mú su befuté Yesu bée, “Akóó amó? Anibu ndayí.” 50 Inu amótó ɔ́kule lótswi mu ɔ́dayí kpá Bulu igyí ɔ́hapú dehen osúmpú ɔ́ku gyɔ́ɔɔɔ-ɔ́su lé.

51 Yesu lébláa ɔ́kasípú amu ɔ́béé, “Mábwe! Isíí mli ɔ́ka!” Inu ɔ́ɔpu íbɔ́ da osúmpú amu ɔ́su ámu, ileyinkí tsá.

52 Mú Yesu léfité Bulu igyí ahapú dehen, Bulu ɔ́tswékpa agyópu ahande pú Yudafɔ́ ahande amó́ beba mu ɔ́kitákpá amu ɔ́béé, “Ogyo otswapú ngyi, sù mlilatsú nkpotí pú ndayí mlebá mí ɔ́kitákpá?” 53 Ntsie mli wá Bulu ɔ́tswékpa wunsunésú ekekegyíeke, mlimópu íbɔ́ da mi ekekeeke. Táme mli bré ní, oklún túmi dé iwíé gyí.”

Petro Lóswí ɔ́béé Mmeyín Yesu

(Mateo 26:57-58, 69-75; Marko 14:53-54, 66-72;
Yohane 18:12-18, 25-27)

54 Inu ahá ámu bekítá Yesu, kpá mu ya Bulu igyí ɔ́hapú dehen wóyító. Petro lépetí obuo amó́ ɔ́ma tsútsúútsú. 55 Táme bréá bosun agyabi wunsunésú inu, butsie mú así á, Petro léyétsiá amó́ wá. 56 Otsibi ɔ́kúvá ogyi osúmpú inu lówun ání Petro tsie ogyá ámu así, ɔ́leki mu díín, blí ɔ́béé, “Oyin ánfí é buo Yesu!”

57 Táme Petro lópu ɔ́nɔ́lɔ́ blí ɔ́béé, “Otsi, mmeyín mu ɔ́tinetiné!”

58 Uɔ́bwe kpalobí á, ɔ́ha ɔ́ku é lówun Petro, ɔ́lebláa Petro ɔ́béé, “Fú é fúbú amótó.”

Táme Petro lébláa mu ɔ́béé, “Owíé, megyí mí ní!”

59 Fé ɔ́nɔ́hwírí kule ɔ́ma a, ɔ́ha bambá é léba botsulá mósú ɔ́béé, “Lélé, oyin ánfí é létsiá mu wá, tsúfé Galileayin ogyi.”

60Táme Petro léle mú ɔ́nɔ́ ɔ́béé, “Agya! Kɪ, mmeyín asún ánfɪ ɪwɪ kuku.”

Petro ɔ́nɔ́ mesi, bate lóɓɔn. 61Anɪ Wíe Yesu lédamlí kɪ Petro. ɪnu Petro lékaín asún ámúú anɪ Wíe lébláa mu ɔ́béé, “Fóswú tse sa fée fumeyín mí asa bate ɔ́béle ɔ́nɔ́ onyenu.” ámɪsu. 62ɪnu ɔ́ledalɪ yó kpankpá híé yósu.

Yesu Ahinlá Bwe

(Mateo 26:67-68; Marko 14:65)

63Yesusu akípu befi asɪ buɗe mu ahinlá bwe, buɗe mu da. 64Bɔpu ató klí mu ansíbi, fíté mu beɛ, “Bulu ɔ́nɔ́sú ɔ́tɔ́pú, maláda fú? Bla anɪ.” 65Bekpa mu asiabí, bláa mu nyányála.

Yudafɔ Asún Agyípu Ansító Lú

(Mateo 26:59-66; Marko 14:55-64; Yohane 18:19-24)

66Yudafɔ ahande, Bulu igyí ahapú dehen pú Mose mbla asunápú amu befia ɔ́yɪ kehe nyankɪ-nyankɪ, bebitía Yesu belí amú ansító. 67Bebláa Yesu beɛ, “Ní fúgyí Kristo, (ɔ́há ámúú Bulu ladá mu ofúli amu) a, bla anɪ.”

Yesu lébláa amú ɔ́béé, “Ní nebláa mlɪ kúráá, mlumóohogyi. 68Ní nefité mlɪ asvanku é á, mluméele mú ɔ́nɔ́. 69Táme tsú séi púya a, mí, Nyankpusa-Mu-Bi ánfɪ nétsiá Bulu Otúmípu amu gyɔ́pɪsu.”

70Amú fée befité Yesu beɛ, “Mú su fúgyí Bulu mu Bi ámu nɪ?”

Yesu lébláa amú ɔ́béé, “Ee, ɔ́ɔkwali amu mlɪlablí á.”

71ɪnu befité aba beɛ, “Ntogyi sú abétrá dunká adansfɔ bámbá? Mú anɪlanú tsú mu onutó ɔ́nɔ́ á.”

Yesu Kpa Ya Pilato

(Mateo 27:1-2, 11-14; Marko 15:1-5; Yohane 18:28-38)

23 1ɪnu ahá ámúú befia ɪnu ámu ɔ́kɔ́sú kpá Yesu ya ɔ́má́sú ogyípu Pilato. 2Beka asún dínká musu beɛ, “Anɪlawun ání oyin ánfɪ dé ɔ́má ánfɪtɔ́ ahá yintá. ɔ́de amú bláa ɔ́béé, bumátra ka lampóo há Roma owíe dehen. ɔ́deblí

é ɔ́bée, mɔgyí Kristo, (ɔhá ání Bulu ladá mu ofúli amu), idesuná ání owíe ogyi.”

³Pilato léfuté Yesu ɔ́bée, “Fúgyí Yudafɔ owíe amu ni?”

Yesu léle mú ɔ́nɔ ɔ́bée, “Ee, mú fablí á.”

⁴Pilato lébláa Bulu igyí ahapú dehen pú ɔ́dɔm amu ɔ́bée, “Mmɔkúwun tsitsa kukvá oyin ánfí labwé.”

⁵Táme amú mú buɔe mútɔ kótóó beɛ, “Ɖɔɔpɔ mu atosunáhé tí utrɛ múa ɔ́kɔ wá Yudea ɔ́má ánfítɔ. Olefi mú así tsú Galilea, alapú bowie nfi.”

Yesu Líí Herode Ansítɔ

⁶Bréá Pilato lónu asún ánfí á, ɔ́lefuté ɔ́bée, “Galileayin oyin ánfí gyí?” ⁷Bréá ɔ́leɔ́lɔ́ ání Yesu otsú Galilea, ɔ́tínéá owíe *Herode dé iwíe gyí a, ɔ́leha beɔkpa mu ya Herode. Alí bré ámutɔ á, Herode bu Yerusalem wúlutɔ unu. ⁸Bréá owíe Herode lówun Yesu a, ansí lehiɛ gyi mu. Tsúfé olodunká ání obówun mu dodoodo, mu iwí asún ání alanú su. Odeklé ání Yesu ɔ́bwéé osúna ku suna mu. ⁹Mú su ɔ́lefuté Yesu asún tsɔtsɔɔtsɔ, táme Yesu méle kuku ɔ́nɔ. ¹⁰Bulu igyí ahapú dehen amu pú Mose mbla asunápú amu bulí unu, buɔekplón ka asún dínká musu. ¹¹Owíe Herode mua mu ɔ́sá akɔpú ámu é ɔ́ɔsupáa mu, bwé mu ahinlá. Ɖɔpɔ sríkí ligá ku wá mu, beyinkía mu ya Pilato. ¹²Owíe Herode mua Pilato bemlí anyawíe tsú eke ámu. Teki amú nsiné uma ale yáí.

Yesu Lowu ɔ́pón Ha

(Mateo 27:15-26; Marko 15:6-15; Yohane 18:39-19:16)

¹³Pilato létí Bulu igyí ahapú dehen, Yudafɔ ahande pú ɔ́má ámu féé befia. ¹⁴Mú ɔ́leɔ́lɔ́ amú ɔ́bée, “Mliléɔkpa oyin ánfí ba mi mlíaa, ɔ́de ɔ́má ámu agywun yintá. Nafité mu ɔ́nɔtɔ asún mli ansítɔ, nawun ání asún ámutú mliléka dínká musu ámu uma mútɔ. ¹⁵Owíe Herode é lawun mú alí. Mú sù alayínkía mu sísí aní ní. Oyin ánfí mɔ́kúbwé tɔ́tɔá ɔ́mɔ mu. ¹⁶Íni su néha béputí mu atɔ, mí ansi mu ɔ́natí.”

17-18 Inu ɔɔm amu fée bɔkplɔn blí beɛ, “Le mu inu, afusi Baraba ha aní!”^a 19 (Baraba anfi da obu, tsúfée ɔɔkusú lí wúlu amusu, ɔɔmɔ ɔha é mótó.)

20 Pilato lékléá obési Yesu. Mú su ɔletrá tɔí kplá ɔɔm amu. 21 Táme bɔkplɔn kúklúkúú bláa mu beɛ, “Da mu manta *oyikpalíhesu! Da mu manta oyikpalíhesu!”

22 Pilato lébláa amú otse saasi ɔbéɛ, “Tsitsa mɔmu alabwé? Mmɔkúwun tɔá alabwé, sù néha bómmu mu. Néha abupiti mu ató, ɔnati.”

23 Táme bubu mósú budekplɔn kuklúkúú beɛ, ɔháa abuda mu manta oyikpalíhesu. Inu bɔɔun mu ɔnɔlí. 24 Mú su Pilato lɔbwe dínká tɔ á múú buɔedunká ámusu. 25 Olesi oyin á múú ɔɔkusú lí ɔmá ámusu, mɔ ɔha mótó sù ɔda obu ámu, olesi Yesu há mu isá akɔpú ɔbéɛ bubwée mu alíá ahá ámu buɔeklé.

Yesu Da Mántá Oyikpalíhesu

(Mateo 27:32-44; Marko 15:21-32; Yohane 19:17-27)

26 Bréá bekpa Yesu bɔyɔ́ á, befia Kireneyin ɔkúá butetí mu Simon. Otsú abúasi. Isá akɔpú ámu beka mu híé beɛ ɔsúra oyikpalíhe amu buo Yesu.

27 ɔɔm bobuo Yesu. Atsiá bubu amútó bupu amú anyópu, buhíé buɔesú ha Yesu. 28 Yesu lédamlí, ɔlebláa amú ɔbéɛ, “Yerusalemfo atsi, mlumásu mi. Mlisu mli iwi pú mli abí. 29 Tsúfée nke ku tɔbá mléblí mliáa, ‘Bulu layúlá atsiá bumɔkúkwií ki, obí mɔkúdí amú opúnitɔ ki, obí mɔkúnyópú amú é ki.’ 30 Alí bré ámutɔ á, ahá bébláa abu beɛ, ‘Mliɔwie bun anisu. Nkúku, mliɔpula aní.’ 31 Tsúfée ní buɔe oyi bɔbwe ogyá wa alí á, nkálí bɔbwe oyi wulíhe?”^r

32 Isá akɔpú ámu bekpa lalahe abwepú abanyó é mántá Yesusu, bɔyɔ́mɔ amú. 33 Bréá bowie ɔtinekúá butetí inu

^a 23:17 Mótó yée 17 bu nwulú dada amu akutɔ: *Katsvn Nke kugyíkvtɔ á, lehián ání Pilato obési obu ɔɔpú ɔkvlɛ ání Yudafo ámu buɔeklé há amú.* ^r 23:31 Ní mí ántí mí asún da ɔkpa ántí kúráá buɔebwe alí á, nkálí Bulu ɔbɔbwe ahá ántí bégyi pón mu ansító?



Yesu Da Mántá Oyikpalíhesu ni. (Luka 23:32)

“Nwun Okokobi” a, beda Yesu mántá oyikpalíhesu. Beda amú abanyó ámu é mántá nyikpalíhesu. Ɔkule bu Yesu gyɔpɔsu, ɔkule é bu mu bɔnasu. ³⁴ ɔnu Yesu léblí ɔbéé, “Mí Sí, sikie amú, tsúfé bumeyín tʒá budebwe.”^s

ɔsá akɔpú ámu ɔɔtswi abi ye Yesu atadiɔɔ. ³⁵ Ahá tsɔtsɔɔtsɔ ámú bobuo amú yó unu ámu besi bulú unu bude mu kí. Yudafo ahande amu ɔɔbwe mu ahinlá beé, “Ɖɔɔhɔ ahá nkpa. Ní lélé mɔgyí Kristo, (ɔhá ámú Bulu ladá mu ofúli), mu Bulu lalé ní á, ɔhɔɔ mu iwɔ nkpa!”

³⁶⁻³⁷ ɔsá akɔpú ámu é ɔɔpɔ ntá ɔdái tin mu ɔnɔ, bwé mu ahinlá beé, “Ní fúgyí Yudafo owíe amu ni á, le fú iwɔ!”

³⁸ Bɔwanlín ató mántá oyikpalíhe amu awunso beé, “YUDAFɔ OWÍE AMU NI.”

³⁹ Lalahe abwepú ámú beda mántá oyikpalíhesu ámú ɔkule léblí Yesu iwɔ abususu ɔbéé, “Meyí fúgyí Kristo amu ni? Le fú iwɔ, afule anɔ mɛe!”

^s 23:34 Múts yéé 34 uma nwuló dada amu akúɔ.

40Táme onyɔɔsi amu lɔwa iyin wá mu ɔbée, “Fumédé Bulu ifú nya! Fúa munyɔ fée dé isubití kule hóɔ. 41Ani mú á, ani isubití ida ɔkpa, ani lakpan ání anlóbwe su. Táme oyin ánfí mú mókúbwé laláhe kuku.” 42Mú ɔlebláa Yesu ɔbée, “Yesu, ní febá fú iwíe ogyíkpa a, kain mísú!”

43Yesu lébláa mu ɔbée, “Ɔnɔkwali nde fú bláa. Nde, mía funyɔ abétsiá *Paradiso.”

Luk

Yesu Lowu

(Mateo 27:45-56; Marko 15:33-41; Yohane 19:28-30)

44-45Alí bré ánfí íbɔ́bwe fé ɔpa dódúanyɔ. Owí leta ɔsulúv amusu fée alu yɔ́fun ntópwe ɔsato. Owí metrá lun ε. Inu á, tati ámú ɔɔpuká Bulu Ɔtswékpa obu ámutɔ ɔlebalí anyɔ. 46Yesu lɔkplun kúklúkú blí ɔbée, “Mí Sí, napú mí ɔhé wá fú íbutɔ.” Olenya blí alí tá pé, ɔlele ɔhé.

47Bréá ísá akɔpɔ ɔhande amu lówun tɔ́a ɔlaba a, ɔlekanfú Bulu ɔbée, “Lélé, ɔha yilé oyin ánfí gyí.”

48Ahá ámú ɔbulí unu ámu fée bowun tɔ́a ɔlaba, ɔɔpu awirehɔ náti ɔyɔ́ wóyí. 49Táme amú ɔbuyin Yesu pú atsi ámú ɔbobuo mu tsú Galilea ɔmátɔ́ ámu besi bulí tsútsúútsú bude ɔtɔ́a ɔde músú yɔ kí.

Yesu Pulá

(Mateo 27:57-61; Marko 15:42-47; Yohane 19:38-42)

50-51Oyin ɔku létsiá, butetí mu *Yosef. Otsú Yuda wúlu kvá butetí mú Arimateatɔ. Ɔha yilé ogyi, obú é bu musu. Ibu mútɔ́a ɔbu ɔmá ámu asún agyípúɔ, táme omotsulá dínká amú agywun pú amú bwehé ánfisu. Otsie ogyo Bulu iwíegyí ámu. 52Oyin ánfí lóyɔ Pilato wá, yɔ́kulí mu ɔkpa ɔbée, osíi Yesu fúli amu ha mu. Pilato léha mu ɔkpa. 53Inu Yosef léyesuɛí Yesu fúli, ɔɔpɔ ɔhráda kíklí mu iwí, pú mu yɔ́wa ɔbɔ́ kvá mu onutó ɔleha beda butátɔ́ há mu iwí, bumɔkúpúlá ɔhaa mútɔ́ kí. 54Eke ámu igyi Fieda. Eke ámu igyi *ogyá ɔdudáké. Owí inyá tá pé, ɔkpúnú ɔdaké ámu lafi asi.

55Atsi ámú ɔbobuo mu tsú Galilea amu bobuo Yosef yéki Yesu opulákpá pú alá ɔɔpɔ fúli amu tswí ɔbɔ́ ámutɔ.

⁵⁶Beyinkí yó wóyí yókwe *ohuam, chíén pú ofobí fánfán ání bópu yékpá Yesu. Botsutsúa abubwe ta á, owí latá, beda ɔkpúnú ɔkpúnú ɔdaké ámu fé alá Mose Mbla leblí.

Yesu Kusó Tsú Afúlitó

(Mateo 28:1-10; Marko 16:1-8; Yohane 20:1-10)

24 ¹Kwasieda, igyi ndawótswító eke gyankpapu bake a, atsi ámu bɔkusú tsú afá ámúú bɔkwe yáí ámu yó Yesu ntsán ámu asi. ²Bowun ání bamína ibwi ámúú bɔputin ɔbó ámu ɔnó ámu lé unu. ³Mú su bebitíwíé ɔbó ámutɔ, táme bumowun Yesu fúli amu. ⁴Besi bulí, buɔe nwuntɔ bu. Beki a, ayin abanyó aku líí amú wá unu á. Amú atadié de ogyá kpa. ⁵Ifú lekitá atsi ámu, beda akpawunu pú ansító bun ɔsulótɔ. Táme ayin ámu befité amú beé, “Ntogyi sù mlidé ɔkɔankpapu dunká afúlitó? ⁶Ɔma nfi, alakúsú! Mlɔkaun asún ámúú ɔlebláa mli bréá mlia munyo mliɔ Galilea ɔmátó ámusu. ⁷Ɔbéé, ‘Ilehián ání béle mí, Nyankpusa-Mu-Bi ánti há lakpan abwepú. Béda mí mántá oyikpalíhesu. Mú eke sáásí a, nókusú tsú afúlitó.’ ” ⁸Unu atsi ámu bekaín Yesu asún ántisu. ⁹Beyinkí tsú ntsán ámu asi bebláa *sumbí ayɔpú dúɔkun ámu pú aha atráhe amúú bubu unu ámu féé tóá bayówun.

¹⁰Atsiá bɔyo ntsán ámu asi gyí, Magdalayintse Maria, Yohana pú Yakobo mu yin Maria. Amúá atsi akvá bubu amúú lékla asún ánti suná sumbí ayɔpú ámu. ¹¹Asún ámu lobwe sumbí ayɔpú ámu fé mimlála. Mú su bumɔhɔ músú gyi. ¹²Táme Petro mú lókusú, tsíí ɔsɔ yó ntsán ámu asi. Olobun kpeléki ɔbó ámutɔ. Tati ámúú bɔpupúlá Yesu nkule olowun ání ida ifúntó. Oleyinkí yó wóyító, ɔde nwuntɔ bu tsú asún ánti ulaba anfi iwí.^t

Emaus Wúlutó Yo

(Marko 16:12-13)

¹³Eke ámu kén á, abúopu amu abanyó benatí bɔyó wúlu kuá butetí mú Emaustɔ. Tsú Yerusalem ya unu bóbwe fé

^t24:12 Múú yéé 12 uma nwulú dada amu akutɔ.

máali asienó. ¹⁴Amú nkule buna bude nkombó gyí tsu asún ámúú ulaba amu iwí. ¹⁵Bréá bude mútú yó á, Yesu onutó é lóbotu amú, mua amúnyo buna. ¹⁶Bulu létin amú ansí. Mú su bumebi mu. ¹⁷Yesu léfité amú óbéé, “Amansu iwí nkombó mluná mlidégyí ali?”

Besi lí tikpa, awireho lekitá amú. ¹⁸Amútú okuleá butetí mu Kleopa léfité óbéé, “Fú nkule gyí ófó Yerusalem wúluto, fúmeyín asún ání ulaba unu nke ánfuto?”

¹⁹Yesu léfité mu óbéé, “Amansu igyi?”

Bebláa mu bee, “Yesu, Nasaretyin amu iwí asún igyi. Bulu ónósú ótóípú ogyi. Ólobwe ofúla akpónkpónti, bí Bulu asún tímísu, Bulu mua anyánkópósa féé ansítú. ²⁰Ani Bulu igyi ahapú dehen pú wúlu ahande bapú mu há ahá, bahá mu lowu ipón, dá mu mántá oyikpalíhesu. ²¹Teku mugyí óhá ání anuléki ókpa aniaa, óbéha ani Israelfó abégyi iwí ní. Nde eke saásí ópá asún ání lébá. ²²⁻²³Múá idun kúráá á, anito atsi aku bayó mu ntsán ámu asi bakiení, táme bumowun mu fúli amu. Bee, bayówun Bulu-abopu aku babláa amú bee, óbu nkpa. Tóá beyinkí bebláa ani lawá ani wánwan. ²⁴Ínu su anito aku é basrí yó ntsán ámu asi, bayówun mú fé aliá atsi ámu beba beblí. Amú é bumowun fúli amu.”

²⁵Yesu lébláa amú óbéé, “Mlilémiplá o! Mli agywun tamayó agyómá ósasú. Nkáli igyi sú mlumóho asún ámúú Bulu ónósú atóípú amu beblí tswi amu féésú gyi? ²⁶Mluméyín mliáa, ilehián ání Kristo, (óhá ání Bulu ladá mu ofúli amu) obówun iwíwun, asa obénya mu numnyam?” ²⁷Ínu Yesu léle mu iwí asún ání ówanlín wá Bulu asun wanlínhé amuto, tsú Mosesu botu Bulu ónósú atóípú amu féésú asi súná amú.

²⁸Bréá bowie wúlu amuto boyó á, Yesu lóbowe fé ódetsóun óyó ótine bambá. ²⁹Táme abúopu amu bebláa mu bee, “Ani sí, owí lapón, di ani wá nde.” Mú su Yesu lébaí yó amú wá. ³⁰Bréá bude ató gyí a, Yesu léle bodobodo ipín, dá Bulu ipán. Múú olebiabía mútú púhá amú. ³¹Ínunu amú ansísú letitú amú, bebi mu, táme ólówi sí amú. ³²Ínu befité aba bee, “Ansí mehíe gyí ani bré ámúú ania munyo aniná, óde

anɪ asún bláa, ɔde Bulu asun wanlínhé amu asɪ le súná anɪ ámu?”

³³Bɔkusú unonu yínkí ba Yerusalem. Beba a, sumbí ayɔpó dúɔkun ámu pú aha tráhe bafia, ³⁴búdeblí beɛ, “Lélé, anɪ Wíe lakúsú. Alalé iwɪ ɔwan súná Simon!”

³⁵Mú su ahá abanyó ámu é beblí t́á bayówun ɔkpatɔ. T́á bɔpubí mu gyí bodobodo amú oleye ha amú ámu.

Yesu lwiɔwanle Súná Mu Akasípó

(Mateo 28:16-20; Marko 16:14-18;

Yohane 20:19-23; Gyumagyihe 1:6-8)

³⁶Ahá abanyó ámu bubu músú budetɔ́ alɪ á, Yesu onutó léba belí amú nsiné. ɔleblí ɔbéɛ, “lwi ilwíi mli.”^u

³⁷Opúni letsíi amó, bɔwan. Uɔbwe amó fé fúli budewúun. ³⁸lɪnɪ Yesu léfité amó ɔbéɛ, “Ntogyi sù mlidé ifú nya, mlidé nwéen gyí mli klɪntɔ alɪ? ³⁹Mlɪkɪ mí ibɪ, amlɪkɪ mí ayabiasɪ. Megyí mí onutó ní? Mlɪkɪta mí amlɪkɪ. Fúli má ɔyulúv múa awú fé alá mbu.”

⁴⁰Bréa ɔleblí asún ánfɪ tá á, ɔɔpɪ mu ibɪ pú mu ayabi súná amó. ⁴¹Ansí lehiɛ gyi amó, asún ámu é lówa amó wánwan. Mó su bumohogyi ání lélé mu nɪ. lɪnɪ ɔlefíté amó ɔbéɛ, “Mlɪbu atogyihe ku nfi?” ⁴²Beha mu iye t́hé itin ku, ⁴³ɔɔhɔ mú, wí mú amó ansítɔ unu.

⁴⁴lɪnɪ ɔlebláa amó ɔbéɛ, “lɪnɪ gyí asún ání nebláa mli bréa mbu mli wá ní. Nebláa mli mbéɛ, ilehián ání mí iwɪ asún kugyíkúá bɔwanlín wá Mose Mbla, Bulu ɔnɔ́sú atɔ́pú nwulú pú *Israelfɔ ulɔ ɔwulú́tɔ féé béba mútɔ.”

⁴⁵lɪnɪ olobwií amó agywun, méni bónu Bulu asun wanlínhé amu asɪ. ⁴⁶ɔlebláa amó ɔbéɛ, “Bɔwanlín tswɪ beɛ, Kristo, (ɔhá amú Bulu ladá mu ofúli amu) amu obówun iwɔwun, wú. Bulu ɔbɔkusúa mu mú eke sáásí tsú afúlitɔ. ⁴⁷Mú ɔma a, ahá béda Bulu asun wankláán ámu ɔkan mí ɪdátɔ há ɔmá féé beɛ budámli klɪntɔ, fékɪ Bulu obési amó lakpan kíé amó. Béfi mú asɪ tsú Yerusalem. ⁴⁸Mlɪgyí mí

^u 24:36 ɔleblí ɔbéɛ, “lwi ilwíi mli.” uma nwulú dada amu akɔtɔ.

adansifo há asún ánfí ní. ⁴⁹Nópu *Dje Wankíhé amú mí Sí léhie yáí há mli ámu sísí mli. Mú su mltsia wúlu anfito alu yófun ekeá Dje Wankíhé amu obótsu ɔsúsú bá beha mli túmi.”

Yesu Ɔsúsú Yɔ

(Marko 16:19-20; Gyumagyihe 1:9-11)

Luk

⁵⁰Bréá Yesu léblí asún ánfí tá á, ɔlekpa amú dáli, bɔyɔ Betania wúluto. Inu olotsu ibi fúá, yúlá amú. ⁵¹Bréá ɔde amú yulá á, mva amónyɔ nsiné lówa ifó wa bi, Bulu lótsu mu ya ɔsúsú. ⁵²Inu beda akpawunu súm mu, bɔpu ansigyí kpɔnkpɔnti yínkí yétsiá Yerusalem. ⁵³Betsiá yó Bulu ɔtswékpa unu brégyíbré, yékanfú Bulu.

Asun Wankláán Ání

Yohane

Lówanlín

1 ¹Asa ɔ́yí lẹ̀belun a, Asún ámu bu unv. Asún ámu mua Bulu bu unv. Asún ámu gyí Bulu.

Asún Ání Itehá Nkpa

²Asún ámu mua Bulu bu unv asa ɔ́yí lẹ̀belun. ³Musú Bulu lótsun bwe tógyít. Tɔ́tɔ́tɔ́ má unvá Bulu lóbwe tsun mu ɔ́ma. ⁴Mutɔ́ nkpa itsú. Nkpa ámu tɔ́pú wanki ba ahá fée ní. ⁵Wanki anfi tɔ́wánkí oklúntɔ́, táme oklún mókúgyi músú ki.

⁶Bulu lówa oyin ɔ́kuá butetí mu Yohane^a sísí. ⁷Ɖleba bebláa ahá wanki amu iwí asún, méni ahá fée bóhɔ́ asún ámusu gyi. ⁸Megyí Yohane onutó gyí wanki amu. Mu mú wanki amu iwí asún ɔ́leba bebláa ahá. ⁹Ɖhá ámúú ogyi wanki onutó, ɔ́tɔ́wánkí há ɔ́hagyíɔ́ha amu ɔ́bá ɔ́yít.

¹⁰Ɖbu ɔ́yí ánfítɔ́. Musú Bulu lótsun bwe ɔ́yí, táme ɔ́yí ánfítɔ́ atsiápú bumebi mu. ¹¹Ɖleba mu onutó ɔ́mátɔ́, táme mu pi bumɔ́hɔ́ mu. ¹²Táme ɔ́leha ahá ání bóhɔ́ mu, hɔ́ mu gyi fée ɔ́kpa ání bubwée Bulu abí. ¹³Amú Bulu abí bwe motsú ilíntɔ́, ntée nyankpusa apébwetɔ́, ntée oyin ɔ́wólí ɔ́kpasu. Mboún Bulu onutó lóbwe amú mu abí.

¹⁴Asún ámu lébemlí nyankpusa, oletsiá anitɔ́. Awitɔ́le pú ɔ́nɔ́kwali sɔ́ɔ́n létsiá mutɔ́. Anulówun mu numnyam. Mu Si lówa mu numnyam amu, tsúfé Obí ɔ́kukúnú ɔ́kule pé ogyi há mu.

^a 1:6 Asú Ɖbɔ́pú Yohane

15 Yohane léle mu súná, tóí tsú mu iwí ɔ́bée, “Óni iwí asún neblí mbée, ‘Dhá ámú obuo mi ɔ́bá ámu dɔn mi, tsúfée ɔ́bu unu asa bɔkwí mí’ ” ní.

16 Mu awitɔle itsɔ. Íni sù ɔde awitɔle tsɔtsɔɔtsɔ ánfí wa há aní fée ní. 17 Mosesu Bulu mbla ámu ná ileba, táme ɔ́ɔkwali mba awitɔle mú una aní Wíe Yesu Kristosu ileba. 18 Dhaa mɔ́kúwun Bulu kí. Obí ɔ́kúkúnú ɔ́kule pé, mu onutó ogyí Bulu, otsie Dsí ámu gyɔpɔsu, Dsí ámu tehié kle mu asún ámu, nkule labláa aní alá Bulu gyí.

Asú Ɖɔɔpú Yohane Bulu Asún Ɖkanda

(Mateo 3:1-12; Marko 1:1-8; Luka 3:1-18)

19-20 *Yudafɔ ahande ání bubu Yerusalem bɔwa Bulu igyí ahapú pú Lewifɔ Yohane wá bɛe buyéfíté mu bɛe, ma ogyí? Yohane mési asvansu ɣáín amú. Ɖlele bláa amú ɔ́bée, “Megyí mígyí Kristo, (ɔ́há ámú Bulu ladá mu ofúli amu).” 21 Befíté mu bɛe, “Mómú fúgyí ma? Fúgyí *Elia?”

Ɖlele mú ɔ́nɔ ɔ́bée, “Megyí mígyí Elia.”

Betrá fité mu bɛe, “Fúgyí Bulu ɔ́nɔsú ɔ́ɔɔpú amú ɔ́bɛba amú?”

Ɖlele mú ɔ́nɔ ɔ́bée, “Ó-o.”

22 Mú bɛfité mu bɛe, “Ma fuhíé fúgyi? Bla aní, méni abéyɛbláa ahá ámú bɔwa aní ámu. Nkáli fúdeblí tsú fú onutó iwí?”

23 Yohane lɔ́pu asún ání Bulu ɔ́nɔsú ɔ́ɔɔpú *Yesaia léblí tswi lé mú ɔ́nɔ ɔ́bée,

“Mígyí ɔ́há ámú ɔ́dekplón *dimbísú ɔ́bée,

‘Mlitswii aní Wíe ikpa ámu ha mu’ amu ní.”

24-25 Inu *Farisifɔ akvá bɔwa Yohane wá é bɛfité mu bɛe, “Ní megyí fúgyí Kristo amu, megyí fúgyí Elia ntée Bulu Ɖnɔsú Ɖɔɔpú amú ɔ́bɛba amu é á, ntogyi sù fude ahá *asú bɔ?”

26 Yohane léle mú ɔ́nɔ ɔ́bée, “Ntsu ndepubɔ́ ahá asú, táme ɔ́ha ɔ́ku bu mlitɔ nfi, mluméyín mu. 27 Múgyí ɔ́há ání obuo mi ɔ́bá ní. Mmɔ́fun ání nésankí mu ntukuta ɔ́fé kpán.”

28 Asún ánfí fée léba Yordan ntsu ɔ́bun Betania wúlutɔ. Inú Yohane létsiá bɔ́ ahá asú ní.

Bulu Okúfabi

29Ɔyi kehe a, Yohane lówun ání Yesu ná ɔbá mu wá. Múú ɔlebláa ahá ámu ɔbéé, “Mlɩkɩ, Bulu *Okúfabi amu ɔbá á. Músú Bulu ɩtsun sí ɔyító ahá lakpan kíé amú ní! 30Mu ɩwi asún neblí mbée, ‘Ɔku buo mi ɔbá. Ɔɔvɩn mi, tsúfé ɔbu ɩnu asa ɔkwúí m’ ní. 31Mí onutó mmeyín mu, táme neba nde ahá asú ɔ, méni Israelfo bébi ɔhá ání ogyi.”

32Yohane léblí ɔbéé, “Nowun *Ɔɩe Wankíhé amu, ɔlekplí tsú ɔsúsú fé abróɔuma bogyonká musu. 33Mí onutó mmeyín mu, táme Bulu lówa mí ɔbéé mbá ɔɔpu ntsu ɔbó ahá asú. Múlébláa mi ɔbéé, ‘Ɔhá ámúú fówun Ɔɩe Wankíhé amu ɔbéekplí tsú ɔsúsú bogyonká musu ámu ɔbópu Ɔɩe Wankíhé amu ɔbó ahá asú ní.’ 34Nawun ání ɩlaba mútó. Mú su nde mu ɩwi adánsɩe gyí mbée, mu gyí Bulu mu Bi ámu ni.”

Yesu Akasípú Agyankpapu

35Mú ɔyi kehe a, Yohane mua mu akasípú abanyó besankí ba ɩnu. 36Bréá Yohane lówun Yesu détsúvɩn a, ɔleblí ɔbéé, “Mlɩkɩ, Bulu *Okúfabi amu ná ɩnu á.”

37Akasípú abanyó ámu bonu asún ánfɩ. Mú su beklá buo Yesu. 38Yesu lédamlí kɩ wun ání bobuo mu. Múú ɔlefíté amú ɔbéé, “Ntɔ mlídédunká?”

Befíté mu beɛ, “Osunápú, nkúnu futsie?”

39Yesu léle mú ɔnɔ ɔbéé, “Mlɩba beki.” Mú su ayin abanyó ámu bobuo Yesu yéki mu otsiákpá. ɩbɔ́bwe fé ntúpwe ɔnɔnɔ. Betsiá mu wá tá owí.

40Ayin ámúú bonu asún ání Yohane léblí tsú Yesu ɩwi, beklá buo Yesu amɔtɔ ɔkule gyí Simon Petro mu pio Andrea. 41Mú ɔma a, ɩtɔ gyankpapuvá Andrea lóɔbwe gyí, oloyódunká mu pio Simon, bláa mu ɔbéé, “Anɩlawun Mesia.” (Mú asɩ gyí, “Kristo”, ɔhá ámúú Bulu ladá mu ofúli amu.)^b 42ɩnu ɔlekpa Simon ba Yesu wá.

^b 1:41 *Kristo* igyi Griiki ɔblí, *Mesia* é igyi Hebri ɔblí.

Yesu lékɪ mu díín, ɔ̀léblí ɔ̀béé, “Fúgyí Yohane mu bi Simon ni. Tsú nde púya a, bétɪ fú Kefa.” (Griiki ɔ̀blítɔ “Petro.” Mú asi gyí, “Butá.”)

Filipo Mva Nataniel Tɪ

43 Ɔ̀yí kehe a, Yesu lɔ̀bwe ɔ̀béé mɔ́yɔ Galilea ɔ̀mátɔ, olowun Filipo. Mú ɔ̀lébláa Filipo ɔ̀béé, “Buo mi.” 44 Filipo otsú Betsaida, Andrea mva Petro wúluto. 45 Filipo lówun Nataniel, ɔ̀lébláa mu ɔ̀béé, “Anulawun oyin á mú Mose lɔ̀wanlín mu iwɪ asún wá Bulu mbla ámutɔ, Bulu ɔ̀nɔ́sú atɔ́pú amu é bɔ̀wanlín mu iwɪ asún ámu. Mu dá gyí Yesu. Mu si gyí *Yosef, otsú Nasaret wúluto.”

46 Nataniel léfuté mu ɔ̀béé, “Itɔ yilé ku bétalí dalɪ tsu Nasaret wúluto?”

Filipo lébláa mu ɔ̀béé, “Ba afubeki.”

47 Bréá Yesu lówun Nataniel ɔ̀bá mu wá á, ɔ̀léblí ɔ̀béé, “Israelyin onutónutó ní. Afunu kuku ma mutɔ.”

48 Nataniel léfuté Yesu ɔ̀béé, “Nkálɪ lɔ̀bwe febi mí?”

Yesu léle mú ɔ̀nɔ́ ɔ̀béé, “Nowun fu bréá fubu pɔ̀ntɔ-oyí ámu asi unv, asa Filipo lébetɪ fú.”

49 Nataniel lébláa mu ɔ̀béé, “Osunápú, fúgyí Bulu mu Bi Israel Owie amu ni.”

50 Yesu lébláa mu ɔ̀béé, “Alɪ á mú nabláa fu mbée, nowun fu pɔ̀ntɔ-oyí ámu asi ámu sv fahogyi? Fówun ofúla ání idon íni.” 51 Yesu létrá bláa mu ɔ̀béé, “Ɔ̀nɔ̀kwali nde mlɪ bláa, mlówun ání ɔ̀súsú lafínkí, *Bulu-abɔ̀pu buɔ̀de ɔ̀súsú yɔ́ yínkí bá Nyankpusa-Mv-Bi ámusu.”

Ɔ̀kátsiá Kana Wúluto

2 ¹ Eke sáásí a, betsiá ɔ̀ká Kana wúlu ání ibv Galilea ɔ̀mátɔ. Yesu mu yin bv unv. ² Betɪ Yesu mva mu *akasípú é mú asi. ³ Bréá amú ntá leta á, Yesu mu yin lébláa mu ɔ̀béé, “Butráa buma ntá.”

4 Yesu lébláa mu ɔ̀béé, “Amú yín, yéé megyí mí asún igyi o! Mí bré mɔ̀kúnyá fun.”

5 Mu yin lébláa wóyí ámutɔ asúmpú ɔ̀béé, “Mlɔ̀bwe dunka asúngyíasún ání ɔ̀bébláa mlɪsu.”



Asúmpú amv besa bólá awvndi ámv féé. (Yohane 2:7)

⁶*Yudafɔ butɔfwí iwɔ amú amándíé ɔkpasu. Mú su bɔpu awvndi akpɔnkpɔɔnkpɔnti asie yáí wóyí ámvɔ. ⁷Yesu lébláa unv asúmpú amv ɔbéé, “Mlisa ntsu bula awvndi ámv féé.” Lélé besa. ⁸Unv ɔlebláa amú ɔbéé, “Mlisa ukv ya nkesu ɔkípu amv.” Besa ya mv. ⁹Ɔleda mú ɔnɔ á, uladámli bwé ntá. Omeyín ɔtínéá benya ntá ámv tsú. (Táme asúmpú amv mú buyin.) Unv ɔletɔ ɔká otsiápu amv ya utsétɔ, ¹⁰ɔlebláa mv ɔbéé, “Nta wankláán ɔhagyíɔha tegyankpá yáí. Ní bonu mú tá asa butɔpú múá uma ale ba. Táme fú mú fapú wankláán ámv yáí bɔfun séi.”

¹¹Unv gyí osúna gyankpapu ání Yesu lɔbwe ní. Ɔlobwe mú Kana ání ibu Galilea ɔmátɔ, púlé mv numnyam ɔwan. Uleha mv akasípú bɔhɔ mv gyi.

¹²Unv ɔma a, Yesu mvu mv yin, mv apíó pú mv akasípú bɔyɔ Kapernaum wúlutɔ, yétsiá unv nke kpalobí.

Yesu Bulu Ɔtswékpa Yɔ

(Mateo 21:12-13; Marko 11:15-17; Luka 19:45-46)

13 Bréá nkeá Yudafo bɔpɔgyi Israelfosu *Katsun Nke lowie wóyí tá á, Yesu lɔdu yɔ Yerusalem. 14 Ɖɔɔyɔ *Bulu ɔtswékpa amu wunsunésú yówun ání ahá buɔe nnantswie, akúfa pú abrɔduma fe. Olowun aku é butsie mpúnúasi buɔe kɔba tsée. 15 ɔlɔ ɔɔbwe mpli, wíe amútɔ, gyáa amúba mbwi ámu fée dáli. Olowutá kɔba atsépu amu mpúnú dá, dá amú kɔba sáín. 16 Múú ɔlebláa abrɔduma afepú ámu ɔbéɛ, “Mlile amú nfi! Mlumápu mí Sí wóyítɔ bwé mli ibiá ogyíkpa.” 17 ɔlɔ ɔleba ali su á, mu akasípú amu bekaín Bulu asun wanlínhé anfi. “Fú osúmkipá amu asún ihíe igyi mí asunbogya.”

18 Yudafo ahande amu beba Yesu wá befité mu beɛ, “Osúna mɔmu fɔbwe púsúná aní ání Bulu túmitɔ fúde ínu bwe?”

19 Yesu lébláa amú ɔbéɛ, “Mlɔbwie Bulu ɔtswékpa anfi, nɔpu nkensá yí mú.”

20 Yudafo ahande amu bebláa mu beɛ, “Nfi advana-sie kéké bɔpɔyi obu ánti. Mú fú mú fɛɛ, fɔpu nkensá yí mú?”

21 Táme mu nyankpusa-oyí iwɔ asún ɔdeblí, megyí Bulu ɔtswékpa amu. 22 Bréá Bulu lɔkusúba mu tsú afúlitɔ ɔma a, mu akasípú amu bekaín ání ɔleblí asún ánti. Mú su bɔho Bulu asún pú Yesu asun blíhé amusu gyi.

Yesu Yin Nyankpusa Klɔntɔ

23 Yesu lɔbwe osúna tsɔtsɔtsɔ Israelfosu Katsun Nke ámutɔ bréá ɔbu Yerusalem, ahá tsɔtsɔtsɔ bowun. Mú su bɔho mu gyi. 24 Táme Yesu mɔpu ansí dínká amósú, tsúfé oyin alíá amú fée bugyi. 25 Mehián ání ɔhaa ɔbebláa mu ɔha iwɔ asún, tsúfé mu onutó oyin asún ání ɔbu nyankpusa klɔntɔ.

Yesu Mwa Nikodemo

3 1 *Yudafo ɔhande ɔku létsiá, butetí mu Nikodemo. Farisiyin ogyi. 2 Ɖleba Yesu wá eke ɔku onyé bebláa mu

ɔ́bée, “Osunápú, anyin ání Bulu lówa fú sísí fé ató osunápú. Tsúfé ɔ́haa méetalí bwé osúna anfi fúdebwe ánti, ní Bulu móbúo mu.”

³Yesu léle mú ɔ́nɔ́ ɔ́bée, “Ɖnɔ́kwali nde fú bláa, ɔ́haa méetalí nyá Bulu ogyi iwíe musu, nkéti balákwíi mu.”

⁴Nikodemo léfuté mu ɔ́bée, “Nkálí bélakwíi ɔ́há ání aladan? Ɖbétalí sánkí wíe mu yin iputo, ɔ́bélakwíi mu?”

⁵Yesu léle mú ɔ́nɔ́ ɔ́bée, “Ɖnɔ́kwali nde fú bláa. Ní bumelakwíi ɔ́ku tsun ntsu múa *Ɖɔ́ɔ́ Wankíhétɔ́ á, ɔ́méetalí wíe *Bulu iwíegyí ámutɔ́. ⁶Ɖyulúv nkpa itsú nyankpusatɔ́, ɔ́ɔ́tɔ́ klé é itsú Bulu Ɖɔ́tɔ́. ⁷Mú su máha mú iwa fú wánwan ání nabláa fu mbée, ilehián ání bélakwíi mli. ⁸Afú tɔ́tsun yɔ́ ɔ́tínéá ideklé. Futonú mú nka, táme fumeyín ɔ́tínéá itsú pú ɔ́tínéá iyɔ́. Alí kén igyi há ɔ́hagyíɔ́ha ání bakwíi mu tsú Ɖɔ́ɔ́ ámutɔ́ ní.”^c

⁹Nikodemo léfuté mu ɔ́bée, “Ngya ntɔ́ asún ní?”

¹⁰Yesu léle mú ɔ́nɔ́ ɔ́bée, “Israelfɔ́ osunápú yilé fúgyi, mú fée fumɔ́kúnú asún ánti así? ¹¹Ɖnɔ́kwali nde fú bláa. Tɔ́a anyin iwí anidétɔ́i tsú, tɔ́a anilawun é iwí anidé adánsie gyí, táme mlutamahɔ́ aní asún ámu. ¹²Ní nebláa mli tɔ́a ide músu yɔ́ ɔ́yí ánti, mli móhogyi a, nkáli íbɔ́bwe nebláa mli tɔ́a ide músu yɔ́ ɔ́súsú mboún mlóhogyi? ¹³Ɖhaa mókúdú yɔ́ ɔ́súsú unu kí, nkéti Nyankpusa-Mu-Bi ámutú olotsu unu ba amu.

¹⁴“Alí ámutú Mose lópu kɔ́ɔ́bri iwɔ́ síán oyísú, tsú mú líi *dimbísú unu ámu a, alí kén ilehián ání béda Nyankpusa-Mu-Bi ámu mántá oyísú, tsú mú líi,^d ¹⁵méni ɔ́hagyíɔ́ha ání ɔ́lɔ́ɔ́ mu gyi obénya nkpa ání itamatá ní. ¹⁶Tsúfé dwé Bulu léhie dwé anyánpósa. Mú su ɔ́lɔ́pu mu Bi ɔ́kukúnú ɔ́kule pé ámu há, méni ɔ́hagyíɔ́ha ání ɔ́lɔ́ɔ́ mu gyi omóowu, mboún obénya nkpa ání itamatá. ¹⁷Bulu mópu mu Bi ámu sísí ɔ́yí ánti ɔ́bée, ɔ́bá begyi ahá asún, ɔ́ha ahá ipón, mboún ɔ́bée, ɔ́bá bɔ́ɔ́ ahá nkpa.

^c 3:8 Ɖɔ́ɔ́ múa afú lehan aba Griiki ɔ́blítɔ́. ^d 3:14 Mu oyikpalíhesu síán iwí asún ɔ́deblí.

18“Dhá ání ɔɔhɔ mu Bi ámu gyi lagyi asu. Dhá ání ɔmɔhɔ mu Bi ámu gyi a, Bulu lahá mu ipón dodo, tsúfé ɔmɔhɔ mu Bi ɔkule pé ámu gyi. 19Alá ɔbéha ipón ámu gyí, wanki amu laba ɔyítɔ, táme ahá bɔdwe oklún dun wanki amu, tsúfé lalahe abwepó bugyi. 20Dhagyícha ání ɔɔbwé lalahe tolú wanki amu. Dtamakpókpe mantáa mú, tsúfé ɔde ifú nya ání mu bwehé béln ɔwan. 21Táme dhá ání ɔɔbwé yilé tehá wanki amu ɔwánkí wólí musu, méni ahá bówun ání Bulu apé ɔdebwe.”

Yesu Mva Asú Ɖɔpó Yohane

22Íni ɔma a, Yesu mva mu *akasípú bedali Yerusalem yó Yudea ɔmátɔ. Betsiá unu kpalobí, oletsiá bɔ ahá *asú. 23Alí bré ámutɔ á, Yohane é dé ahá asú bɔ Aenon nsáuntɔ, mantáa Salim wúlu. Tsúfé ntsu dada nsuné unu. Ahá betsiá yó mu wá, oletsiá bɔ amú asú. 24(Bumɔkúnyá kítá Yohane tswi obu ali bré ámutɔ.)

25Iwígyvráa iwí nwéengyi kú leba Yohane akasípú pú Yudayin ɔku nsuné. 26Inu Yohane akasípú bɔyɔ mu wá yébláa mu beɛ, “Osunápú, yéɛ fakáín oyin ámúbú fúa munyɔ mlílétsiá Yordan bunkpa ɔbun, fegyí mu iwí adánsie wankláán ámusu? Ɖde ahá asú bɔ, ahá féé buɔe mu wá yɔ.”

27Yohane léle mú ɔnɔ ɔbéɛ, “Dhaa méetalí bwé tɔtɔ, nkéti Bulu lahá mu ɔkpa. 28Mli onutó mlétalí gyi mi adánsie ání nebláa mli mbéɛ, ‘Megyi mígyí Kristo amu, táme Bulu lówa mí gya mu nkpa.’ ” 29Inu ɔleha amú yébi ɔbéɛ, “Ɖká otsiápu bú mu ka. Ɖká otsiápu amu mu nyawie é tetsiá ɔká otsiákpá unu, méni ansí bégyi mu ní onú mu nyawie amu ɔme. Ali kén ansí de mí gyi séi ní. 30Mí atomabi béta wíé mu kletɔ.”

Dhá Ání Olotsu Ɖsúsú Ba

31Dhá ámúbú otsú ɔsúsú ámu dun dhagyícha. Dhá ání otsú ɔsulósu é gyí ɔsulósu cha. Ɖsulósu asún ɔteblí, táme dhá ání otsú ɔsúsú dun dhagyícha. 32Otegyi tóá alawun pú tóá alanú iwí adánsie, dhaa tamahɔ mu asun blíhé. 33Táme dhagyícha ání ɔɔhɔ mu asun blíhésu gyi dé músú si ání Bulu

asún igyi ɔ̀ɔkwali. ³⁴Ɔhá ámú Bulu lówa ámu telé Bulu asún blí, tsúfé Bulu ɔ̀pɔ́ Ɔ́hé ámu búlá mutɔ́. ³⁵Ɔsí ámu ɔ̀ɔwé mu Bi ámu, alapú túmi féé wá mu ibutɔ́. ³⁶Ɔhagyíɔ́ha ání ɔ̀ɔhɔ́ mu Bi ámu gyi bu nkpa ání utamatá. Ɔhagyíɔ́ha ání ɔ̀mɔ́hɔ́ mu gyi má nkpa ání utamatá. Bulu isubití é idun musu.

Yesu Mva Samariayintse Ɔku

4 ¹*Farisifo bonu ání Yesu dé abúopu nya, bó amú *asú dun Yohane. ²(Táme megyí Yesu onutó dé amú bɔ́. Mu *akasípú dé amú bɔ́.) ³Bréá Yesu lébɔ́ ání Farisifo ámu banú asún ánfɔ́ á, ɔ̀ledali Yudea ɔ̀mátɔ́ yínkí yɔ́ Galilea ɔ̀mátɔ́. ⁴Táme lehián ání ɔ̀bótson *Samariafɔ́ ɔ̀sulúsu.

⁵Yesu lóyówie Sikar ání igyi Samaria wúlu kutɔ́. Wúlu anfi bu mantáa ɔ̀sulúsu kuá *Yakob lópvhá mu bi *Yosef bímbí ámu. ⁶lnú Yakob ibún bu ni. Ɔkpa ámu bu ifó. Mú su Yesu lótsutsúa obowie unv á, ɔ̀lapián mu. Mú su oletsiá ibún ámu asi. Ali bré ámutɔ́ á, ɔ̀labwé fé ɔ̀pawísú.

⁷lnv á, Samariayintse ɔ̀ku léba ntsu ɔ̀sakpá. Yesu lókulí mu ɔ̀béé, “Nobwíí ipa, ha mí ntsu annu.” ⁸Ali bré ámutɔ́ á, Yesu akasípú bɔ́yɔ́ wúluto yóhɔ́ atogyihe.

⁹Yudafɔ́ butamapú ibi da Samariafɔ́ nwe núu ntsu. Mú su ɔ̀tsi ámu léfuté Yesu ɔ̀béé, “Yudayin fugyi, mí é Samariayintse ngyi. Nkáli igyi sù fude mí ntsu kulí?”

¹⁰Yesu léle mú ɔ̀nɔ́ ɔ̀béé, “Ní fuyin Bulu atokiehé pú ɔ̀há ání ɔ̀de fú ntsu kulí á, teki fókulí mu, ɔ̀béha fú ntsu ání itehá nkpa.”

¹¹Ɔtsi ámu lébláa mu ɔ̀béé, “Ani sí, fumedé ɔ̀fé, ibún ánfɔ́ ɔ̀ é bu oklí. Nkónv fénya ntsu ání itehá nkpa? ¹²Fóɔ̀dun anɔ́ náin Yakob ání olokwi ibún ánfɔ́ há anɔ́, mva mu abí pú amú mbwɔ́ bonu ntsu mútɔ́?”

¹³Yesu léle mú ɔ̀nɔ́ ɔ̀béé, “Ɔ̀mewóli bélékítá ɔ̀hagyíɔ́ha ání otonu ibún ánfɔ́ ntsu. ¹⁴Táme ɔ̀hagyíɔ́ha ání obónu ntsuá néha mu a, ɔ̀mewóli méétrá kutá mu ekekeke. Ntsu ámú néha mu amv ibédamlí ntsu ɔ̀wíkpa mutɔ́ ání ibélnv ha nkpa ání utamatá.”

15 Ɔtsi ámu lébláa mu ɔbéé, “Ani sí, ha mí ntsu ánfɪ ku, ménɪ ɔmewóli méétrá kítá mí, mméétrá ba nfi é besa ntsu.”

16 Yesu lébláa mu ɔbéé, “Yeti fú kúlu amliba.”

17 Ɔtsi ámu léle mú ɔnɔ ɔbéé, “Mma okúlu.”

Yesu lébláa mu ɔbéé, “Ɔnɔkwali igyi fablí ání fuma okúlu. 18 Tsúfé fatsía akúlu tse nu ki. Mégyí fú kúlu gyí oyin ámuó fúa munyɔ mluná séi ámu é. Fawá ɔnɔkwali.”

19 Múú ɔtsi ámu lébláa mu ɔbéé, “Ani sí, nawun ání Bulu ɔnɔsú ɔtɔípú fugyi. 20 Ani anáin Samariafɔ bosúm Bulu ibu ánfɪsu, táme mli Yudafɔ mú mliaa Yerusalem kóún lehián ání ɔhagyíɔha obósum Bulu.”

21 Yesu lébláa mu ɔbéé, “Ɔtsi, hɔ mí asún ánfɪsu gyi. Bré ku béba ání ahá buméétrá súm Ɔsí ámu ibu ánfɪsu ntée Yerusalem. 22 Mli Samariafɔ mluméyín ɔhá ání mlidésu. Ani Yudafɔ mú anyin ɔhá ání anidésu, tsúfé Yudafɔsu una nkpahɔ́ leba ɔyítɔ́. 23 Bré ibá, ilafon ta ání Bulu asúmpú anɔkwaliɔ bósu Ɔsí ámu ɔhétɔ́ pú ɔnɔkwali. Tsúfé ahá ánfɪ odu Ɔsí ámu dédunká ɔbéé busúm mu ni. 24 Ɔhɛ Bulu gyí. Mú su ilehián ání ahá ání butosúm mu bósu mu ɔhétɔ́ pú ɔnɔkwali.”

25 Ɔtsi ámu lébláa mu ɔbéé, “Nyin ání Mesia^e, (ɔhá ámuó Bulu ladá mu ofúli amu) ɔbéba. Ní ɔbá á, ɔbéle asúngyíasún asi súná anɪ.”

26 Múú Yesu lébláa mu ɔbéé, “Mí ánfɪ nde fú asún bláa anfi gyí Kristo amu ni.”

27 Inu akasípú amu besankí tsú wúluto ba ɔɔtu amó. Uɔwa amó wánwan ání bawun Yesu mua ɔtsi bulú budetɔ́. Táme amótɔ́ ɔkuku metálí fité ɔbéé, “Ntɔ fudedunká tsú mu wá, ntée ntogyi sú fúa ɔtsi ámu mlidétɔ́?”

28 Ɔtsi ámu lési mu ɔlɔ́ yáí unu, yínkí yɔ́ wúluto yébláa ahá ɔbéé, 29 “Mliiba amlibeki oyin ɔkuvá alabláa mi tɔ́á nabwé ki féé. Mliilahogyi mliaa, megyí Kristo amu ni?” 30 Mú su ahá bedali tsu wúlu amuto beki Yesu.

31 Alɪ bré ámuto á, mu akasípú ámu bude mu kokóli beɛ, ogyíi atɔ́.

^e 4:25 Griikifɔ tétí Mesia beɛ Kristo.

³²Táme ɔlebláa amú ɔbéε, “Mbu t́á négyi, mluméyín mú iwí kúkukú.”

³³Mú su akasípú amu befíté aba beε, “Ntée ɔku labeha mu ɔku alagyi?”

³⁴Yesu lébláa amú ɔbéε, “Mí atogyihe gyí ání nóbwe t́á ɔhá ámúbú ɔɔwa mí sísí ámu ɔbéε mbwée, ammu mú ɔnó. ³⁵Yée mlteblí mltaa, ‘Tsra ana pé lasí ayó t́nbi bófun?’ Táme nde mli bláa mbée, mlitsu ansí kí adɔbúbú amuɔ, ayó ámu ulabli fun t́n. ³⁶Bude mu atínpu akɔ ka dodo. Bude mú t́n yaí há nkpa ání itamatá. Mú su ansí bégyi adupú ḿa atínpu amu fée ekewóle. ³⁷Mú su ɔnɔkwali igyi buteblí beε, ‘ɔku todú, ɔku é tetun.’ ³⁸Nɔwa mli mbée mlyétun ayóá mlumóyɔ mú odukpá. Aha bambá lóyɔ mú iwí agyómá, ulawá labi há mli.”

³⁹Samariaf́a bubu wúlu amuɔ tsɔtsɔɔtsɔ bɔhɔ Yesu gyi, adánsiε ámúbú ɔtsi ámu légyi suná amú ɔbéε, “Abláa mi t́ogyít́a nabwé mí nkpatɔ fée” ámu su. ⁴⁰Íni su bréa beba Yesu wá á, bokokóli mu beε, otsiá amú wá. Yesu létsiá unu nkenyó.

⁴¹Yesu asun blíhé su Samariaf́o ámu tsɔtsɔɔtsɔ é belahɔ mu gyi. ⁴²Bebláa ɔtsi ámu beε, “Megyí f́u asún ámu śu anulétrá hɔ mu gyi ngya o. Ani onutó anulanú, anlawun ání lélé oyin áñfi gyí ɔyít́ó Nkpa ɔhópu amu ni.”

ɔhande ɔku Mu Bi Ilo Tsa

⁴³Nkenyó ámu ɔma a, Yesu lénatí ý Galilea ɔmát́. ⁴⁴(Tsúfé mu onutó olowun blí ɔbéε, “Butamabú Bulu ɔnósú ɔt́óipú mu onutó ɔmát́.”) ⁴⁵Bréa olowie Galilea a, unuf́o bɔhɔ mu atúu, tsúfé amú onutó bɔyɔ Yerusalem Yudaf́osu *Katsun Nke ámu ogyíkpá. Mú su bowun t́á ɔɔbwe unu fée.

⁴⁶Yesu létrá yinkí ý Galilea ɔmát́, Kana wúluto, ɔt́iné ámúbú ɔledamlí ntsu bwé ntá ámu. ɔmá ɔhande ɔku tsie Kapernaum wúluto. ɔbu obi yinhé ɔkúv́a ɔda ɔdelɔ. ⁴⁷Bréa ɔhande amu lónu áñi Yesu latsú Yudea ba Galilea a, olegya mu ɔkpa yókokóli mu ɔbéε, mu bi yínhé lawú tá, ɔkplí ba Kapernaum, ɔbetsa mu ilo ha mu. ⁴⁸Yesu lébláa mu ɔbéε, “Mú su ní mlumókúwun osúna a, mlumóhɔ mi gyi ekekéke?”

49 Ɖmá ɔhande amu lébláa mu ɔbéɛ, “Owíé! Ní anɔ ayabi mɔwa ɔsa á, kebi ámu obówu.”

50 Yesu lébláa mu ɔbéɛ, “Yɔ! Fú bí ámu obénya nkpa!”

Oyin ámu lóhɔ asún ámúb Yesu lébláa mu amusu gyi, oleyinkí ɔyɔ wóyí. 51 Bréá ɔyɔ á, mu asúmpú beba befia mu, bláa mu beɛ, “Fú bí ámu lanyá nkpa.”

52 ɔlɔfité amú bréá iwɔ lówa mu bi ámu ɔnlɔn. Bebláa mu beɛ, “Owísó ámu lési mu ígye ɔpa ɔɔɔ-kuɔɔɔ.” 53 ɔlɔn á, ɔɔɔkɔ́n ání alɔ bré ámutɔ kén Yesu lébláa mu ɔbéɛ, mu bi ámu obénya nkpa ní. ɔlɔn su mva mu wóyítɔfɔ fée ɔhɔ Yesu gyi.

54 ɔlɔn gyí osúna nyɔɔsɔ́á Yesu lóbwɛ bréá olotsu Yudea ba Galilea nɔ.

Tsukule Osínpu Ɖku ɔlɔ Tsa

5 1 Asún ánfɔ ɔma a, Yesu lóɔv yɔ Yerusalem *Yudafɔ Bulusúm nke ku ogyíkpa. 2 Bɔpwe buntíí wá wúlu amu. Bokwi ibún ku mantáa buntíí amu ɔkpa ɔnɔ kúvá butetí mú Akúfa Ɖtsónkpa. Butetí ibún ámu Betesda *Hebri ɔblítɔ. Beyi mbu anu bómlí mú. 3-4 Alɔpu tsɔtsɔtsɔ bubun ibún ámu asu mbu ánfɔ. Amótɔ aku bugyi ansibi abwiepú, abɔ pú tsukule asínpu.^f 5 Oyin ɔkúv alasin tsukule ní advasa-kwe (38) kéké da unu. 6 Bréá Yesu lówun mu a, olowun ání alalɔ, dí unu wá ɔpá. Mú su ɔɔɔfité mu ɔbéɛ, “Fudeklé fɛɛ iwɔ iwá fú ɔnlɔn?”

7 Tsukule osínpu amu léle mú ɔnɔ ɔbéɛ, “Owíé, ní bowúli ntsu ámutɔ á, mma ɔhá ání obótsu mí wá mútɔ. Nótutsúá ambɔbwɛ á, ɔku lagyankpá wíé mútɔ dodo.”

8 Yesu lébláa mu ɔbéɛ, “Kusu! Tsu fú ɔklan, afvnatu!” 9 ɔlɔn unu oyin ámu iwɔ lówa mu ɔnlɔn, ɔɔkúv tsú mu ɔklan, wá natí bu.

Alɔ eke ámu igyi Yudafɔ *Ɖkpúnú Ɖɔaké. 10 Mú su Yudafɔ ahande beka oyin ámúb Yesu latsá mu ɔlɔ ámu ansítɔ, blí

^f5:4 Mútɔ yée 4 bu nwló dada amu akutɔ: *lbu nu bu unu á, Bulu-ɔbɔpu tobowulí ntsu ámutɔ. ɔlɔn su butsie unu bvyo mu. Tsífé ní ɔbá bowulí mú á, fúv fegyankpá wíé mútɔ á, futenyá ulɔtsá.*



Yesu mva tsukvle osínpu amv ni. (Yohane 5:6)

bee, “Nde igyi Ɔkpúnú Ɔdaké. Anu mbla meha ɔkra ání fósará fú ɔklan.”

11 Ɔlebláa amú ɔbéé, “Ɔhá ámú ɔletsá mí uló ámv lébláa mí ɔbéé, ‘Tsu fú ɔklan, afonatu.’”

12Mú su befité mu bæe, “Ma lébláa fu ɔbée, futsúu fú ɔklan afunati?”

13Oyin ámu mébu ɔhá ání ɔletsa mu ɔɔ, tsúfé ahá buhié butso unu, Yesu lófwɪ wá amútó.

14ɔma a, Yesu lóyówun mu *Bulu ɔtswékpa unu. Mú ɔlebláa mu ɔbée, “Yée fawun ání ɔwɪ lawá fú ɔnɔn. Mátrá bwe lakpan, ménu múá ɔɔvɔn ɔnu méeba fusu.”

15Oyin ámu léyébláa Yudafɔ ahande amu ɔbée, Yesu létasa mu ɔɔ. 16Ínuá Yesu dé ntobí ánfɪ odu bwe ɔkpónú ɔɔaké su á, Yudafɔ ahande amu bɔwa mu kpekpeé bi. 17Táme Yesu lébláa amú ɔbée, “Mí Sí mɔkúsí agyómá yɔ. Mú su mí é mmɔkúsí.”

18Mu asun blíhé anfi su á, Yudafɔ ahande amu bekle ání bómɔ mu ɔkpagyíɔkpasu. Tsúfé megyí ɔkpónú ɔɔaké mbla ámu nkule tóvɔn su, mboún ɔleblí ɔbée, mu si gyí Bulu, ilosuná ání mua Bulunyo bugyi kékée.

Bulu Téhá Mu Bi Ámu Túmi

19Yesu léle mú ɔnɔ ɔbée, “ɔnɔkwali nde mli bláa. Mí Bulu mu Bi ánfɪ onutó mméetalí bwé tɔtɔ mí iwɔsu. Tɔá nowun ání mí Sí débwe á, mú ntɔbwé. 20Tsúfé mí Sí tɔɔwé mí, otosúná mí ɔtɔá mu onutó ɔɔdebwe féé. Inn! ɔbɔwa mli wánwan ání obósuná mí múá ɔɔvɔn alɪ. 21Alɪ ámúú mí Sí tɔkúsvá ahá tsú afúlitɔ, há amú nkpa ámu a, alɪ mí é ntehá ahá ání ndeklé nkpa ní. 22Mí Sí tamagyi asún há ɔpón, támɛ alapú asúngyí féé wá mí ɔbitɔ, 23ménu ɔhagyíɔha obóbu mí fé alɪá otobú mí Sí ámu. ɔhá ání ɔtamabú mí tamabú mí Sí ámúú ɔɔpɔ mí sísí ámu é.

24“ɔnɔkwali nde mli bláa mbée, ɔhagyíɔha ání otonú mí asún, ɔtɔhɔ ɔhá ámúú ɔɔwa mí sísí ámu gyi, bu nkpa ání utamatá. Bulu méegyí mu asún, há mu pón, tsúfé aladálɔ lowutɔ ba nkpatɔ dodo. 25ɔnɔkwali nde mli bláa. Bré ku ɔbá. Bré ámu ɔlawúna fun ání ahá ání bugyi fé aha wuhés bónu Bulu mu Bi ámu ɔmɛ. Amúá bonu mú bénya nkpa.

§ 5:25 Ahá ání bawú ɔɔtɔ.

26 Tsúfé mí Sí búv túmi, ɔtɛhá nkpa. Alí kén alahá mí ánfí ngyi mu Bi ánfí túmi, ɔbéé nháa ahá nkpa ní. 27 Alahá mí túmi ɔbéé, ngyíi ahá asún, tsúfé mígyí Nyankpusa-Mu-Bi ámu ni. 28 Asún ánfí imáwa mli wánwan. Bré ku ibá, afúli féé bónu mí ɔme, 29 kúsú. Amúá ɔɔbwe yilé bɛlakúsú, nyá nkpa ání itamatá. Amúá ɔɔbwe laláhe a, négyi amú asún, há amú ipón.”

30 “Mmɛetalí bwé tɔtɔɔtɔ mí iwɛsu. Asún ání nonú tsú mí Sí wá á, mú ntɔpúgyí asún. Mú sù ntegyi asún ɔɔɔkwali su ní. Tsúfé ntamabwé tɔá mí onutó ndeklé, mboún tɔá ɔhá ámúbú ɔlwa mí sísí ámu tekle.”

Yesu Iwɛ Adánsɛ Wankláán Agyípó

31 Yesu lóyɔ músú blí ɔbéé, “Ní mí onutó negyi mí iwɛ adánsɛ á, mlumɔ́hɔ mú ání ɔɔkwali igyi.^h 32 Bulu é tegyi mí iwɛ adánsɛ. Nyin ání mí iwɛ adánsɛ ámúbú odegýí amu igyi ɔɔkwali. 33 Mlilawá abí sísí Yohane. Alabláa mli ɔɔkwali amu. 34 Mí mú á, mmehián anyánpúsa adánsɛ. Mboún nde mli asún ánfí bláa, méni Bulu ɔɔhɔ mli nkpa. 35 Yohane asun blíhé ɔbwe fé ɔkandíe ání idewankí. Mú su mlilótsulá gyi mú ɔdwe kpalobí. 36 Mbu tɔá itegyi mí iwɛ adánsɛ, idun Yohane klé amu. Agyúmá ámúbú mí Sí lawá ɔbéé mbwée mɔ mú ɔnɔ, nde mú bwe ámu dé adánsɛ gyi ání mɔlɔ́wa mí sísí. 37 Mí Sí ámúbú ɔlwa mí ámu onutó lagyi mí iwɛ adánsɛ. Mlumɔ́kónu mu ɔme, mlumɔ́kówun mu é ki. 38 Mlumɔ́hɔ mu asún wá mli kluntɔ, tsúfé mlumɔ́hɔ mí ámúbú ɔlwa sísí ámu gyi. 39 Mlúkíá mlénya nkpa ání itamatá tsú Bulu asun wanlínhé amutɔ. Mú sù mli ansí lapé, mlidé mú kasí ní. Mí iwɛ adánsɛ Bulu asun wanlínhé amu idegyí. 40 Táme mlilakíná mí wá bá, méni mlénya nkpa ámu.

41 “Mmedédunká mbée, ahá bukánfu mí, 42 tsúfé nyin mli dodo. Nyin ání mlitamadwé Bulu tsú mli kluntɔ. 43 Naba mí Sí dátɔ, mlumɔ́hɔ mu. Táme ní ɔha bambá ɔbá mu onutó iwɛsu á, mlɔ́hɔ mu. 44 Mlitekleá mlékanfú aba, táme

^h 5:31 Mose mbla lósuná ání ahá abanyó ogyí adánsɛ.

mlitamabó mbódí ání Bulu ɔkule pé ámu ɔkánfu mli. Nkálí ɔbɔbwe mlɔ́hɔ mi gyi? ⁴⁵Mlumáki mliaa, néle mli ulá mí Sí ansító. Mose amúú mli ansí ɔdun musu mliaa ɔbɔ́hɔ mli nkpa ámu mboún ɔbéle mli ulá Bulu ansító ní. ⁴⁶Ní lélé mlɔ́hɔ Mose asúnsú gyi a, teki mlɔ́hɔ mí asúnsú gyi, tsúfé mí ɔw asún ɔɔwanlín tswi. ⁴⁷Táme íniá mliamɔ́hɔ tóá ɔɔwanlín tswísv gyi a, nkálí ɔbɔbwe mlɔ́hɔ mí asun blíhész gyi?"

Ahá Mpím-nu Atogyihe Ha

(Mateo 14:13-21; Marko 6:30-44; Luka 9:10-17)

6 ¹Íni ɔma a, Yesu mua mu *akasípú befa Galilea ɔpúá butetí mú Tiberia amu yó mú ɔbun. ²Ɔɔɔm betsiá buo mu, tsúfé ɔde alɔpu tsa wánwansu. ³Mua mu akasípú bɔdu yó okúku kusu, yétsiá asi unu. ⁴(Alí bré ámutɔ á, Yudafo nkeá bɔpugyi Israelfosu *Katsun Nke ámu ulafun ta.) ⁵Unu Yesu lótsu ansí fúá wun ání ɔɔɔm kponkponkponnti bebá mu wá. Múú ɔlefuté Filipo ɔbéé, “Nkúnú abénya atogyihe hɔ ha ahá ánfí bégyi?” ⁶(Yesu léblí asún ánfí púsɔ Filipo ki, tsúfé oyin tóá ɔbɔbwe dodo.)

⁷Filipo léle mú ɔnɔ ɔbéé, “Ní apú tsra kwe ɔkóká hɔ atogyihe kúráá á, ɔmóɔfun ání okugyíɔku obénya kpalobí gyí!”

⁸Simon Petro mu pio Andrea, ogyi akasípú amutɔ ɔkule lébláa Yesu ɔbéé, ⁹“Oyimbi ɔku dé bodobodo apín pútúpútú anu pú ntsutso iye bwáhé anyɔ. Táme ntu íni bɔbwe ahá tsɔtsɔtsɔ ánfí?”

¹⁰Yesu lébláa mu akasípú amu ɔbéé, “Mliha amú abutsiatsia asi.” Ahá ámu féé betsiá ífású. Ayin ání bubu amútó bɔbwe fé mpím-nu (5,000). ¹¹Múú Yesu lóhɔ bodobodo amu, dá Bulu ípán, ɔleha beye mú há ahá amúú butsie unu ámu. Alí kén ɔɔbwe ntsabi buáhé amu é ní. Amútó okugyíɔku lénya alá odeklé. ¹²Begyi mwe sian. Yesu lébláa akasípú amu ɔbéé, “Mlikula síanhe amu, méni ɔmóɔbwe atɔ yintáhé.” ¹³Lélé, bɔtɔsí síanhe amúú benya tsú bodobodo anu ámutɔ ámu. Uɔbulá alakpá dúanyɔ kéké.

¹⁴Ahá ámu bowun osúna anfi Yesu labwé ánfí. Mú su beblí beé, “Léle, oyin ánfí gyí Bulu ɔnɔsú ɔtɔpú amúú bowanlín

mu iwí asón wá Bulu asóntó bée, óbéba oyító ámu ní.” ¹⁵Yesu lówun ání ahá ámu babwé agywun bée, béba bekítá mu ówunlínító yáí mu iwíe. Mú su mu nkule óléladó yó nkpa sí amú.

Opusu Natí

(Mateo 14:22-33; Marko 6:45-52)

¹⁶Bréá owí lópon a, Yesu akasípú beklí ba Galilea opu onó. ¹⁷Owí latá, táme Yesu mókúyínkí botu amú. Mú su botu wíe óklontó, budefa boyó Kapernaum. ¹⁸Afú kponkpontu ku léba idetsúun, opu amu lówa dabi. ¹⁹Alí bré ámutó á, akasípú amu baplá óklun amu yó fé máuli asa ntéé ana. Iwu bowun ání Yesu ná opu amusu óbá amú wá. Mú su ifú lekítá amú. ²⁰Táme Yesu lébláa amú óbée, “Mí ní, mlumánya ifú!” ²¹Iwu botsu mu wá óklun amuto ansigyísó. Ilotsutsúa iwanki amú á, óklun amu lawíe osubúnó, ótíné amú boyó ámu.

Yesu Dunká

²²Óyí kehe a, ódom amú besi bubu opu amu óbun iwu ámu bowun ání óklun kuku itráa melíi iwu. Múá tekí ulí iwu akasípú amu bowie náti ní. Bowun ání Yesu mówie mútó asa benatí. ²³Mú óma a, nklun aku lótsu Tiberia wúluto belí mantáa ótíné amú begyi bodobodo amú Yesu léda Bulu ipán púhá amú ámu. ²⁴Ódom amu bowun ání Yesu lanatí iwu, mu akasípú amu é buma iwu. Mú su botu wíe nklun amuto yó Kapernaum, bude Yesu dunká.

Bodobodoá Itehá Nkpa

²⁵Bréá ódom amu boyówun Yesu ntsu óbun iwu á, befité mu bée, “Osunápú, bré mómú fobowie nfi?”

²⁶Yesu lébláa amú óbée, “Ónókwali nde mli bláa. Megyí osúna amú ndebwe mlidéwúun amu su mligyá mí ókpa. Mboún bodobodo amú neha mli, mlulégyí mwe ámu su. ²⁷Mlumáwun ipian atogyihe ání iteyíntá su. Mboún mlwun ipian múá ibétsiá yó, íbéha nkpa ání utamatá, ání mí, Nyankpusa-Mu-Bi ánti néha mli su. Tsúfé mí mí Sí Bulu lahie nsu ání mbu ókpa há mú.”

28 Befité Yesu bæe, “Gyuma mɔmɔ abwée isuna ání anidé tǎ́ Bulu tekle bwe?”

29 Yesu léle mú ɔ́nɔ́ ɔ́bée, “Tǎ́ Bulu déklé ɔ́bée mlibwée gyí, mliho mí ánfɔ́ ɔ́lɔ́wa sísí ánfɔ́ gyí.”

30 Inu befité Yesu bæe, “Osúna mɔmɔ fǔ́bwe abówun, ménu abóhɔ́ fu gyí? Ntɔ́ fǔ́bwe? 31 Aní anáin begyi *mana dimbí ámusu. Bɔ́wanlín mú wá Bulu asún ámutɔ́ bæe, ‘Mose léha amú atǎ́ ilotsu ɔ́súsú bá begyi.’ ”

32 Múy Yesu lébláa amú ɔ́bée, “Ɖnɔ́kwali nde mli bláa. Megyí Mose léha mli atogyihe amu tsú ɔ́súsú. Mí Sí léha mli bodobodo onutónutó ámu tsú ɔ́súsú. 33 Tsúfé bodobodo ání Bulu tehá gyí mí ánfɔ́ natsú ɔ́súsú bá, nebá beha ɔ́yító ahá nkpa ánfɔ́.”

34 Ahá ámu bebláa mu bæe, “Owíé, tsia ha aní bodobodo anfi brégyíbré, tsú séi púya.”

35 Yesu lébláa amú ɔ́bée, “Mígyí bodobodo amú itehá nkpa ámu ni. Akún méekítá ɔ́há ání ɔ́leba mí wá ekekekeke. Ɖmewúlí méekítá ɔ́há ání ɔ́lɔ́ho mi gyí é ekekekeke. 36 Fé alíá nebláa mli á, mli lawun mi, táme mli mǔ́kúhɔ́ mi gyí bɔ́fun séi. 37 Ɖhagyíɔ́ha ání Ɖsí ámu léha mí ɔ́béba mí wá. Mméegya ɔ́hagyíɔ́ha ání ɔ́leba mí wá. 38 Tsúfé mmotsu ɔ́súsú ba mbée, nebá ɔ́bwe tǎ́ ndeklé. Mboún tǎ́ ɔ́há amú ɔ́lɔ́wa mí sísí ámu déklé ɔ́bwekpá neba. 39 Tǎ́ ɔ́há amú ɔ́lɔ́wa mí sísí ámu déklé gyí, ahá amú ɔ́lɔ́pɔ́há mí ámutɔ́ ɔ́kuku mádali mí ibi. Mboún nkúsva amú féé tsu afúlito eke tráhe amu. 40 Tǎ́ mí Sí ámu tekle gyí, ɔ́hagyíɔ́ha ání olowun mí, mu Bi ánfɔ́, ho mi gyí obénya nkpa ání utamatá. Nókúsúba mu tsú afúlito eke tráhe amu.”

41-42 Ínǎ́ Yesu léblí ɔ́bée, “Mígyí bodobodo amú notsu ɔ́súsú ba amu ni” su á, Yudafo ámu ɔ́wa mu wuntí bi. Bæe, “Megyí *Yosef mu bi Yesu amu ni? Animéyín mu si muv mu yin? Ɖkpa mɔmɔ sǔ́ ɔ́deblí ɔ́bée, ‘Ɖsúsú notsu neba?’ ”

43 Yesu lébláa amú ɔ́bée, “Mlisi wuntí mli wolewule. 44 Ɖhaa méetalí ba mí wá, nkéti mí Sí amú ɔ́lɔ́wa mí sísí ámu lakpá mu ba mi. Mí é nókúsúba mu tsú afúlito eke tráhe amu. 45 Bulu ɔ́nɔ́sú atǔ́pú amutɔ́ ɔ́ku lówanlín tswi

ɔbée, ‘Bulu obósuná ahá fée ató.’ Ɖhagyíɔha ání alanú mí Sí asún, kásí mú tsú mu wá teba mí wá. ⁴⁶Ɖhaa mǎkúwun Ɖsí ámu ki. Mí ánfí notsu Bulu wá bá anfi nkule láwun mu ki. ⁴⁷Ɖnɔkwali nde mli bláa. Ɖhagyíɔha ání ɔlɔɔ mu gyi bu nkpa ání itamatá. ⁴⁸Mígyí bodobodoá itehá nkpa ní. ⁴⁹Íniá mli anáin begyi mana *dimbísú óó á, amú fée bowu. ⁵⁰Táme bodobodo anfi gyí múa ulatsú ɔsúsú bá, méni ɔhagyíɔha ání obégyi mú móowu ní. ⁵¹Mígyí bodobodo amúbú ntehá nkpa, natsú ɔsúsú ba amu ni. Ɖhagyíɔha ání ogyi bodobodo anfi obétsiá nkpa, omóowu ekekekeke. Mí ɔyulúv gyí bodobodo amu. Mú nési há, méni ɔyítǔfɔ bénya nkpa ní.”

⁵²Ínu Yudafo ámu benya asún anfi Yesu lablí ánfí iwu ɔblí. Amú wulewule begyi aba nwéen bee, “Nkáli oyin ánfí ɔbétalí pú mu ɔyulúv há aní ɔbée agyíí?”

⁵³Yesu lébláa amú ɔbée, “Ɖnɔkwali nde mli bláa. Ní mímégyi mí, Nyankpusa-Mu-Bi ánfí ɔyulúv, nu mí obugya a, mímá nkpa ání itamatá kukvuku mlɔ. ⁵⁴Ɖhá ání olegyi mí ɔyulúv, nu mí obugya bu nkpa ání itamatá. Nǔkusúba mu tsú afúlitɔ eke tráhe amu. ⁵⁵Tsúfí mí ɔyulúv igyi atogyihe onutó, mí obugya é igyi atonuhe onutó. ⁵⁶Ɖhá ání ogyi mí ɔyulúv, nu mí obugya tsie mutɔ, mí é ntsie mutɔ. ⁵⁷Mí Sí Ɖkɔankpavu amu lówa mí sísí. Mu súbu nkpa. Mú su fúbá fegyi mi a, mí su fú é fubu nkpa. ⁵⁸Mígyí bodobodo onutóá notsu ɔsúsú ba ni. Mli anáin begyi mána, táme bowu. Ɖhá ání ogyi bodobodo anfi mú obétsiá nkpa ání itamatá.”

⁵⁹Yesu léblí asún ánfí bréá ɔde ató suná Kapernaum, Yudafo *offakpa.

Nkpa Ání Itamatá Asún

⁶⁰Yesu abúopu tsɔtsɔtsɔ ámutɔ aku bonu asún ánfí á, beblí bee, “Atosunáhé ánfí mú bu ɔnlun o! Ma ɔbétalí hɔ mó?”

⁶¹Yesu lówun ání mu abúopu amutɔ aku bude wunti ání alablí alí su á, ɔlefté amú ɔbée, “Asún ánfí ilahan mli? ⁶²Múmú ní mlowun Nyankpusa-Mu-Bi ámu ɔyó ɔtínéá olotsu ba me, nkáli mlóbwe? ⁶³Bulu Ɖjé ámu téhá nkpa.

Nyankpusa ɔwunlín mú á, kpaali ígyi. Asún ánfí nde mli bláa anfi itsú Ɖɛ́ ámú ɔtehá nkpa ámu wá, ⁶⁴táme mltɔ aku bumɔho mósú gyi.” Yesu lówun amúá bumɔho mósú gyi pú ɔhá ání ɔbéle mu há yáí dodoodo. ⁶⁵Ɖletrá bláa amú ɔbé, “Ínu sù nebláa mli mbée, ɔhaa méetalí ba mí wá, nkéti mí Sí lakpá mu ba mí” ní.

⁶⁶Tsú eke ámu a, Yesu abúopu amu tsɔtsɔtsɔ beyinkí mu ɔma, bumetrá buo mu. ⁶⁷Mú su Yesu léfité mu akasípú dúanyɔ ámu ɔbé, “Mli é mlidékléá mléyinkí mí ɔma lóó?”

⁶⁸Simon Petro lébláa mu ɔbé, “Owíé, ma wá abóyɔ? Fú wá asún ání itehá nkpa ání itamatá bu. ⁶⁹Anulahogyi, anulabí ání fúgyí Ɖha Wankíhé amú fotsú Bulu wá ámu nu.”

⁷⁰Ínu Yesu lébláa amú ɔbé, “Mli ahá dúanyɔ nele, táme mltɔ ɔku gyí ɔbunsám!” ⁷¹(Simon Iskariot mu bi Yuda ɔde á. Tsúfé ogyi akasípú dúanyɔ ámutɔ ɔkule. Mu ɔbéle mu há ní.)

Yesu Mva Mu Apio Yinhé

7 ¹Mú ɔma a, Yesu létsiá kí Galilea ɔmátó. Omekléá ɔbóyɔ Yudea ɔmátó, tsúfé Yudafo ahande amu buɔde mu tée abumɔ mu. ²Táme Yudafo *Kantankpatɔtsiá Nkegyí lafun. ³Mú su mu apio yinhé bebláa mu be, “Nati yɔ Yudea nke ámu ogyíkpá, méni fú abúopu amú bubu unu ámu é bówun ofúla ání fudebwe. ⁴Ɖhá ání odekléá ahá bubú mu gyumagyihé tamaráin iwí. Ínúá fúde ntobíá igyi alí bwe á, wuna le mú suna, ɔyí féé abuwun.” ⁵(Mu apíó ámu kúráá bumɔho mu gyi. Mú su bebláa mu alí ní.)

⁶Ínu su Yesu lébláa amú ɔbé, “Bréá nóyɔ unu mɔkúnyá fun. Mli mú mlétalí yó unu brégyíbré. ⁷Ɖyítɔfo buméetalí lú mli, táme mí mú buɔde mí lu, tsúfé nde amú ulá le. ⁸Mliyo nke ámutɔ. Mí mú mmɔkúnyá yó, tsúfé mí bré mɔkúfun.” ⁹Yesu léblí asún ánfí tá á, olesi tsiá Galilea ɔmátó.

Yesu Kantankpatɔtsiá Nke Ámu Ogyíkpá Yɔ

¹⁰Táme bréá Yesu apíó ámu benatí yó nke ámu ogyíkpá a, mu é oleɔain iwí yó unu. ¹¹Yudafo ahande amu bodunká mu nke ámu ogyíkpá, buɔde ahá fité be, “Oyin ámu me?”

12Ɔɔm amu beblí asún tsɔtsɔtsɔ nklobító tsú Yesu iwí. Aku beɛ, “Ɔha wankláán ogyi.” Aku é beɛ, “Ɛkekeke, ɔde ahá mlé.” 13Táme amútsɔ ɔhaa metálí blí mu iwí asún kúkló ahá abunu, tsúfé buɔe Yudafo ahande amu ifú nya.

14Bréá bowie nke ámu nsuné á, Yesu lódu wíé *Bulu ɔtswékpa wunsinésú unu yéfi ató suná así. 15Mu atosunáhé lobwie Yudafo ahande amu ɔnó. Mú su befité aba beɛ, “Oyin ánfí mókókásí ɔwulú yó nkpá. Nkálí ulɔbwe asa ɔlebi ɔwulú ahí?”

16Yesu léle mú ɔnó ɔbéɛ, “Megyí mí wá atosunáhé anfi itsú. Itsú Bulu wá. Mulówa mí sísí. 17Ní ɔku dékléá ɔbɔbwe Bulu apé á, obówun ní atosunáhé anfi itsú mí wá ntée Bulu wá. 18Ɔhá ání ɔde mu onutó asún blí dé mu numnyam dunká. Táme ní ɔku todúnká numnyam há ɔhá ání ɔlɔwa mu sísí á, ɔnɔkwalu ɔhá ámu gyí. Ɔtamawá afunu. 19Yéɛ Mose lópu mbla ámu ba mli a? Táme mlitɔ ɔkuku médé mósú gyi. Ntogyi su mlidékléá mlómɔ mí?”

20Inu ɔɔm amu bebláa mu beɛ, “*Ɔɔe laláhe bu futɔ! Ma dékléá ɔbómɔ fú?”

21Yesu lébláa amú ɔbéɛ, “Ofúla kule pé nɔbwe *ɔkpónú ɔdaké, mli féé ɔnó lobwie mli. 22Mose lówa mbla há mli ɔbéɛ, mlítún *keté. (lbu mútsɔ ání megyí Mose lótsɔ keté tún, mli anáin léfi mú así.) Yéɛ mú sù mlitetun ahá keté ɔkpónú ɔdaké ní a? 23Ní mlidé keté tún ɔkpónú ɔdaké, ménu mlumɔkúsú líí Mose mbla ámusu á, ntogyi sù mlilanyá ɔbló mísú mliaa, natsá nyankpusa kéín ɔkpónú ɔdaké? 24Mliyo asúntó wankláán, asa amlíha ipón. Mliyo ɔnɔkwali gyi asún.”

Yesu Iwí Nwéengyi

25Yerusalemfo aku befité amú iwí beɛ, “Megyí oyin ánfí Yudafo ahande buɔedunká abumɔ ní? 26Megyí mu líí ahátɔ ɔɔetɔí, amútsɔ ɔkuku mékpla mu a? Ntée ulawánkí amú ání mogyí *Kristo, (ɔhá ámúú Bulu ladá mu ofúli amu) ní? 27Oyin ánfí mú a, aní féé anyin ɔtínéá otsú, táme ní Kristo ámu ɔbá á, ɔhaa méébi ɔtínéá otsú.”

28Bréá Yesu bu mósú ɔde ató ámu suná Bulu ɔtswékpa wunsinésú unu á, olotsu ɔnó fúá blí ɔbéɛ, “Mliyin mi,

mlyin ɔ́tínéá notsú, táme megyí mí onutó túmisu neba. Ɖɔ́kwalıpu ɔ́há ámúɔ́ ɔ́ɔ́wa mí sísí ámu gyí. Mluméyín mu. ²⁹Táme mí mú nyin mu, tsúfé mulówa mí sísí. Mu wá notsu ba.”

³⁰Ínu bekle abukíta mu, táme bumɔ́pu ibi da mu, tsúfé mu bré mɔ́kúfun. ³¹Táme amúɔ́ ahá tsɔ́tsɔ́tsɔ́ ɔ́ɔ́ɔ́ mu gyi. Mú su befuté beɛ “Ní Kristo amu ɔ́bá á, ɔ́bétalí bwé osúna dun mú ánfɔ́ oyin ánfɔ́ débwe?”

Yoh

Bɔ́wa Bɛɛ Bukíta Yesu

³²Bréá *Farisifɔ́ ámu bonu ání ɔ́ɔ́m amu buɛ Yesu íwɔ́ asún blí nklobíɔ́ á, amúa Bulu *igyí ahapú dehen amu bɔ́wa Bulu ɔ́tswékpá agyópu beɛ bukíta Yesu. ³³Ínu su Yesu lébláa amú ɔ́béɛ, “Ílasí nke kpalobí pé nétsiá mlí wá. Mú ɔ́ma a, néyinkí yó ɔ́há ámúɔ́ ɔ́ɔ́wa mí sísí ámu wá. ³⁴Mlódunká mí, táme mlumóowun mi. Mluméetalí ba ɔ́tínéá mbu é ekekekeke.”

³⁵Yudafɔ́ ahande amu befuté aba beɛ, “Nkúnú oyin ánfɔ́ obótu ɔ́kpa yó, su abódunká mu anumóowun mu? Ntéɛ odekléá ɔ́bóyɔ́ Griikifɔ́ awúlu amúɔ́ anɔ́ pí badásáín yó músú ámuɔ́, ntéɛ obóyósuná Griikifɔ́ ámu ató? ³⁶Asún ánfɔ́ ɔ́deblí é así mé? Ɖbéɛ, ‘Mlódunká mí, táme mlumóowun mi. Mluméetalí ba ɔ́tínéá mbu é.’ ”

Nkpa Ntsu

³⁷Nke ámu eke tráheá ígyi eke títriu á, Yesu lókusú líí kplun blí ɔ́béɛ, “Ní ɔ́mewóli de ɔ́ku á, ɔ́bá mí wá obonu ntsu. ³⁸Ɖhagyíɔ́ha ání ɔ́ɔ́ɔ́ mɔ́ gyi a, ‘Nkpa ntsu bɔ́wɔ́ dali mutɔ́.’ Alí bɔ́wanlín wá Bulu asún ámutɔ́ ní.” ³⁹(*Ɖɔ́ɛ Wankíhé amúɔ́ Bulu ɔ́béha ahá ání bɔ́ɔ́ mu gyi amu íwɔ́ asún ɔ́deblí. Alí bré ámutɔ́ á, Ɖɔ́ɛ Wankíhé amu mɔ́kúnyá ba, tsúfé Bulu mɔ́kúnyá wá Yesu numnyam.)

Ahá Ámutɔ́ Leye

⁴⁰Bréá ɔ́ɔ́m amu bonu Yesu asun blíhé anfi á, amúɔ́ aku beblí beɛ, “Lélé, Bulu ɔ́nɔ́sú ɔ́ɔ́pú amúɔ́ anúde mu ɔ́kpa kú amu ni.”

⁴¹Aku é bεε, “Kristo amu ni!” Táme amótó aku é beblí bεε, “Yée megyí Galilea omátó Kristo amu obótsu o. ⁴²Bowanlín wá Bulu asún ámutó bεε, Owíe *Dawid abusuantó Kristo amu obédalí tsu. Bókwí mu Betlehem, Dawid wúlutó.” ⁴³lna Yesu iwí asún ánfí su ukulebwe metsiá amótó. ⁴⁴Amótó aku bekle abukita Yesu, táme ohaa mópu íbì da mu.

Yesu Máhogyi

⁴⁵Omá-oma a, Bulu otswékpa agyópu amúb bowa sumbí ámu besankí ba Bulu igyí ahapú dehen pú Farisifo ámu wá. Befité agyópu amu bεε, “Ntogyi su mlumékutá mu ba?”

⁴⁶Bele mú onó bεε, “Ohaa mókútóí fé oyin ánfí kí!”

⁴⁷Farisifo ámu befité amú bεε, “Mú su oyin ámu lamlé mli é. ⁴⁸Mlulawun ohande ntée Farisiyin oku laho mu gyi kí? ⁴⁹Ekekekεke! Odom anfi bomeyín Mose mbla ámu iwí toto. Mú su Bulu olwí amú.”

⁵⁰lnu Farisifo ámutó okule, ogyi Nikodemo amúb olwo Yesu wá onyé ámu léfíté amú obée, ⁵¹“Ani mbla leha okpa ání abéha oku ipón asa abéfíté mu onótó asún nú?”

⁵²Befité mu bεε, “Galileayin fú é fúgyi? Kí Bulu asún ámutó wankláán. Fówun ání Bulu onósó otóipú okukuvuku móotsu Galilea omátó.” ⁵³[lnu amú féé benatí yó wóyító.

Otsi Oku Mbuato Pú Mu Kitá

8 ¹Bréá ahá amu bedasáín á, Yesu lódu yó Nfo-nyíbu ámusú. ²Mú oyi kehe bake a, oleyinkí ba Bulu otswékpa wunsunésú unu. Ahá ámu féé beba mu wá. Mú su oletsíá así, olefí así ode amú ató suná. ³Bréá odetóí á, *Farisifo pú Mose *mbla asunápú amu bekpa otsi okuá bakítá mu, ode mbuato ba belí amú ansító. ⁴Múú bebláa Yesu bεε, “Osunápú, bakítá otsi ánfí mbua otokpá. ⁵Mose Mbla ámu léblí obée, adáa atsi ánfí odu abwi mo. Nkálí fudeblí tsú asún ánfí iwí?” ⁶Asúnklé sù befíté mu asún ánfí, abuyoto mu ha ahande. lnu Yesu lóbun, pú osrebi ode ató wanlín osolúto.

¹8:1 *Nfo-nyíbu* igyi obubwí kuá íbu mantáa Yerusalem, butetí mú Olifbu.

⁷Bréá butráa bude asún ámu fité plá á, olobwií tsíá, bláa amú ɔbéé, “Mluto ɔhá ání ɔmɔkúbwé lakpan ki ogyánkpa da ɔtsi ánfí ibwi.” ⁸Ɔleblí mú alí á, oleyinkí bun ɔde mu atɔ wanlín ɔsulúto. ⁹Bréá ahá ámu bonu mu asún ánfí á, ɔɔwa natí ikule-kule bi, tsú ahandesu ɔɔtu nyebísú. Ilebesi Yesu mu ɔtsi ámu nkule ɔbun nsiné unu. ¹⁰Yesu lóbwíí tsíá, ɔlefíté ɔtsi ámu ɔbéé, “Ɔtsi, nkí ahá ámu me? Ɔkuku mésián ání ɔbéha fú ipón?”

¹¹Ɔtsi ámu lélé mú ɔnɔ ɔbéé, “Owíé! Ɔkuku méha mí pón o!” Mú Yesu lébláa mu ɔbéé, “Ibu alé! Mí é mméeha fú ipón! Nati, mátrá bwe lakpan.”^j

Ɔyítɔ Wanki

¹²Ínu ɔma a, Yesu léyinkí bláa Farisifo ámu ɔbéé, “Mígyí ɔyítɔ wanki ni. Ɔhagyíɔha ání obuo mi obénya wanki ání íbéha mu nkpa, oméésin oklúnto ekekeke.”

¹³Ibu á, Farisifo ámu bebláa mu beé, “Nfóli tamakánfú mu iwí. Fumɔkúblí toto.”

¹⁴Yesu lébláa amú ɔbéé, “Ní mí onutó nde mí iwí adánsie gyí ó á, ɔmɔkwali igyi. Tsúfé mí mú nyin ɔtínéá notsú pú ɔtínéá nɔyɔ. Táme mluméyín ɔtínéá notsú pú ɔtínéá nɔyɔ. ¹⁵Anyánkpuása asúngyí ɔkpasu mlitegyi asún tsun, táme mí mú ntamagyi ɔhaa asún. ¹⁶Ní negyi asún ó á, ɔmɔkwali ɔkpasu negyi mú tsun. Tsúfé megyí mí nkule tegyi mú. Mía mí Sí ámú ɔɔwa mí sísí ámu nyo tegyi mú. ¹⁷Ɔwanlín wá mli onutó Mbla ámutɔ beé, ‘Ní adansifo abanyɔ beblí asun kua kule a, amú asún íbu mútɔ.’ ¹⁸Mí onutó ntegyi mí iwí adánsie. Mí Sí lówa mí sísí. Mu é otegyi mí iwí adánsie.”

¹⁹BeFITÉ mu beé, “Nkúnú fú sí bu?”

Yesu lélé mú ɔnɔ ɔbéé, “Mluméyín mí wankláán, mluméyín mí Sí ámu é. Ní mlyin mi wankláán á, teki mlébi mí Sí ámu é.”

²⁰Yesu léblí asún ánfí bréá ɔde atɔ suná Bulu ɔtswékpa tswutswi adáka otsiákpá. Táme ɔhaa mékutá mu, tsúfé mu bré mɔkúnýá fun.

^j7:53-8:11 Ima Griikifo nwaló dada amu akuto.

Yesu Ɔsúsúyɔ

21 Yesu létrá bláa amú ɔbéɛ, “Mí mú nɔyɔ. Mlódunká mí. Mlówu wá mli lakpantɔ. Mluméetalí ba ɔtínéá nɔyɔ.”

22 YudaƆo ahande amu befuté beɛ, “Mó ɔbómɔ mu iwɪ, sù ɔdeblí ɔbéɛ, mluméetalí ba ɔtínéá nɔyɔ?”

23 Yesu léle mú ɔnɔ ɔbéɛ, “Mli mú mlotsú ɔyí ánfɪtɔ, táme mí mú notsú ɔsúsú. Ɔyí ánfɪtɔƆo mli gyí. Mmegyí ɔyí ánfɪtɔyin mí mú ngyi. 24 Mú sù nde mli bláa mbée, mlówu wá mli lakpantɔ ní. Mlówu wá mli lakpantɔ, ní mliumóhógyi ání ‘Mígyí ɔhá ámúú mbée ngyi ámu.’ ”

25 Befuté mu beɛ, “Fúgyí ma?”

Yesu lébláa amú ɔbéɛ, “Ɔhá ámúú ntebláa mli yáí mbée, ngyi ámu kén ntráa nde mli bláa a. 26 Mbu asún tsɔtsɔɔtsɔɔ néblí tsú mli iwɪ púhá mli pɔn. Táme ɔnɔkwaliƆu ɔhá ámúú ɔlɔwa mí sísí ámu gyí. Asún ání nonu tsú mu wá nde mli ɔyítɔƆo bláa.”

27 Imɔwankí amú ání mu Si ámúú ɔbu ɔsúsú ámu iwɪ asún ɔde amú bláa. 28 Mú su Yesu lébláa amú ɔbéɛ, “Ní mledá Nyankpɔsa-Mu-Bi ámu mántá *oyikpalíhesu, tsú mú líí á, mlówun ání ‘Mígyí ɔhá ámúú mbée ngyi’ ámu. Mlébi ání ntamabwé tɔtɔɔtɔ mí onutó túmitɔ. Múá mí Sí lɔpuwá mi ɔnɔ á, mú nteblí. 29 Ɔhá ámúú ɔlɔwa mí sísí ámu buo mi. Ɔmɔkúyínkí mí ɔma, tsúfé tɔá itegyí mu ansí ntɔbwé brégyíbré.”

30 Inu ahá ámúú bonu mu asún ánfɪtɔ tsɔtsɔɔtsɔɔ bɔhɔ mu gyí.

Abraham Abí-aná

31 Yesu lébláa YudaƆo ámúú bɔhɔ mu gyi amu ɔbéɛ, “Ní mlobuo mí atosunáhé a, mli gyí mí akasípú lélé. 32 Mlébi ɔnɔkwali amu. Ɔnɔkwali amu ibéha mlégyi iwɪ.”

33 Beblí beɛ, “Abraham abí-aná anugyí. Anumókúbwé ɔhaa nkpábi ki. Mú ntogyi sù fúde anu bláa fée, ‘Mlégyi iwɪ?’ ”

34 Yesu léle mú ɔnɔ ɔbéɛ, “Ɔnɔkwali nde mli bláa. Ɔhagyíɔha ání ɔtɔbwé lakpan á, ogyi lakpan ɔkpábi. 35 Ɔkpábi

tamatsiá mu wie wóyí yó, obí tetsiá mu si wóyí yó. ³⁶Mú su ní Bulu mu Bi ámu ɔhá mlegyi iwí á, múmú mlulagyi iwí fée. ³⁷Nyin ání Abraham abí-aná mligyí, táme mlidékléá mlómó mí, tsúfé mlumóhó mí atosunáhé. ³⁸Tsá nowun tsu mí Sí wá ndeblí. Mli é asún ání mlílonu tsú mli sí wású mlidégýí.”

³⁹Bebláa mu beɛ, “Ani sí gyí Abraham.”

Yesu lébláa amú ɔbéɛ, “Ní Abraham abí mligyí á, teku mli bwehé leltan Abraham. ⁴⁰Mlidékléá mlómó mí, tsúfé nde mli ɔɔkwaliá nonu tsú Bulu wá bláa. Abraham móbwe alí! ⁴¹Mli sí bwehé mlidébwe.”

Bebláa Yesu beɛ, “Megyí mbua ɔɔɔ kwíí ani. Bulu onutó gyí ani Sí. Anumá ɔsí ɔkoku tsía mutɔ.”

⁴²Yesu lébláa amú ɔbéɛ, “Ní mli Sí gyí Bulu á, teku mlutɔdwé mí, tsúfé mu wá notsu ba. Múlówa mí sísí. Megyí mí onutó túmitɔ neba. ⁴³Ntogyi sù mlumédé mí asun blíhé asi nu? Mlumédé mú asi nu, tsúfé mí asún de mli asutɔ wóɔ. ⁴⁴Ɔbunsám gyí mli sí. Mú su mlutekleá mlóbwe tsá mli sí tekle. Ahá ɔmɔpú ogyi tsú nfiásí. Ɔtamabuo ɔɔkwali. Mú su ɔɔkwali kuku ima mutɔ. Ní ɔwá afunu a, mu tsiátɔ ɔwan ɔdele, tsúfé ofunupu ogyi. Mvgyí afunupu fée ɔsí ní. ⁴⁵Táme nteblí ɔɔkwali. Mú su mlitamahó mí asúnsú gyi ni. ⁴⁶Mlutɔ ma ɔbétalí súná ání lakpan ɔbwepú ngyi? Ní nde ɔɔkwali blí á, mú ntogyi mlumóhó mu gyi? ⁴⁷Ɔhá ání otsú Bulu wá teyáá asu nú mu asún. Mli mú mlímótsú mu wá. Mú su mlitamayáá asu nú mu asún ní.”

Yesu Mva Nanáin Abraham

⁴⁸Yudafɔ ámu bebláa mu beɛ, “Ní ablí aníaa Samariayin fugyi, *ɔɛ laláhe bu futɔ á, anilawá afunu?”

⁴⁹Yesu lébláa amú ɔbéɛ, “Ɔɛ laláhe ma mítɔ. Ntobú mí Sí, táme mli mú mlitamabú mí. ⁵⁰Mmedé mí iwí numnyam wa. Ɔha ɔku bu uná ɔde mú dunká há mí. Mvgyí asún ogyípú wankláan ámu ni. ⁵¹Ɔɔkwali nde mli bláa. Ɔhagyíɔha ání otegyi mí atosunáhésu omóowu ekekekeke.”

⁵²ɩnu Yudafɔ ámu bebláa mu beɛ, “Séi ánfu mú á, anilawun ání lélé ɔɛ laláhe bu futɔ! *Abraham mva Bulu

sísí.”) Oyin ámu lóyófwi ansító yínkí ɔbá wóyí á, ɔde ató wúun.

⁸Mu aba pú ahá ání butowun mu ɔde ató kulí befité bee, “Megyí oyin ánfí tetsiá kulí ató bré ámu ní?”

⁹Amótó aku bee, “Mu ní!” Aku é bee, “Ó-o, lían ɔlelian mu.”

lno oyin ámu onutó léblí ɔbéé, “Mí ní.”

¹⁰Befité mu bee, “Nkálí ɔlobwe asa fude ató wúun ngya?”

¹¹Ɔlele mú ɔnó ɔbéé, “Oyin ámú butetí mu Yesu amu lóbwe ɔdiba tan mí ansíbisu. Múú ɔlebláa mi ɔbéé, nnáti yɔfwi ansító Siloam paatitɔ. Nɔyófwi, múú nde ató wúun a.”

¹²Befité mu bee, “Nkónú ɔbu?” Múú ɔlele mú ɔnó ɔbéé, “Ohwée.”

Farisifo Ansibi Obwiepú Ámu Asón Futé

¹³lno bekpa oyin ámúú tɛki ogyi ansibi obwiepú ámu yáa Farisifo wá. ¹⁴Eke ámúú Yesu lóbwe ɔdiba púbwíí mu ansíbi amu igyi *ɔkpónú ɔdaké. ¹⁵Mú su Farisifo ámu belafíté oyin ámu alíá ɔlobwe asa ɔde ató wúun. Ɔlebláa amú ɔbéé, “Ɔdiba ɔlɔputan mí ansíbisu, nɔyófwi ansító. Múú nde ató wúun ngya a.”

¹⁶Farisifo ámu aku beblí bee, “Megyí Bulu ɔha oyin ámúú olobwíí mu ansíbi amu gyí, tsúfé ɔtamagyi ɔkpónú ɔdaké mbla ámusu.”

Táme aku é befité bee, “Nkálí lakpan ɔbwepú ɔbétalí bwé osúna anfi odu? Asón ánfí su bumetrá bwe kule.”

¹⁷Mú su belafíté oyin ámu bee, “Fée mulóbwíí fú ansíbi. Amansu fobu blí tsú mu iwí?”

Oyin ámu léle mú ɔnó ɔbéé, “Bulu ɔnósú ɔtáipú ogyi.”

¹⁸Yudafɔ ahande amu bumohogyi ání lélé, bɔkwíí mu ansibi obwiepú asa séi ɔde ató wúun, kpéfun bréá beti mu akwíipú ba. ¹⁹Befité amú bee, “Mlí bí ámúú mlíaa, mu ansíbi lobwie asa mlíɔkwíí mu amu ní? Nkálí ɔlobwe asa ɔde ató wúun ngya?”

²⁰Mu akwíipú amu bele mú ɔnó bee, “Aniyin ání aní bí ní. Aniyin ání aníɔkwíí mu ansibi obwiepú. ²¹Táme alíá ɔlobwe

asa ɔde atɔ wúun pú ɔhá ání olobwií mu ansíbi mú á, anuméyín. Kókoli mli, mlfite mu onutó. Megyí kebi ógyi, aladan. Ɔbétalí lé mú ɔnɔ́.” 22 Mu akwúpú amu bude Yudafo ahande amu ifú nya. Mú su beblí alí ní. Tsúfɛ ahande amu bablí tswi beɛ, ɔhagyíɔha ání ɔbéblí ɔbéɛ, Yesu gyí *Kristo, (ɔhá ámú Bulu ladá mu ofúli amu) a, bégya mu lé Yudafo *ofiakpa unu. 23 Mú su mu akwúpú amu beɛ, “Megyí kebi ógyi, aladan, mlfite mu onutó!” ní.

24 Belatí oyin ámú bɔkwú mu ansibi obwiepú ámu otse nyɔɔsi, bláa mu beɛ, “Ka ntam Bulu ansítɔ ání féblí ɔnɔkwali. Anyin ání lakpan ɔbwepú oyin ámú olobwií fú ansíbi amu gyí.”

25 Mú oyin ámu léle mú ɔnɔ́ ɔbéɛ, “Ní lakpan ɔbwepú ogyi o, yilé ɔbwepú ogyi o, mí mú mmeyín. Toku kule pé nyin. Múgyí, tɛki bré ámu ntamawun atɔ́, táme séi mú ndewúun.”

26 Mú befuté mu beɛ, “Nkálí ɔlbwe fú? Nkálí olobwií fú ansíbi amu?”

27 Mú ɔlele mú ɔnɔ́ ɔbéɛ, “Nabláa mli dododo, táme mlumónu. Ntogyi sù ntráa bla mli? Mli é mlidékléá mlóbwe mu akasípú lóó?”

28 Besia mu, bláa mu beɛ, “Fúgyí mu ɔkasípú. Aní náin Mose akasípú aní mú anígyí. 29 Anyin ání Bulu lótoí bláa Mose asún, táme anuméyín ɔtínéá oyin ánfí mú otsú.”

30 Oyin ámu lébláa amú ɔbéɛ, “Ngya nto asún ní? Mluméyín ɔtínéá otsú, táme mulábwíí mí ansíbi ni o. 31 Aní fɛé anyin ání Bulu tamanú lakpan abwepú isu. Ɔhá ání otobú mú, otegyi mu mblasu isu otónú. 32 Tsú bréá Bulu lóbwe ɔyí ɔpá á, ɔhaa mɔkúnú ání ɔku labwíí ɔhá ání bɔkwú mu ansibi obwiepú ansíbi ki. 33 Ní megyí Bulu ɔha oyin ánfí gyí á, tɛki ɔméetalí bwé ɔtɔɔɔ.”

34 Ahande amu bele mú ɔnɔ́ beɛ, “Fú ánfí fugyi lakpan ɔbwepú tsú bréá bɔkwú fú ánfí dékléá fósuná aní asún?” lnu nu begya mu lé ofiakpa unu.

Ɔnétɔ́ Ansíbi Bwie

35 Yesu lónu ání bagya oyin ámu lé ofiakpa unu. Mú su bréá olowun mu a, ɔlefuté mu ɔbéɛ, “Fɔho Nyankpusa-Mu-Bi ámu gyí?”

³⁶Oyin ámu lébláa mu ɔbéε, “Owíé, suna mí ɔhá ání ogyi, mí anho mu gyi!”

³⁷Yesu lébláa mu ɔbéε, “Fawun mu dodo. Mugyí ɔhá ání ɔde fú asún bláa séi ání á.”

³⁸Múy oyin ámu lébláa mu ɔbéε, “Mí Wíé, nahɔ fu gyi.” Inu olosúm Yesu.

³⁹Yesu léblí ɔbéε, “Asún ogyíkpa neba ɔyí ánífɔ, ménu ahá ání bumedé ató wúun bówun ató. Ahá ání budewúun é ansíbi ibwie.”

⁴⁰Farisifɔ akvá bubu Yesu wá inu bonu asún ání. Múy befité mu beε, “Mú su fudéblí fee ani é anigyí ansibi abwiepú?”

⁴¹Yesu léle mú ɔnó ɔbéε, “Ní ansibi abwiepú mligyí á, tekí Bulu mééha mli ipón. Táme íniá mliaa mliáde ató wúun su á, mli lakpan lasin mli su.”

Akúfa ɔkparú Mva Mu Akúfa

10 ¹Yesu léblí ɔbéε, “Ɔnɔkwali nde mli bláa. Ɔhá ání ɔdú tsun akúfa ibansu wíé mútɔ, ɔmɔtsun ɔkpa ɔnó á, owikplu pú ogyo otswapú ogyi. ²Tsúfé iban ɔnó akúfa ɔkparú tɔtsun wie mútɔ. ³Iban ámvsu ɔkípu tefínkí mú há akúfa ɔkparú ámu tebíwíé. Ɔtɔpú akúfa amv dá tí amú, butonú mu ɔme, ɔtekpá amú dáli. ⁴Ní ɔkpá akúfa amv féé



Akúfa ɔkparú wankláán tɔpú akúfa amv dá tí amú, butonú mu ɔme, ɔtekpá amú dáli. (Yohane 10:3)

dáti a, otegya amú nkpa, butobuo mu, tsúfé buyin mu ɔme. ⁵Butamabuo ɔfɔ. Srí butesrí sí mu, tsúfé bumeyín mu ɔme.”

⁶Yesu léha amú yébi anfi, táme bumonu mú asu.

Akúfa Ɔkparú Wankláán Ámu

⁷Yesu létra bláa amú ɔbé, “Ɖnɔkwali nde mli bláa. Mígyí akúfa iban ámu ɔnɔ ní. ⁸Awikplu pú ogyo atswapú ahá ání begyankpá ba féé bugyi. Akúfa amu bumebi amú ɔme. ⁹Mígyí akúfa iban ámu ɔnɔ ní. Ní ɔku ɔtsun mitɔ wíé dáli a, tɔtɔ mɔɔbwe mú. Obéyénya atɔ gyí mwe. ¹⁰Owikplu agywun gyí, ɔbá bowi, ɔmɔ, oyinta atɔ. Mí mú neba, méni ahá bénya nkpa ání ulɔfon.

¹¹“Mígyí akúfa ɔkparú wankláán ámu ni. Akúfa ɔkparú wankláán totsúlá húli mu nkpa há mu akúfa. ¹²Táme akúfa ɔkparú ání ɔde ipa gyí, megyí mu onutó bú akúfa amu tesrí ní owun ɔkpataku ɔbá bekítá amú. Ɖkpataku ámu tekítá akúfa amutɔ ɔku, atráhe butedásáin. ¹³Oyin ámu tesrí, tsúfé ipa keke odegyí. Akúfa amu nkpa tamahían mu. ¹⁴Mígyí akúfa ɔkparú wankláán ámu ni. Nyin mí akúfa, mí akúfa é buyin mi, ¹⁵fé alá mí Sí ámu yin mi á, alí mí é nyin mu ni. Ntɔhúli mí nkpa há mí akúfa. ¹⁶Mbu akúfa bámbá aku é. Buma akúfa iban ánfutɔ. Ilehían ání nékpa amú é ba. Amú é bónu mí ɔme. Amú féé bɔbwe akúfa iku kule pú ɔkparú ɔkule.

¹⁷“Íni sú mí Sí tekle mi asún ní. Tsúfé natsúlá ání nɔhulú mí nkpa há ahá, méni nélanya mú. ¹⁸Ɖhaa méetalí swíí mí. Mí onutó latsúlá ání nɔhulú mú. Mbu ɔkpa húli mí nkpa, mbu ɔkpa lánýá mú é. Íni mí Sí lébláa mi ɔbéé mbwéé ní.”

¹⁹Mu asun blíhé anfi su Yudafo ahande amu bumetrá bwe kule. ²⁰Amútsó aku beblí bee, “*Ɖɔhe laláhe bu mutɔ. Mu nwun ideyintá. Ɖhaa mátrá nu mu asun blíhé.”

²¹Aku é bee, “Ɖhá ání ɔɔhe laláhe bu mutɔ méetalí blí asún ánfi odu. Ɖɔhe laláhe ɔbétalí bwíí ansibi obwiepú ansíbi?”

Yesu Kiná

²²Ɖkeá butɔpókáin Bulu ɔtswékpa gyvrásu Yerusalem lɔfon. Alí bré ámu igyi lultɔ. ²³Yesu lóyɔ odeki Bulu

otswékpatɔ ɔtɪnekúá butetí unu “Salomo Abrándaású.”
 24Yudafɔ ahande amu aku befia bomlí mu. Befuté mu beɛ,
 “Ɖmenke kén asa fébláa anɪ ɔɔkwali amu? Ní fúgyí Kristo,
 (ɔhá amúú Bulu ladá mu ofúli amu) a, wuna le mú tii anɪ.”

25Yesu lébláa amú ɔbéɛ, “Nébláa mli bɔtsun, táme
 mlumédéhogyi. Ofúla amúú ndebwe mí Sí dátɔ́ ámu dé mí iwɪ
 adánsɪɛ gyí. 26Táme mlumédéhogyi, tsúfé mli má mí akúfatɔ.
 27Mí akúfa butonú mí ɔmɛ. Nyin amú, butobuo mɪ. 28Ntehá
 amú nkpa ání itamatá. Bumóowu ekekeɛke. Ɖhaa méetalí swíí
 mí amú. 29Mí Sí amúú ɔɔpɔ amú há mí ámu dɔn tógyítɔ.
 Ɖhaa méetalí swíí amú lé mí Sí ibɔɔ. 30Mía mí Sí anigyí kule.”

31Unu á, Yudafɔ ahande amu betrá kulá abwi beɛ abutswɪ
 da Yesu mɔ. 32Táme Yesu léfité amú ɔbéɛ, “Nabwé ofúla
 tsɔtsɔɔtsɔ́ á itsú mí Sí wá súná mli. Mútɔ́ mɔmu sú mludékléá
 mléda mí abwi?”

33Bebláa mu beɛ, “Megyí ofúla ání fabwé kukɔɔku sú
 anɪaa abéda fú abwi. Alɪ amúú fablí abususu púkúsú líí
 Bulusu ámu sv. Nyankpusa fugyi, táme fɛɛ Bulu fúgyi.”

34Yesu léfité amú ɔbéɛ, “Bumɔwanlín wá mli Mbla
 ɔwulú ámutɔ beɛ, Bulu ɔbéɛ, ‘Mlgyí fé Bulu?’ 35Anɪyin ání
 ɔɔkwali Bulu asún igyi. Mú sv ní Bulu létɪ ahá amúú ɔɔpɔ
 mu asún há ámu ɔbéɛ, bugyi fé mu a, ntogyi sú mlidé ɔblɔ́
 nya? 36Mí mú á, mí Sí léle mí yáí, ngyi mu kle, ɔɔwa mí sísí
 ɔyí ánfɔɔ. Ntogyi sú mlidéblí mli aa nablí mbéɛ, ‘Bulu mu
 Bi ngyi’ sv nablí abususu púkúsú líí musu? 37Ní megyí mí
 Sí agyómá ndebwe mú á, mli máhɔ mi gyi. 38Táme ní mí Sí
 agyómá ndebwe, asa mli mɔ́hɔ mi gyi kúráá á, múmú mli hɔ
 ofúla amúú ndebwe ámu mú gyi, amlɪbí ání Mí Sí ámu bu
 mɔɔ, mí é mbu mɔɔ.”

39Betrá bwe ání békutá mu, táme ɔledali amú ibɪ, náti sí
 amú.

40Yesu léyinkí fá Yordan ɔbún ba ɔtíné amúú Yohane
 létsiá bó ahá asú ámu, olesi tsiá unu. 41Ahá tsɔtsɔɔtsɔ beba
 mu wá, bude aba bláa beɛ, “Yohane mɔ́bwe osúna kukɔɔku,
 táme asún ání Yohane léblí tsú oyin ánfɔ́ iwɪ féé laba mútɔ́
 pépéépé.” 42Ahá tsɔtsɔɔtsɔ bɔhɔ mu gyi unu.

Lasaro Lowu

11 ¹Oyin ɔkúvá bɔtɛtí mu Lasaro mua mu apio tshé ^{*}Maria pú Marta betsiá Betania wúluto. Oyin ámu lóló. ²Maria anfi létsei mu ofobí fánfáánfán wólí aní Wíe Yesu ayabisu, pú mu imi tsísi mú ni. Mu pio yínhé gyí Lasaro anfi ɔda ɔdebo á.^k ³Mú su mu apio tshé ánti bɔwa abí sísi Yesu bee, “Owíé, fú ɔdwepú débo.”

⁴Yesu lónu asún ámu a, ɔleblí ɔbéé, “Megyí ubo ánti ɔbómɔ mu, mboún ibéle Bulu numnyam ɔwan. lbówa mí Bulu mu Bi ánti é numnyam.”

⁵Yesu tekle Marta mua Maria pú Lasaro féé asún. ⁶Táme bréá olonu ání Lasaro débo á, ɔletrá si tsiá ɔtínéá ɔbu nkenyó kéké. ⁷Mú ɔma a, ɔlebláa mu akasípú ɔbéé, “Mliha ayinki yɔ Yudea.”

⁸Mu akasípú amu befité mu bee, “Osunápú, nwén nfi Yudafɔ ahande bakle abuda fú abwi mɔ. Mú fee fétrá yinkí yó unu?”

⁹Yesu lópu yébi lé mú ɔnɔ ɔbéé, “Megyí ɔnɔhwírí dúanyɔ bu ekewóletɔ? Ní ɔha ná ɔyi keheto á, ɔtamasúti, tsúfé nsainto lówankí, su odewúun. ¹⁰Táme ní ɔku ná oklúnto á, otosúti, tsúfé ɔmedé ató wúun.” ¹¹Asún ánti ɔma a, ɔletrá blí ɔbéé, “Ani nyáwíe Lasaro ladídi, táme nɔyó anyetsinkí mu.”

¹²Akasípú amu bebláa mu bee, “Ani Wíe, ní ɔdedídi mú á, iwí bówa mu ɔnlɔn!”

¹³Lasaro lowu iwí asún Yesu déblí, táme akasípú amu mú buki bee mu didí keke iwí asún ɔdeblí. ¹⁴Unu Yesu lówunáa kpa mú opulu ɔbéé, “Lasaro lawú. ¹⁵Mli su ulawá mí ansigyí ání mma unu asa olowu, méni mlshɔ mi gyi. Mliha ayekí mu.”

¹⁶Unu Toma ání ogyi Tabí^l lébláa mu aba ámu ɔbéé, “Mliha ania munyɔ féé ayɔ, méni ní lowu ígyi kóráá á, ania munyɔ awu!”

^k 11:2 Íni kén bu 12:1-8tɔ. ^l 11:16 *Didimus* múa *Toma* así gyí *Tabí* Griiki múa *Hebri* ɔblíto.

Dhá Ání Ɔtɔkúsúa Ahá Tsú Afúlitɔ, Há Amú Nkpa

17 Yesu lówie Betania wúluto á, bebláa mu bee bopulá Lasaro ulagyi nkená. 18 Tsú Betania ya Yerusalem mɔfɔn máulu anyɔ. 19 Mú su Yudafɔ tsɔtsɔɔtsɔ beba *Maria mva Marta gyɔwi ɔhakpá, amú píó lowu su.

20 Benya bláa Marta ání Yesu ɔbá alɪ, ɔɔkɔsú yéfia mu ɔkpa. Maria mú lésin wóyítɔ. 21 Múú Marta lébláa Yesu ɔbéé, “Mí Wíe, tɛki ní fɔbu nfi á, tɛki mí píó mówu sí mí. 22 Táme séi kúráá nyin ání tógyítɔá fókulí Bulu á, ɔbéha fú.”

23 Yesu lébláa mu ɔbéé, “Fú píó ámu ɔbélakúsú.”

24 Marta lébláa mu ɔbéé, “Nyin ání ɔɔkɔsú eke tráhe amúú afúli bókúsú ámu.”

25 Yesu lébláa mu ɔbéé, “Mígyí ɔhá ání ntɔkúsúa ahá tsú afúlitɔ, há amú nkpa. Ɔhá ání ɔɔhɔ mi gyi owú kúráá á, ɔbétrá tsiá nkpa. 26 Ɔhá ání otsie nkpa, ɔɔhɔ mi gyi é móowu ekekeeke. Faho músú gyi?”

27 Marta lótsulá músú ɔbéé, “Ee! Mí Wíe, nahogyi ání fúgyí Kristo, ɔhá ámúú Bulu ladá mu ofúli), Bulu mu Bi ámúú bee ɔbéba ɔyítɔ ámu ni.”

Yesu Lósú

28 Bréá Marta lébli alɪ tá á, oleyinkí ba wóyítɔ betu Maria ya utsétɔ, bláa mu ɔbéé, “Osunápú laba, ɔde fú ti.” 29 Maria lénya nú mú alɪ, ɔɔkɔsú yó Yesu wá. 30 (Alɪ bré ámutɔ á, Yesu mókúnyá wíe wúluto. Ɔlí ɔtíné ámúú Marta lóyɔtu mu amu.) 31 Bréá ahá ámúú butsie Maria wá wóyítɔ, bude mu klun yíá ámu bowun ání alakúsú ɔtsáwule pé ɔyó á, ɔkɔsú buo mu. Buki bee ɔyó opulákpá unu yósu.

32 Bréá Maria lówie Yesu wá á, ɔleda akpawunu, bláa Yesu ɔbéé, “Mí Wíe, ní fɔbu nfi á, tɛki mí píó mówu sí mí!”

33 Bréá Yesu lówun ání Maria mva ahá ámúú bubuo mu amu fée budesú a, ɪlehɪe han mu. Mú su mu ansí lepe. 34 Ɔlefíté amú ɔbéé, “Nkónó mlólópulá mu.”

Unu bebláa mu bee, “Anɪ Wíe, beki.”

35 Inu Yesu lósú. 36 Mú su Yudafo ámu beblí bee, “Kí alá òtéhíé dwé Lasaro!”

37 Táme amótó aku beblí bee, “Megyí oyin ánfí lóbwií ansibi obwiepú ámu ansíbi ni. Ntogyi sù òmetalí kítá Lasaro yáí, alawú?”

Lasaro Kusúa

38 Yesu ansí létrá pé, òlenatí yó opulákpá unu. Ibwi alato bopulá mu, bemináa ibwi tin mú ònó. 39 Inu òlebláa amú òbéé, “Mlumina ibwi ámu le òbó ámu ònó.”

Táme owupú ámu mu pio tsíhé Marta lébláa mu òbéé, “Mí Wíé, nde aná mú á, alayíntá. Nde eke náásí òpá bopulá mu.”

40 Yesu lébláa mu òbéé, “Mmebláa fu mbéé ní fohogyi a, fówun alá Bulu iwí bu ifú?” 41 Inu bemináa ibwi ámu lé òbó ámu ònó. Yesu lótsu ansí fúá kí òsúsú, blí òbéé, “Mí Sí, nedá fú ipán ání fanú mí òme. 42 Nyin ání futonú mí mpái ekekegyíeke. Táme ahá ánfí bulí nfi ánfí sù nablí alí, méni bóhogyi ání fúlówa mí.” 43 Bréá òlòbò mpái ánfí tá á, òlòkplón blí òbéé, “Lasaro, dali ba!” 44 Lasaro lédali a, tati klí mu ibi pú mu ayabi. Dúku é klí mu ansító. Yesu lébláa amú òbéé, “Mlísanki mu ònatí.”

Bekíklí Yesu Nwunsu

45 Yudafo amúú bobuo Maria ba unu ámu bowun tóá Yesu labwé. Mú su amú tsòtsòtsò òhò mu gyi. 46 Táme amótó aku òyò yébláa *Farisifo ámu tóá Yesu labwé. 47 Inunu Bulu *igyí ahapú dehen pú Farisifo ámu beti aba asún agyípu fia. Múú befuté aba bee, “Nkálí abóbwe? Lélé mú á, oyin ánfí dé osúna tsòtsòtsò bwe. 48 Ní anuméka mu itin á, òhagyíoha òbòhò mu gyi. Ibéha Romafò béba bobwie aní Bulu òswékpá amu, yíntá aní òmá!”

49 Táme amótó òkuleá butetí mu Kaiafa, ogyi Bulu igyí òhapú dehen ofí ámutò lébláa amú òbéé, “Mlí mú mluméyín òlala! 50 Mlumókúbí ání ibi alá òbakúle obówu ahá féé nwunsu, òun ání òmá ámutò ahá féé béhí?” 51 Megyí Kaiafa onutó agywun òlòpublí asún ánfí. Táme íníá ofí



Yesu lɔkplɔn blí ɔbée, “Lasaro, dali ba!” (Yohane 11:43)

ámɔɔ mɔgyí Bulu igyí ɔhapú dehen su á, igyi asún ání ɔleblí tswi ání ilehián ání Yesu obówu há Yudafɔ ɔmá.
⁵²Megyí bæe ɔmá ámu nkule pé su obówu, mboún alá

ɔbékpa Bulu ahá ání badásáín fée bɔwa abato, bóbwe ikule su.

⁵³Tsú eke ámu bɔwa agywun bwe ání bómɔ Yesu bi. ⁵⁴Ínu su Yesu métrá tsiá lé ɔwɔ Yudafɔtɔ. Mboún ɔlenatí yɔ wúlu kuá butetí mú Efraim, ání ibu dimbísú. Mva mu akasípú amu betsiá inu.

⁵⁵Bré ámɔtɔ á, Yudafɔ nkeá bópugyi Israelfɔsu *Katsun Nke ámu lawíé wóyí tá. Ahá tsɔtsɔɔtsɔ bɔtsu awúlusu dú yɔ Yerusalem ání bɔyɔgyuráa ɔwɔ asa nke ámu ifun. ⁵⁶Bréá bɔyɔ Bulu ɔtswékpa wunsínésú inu á, bodunká ání bówun Yesu. Mú su befité aba beɛ, “Nkálí mlidékú? Mlulahogyi mluaa, ɔbéba nke ánfɔtɔ lóó?” ⁵⁷Táme bré ámɔtɔ á, Bulu igyí ahapú dehen pú Farisifɔ ámu babláa ahá beɛ, ní ɔku owun ɔtínéá Yesu bu a, ɔhá amú ibu, méni beyékitá mu.

Ofobí Fánfáánfán Pwólí Yesu

(Mateo 26:6-13; Marko 14:3-9)

12 ¹Ilesi nkensíé abugyi Israelfɔsu Katsun Nke a, Yesu lóyɔ Lasaro amú ɔɔkɔsúba tsu afúlito ámu wúlutɔ Betania. ²Mú ntúpwesu bɔtswi ɔpúnú há mu. Marta léye atogyihe ɔpúnú ámu asi. Lasaro mva ahá amúú beti ámu bɔwa ibu gyi atɔ Yesu wá. ³Inu *Maria lópu ofobí fánfáánfán ání ibu ibiá prentua yílé ɔbɔ betsei wólí Yesu ayabisu, ɔɔpu mu nwunsu-imi tsítisi mú. Ofobí ámu ɔfan loho wóyí ámɔtɔ fée.^m ⁴Táme Yuda Iskariot, ogyi Yesu akasípú amɔtɔ ɔkule, ɔbéle Yesu há ámu mú léblí ɔbéɛ, ⁵“Ofobí ánfɔ bu bíá. Ntogyi sú bumefe mú, pú kɔba amu há ahiánfɔ? Mú bíá bóbwe ɔbakúle ofi ɔkule akatua.” ⁶Megyí ahiánfɔ nwewúun su Yuda dé asún ánfɔ blí. Owikplu ógyi su. Mu wá sika okentebi bu, otetsiá wí ku lé mútɔ.

⁷Yesu léblí ɔbéɛ, “Mlisi mu ɔpu ofobí ánfɔ wuli mí ha mí opuláké. ⁸Ahiánfɔ mú bétsiá mli wá ekekegyíeke, táme mí mú mméetsiá mli wá yɔ.”

^m 12:3 Oyi kuá butetí Naadi nlin butɔpúbwé ofobí ámu.

Bekiklú Lasaro Nwunso

⁹Yudafɔ tsɔtsɔɔtsɔ bonu ání Yesu laba Betania. Mú su begya ɔkpa yɔ mu ɔkíkpa. Megyí mu nkule su bɔyɔ mu. Beyéki Lasaro amú Yesu lɔkusúa tsu afúlito ámu é. ¹⁰Mú su Bulu *igyí ahapú dehen amu bɔbwe agywun bee bómu Lasaro é. ¹¹Tsúfé mu kusúa tsu afúlito su Yudafɔ tsɔtsɔɔtsɔ bude ɔma yinkí bɔho Yesu gyi.

Yoh

Bɔho Yesu Fé Owíe Yerusalem

(Mateo 21:1-11; Marko 11:1-11; Luka 19:28-40)

¹²Ɔyi kehe a, ɔɔm amú baba nke ogyíkpa amu bonu ání Yesu ɔbá Yerusalem. ¹³Mú su beka mbláa, bɔpu ɔkpa beyéfia mu. Bude okitikíti bee, “*Hosiána! Bulu oyúla ɔhá anfi ɔna aní Wíe Bulu dátɔ ɔbá anfi! Bulu oyúla Israel Owíe amu!”

¹⁴Yesu lénya afrímú ɔku, ɔɔɔɔ bian musu, fé alía bɔwanlín wá Bulu asúntɔ bee,

¹⁵“*Sionfo, mlu mánya ifú!

Mlu Wíe dín afrímú ibísú ɔbá á!”

¹⁶Yesu akasípú amu bɔmɔkɔsí nú asún anfi así. Táme bréa Bulu lɔkusúa Yesu tsú afúlito, wá mu numnyam ɔma a, bekaín aní bɔwanlín asún anfi tsú mu iwí. Mú bɔbwe há mu a.

¹⁷Aha aní bobuo Yesu bréa ɔletí Lasaro fúli-ɔbɔtɔ, kúsúa mu tsú afúlito bɔyɔ músú dá asún anfi ɔkan. ¹⁸Ínu su ɔɔm amu beyéfia mu ni. Bonu ání alabwé osúna anfi. ¹⁹Farisifo amu bebláa aba bee, “Mlulawun aní anilabwé kásíán. Mlúki, ahá fee bayɔ bubuo mu o!”

Griikifo Aku Bodunká Yesu

²⁰Griikifo aku bubu ahá amú beba Bulu osúmkrá Yerusalem Israelfɔsu Katsɔn Nke ámuɔ. ²¹Bɔyɔ Filipino aní otsu Betsaida aní ibu Galilea ɔmátɔ wá yébláa mu bee, “Owíe, anudékléa abówun Yesu.”

²²Filipo lébláa Andrea, mua munyɔ beyébláa Yesu. ²³Yesu lébláa amú ɔbé, “Bré lafun aní bówa Nyankpusa-Mu-Bi ámu



*Mú sv beka mbláa, bɔv ɔkpa beyéfia mv.
Bvde okitikíti bæe, “Hosiána” (Yohane 12:13)*

numnyam. ²⁴Ɖɔɔkwali nde mli bláa. Ní kpolibí mɔkúwíé ɔbótó, ikwe, pló á, kpoli ibi-kule amu kén igyi. Táme ní ikwe, pló á, utɔwé abí tsɔtsɔtsɔ. ²⁵Ní ɔku tɔdwé mu nkpa ɔyí ánfɔtɔ á, ɔbɔhulú mú. Ní ɔku é tamadwé mu nkpa á, obénya nkpa ání utamatá. ²⁶Ní mɔtɔ ɔku ɔbée mósum mí á, ilehián ání obóbuo mi, méni obétsiá ɔtínéá mbu. Ní ɔku dé mí sum á, mí Sí ɔbówa mu numnyam.”

Yesu Lowu Iwɪ Asún Blí

27 Yesu lóyɔ mósú ɔbéɛ, “Séi á, asún dé mí klɔn háan! Amansu néblí? Blí nteblí mbée, Mí Sí, le mí tsu asun wunhe anfitɔ lóó? Ó-o, mú su neba ni. 28 Mí Sí, wa fú iwɪ numnyam!”

Iɔ á, ɔme ɔku lótsu ɔsúsú ba ɔbéɛ, “Nawá mí iwɪ numnyam dodo. Nétrá wa mú.”

29 Bréá ɔɔm amúú bulú unv ámu bonu ɔme amu a, beblí beɛ “Ɔpráda lapútí.” Aku é beɛ, “*Bulu-ɔɔɔɔ lábláa mu asún!”

30 Iɔv Yesu lébláa amú ɔbéɛ, “Mli su ɔme anfi lalin, megyí mí. 31 Bréá Bulu obégyi ɔyítɔfɔ asún ní. Bréá Bulu ɔbékplí Ɔbunsám, ɔyísú ogyípú amu obiású ní. 32 Táme mí mú á, ní bedá mí mántá *oyikpalíhesu, tsú mú líí á, nékpa ahá féé ba mí iwɪ wá.” 33 (Yesu léblí asún ánfɪ púsúná lowu oduá mówu.)

34 Iɔv ɔɔm amu befíté mu beɛ, “Ani mú anlónu tsú anu Mbla ɔwulú ámutɔ ání Kristo, (ɔhá amúú Bulu ladá mu ofúli amu) obétsiá bré féé. Mú ntogyi su fúdeblí fée, ilehián ání bedá Nyankpusa-Mu-Bi ámu mántá oyísú, tsú mú líí? Ma gyí Nyankpusa-Mu-Bi ámu?”

35 Yesu lébláa amú ɔbéɛ, “Bré kpalobí ku pé ulasí ání Wankɪ amu ɔbétrá tsiá mli wá. Íniá Wankɪ amu trá ɔbu mli wá á, mlɪnatɪ wankɪ amutɔ, méni owí méeta wá mli. Tsufé ɔhá ání ɔna oklúntɔ tamabí ɔtunéá ɔyɔ. 36 Bré ánfɪ wankɪ amu trá ɔbu mli wá á, mlɪhɔ mu gyi, méni mlɔbwe wankɪ amu abí.”

Yudafɔ Yesu Máhogyi

Bréá Yesu lébláa amú asun anfi tá á, ɔlenatí yéɔain. 37 Íniá ɔɔbwe osúna tsɔtsɔtsɔ amú ansítɔ ó á, bumɔhɔ mu gyi. 38 Íni léha Bulu ɔnósú ɔtɔípú *Yesaia asún amúú ɔleblí tswɪ dodo amu léba mútɔ. Ɔbéɛ,

ⁿ 12:36 Yesu gyí Wankɪ amu.

“Ani Wíe, ma láhɔ asún ámúbú anléblí ámvsu gyi?
Ma ani Wíe lalé mu túmi súná?”

³⁹Mú su bumetálí hɔ Yesu gyi, tsúfé Yesaia létrá blí ɔbéɛ,

⁴⁰“Ani Wíe Bulu lahá bumedéwúun,
búmedé asún nu,

Mú su bumóowun ató,
bumóonu asún, méni bédamlí ba mí wá,
nétsa amú ɔlɔ.”

⁴¹Yesaia lówun Yesu numnyam. Mó su ɔleblí asún ánfɔ tsú mu ɔwɔ ní.

⁴²Mú ó á, Yudafo ahande amu tsɔtsɔɔtsɔ ɔhɔ mu gyi, táme bumele amú hógyi ɔwan. Tsúfé benya ifú ání Farisifo ámu bébi amú, gya amú lé amú *ofiákpa. ⁴³Tsúfé butekle beɛ ahá bukánfu amú dun ání Bulu ɔbékanfú amú.

Yesu Asún Bulu ɔbópugyi Ahá Asún

⁴⁴Yesu lókplɔn blí ɔbéɛ, “Megyí mí nkule ɔhagyíɔha ání ɔlɔhɔ mi gyi déhógyi. ɔhá ámúbú ɔlɔwa mí sísí ámu é. ⁴⁵ɔhagyíɔha ání ɔde mí wúun dé ɔhá ámúbú ɔlɔwa mí sísí ámu é wúun. ⁴⁶Naba ɔyí ánfɔtɔ fé wankɔ, fékɔ ɔsulúv anfisɔ iwankɔ, méni ɔhagyíɔha ání ɔlɔhɔ mi gyi méesin oklúntɔ. ⁴⁷Ní ɔku onú mí asún, táme omegyí músú á, megyí mí ɔbéha mu ipón. Tsúfé mmeba asún ogyíkpá. Ahá nkpa ɔhókpa neba. ⁴⁸ɔha ání okíná mí, ɔmɔhɔ mí asún é bu asún ání ɔbópuhá mu ipón. Mí asun blíhé amu ɔbéha mu ipón eke tráhe amu. ⁴⁹Tsúfé megyí mí onutó túmi nɔpɔtɔí. Mí Sí lówa mí sísí. Muléha mí asún ání mblí, pú alíá mblí mú. ⁵⁰Nyin ání mu asún ámu ɔtehá nkpa ání ɔtamatá. Mó su asún ání ɔɔwá mí blí kóún nteblí.”

Akasípú Amu Ayabiasɔ Fwɔ

13 ¹Asa béfi Israelfɔsu Katsun Nke ámu gyí asɔ á, Yesu lébi ání mu bré lafɔn ání médalɔ ɔyí ánfɔtɔ yó mu Sɔ wá. ɔlɔdwe ahá ámúbú bugyi mu kle ɔsulúsv nfi ámu alu yófɔn mu owuké.

²Mva mu akasípú amu befia ntópwe ató ogyíkpá. Alɔ bré ámɔtɔ á, ɔbunsám lawúna wie Simon Iskariot mu bi Yuda

klvnto ání oyéle Yesu ha. ³Yesu yin ání mu Si lópu tógyító wá mu ibuto. Oyin ání Bulu wá motsu ba, mu wá méyinkí yó ní. ⁴Mú su ọlele ibi ọlepe ámutọ, ọlọkvsú wóí mu atadię tswi, tsú ọsan sába. ⁵Ọletseí ntsu wá onuwetọ, olefi asi ọde mu akasípú amu ayabiasí fwi. Ọfwí ọmáýín a, alapú mu osiétọ ọsan ámu tsítsi mu ayabiasí. ⁶Bréá ulọtu Simon Petro a, ọlefuté Yesu ọbée, “Mí Wíé, fú ọbófwi mí ayabiasí?”

⁷Yesu léle mú ọnọ ọbée, “Fumóonu tó ánfí ndẹbwe ánfí asi séi. Ọma asa fọbonu mú asi.”

⁸Mú Petro lébláa mu ọbée, “Ó-o! Mméesi, afufwi mí ayabiasí ekekẹkẹ.”

Yesu lébláa mu ọbée, “Ní mmọfwi fú ayabiasí á, fuménya ogyíkpa mí wá.”

⁹Simon Petro lébláa mu ọbée, “Mí Wíé, megyí mí ayabi nkọle. Wuna fwi mí ibi pú mí nwuntọ é.”

¹⁰Yesu lébláa mu ọbée, “Ọhá ání alabie ntsu métrá hián ntsubíe. Mboún mu ayabiasí fwi pé, tsúfé alalun dodo. Mli wwi lalun, táme megyí mli féé.” ¹¹(Yesu lébláa mu alí, tsúfé oyin ọhá ání ọbéele mu há. Mú su ọleblí ọbée, “Megyí mli féé lalun” ni.)

¹²Bréá ọlọfwi amó ayabiasí tá á, ọlelatsú mu atadię wá, yínkí yétsiá ọpúnú ámu asi. Mú ọlefuté amó ọbée, “Mlilanú utó ánfí nabwé há mli ánfí asi? ¹³Mlitetí mí ‘Osunápú,’ mlitetí mí ‘Owíé.’ Mú ọkpa ní, tsúfé mú ngyi ní. ¹⁴Ní mí ání ngyi mli osunápú pú mli Wíé, nafwí mli ayabiasí á, múmú ilehián ání mli é mlófwi mli aba ayabiasí. ¹⁵Nabwé súná mli, ménu mlóbwe mú alí ámú nabwé mú há mli ámu. ¹⁶Ọnọkwali nde mli bláa. Osúmpú ọkuku módvun mu wie. Alí kén sumbí ọyọpú módvun ọhá ání ọlọwa mu ni. ¹⁷Íniá mli labí ọnọkwali anfi á, Bulu obóyulá mli ní mlegyi músú.

¹⁸“Megyí mli féé wwi asún ndeblí. Tsúfé nyin ahá ání nalé. Táme lehián ání Bulu asún ánfí ibéba mútọ. Asún ámu ọbée, ‘Ọhá ámú mía munyo anidé ibi wa ọlepeto ámu lakúsú líí mísú.’ ¹⁹Nde mli bláa séi asa iba, ménu ní ibá á, mlóhọ mu gyi ání mígyí ọhá ámú mbée ngyi ámu ni. ²⁰Ọnọkwali nde mli bláa. Ọhagyícha ání ọlọhọ ọhá ání ọlọwa sumbí laho mu.

Alí kén ɔhagyíɔha ání ɔlɔɔ mu laɔ mí Sí ámu ɔlɔwa mí sísí ámu é ní.”

Yesu Le Há

(Mateo 26:20-25; Marko 14:17-21; Luka 22:21-23)

²¹Bréá Yesu léblí asún ání tá á, asún ihíé de mu háan mu kluntɔ. Mú su olowunáa kpa mú tati ɔbéé, “Ɖɔɔkwali nde mli bláa, mliɔ ɔkule ɔbéle mí há.”

²²Akasípú amu bekpelé kí aba ansító, tsúfé bumeyín amútó ɔmá ɔde. ²³Akasípú amuɔ ɔkuleá otsie mantáa Yesu, gyí ɔmá Yesu tehié dwé ní. ²⁴Mú su Simon Petro lóɔbun mu ansíbi ɔbéé, ɔfíte mu ɔhá ání ɔbéle mu há.

²⁵Mú ɔkasípú amu léyinkí kpísá Yesusu, fíté mu ɔbéé, “Mí Wíé, ma ɔbéle fú há?”

²⁶Yesu lébláa mu ɔbéé, “Ɖhá ámuú nébia bodobodo, púdá oputsútó há ámu gyí mu ní.” Inu olebia bodobodo púdá oputsútó há Yuda, ogyi Simon Iskariot mu bi. ²⁷Olenya hɔ mú alí, Ɖbunsám lówie mutɔ. Mú su Yesu lébláa mu ɔbéé, “Bwe tóá fudekléá fóbwe sasa!” ²⁸Ahá ámuú butsie ɔpúnú ámu asi ámuɔ ɔkuku mébi tóá suá Yesu lébláa mu asún ání. ²⁹Amútó aku buki beé, Yuda gyí amú sikasu ɔkípu. Fíali Yesu dé mu bláa ɔbéé, ɔyíɔhɔ atóá bóɔɔgyi nke ámu, ntéé ɔpúɔ tɔku ya ahiánfo.

³⁰Yuda lénya hɔ bodobodo amu alí, ɔledali. Owí latá alí bré ámu.

Mbla Pɔɔpwe

³¹Yuda lénya dáli obuto inu alí Yesu léblí ɔbéé, “Bréá Mí, Nyankpusa-Mu-Bi ání numnyam bélin ɔwan ní. Bulu ɔbótɔn misu lé mu numnyam ɔwan. ³²Ní ɔtsun misu lé mu numnyam ɔwan á, alí kén ɔbótɔn mu iwísu lé mí numnyam ɔwan ní. Ɖbówa mí numnyam inuɔ. ³³Mí abí, mméetrá tsiá mli wá, wá ɔpá. Mlódunká mí. Alí ámuú nebláa Yudafo ahande amu mbée, ‘Mluméetalí ba ɔtínéá nɔyó ámu’ a, alí kén nde mli bláa mli é ní. ³⁴Mbla pɔɔpwe ndewa há mli mbée, mliɔwe aba. Alí ámuú nɔɔdwe mli ámu a, alí kén mliɔpú

ɔdwe ámu dwe mli aba ní. ³⁵Ní mlidé aba dwe á, ibósuná ahá fée ání mí akasípú mligyí.”

Petro Ɖbóswí Ɖbé Mmeyín Yesu

(Mateo 26:31-35; Marko 14:27-31; Luka 22:31-34)

³⁶Simon Petro léfité Yesu ɔbé, “Mí Wíé, nkónu foyó?”

Yesu léle mú ɔnó ɔbé, “Ɖtíné ámú ɔyó ámu a, fuméetalí buo mi yó unu séi. Táme ɔma a, fóbobuo mi.”

³⁷Petro léfité mu ɔbé, “Mí Wíé, ntogyi sú mméetalí buo fu séi. Nówu fú su!”

³⁸Yesu léfité mu ɔbé, “Fówu mí su? Ɖnɔkwali nde fú bláa. Fóswí pú ibi wá ogyá tse sa fee fumeyín mí asa bate ɔbéle ɔnó.”

Ɖsí Ámu Wá Ɖkpa

14 ¹Yesu lébláa mu akasípú amu ɔbé, “Opúni mátsíí mli. Mliho Bulu gyi, amlího mi gyi. ²Otsiákpá tsɔtsɔtsɔ bu mí Sí wóyító. Ní otsiákpá ma unu á, teki mmebláa mli mbée neyéla unu yái mli. ³Ní ɔyó yéla otsiákpá amu yái mli tá á, néyinkí bá bekpa mli yáa mí unu wá, méni mlétsiá ɔtínéá mbu. ⁴Mliyin ɔkpa ání ida yo ɔtíné ámú ɔyó.”

⁵Unu Toma léfité mu ɔbé, “Mí Wíé, anumeyín ɔtínéá foyó, nkáli abóbwe abébi ɔkpa ámu?”

⁶Yesu léle mú ɔnó ɔbé, “Mígyí ɔkpa ámu, ɔnɔkwali amu pú nkpa ámu. Ɖhaa méetalí yó mí Sí ámu wá, nkéti alatsun musu. ⁷Ní mliyin mi lélé á, teki mlilabí mí Sí ámu é. Táme séi mú mlilawun mu, mlilabí mu é.”

⁸Filipo lébláa mu ɔbé, “Ani Wíé, suna anu fú Sí ámu. Mú kpán tsɔ anu.”

⁹Yesu léfité mu ɔbé, “Filipo! Mbu mli wá dodoodo. Mú su fumɔkóbí mí? Ɖhagyícha ání alawun mi ki lawun mí Sí ámu. Ntogyi sú fúdeblí fee, nsúna mli Ɖsí ámu? ¹⁰Fumohogyi ání mbu mí Sí ámutɔ, mu é ɔbu mutɔ? Asún ánti nde mli bláa ánti motsú mí onutó wá. Mboún mí Sí ámú ɔbu mutɔ ámu dé mu agyómá yo. ¹¹Ní nde mli bláa mbée, mbu mí Sí ámutɔ, mu é ɔbu mutɔ á, mliho mi gyi. Ní mlumócho asún

ámusu gyi óó á, ofúla amúú ndebwe ámu su mliho mi gyi. ¹²Ɔnɔkwali nde mli bláa. Ɔhagyícha ání ɔlɔho mi gyi a, ɔbɔbwe utá ndebwe. Ɔbɔbwe mú dun mí klé, tsúfé mí mú nɔyó mí Sí ámu wá. ¹³Nɔbwe tógyítá mlókúli mí idátó há mli, méni nɔwa mí Sí ámu numnyam. ¹⁴Ní mlókúli tógyító mí idátó á, nɔbwe mú.

Ɔɛe Wankíhé Amu lbá

¹⁵“Ní mliɔdwé mí á, mlégyi mí mblasu. ¹⁶Nókúli mí Sí, ɔbɔpu Ɔma Ɔlúpú bambá sísí mli, ɔbéba betsiá mli wá bré féé. ¹⁷Muɔgyí Ɔɛe Wankíhé. Mutósúná ɔnɔkwali ání tɔbu Bulutɔ. Ɔyító ahá buméetalí ho mu, tsúfé bumédé mu dunká. Buméebi mu é, táme mli mú mlyin mu, tsúfé ɔbu mli wá, obétsiá mliɔ.

¹⁸“Mméesi mli tswi fé awumbi. Néyinkí bá mli wá. ¹⁹Ulasí kpalobí ɔyító ahá bumétrá wun mi, táme mli mú mlówun mi. Ínɔ́á mbu nkpa su á, mli é mlétsiá nkpa. ²⁰Ní eke ámu ifun a, mlébi ání mbu mí Sí ámutɔ. Mli é mliɔbu mliɔ fé alí ámúú mí é mbu mliɔ ámu.

²¹“Ahá ání bude mí mblasu gyí a, amúgyí mí adwepú ní. Ɔhagyícha ání ɔɔdwé mí á, mí Sí ɔbɔdwe mu. Mí é nɔdwe mu, lé mí tɔwɔ ɔwan súná mu.”

²²Múú Yuda (megyí Yuda Iskariot) léfuté mu ɔbéé, “Mí Wíe, ntogyi sù aní nkule pé féle tɔwɔ ɔwan súná, megyí ɔyító ahá féé?”

²³Yesu léle mú ɔnɔ ɔbéé, “Ní ɔku dé mí dwe á, ɔbɔbwe dínká mí atosunáhésu. Mí Sí ɔbɔdwe mu. Mía mí Sí ámu nyo abéba betsiá mu wá. ²⁴Ɔhá ání ɔtamadwé mí ɔmɔɔbwe dínká mí atosunáhésu. Asún ánfɔ ndéblí mli dénu ánfɔ motsú mí onutó wá. Mí Sí lɔwa mí, mu wá itsú.

²⁵“Nde mli asún ánfɔ bláa, séi ánfɔ mbu mli wá. ²⁶Táme Ɔma Ɔlúpú, ogyi *Ɔɛe Wankíhé amúú mí Sí ɔbɔpusísí mí idátó ámu obósuná mli tógyító. Ɔbékaín mli asúngyíasún ání nebláa mli.

²⁷“Iwilwii nde mli ha! Napú mí iwilwii há mli. Megyí mú ámúú ɔyítóɔ butehá ámu odu. Mli máha opúni itsii mli.

Ifú é mákutá mli. ²⁸Nabláa mli bɔtsun mbée, ndenatí, táme néyinkí bá mli wá. Ní mliɔdwé mí á, teki mlénya ansigyí ání nɔyɔ mí Sí wá, tsúfé ɔdun mi. ²⁹Nde mli ínu fée bláa yaí, ménu ní íbá mútɔ á, mlóhogyi. ³⁰Mméetrá tɔí yɔ nkpa, tsúfé ɔyísú ogyípú ámu ɔbá. ɔma túmi mísú. ³¹Ntonú mí Sí ɔme, ménu ɔyítɔfɔ bébi ání ntɔdwé mu.

“Mlikusu anati.”

Wáun Oyí Onutó

15 ¹Yesu léblí ɔbée, “Mígyí *wáun ifla onutó. Mí Sí gyí mú ɔdɔpu. ²Bámbigyíbámbiá ibu mí iwí, itamaswíé á, ɔtekpálí mú tsítsá. Táme kugyíkúá itoswíé á, ɔtelá mú wankláán, ménu íbóswie tsɔtsɔtsɔ dun. ³Mí atosunáhé anfi mɔlanú anfi su mli *iwí latin dodo. ⁴Mlitsia mítɔ, mí é antsia mliɔ. Bámbi kukukú méetalí swíé abí, nkéti utsa mú oyísú brégyíbré. Alí kén mli é mɔméesalí swíé abí, nkéti mɔbu mitɔ ní.

⁵“Mígyí wáun ifla ámu. Mlgyí mú abámbi. ɔhá ání ɔbu mitɔ, mí é mɔbu mitɔ obóswie abí tsɔtsɔtsɔ, tsúfé mɔméesalí bwé tɔtɔtɔ tsun mí ɔma. ⁶ɔhagyíɔha ání ometsie mitɔ gyí



Wáun ifla móa mú abi nu. (Yohane 15:5)

fé bámbiá bakpálí mú bun, íbówulí, békpa mú wá ogyá. ⁷Ní mltsie mutɔ, mí asún é íbu mlɔ á, mléfute mí Sí tógyítáá mlhdéklé, ɔbéha mli. ⁸Ní mloswíé abí tsɔtsɔtsɔ á, íbówa mí Sí numnyam. Mú obósuná ání mí akasípú mlgýí ní. ⁹Alí ámúb mí Sí tɔdwé mí ámu a, alí kén mí é ntɔdwé mli ní. Mltsia mítɔ, méní nódwe mli yó. ¹⁰Ní mlegyi mí mblasu á, nódwe mli yó, fé alí ámúb mí é ntegyi mí Sí mblasu, ɔtɔdwé mí yó ámu.

¹¹“Nabláa mli asún ánfí fée, méní ansigyí ámúb íbu mlɔ ámu bétsiá mlɔ. Fówun ansí bégyi mli wankláán. ¹²Mbla ání ndepuhá mli gyí; mlidwe aba fé alíá ntɔdwé mli. ¹³Ɖwe kuku mɔdún ání ɔku obówu mu nyawie nwunsu. ¹⁴Ní mlegyi mí mblasu á, mí anyawíé mlgýí. ¹⁵Mméétrá tí mli mí asúmpú. Tsúfé osúmpú méyín tóá mu wie débwe. Nde mlɔ mí anyawíé, tsúfé nabláa mli tógyítáá nonu tsú mí Sí wá. ¹⁶Megyí mli léle mí. Mílélé mli yáí mbée, mliyɔ amltyoswie abíá íbétsiá bré fée, méní mí Sí ɔbéha mli tógyítáá mlɔkulí mu mí idátɔ. ¹⁷Mbla ání ndewa há mli gyí, ‘Mludwe aba.’

Ahá Bólu Mli

¹⁸“Ní ɔyítɔ ahá bude mli lu á, mlikaun ání mí begyankpá lú. ¹⁹Ní ɔyítɔ ahá mlgýí a, teki ɔyítɔ ahá bódwe mli fé amú abí. Táme nalé mli tsú ɔyítɔfɔtɔ, su mlumá amútɔ. Íni su ɔyítɔfɔ butolú mli ní. ²⁰Mlikaun asún ámúb nebláa mli mbée, ‘Osúmpú ɔkuku mɔdun mu wie’ amusu. Ní ahá budun mísú a, mli é bédinká mli su. Ní begyi mí asúnsú á, mli é bégyi mli asúnsú. ²¹Táme míbú mli, su bópu íni fée gyi mli, tsúfé bumeyín ɔhá ámúb ɔlɔwa mí ámu. ²²Ní mmɔkúbláa amú asvansu á, teki buma ipón kuku gyí. Táme séi ánfí mú buma ɔnɔ lé. ²³Ɖhagyíɔha ání otolú mí tolú mí Sí é. ²⁴Nabɔbwe agyómá ání ɔhaa mɔkúbwé mú odu kí amútɔ. Ní bumɔpu amú ansíbi wun mú á, teki Bulu mééha amú ipón. Bowun tóá ɔbwe asa bude mía mí Sí lu. ²⁵Ilehián ání íbéba alí, méní asún ámúb ɔwanlín wá amú Mblatɔ beé, ‘Bolu mí kpaali’ ámu íbéba mútɔ.

²⁶“Nówa Ɖma Ɖlípú obótsu mí Sí wá bá. Mvgýí *Ɖhe Wankíhé amu. Mutósúná ɔnɔkwali ání íbu Bulutɔ. Obégyi mí

ɿwɿ adánsɿɛ. ²⁷Mli é mlégyi mí ɿwɿ adánsɿɛ, tsúfé mlulatsiá mí wá tsú bréá nefi ató suná asɿ.

16 ¹“Nabláa mli asún anfi fée, méni mluméedɿda hógyɿɿ. ²Yudafɿ ahande bégya mli lé amú ofiakpa. Bré ku kúráá ɿbéba ání ahá bómo mli, súsɿ beɛ Bulu agyómá budɛyɿ. ³Bópu ɿni gyi mli, tsúfé bumɿkúbí mí ntée mí Sí ámu. ⁴Táme nabláa mli asún ánti, méni ní ɿbá á, mlékaɿn ání nebláa mli yái.

Yoh

Ɖɿe Wankíhé Gyumagyihɛ

“Mmɿkɿsɿ bláa mli asún ánti, tsúfé mbɿ mli wá. ⁵Táme séi nde mli bláa, tsúfé nɿyɿ ɿhá ámuɿ ɿɿɿwa mí sísí ámu wá. Táme mlɿɿ ɿkuku méfité mí ɿbéɛ, ‘Nkúnú fɿyɿ.’ ⁶ɿniá nabláa mli asún ánti su á, awɿrehɿ lahíé kítá mli. ⁷Táme nde mli ɿɿkwalɿ bláa. Ɖkláa lawá mli ogyá ání nɿyɿ. Tsúfé ní mmɿyɿ á, Ɖma Ɖlípú amɿ ɿméeba mli wá. Táme ní nɿyɿ á, nɿpu mu sísí mli. ⁸Ní ɿbá á, ɿbéle súná ɿyítɿ ahá ání lakpanbwe su bafwí, ɿbéle tóá igyi Bulu yilébwe pú mu asúngyí é súná amú. ⁹Bébi ání mísú máhógyi igyi lakpan. ¹⁰Bébi tóá igyi Bulu yilébwe, tsúfé nɿyɿ mí Sí wá, mluméetrá wun mɿ ekekeke. ¹¹Bébi tóá igyi Bulu asúngyí, tsúfé Bulu lahá ɿbunsám, ogyi ɿyísú ogyípú amɿ ɿpón dodo.

¹²“Mbɿ asún tsɿtsɿɿtsɿ ání nébláa mli, táme mluméetalí nú mú fée asɿ séi. ¹³Ɖɿe Wankíhé amɿ tósúná ɿɿkwalɿ ání ɿbɿ Bulutɿ. Ní ɿbá á, ɿbéle asún ání igyi ɿɿkwalɿ fée súná mli. Tsúfé megyí mu onutó túmitɿ ɿbótɿ, mbóun ɿbéblí asún kugyíkúá olonu. Ɖbébláa mli múá ɿbéba é. ¹⁴Ɖɿé ámu ɿbówa mí numnyam, tsúfé ɿbébláa mli asún ání nteblí. ¹⁵Tógyítóá mí Sí búv a, mí bú. Mú su nabláa mli mbée, Ɖɿé ámu ɿbébláa mli asún ání nteblí ní.

Akasípú Amɿ Awɿrehɿ Pú Ansigyí

¹⁶“Ulasí kpalobí mluméetrá wun mɿ, táme ɿmɿɿɿwa ɿpá kuku mlélawun mɿ.”

¹⁷Akasípú amutɿ akɿ befité aba beɛ, “Ngya ntɿ asún ní? Ɖbéɛ, Ulasí kpalobí, anuméetrá wun mu, táme ɿmɿɿɿwa ɿpá

kuku, abélawun mu. Ɔdeblí é ɔbéé, ‘Nɔyó mí Sí wá?’ 18‘Ulasí kpalobí’ ánfí así mé? Anumédé asún ánfí ɔdeblí ánfí así nu.”

19Yesu lébɪ ání akasípó amu budekklé abufite mu asún ámuɔ. Mú su ɔlebláa amú ɔbéé, “Blí ndeblí mbée, ulasí kpalobí mlumétrá wun mi. Táme imóɔwa ɔpa kuku mlélawun mi. Ínu mlidé aba fité ní? 20Ɔnɔkwali nde mli bláa. Mlósu kpisí, táme ɔyító ahá mú bénya ansigyí. Mlégyi awurehɔ, táme mli awurehɔgyí amu ibéba bemlí ansigyí. 21Ní ukwí de ɔtsi dwiín á, ahumiti tekítá mu, tsúfé mu iwɔsun wúunbɪ lafun. Táme onyákwíí tá pé ɔtetan mu iwɔsun ámuɔ, tsúfé ansí de mu gyí ání makwíí obí wá ɔyító. 22Alí kén igyi há mli ní. Ahumiti de mli séi, táme nélawun mli. Mú su mléhɛ nyá ansigyí ání ɔhaa méetalí ká mli itin.

23“Alí eke ámu a, mlumétrá kulí mí ɔɔɔɔ. Ɔnɔkwali nde mli bláa. Tógyítóá mlókulí mí Sí mí idátó a, ɔbéha mli. 24Bɔtu nde mlumókúfíté ɔɔɔɔ mí idátó. Mlufite, ɔbéha mli, méni ibéhɛ wá mli ansigyí.

Yesu Ɔyísú Gyí

25“Nde mli asún ánfí bláa ayébisu, táme bré ku béba, mmétrá ɔí ayébisu. Nówuná kpa mí Sí asún tati súná mli. 26Tsú bré ámuɔ púya a, mlókulí mí Sí ámu ató mí idátó. Mmedéblí mbée, mí ɔbókulí mu ató há mli. 27Tsúfé mí Sí ámu onutó ɔɔwé mli. Ɔɔɔwé mli, tsúfé mlitɔɔwé mí, mlulahogyi ání notsú mu wá. 28Mí Sí wá notsu ba ɔyító. Séi á, ndeyinkí tsú ɔyító nɔyó mí Sí ámu wá.”

29Inu akasípó amu bebláa mu beɛ, “Ehéen! Séi mú á, futráa fumédéɔí ayébisu. 30Séi mú anlabí ání fuyin tógyító. Mú su mehián ání ɔhaa ɔbétrá fité fú asvansu. Ínu lahá anulahogyi ání lélé fotsú Bulu wá.”

31Yesu léfité amú ɔbéé, “Séi mú mlulahogyi? 32Bré ku íbá. Ulafun ta, mlédasáín. Mlito okugyíɔku ɔbóyɔ mu otsukpá sí mí. Táme iméesi mí nkule, tsúfé mí Sí ámu bu mí wá. 33Nabláa mli asún ánfí féé, méni mlótsun misu nyá iwilwii. Mlówun iwɔsun ɔyí ánfíɔ, táme mliwa klun, tsúfé nagyi ɔyísú dodo!”

Yesu Lóbo Mpái Mu Akasípó Nwunsu

17 ¹Yesu léblí asún ánfí tá, olotsu ansí fúá kí osúsú bó mpái òbée, “Óo mí Sí, bré lafvn. Wa mí numnyam, méni mí é nówa fú numnyam. ²Tsúfé feha mí túmi ahá féesú, ání nháa ahá ání feha mí fée nkpa ání itamatá. ³Nkpa ání itamatá ámu gyí, bubí fú Bulu Dnɔkwaliɔ ɔkukúnú ɔkule pé ánfí, abubu mí Yesu Kristo anfi fɔpusísi ɔyító ánfí. ⁴Nawá fú numnyam ɔsolúv anfisv, tsúfé namó agyómá ámu fɔpohá mí ámu fée ɔnó. ⁵Mí Sí! Wa mí numnyam fú ansító ngya, fé alí ámu mbu mú fú wá yái asa fɔbwe ɔyí ámu.

Yoh

⁶“Nalé fú súná ahá ámu fele ɔyító há mí ámu. Fúbú amú, fɔpv amú há mí, bagyi fú asúnú. ⁷Séi babí ání tógyítá mbu itsú fú wá. ⁸Tsúfé nabláa amú asún ání fɔpohá mí fée, banú. Babí ání lélé fú wá notsú, bahogyi ání fúlówa mí.

⁹“Nde fú kokóli ha amú. Megyí ɔyító ahá fée nde mpái bo há. Mboún ahá ámu fɔpohá mí ámu, tsúfé fúbú amú. ¹⁰Mí klé igyi fú klé, fú klé é igyi mí klé. Fatsun amúsú lé mí numnyam ɔwan. ¹¹Nebá fú wá séi. Mmétrá tsiá ɔyító, táme amú mú bubu ɔyító. Mí Sí Wankíhé, pv fú idá ámu fɔpohá mí ámu túmi kí amúsú, méni ɔbwe kule fé alí ámu mía funyo angyí kule amv. ¹²Bréá mbu amú wá á, nekutá amú wankláán, idá ámu fɔpohá mí ámu túmitɔ. Nele ansí kítá amú wankláán. Mmeha amútó ɔkuku mɔfwí, dun ɔmvamú idá yái ání ɔbéhu ámu, féki Bulu asun wanlínhé amv íbéba mútó. ¹³Nebá fú wá séi. Táme bré ánfí ntráa mbu ɔyító nfi nde asún ánfí blí, méni bénya ansigyí fé alí ámu mí é mbu ansigyító amv. ¹⁴Nabláa amú asún ámu febláa mi ámu. Mú sv ɔyító ahá bude amú lu, tsúfé butráa bumegyí ɔyító, fé alí ámu mí é mmegyí ɔyítóyín amv. ¹⁵Mmedéblí mbée, fulée amú le ɔyító. Mboún mbée fukú amúsú wankláán, méni bumóowie lalaha ɔbwepó amú íbítɔ. ¹⁶Alí ámu mmegyí ɔyítóyín ngyi ámu a, alí amú é bumegyí ɔyító ní. ¹⁷Fú asún ámu gyí ɔnɔkwali. Tsun músú afɔpv amú bwe fú klé. ¹⁸Alí ámu fowa mí sísi ɔyító amú a, alí

◦ 17:15 Ɖbunsám gyí lalaha ɔbwepó.

mí é nawá amú sísí ní. ¹⁹Amú su nɔpu iwɪ há fú, méni amú é bótson ɔɔkwali amusu mlí fú klé.

²⁰“Megyí mí akasípú amu nkule nde mpáí bɔ há. Mboún ahá ání bótson amú atosunáhésu ho mi gyi fée ndeɔ há. ²¹Nde mpáí bɔ mbée, amú fée bubwée kule. Mí Sí, ali ámú fubu mitɔ, mí é mbu futɔ ámu a, ha amú é abutsia antɔ ali kén, fówun ɔyítɔ ahá bóhogyi ání fúlówa mí sísí ɔyítɔ. ²²Nawá ahá ání numnyam amú fowa mí ámu, méni bóbwe kule fé aliá ntsu tamatsun miá funyɔ nsuné. ²³Mbu amú fú fé aliá fubu mitɔ, méni bóbwe kule, ntsu mɔɔtsun amú nsuné. Ní íbá ali á, ɔyítɔ ahá bébi ání fúlówa mí, futɔdwé amú fé ali ámú futɔdwé mí ámu.

²⁴“Mí Sí! Ndeklé mbée ahá ámú fɔpuhá mí ámu bétsiá mí wá ɔtíne ámú mbu amu. Fówun bówun numnyam amú fowa mí ámu. Tsúfé futɔdwé mí asa fɔbwe ɔyí. ²⁵Mí Sí Yilé ɔbweɔpú! ɔyítɔfɔ bumebi fú, táme mí mu nyin fu. Ahá ání é buyin ání fúlówa mí sísí ɔyítɔ. ²⁶Nele fú súná amú. Nétrá le fú súná amú. Fówun ɔdwe ámú futɔdwé mí ámu itsia amú fú, méni mí é nétsiá amú fú.”

Yesu Kitá

(Mateo 26:47-56; Marko 14:43-50; Luka 22:47-53)

18 ¹Yesu lóɔ mpáí ání tá á, mua mu akasípú amu benatí yótson Kidron tsonkolitɔ wíé ndobíi kutɔ. ²Yuda amú ɔlele Yesu há ámu é yin ndobíi amutɔ, tsúfé Yesu mua mu akasípú butetsiá yéfia unu. ³Mú su Yuda lékpa Romafɔ ísá akɔpú pú Bulu ɔtswékpa agyópu akvá Bulu *igyí ahapú dehen pú Farisifɔ bɔwa, bɔyɔ unu. Bude mbia, nkandíe pú akɔtɔ. ⁴Íniá Yesu yin tɔá íbá musu su á, ɔledali fia amú, fíté amú ɔbé, “Ma mlidédunká?”

⁵Bele mú ɔnɔ bée, “Yesu Nasaretyin amu.”

Yesu lébláa amú ɔbé, “Mí ní.”

(Yuda amú ɔde mu le há ámu é líí amú wá unu.) ⁶Bréá Yesu lébláa amú ɔbé, “Mí ní!” á, besankí yéduda lalá kpla.

⁷Yesu lélafíté amú ɔbé, “Mbée, ma mlidédunká?”

Bebláa mu bée, “Yesu Nasaretyin amu.”

⁸Yesu lébláa amú ɔ́bée, “Nakú bláa mli mbée, mí ní. Mú su ní mí mlidédunká mú á, mliha ahá ánfí abunati.” ⁹(Ɖlebláa amú ali, méni asún ámúú ɔ́leblí ámu íbéba mútú. Ɖbée, “Ahá ámúú ɔ́pohá mí ámuto ɔ́kuku mófwí.”)

¹⁰ɪnu á, Simon Petro dé ɔ́dayí iya anyɔ, ɔ́lebití mú lé, kpá Bulu igyí ɔ́hapú dehen osúmpú gyɔɔɔ iɔu. Osúmpú amu ɔ́dá gyí Malkus. ¹¹Yesu lébláa Petro ɔ́bée, “Sankia fú ɔ́dayí wa mú ɔ́fletó! Imehián ání nówun iwɔɔsun ání mí Sí lahá mí ɔ́bée nwúun lóó?”

Yesu Kpa Ya Hana

(Mateo 26:57-58; Marko 14:53-54; Luka 22:54)

¹²ɪnu ɔ́sá akɔ́pú ámu, amú ɔ́hande pú Bulu ɔ́tswékpá agyópu amu bekítá Yesu, klí mu íbɔ. ¹³Begyankpá kpá mu ya Kaiafa mu sia Hana. Kaiafa gyí Bulu igyí ɔ́hapú dehen ofí ámuto ní. ¹⁴Mulébláa Yudafo ahande amu ɔ́bée, íbu aláá ɔ́bakúle obówu ahá féé nwunsv ní.

Petro Lékiná Yesu

(Mateo 26:69-70; Marko 14:66-68; Luka 22:55-57)

¹⁵Simon Petro mva ɔ́kasípú bambá bobuo Yesu. Bulu igyí ɔ́hapú dehen amu yin ɔ́kasípú bámbá ánfí wankláán. Mú su olobuo Yesu bitíwíé Bulu igyí ɔ́hapú dehen amu wóyítú. ¹⁶Táme Petro mú lési ɔ́lú wóyí ámu ɔ́nó. Ɖkasípú bámbá ánfí óyin Bulu igyí ɔ́hapú dehen anfi lédalɔ yébláa otsibi ɔ́kúá ɔ́de wóyí ámu ɔ́nó gyo, ɔ́lekpa Petro ba wóyí ámuto. ¹⁷Otsibi amu léfité Petro ɔ́bée, “Megyí oyin ámu akasípú ámuto ɔ́ku fúgyi?”

Petro léle mú ɔ́nó ɔ́bée, “Èkekεεεε. Mma amútú.”

¹⁸Atsalɔ bu ɔ́nu. Mú su asúmpú pú agyópu amu bɔɔvɔdá ogyá, bulí mú asi. Petro é léyelí amú wá, ɔ́de ogyá ámu núu.

Bulu Igyí Ɖhapú Dehen Léfité Yesu Asún

(Mateo 26:59-66; Marko 14:55-64; Luka 22:66-71)

¹⁹Bulu igyí ɔ́hapú dehen amu léfité Yesu asún, tsú mu akasípú pú mú atosunáhé iwɔ. ²⁰Yesu léle mú ɔ́nó ɔ́bée, “Ahá

ansító nelí blí mí asún fée. Netsiá súná ató Yudafó *ofiakpa pú *Bulu ɔtswékpa, ɔtínéá ahá fée butefia. Mmèblí asvansu ñaintó. ²¹Ntogyi só fúde mí asún ánfí futé. Fite ahá ání bonu asún ání neblí. Amú yín asún ání neblí.”

²²Bréá Yesu léblí asún ánfí á, unu agyópu amuto ɔkuleá ɔlú mantáa mu léda mu usuto, fíté mu ɔbéé, “Alí féle Bulu igyí ɔhapú dehen asún ɔnó ní?”

²³Yesu lébláa mu ɔbéé, “Ní nablí asvokpan á, le mú blí ɔhagyíɔha onu. Táme ní ɔnɔkwali nablí á, ntogyi su fúde mí da?”

²⁴Yesu trá ɔda ɔfétó ɔhande Hana lópu mu sísí Bulu igyí ɔhapú dehen Kaiifa.

Petro Létrá Kiná Yesu

(Mateo 26:71-75; Marko 14:69-72; Luka 22:58-62)

²⁵Simon Petro trá ɔlú ogyá ámu asi, ɔku léfíté mu ɔbéé, “Megyí oyin ánfí akasípú amuto ɔkule fugyi?”

Petro lóswú ɔbéé, “Èkekèkè. Mma amótó!”

²⁶Bulu igyí ɔhapú dehen amu osúmpú ɔku, ogyi ɔhá ámú Petro lékpa mu usv kule amu mu pio léfíté Petro ɔbéé, “Megyí fúa munyo nowun ndobii amuto ní?”

²⁷Petro létrá swí pú ibi wá ogyá. Inunu bate lóbon.


Yesu Kpa Ya Pilato

(Mateo 27:1-2, 11-14; Marko 15:1-5; Luka 23:1-5)

²⁸Ɔyi kehe bake-bake a, bekpa Yesu tsú Kaiifa wóyító ya Roma ɔhande ání ɔde Yudea ɔmású gyí wóyító. Yudafó ahande amu bumedékléá bópu ifin da iwí. Mú su bumbétiwíé wóyító unu. Tsúfé budekléá béki ání amú *iwí letun, méni bétalí gyi Israelfosv Katsun Nke ámu.^p ²⁹Mú alí su Pilato lédalí ba kpankpá befíté amú ɔbéé, “Amansu mlibu blí tsú oyin ánfí iwí?”

³⁰Bébláa mu beé, “Ní ɔhá ánfí mókúbwé lakpan á, tekú anumékpa mu ba fu.”

^p 18:28 Ní fowíé ɔhá ání omegyí Yudayin wóyító a, ifin lada fu.



Yoh

Yesu kpa ya Pilato ni. (Yohane 18:28)

31 Pilato lébláa amú ɔ́bée, “Múmú mlíkpa mu ya, amlyegyí mu asún mli mbla ɔ́nó.”

Yudafo ahande amu bele mú ɔ́nó bee, “Animá ɔ́kpa mɔ́ ɔ́ha.” 32 (Asún ánfí léba mútɔ́, méni asún ámúú Yesu léblí tsú mu lowu ání obówu twí ámu íbéba mútɔ́.)

33 Inu Pilato léyinkí wíé wóyítɔ́. Múú ɔ́letí Yesu, fíté mu ɔ́bée, “Fúgyí Yudafo owíé amu ni?”

34 Yesu léle mú ɔ́nó ɔ́bée, “Fú onutó asun fitéhé igyí, ntée aku lábláa fu mí twí asún?”

35 Pilato léle mú ɔ́nó ɔ́bée, “Yudayin ngyi? Fú onutó ahá pú Bulu igyí ahapú dehen lékpa fú ba mi. Ntɔ́ fabwé?”

36 Yesu lébláa mu ɔ́bée, “Megyí ɔ́yí ánfítɔ́ nde iwíé gyí. Ní ɔ́yí ánfítɔ́ á, teki mí abúopu bóko ho mi. Buméeha bumóɔpu mí wá Yudafo ahande íbúɔ́, táme megyí ɔ́yí ánfítɔ́ nde iwíé gyí!”

³⁷Pilato léfuté mu ɔbéé, “Múmú yéé owíe fugyi á?”

Yesu lélé mú ɔnɔ ɔbéé, “Ɖnɔkwali fablí fée Owíe ngyi. Mí á, bɔkwí mí neba ɔyí ánfuto ání mbá ambegyí ɔnɔkwali amu iwí adánsíe. Ɖhagyícha ání ogyi Ɖnɔkwali amu klé teyaa asu nú mí ɔme.”

³⁸Pilato léfuté mu ɔbéé, “Nto gyí ɔnɔkwali amu?”

Pilato Léha Ɖkpa Ɖbéé Búmɔ́ Yesu

(Mateo 27:15-31; Marko 15:6-20; Luka 23:13-25)

Pilato léblí asún ánfu tá á, ɔletrá dali ɔɔ Yudafɔ ámu wá wóyí ɔnɔ unu. Ɖlebláa amú ɔbéé, “Mmɔkúwun lalahe kukubukvá nɔpuhá oyin ánfu ipón. ³⁹Táme mli amándíé ɔnɔ á, ntesí obu ɔdipú ɔkule há mli Katsun Nke kugyíkuto. Mludéklé mliaa, nsíi Yudafɔ Owíe anfu ha mli?”

⁴⁰Bɔkplón le mú ɔnɔ beé, “Èkekeke! Megyí mu. Si Baraba ha aní.” (Ogyo otswapú Baraba é gyí).

19 ¹Unu Pilato léha bekpá Yesu ya, yéputí mu ató wankláán. ²Isá akɔpú ámu bɔlu obungyo-awu, bwé mú owíepa bun mu nwun, bɔwa mu ligá pepe ku. ³Unu benatí bwé mu ahinlá beé, “Yudafɔ Owíe, fú nkpasu ɔnlunsu!” Fówun badá mu tsuto kpa.

⁴Pilato létrá dali ɔɔ wóyí ɔnɔ unu yébláa amú ɔbéé, “Nakpá mu neba mli, amlíwun ání mmɔkúwun lalahe kuku mu iwí.” ⁵Bréá Yesu lédali ba a, obungyo-awu ipa ámu bun mu nwun, ɔɔwa ligá pepe amu. Pilato lébláa amú ɔbéé, “Mu ni!”

⁶Bulu igyí ahapú dehen pú Bulu ɔtswékpa agyópu amu benya wun mu pé, bɔsurá okitikítí blí beé, “Da mu manta oyikpalíhesu! Da mu manta oyikpalíhesu!”

Pilato lébláa amú ɔbéé, “Mli onutó mlíkpa mu ya, amlíyeda mu manta oyikpalíhesu. Mí mú mmɔkúwun lalahe kuku mu iwíá nɔpuhá mu ipón.”

⁷Yudafɔ ámu bebláa mu beé, “Ani mbla ɔnɔ á, ilehián ání obówu. Tsúfé ɔleblí ɔbéé, Bulu mu Bi mugyi.”

⁸Bréá Pilato lónu asún ánfu á, ifú létrá kutá mu tsíá mútɔ. ⁹Oleyinkí yó mu wóyítɔ yéfité Yesu ɔbéé, “Nkúnú fotsú?”

Táme Yesu mékpla mu. ¹⁰Mú su Pilato léfuté mu ɔ́bée, “Fuméekplá mí? Fumeyín ání mbu túmiá nétalí sí fú ntée nétalí há beda fú mántá oyikpalíhesu mós fú?”

¹¹Yesu léle mú ɔ́nɔ́ ɔ́bée, “Ní megyí Bulu léha fú ɔ́kpa á, teki fuma túmi kuku mísú. Ínu su ɔ́há ámúú ɔ́ɔ́pu mí wá fú ɔ́bɛɛ ámu lakpan dɔ́n fú klé.”

¹²Pilato lónu asún ánfɛ á, olekle osi Yesu. Táme Yudafo ámu bɔ́sɔ́rá okitikíti kúklúkúú blí bɛɛ, “Ní fesi ɔ́há ánfɛ á, múmú megyí Roma owíe dehen^q mu nyawie fugyi. Tsúfé ɔ́hagyíɔ́ha ání ɔ́blí ɔ́bée owíe mugyi á, alakúsú líí Roma owíe dehensu!”

¹³Bréá Pilato lónu asún ánfɛ á, ɔ́lekpa Yesu dáli ba krankpá, tsíá mu asúngyi obíá ání itsie ɔ́tɛnekvá bɔ́pu abwi bwé unu, butetí unu “Abwito” su. (Butetí unu “Gabata” *Hebri ɔ́blítɔ́.) ¹⁴Eke ámu igyi *ogyá ɔ́dudáké há Israelfɔ́su Katsun Nke. ɔ́bɔ́we fé ɔ́pa dóduanyɔ́tɔ́ á, Pilato lébláa Yudafo ámu ɔ́bée, “Mli Owíe amu ni!”

¹⁵Bɔ́sɔ́rá okitikíti bɛɛ, “Kpa mu ya, kpa mu ya, afuyɛda mu manta oyikpalíhesu.”

Pilato léfuté amú ɔ́bée, “Ndáa mli owíe manta oyikpalíhesu?”

Bulu igyi ahapú dehen amu bebláa mu bɛɛ, “Anumá owíe ɔ́kuku dɔ́n Roma owíe dehen!”

¹⁶Ínu Pilato lési Yesu há amú ɔ́bée buyéda mu manta oyikpalíhesu.

Yesu Da Mántá Oyikpalíhesu

(Mateo 27:32-44; Marko 15:21-32; Luka 23:26-43)

Ísá akɔ́pú ámu bɛkpa Yesu náti. ¹⁷Mu onutó olotsu mu oyikpalíhe dínká mu nkanta alu yéwie ɔ́tɛnekvá butetí unu “Nwun Okokobi Otsiákpá.” (Butetí unu “Golgota” Hebri ɔ́blítɔ́.) ¹⁸Beda Yesu mántá oyikpalíhesu unu, beda ayin abanyó aku é mántá nyikpalíhesu mu wá unu. ɔ́kule bu Yesu binasu, ɔ́kule é bu mu gyɔ́pɛsu, Yesu bu amú nsúné. ¹⁹Pilato

^q 19:12 Roma Owíe dehen gyí Kaesare.

lówanlín asún mántá oyikpalíhe amu awunso. Asún ámu gyí, “YESU NASARETYIN, YUDAFƆ OWÍE.” ²⁰Yudafɔ tsɔtsɔtsɔ bekla asun wanlínhé anfi. Tsúfé ɔtíné á múú beda Yesu mántá oyikpalíhesu ámu ibu mantáa Yerusalem. Ɖleha bɔwanlín asún ámu *Hebri ɔblí, Roma ɔblí pú Griiki ɔblítɔ. ²¹Bulu igyí ahapú dehen amu bebláa Pilato bee, “Máwanlín fee, ‘Yudafɔ Owíe.’ Mboún wanlun fee, ‘Oyin á nfi ɔbée, mígyí Yudafɔ Owíe.’”

²²Pilato lébláa amú ɔbée, “Múá nawánlín á, nawánlín mú dodo.”

²³Isá akɔpú ámu beda Yesu mántá oyikpalíhe amusu tá á, botsu mu atadie, beye mútɔ aku ana. Okugyíɔku klé kule. Botsu mu ligá ání bɔlu mú tsú ɔsúsú beyi asi. ²⁴lnu bebláa aba bee, “Mlumáha abali atadie á nfi mútɔ. Mlha atswi abi kɪ bee, ma obénya mú.” Asún á nfi léba, méni Bulu asún á múú bɔwanlín tswi bee,

“Beye mí atadietɔ,

bɔtswi abi mí ligású” amu íbéba mútɔ.

Isá akɔpú ámu bɔbwe dínká músú.

²⁵Yesu mu yin, mu yin mu pio tsíhé *Maria, ogyi Klopa mu ka pú Magdalayintse Maria bulí oyikpalíhe amu asi. ²⁶Bréá Yesu lówun mu yin pú mu ɔkasípú á múú ɔtehié dwé ámu, bulí mantáa unu á, ɔlebláa mu yin ɔbée, “Amó yín, fú bí ní.”

²⁷Múú ɔlebláa ɔkasípú amu é ɔbée, “Fú yín ní.” Tsú eke ámu a, ɔkasípú amu lékpa mu ya mu wóyítɔ.

Yesu Lowu

(Mateo 27:45-56; Marko 15:33-41; Luka 23:44-49)

²⁸Ínu ɔma a, Yesu lówun ání mu agyómá lamɔ ɔnɔ. Múú ɔleblí ɔbée, “Ɖmewúl de mí.” Ínu leha Bulu asún á múú bɔwanlín tswi amu íleba mútɔ.

²⁹Onuwé ku tsie unu, ntá ɔdái ibɔ mú. Isá akɔpú ámu bɔpu ɔsɔpɔ dá ntá ámutɔ púsíán oyísú, tsú mú fúá yétin mu ɔnɔ. ³⁰Yesu lékpkpɔ mú mé. lnu ɔleblí ɔbée, “Ulatá!”

Múú oloko nwuntɔ wá, ɔlele ɔɣé á.

Yesu Abuntɔ Atɔ Wɔ

31 Eke ámu igyi Fieda. Mú ɔyi kehe igyi ɔkpónú ɔdaké kponkponu há Yudafɔ. Mú su bumekle ání ahá ámu busían nyikpalíhe amusu yɔfun owi tahé.^r Mú su bɔkulí Pilato ɔkpa beɛ ɔháa mu usá akɔpú abuyebiabía amú ayabi, méni bɔkɔsí wú, fówun béle amú tsu nyikpalíhe amusu asa owí ɔta. 32 Mú su bɔyɔ yébiabía ayin abanyó ámu ayabi. 33 Táme bréá bowie Yesu wá á, bowun ání alawú dodo. Mú su bumebia mu ayabi. 34 Táme usá akɔpú ámutɔ ɔkule lópu mu pía wɔ Yesu abuntɔ, ntsu múa obugya lefen dali. 35 (ɔhá ámú olowun mú ámu légyi mú iwí adánsiɛ, fówun mli é mlóhogyi. Megyí afunu igyi. Oyin ání ɔnɔkwali asún mudéblí.) 36 Íni fée léba mútɔ, méni Bulu asún ámú bɔwanlín tswi beɛ, “Buméebia mu iwú kukukuku” ámu íbéba mútɔ. 37 Bulu asun wanlínhé amu kén leblí ɔbéɛ, “Béki ɔhá ámú bɔwɔ mu abuntɔ pía ámu.”

Yoh

Yesu Pulá

(Mateo 27:57-61; Marko 15:42-47; Luka 23:50-56)

38 Íni fée ɔma a, Arimateayin *Yosef léba bokokóli Pilato ɔbéɛ, ɔpú Yesu fúli amu ha mu. (*Yosef anfi buo Yesu ɔáintɔ, tsúfé ɔde Yudafɔ ahande amu ifú nya.) Pilato léha mu ɔkpa. Mú su Yosef léyɛɛ Yesu fúli amu oyópulá. 39 Nikodemo amú ɔleba Yesu wá eke ɔku onyé ámu é léba. ɔɔpu afá fánfáanfán aku anyɔ^s ání bɔkwe mú wá abato tsɔtsɔtsɔ ba. Mú odwin bɔbwe kílo advasa (30). 40 Ayin anfi bɔpú ɔhráda kíklí afá ámu mántá fúli amu iwí fé alíá Yudafɔ butɔbwé amú afúli asa butopúlá amú. 41 Ndobíi ku íbu mantáa ɔtíné ámú beda Yesu mántá oyikpalíhesu ámu. Bolotí butátɔ bwé mú fúli-ɔbɔ unu. Bumɔkúpulá ɔhaa mútɔ kí. 42 Íniá eke ámu igyi *ogyá ɔdudáké, fúli ɔbɔ ámu é íbu mantáa unu su á, bopulá Yesu mútɔ.

^r 19:31 Yudafɔ ɔkpónú ɔdaké tefi asu tsú owi tahé. ^s 19:39 Afá aku anyɔ ámu adá gyí *mire* múa *aloe*.

Yesu Kusú Tsú Afúlitó

(Mateo 28:1-8; Marko 16:1-8; Luka 24:1-12)

20 ¹Ndawótswító eke gyankpapu, igyi Kwasiéda bake-bake, bréá nsauntó mókútítí a, Magdalayintse Maria lóyo Yesu opulákpá unu. Olenya wíe unu alí olowun ání bamína íbwi ámu lé ɔ́bó ámu ɔ́nó. ²Mú su oleyinkí srí ba ɔ́kasípú ámúbú Yesu tēhíé dwé mu amu mva Simon Petro wá, bebláa amú ɔ́béé, “Balé Yesu ɔ́bó ámutó. Animéyín ɔ́tínéá bapú mu yówa!”

³Múbú Petro mva munyɔ́ bɔ́pu ɔ́kpa bɔ́yó opulákpá unu. ⁴Amú abanyó ámu fēé betsií ɔ́srí, táme ɔ́lesrí sí Petro gyankpá yówie opulákpá unu. ⁵Bréá olobun kí ntsán ámutó á, olowun ání ɔ́hráda ámu kpán dá, táme omebitíwíé mótó. ⁶Simon Petro lóbotu mu, ɔ́lotsun bitíwíé ntsán ámutó, olowun ɔ́hráda amu da. ⁷Olowun ɔ́hráda ámúbú bɔ́putó mu nwun ámu é, ilokuntá ida ífúntó. ⁸ɔ́kasípú amúbú olegyankpá wíe unu ámu é lébitíwíé mótó, wun ɔ́hráda ámu pú mú ámúbú bɔ́putó mu nwun ámu alí olohogyi. ⁹Bré ámutó á, Bulu asun wanlínhé amúbú ɔ́leblí ɔ́béé, ilehián ání Yesu ɔ́bókusú tsú afúlitó ámu mókónyá wánkí amú. ¹⁰Beyinkí yó wóyí.

Yesu lwaɔwanle Súná Magdalayintse Maria

(Mateo 28:9-10; Marko 16:9-11)

¹¹Táme Maria lési ɔ́lí opulákpá unu odesú. Bréá odesú a, olobun kí ɔ́bó ámutó. ¹²Unu olowun *Bulu-abɔ́pu abanyó ání bɔ́wa atadié futútúútú, butsie ɔ́tíné ámúbú bɔ́pu Yesu fúli tswi amu. ɔ́kule tsie mu adianwun, ɔ́kule tsie ayabiasí. ¹³Befité mu beé, “Amú yín, nkálí igyi sù fudesú?”

ɔ́lele mú ɔ́nó ɔ́béé, “Balé mí Wíe nátí. Mmeyín ɔ́tínéá bapú mu yótswi!”

¹⁴ɔ́leblí tá á, ɔ́ledamlí kí ɔ́ma. ɔ́kí a, Yesu líí mu ɔ́ma, táme ɔ́mebiá Yesu ní. ¹⁵Yesu léfuté mu ɔ́béé, “Amú yín, nkálí ígyi sù fudesú? Ma fudedunká?”

Mu mú ɔ́kí ání ndobíí amutó agyómá ɔ́yɔ́pú ní. Mú su ɔ́lebláa Yesu ɔ́béé, “Aní sí, ní fúlatsú mu yótswi ɔ́tineku á, suna mí, anyetsu mu natí.”

16 Yesu lókpólí mu ɔ́bée, “Maria.”

Ɖledamlí ki, kpólí Yesu *Hebri ɔ́blíto ɔ́bée, “Rabuni!” (Mú asu gyí, “Osunápú.”)

17 Yesu lébláa mu ɔ́bée, “Mápu ibi da mi, tsúfé mmɔ́kúnyá yó ɔ́súsú mí Sí wá. Mboún nati yebláa mí apíó ámu fee, nɔ́yó mí Sí ání ogyi mli Sí wá. Nɔ́yó mí Bulu ání ogyi mli Bulu wá.”

18 Magdalayintse Maria léyebláa akasípú amu ɔ́bée, “Nawun aní Wíe!” Ɖlebláa amú asún ání Yesu lébláa mu.

Yesu lwiɔ́wanle Súná Mu Akasípú

(Mateo 28:16-20; Marko 16:14-18; Luka 24:36-49)

19 Kwasieda ámu ntópwesu á, akasípú amu befia. Befin obu wá iwi, tsúfé bɔ́de Yudafɔ́ ahande amu ifú nya. Inu á, Yesu lébelú amú nsiné, ɔ́lebláa amú ɔ́bée, “lwi ilwíi mli.” 20 Ɖlebláa amú alí tá á, ɔ́ɔ́pu mu ibito pú mu abunto súná amú. Ansí légyi amú, tsúfé bawun amú Wíe. 21 Yesu létrá bláa amú ɔ́bée, “lwi ilwíi mli. Alí ámúbú mí Sí lawá mí ámu a, alí nde mli wa ní.” 22 Inu ɔ́ɔ́ɔ́ɔ́n ɔ́ɔ́é fú wólí amúsú, bláa amú ɔ́bée, “Mliho Ɖɔ́ɔ́e Wankíhé amu. 23 Ní mlesí ahá lakpan kíe amú á, Bulu lasíkíe amú. Táme ní mli méésikíe amú á, Bulu méésikíe amú.”

Yesu lwiɔ́wanle Súná Toma

24 Bréa Yesu léba a, amótɔ́ ɔ́kuleá butetí mu Toma, butelátí mu Tabí má inu. 25 Mú su akasípú atráhe amu bebláa mu bee, “Anilawun aní Wíe!”

Táme Toma lébláa amú ɔ́bée, “Ní mmɔ́kúwun mu ibito ndatobi nɔ́ ámu, kpíe osrebi wá mótɔ́, kpíe ibi wá mu abunto ɔ́ɔ́ ámutɔ́ á, mmóohogyi ekekeke.”

26 Nkekwe ɔ́ma a, akasípú amu betrá fia obu ámutɔ́. Alí eke ámu mú á, Toma bú amótɔ́. Befin obu ámu, táme Yesu lébelú amú nsiné, bláa amú ɔ́bée, “lwi ilwíi mli.” 27 Múbú ɔ́lebláa Toma ɔ́bée, “Ki mí ibito, kpíe osrebi wa nfi. Kpie fú ibi wa mí abunto. Si nwéen gyí, afuhogyi!”

28 Toma léle mú ɔ́nɔ́ ɔ́bée, “Mí Wíe pú mí Bulu!”

²⁹Yesu lébláa mu ɔbéɛ, “Ani á múbú fawun mi á mu su fahogyi lóó? Ansi bégyi ahá á múbú bumɔpu amú ansíbi wun, asa bohogyi amu!”

Tsá Svá Bɔwanlín ɔwulú Ánfi

³⁰Yesu létrá bwe osúna tsɔtsɔtsɔ mu akasípú amu ansítú ání bumɔwanlín wá ɔwulú ánfítɔ. ³¹Táme bawánlín íni, méní mlóhogyi ání Yesu gyí Bulu mu Bi Kristo amu. Asón ánfísu hógýi ɔbéha mlénya nkpa ání itamatá mu idátó ní.

Yesu lwiɔwanle Súná Akasípú Abasiénó

21 ¹Íni ɔma a, Yesu létrá le lwi ɔwan súná mu akasípú Tiberia ɔpu^t ɔnó tsun ɔkpa ánfísu. ²Simon Petro mua Toma ání butelátí mu Tabí, Nataniel, otsú Kana wúluá íbu Galilea ɔmátó, Sebedeo abí á mu pú akasípú abanyó é befia. ³Simon Petro lékla amú ɔbéɛ, “Nɔyó ɔpusu yéle aye.”

Bebláa mu beɛ, “Ani é abóbúo fu yó.” Íni su boyówie ɔkluntó náti. Táme betsiá ntsusu onyé á mu féé, bumenya tɔtɔ. ⁴Bréá ɔyí íbá beke a, bowun ɔku líí ɔpu amu ɔnó. Bumebi ání Yesu ni. ⁵Mú Yesu léfíté amú ɔbéɛ, “Mí anyawíe, mlíménya tɔtɔ?”

Bele mú ɔnó beɛ, “Ee!”

⁶Yesu lébláa amú ɔbéɛ, “Mlitswi asawu amu wa gyɔpísu fún, mléle aye.” Mú su bɔtswi wa unu. Aye lobulá asawu amu, bumetalí bíti mú lé.

⁷Mú ɔkasípú amú Yesu tɛhíé dwé á mu lébláa Petro ɔbéɛ, “Ani Wíe Yesu ni!” Bréá Petro lónu ání ani Wíe Yesu ni á, olotsu mu atadie mla lwi. (Tsúfé ɔlowóí mu atadie tswi), olotu wíe ntsu ámutɔ gyuaa, ɔdeputí ɔyó Yesu wá. ⁸Táme akasípú atráhe amú búbu ɔkluntó á mu bebitía asawu amú aklemetí búbu mú á mu ba otsubúnɔ, tsúfé buma ífó ɔpu ɔnó unu. Mú ífótó bóbwe fé ayabi lafasa (300). ⁹Bréá bowie ɔpu ɔnó á, bowun ání bawá agyawunu ogyá, buɔe iye tɔ músú, bodobodo é da mú asi. ¹⁰Mú Yesu lébláa amú ɔbéɛ, “Mlile aklemetí á mú mlílalé á mu ku ba.”

^t21:1 Butetráa ti mú Galilea ɔpu.



Yoh

*Bebítá asawu amú aklemetí bubo mó ámu
ba otsubúnɔ. (Yohane 21:8)*

11 Mú su Simon Petro léyinkí dú wíé ɔklɔn amɔɔ, ɔleyébútía asawu amú aklemetí akpɔnkpɔnti bubo mó ámu bɔtswɔ ɔpɔ ɔnɔ. Aklemetí ámu bugyi lafakule aduenu-sa (153). Íniá butso ó á, asawu amu metítí. 12 Yesu létí amú ɔbéé, “Mlibegyí ató.” Amúɔ ɔkɔku métalí wá klɔn fíté mu ɔbéé, “Ma fugyi?” Tsúfí bebi ání amú Wíé ni. 13 Yesu lótsu bodobodo amu há amú, olotsu aye amu é há amú.

14 Bulu lókusúa Yesu tsú afúlitɔ ɔma a, íni gyí otse saasi ání ɔlele wɔ ɔwan súná mu akasípú amu ni.

Yesu Mua Petro

15 Bréá begyi nyanki atogyihe amu tá á, Yesu léfíté Simon Petro ɔbéé, “Yohane mu bi Simon, futɔdwé mí dɔn fú aba ánfɔ lóó?”

Petro léle mú ɔnɔ ɔbéé, “Ee, mí Wíé, fuyin ání ntɔdwé fú.”

Yesu lébláa mu ɔbéé, “Kɔ mí akúfabi amusu.” 16 ɔletrá fíté Petro otse nyɔɔsi ɔbéé, “Yohane mu bi Simon, futɔdwé mí?”

Petro léle mú ɔnɔ ɔbéé, “Ee, mí Wíé, fuyin ání ntɔdwé fú.”

Yesu lébláa mu ɔ́bée, “Kpa mí akúfa amu.” ¹⁷Yesu léfité mu otse saasi ɔ́bée, “Yohane mu bi Simon, futɔ́dwé mí lélé?”

Ulehan Petro, tsúfé otse saasi Yesu lafité mu ɔ́bée, “Futɔ́dwé mí?” á. Mú su ɔ́lele mú ɔ́nɔ́ ɔ́bée, “Mí Wíé, fú onutó fuyin tógyítɔ́. Yéé fuyin ání ntehié dwé fú!”

Yesu lébláa mu ɔ́bée, “Kí mí akúfa amusu. ¹⁸Ɔ́nɔ́kwali nde mli bláa. Bréá fúgyi ɔ́yasubi á, fú onutó futetáli tsú fú atadie híhie iwi, kúsú yó ɔ́tínegyíɔ́tíneá fudeklé. Táme ní fɔ́bwé oyin dehen a, fétinkí ibi, há ɔ́ku ɔ́bédidá fú atɔ́, kpá fú ya ɔ́tíneá fumedékle.” ¹⁹(Yesu lébli asún ání, púsúná ɔ́kpa ání Petro ɔ́bɔ́tsun músú wú pówá Bulu numnyam.) Iwu ɔ́lebláa Petro ɔ́bée, “Buo mi!”

Yesu Mva Ɔ́kasípúá Ɔ́tehié Dwé

²⁰Petro lédamli kí a, Yesu ɔ́kasípú amú ɔ́tehié dwé ámu buo amú. (Múgyí ɔ́há amú ɔ́leyinkí kpísá Yesusu ntúpwe atɔ́ ogyíkpá, fíté mu ɔ́bée, “Owíé, ma ɔ́béle fú há?” ámu ni.)

²¹Bréá Petro lówun mu a, ɔ́lefíté Yesu ɔ́bée, “Mí Wíé, ntu ɔ́béba oyin ání é́sú?”

²²Yesu léle mú ɔ́nɔ́ ɔ́bée, “Ní ndeklé mbée otsía nkpa yófun bréá néyinkí ba a, fú asún igyi? Fú mú buo mi wule!”

²³Asún ání ulekleí wá Yesu abúopu amuto, ání alɔ́ ɔ́kasípú amu mú móowu. Táme Yesu mébli ɔ́bée, omóowu. Blí ɔ́lebli ɔ́bée, “Ní ndeklé mbée, otsía nkpa yófun bréá néyinkí ba a, fú asún igyi?”

²⁴Múgyí ɔ́kasípúá olowun íni féé, ɔ́lowanlín mú tswi ni. Anyin ání mu asun blíhé anfi igyi ɔ́nɔ́kwali.

Ɔ́nɔ́mɔ

²⁵Atɔ́ tsɔ́tsɔ́tsɔ́ utráa bu unvá Yesu ló́bwe tsía íntɔ́. Ní ɔ́wanlín mú féé wá nwlú́tɔ́ ukule-kule a, tekí buménya nwlú́ ámu ɔ́yaíkpá ɔ́sulúv anfisv. Natɔ́í tá.

Sumbí Ayɔpú Ámu Gyumagyihe

1 ¹Mí wíé Tiofilo,
Mí Luka dé ɔwulú ánfɔ wanlín sísí fú. Mí ɔwulú gyankpapu amutɔ á, nɔwanlín Yesu atɔ bwehé pú mu atosunáhé fée; tsú bréá olefi mu agyúmá asi, ²bɔfun ekeá Bulu lótsu mu ya ɔsúsú. Asa Bulu lótsu mu náti á, ɔlɔtsun *Ɖɛ Wankíhé túmito bláa ahá ámúbú ɔlele ɔbéé, bubwée mu *sumbí ayɔpú ámu t́á bubwée. ³Mu iwɔɔsin wúun pú mu lowu ɔma a, oletsíá lé iwɔ ɔwan ɔkpa ɔtsan-ɔtsansu súná amú, púsúná ání lélé otsie nkpa nke advana ání ɔlelatsíá ɔwulúsu fée; ɔde *Bulu iwíegyí iwɔ asún blí. ⁴Bré kuá mva amúnɔ befia a, ɔleda amú ɔlá ɔbéé, “Mlumánatí Yerusalem. Mltsia unv gyo mí Sí atokiehé ámúbú ɔlehɛ yáí ɔbéé méha mli, nebláa mli mú iwɔ asún ámu. ⁵Asú Ɖɔpú Yohane lópu ntsu bó ahá *asú, táme nke kútúklú ku ɔma a, Bulu ɔbópu Ɖɛ Wankíhé amu bó mli asú.”

Yesu Ɖsúsú Yɔ

⁶Mú sv bréá mva amúnɔ belafia a, befité mu beɛ, “Ani Wíé, bré ánfɔtɔ féyinkíá iwíegyí amu há Israelfɔ ní?”

⁷Yesu lébláa amú ɔbéé, “Imehián ání mlébi nke ntée bréá mí Sí nkule lahié mu onutó túmito. ⁸Mboún ní Ɖɛ Wankíhé amu owíé mlɔ á, mlénya túmi tálí gyi mí iwɔ adánsɛ tsú Yerusalem wúlutɔ, Yudea pú Samaria ɔmátɔ fée yɔfun ɔyi ɔka.” ⁹Bréá ɔleblí asún ánfɔ tá á, amú ansítɔ unv Bulu lótsu mu ya ɔsúsú, ɔlɔfwɔ wíé nwulótáatɔ.

¹⁰Besi bude nwulótáa kú alu. Beláki a, ayin abanyɔ akvá ɔɔwa atadie futútú líí amú wá á. ¹¹Ayin ámu befité amú

bee, “Óo Galileafɔ ayin, ntɔ mludékú nwulótáasu alí? Alí ánfí mlilawun Bulu latsú Yesu ɔya ɔsúsú ánfí á, alí kén obéyinkía mu ba nɛ.”

Matias Yuda Otsiákpá Tsiá

(Mateo 27:3-10)

12Lnu beyinkí kplí tsú Nfɔ-nyíbu ámusu^a ba Yerusalem. Ɔkpa ámu íbɔ́bwe máli fun. 13Bowie wúluto á, bɔɔv yó abansúruto, ɔtíné ámúú butsie yaí ámu. Sumbí ayɔpúá bɔyɔ unv gyí: Petro, Yohane, Yakobo mua Andrea, Filipino mua Toma, Bartolomeo mua Mateo, Alfeo mu bi Yakobo, Simon ání ogyi iwɛtsiá adunkápú ɔpasuato ɔha pú oyin ɔkúá butetí mu Yakobo mu bi Yuda. 14Ahá ání betrá du yó unv gyí, atsi aku, Yesu mu yin *Maria pú Yesu apíó. Ahá ánfí féé létsiá bwé ikule bɔ́ mpái.

15Nke ámutɔ á, ahógyipu bɔ́bwe fé lafakule-advanyɔ (120) befia. Lnu Petro lókusú líí amú nsuné bláa amú ɔbée, 16“Mí apíó ahógyipu, Ɔɔɔ Wankíhé asún ámúú ɔleblí tsun Owíe *Dawidsu, íbu Bulu asun wanlínhé amutɔ, tsú Yuda Iskariot ámúú ɔlekpa ahá beyékutá Yesu iwí ámu ilaba mútɔ. 17Yuda Iskariot anfi létsiá anutɔ. Ania munyɔ lóyɔ osum agyúmá ánfí.”

18Yuda lópu mu lalahe ání ɔɔbwe ikɔ́á beka mu yóho ɔsulúv kv. Ɔlekpa tsú ɔsúsú beda ɔsulúv amusu pɔ, mu ipu lefa po, mu mpúni é lefen dali wurɔɔɔ. 19Ɔhagyíɔha ání ɔbu Yerusalem lónu asún ánfí. Bedunká ɔsulúv amu dá amú ɔblítɔ bee, “Hakeldama.” Mú asi gyí, “Ɔsulúv á obugya lawólí músú.”

20Petro lóyɔ mu asúnú ɔbée, “Tsúfé bɔwanlín wá *Israelfɔ ílv ɔwulú ámutɔ bee,

‘Mu wóyí ídí kpan.

Ɔhaa mátsiá mútɔ.’

Betrá wanlín tswi bee,

^a 1:12 *Nfɔ-nyíbu* igyi obubwí kuá íbu mantáa Yerusalem, butetí mú Olifbu.

‘Dha bambá otsía mu otsiákpá.’

21-22 “Mú su ilehián ání ɔku ɔbétsa aní Yesu afúlitɔkusu ánfu ɪwɪ adánsɛ gyí. Ilehián ání ɔhá ámu obótsu ayin ámúbu betsiá anɔtɔ bré ámúbú anulóbuo aní Wíe Yesu, náti kí ntíné-ntíné amɔtɔ. ɔhá ání olobuo aní tsú bréá Asú ɔbɔpú Yohane léblí *asúbɔ asún alu ɔɔfɔn eke ámúbú Bulu lótsu Yesu ya ɔsúsú sí aní ámu.”

23 ɪnu su bele ahá abanyó, bugyi *Yosef ání butetí mu Barsaba, butetráa ti mu Yustus mua Matia. 24 Múú ɔɔɔ mpái beɛ, “Aní Wíe, fuyin ɔhagyíɔha klɔntɔ asún. Suna aní ahá ánfɔtɔ ɔmúvá falé, 25 otsia Yuda amúbú alakíná agyómá ánfu, nyá mu ɪsubutí ámu otsiákpá, ɔɔɔ fú osum agyómá ámu.” 26 Múú bekapú atɔ amú abanyó nwunsv. Ileyi Matiasu. Mú su ɔɔpɔ mu wá sumbí ayɔpú dúɔkun ámɔtɔ, belabwé dúanyɔ.

ɔɔɛ Wankíhé lbáto

2 1 *Pentekoste Eke, igyi Israelfɔ atɔ pɔpwe ɔnɔ ɔdaké ámu ɔɔfɔn a, ahógyipu amu féé beba befia amú ofiákpa. 2 ɔtsáwule pé á, olú kvá igyi fé afú kpɔnkpɔntɪ ilotsu ɔsúsú ɔɔbulá wóyí ámúbú bubu mútɔ ámu. 3 ɪnu bowun tɔkvá igyi fé ogya plenplen, ɪlehan ɔdandu. ɪledasáin dínká amútɔ okugyíɔkusu. 4 *ɔɔɛ Wankíhé ɔɔbulá okugyíɔkɔtɔ, ɪleha okugyíɔku léfi asú ɔde ɔblí bambá blí.

5 Bré ámɔtɔ á, *Yudafɔá butenyá Bulu ifú, bubu ndítɔ féé baba butsie Yerusalem. 6 Bréá ɔɔɔm anfi bonu okitikíti amu a, besrí befia ɪv. Amútɔ okugyíɔku lónu mu wúluto ɔblí. Mú su ɔnɔ lobwie amú. 7 ɪɔwa amú ifú, wá amú wánwan. Mú su befité beɛ, “Ahá ánfu budetɔí á, megyí Galileafɔ sɔ́ɔn bugyi? 8 Mú nkáli ɪɔbwe asa anidenuá buɔde anɔtɔ okugyíɔku wúluto ɔblí blí? 9 Anɔtɔ aku atsú Partia, Media, Elam, Mesopotamia, Yudea, Kapadokia, Ponto, Asia, 10 Frigia, Pamfilia, Egyipte ɔmátɔ pú Libia awúlu ání ɪbu mantáa Kirene wúluto. Aku é botsú Roma wúluto, 11 búgyi Yudafɔ pú amúá bumegyí Yudafɔ bawíé Yudafɔ Bulusúmtɔ aná féé bubu anɔtɔ. Kretafɔ pú Arabifɔ é bubu anɔtɔ. Táme

anidenuá bude Bulu atɔ kɔɔnkɔntɪ ání alabwé blí antɔ okugyíɔku ɔblítɔ.” ¹²Alí ámú asún ámu ilobwie amú ɔnɔ ámu su bɔbwe yɔɔ, sí bude amú aba fité bee, “Ngya amansu é ní?”

¹³Táme amútsɔ aku bɔbwe ahógyipu amu ahinlá bee, “Ntá banu bu.”

Petro Asúntóle Súná Ahá Ámu

¹⁴ɪnu Petro mua mu aba dúɔkun ámu bɔkusu líí. Mú Petro lótsu ɔme fúá bláa ɔɔm amu ɔbé, “Apíó aba Yudafɔ pú mli fééá mliɔ Yerusalem, mliɪe yaa asu, anle asúntɔ suna mli. ¹⁵Mli máki mliaa ahá ánti babú, tsúfé ɔyí mɔkúke. Bréá dokwebá ladá ní. ¹⁶Mbóún asún ánti ulaba nde ánti Bulu ɔnɔsú ɔɔpú Yoel léblí yáí ní. ɔbé,

¹⁷‘Bulu ɔbé, “Nke tráhe amutɔ á,

nɔpu mí ɔhé wá anyánpúsa féétɔ.

Mli abi yinhé pú mli abi tsihé béblí asún ánti
nɔpuwá amú ɔnɔ.

Mli nyasubi bówun atɔ.

Mli ayin dehen bókun nkude.

¹⁸Nke ámutɔ á, nɔpu mí ɔhé wá mí asúmpú
atsi múa ayin féétɔ.

Mú su béblí asún ánti nɔpuwá amú ɔnɔ.

¹⁹Nɔbwe ofúla nwulútaasu,
bwé osúna ɔsulúsu.

Ogyá, obugya pú ogyási tuun béba ɔyítɔ.

²⁰Owí ɔbéta ɔpá.

ɔtsra é ɔbépe kɔɔ fé obugya,

asa aní Wíe numnyam eke kɔɔnkɔntɪ ámu
ɪbɔfn.

²¹ɪbéba ánti ɔhagyícha ánti okpólí aní Wíe a, ɔbéha
mu obénya nkpa.” ’ ’ ”

²²Petro lóyɔ músú ɔbé, “Mí apíó Israelfɔ, mliyaa asu amlinu asún ánti. Bulu lɔbwe ofúla múa atɔ kɔɔnkɔntɪ pú osúna tsɔtsɔɔtsɔ tsun Yesu Nasaretyin amusu, púsúná ánti mulówa mu. Mli féé mliulówun mú, tsúfé mli ansísú ín

fée leba. ²³Igyi tóá Bulu yin yaí dodo, igyi mu apé ání béle Yesu há mli. Mlúléha ahá ání butamagyi mblasu beda mu mántá *oyikpalíhesu, mó mu. ²⁴Táme Bulu léle mu lowu sínsínsíntó, kúsúa mu tsú afúlitó. Tsúfélé lowu méetalí gyi musu, osin afúlitó. ²⁵Íni sù Owíe *Dawid léblí mu iwí asún óbée,

‘Brégyíbré á, ntowun aní Wíe mí ansísú.

Tsúfélé óhí mí gyɔpsu, su tɔtɔ mɔ́owa mí ifú.

²⁶Mú su ansí tegyi mí,
ntɔtɔ́í ansigyísú.

Nyankpusa ngyi. Lowu da gyo mí,
táme nde Bulu ɔkpa kí.

²⁷Tsúfélé fuméesi mí ɔkláa wá afúlitó.

Fumééha mí fú osúmpú wankíhé mmɔ́opló.

²⁸Fúlósuná mí ɔkpa ání ntsúvun músú, mí anya nkpa
ání itamatá.

Ní fúvú mí wá á, ansí bégyi mú ekekegyíeke.’ ”

²⁹Petro létrá bláa amú óbée, “Mí apíó Israelfó, mbúa hue bla mli amlinu. Aní náin Owíe Dawid lówu, bopolá mu. Bótu nde mu ntsán da aní wá nfi. ³⁰Bulu ɔ́nsú ɔ́tɔ́pú ogyi, oyin ání ntam ání Bulu léka há mu béba mútó. Bulu léka ntam há mu óbée, méha mu natuna ɔku obétsiá mu obíású eke kú. ³¹Íniá aní náin Owíe Dawid lówun mú yáí su á, ɔ́tɔ́tɔ́í tsú *Kristo, (ɔhá ámúú Bulu ladá mu ofúli amu) kusú tsú afúlitó iwí óbée,

‘Bulu méesi mu wá afúlitó.

Mú su mu ɔ́vɔ́lúv mɔ́opló.’ ”

³²Petro lóyɔ músú óbée, “Yesu gyí ɔhá ání Bulu lókusúa tsu afúlitó, aní fée anígyí mú adansífo. ³³Bulu lótsu Yesu ya ɔ́súsú, há mu otsiákpá yilé mu gyɔpsu. Aní Sí Bulu lópv Dɔ́e Wankíhé ání ɔ́lehɛ yáí óbée, mɔ́pvhá mu ahógyipv há mu. Dɔ́e ámv Yesu lapóhá aní á. Mú gyumagyihe mlidéwúun, mlidénu á. ³⁴Megyí Owíe Dawid Bulu lótsu ya ɔ́súsú, táme mléblí yáí óbée,

‘Aní Wíe Bulu lébláa mí Wíe óbée,

Tsia mí gyɔpsu,

³⁵yǒfun bréá nǒpu fú alupú bwé fú ayabi oyíkpa.’ ”

³⁶“Mú su mli Israelfǒ fée mlinu. Ibo mútǒá mliléda Yesu mántá oyikpalíhesu. Táme mlihié bi ání Bulu ladá mu ofúli, bwé mu Kristo pú aní Wíe.”

³⁷Bréá Israelfǒ ámu bonu asún ánfí á, ilehié han amú. Mú su befíté Petro mua mu aba *sumbí ayǒpú atráhe amu beé, “Apíó, ntǒ abwée?”

³⁸Múú Petro léle mú ǒnǒ ǒbéé, “Mlito okugyǒku ǒdámli klntǒ, abǒ mli *asú Yesu Kristo dátǒ, méni Bulu obési mli lakpan kíé mli, há mli ǒhe Wankíhé amu. ³⁹Tsúfé mli mli abí-aná pú ahá ání bǒbu tsútsúútsú ání Bulu ǒbétí fée ǒlehié ǒhe Wankíhé anfi há.”

⁴⁰Petro léblí asún tsǒtsǒtsǒ, pútǒí kplá amú ǒbéé, “Mlile mli iwí tsu ndemba-abí laláhe anfiǒ.” ⁴¹Amútǒ ahá tsǒtsǒtsǒ bǒhǒ Petro asún ámu. Mú su bǒbǒ amú asú. Eke ámu a, ahá ǒǒbwe fé mpím-sa (3,000) betsiá ahógyipu amutǒ. ⁴²Ahógyipu amu bele ansí kítá sumbí ayǒpú ámu atosunáhé, amú ikulebwe tógyítǒtǒ, ǒpasua ámutǒ atogyihetǒ yée pú mpáibǒtǒ.

Ahógyipu Amu Tsiátǒ

⁴³Sumbí ayǒpú ámu ǒǒbwe ofúla pú osúna tsǒtsǒtsǒ, ǒnǒ lobwie ǒhagyǒha. ⁴⁴Ahógyipu amu fée ǒǒbwe tógyítǒ kule. Betsiá ye amú atǒ há aba. ⁴⁵Betsiá fé amú atǒ, ye kǒba ání benyatǒ há amútǒ okugyǒkuá ǒma. ⁴⁶Amú fée betsiá fía *Bulu ǒtswékpa wunsínésú ekekegyíeke. Bǒpu amú klntǒ-ǒdwe tsíá gyi atǒ ǒpasuatǒ amú aba wóyítǒ. ⁴⁷Betsiá kánfú Bulu, ahá fée bekle amú asún, aní Wíe Bulu létsiá pú ahá ání ǒdele betsiá amútǒ ekekegyíeke.

Petro Mua Yohane Ibo ǒku Tsa

3 ¹Eke ǒku ntǒpwe dǒsatǒ mpáibo bré á, Petro mua Yohane bǒyǒ Bulu ǒtswékpa amu wunsínésú. ²Oyin ǒkuá bǒkwí mu ibǒ tetsiá Bulu ǒtswékpa amu ǒkpa ǒnǒ kuá butetí mú “ǒkpa ǒnǒ Wankláán.” Ahá butotsú mu ba beyaí unu ekekegyíeke, ǒtǒkúlí ahá ání bǒwie ǒtswékpa unu kǒba.

³Bréá ɪbo amu lówun ání Petro mua Yohane budebitíwíé Ɔtswékpa inu á, ɔɔkulí amú kóba. ⁴Petro mua Yohane besi líí buɔe mu kú díín. Múú Petro lébláa mu ɔbée, “Fú mú kú anɪ wule.” ⁵ɪbo amu kɪ ɔbée, béha mu tɔku. Mú su olotsu ansí fúá ɔɔe amú kú. ⁶Táme Petro lébláa mu ɔbée, “Mma sika futútú ntée pépe, táme néha fú tśá mbu. Kusu lu, afunati Yesu Kristo Nasaretyin amu dátó!” ⁷ɪnu Petro lékitá mu gyɔɔɔ bi, tsú mu líí, inunu ɔwunlín lowie mu ayabi pú mu ntsakpátó. ⁸Olofulí kpáyí ɔtsáwule pé, wá natí bi. Mú su ɔlekplá buo Petro aná wíé *Bulu ɔtswékpa wunsínésú inu; ɔna odefulí kpáyí; ɔɔe Bulu kanfú. ⁹Ahá ání bubu inu féé bowun mu ání ɔna ɔɔe Bulu kanfú. ¹⁰Mú su bréá ɪɔwankí amú ání ɪbo amúú otetsíá Ɔkpa Ɔnó Wankláán inu kólí ató ámu ni á, ɪɔwa amú wánwan, bwíé amú ɔnó.

Petro Tóí Bulu Ɔtswékpa Wunsínésú

¹¹Oyin ámu pú Petro mua Yohane kínkíínkín *Bulu ɔtswékpa wunsínésú, ɔtɪnekvá butetí inu Salomo Abrándaású. Mu ɪɔtsa ɪɔwa amú wánwan. Mú su besrí ba amú wá inu. ¹²Bréá Petro lówun amú á, ɔlefíté amú ɔbée, “Mí apíó Israelfɔ, ntogyi sú asún ánfɪ lawá mlɪ wánwan alɪ? Ntogyi sú mlɪlaba mlɪdé anɪ kú alɪ? Mlɪkí mlɪaa, anɪ onutó túmi ntée anɪ Bulusúm wankláán láhá su oyin ánfɪ lakúsú ɔna? ¹³Bulu ámuú anɪ anáin *Abraham, *Isak pú *Yakob bosúm ámu ɪɔwa mu osúmpú Yesu numnyam. Táme mlɪlɔpu mu há mlɪaa bumóɔ mu. Mlɪlékiná ɔhá ánfɪ tɛkɪ Pilato ɪɔbwe agywun ání mési mu ɔnati ánfɪ. ¹⁴Mlɪlékiná Ɔha Wankíhé pú Yilé Ɔbwepú ánfɪá ɔɔwanlín mu ɪwɪ asún wá Bulu asún ɔwulótó anfi, bláa Pilato mlɪaa, osíi ahá ɔmɔpú ámu mboún ha mlɪ. ¹⁵Mlɪléha ɔmɔ nkpa ɔhapú ánfɪ, táme Bulu ɪkúsúa mu tsú afúlitɔ. Anigyí mú ɪwɪ adansɪfɔ ní. ¹⁶Yesu túmi láhá ɪbo anfi mlɪyin yaí, mlɪdékú anfi ɪwɪ lawá mu ɔnlɪn. Anɪ Yesu hógyi látsá mu, mlɪ féé mlɪdewúun a.

¹⁷“ɪnu su mí apíó, nyin ání mábí léha mlɪa mlɪ ahande mlɪlɔpu ɪnu féé gyi Yesu. ¹⁸Táme a, Bulu léblí tsun mu ɔnósú atɔpú amu féésú yaí ɔbée, “*Kristo, (ɔhá ámuú neda mu

Gyu

ofúli amu) obówun iwɔɔsun.’ Mú su ɔleha ɔleba ahi ní. ¹⁹Mú su mlɔdamli klɔntɔ, amlɔyinki ba Bulu wá, ménu obési mli lakpan fée kíe mli, wá mli ɔwunlín pɔpwe, ²⁰lápú Yesu sísí mli. Mu Bulu léda ofúli yáí há mli ní. ²¹Ilehián ání Yesu obétsiá ɔsúsú unu yófun bréá Bulu ɔbéla tógyítɔ bwé, fé ahiá ɔleha mu ɔnɔsú atɔírú wankíhé amu beblí tswi. ²²Ani náin Mose léblí ɔbéé, ‘Mli Wíe Bulu ɔbéha mu ɔnɔsú ɔtɔírú ɔkúvá ogyi fé mí ɔbédalí tsú mlɔtɔ há mli. Mlɔgyi mu asun blíhé féesú. ²³ɔhagyícha ání omobu ɔnɔsú ɔtɔírú anfi á, Bulu ɔbéle mu lé mu ahátɔ, mɔ mu.’

²⁴“Tsú Samuelsu á, Bulu ɔnɔsú atɔírúba beba fée ɔtɔí tsú asún anfi ɔdebá nke ánfítɔ wi. ²⁵Mlɔgyí Bulu ɔnɔsú atɔírú amu abí-aná. Mlibú itɔ ámúú Bulu léhɔe yáí há aní anáin amu. Tsúfé Bulu lébláa Abraham ɔbéé, ‘Nótson fú abí-anású yúlá ɔyítɔ ahá fée.’ ²⁶Íni sú bréá Bulu léle mu osúmpú Yesu a, olegyankpá pú mu sísí mli Israelfɔ, ɔbéé obóyulá mli, amlɔsi lakpan bwe ní.”

Petro Mva Yohane ɔnɔle Yudafɔ Asún Ogyíkpa

4 ¹Bréá Petro mva Yohane bubu músú budetɔí kplá ahá ámu a, Bulu igyí ahapú mva Bulu ɔtswékpa agyópu ɔhande pú *Sadukifɔ aku beba ɔtɔu amú. ²ɔblí lekítá ahande anfi. Tsúfé *sumbí ayɔpú ámu buɔe ahá ámu atɔ suná beé, Yesu lawú kúsú tsú afúlitɔ. Mú su wukúsú bu unu há ɔhagyícha. ³Ahande amu bekítá Petro mva Yohane. Owí deta su ɔɔpu amú yówa obu yéha ɔyi kehe. ⁴Táme ahá ámúú bonu amú atosunáhé amutɔ ahá tsɔtsɔɔtsɔ bohogyi, betsiá ahógyipu amutɔ. Mú su ahógyipu amutɔ ayin ɔɔbwe fé mpím-nu (5,000).

⁵ɔyi kehe nyanki a, *Yudafɔ awíe, amú ahande pú Mose *mbla asunápú beba befia Yerusalem. ⁶Ahá anfi pú ahande ání befia asún ámu asi gyí; Bulu *igyí ɔhapú dehen Hana, mu wóyítɔ ahande Kaiafa, Yohane, Aleksandro pú wóyí ámutɔ ahá fée. ⁷Beha ɔɔpu Petro mva Yohane belí amú ansítɔ, befítɔ amú beé, “Ma túmitɔ ntée ma dátɔ mlílétsa oyin anfi?”

8Inu á, *Dhe Wankíhé lɔbulá Petrotɔ. Mú su ulɛha mu túmi ɔlebláa Yudafo awíe pú amú ahande amu ɔbé, 9“Nde mú mlidé aní futé tsá svá anlawá awitɔle há ɔɔ anfi, tsá mu ɔɔ? 10Mómú tsú nde mlɛa Israelfɔ féé mliɔ aní Yesu Kristo, Nasaretyin amu túmi pú mu dátɔ oyin anfi ɔlú mli ansítɔ anfi lanyá ulɔtsá. Mugyí ɔhá ámúú mliléda mántá *oyikpalíhesu mɔ mu asa Bulu lókusúda mu tsú afúlitɔ ámu ni. 11Yesu anfi iwɛ asún ɔwanlín wá Bulu asún ámutɔ beɛ,

‘Ibwi ámúú mli obu ayípu mlilékiná ámu
lábɔbwe okonkísúbwi ní.’

12Yesu anfi nkule pé gyí ɔhá aní Bulu lópuhá aní ɔyí ánfɔ ɔbé, atɔvun musu nya nkpa. ɔhaa trá ɔma unvá ɔvun mu.”

13Inúá Yudafo ahande amu buyin aní Petro mva Yohane bumɔkúkásí ɔwulɔ kɪ, táme ifú medé amú su á, ɔnɔ lobwie amú. Ulɔwankí amú aní babuo Yesu kɪ. 14Ahande amu bumenya asvansu blí. Tsúfé bowun aní ɔɔ amúú alanyá ulɔtsá ámu líí Petro mva Yohane wá. 15Mú su bebláa Petro aná beɛ, budáli asún ogyíkpá unv kpalobí, abukita agywun. Múú ahande amu befité aba beɛ, 16“Nkálɔ abɔbwe ahá anfi? ɔhagyíɔha labí Yerusalem wúlutɔ aní amú labwé osúna kɔnkpɔntɪ anfi. Aníméetalí gyi mú nwéɛn. 17Táme alíá ɔbɔbwe asún anfi méétrá kleí á, mliha ada amú ɔlá kinkíinkín aníaa bumátra bláa ɔhaa asvansu Yesu dátɔ ɛ.”

18Inu belatí Petro mva Yohane ba obuto unv, beda amú ɔlá beɛ, bumátra bláa ɔhaa asúngyíasún ntéɛ súná atɔ Yesu dátɔ ekekeke. 19Múú Petro mva Yohane bebláa amú beɛ, “Mli onutɔ mliki. Mɔmu bu alé Bulu ansítɔ, aní abónu mli asún lóó, ntéɛ Bulu klé? 20Tsúfé aní mú aníméetalí sí tsá anlawun pú asún aní anlanú blí.” 21Bumetalí bíí amú isu, tsúfé ahá ámu féé buɔ Bulu kanfú ofúla kɔnkpɔntɪ ámúú alabwé ámu su. Mú su ahande amu betrá da amú ɔlá kinkíinkín, besi amú benatí. 22Oyin ámu ulɔtsá lówa ifú, tsúfé alahɔ vɔn ní advana (40) alí bré ámutɔ.

Ahógyipu Amu Atɔ Kulíhé

23Yudafo ahande amu benya sí amú alí, Petro mva Yohane beyinkí ba amú aba ahógyipu amu wá. Bebláa amú

Gyu

asún ání Bulu igyí ahapú dehen pú Yudafɔ ahande amu beblí fée. ²⁴Bréá ahógyipu amu bonu asún ámu a, amú fée bɔpu ɔme kule kúlí Bulu beɛ, “Ani Wíe Bulu Otúmípu, fúlóbwe ɔsú ɔbwe asi, ɔpu múa ntsu pú mótɔ atɔ fée. ²⁵Fɔtsun Dɔɛ Wankíhésu há aní náin Dawid, ogyi fú osúmpú léblí ɔbée, ‘Ntogyi sù ɔmá-ɔmá banyá ɔblɔ?’

Ntogyi sù ahá fée babwé agywun kuku kpaali?

²⁶Ɔsulúsu awíe badídá atɔ.

Wúlu ahande batí aba fia,

kítá agywun laláhe aní Wíe Bulu mua *Kristo, (ɔhá ámúú ɔleda mu ofúli) amusu.’ ”

²⁷Petro lóyɔ mu asúnsú ɔbée, “Lélé á, asún ánfɔ laba mótɔ. Owíe *Herode mua Pontio Pilatoá bomegyí Yudafɔ pú Israelfɔ babwé kule wúlu anfɔtɔ, kúsú líí Yesusu. Mbugyí fú osúmpú wankíhéá féda mu ofúli ni. ²⁸Táme bomebɔ ání tɔá fehíhe yaí fee íbéba mótɔ fú apé pú fú túmitɔ dodo babwé á. ²⁹Aní Wíe Bulu, kí alíá baká anisu, afukpa fú asúmpú, méní abétalí blí fú asún ámu, anuméenya ifú. ³⁰Tsa ahá ɔlɔ fú túmitɔ, afuha abwe ofúla pú osúna fú osúmpú wankíhé Yesu dátɔ.”

³¹Bréá bɔbɔ mpái ánfɔ tá á, amú offiakpa unu fée ɔlɔkpinkí. Dɔɛ Wankíhé lɔbulá amótɔ. Mú su bɔwa klun dá Bulu asún ámu ɔkan.

Ahógyipu Amu Atótɔ Yée

³²Ahógyipu amu fée bɔpu klun kule múa agywun kule tsíá. Ɔkuku méblí ɔbée tɔá mubɔ igyi mu nkule klé. Mboún okugyíɔkuku atɔ ɔbwe amú fée klé. ³³Sumbí ayɔpú ámu bɔpu túmi kpɔnkpɔɔnkpɔntɔ gyi aní Wíe Yesu iwɔ adánsɛ beɛ, Bulu lakúsúá mu tsú afúlitɔ. Bulu léhɛ wá awítɔle há ahógyipu amu fée. ³⁴Amótɔ ɔkuku mégyi ohian, tsúfé amúá bubɔ ɔsulúv pú wóyí betsiá fé mú, pú mú ɔnɔ kɔba ba ³⁵sumbí ayɔpú ámu, betsiá ye mú há ɔhagyíɔha alíá ilehián mu.

³⁶⁻³⁷Mú su alí kén Lewiyin ɔkúá butetí mu *Yosef léfe ɔsulúv, ɔlɔpu kɔba amu ba sumbí ayɔpú ámu ni. Yosef anfi

otsú Kipro omátó, sumbí ayópú beha mu idá Barnaba, (mó así gyí, “Ahá atetɔ-ɔnlɔ ɔwapú.”)

Anania Mva Safira

5 ¹ Inu oyin ɔkuá butetí mu Anania mva mu ka Safira é befe amú siadie ku. ² Táme Anania léle kóba amu ku ñáín, mu ka é yin mó iwɛ. Ɔɔpu kóba amu tráhe ba *sumbí ayópú ámu. ³ Mú Petro léfuté mu ɔbéé, “Anania, ntogyi sù fahá Ɔbunsám lagyi fusu, fapú kóba amú fenyá ámu ku ñáín, bówa afunu suná Ɔɛ Wankíhé? ⁴ Fúbú fú ɔsulú asa fefe mú. Íniá fefe mú é á, fúbú fú kóba. Ntɔ láhan fu sù fabwé utá igyi alí? Bulu fawá afunu súná o, megyí anyánkpúsa.” ⁵ Anania lénya nú asón ánfɛ alí á, ɔletɔn da wú. Mú su ifú lehɛ kítá ahá ání bonu asón ánfɛ féé. ⁶ Inu nyasubi aku bókusú tsú tati kíklɛ mu iwɛ, tsú mu yópulá.

⁷ Ilegyi fé dɔnhwírɛ asa ɔma asa mu ka Safira é lóbowie unu. Alí bré ámutɔ á, omeyín tóá ɔlaba mu kulusu. ⁸ Petro léfuté mu ɔbéé, “Safira, bla mɛ. Kóba anfi gyí tóá fúá fú kulu mlúnya bréá mlúfé ɔsulú amu nɛ?”

Safira léle mú ɔnɔ ɔbéé, “Ee, alí anlúnya ní.”

⁹ Mú su Petro léfuté mu ɔbéé, “Ntogyi su fúá fú kulu mlúlabwé ɔɔ-ɔkule mlúaa mlóɔ Aní Wíe Ɔɛ kí? Kɛ, nyasubi ání bayópulá fú kulu yínkí lawíé obu-ɔnɔ unu á. Bósvrá fú é ya.” ¹⁰ Inu ɔtsɛ ámu é létɔn da Petro ayabitɔ unu wú. Bréá nyasubi ámu bobowie unu á, bowun ání Safira é lawú, su botsu mu yópulá mu mantáa mu kulu. ¹¹ Ifú lehɛ wíe ɔpasua ámu pú ahá ání bonu asón ánfɛ féétó.

Sumbí Ayópú Ámu Ofúla Pú Osúna Bwe

¹² Bulu lótsun sumbí ayópú ámusu bwé ofúla pú osúna tsɔtsɔtsɔ wúlu amutɔ. Ahógyipu amu féé ɔɔbwe kule tsíá fia ɔtnekúá butetí unu Salomo Abrándaású. ¹³ Ahá ání bomegyí ahógyipu kóráá betɛ ahógyipu amu ɔdayilé. Táme ɔkuku móbwe agywun ɔbéé, mébetsíá ahógyipu amutɔ. ¹⁴ Igyi alí óó á, atɛ múa ayin tsɔtsɔtsɔ bɔhɔ aní Wíe Yesu gyi. Bulu létsiá pú amú tsíá ahógyipu amutɔ. ¹⁵ Sumbí ayópú

ámu ofúlábwe su wúlu amuto ahá betsiá tsú amú alɔpu ba brɔnusu, beyaí nklan tswi pú amú tswi mósú. Fówun ní Petro ɔbá bɔtsun unu á, mu yiyí bówulí amósú. ¹⁶Ɔɔm ání bɔtsú awúluá ibu bomlí Yerusalemtɔ é bɔpu amú alɔpu pú ahá ání *ɔɛ laláhe dé amú háan ba, sumbí ayɔpú ámu betsa amú ilo.

Sumbí Ayɔpú Ámu Lu

¹⁷Sumbí ayɔpú ámu iwi lówa Bulu *igyí ɔhapú dehen amu mua mu aba ání bubu Saduki ɔpasuato olu. ¹⁸Íni su bekíta sumbí ayɔpú ámu wá obu. ¹⁹Táme onyé, *Bulu-ɔɔpu ɔku léba befinkí obu ámu, kpá sumbí ayɔpú ámu dáli. ²⁰Bulu-ɔɔpu amu lébláa amú ɔbé, “Mliyo amliyelí Bulu ɔswékpa wunsínésú unu, amlibla ahá nkpa ɔɔwe amu iwi asún féé.” ²¹Sumbí ayɔpú ámu begyi Bulu-ɔɔpu amu asúnsú. Mú su benatí yɔ wunsínésú unu bake, bude ahá atɔ suná.

Ɔma-ɔma a, Bulu igyí ɔhapú dehen amu létɔ Yudafo asún agyípú amu féé fia. Mú ɔɔwa abí beɛ buyéle sumbí ayɔpú ámu ba. ²²Táme ɔɔɔ á, sumbí ayɔpú ámu buma unu. Íni su beyinkí bebláa ahande amu beɛ, ²³“Anilóɔ unu á, anilówun ání aklun amu fin wankláán. Obu adípúsú akípu amu bulí bude aklun amu ɔnɔ gyo. Táme bréá aniléfinkí aklun amu a, animówun ɔhaa obu ámutɔ.” ²⁴Bulu ɔswékpa agyópu ɔhande mua Bulu igyí ahapú dehen amu bonu asún ántɔ a, ɔɔwe ɔɔ, sí bude asún ání íbéba mú ɔma gywín. ²⁵Unu ɔha ɔku lébebláa amú ɔbé, “Mlíki, ahá ámúú mlilówa obu ámu bulí Bulu ɔswékpa wunsínésú unu, bude ahá atɔ suná.” ²⁶Mú su Bulu ɔswékpa agyópu ɔhande amu mua mu aba ɔɔɔ yékpa sumbí ayɔpú ámu ba. Bekpa amú díín pú amú ba, tsúfé benya ífú ání ní ɔɔpu ibi da amú á, ahá béda amú abwi.

²⁷Ɔpu amú ba belí Yudafo asún agyípú amu ansítɔ. Mú Bulu igyí ɔhapú dehen amu léfuté amú ɔbé, ²⁸“Animéda mli ɔlá aniaa, mlumátrá ti oyin ántɔ dá súná atɔ? Táme mlíki tɔá mlilabwé. Mlilahá mli atosunáhé labólá Yusalem wúluto féé. Mludékléá mlópu mu lowu súra aní.”

²⁹Petro mva sumbí ayɔpú atráhe amv beɛ mú ɔnɔ beɛ, “Bulu asúnsú lehián ání abégyi, megyí anyánkprúsa. ³⁰Mlúléda Yesu mántá oyikpalíhesv mɔ mv. Táme aní anáin Bulu lókusúba mv tsú afúlitɔ. ³¹Olotsu mv ya ɔsúsú, pú mv yéyaí mv gyɔpɔsv, bwé mv ahá ɔkparú pú Nkpa ɔhɔp. Fówun ɔkpa ɔdɔ ha Israelfɔ abudamli kluntɔ, Bulu osi amú lakpan kie amú. ³²Anɔgyí alɔ asún ánfɔ ɔwɔ adanstɔ ní. ɔɣe Wankíhé amú Bulu lópokíé ahá ání butegyi mv asúnsú amv é dé mú ɔwɔ adánsɛ gyí.”

³³Bréa Yudaɔ ahande amv bonu asún ánfɔ á, ɔlɔwa amú ɔblɔ. Mú sv ɔɔbwe agywun beɛ, bómcɔ sumbí ayɔpú ámv. ³⁴Táme Yudaɔ ahande amɔɔ ɔkúá ogyi Farisiyin, mv dá gyí Gamaliel, ogyi Mose mbla osunápú ání ahá féé butobú mv lókusú líí, blí ɔbéé bukpa sumbí ayɔpú ámv dalɔ kpalobí. ³⁵ɔnv ɔlebláa Yudaɔ ahande amv ɔbéɛ, “Israelfɔ ayin, mlíkɔ wankláán ɔtɔ ánfɔ mlíaa mlɔpugyi ahá ánfɔ ɔwɔ. ³⁶Mlíkaun ání bré kutɔ á, oyin ɔkúá butetí mv Teuda létsiá. ɔɔbwe mv ɔwɔ fé ɔha kɔɔnkɔntɔ ɔkɔ. Mú sv ahá bóɔbwe fé lafana (400) sɔ́n bobuo mv. Táme bómcɔ mv, mv abúopv féé bedasáín, mv bwehé é féé lowie ntsu. ³⁷Mv ɔma a, Yuda ání ogyi Galileayin é léba ahákláɔ. Mv é ɔlekpa ɔɔɔm buo ɔwɔ. Táme bómcɔ mv, mv abúopv amv féé bedasáín. ³⁸Mú sv nde mlí bláa mbéɛ, mlísi ahá ánfɔ. Mlímápv ɔbɔ da amú. Tsúfé ní itsú anyánkprúsa wá á, mú féé ɔbéba ɔɔtsun. ³⁹Táme ní itsú Bulu wá á, mlíméetalí ká amú itin. Mú sv mlímábwe amú ɔtɔ, ménɔ ɔmɔɔbwe fé mlá Bulunɔ mlúdéɔ.”

Yudaɔ ahande amv botsulá dínká Gamaliel asún ánfɔsv. ⁴⁰ɔnv beha betɔ sumbí ayɔpú ámv ba obuto ɔnv. Beha ɔɔnwen amú ɔtɔ, beda amú ɔlá beɛ, bumátra tɔ Yesu dá súná ɔtɔ ekekeke, besi amú benatí. ⁴¹Bréa sumbí ayɔpú ámv bedalɔ Yudaɔ asún ogyíkpa ɔnv ɔɔyɔ á, ansí de amú gyí. Tsúfé Bulu lahá amú é bawun ɔwɔsv Yesu sv. ⁴²Sumbí ayɔpú ámv betsiá súná ɔtɔ ekekegyíkeke, dá Bulu *asv wankláán ámv ɔkan Bulu ɔtswékpa ɔnv pú wóyígyíwóyítɔ beɛ, Yesu gyí Kristo, (ɔhá amú Bulu ladá mv ofúli amv).

Gyu

Ɔnɔ Alɔpú Abasiénɔ Le

6 ¹Bréá akasípú amu beba budekleí á, itré leda Yudafo Griiki ablípú amú buteblí *Hebri ɔblú amu nsiné. Griiki ablípú amu beɛ, ekekegyíeke, ní buɛe atɔ yée a, butamahá Griikifo asurapu amu. ²Mú su *sumbí ayɔpú dúanyɔ ámu beti ahógyipu amu féé fia, bláa amú beɛ, “Ima aleá abési Bulu asún ɔkanda betsiá ye atɔ. ³Ínu su apíó, mlkɔ mlɔɔ amlɔle ahá abasiénɔ ání obú bu amúsu, Ɖɛ Wankíhé múa nyánsa itsɔ amútu. Fówun apu amú lu atɔtu yée ɔnɔ, ⁴méni anɔ é abéle ansí kɔ mpáɔbu pú Bulu asún ámu ɔkanda.”

⁵Ansí legyi ahógyipu amu féé asún ánfɔ iwi. Mú su bele oyin ɔkuá mu hógyi ɔnɔ bu ɔnlɔ, Ɖɛ Wankíhé é itsɔ mutɔ, butetɔ mu Stefano mua Filipino, Prokoro, Nikanor, Timon, Parmena pú Nikolao, ogyi Griikiyin ɔkuá otsú Antiokia asa alawíé Yudafo osúmtɔ. ⁶Bɔpu ahá ánfɔ bosuná sumbí ayɔpú ámu, sumbí ayɔpú ámu é bɔpu ibi dínká amúsu, bó mpáɔ há amú.

⁷Ínu su Bulu asún ámu lekleí, akasípú amu bomoní Yerusalem. Bulu igyí ahapú ámu óó tsɔtsɔtsɔ boho Yesu asún ámu.

Stefano Kutá

⁸Bulu lówa awɔtɔle há Stefano túmi kɔnɔkɔnɔkɔntɔ. Mú su ɔɔbwe ofúla pú osúna akɔnɔkɔnɔtɔ ɔmá ámutɔ. ⁹Táme aku bɔkɔsú líi musu. Ahá ánfɔ botsú *ofiakpa kuá butetɔ mú “Nkpábiá Bahɔ lwɔsɔtsiá.” Amú aku bugyi Yudafoá botsú Kirene pú Aleksandria awúlusu. Aku é botsú Kilikia pú Asia ɔmátɔ. ¹⁰Táme Ɖɛ Wankíhé léha Stefano nyánsa ɔɔɔpɔtɔ. Mú su bumetalí gyi mu nwéen. ¹¹Ínu su beha aku ɔnɔ beɛ bublí beɛ, bonu ání Stefano détu wɔ Mose mua Bulu. ¹²Ínu léha ahá ání bubu unu pú Yudafo ahandɛ pú Mose *mbla asunápú amu benya ɔblɔ Stefanosu. Inu benatɔ yótu mu, kítá mu, kpá mu ya Yudafo Asún Agyípú amu ansítɔ. ¹³Belahá aku bɔwa afunu dínká musu beɛ, “Oyin ánfɔ tɔtɔ

wɔ Bulu ɔtswékpa wankíhé pú Mose mbla ámu ekekegyíeke. ¹⁴Anulónu ání ɔdeblí ɔbéé, ‘Yesu Nasaretyin amu obóbwie Bulu ɔtswékpa amu, tse amándíé ání Mose lósuná aní fée.’” ¹⁵Yudafɔ Asún Agyípú amu fée besi buɔde Stefano kú díín. lnu beki a, mu ansító de ogyá kpa fé Bulu-ɔɔɔɔ ansító.

Stefano lwi ɔnóle

7 ¹Bulu *igyí ɔhapú dehen amu léfité Stefano ɔbéé, “Asún ánfɔ bablí tsú fú iwɔ ánfɔ fée bu mútɔ?”

²Stefano léle mú ɔnɔ ɔbéé, “Mí apíó pú mí así, mliyaa asu amlnu! Bulu Onumnyampu amu léle iwɔ ɔwan súná aní náin *Abraham bréá otsie Mesopotamia ɔmátɔ, Kaldeafɔɔ asa olotu yétsiá Haran wúluto. ³⁻⁴lnu Bulu lébláa mu ɔbéé, ‘Tu dali fú ɔmátɔ si fú abusuan, afuyɔ ɔsulóv kuá nósuná fúsú.’ Mú su Abraham lótu tsú Kaldeafɔ ɔsulósv yétsiá Haran wúluto. Mu si lowu ɔma a, Bulu léha mu olotu ba ɔtíné ánfɔ mltsie nde ánfɔ. ⁵Bré ámutɔ á, Bulu mɔkúnyá há Abraham ɔsulóv anfi yabi oyíkpa kule kúráá. Táme Bulu léhie mu asɔ yaí ɔbéé, muv mu abí-aná obégyi ɔsulóv anfi ekekú. Alɔ bré ámutɔ á, Abraham mɔkúkwíí obí. ⁶Asún ání Bulu lébláa mu gyí, ‘Fú abí-aná bóbwe afɔɔ ɔsulóv kusu. Bóɔv amú bwé nkpábi, wá amú amumuyɔ nfí lafana (400). ⁷Táme négyi ɔmá ámúv fú abí-aná béyetsiá amú asɔ ámu asún, bítí amú isv. Mú ɔma a, néle amú lé amú ibitɔ, fówun béba bosúm mí nfi.’ ⁸Bulu léka ntam há *Abraham. Ntam amu ɔnɔ á, Abraham ɔbétun mu abí-aná *keté. Mú su mu bi *Isak lóhɔ nkekwe á, Abraham létun mu keté. Isak é létun mu bi *Yakob keté. Yakob é létun mu abí, bugyi aní anáin dúanyɔ ámu keté amú nyebitɔ.

⁹“Aní anáin anfi befe amú gyama *Yosef, mu iwɔ olu sv. Mú su ɔɔyɔ yébwé ɔkpábi Egyipte ɔmátɔ. Táme Bulu lélu mu ɔma, ¹⁰lé mu lé mu asun wunhe féeɔ. Bulu léha mu nyánsa, há Egyipte owíe lénya mu iwɔ ansigyí. Mú su ɔɔbwé Yosef mu ɔmá pú mu wóyí féeésú ɔkípu. ¹¹Akún ku lébá Egyipte pú *Kanaan ɔsulósv fée. lɔɔpu ɔkplán ba ɔmá ámutɔ. Aní anáin amu bumenyá atɔ gyi. ¹²Mú su bréá Yakob lónu

Gyu

ání atogyihe bu Egyipte a, ɔɔwa anɪ anáin anfi sísí. Bɔyɔ unu eke gyankpapu yénya atogyihe ba. ¹³Beyinkí yɔ otse nyɔɔsi a, Yosef léle iwɪ ɔwan súná amú ɔbéé, mugyí amú gyama Yosef ni. Íni su Egyipte owíé é lébi Yosef abusuan. ¹⁴Mú ɔma a, Yosef lówa mu apíó sísí ɔbéé, buyékpa mu si Yakob pú mu abusuanfɔ, bɔbwe fé ahá aduesienɔ́-nu (75) ba, abubetsiá Egyipte ɔmátɔ. ¹⁵Ínu Yakob lóyɔ Egyipte. Ínú mua anɪ anáin amu bowu ní. ¹⁶Nfí tsɔtsɔɔtsɔ ɔma a, bɔpu amúɔ́ aku afúli ya Sekem. Wúlu anfitɔ Abraham légyankpá tsíá ní. Bopolá amú ulán kuá Abraham lópu kóba hɔ tsu oyin ɔkuá butetí mu Hamor abí wátɔ.

¹⁷“Nke ámú Bulu léhie Abraham amu lotsutsúa ibɔfun a, anɪ anáin amu bakléí wá Egyipte ɔmátɔ. ¹⁸ɔma a, Egyipte owíé ɔkuá ɔmebi Yosef lébetsiá obíá ámusu. ¹⁹Owíé anfi lówa owuntɔlin anɪ anáin amusu. ɔleka amú híé ɔbéé, butswí amú abi ɔɔbwe tsalífwi abuwu. ²⁰Alɪ bré ámutɔ bɔkwí Mose ni. Ogyi obí ání ɔhíé ɔbu akíle, Bulu ansí legyi mu iwɪ. Mu yin léyai mu tsra asa mu si wóyítɔ. ²¹Bréá bele mu mu wóyítɔ a, Farao mu bi tsíhé lótsu mu, pú mu bwé mu bi alɪ, ɔledan. ²²Egyptefɔ bosuná Mose amú amándíé kugyíku. ɔɔbwe ɔha kpɔnkpɔntɪ mu utí pú mu bwehétɔ.

²³“Bréá Mose lóhɔ nfí adwana (40) á, ɔɔbwe agywun ɔbéé, móyɔ yéku alá Egyptefɔ bɔpu buɔe mu apíó Israelfɔ kpa. ²⁴Ínu á, olowun ání Egypteyin dé mu apíó Israelfɔ ámutɔ ɔku da. Mú su ɔɔyɔ ɔyɔhɔ mu pio ámú ɪde mu dún amu, ilemlí mua Egypteyin amu nyɔ. Ínu ɔleda Egypteyin ámu mɔ. ²⁵Mose mú kɪ ɔbéé, íbɔwankí mu apíó Israelfɔ ání Bulu dépu mu hɔ amú nkpa, táme unɔwankí amú. ²⁶Mú ɔyi kehe a, olowun Israelfɔ abanyɔ buɔekɔ. ɔɔyɔ ɔyékpátá amú, ɔlebláa amú ɔbéé, ‘Mlɪkɪ, apíó mlɪgyí. Ntogyi sù mlɪ wulewule mlɪdé aba amumuyɔ wa?’ ²⁷Táme ɔmuamú ɔɔe mu ba da ámu lówutá Mose sísí, fíté mu ɔbéé, ‘Ma lówa fú ɔbéé fubégyi anɪsu, afugyi anɪ nsuné asún? ²⁸Fudekléá fómɔ mí, fé alɪ ámú ɪgye fómɔ Egypteyin amu lóó?’ ²⁹Mose lénya nú asún áni alɪ, ɔlesrí dalɪ Egyipte ɔmátɔ yɔ Midiafɔ ɔsulósu. Oletsíá unu kwí abi anyɔ.

30“Nfí advana ɔma a, Bulu-ɔɔɔpu léle iwɪ ɔwan súná Mose dimbísú oyíbi kuá ibu awu, ogyá detsíí mótótó, mantáa Sinaibu. 31 Mose lówun mú á, ulɔwa mu ifú. Bréá ɔɔɔkpukpé ɔyó yéku mú wankláán á, Bulu lébláa mu ɔbéé, 32‘Mígyí fú anáin Abraham, Isak pú Yakob Bulu.’ Mose lénya ifú, ɔɔɔkpunkí kpakpakpakpa. Mú su ɔmetalí ki mú. 33 Aní Wíe Bulu lébláa mu ɔbéé, ‘Wɔi fú ntukuta tswi, tsúfé ɔtíné ánfɪ fulú ánfɪ igyi ɔtine wankíhé. 34 Nawun ání mí ahá bude iwɔɔsin wúun Egyipte ɔsulúsu. Nanú amú isú. Mú su nakplí nebá ɔɔɔ amú. Ba, anwa fú Egyipte.’

35“Mose anfí Israelfɔ bekiná Egyipte ɔmátó, fíté mu bæ, ‘Ma lówa fú ɔbéé fubégyi anɔsu, afɔgyi anɪ nsuné asún?’ ní. Mose anfi kén Bulu léha ɔbéé, ɔbwéé anɪ anáin amúsú ogyípú pú amú ɔlepú ní. Bulu lówa mu sumbí ánfɪ tsɔn Bulu-ɔɔɔpu amúbú ɔlele iwɪ súná mu ogya plenplentɔ ámusu. 36 Mu kén gyí ɔhá ání ɔlekpa amú dali Egyipte, bwé ofúla pú osúna tsɔtsɔɔtsɔ Egyipte ɔsulúsu, ɔpu Pepe amu ɔnó pú dimbí ámusu nfí advana (40) kéké ní. 37 Mu kén lébláa Israelfɔ ámu ɔbéé, ‘Bulu ɔbéle mu ɔnósú ɔtɔípú ɔkuá ogyi fé mí tsú mlɔtɔ há mli’ ní. 38 Bréá mua Israelfɔ ámu befia dimbí ámusu á, Mose anfɔsu Bulu-ɔɔɔpu amu lótɔi tsɔn Sinaibu ámusu há anɪ anáin amu ni. Mu kénsú Bulu lópu mu nkpa asún ámu tsɔn, ide anɪ é tu ní.

39“Táme anɪ anáin bumobu mu. Bekiná mu asún nu. Amú nkɔle su mú á, tekɪ butráa bubu Egyipte ɔmátó. 40 Ínɪ su bebláa *Aaron bæ, ɔyáɪ ikpi ání békpa amú ha amú. Tsúfé bumeyín tɔá ulabwé Mose amúbú ɔlekpa amú tsú Egyipte amu. 41 Alɪ bré ámutɔ á, beblí sika pepe ɔnantswiebí púbwé ɔkpi, tsíá há mú igyí. Amú ansí legyi amú ibu ɔnó itɔ bwehé ánfɪ iwɪ. 42 Bulu lési amú asún, ɔɔɔɔ bude owí múa ɔtsra pú ntsrakpabi tswéé. Fé alá ɔɔwanlín wá Bulu ɔnósú atɔípú amu ɔwulótó bæ,

‘Israelfɔ! Megyí mí mlulómɔ mbwɪ bɔ afɔɔɔie há
nfí advana (40) amúbú mlulétsiá dimbí ámusu.

43 Mboún ɔkpi Molok tati-obu
pú Refan ntsrakpabi ɔkpi

mlilóbwe súra, náti tswε.

Íni su négya mli yówa *Babilonfɔ ɔsulúv ɔma
ɔtineku.’

44“*Tati-obu ámúb itosúná amú ání Bulu bu amú wá ámu é letsiá anɪ anáin amu wá dimbí ámusu. Mose lóbwe múb aliá Bulu lósuná mu ɔbéε, ɔbwéε múb pépéépé. 45Anɪ anáin amu bowu sí Bulu *tati-obu ámu há anɪ así, *Yosua légya amú nkpá bɔpuba ɔsulúv anɪsu. Amú onutó ansító Bulu légya ɔmá-ɔmá lé ɔsulúv anɪsu púhá amú. Bulu tati-obu ámu letsiá amú wá alu ɔɔtu Owíε *Dawid brésú. 46Bulu ansí legyi Owíε Dawid iwɪ. Múb su Dawid lókulí mu ɔbéε, muyíi obu ha mu, ménɪ anɪ Yakob abí-aná féé abósum mu unu. 47Támε Owíε *Salomo mboún lébeyi obu ámu.

48“Támε Ɔsúsúbú Bulu tamatsiá nyankpusa obu yihεɔ. Fé aliá Bulu ɔnósú ɔɔɔpú ɔku léblí ɔbéε,

49‘Anɪ Wíε Bulu ɔbéε, “Ɔsúsú gyí mí owíε obíá,
ɔsulúv é igyi mí ayabi oyíkpa.

Ntɔ obu mlaa mléyi ha mí?

Nkúnu gyí mí ɔkpúnú ɔdakpá?

50Megyi mí lóbwe ntobí ánfɪ féé?” ’ ”

51Stefano lómɔ mu asún ɔnó ɔbéε, “Asutɔ-ɔnlɪn awíε, klɔntɔ bu mli odwin. Mlɪlakíná Bulu asún ámu nu. Mli é mlɪtɔkúsú líí Ɔɣε Wankíhé amu asúnú brégyíbré, fé aliá mli anáin amu betsiá bwé. 52Bulu ɔnósú ɔɔɔpú ɔmɔmsú mli anáin bumedɪnká? Bɔmɔ Bulu ɔnósú atɔɔpú amúb beblí yái beε, Yilé Ɔbwεpú ámu ɔbéba amu é. Mlɪléle Yilé Ɔbwεpú ámu há, bɔmɔ mu. 53Mlɪlɔhɔ Mose mbla ámu tsú Bulu-abɔpu ámu wá ní, támε mlɪmégyi músú.”

Stefano Abwi Da Mó

54Bréá Yudafɔ ahandε amu bonu Stefano asun blíhé anɪ á, ɔbló lehɪε kítá amú, beda ansító kpun. 55Támε Ɔɣε Wankíhé lóbulá Stefanotɔ, olotsu ansí fúá, ɔde ɔsúsú kí. Olowun Bulu numnyam, Yesu líí Bulu gyɔpɪsu. 56Múb ɔlebláa amú ɔbéε, “Mlɪkɪ, nawun ání ɔsúsú lafínkí, Nyankpusa-Mu-Bi ámu líí Bulu gyɔpɪsu.”

⁵⁷Bréá bonu íni á, bɔpu ibi tin asu. Inu amú fée bɔsura okitikiti tú bun musu, ⁵⁸bebutía mu dali wúlu amuto beyéda mu abwi mʼ. Adansɔfɔ ámu bɔwɔí amú awunso atadie tswi ɔyasubi ɔkuá butetí mu Saulo wá. ⁵⁹Bude mu abwi da alu, olokpólí aní Wíe ɔbéé, “Mí Wíe Yesu, hɔ mí ɔhé.” ⁶⁰Inu á, ɔleɔa akpawunu, kplón kuklókúú ɔbéé, “Mí Wíe, si lakpan ánfɔ kie amú.” Olenya blí alɔ pé, olomu ɔnɔ.

8 ¹Saulo é lótsulá dínká Stefano mɔsu.

Saulo ɔpasua Ámusu Dínká

Tsú eke ámusu á, bedínká ɔpasua ámúú ibu Yerusalem amusu, wá amú mɔ bi. Mú su ɔpasua ámu fée bedasáin wá Yudea pú Samaria ɔmátʼ, sí *sumbí ayɔpú ámu nkule pé wá inu. ²Táme Bulu asúmpú aku bosu Stefano, bun mu.

³Saulo mú léfi ɔpasua ámu bwie asɔ. Oletsiá kí ahá wóyítʼ, bítía ahógyipu atsi múa ayin fée yówa obu.

Filipo Bulu Asún ɔkanda Samaria Wúluto

⁴Ahógyipu amu beda Bulu *asun wankláán ámu ɔkan ɔtínegyíótíné ání bedasáin yó. ⁵Mú su Filipo lóyɔ *Samaria wúlu yilé kutɔ yébláa amú Kristo, (ɔhá ámúú Bulu ladá mu ofúli amu) iwɔ asun wankláán ámu. ⁶Afiapu amu fée bonu mu asun blíhé, bowun osúna ání ɔɔbwé é. Mú su bɔhɔ mu asún ámu. ⁷*ɔhe laláhe lósurá okitikiti dálɔ ahá tsɔtsɔtsɔ. Ahá ání amú ífún lawú pú tsukule asínpu tsɔtsɔtsɔ é benya ulɔtsá. ⁸Mú su ansí lehie gyi Samariafɔ ámu.

⁹Alɔ bré ámutɔ á, ɔfápú kpɔkpɔntɔ ɔkuá butetí mu Simon bu wúlu amuto. Bréá Filipo mʼkúba inu á, ɔɔbwé túmila súná mu pi amu, itɔwá amú ifú. ɔɔpú ibi sí kántʼ blí ɔbéé, otúmípu kpɔkpɔntɔ mugyi. ¹⁰Nyebí ahande fée butobú mu, blí beé, “Oyin ánfɔ dé Bulu túmi kpɔkpɔntɔ ámu.” ¹¹Íniá ɔɔepu mu asuma bwé ofúla suná amú, ulawá ɔpá su á, amú fée bɔhɔ mu gyi. ¹²Táme bréá Filipo léba beda *Bulu iwíegyí pú Yesu Kristo iwɔ asun wankláán ámu ɔkan a, atsi múa ayin bɔhɔ mu asún ámusu gyi, ɔɔbɔ amú *asú. ¹³Simon onutó é lóhgyi, ɔleha Filipo lóɔbɔ mu asú. Mu asúɔ ɔma a,

ɔɔɔɔ ɔwɔ mantáa Filipino. Bréá olowun alá Filipino dé ofúla múa osúna bwe á, ɔnɔ lobwie mu.

14 Sumbí ayɔɔɔpú ámúú bubu Yerusalem amu bonu ání Samariafo baho Bulu asún ámu. Mú su bɔwa Petro mua Yohane amú wá. 15 Bréá boyówie ɔnu á, bɔbɔ mpái há Samariafo ahógyipu amu bæ, bunyáa ɔɔɔe Wankíhé. 16 Tsúfé asú keke babɔ amú anɔ Wíe Yesu dátɔ, táme amúú ɔkuku mókúnyá ɔɔɔe Wankíhé amu. 17 ɔnu Petro mua Yohane bɔpu ɔbi dínká amú nwunsv, Bulu léha amú ɔɔɔe Wankíhé amu.

18 Simon lówun ání ɔbi keke sumbí ayɔɔɔpú amu bapú dínká ahógyipu amu nwunsv, Bulu lahá amú ɔɔɔe Wankíhé. Mú su ɔlele kɔba há Petro mua Yohane, 19 ɔlebláa amú ɔbé, “Mliha mí túmi ání kɔ, méni ní mí é nɔpú ɔbi dínká ɔku nwunsv á, Bulu ɔbéha mu ɔɔɔe Wankíhé.”

20 Táme Petro lébláa mu ɔbé, “Fúá fú kɔba ámu nɔɔ féé mlihi. Tsúfé fuku fæ, fétalí pú kɔba ho Bulu itokiehé ání. 21 Fuma ogyíkpa ntée olúkpa anɔ gyumagihe anfitɔ, tsúfé fú kluntɔ metun Bulu ansítɔ. 22 Damli kluntɔ tsu fú lakpan ání, afukuli anɔ Wíe Bulu. Fíalɔ obési agywun laláhe anfi fabwé ání kíé fú. 23 Tsúfé nawun ání fuhíé fúbu ɔnsɔɔe, lakpan lagyi fusu.”

24 Simon lébláa Petro mua Yohane ɔbé, “Nobwíí ɔpa, mlukokoli ml Wíe Bulu ha mu, méni ɔméha asún ání fablí ání, kuku méeba musu.”

25 Bréá Petro mua Yohane begyi adánsɔ, dá Yesu ɔwɔ asún ámu ɔkan tá á, beyinkí yɔ Yerusalem. Bréá buna bɔyɔ á, beda asun wankláán ámu ɔkan Samaria nkuda tsɔtsɔtsɔ asi.

Etiopia Owíe Sikasu ɔkípu Kluntɔdamlí

26 Alɔ bré ámutɔ á, Bulu-ɔbɔpu lébláa Filipino ɔbé, “Kusu pu ɔsaasí *dimbísú ɔkpa ámúú ɔda tsu Yerusalem yɔ Gasa amu.” 27 Múú Filipino lókusú pú ɔkpa. Bréá yɔ á, ɔɔɔɔ Etiopia ɔmá ɔhande ɔkúá baflo mu. ɔhande amu gyí Etiopia owíe tsíhé Kandake sikasu ɔkípu. Oyin ání layɔ Yerusalem yósum Bulu, 28 yínkí yɔ wóyí, otsie mu kekétɔ, mpɔnkɔ bude mu butí. ɔde Bulu ɔnɔsú ɔɔɔpú *Yesaia ɔwulú ámu kláa.

29Múú Úḡe Wankíhé lébláa Filipino ɔ́bée, “Kpukpe manta keké ánfí.” 30Filipo lésrí tú keké ámu wun ání Bulu ɔ́nósú ɔ́tɔ́pú *Yesaia ɔ́wulú ámu oyin ámu dé kláa. Mú su ɔ́lefíté mu ɔ́bée, “Ohande, fude asún ámúú fudekláa amu asu nu?”

31Ohande amu léle mú ɔ́nós ɔ́bée, “Nkálú íbɔ́bwe nónu mú asu ní ɔ́ku méle mú asu súná mí?” Mú su ɔ́lebláa Filipino ɔ́bée, “Du tsia mí wá ayɔ.” 32Bulu asún ání ɔ́dekláa ɔ́wulú ámutɔ́ gyí:

“Olobwe díín fé kufa ání bapú beya ɔ́mɔ́kpá.

Omobwií mu nnonyo.

Olobwe díín fé alá kufa tɔ́bwé

ní bude mu iwí imi dínkí.

33Bɔ́kpɔ́í mu, bumegyí mu asún ɔ́nɔ́kwalusu.

Ohaa méetalí súná mu abí-aná,

tsúfé beka mu nkpa tin ɔ́sulúv anftsú.”

34Múú ɔ́má ohande amu léfíté Filipino ɔ́bée, “Ma iwí asún Bulu ɔ́nósú ɔ́tɔ́pú anfi déblí, mu onutó ntée oha bambá?”

35Inu Filipino lélú Yesaia asun wanlínhé anftsú bláa mu Yesu iwí asun wankláán ámu. 36-37Bɔ́pu bɔ́yɔ́ á, bɔ́tu ntsu ku. Múú ɔ́má ohande amu léfíté Filipino ɔ́bée, “Ntsu dá a, ntɔ́ létin mí asúbo ɔ́kpa?”^b

38Mú su ɔ́má ohande amu léha mu keké ámu ɔ́bitípú lélú. Mva Filipino bekplí wíé ntsu ámutɔ́, Filipino lóbo mu asú. 39Bréá bedalu ntsu ámutɔ́ á, aní Wíe Úḡé lotsu Filipino náti. ɔ́má ohande amu métrá wun mu, táme ɔ́lɔ́pu ansigyí natí ɔ́yɔ́ wóyí. 40Filipo é léyedalu Asoto wúlutɔ́. Olenatí kí unv awúlusu dá asun wankláán ámu ɔ́kan alu, oloyówie Kaesarea wúlutɔ́.

Saulo Kluntɔ́damlí

(Gyumagyihe 22:6-16; 26:12-18)

9 1-2Alí bré ánfítɔ́ féé á, Saulo mɔ́kúsí Yesu akasípú amu bláa ɔ́bée, mɔ́mɔ́ amú. Mú su ɔ́lɔ́yɔ́ Bulu igyí ɔ́hapú dehen wá yɔ́kulí mu ɔ́bée, ɔ́wánlun ɔ́wulú pule mu suna Damasko

^b 8:37 Múú yéé 37 bu nwulú dada amu akutɔ́: *Filipo lebláa mu ɔ́bée “Ní fahɔ́ Kristo gyi tsú fú uklvn féétɔ́ a, nétalí bɔ́ fú asú.” Olebláa Filipino ɔ́bée, “Ee, nahogyi mbee Yesu Kristo gyi Bulu mu Bi.”*



*Filipo lélu Yesaia asvn wanlínhé anfsu bláa mu
Yesu iwí asvn wankláán ámu. (Gyumagyihe 8:35)*

Yudafɔ *ofiakpa ahande, méni ní mu ibi da oyin ntée ɔtsi ɔku, ɔna aní Wíe ɔkpa ámusu a, mékítá mu, kpá mu ba Yerusalem.

³Saulo lópu ɔkpa ɔyɔ Damasko. Oleta wie tá á, nsainto lekpa ogyá wa mu. ⁴Oledida ɔsolúto kpla. Inu olonu ɔme ku. ɔme amu léfuté mu ɔbéé, “Saulo, Saulo, ntogyi sú fúdin mísú alí?”

⁵Saulo léfuté ɔbéé, “Fú ma ni, mí Wíé?” Múú ɔme amu lébláa mu ɔbéé, “Mí Yesu ni. Mísú fudin ní. ⁶Kusu, afuyu wúluto unu. ɔku obósuná fú tɔá lehián ání fɔbwe.”

⁷Saulo aba ání mua amónyɔ buna besi líí díín. Bonu ɔme amu, táme bumowun ɔhaa. ⁸Saulo lókusu líí. Olobwíí ansíbi, táme ɔmedé atɔ wúun. Mú su bekítá mu ibi, kpá mu ya Damasko wúluto. ⁹Oletsiá nkensá owítɔ omowun atɔ. Omegyí atɔ, omonu tɔto é alí bré ámutɔ.

¹⁰Alí bré ámutɔ á, Yesu ɔkasípú ɔku bu Damasko, butetí mu Anania. Olowun atɔ. Múttɔ á, aní Wíe Yesu lókpólí mu ɔbéé, “Anania!”

Olotsulá ɔ́bée, “Mí Wíé, mí ní.”

¹¹Mú aní Wíé lébláa mu ɔ́bée, “Kusu, yɔ́ brɔ́nu á múbú butetí mú ‘Ɖkpa Tswííhé’ amusu. Wie Yuda wóyítɔ́, afufite oyin á múbú otsú Tarso, butetí mu Saulo amusu. Alaba, ɔ́bu unu ɔ́de mpái bɔ́. ¹²Alawun á ní oyin ɔ́kúá butetí mu Anania laba bɔ́pu ibi dínká musu, mu ansíbi labwíí.”

¹³Mú Anania lébláa aní Wíé ɔ́bée, “Mí Wíé, nanú oyin á nfi iwí asún. Alá ɔ́depu lalahe gyi fú ahá á ní bubu Yerusalem. ¹⁴Igyí ahapú dehen amu é bahá mu túmi bée, ɔ́bá Damasko bekítá ahá á ní butɔ́bɔ́ mpái fú dátɔ́ fée.”

¹⁵Aní Wíé lébláa mu ɔ́bée, “Yɔ́, mílalé mu mbée, ɔ́bwée mí osúmpú, ɔ́ha ɔ́má bámbátɔ́fɔ́, amú awíe pú Israelfɔ́ fée abubi mí. ¹⁶Mí onutó nósuná mu alá ɔ́bókuku wun ipian mí su.”

¹⁷Mú su Anania lóyɔ́ Yuda wóyítɔ́, yópu ibi dínká Saulosu, bláa mu ɔ́bée “Opíó Saulo, aní Wíé Yesu amúbú ɔ́lele iwí ɔ́wan súná fú bré á múbú febá nfi á mu lává mí fú wá. Ɖbée, mbeha fú afulawun atɔ́, Ɖɔ́e Wankíhé ɔ́bula fútɔ́.” ¹⁸Tɔ́kúá igyi fé klemetí afwí lémain lé mu ansíbisu kpádá ununu. Mú su ɔ́lela ɔ́de atɔ́ wúun. Inu ɔ́ɔ́kusú, bɔ́bɔ́ mu asú. ¹⁹Beha mu atɔ́ olegyi, ɔ́wunlín lelawíe mu.

Saulo Bulu Asún Ɖkanda Damasko

Saulo létsiá akasípú amu wá nke kpalobí. ²⁰Inunu ɔ́lenatí yó amú ofiakpa, yéfi Yesu iwí asún ɔ́kan da asi ɔ́bée, “Yesu gyí Bulu mu bi á mu ní.”

²¹Ahá á ní bonu mu asun blíhé anfi fée ɔ́nɔ́ lobwie amú. Mú su befité bée, “Megyí mudé Yesu asúmpú mɔ́ Yerusalem ní? Megyí amú ɔ́kutákpá ɔ́leba nfi, ɔ́kpa amú ya igyí ahapú dehen amú?”

²²Táme Saulo lélanyá túmi blí asún á mu ɔ́wunlínɔ́ ɔ́bée, lélé Yesu gyí Kristo, (ɔ́há á múbú Bulu ladá mu ofúli amu). Alá ɔ́lehie lé asún á mutɔ́ leha Yudafo á ní bubu Damasko unu bɔ́bwe basaa. Bumowun múá bótsu.

²³Nke tsɔ́tsɔ́tsɔ́ ɔ́ma a, Yudafo á mu befia kítá agywun bée bó mɔ́ Saulo. ²⁴Mú su betsiá gyo wúlu amu ɔ́nɔ́ ɔ́pa onyé, méni bénya mu mɔ́ mu. Táme aku bowi tsá Saulosu bée, alá

Yudafɔ ámu babwé agywun ní. ²⁵Mú su eke ɔku onyé á, Saulo abúopu amutɔ aku botsu mu wá lakpátɔ, pú mu tɔun ikwitɔ kplí mu yi iban ɔma, ɔlesrí nátlí.

Saulo Yerusalem Yo

²⁶Bréá Saulo lówie Yerusalem a, ɔlɔtsun ɔkpa kugyíkusu ání obówie Yesu akasípú amutɔ. Táme bumohogyi ání alabwé ɔkasípú. Mó su benya mu ifú. ²⁷lɔu Barnaba lékpa mu ya, yéle mu súná *sumbí ayɔpú amu. ɔlebláa amú alíá aní Wíe léle iwí ɔwan súná Saulo Damasko ɔkpatɔ, mu Yesunyo batóí; pú alíá Saulo lówa klɔn dá Bulu asún ámu ɔkan ɔwonlínú Yesu dátɔ Damasko wúlutɔ. ²⁸Mú su Saulo lówie amótɔ, beki Yerusalem wúlutɔ. ɔlɔwa klɔn blí Bulu asún ámu Yesu dátɔ. ²⁹Muá Yudafɔ ámúbú buteblí Griiki ɔblí amu betsiá tóí, gyi aba nwéen. Táme alí bré ámutɔ fée á, bude agywun bwe ání bómu mu. ³⁰Bréá mú afú lɔwulí ahógyipu amu a, bekpá mu yáa Kaesarea, há mu ɔlenatí yó Tarso.

³¹Mú su iwí lolwií ɔpasua ání bu Yudea, Galilea pú Samaria ɔmátɔ. ɔɲe Wankíhé lékpa amú bekleí, dan hógyitɔ, betsiá tsiátóá ilegyi aní Wíe Yesu ansí.

Aha Aku lɔ Tsa

³²Petro lénatí ki Samaria nkudasi. Eke ɔku ɔleyéki Bulu ahá ání bubu Lida wúlutɔ. ³³lɔu á, oleyéfiá oyin ɔkuá butetí mu Enea, olesin tsukule nfikwe ní. ³⁴Petro lébláa mu ɔbée, “Enea, Yesu Kristo latsá fú ulɔ. Kusv kunta fú ɔklan.” lɔu Enea lókusú. ³⁵Ahá ání butsie Lida wúlutɔ pú Saron nsáuntu fée bowun oyin ámu. Mó su bohogyi, bobuo aní Wíe.

³⁶ɔtsi ɔku bu Yopa wúlutɔ, ogyi ɔkasípú. Butetí mu Tabita. Mu dá ámu asi Griiki ɔblítɔ gyí, “Dorka.” Mó asi gyí, “Abre.” Yilé ɔbwepú ogyi. ɔbu awitɔle há ahiánfɔ. ³⁷Bréá Petro bu Lida a, ulɔ lɔda Tabitasv. Olowu, bebie mu ntsu, sí mu tswi abansúru kutɔ. ³⁸Yopa múa Lida awúlu umafɔ aba wá. Mó su bréá akasípú amúbú bubu Yopa amu bonu lowu ánfí á, ɔbwa abi anyɔ sísí Petro bée, bobwíí ipa há mu,

ɔwáa ɔsa tu amú. ³⁹ɛnu Petro lówa ɔsa bwé, múa amúnɔ benatí. Bréá olobowie unu á, bekpa mu ya abansúru amuto. Wúlu amuto asurapu féé bubu fúli amu asi. Bekpa pútá Petro budesú, bude atadiéá Dorka lóbwe bréá otsie nkpa pusúná mu. ⁴⁰Petro légya asurapu amu féé lé obu ámuto. Múú ɔleda akpawunu b́ mpát, asa ɔledamlí kɪ fúli amu blí ɔbéé, “Tabita, kusv.” ɛnu Tabita lóbwií ansíbi. Bréá olowun Petro a, ɔɔkusú tsíá. ⁴¹ɛnu Petro lékitá mu bi, ɔɔkusú líí. Petro létu asurapu amu pú ahógyipu atráhe amu. Múú ɔɔpu Tabita súná amú ání alatsínkí. ⁴²Asún ánífí lekkléí wá Yopa wúluto. Mú su ahá tsɔtsɔɔtsɔ bɔhɔ aní Wíe gyi. ⁴³Petro létsiá Simon ání ɔɔyɔ́ ɔwulú-kpákpá iwí agyúmá wá Yopa unu wá ɔpá.

Konelio Abí Wa Petro Wá

10 ¹Oyin ɔku létsiá Kaesarea unu, butetí mu Konelio. Ogyi Romafɔ isá akɔpú ɔpasua kuá butetí mú Italia ɔhande. ²ɔbu nsi Bulusúm iwí. Mva mu wóyítɔ́fɔ féé butosúm Bulu. Konelio tekíé Yudafɔ ahiánfɔ atɔ́. ɔɔɔb́ mpái há Bulu brégyíbré. ³Eké ɔku Konelio lówun atɔ́ ntúpwe ɔɔsatɔ. Mu atowunhe amuto á, olowun Bulu-ɔɔpu ansí káín, Bulu-ɔɔpu amu lókpólí mu ɔbéé, “Konelio!”

⁴Ifú lekítá mu. Mú su olesi ɔde Bulu-ɔɔpu amu kí. Múú ɔlefíté Bulu-ɔɔpu amu ɔbéé, “Mí Wíé, nkálí igyi?”

Bulu-ɔɔpu amu lébláa mu ɔbéé, “Bulu laho fú mpái. Fú ahá atɔ́ kie é lagyi mu ansí. ⁵Wa abí abuyɔ́ Yopa yetí Simon Petro ba. ⁶ɔɔyɔ́swíí ɔwulú-kpákpá iwí agyúmá ɔyɔpú Simon wóyítɔ́, mantáa ɔpu ɔnɔ́.” ⁷Bréá Bulu-ɔɔpu amu lénatí á, Konelio létu mu asúmpú abanyɔ́ ání bubu mu wóyítɔ́ pú mu ɔbɔsvfe ání ogyi isá ɔkɔpú, otenyá Bulu ifú. ⁸ɔlebláa amú asún ání ulaba féé, ɔɔwa amú sísí Yopa.

⁹Mú ɔyi kéhe bɔkusú ɔyɔ́ Yopa. Beta unu wie tá á, ɔbɔbwe fé ɔpa dódúanyɔɔ. Petro é dédu ɔyɔ́ obu awunso mpái ɔɔkpá. ¹⁰Akún thíé de mu. Mú su olekle ání obénya tɔku wá ɔnɔ́. Bréá bude atɔ́ ámu núná há mu a, Petro lówun atɔ́. ¹¹Atowunhe amuto á, olowun ání ɔsúsú lafínkí,

tɔkɔvá igyi fé ɔhráda téíhéhé, buɗe mu nsiebí ana, ɔdekplí íbá ɔsulósu. ¹²Ɔyítɔ mbwi ɔtsan-ɔtsan, mbwíá bubu ayín, táme buteká abɔɔɔ pú ɔyítɔ mbubwi féé bubu ɔhráda ámuɔ. ¹³Múú olonu ɔme ku léɗalu ɔbéé, “Petro, kusu mɔ mbwi ánfí afuwí.”

¹⁴Táme Petro léle mú ɔnɔ ɔbéé, “Ó-o! Mí Wíé, bɔkwí mí ɔpá á, mmɔkúgyi tɔá Yudafɔ amándíé lekisí ntée mú *ɔwí metn kí.”

¹⁵Ɔme amu léla bláa mu ɔbéé, “Máti tɔá Bulu latin mú ɔwí atokisíhéhé.” ¹⁶Atowunhe amu pú ɔme amu léba tse sa. Mu ansítɔ unu á, botsu ɔhráda ámu ya ɔsúsú ɔsáwule pé.

¹⁷Bréá Petro dé nwuntɔ bu tsú atowunhe anfi ɔwí á, Konelio abí ámu é bafíté wun Simon wóyítɔ, ba bulí ɔkpa ɔnɔ. ¹⁸Konelio abí ámu bokpolí fíté beé, “Ɖfɔɔ ɔku tsie nfi, butetí mu Simon Petro?”

¹⁹Petro trá ɔɗe nwuntɔ bu tsú atowunhe amu ɔwí, Ɖhe Wankíhéhé lébláa mu ɔbéé, “Simon, ahá abasá aku baba buɗe fú dunká. ²⁰Kusu bwe, afukpli yefia amú amlinatu. Mágyi nwéén, tsúfé mílawá amú fú wá.” ²¹Unu Petro lékplí yótu amú, bláa amú ɔbéé, “Mígyí ɔhá ámúú mlíɗédunká ámu ni. Ntogyi sù mliná?”

²²Ahá ámu bele mú ɔnɔ beé, “Anumédé tsitsa. Isá akɔpú ɔhande Konelio ání otenyá Bulu ifú, Yudafɔ féé butetí mu ɔdayilé lówa aní fú wá. Bulu-ɔbɔpu ɔku labébláa mu ɔbéé, ɔbá betí fú afuba mu wóyítɔ, méni obónu asún ání fúbu blí.” ²³Múú Petro lékpa amú wá wóyítɔ, ɔleha amú ɔdikpa.

Ɔyi kehe a, Petro mua amúnyɔ bɔkúsú pú ɔkpa bɔyɔ Kaesarea. Bréá bɔyɔ á, ahógyipu akvá bubu Yopa unu é bobuo amú yó. ²⁴Mú ɔyi kehe a, boyówie Kaesarea wúlutu. Botsutsúa abowie unu á, Konelio latí mu wóyítɔ ahá pú mu anyawíe kláklá befia, ɔɗe amú ɔkpa kí. ²⁵Bréá Petro lówie wóyí ámu ɔnɔ á, Konelio lókúsú yéfia mu, dá akpawunu mu ayabitɔ súm mu. ²⁶Táme Petro léha mu ɔlɔkúsú. Ɖlebláa Konelio ɔbéé, “Kusu, máda akpawunu há mí. Nyankpusa mí é ngyi.” ²⁷Petro mua munyɔ buna buɗetɔí alu olowie wóyítɔ. Unu olowun ání ahá tsɔtsɔtsɔ bafia. ²⁸Múú ɔlebláa

amú ɔ́bée, “Mli onutó mliyin ání Yudafo mbla meha ɔ́kpa ání Yudayin mua ɔ́má bámbátɔ́yin bubwée anyawíe ntée ɔ́bɔ́yɔ́ mu wá kpán. Táme Bulu lahá mí nabí ání mmáku mbée ɔ́ku *ɪwɪ metɪn ntée ɔ́mɔ́fɔn amándíé ɔ́kpasu. ²⁹Mú sù bréá fɔ́wa abí féé bubéti mí á, mmɔ́kpɔ́kpɔ́w nwuntɔ́ ní. Amansu igyi? Bla mɪ.”

³⁰Mú Konelio lébláa mu ɔ́bée, “Nde eke náásí, ntúpwe dɔ́sɔ́tɔ́ mbu wóyítɔ́ nde mpái bɔ́. ɔ́tsáwɔ́le pé á, nowun oyin ɔ́ku líí mí ansítɔ́. Oyin ámu lówa atadié futútú. ³¹Oyin ámu lébláa mɪ ɔ́bée, ‘Konelio, Bulu lanú fú mpái. Fú ahá atɔ́ kie é lagyi mu ansí. ³²Mú su wa abí abuyɔ́ Yopa wúlutɔ́ yeti Simon Petro ba. ɔ́wulú-kpákpá ɪwɪ agyómá ɔ́yɔ́pú Simon wóyí ɔ́lɔ́swí. Otsie mantáa ɔ́pu ɔ́nɔ́.’ ³³Mú su ununu nɔ́wa abí sísí fú. Ibu aléá faba. Séi á, anɪ féé anɪlafia Bulu dátɔ́. Anigyó anɪ Wíe asún ání alapóhá fú ɔ́bée, fubláa anɪ.”

Petro Asun Blíhé

³⁴Mú Petro lótsu ɔ́nɔ́ blí ɔ́bée, “Nawun ání lélé Bulu tamaki ɔ́haa ansítɔ́. ³⁵Mboún ɔ́há ání otenyá mu ifú, ɔ́tɔ́bwé yilé asún otekle ɔ́mágyíɔ́mátɔ́. ³⁶Mliyin asun wankláán ání Bulu lópuhá Israelfɔ́. Asún ámu gyí, Bulu lapú iwílwii ba tsun Yesu Kristo, ahá féé Owíe amusu. ³⁷Mliyin asún kpɔ́nkpɔ́ntɪ ání ɪleba Yudea ɔ́mátɔ́ féé. Ilotsu asɪ tsú Galilea ɔ́mátɔ́, bréá Asú ɔ́bɔ́pú Yohane léda *asúbɔ́ ɔ́kan ɔ́ma. ³⁸Mliyin anɪ Wíe Yesu Nasaretyin amu. Mliyin ání Bulu lópu mu ɔ́ɲe Wankíhé pú túmi wá mutɔ́, oleki ɔ́tínegyíɔ́tíné bwé yilé, tsá ahá ání bubu ɔ́bunsám túmi asɪ ɪɔ́, tsúfɛ́ Bulu buo mu. ³⁹Anigyí ahá ání anulówun mu bwehé ání ɔ́lɔ́bwe Yudea pú Yerusalem ɔ́mátɔ́ féé ní. Beda mu mántá *oyikpalíhesu mɔ́ mu. ⁴⁰Táme mú eke sáásí a, Bulu lókusúa mu, lé mu ɔ́wan, ahá bowun mu. ⁴¹Megyí ɔ́yítɔ́ ahá féé lówun mu, táme anɪ ahá ámúbú Bulu léle yáí ɔ́bée, abwée mu adansɪfɔ́ ámu mú anulówun mu. Mu kúsú tsú afúlito ɔ́ma a, anɪa munyɔ́ légyi, anulówɪ ní. ⁴²ɔ́lehɪe anɪ ɔ́bée, adáa mu asun wankláán ámu ɔ́kan suna ahá, agyi mu ɪwɪ adánsɪe ání mgyí ɔ́há ání Bulu laléá obégyi aktankpapu pú awupú féé asún ní. ⁴³Bulu ɔ́nɔ́sú

atɔ́pú amu fée beblí beɛ lélé, ɔhagyíɔha ání ɔlɔɔ Kristo gyi a, Bulu obési mu lakpan fée kíé mu Kristo dátó.”

Ɔmá Bámbásófo Ɖɛ Wankíhé Nya

⁴⁴Bréá Petro dé asún ánfí blí á, Ɖɛ Wankíhé lébá ahá ámú bude mu asún ámu nu ámu féesú. ⁴⁵Ɖnó lobwie Yudafo ahógyipu amú bobuo Petro ba unu ámu ání Bulu lapú mu Ɖɛ Wankíhé amu kíé ahá ání bumegyí Yudafo. ⁴⁶Tsúfé bowun ání ahá ámu bude ɔblí bámbá blí, buhíé bude Bulu kanfú. Mú su Petro lébláa amú ɔbéé, ⁴⁷“Bulu lahá ahá ánfí é Ɖɛ Wankíhé fé aní. Ɖku ɔbétalí tin amú ɔkpa ɔbéé bumáɔ amú asú?” ⁴⁸Mú su ɔleblí ɔbéé, bubó amú asú Yesu Kristo dátó. Mú ɔma a, bokokóli Petro beɛ, otsía amú wá kpalobí.

Petro lwi Asún Ɖnóle Yerusalem

11 ¹Yesu sumbí ayɔpú ámu pú ahógyipu amú bubu Yudea ɔmátó ámu bonu ání ɔmá bámbátófo é baho Bulu asún ámu. ²Mú su bréá Petro lóyo Yerusalem wúluto á, muv ahógyipu akvá butekleá ahá butún *keté asa abowie ɔpasua ámutɔ bebutí asún. Befité mu beɛ, ³“Ntogyi su fayó ahá ání bumetun keté wóyí, fúa amúnyo mlilawá ibi gyi ató?” ⁴Mú su Petro léle asún ání ulebatɔ súná amú ukule-kule ɔbéé, ⁵“Mbu Yopa wúluto nde mpái ɔ nowun ató. Mútó á, nowun ání tɔkwá igyi fé ɔhráda téíhé, bude mú nsiebí ana lékplí tsú ɔsúsú bá mí wá. ⁶Nowun pututo-mbwi pú wúluto mbwi, mbwiá bubu ayín, táme buteká abɔɔ pú ɔyítɔ mbubwi fée ɔhráda ámutɔ. ⁷Unu nonu ɔme ku ledali bláa mi ɔbéé, ‘Petro, kusu ɔ mbwi ánfí afowi.’

⁸“Mú neblí mbée, ‘Mí Wíe, ekekeke. Bɔkwí mí ɔpá á, mmɔkɔgyi tóá Yudafo amándíé lekisi ntée mú *lwi metun ki.’

⁹“Mú ɔme amu lótsu ɔsúsú lábláa mi ɔbéé, ‘Mátu tóá Bulu latun mú lwi atokisíhé.’ ¹⁰Tsesa sún nowun atowunhe anfi. Mú ɔma a, ulelayínkí yó ɔsúsú.

¹¹“Alí bré ámutɔ kén á, ayin abasá akvá ɔwá mí wá tsú Kaesarea baba bulí wóyí ámú ntsie mútó ámu ɔnó. ¹²Ɖɛ

Wankíhé lébláa mi ɔ́bée, mbúo amú yɔ, mmágyi nwéen. Apíó abasié ánfí botsú Yopa anfi é bobuo mi yó Kaesarea, aní fée anúlóyɔ Konelio wóyító. ¹³Konelio lébláa aní ɔ́bée, mowun Bulu-ɔ́ɔpɔ ɔku mu wóyító, ɔlébláa mu ɔ́bée, ‘Wa abí abuyɔ Yopa yeti oyin ɔkúá bɔtetí mu Simon Petro ba. ¹⁴Ɖbébláa fu asún ání fúá fú wóyító ahá fée mlótsun músú nyá nkpa.’

¹⁵“Nenya tsú ɔ́nó ndetóí alí, Ɖɛ Wankíhé léba amúsú fé alíá ɔ́lɛba anísv eke gyankpapu amv. ¹⁶Ínu nekaín aní Wíe asun blíhésu. Ɖbée, ‘Yohane lópu ntsu bó ahá asú. Táme mli mú á, Bulu ɔ́ɔpɔ Ɖɛ Wankíhé bó mli asú.’ ¹⁷Mú sv ní Bulu lapú mu atokiehé ámu kíé amú, fé alíá ɔ́ɔpɔkíé aní ahá amúbú anúlóhɔ aní Wíe Yesu Kristo gyi amv a, mígyí ma ání nétin Bulu ɔ́kpa?”

¹⁸Bréá sumbí ayɔpú ámu bonu asún ánfí á, besi Petro tóí wa, bekanfú Bulu bɛɛ, “Múmú Bulu lahá ahá ání bumegyí Yudafo ɔ́kpa ɔ́bée, amú é budámli kluntɔ, abunya nkpa.”

Kristo Ɖpasua Ání Ibv Antiokia

¹⁹Stefano lowu ɔ́ma a, beɔ́nká ahógyipɔ amúsv. Mú sv beɔ́sáín yó Foinike múa Kipro ɔ́sulúsv pú Antiokia wúluto. Yudafo nkɔɛ bebláa Bulu asun wankláán ámu. ²⁰Táme amótó akv mú botsu Kipro pú Kirene ɔ́mátó ba Antiokia bebláa Griikifo ámu aní Wíe íwɛ asun wankláán ámu. ²¹Aní Wíe Bulu lélí amú ɔ́ma. Mú sv amótó ahá tsɔ́tsɔ́tsɔ bohogyi, dámlí kluntɔ ba aní Wíe Yesu wá.

²²Yerusalem ɔ́pasua ámu bonu asún ánfí. Mú sv bɔ́wa Barnaba sísí Antiokia. ²³⁻²⁴Barnaba gyí ɔ́ha wankláán, Ɖɛ Wankíhé pú hógyi é itsɔ́ mutɔ. Bréá olowie Antiokia, olowun alíá Bulu lagyi amú buale a, ansí legyi mu. Múú ɔ́ɔtɔ́ kplá amú ɔ́bée, bupúv amú klun fée dunka aní Wíe Yesusu, abuyi mu mblasu. Ínu sv ahá tsɔ́tsɔ́tsɔ bɔ́tsun mu asún amúsv hɔ aní Wíe gyi. ²⁵Mú ɔ́ma a, Barnaba lóyɔ Tarso wúluto yóɔ́nká Saulo. ²⁶Bréá olowun mu a, ɔ́lekpa mu ba Antiokia. Betsiá unv ofi ɔ́kɔɛ, tsíá fíá ɔ́pasua ámu, súná amú ató. Antiokia begyankpá tí akasípú amv bɛɛ “Akristofɔ” ní.

²⁷Bulu ɔ́nɔ́sú atɔ́ipú aku botsu Yerusalem ba Antiokia alí bré ámutɔ kén. ²⁸Amútɔ ɔkule dá gyí Agabo. Ɔɔkusú líí, blí Ɔɔe Wankíhé túmitɔ tswi ɔ́bée, “Akún kɔ́nkpɔ́nti ku béba Roma ɔ́mátɔ́ fée.” Uleba mótɔ́ bréá Roma Owíe Klaudio tsie obíású. ²⁹Akasípú amu bɔ́bwe agywun bee, amútɔ́ okugyíɔku obódunká t́sá obénya, abupu yekie apíó ahógyipu ání bubu Yudea ɔ́mátɔ́. ³⁰Begyí dinká ḿsú, bɔ́puhá Barnaba mva Saulo bɔ́puya ɔ́pasua ámu ahande.

Petro Obudi

12 ¹Alí bré ámutɔ́ á, Owíe *Herode lédinká ɔ́pasua ámutɔ́ akusu, wá amú amumuyɔ. ²Ɔleha betun Yohane mu pio Yakobo ɔ́dayítɔ́. ³Herode lówun ání ibu Yudafɔ́ ámu ɔ́dwe. Mú su omesi, ɔ́leyékítá Petro é. Alí bré ámutɔ́ buɔe Israelfɔ́ *Bodobodo Mátúhé *Nke gyí. ⁴Mú su bréá ɔ́lekítá Petro a, ɔ́ɔpu mu tswi obu, ɔ́lele isá akɔ́pú dúasie ɔ́bée, butsíá gyo mu iwí abaná-abaná. Ɔɔbwe agywun ɔ́bée, begyí Nke ámu tá á, mégyí Petro asún dunsu. ⁵Bɔ́wa Petro obu, táme ɔ́pasua ámu bɔ́bɔ́ mpái kínkíínkín há mu.

Petro Obule

⁶Onyé asa ɔ́yí ɔ́bée Owíe Herode ɔ́bée Petro ba dunsu begyí mu asún á, bɔ́wa Petro ikan anyɔ́ kéké, ɔ́da ɔ́ɔɔɔɔɔ isá akɔ́pú abanyó nsiné. Isá akɔ́pú aku é bulí buɔe obu ámu ɔ́nɔ́ gyo. ⁷Ɔ́tsáwule pé á, Bulu-ɔ́bɔ́pu ɔ́ku lébelí amú wá obuto unu, unu fée lówankí. Bulu-ɔ́bɔ́pu amu lópu ibi da Petro abintɔ́, oletsinkí. Ɔ́lebláa Petro ɔ́bée, “Wa ɔ́sa kusu.” Inu ikan amu lówóí lé mu ibi. ⁸Mú Bulu-ɔ́bɔ́pu amu lébláa mu ɔ́bée, “Kusu pu ɔ́fé klí osiétɔ́, afutsu fú ntukuta wa.” Petro lóɔ́bwe. Mú ɔ́letrá bláa Petro ɔ́bée, “Tsu fú ligá wa afuba ayo.” ⁹Petro lóbuo Bulu-ɔ́bɔ́pu amu dáli obu ámutɔ́. Imɔ́wankí Petro ní akíankpatɔ́ ntée atowunhetɔ́ Bulu-ɔ́bɔ́pu amu dé mu asún bláa. ¹⁰Mva Bulu-ɔ́bɔ́pu amu bɔ́tsun obu-ɔ́nɔ́ gyankpapu pú nyɔ́ɔ́si agyópusu. Beba bɔ́tu dátɔ́ uklɔ́n ání f́ɔ́pudáli wie wúlutɔ́. Uklɔ́n amu onutó lefinkí há amú bɔ́tsun. Bɔ́pɔ́tsun brɔ́nu kusu bɔ́yɔ́ á, Bulu-ɔ́bɔ́pu amu lófwi sí Petro.

¹¹Bréá Petro ansító lettú mu a, ɔleblí ɔbéé, “Séi mú nawun ání lélé Bulu lawá mu ɔbɔɔ, alabele mí Owíe Herode ibi pú tśá Yudafo bude ɔkpa kító.”

¹²Íniá Petro lówun mú ali su á, ɔlenatí yó Yohane ání butetráa ti mu Marko mu yin *Maria wóyí. Ali bré ámutɔ á, ahá tsɔtsɔtsɔ bafia unu bude mpái bɔ. ¹³Petro léda amú uklonsu, osúmbi tshé ɔkúá butetí mu Rode lébeki ɔhá ání ogyi. ¹⁴Bréá Rode lébi ání Petro ɔme ni á, ansí lehie gyi mu. Mú su ɔletan obu ámu finkí. Mboún oleyinkí srí yébláa amú ɔbéé, “Petro laba ɔlí obu-ɔnɔ.” ¹⁵Ahá ámu bebláa mu beé, “Fú nwun layintá.” Táme ɔbɔɔ músú, ɔdeblí ɔbéé, “Lélé a.” Mú su bebláa mu beé, “Mómú fíali *Bulu-ɔbɔɔvá ɔteki Petrosu ní.”

¹⁶Ali bré ámutɔ fée á, Petro trá ɔde uklon amusu da. Bréá bɔɔ yéfinkí mú, bowun Petro a, ɔnɔ lobwie amú. ¹⁷Petro lóbwe ibi súná amú ɔbéé bukásu, ɔlebláa amú alí aní Wíe lalé mu obu. ɔlebláa amú ɔbéé, “Mlɔbla Yakobo mua apíó ahógyipu atráhe amu asún ánfí.” Mú ɔlenatí amú wá yó ɔtine bambá á.

¹⁸Bréá ɔyí leke a, isá akɔpú ámu fée begyigyáa, fíté aba beé, “Nkí Petro me?” ¹⁹Owíe Herode léha bodunká Petro ɔtíngyíɔtíne, táme bumowun mu. Mú su ɔleti obu adípúsú akípu amu, fíté amú asún, ɔleha bɔmɔ amú.

Mú ɔma a, ɔlenatí Yudea ɔmátɔ yétsiá Kaesarea wúluto nkensá ku.

Owíe Herode Lowu

²⁰Bré kutɔ á, ɔblɔ lehie kítá Owíe Herode Tiro múa Sidonfo su. Mú su awúlu anyɔ ánfí bele abí beé buyókokóli mu, iwilwii itsia amú nsiné. Tsúfé Owíe Herode ɔmátɔ butenyá atogyihe tsú. Ahá ámu begyankpá yéle asúntɔ súná Owíe Herode wóyísú ɔkípu ɔkúá butetí mu Blasto, olotsulá gya amú nkpá bɔɔ Owíe Herode wá yókokóli mu.

²¹Owíe Herode léhie amú eke. Eke ámu lófun a, ɔlehihie ɔwɔ dáli betsiá mu obiású, bláa amú asún. ²²Ahá ámu bɔkplún blí beé, “Megyí nyankpusa déto, mboún ɔkpi déto

Gyu

o!” ²³ Լոսոս Բուլու-ճօքս Լեճա Իերոճե, այամբի Խօւո մս, օլօւս. Թսիճե յօքս նսնյամ հա Բուլս.

²⁴ Բուլս ասն Լօյո մսս, կլի յո թսիսիսիս.

²⁵ Բարնա մսա Տաւօ Խօյո ամս արյոմա տա Իերսալեմ, Բեքա Իօհանե անի Բուտերաա տի մս Մարկօ Բուօ Իւո յինկի յո Անտիօկա.

Barnaba Mua Saulo Sumbi Wa

13 ¹ Բուլս յոնսս ատիքս քս ատս ասնաքս ակս Բեսիա Անտիօկա յքասա ամսո. Ամոցի: Բարնա, Տիմեօն անի Բուտի մս ՕԲիԲի, Լուկիօ անի օտս Կիրենե յմատ, Մանան անի Բեյաի մսա Գալիլեա յմասս օցիքս *Իերոճեյո թսուլե քս Տաւօ. ² Բրեա *Բեկի յոն, Բուճե ան Վիե սւմ ա, Ըյե Վանկիե Լեբլաա ամս յԲե, “Միլե Բարնա մսա Տաւօ հա մս, Բսյո արյոմա ամսո նետի ամսո մԲե Բսճոյո ամս.”

³ Մս սս Բրեա Բեկի յոն ամս Բո մքաի տա ա, Խօքս ԻԲու ճինկա ամսո նւսնս, սի ամս յքա.

Barnaba Mua Saulo Kipro Ծսլոսս Իո

⁴ Ըյե Վանկիե Լոճա Բարնա մսա Տաւօ սմբի. Խօյո Տելուկիա յւլսո յոտսս նսսս-յիԲի ֆա յո յսլոս կւա ԻԲու նսսս նսնե, Բուտի մս Կիքոսս. ⁵ Բրեա Բուիե յւլս կւա ԻԲու սս, Բուտի մս Տալիսս ա, Խօյո Իսուճո *օֆիքքա յեճա Բուլս ասն ամս յքան. Իօհանե ամսո Բուտերաա տի մս Մարկօ ամս Է ԼոԲուօ ամսո յեճա ամս արյոմա յո.

⁶ Բեճալ Տալիմի յւլսո, Բեճալի Բուիե յսլոս կւա Բուտի մս Քափօսս. Լսս Բեֆիա յֆաքս քքոնքոնտի յքւա Բուտի մս Բար-Իեսս. օցի Իսուճոյն, յոճա աֆսնս յԲե Բուլս յոնսս յոնքս մսցի. ⁷ Մսս նյաւիե ցի սս յմասս օցիքս Տերցիօ Քաւօ. Ըմասս օցիքս անի Լետն անի. Ըլօճա Բեյետի Բարնա մսա Տաւօ Բա մս յոյիտ. Թսիճե օճեկեա մոնս Բուլս ասն. ⁸ Դաճե յֆաքս Բար-Իեսս անի մս ճա ասի ցի, Էլիմա Գրիկի յԲլիտ անի մեհա ամս յքա ԲսԲա յմասս օցիքս ամս Բուլս ասն ամս. Ըլօճո մԲոճի անի յմասս օցիքս ամսո մանս Իեսս Իւո ասն ամս, ֆոճսն յմոճոճո մսս ցի. ⁹ Լսս Ըյե Վանկիե ԼոԲսլա Տաւօ ամսո Բուճե մս տի Քաւօ ամսո, օլեսի յլի յճե յֆաքս ամս

ansító kú. ¹⁰Múú ɔlebláa ɔfápú amu ɔbéé, “Ɖbunsám mu bi, futekísí uto wankláán kugyíku. Fapú ahámlé pú lalahegyí bwé fú agyómá. Mú su fuméesi Bulu ɔɔkwali amu afunuto wa? ¹¹Ki, Bulu ɔbébití fú isu. Fú ansíbi bóbwie. Fuméetrá wun ɔyi keheto owí alu yófun bré ku.”

lnunu Elima ansító loklun mu. Mú su ɔɔwa tatápu bi, ɔde ɔku dunká ɔkita mu oyító. ¹²Bréá ɔmású ogyípú amu lówun tśá ilaba a, ɔɔɔɔ aní Wíe gyi. Aní Wíe ɔwí asún ámúú bude mu suná ámu leha ɔɔ lobwie mu.

Gyu

Barnaba Mva Paulo Antiokia Ání Ibo Pisidia Ɖmátó Yo

¹³Paulo mva mu aba ámu botsu ntsusu-yibi tsú Pafo wúluto yó Perge ání ibu Pamfilia ɔsulúsu. Táme Yohane Marko mú léyinkí amú ɔma tsú unu yó Yerusalem. ¹⁴Bɔkusú tsú Perge yó Antiokia ání ibu Pisidia ɔsulúsu. *Ɖkpúnú ɔdaké á, ɔɔɔ unu Yudafo ofiakpa yétsiá asi. ¹⁵Bekla ató tsú Mose Mbla pú Bulu ɔɔsú atóipú nwlótó ta á, ofiakpa amu ahande ɔɔwa abí beyébláa Paulo aná bee, “Apíó, ní mlidé asvankvá mléblí púwá ahá ánfí ɔwunlín á, ɔkpa da.” ¹⁶Múú Paulo lókusú líí, ɔɔɔwe amú ibi ɔbéé bukásu. Múú ɔlebláa amú ɔbéé, “Apíó Israelfo pú ɔmá bámbásúfá mlitenyá Bulu ifú, mliyaa asu amlunu. ¹⁷Israel Bulu léle aní anáin bwé mu ahá. Ɖleha bekleí bréá bugyi afóó Egipte ɔsulúsu. Ɖɔpu mu túmi kɔɔkɔkɔkɔnti kpá amú dali ɔmá ámutó. ¹⁸Olenya klun kpá amú nfí advana (40) kéké dimbí ámusu. ¹⁹Oleyintá ɔmá asienó kéké Kanaan ɔsulúsu, oleye amú ɔsulúsu amu púbwé siadiɛ há aní anáin. ²⁰Nfí lafana aduenu (450), ɔɔpubwé íni féé há amú.

“Mú ɔma a, ɔleha asún agyípú bekpa amú alu ɔɔtu Bulu ɔɔsú atóipú Samuel. ²¹Bréá bebláa Bulu bee ɔyáí awíe ha amú á, Bulu léyái Kis mu bi Saulo owíe há amú. Saulo otsú Benyamin abusuantó. Olegyi iwíe nfí advana (40). ²²Bréá Bulu lékplí mu a, ɔleha beyái *Dawid obíású há amú. Asún ánfí Bulu léblí tsú mu ɔwí ní. Ɖbéé, ‘Yisai mu bi Dawid gyí ɔhá ání mí klun dun musu, tsúfé ɔɔɔwe tógyítśá nébláa mu mbée ɔbwéé.’

23“Dawid anfi abí-anátó Bulu labele Yesu tsú há Israelfo ɔbéɛ, ɔbwéɛ amú ɔlepú fé alá ɔlehie yáí. 24Asa Yesu lébá a, Asú ɔɔɔpú Yohane légyankpá dá ɔkan súná Israelfo féé ɔbéɛ, budámli kluntɔ, abuha mu ɔɔɔ amú asú. 25Bréá Yohane ɔbá ɔɔɔ mu agyómá ɔnɔ á, ɔlefuté ahá ámu ɔbéɛ, ‘Ma mlidésusúu mlíaa ngyi? Megyí mígyí ɔhá ámú mlidé ɔkpa kíu amu. Mu mú ɔbéba mí ɔma. Mmɔfun ání nɔwɔí mu ntukuta.’

26“Mí apió, *Abraham abí-aná pú ɔmá bámbásúfɔá mlitenyá Bulu ifú, mliyaa asu amlinu. Anígyí ahá ání Bulu lópu nkpahɔɔ asún ámu sísí. 27Yerusalem atsiápú pú amú ahande bumebi ání Yesu gyí ɔlepú. Bumonu Bulu ɔnɔsú atɔípú amu asún ání ɔwanlín tswi asi. Butekla mú ɔkpúnú ɔdaké kugyíku. Táme begyi Yesu asún, há mu ipón, mɔ mu; ileha Bulu ɔnɔsú atɔípú amu asún ání leba mútɔ. 28Bumenya Yesu iwí asún kukvá bélí mósú mɔ mu, táme bebláa Pilato beɛ ɔhá abumɔ mu. 29Mú su bréá ɔɔɔwe tɔá ɔwanlín tsú mu iwí féé tá á, bele mu tsú *oyikpalíhe amusu yópulá mu. 30Táme Bulu lókusúá Yesu tsú afúlitɔ. 31Mú ɔma a, oletsíá le iwí súná ahá ámú mva amónyɔ benatí tsú Galilea yó Yerusalem amu bré tsɔtsɔɔtsɔɔ. Ahá ání gyí ahá ání buɔe mu iwí adánsie gyí suná Israelfo ní.

32-33“Ani mú anidé mli asun wankláán ámu bláa. Múgyí, Bulu labwé tɔ ámú ɔlehie aní anáin amu há amú abí-aná. Amúgyí aní á. Tsúfé alakúsúá Yesu tsú afúlitɔ há aní, fé alá ɔwanlín wá *Israelfo ulu nyɔɔsɔ beɛ,

‘Mí Bí gyí fú.

Nde nabwé fú Sí.’

34Bulu létrá tóí tsú Yesu kusú tsú afúlitɔ pú mu ɔyulúv amúv umɔɔplɔ wá ɔbótɔ ekekekeke ámu iwí ɔbéɛ,

‘Nɔpu mí oyúla wankíhé amúv nehie mbéɛ, ubwé aliágyíalíá

nɔpohá Dawid amu há mli.’

35Owíé Dawid é létrá lawánlín wá Israelfo ulu bámbátɔ ɔbéɛ, ‘Fuméha fú osúmpú wankíhé mɔɔplɔ wá fúli ɔbótɔ.’

³⁶Owíe Dawid lósum Bulu mu nkpatɔ, bwé Bulu apé tá á, olowu, bopulá mu mu anáintɔ, ɔɔɔɔ. ³⁷Táme Yesu anfi Bulu lókvsúá tsu afúlitɔ ánti mú mɔplɔ. ³⁸⁻³⁹Mú su apíó, mluu asún ánti anidé mli bláa anfi asu. Yesu anfi nkulesu mlótsun nya lakpansikié. Mose mbla métalí há amligi asu Bulu ansítɔ. Táme ɔhagyíɔha ání alahɔ Yesu anfi gyi obégyi asu Bulu ansítɔ. ⁴⁰Mú su mliki wankláán, méni asún ámúú Bulu ɔnósú atɔpú beblí tswi amu méeba mliu. ⁴¹Asún ámu gyí,

‘Asún ámu iwá mli

ahá ání mliɔwá Bulu asún nyányáa ifú, amliwu.

Tsúfé ní nde ɔku ɔblí gyuma ání ndegyí mliɔ

kóráá á,

mlumóohogyi.’ ”

⁴²Bréá Paulo mua Barnaba buɔɔɔɔɔɔ Yudafo ofiakpa unu á, ahá ámu ɔkuklí amú beɔ bubá ɔkpúnú ɔɔaké ámúú ubá ámu, abutra ɔɔɔɔ tsu asún ámu iwí suna amú. ⁴³Bréá ahá ámu beɔɔɔ Yudafo ofiakpa unu á, Yudafo tsɔtsɔtsɔ pú ɔmá bámbátɔ abí ání bawíé Yudafo osúmtɔ beklá buo Paulo mua Barnaba. Mú su sumbí ayɔpú ánti ɔɔɔɔ kplá amú beɔ, bupúú ansí dinka Bulu awiɔlesu.

⁴⁴ɔkpúnú ɔɔaké amúú bebláa amú beɔ bubá amu lófun a, ilesi kpalobí teki ahá beta wúlu amuɔ. Amú féé beba Bulu asún onukpá Yudafo ofiakpa unu. ⁴⁵Bréá Yudafo bowun ɔɔɔm amu a, Paulo aná iwí lówa amú olu. Íni su begyi Paulo asun blíhé amu nwéɛn, síá mu. ⁴⁶Táme Paulo mua Barnaba ɔɔwa klun bláa ahá ámu beɔ, “Teki mli lehián ání abégyankpá bláa Bulu asún ánti. Táme íná mlulékiná mú nu, mliɔé mli iwí kí mliáa, mliuméhián nkpa ání utamatá ámu su á, anlayínkí ayɔ ɔmá bámbásúfo wá. ⁴⁷Tsúfé alí Bulu lówa aní ní. ɔbéɛ,

‘Napú fú bwé ɔkandíe há ɔmá bámbásúfo.

ɔyítɔ ahá féé ɔótsun fusu nyá nkpa ání utamatá.’ ”

⁴⁸Bréá ɔmá bámbásúfo ámu bonu asún ánti á, ansí legyi amú, békanfú aní Wíe asún ámu. Inu ahá ánti Bulu lalé ɔbéɛ, bunyáa nkpa ánti utamatá ɔɔɔ asún ámusu gyi.

⁴⁹Ani Wíe asón ámu ilekleí wíe ɔmá ámutɔ ɔtínegyíɔtíne. ⁵⁰Táme Yudafɔ ámu pú atsiá bubu Yudafɔ osúmtɔ, obú bu amósú pú wúlu ahande bɔkúsú líí Paulo mua Barnabas, gya amó lé ɔmá ámutɔ. ⁵¹Sumbí ayɔpú ámu bekpakpáa amú ayabito-isi wúlí amú nwunsu, benatí yó Ikonion wúlutɔ. ⁵²Táme Dɔɛ Wankíhé pú ansigyí lɔbulá Antiokia akasípú amutɔ.

Paulo Mua Barnaba Bulu Asón Blí Ikonion Wúlutɔ

14 ¹Ikonion wúlutɔ é á, alí kén Paulo mua Barnaba bɔɔ Yudafɔ *offiakpa ni. Beblí Bulu asón inu wankláán. Mú su Yudafɔ pú Griikifɔ tsɔtsɔwtsɔ bɔho Yesu gyi. ²Táme Yudafɔ amú bumoogyi amu bɔtɔí wá ɔmátɔfɔ ámu asutɔ, há amú bɔkúsú líí ahógyipu amusu. ³Ifú mekitá Paulo mua Barnaba. Betsiá inu wá ɔpá blí aní Wíe Yesu asón ámu wankláán. Yesu é lélí amú ɔma, su bɔbwe ofúla pú osúna púsúná aní mu awitɔle asón amú budeblí ámu igyi ɔnɔkwali. ⁴Mú su wúlu amutɔ ulɔbɔí anyɔ. Aku bobuo Yudafɔ ámu, aku é bobuo sumbí ayɔpú ámu.

⁵Mú ɔma a, Yudafɔ, ɔmátɔfɔ pú amú ahande bɔbwe agywun bee, bɔwa sumbí ayɔpú ámu iwɔwɔsintɔ, dá amú abwi mɔ. ⁶Sumbí ayɔpú ámu bonu asón anfi. Mú su besrí yó Likaonia awúlu yilé Listra mɔa Derbe pú awúluá ibu mantáa inusu. ⁷Beda asun wankláán ámu ɔkan inu é.

Paulo Mua Barnaba Gyumagyihe Listra Mɔa Derbe

⁸Oyin ɔku létsiá Listra wúlutɔ, bɔkwí mu ibu. ɔmɔkúkúsú líí mu ayabisu ki. ⁹Ubu anfi tsie ɔde Paulo asun blíhé nu. Paulo lési líí ki mu alu, olowun aní alahogyiá Bulu ɔbétalí tsá mu. ¹⁰Mú su ɔkɔplón kuklúkúú blí ɔbéé, “Kusu lu fú ayabi anyɔsu.” Inu oyin ámu lɔkúsú ɔtsáwule pé, wá natí bi. ¹¹Bréá ɔɔm amu bowun tsá Paulo labwé á, bɔkplón blí Likaonia ɔblítɔ bee, “Ukpí ámu badámlí anyánkpúsa kplí ba aní wá.” ¹²Mú su bɔpu amú ɔkpí kpɔnkpɔnti dá tí Barnaba bee, “Seus.” Bɔpu mu ɔtsíámu dá tí Paulo bee, “Hermes,” tsúfé Paulo líí amú ɔnɔ, ɔdetɔí ní. ¹³ɔkpí Seus

otswékpa bu wúlu ɔ́n. Seus igyí ɔ́hapú lóyópu nnantwie pú oyí ntswítswí ba wúlu ɔ́n ɔ́n. Tsúfé mua ɔ́dɔm amu budekléá bótswé sumbí ayɔ́pú ámu.

14Bréá Barnaba mua Paulo bonu t́á bebá ɔ́ɔ́bwe á, bekitá amú atadié bálí. Ilosuná ání bumotsulá dínká itó ámúbú bebá ɔ́ɔ́bwe ámusu. Besrí wíé ɔ́dɔm amuto blí beé, 15“Ntogyi mlidé íni bwe? Aní é anyánkprósa angyí fé mli. Bulu asun wankláán abá bebláa mli, amlisi atɔ́kpan ánti ɔ́magyáa bobuo aní Wíé Bulu ɔ́kpanpapu. Múlɔ́bwe ɔ́sú ḿa asi, ɔ́pu pú ḿt́ ató féé. 16Bímí ámu a, olesi ɔ́kpa há ɔ́mágyíɔ́má ání bubwéé t́á budeklé. 17Táme mú ó á, Bulu ḿkúsí ató wankláán tsɔ́tsɔ́tsɔ́ bwe, púsúná ání mubu ɔ́n. Mutéhá nyankpu totswie, mli ndɔ́tɔ́ ató t́wá alé. Mutéhá mli atogyiye, ɔ́téhá ansí tegyi mli.” 18Paulo aná asun blíhé anfi féé ɔ́ma a, ulɔ́wa ɔ́nlun asa betalí ká ɔ́dɔm amu tin beé, bumátun mbwi wólí amú ayabiasu tswe amú.

19Mú ɔ́ma a, Yudafo aku botsu Antiokia ání ɔ́bu Pisidia ɔ́mát́ pú Ikonion wúluto ba beblí asún pútse ɔ́dɔm amu agywun, ɔ́kúsú líí Paulosu. Beda Paulo abwi, bítia mu dál wúlu amuto. Buki beé alawú, su besi mu tswi. 20Táme bréá akasípú amu beba bobomlí Paulo a, ɔ́kúsú yínkí yó wúlu amuto. Mú ɔ́yi kehe a, mua Barnaba benatí yó Derbe wúluto.

Antiokia Ání ɔ́bu Siria ɔ́mát́ Yinkí Bá

21Paulo mua Barnaba beda asun wankláán ámu ɔ́kan Derbe. Ahá tsɔ́tsɔ́tsɔ́ bedamlí kluntɔ́ mli Yesu akasípú. Múbú belayínkí yó Listra, tsun ɔ́yɔ́ Ikonion alu bebedali Antiokia ání ɔ́bu Pisidia ɔ́mát́. 22Lnu Paulo mua Barnaba ɔ́wa akasípú amu atetɔ́-ɔ́nlun beé, bukíta hógyi amuto. Bebláa amú beé, “Ilehián ání abótswen ipian tsɔ́tsɔ́tsɔ́tɔ́ asa abówie Bulu iwíegyí ámuto.” 23Botó ɔ́pasua kugyíku á, buteklí *ɔ́n b́ mpái, yái ahande há amú, pú amú wá aní Wíé amúbú amú ansí dun musu ámu ɔ́bu.

24Beki Pisidia ɔ́mát́ ɔ́pasua ámusu tá á, beba Pamfilia ɔ́mát́. 25Beda Bulu asun wankláán ámu ɔ́kan Perge wúluto. ɔ́kúsú tsú ɔ́n yó Atalia wúluto. 26Paulo mua Barnaba

Gyu

belatsiá ntsusu-yibito tsú unu bowie Antiokia. Inu gyí otínéá ahógyipu amu begyankpá klí onó bó mpái, ání Bulu owáa awitole ha amú, méni bóyo agyómá ánfí bamó mú onó ánfí ní.

²⁷Bréá bowie Antiokia a, beti opasua ámu féé fia. Bebláa amú alíá Bulu lapú amú gyi gyuma, pú alíá Bulu lahá ahá ání bumegyí Yudafo é baho mu gyi. ²⁸Betsiá akasípú amu wá nke tsotsotsu.

Sumbí Ayopú Pú Opasua Ámu Ifía Yerusalem

15 ¹Bréá Paulo mva Barnaba bubu Antiokia a, ayin aku botsu Yudea omátó ba unu. Bosuná ahógyipu ámúb bumegyí Yudafo ámu ató bee, ní bumokútín *keté Mose mbla onó á, Bulu mócho amú nkpa. ²Paulo mva Barnaba bokusú líí asún ánfisu. Mú su amóba ató asunápú amu begyi mú nwéen kinkíínkín. Inu su beblí bee, bówa Paulo mva Barnaba pú Antiokia ahógyipu amu aku Yerusalem, abuyowun Yesu sumbí ayopú pú unu opasua ahande amu tsú asún ánfí iwí.

³Opasua ámu besi ahá ámu okpa benatí. Bréá boyó á, buna Foenike pú Samaria omátó. Bebláa unfo ámu bee, ahá ání bumegyí Yudafo é badámlí klontó ba Bulu wá. Asún ánfí lehie wá ahógyipu amu féé ansigyí. ⁴Bréá bowie Yerusalem a, opasua ámu, amú ahande pú sumbí ayopú ámu boho amú atúu. Paulo aná bebláa amú tóá Bulu labwé tsun amúsú féé. ⁵Táme ahógyipu amu akvá botsú *Farisifoto bokusú líí blí bee, “Ilehián ání omá bámbásúfo ámu bétun keté, gyi Mose mbla ésú.”

⁶Sumbí ayopú ámu pú opasua ahande amu befia yo asún ánfito. ⁷Bebutí asún ánfí wá opá. Mú oma a, Petro lókusú líí, bláa amú obéé, “Mí apió, mlyin ání tsú bré kutó á, Bulu léle mí tsú mlito obéé, mbláa ahá ání bumegyí Yudafo mu asun wankláán ámu, méni amú é bónu, ho mósú gyí. ⁸Bulu yín nyankpusa klontó. Olpu Oje Wankíhé amu há amú, fé alíá olpohá aní púsúná ání alaho amú. ⁹Olosuná ání bumegyí otsan há aní, tsúfé oleha amú klontó letun bréá amú é bohogyi. ¹⁰Ntogyi su mlidé Bulu sów kí? Ntogyi sú mlidépu

Mose mbla ánfɪ anɪ an anáin anumétalí gyi mósú ánfɪ han akasípú anfi? ¹¹Ekkekke! Anulahogyi ání Bulu ɔbɔtsun anɪ Wíe Yesu awɪtɔlesv hɔ anɪ nkpa fé amú.”

¹²Bréá Petro lɔtɔɪ tá á, afiápv amv féé bɔbwe díín. Múv Paulo mva Barnaba bebláa amú alíá Bulu lɔtsun amósú bwé ofúla pú osúna tsɔtsɔɔtsɔ ahá ámúbú bumegyí Yudafɔ ámvɔ.

¹³Bréá Paulo mva Barnaba bɔtɔɪ tá á, Yakobo lóyɔ mósú ɔbéé, “Apíó, mliyaa asv amlɪnu. ¹⁴Simon Petro labláa anɪ ɔbéé, Bulu légyankpá lé súná ání otekle ahá ámúbú bumegyí Yudafɔ ámv asún. Mú sv ɔlele amútɔ akv bwé mv ahá. ¹⁵Asún ánfɪ pú Bulu ɔnósú atɔɪpú amv asun blíhé labwé kule. Tsúfé bɔwanlín wá Bulu asún ámvɔ bée,

¹⁶‘Bulu ɔbéé. Ínɪ ɔma a, nélatsú *Dawid iwíegyí amúbú ɪladɪda ámv kúsú.

Nélayi mú abuntíi féé,
há mú béli wankláán,

¹⁷méni aha tráhe amv pú amúá bumegyí Yudafɔ, mí dá dɪn amósú féé bódunká míá ngvi amú Wíe, wun mɪ.

¹⁸Alí mí, mli Wíe Buluá nele ínɪ súná tsú bímbí ndeblí ní.’

¹⁹“Ínɪ sv tɔá mí Yakobo ndeblí gyí, mli máha apv asvansv kíklɪ ahá ánfɪ bumegyí Yudafɔ, badámlí klvntɔ ba Bulu wá ánfɪ. ²⁰Mboún mliha awanlɪn ɔwulú bláa amú aniaa, bumágyi atogyiheá bapóhá ɪkpi, tsúfé mú *ɪwɪ metɪn. Bumáwa atsv mva ayin asún. Bumágyi ɔbwɪá ɔɔpusáa mv mós pú obugya. ²¹Tsúfé bímbí ɔpá á, butedá Mose mbla ámv ɔkan wúlugyíwúlutɔ, butekla mú Yudafɔ ofíakpa kugyíku *ɔkpónú ɔdaké é.”

Ɔwulú Pusísí Ahógyipvá Bumegyí Yudafɔ

²²Mú sv sumbí agɔpú ámv, ɔpasua ahande amv pú ɔpasua ámv bɔbwe agywun bée, bele ayin akv tsú amútɔ abubuo Paulo mva Barnaba yɔ Antiokia. Bele Yuda ání butetí mv Barsaba mva Silas. Amú féé bugyi akpapú há ahógyipv amv. ²³Ɔwulú ání ɔɔpvhá amú ɔɔpuyátɔ asún gyí:

“Ahógyipvá mímégyí Yudafo, mlibu Antiokia, Siria pú Kilikia omátó. Mli apíó sumbí ayopú pú opasua ahande dé owuló ánfí wanlín sísí mli.

“Anidé mli itsiá ha.

24“Anulónu ání aní apíó aku botsu anitɔ ba mli wá unu, bɔpu asvanku kíklí mli, púyíntá mli agywun. Animókúwá amú. 25Íni su anulafia, tsúlá ání abéle aha aku abukpa aní apíó adwepú Barnaba mua Paulo ba mli wá. 26Ahá ánfí lásí amú nkpa há aní Wíe Yesu Kristo agyómá ámu su ní. 27Mú su anidé Yuda mua Silas wa aniaa, bupúv ɔnó bebláa mli asún ámúv anulawánlín wá owuló ámutɔ ámu kén. 28Oje Wankíhé lalé súná aní, aní é anulahɔ mú ání uma aleá abópɔ atɔ dwindwín kuku súrá mli, dun mbla ánfí mú iwí dehián anfi. 29Mbla ámu gyí, ‘Mlumágyi atogyiheá bapúhá ikpi. Mlumágyi ɔbwíá bɔpusáa mu mós pú obugya. Mlumáwa atsi mba ayin asún.’

“Ní mlidé mbla ánfísu gyi a, íbɔwa alé há mli. Anulafun nfi.”

30Bɔwanlín owuló ánfí há amú tá á, besi amba sumbí ayopú ámu ɔkpa bɔpuya Antiokia. Boyówie unu tí ahógyipu amu féé fía, pú owuló ámu wá amú íbɔtɔ. 31Bekla owuló ámu a, ansí lehie gyi amú, tsúfé mútɔ asún leha klun lédi amú así. 32Yuda mua Silas, bɔgyi Bulu ɔnósú atópú amu bɔtɔí kplá amú wankláán púwá amú ɔwunlín, wá amú atetɔ-ɔnlun. 33-34Betsiá amú wá nke kpalobí, opasua ámu lési amú ɔkpa iwilwiitɔ, beyinkí yó ahá ámúv bɔwa amú sumbí ámu wá.^c

35Paulo mua Barnaba é betsiá Antiokia unu yófun bré ku. Amba unu ahógyipu amu aku betsiá súná ató, tsíá dá aní Wíe asun wankláán ámu ɔkan.

Paulo Mua Barnaba Abasumáin

36Bré ku ɔma a, Paulo lébláa Barnaba ɔbéé, “Ha ayinkí yɔ awúluá anuladá aní Wíe asun wankláán ámu ɔkan féésú,

^c 15:34 Mótɔ yéé 34 bu nwuló dada amu akutɔ: *Táme Silas mú lɔbwe agywun ání obésin Antiokia unu.*

ayeki alá butsie.” ³⁷Barnaba lékléá békpa Yohane ání butetí mu Marko buo iwi. ³⁸Táme Paulo léblí ɔbé, uma alá Marko obóbuo amú, tsúfé ɔmetrá buo amú abuyɔ Bulu agyómá ámu. Oleyinkí amú ɔma tsú Pamfilia wúluto ɔpá. ³⁹Paulo mu Barnaba beprú asún ánfí kínkíínkín, ileha bemaín abasu. Barnaba lékpa Marko buo iwi, botsu ntsusuyibi yó Kipro ɔmátó. ⁴⁰Paulo é lékpa Silas buo iwi, Antiokia ahógyipu amu bɔpu amú wá Bulu ibito, bɔpu ɔkpa. ⁴¹Paulo lóyɔtsun Siria múa Kilikia ɔmátó; ɔlɔwa ɔpasua ámuú ibubu unu ámu ɔwɔnlín.

Timoteo Léyétstá Paulo Mva Silasto

16 ¹Paulo mu Silas benatí yó Derbe pú Listra. Ohógyipu ɔkúá butetí mu Timoteo bu Listra wúluto unu. Mu yin gyí Yudayin ání ɔlɔɔ Yesu gyi, táme mu si gyí Griikiyin. ²Apíó ání bubu Listra pú Ikonion beti Timoteo idayilé. ³Paulo lékléá ɔbékpa Timoteo náti. Mú su ɔleha betun Timoteo keté, tsúfé Yudafɔ ámuú bubu unu ámu féé buyin ání Griikiyin Timoteo mu si gyí. ⁴Bréá bɔyó á, bowié wúlugyíwúlusu butosúná unu ahógyipu mbla oduá Yesu sumbí ayɔpú ámu pú ɔpasua ahande amúú bubu Yerusalem amu bawá bee bɔgyíi músú. ⁵Íni su ɔpasua ámu benya ɔwɔnlín hógyito, kléi ekekegyíeke.

Paulo Makedonia ɔmátó Yɔ

⁶Paulo mu mu aba ámu bɔtsun Frigia pú Galatia ɔmátó. Tsúfé ɔɔe Wankíhé méha amú ɔkpa ɔbé, budáa Bulu asún ámu ɔkan Asia ɔmátó. ⁷Bréá bowie Misia ɔsulúv ɔka á, bɔbwe agywun bee béyinkí tsun yɔ Bitinia ɔmátó, táme Yesu ɔɔe méha amú ɔkpa. ⁸Mú su bɔtsun Misia ɔsulúsv kplí yó Troa wúluto. ⁹Mú onyé á, Paulo lówun ató. Olowun ání Makedoniayin ɔku líi mu ansító, ɔde mu kokóli ɔbé, “Fa ɔpu amu ba Makedonia, afubegyí aní buale.” ¹⁰Paulo lénya wun ató ámu alí, ulɔwankí mu ání Bulu dé aní wa ɔbé, ayó yeda asun wankláán ámu ɔkan unu. Mú su anlóɔpu ɔkpa yó Makedonia.

Lidia Klɔntɔdamlí Filipi Wúluto

11 Anulówie ntsusu-yibitɔ tsú Troa, fá ɔpu yó Samotrake ɔsulúsu. Mú ɔyi kehe a, anulélatsiá yó Neapoli wúluto. 12 Anulópu ayabitɔ tsú Neapoli yó Filipi wúluto. Filipi gyí Makedonia wúlu yilé ní. Romafɔ búw wúlu anfitɔ. Anulétsiá unu nke kpalobí. 13 Ɔkpúnú ɔdaké á, anulédalɔ wúluto yó ɔpu ɔnɔ ɔtunekvá aníkí aniaa, abówun ɔtínéá Yudafɔ butefia bo mpái. Anulétsiá unu bláa atsi akvá bebefia unu Bulu asón. 14 Atsiá bonu asón ámutɔ ɔkule gyí Lidia. Tiatirayin ogyi, ɔtéfé tatiá mú ntsu lepe, unu bíá. Bulu osúmpú ogyi. Aní Wíe léha mu olonu Paulo asun blíhé amutɔ. 15 Mú su bréá anulóbo mu mu wóyítɔ ahá asú á, olobwií ipa há aní, blí ɔbéé, “Ní mlulahogyi ání nahɔ Yesu gyi a, mlubetsiá mí wóyítɔ.” Ɔtsi ánfɔ bu anisu alu anulóbuo mu yó mu wóyítɔ.

Paulo Mva Silas Obudɔ Filipi

16 Eke ɔku ayó Yudafɔ mpái ɔbokpá unu á, anulótu otsibi ɔkúá ogyi ɔkpábi unu. Atóla ɔhé bu musu, ɔtelá ató, blí asón ání lbéba. Ɔtɔbwé kóba tsɔtsɔtsɔ há mu awíe tsú mútɔ. 17 Otsibi anfi lékplá buo ania Paulonyɔ. Ɔna ɔdekplón blí ɔbéé, “Ahá ánfɔ gyí Ɔsúsúsú Bulu ámu asúmpú ni. Amódé mli nkpahɔ ɔkpa suná ní.” 18 Ɔlɔbwe mú nke tsɔtsɔtsɔ. Inu lehan Paulo. Mú su ɔledamlí bláa otsibi amu ɔbéé, “Atóla ɔhé, nde mbla wa há fú Yesu Kristo dátɔ, dalɔ mutɔ!” Inunu ɔhé ámu lédalɔ mutɔ.

19 Ɔkpábi amu awíe bowun ání amú kóba ɔkpa latin. Mú su bektá Paulo mva Silas, bítía amú ya wúlu ahande ansítɔ. 20 Bɔpu amú ya Romafɔ asón agyípu béé, “Yudafɔ ahá ánfɔ bugyi, bude asón klée wa aní wúlu anfitɔ. 21 Bude amándíé laláhe ání aní mbla meha mú iwɔ ɔkpa suná. Romafɔ aní mú angyí. Anuméetalí hɔ amú amándíé ámu gyi músú.” 22 Inu ɔdɔm amu botu bun Paulo mva Silasu.

Asón agyípu amu beha béé buwóí amú atadié, abunwen amú mpli. 23 Beputí Paulo mva Silas ató wankláán tá á, beha bɔpu amú tswi obu. Bebláa obu adípúsú ɔkípu béé, ogyóo

amú wankláán. ²⁴Asún á múú bebláa obu adípúsú ɔkípu amu su ɔɔpu amú yétswi obutótó, wá amú ayabi kplakitsi.

Obu Adípúsú ɔkípu Yesu Hógyi

²⁵Mú gyí-nsiné á, Paulo mua Silas bude mpái bɔ, bude ulu wa kánfú Bulu. Obu adípú atráhe amu é buda budenu. ²⁶ɔtsáwule pé á, ɔsulúw lékpunkí ɔwunlínúsú, ulékpunkí obu ámu ntswiasí. Mú aklun fée lefinkí. Obu adípú ámu ikan pú amú kplakitsi amu fée lɔwɔí. ²⁷Obu adípúsú ɔkípu amu létsinkí, wun ání aklun amu fée lafinkí. Inu ɔlele ɔdayí tya anyɔ ɔbée amuwɔ iwí, tsúfé ɔkí ɔbée obu adípú ámu fée badáli srí. ²⁸Táme Paulo lɔkplun kúklúkúú bláa mu ɔbée, “Mábwe iwí tɔtɔ. Aní fée aníbu inu.”


²⁹Obu adípúsú ɔkípu amu léha botsu ɔkandíe ba mu, ɔɔwa ɔsa wíe obu ámutɔ. Ifú de mu, su ɔdekpunkí kpakpakpakpa. ɔleyéda akpawunu Paulo mua Silas ayabito. ³⁰Inu ɔlekpa amú dál yéfité amú ɔbée, “Mí awíe, ntɔ mbwée asa Bulu ɔhɔ mi nkpa?”

³¹Mú Paulo mua Silas bebláa mu bee, “Hɔ Yesu gyi, ménu Bulu ɔbɔhɔ fúa fú wóyító ahá fée nkpa.” ³²Múú bebláa mua mu wóyító ahá fée aní Wíe Yesu asun wankláán ámu. ³³Onyé-onyé ámu a, oyin ámu léyiá amú iwí nɔ á múú benya bré á múú bepítí amú ató ámu. ɔleha amú ɔbɔɔ mua mu wóyító ahá ámu asú inu. ³⁴Obu adípúsú ɔkípu anfi lópu amú ya mu wóyító, ɔleyéha benuná ató há amú begyi. Inúá mua mu wóyító ahá fée bahɔ Bulu gyi su á, ansí lehie gyi amú.

³⁵Mú gyi kehe a, asún agyípu amu ɔɔwa ahá akítápú aku bee buyébláa obu adípúsú ɔkípu amu bee, osíi ahá ámu abunati.

³⁶Mú su oyin ámu lébláa Paulo ɔbée, “Asún agyípu amu bapú ɔme sísí mí bee, nsíi fúa Silas amlunati. Mú su mlinati iwilwiitɔ.”

³⁷Táme Paulo lébláa ahá akítápú amu aku ɔbée, “Bumegyí aní asún, táme banwén aní ató ɔbuntɔ. Romafɔ anigyí, táme bawá aní obu. Ntogyi su budekléá bési aní nǵaintɔ? Ekekeke! Asún agyípu amu onutó bubá bele aní.”



*Obu adipúsú ákírv lórv Paulo mva Silas yétswi obutótó,
wá amú ayabi kplakitsi. (Gyumagyihe 16:24)*

³⁸Ahá akitápú amu beyinkí yó yébláa asún agyípu amu. Bréa bonu ání Romafɔ Paulo mua Silas bogyi á, ifú lehié kítá amú. ³⁹Mú su boyóbwií ɔpa há Paulo aná, bekpa amú dali yókokóli amú beɛ budáɔl wúlu amutɔ. ⁴⁰ɔnu Paulo mua Silas benatí yó Lidia wóyítɔ. Befia apíó ahógyipu amu unu, tɔí kplá amú, wá amú ɔwɔnlín asa benatí.

Paulo Tesalonika Yo

17 ¹Bréa Paulo mua Silas benatí tsú unu boyo á, buna Amfipoli pú Apolonia awúlusu beba Tesalonika. Yudafɔ *ofiákpa ku bu unu. ²Fé alá Paulo tɔbwé brégyíbré á, ɔɔyo ofiákpa unu ɔkpúnú ɔdaké, mua amúnɔyo boyo Bulu asun wanlínhé amutɔ. ɔlobwe mú alɔ tse sa sɔ́n. ³ɔlele Bulu asún ámutɔ súná amú, dínká ibwi músú ɔbéɛ, “Ilehián ání Kristo, (ɔhá ámutɔ Bulu ladá mu ofúli amu), obówun iwɔsun wú, lákúsú tsú afúlitɔ.” ɔɔyo mu asún ámusu ɔbéɛ, “Yesu anfi nde mu iwɔ asún blí anfi gyí Kristo amu ni.” ⁴Paulo asún anfi lwankí Yudafɔ ámutɔ aku. Mú su bobuo mua Silas. Alɔ kén Griikifɔ Bulu asúmpú pú atsiá obú bu amúsú tsɔtsɔtsɔ é bobuo amú ní.

⁵ɔni léha Paulo mua Silas iwɔ lówa Yudafɔ ámu olu. Mú su bekpa aha laláhe aku buo iwɔ tsú brɔnusu, boyo ahá tsɔtsɔtsɔ yéhan agywun wúlu amutɔ. Betsií yó oyin ɔkúá butetí mu Yason wóyítɔ, bude Paulo mua Silas dunká abubutia amú ba ɔɔm amu ansítɔ. ⁶Táme bumowun Paulo mua Silas. Mú su bebutia Yason mua ahógyipu amu aku ya wúlu ahande ansítɔ, bude okitikiti beɛ, “Ahá anfi ná bude agywun háan ɔyítɔ féé ní. Bawié nfi, ⁷Yason laho amú yáí mu wóyítɔ. Amú féé budekusú líí Roma Owíe Dehen mblasu. Tsúfé bude ahá bláa beɛ, owíe bambá ɔku bu unu, mu dá gyí Yesu.” ⁸Bréa wúlu ahande pú ɔɔm amu bonu asún anfi á, lehiɛ han amú. ⁹Táme bebutí Yason mua mu aba ámu iwɔ, beka ɔko, ká ntam beɛ bumétrá han agywun, besi amú benatí.

Paulo Mva Silas Beroia Yo

¹⁰Besi owí leta, ahógyipu amu beha Paulo mua Silas benatí yó Beroia wúlutɔ. Benya wíe unu alɔ, boyo Yudafɔ ofiákpa.

¹¹Yudafá bubu wúlu anfito botsulá ho asún ámu dun amúá bubu Tesalonika. Bɔpu ansigyí ho Bulu asún ámu, tsíá yó Bulu asun wanlínhé amuto ekekegyíeke ki bee, ɔɔkwali Paulo dé amú bláa. ¹²Yudafá tsɔtsɔtsɔ pú Griikifó atsi múa ayin ání obú bu amúsú é bɔho asún ámusu gyi. ¹³Yudafá ámúú bubu Tesalonika amu bonu ání Paulo layó ɔde Bulu asún ámu ɔkan da Beroia. Ínu su begya ɔkpa yó unu buɔde unufó ámu agywun yintá. ¹⁴Ɔsasɔ, ahógyipu amu bele Paulo lé wúlu amuto ya ɔpu ɔnó, táme Silas mua Timoteo mú besi bubu unu. ¹⁵Ahá ámúú beyési Paulo ɔkpa ámu bekpa mu alu yówie Atene wúluto. Bréá buɔeyinkí á, Paulo lópu ɔme sísí Silas mua Timoteo ɔbéé, buwáa ɔsa bɔtu mu.

Paulo Atene Yo

¹⁶Bréá Paulo lési otsie ogyo Silas mua Timoteo Atene wúluto á, unu tsiá lehiɛ han mu. Tsúfé olowun ání ikpi sónn bu wúlu amuto. ¹⁷Mú su ní ɔyó Yudafá ofiakpa unu á, mua Yudafá pú Griikifó ámúú buɔde Bulu súm ámu butetsíá lé asúntó há aba. Alu kén mua dunsu atsiápú é betsiá tóí tsú mú iwí ní. ¹⁸Mua atiansipu akvá botsu Epikuro pú Stoak ɔpasuato^d ba unu é betsiá bíí asún ání. Amúótó aku befité bee, “Nto ɔkan ɔnótó ɔkapú ání déda?”

Aha aku bele mú ɔnó bee, “ldeɔbwe fé ikpi aku iwí ɔdetóí tsú.” Tsúfé Paulo dé Yesu mua afúlikusú iwí asún ɔkan da. ¹⁹Múú bekitá Paulo, kpá mu ya Areopago, igyi amú wúlu ahande ofiakpa. Ahande amu bebláa Paulo bee, “Anúdeklé aniaa, futóí tsu fú atosunáhé ɔpɔwe amu iwí suna aní. ²⁰Anumókúnú asún ání ki. Mú su anúdeklé aniaa, fulée mútó suna aní.” ²¹Tsúfé Atenefó pú afózá bubu unu féé butamabwé tɔto dun asún ání ulaba nu pú mú blí.

²²Unu Paulo lókusú líí afiapu amu ansító ɔbéé, “Atenefó, nawun ání mltehíé tswé ikpi. ²³Tsúfé ínúá ndeki wúlu

^d 18:18 *Epikuro* ɔpasuatofo bugyi aha akvá buteblí bee, ilehián ání ansí bégyi aní. Fowú á, ulatá. *Stoak* ɔpasuatofo é bee, mehián ání ansí bégyi aní dubidubi, awireho é mákitá aní dubi.

anfuto féé á, nawun ntobí oduá mlitotswe. Nawun afodie-
 asubwi kuá bōwanlín dínká mósú bee, ‘BULUÁ ANIMÉYÍN MU.’
 Mú su Bulu ámúú mlidésun, mluméyín mu dá ámu iwí okan
 ndeda súná mli á. ²⁴Bulu lóbwe oyí pú mótó ató féé. Mogyí
 ósú múa asi Owíe. Otamatsiá otswékpa ání anyánkpusa ibi
 léyi mótó. ²⁵Otamadúnká toto tsú ohaa wá, méni ibwe fé
 toku tehían mu. Tsúfé mutéhá ahá féé nkpa, oje pú tógyító
 itehían amú. ²⁶Muléha su ahá féé belun tsu obakúle pétó,
 ojeha bekleí wá oyító féé. Muléha oma kugyíku otínéá butsie
 pú bréá bétsiá yófun. ²⁷Olobwe mú ali, méni nyankpusa
 obódunká mu wun mu. Táme teki oma ifó anito okuku wá.
²⁸Tsúfé oku léblí obéé, ‘Bulu su anutsie nkpa. Mu sù anutekán
 iwí, anigyí alíá anigyí.’ Fé alíá mli ulu awapú aku beblí bee,
 ‘Bulu ahá aní é anigyí.’

Gyu

²⁹“Íniá Bulu ahá anigyí su á, animáki aniaa, Bulu gyí fé
 tunkuá nyankpusa lapú sika pepe, sika futútú ntée ibwi pwé
 mú alíá odeklé. ³⁰Bímbí ámu a, ahá bumebi alíá Bulu gyí.
 Bulu lóbun ansíbi mósú, táme séi mú á, alabláa anyánkpusa
 féé obéé, budámli kluntó. ³¹Bulu lalé eke yái ání obótsun oha
 ámúú alalé yái ámusu gyi oyító ohagyíoha asún okokwalisu.
 Odeklé obéé ahá bubú ání okokwali igyi. Mú sù okokúsú
 oha ámu tsú afúlitó ní.”

³²Íniá Paulo lótoí tsú afúlikusú iwí su á, aku bōmōsí
 mu. Táme amótó aku beblí bee, “Anudeklé aniaa, futráa
 ba afubebláa aní asún ánti ku é.” ³³Imu Paulo lókusú dál
 ofiakpa unu. ³⁴Táme ahá kpalobí ku bōho Paulo asún ámusu
 gyi, bobuo mu. Amótó okule dá gyí Dionisio, oletsíá wúlu
 ahande amoto. Mva otsi okuá butetí mu Damari pú aha
 aku é.

Paulo Korinto Yo

18 ¹Imu oma a, Paulo lókusú tsú Atene yó Korinto wúluto.
²Olooyóto Yudayin okuá butetí mu Akwila, bokwú mu
 Italia omanti kuá butetí mú Pontoto. Akwila mua mu ka
 Priskila beba Korinto unu mokówá opa. Tsúfé ali bré ámutó
 á, Roma Owíe Klaudio lagya Yudafó féé lé Roma wúluto.

Paulo lóyɔ amú wá. ³Tati-obubí abwepú amú é bugyi. Mú su Paulo létsiá amú wá, mua munyɔ betsiá bwé tati-obubí ámu fé. ⁴Ɔkpónú ɔdaké kugyíku á, Paulo tɔyɔ Yudafɔ *ofiákpá yéle Bulu asún ámutɔ wankláán súná Yudafɔ pú Griikifɔ ámu, méni bóho Yesu gyi.

⁵Bréá Silas mua Timoteo botsu Makedonia bɔtu Paulo a, olesi agyómá ámu yɔ, pú Bulu asún ámu ɔkanda kóún bwé mu gyumagyihe. Oletsíá gyi adánsɛ súná Yudafɔ ámu ɔbéé, Yesu gyí Kristo, (ɔhá ámutú Bulu ladá mu ofúli amu) ni. ⁶Táme bumɔho mu asún ámu. Bɔkusú líí musu, síá mu. Mú su Paulo lófwi ɔbɔ lé amú asúntɔ, bláa amú ɔbéé, “Tsú nde púya a, nalé ɔbɔ mli asúntɔ. Ní lowu mlidéklé a, ɔbɔ mli mu. Néyébláa ahá ání bumegyí Yudafɔ mboún Bulu asún.” ⁷Ɔni su Paulo lédali Yudafɔ ofiákpá unu yétsiá oyin ɔkuá butetí mu Tito Yustus wóyítɔ. Megyí Yudayin oyin ámu gyí, táme ogyi Bulu osúmpú. Mu wóyí ɔbɔ mantáa Yudafɔ ofiákpá unu. ⁸Táme Krispu ání ogyi Yudafɔ ofiákpá unu ɔhande mua mu wóyítɔfɔ féé mú bóho aní Wíe Yesu gyi. Korintofɔ ámu tsɔtsɔtsɔ é bohogyi, bóho amú asú.

⁹Eke ɔku onyé á, Paulo lówun atɔ. Múts á, aní Wíe lébláa mu ɔbéé, “Mánya ifú. Yɔ músú afɔda asún ámu ɔkan wule. Mákpa ɔnɔ bun. ¹⁰Tsúfé mía funyɔ ná. Ɔhaa méetalí bwé fú tɔtɔ. Mí ahá bɔtsɔ wúlu anfitɔ.” ¹¹Mú su Paulo létsiá Korinto unu súná ahá ámu Bulu asún ofi ɔkule múa ifun.

¹²Bréá Galio létsiá Roma owíe otsiákpá, ɔde Griikifɔ ɔsaasí ɔmanti kúá butetí mú Akaiasu kú a, Yudafɔ ámu bɔbwe ɔnɔ-ɔkule, kítá Paulo, pú mu ya mu ansítɔ. ¹³Bee, “Oyin ání dé ahá asukpan suná ɔbéé busúm Bulu tsɔn ɔkpa ání ɔkusu líí aní mbasusu.”

¹⁴Paulo lénya bwíí ɔnɔ ɔbéé amutɔ a lí Galio lébláa Yudafɔ ámu ɔbéé, “Ní tsitsa ntée lakpan ku oyin ání labwé á, tekɔ ɔbɔ aléá néyaa asu nú mli asún. ¹⁵Táme ɔniá adá pú mli onutó mbla ɔbɔ asún ɔbɔ nwéen mlidégyí su á, mliyɔ amliyeblí mú. Mmégeyi asún ání odu.” ¹⁶Múú ɔleha begya amú lé asún ogyíkpá unu á. ¹⁷Ahá ámu féé bowunáa kítá Sostene ání ogyi Yudafɔ ofiákpá unu ɔhande, dá mu unu. Táme Galio mótsu kuku lé mútɔ.

Paulo Yinkí Yó Antiokia

18 Paulo létsiá ahógyipu amu wá Korinto yófun bré kv. Múú òleklá amú, mua Priskila pú Akwila benatí yó Kenkrea wúluto. Paulo lékpa mu nwun Kenkrea unu, púsúná ání alamó ntam kvá òleka òt. Múú botsu ntsusu-yibi pú bɔyó Siria òmátó á. 19 Bréá bowie Efeso wúluto á, Paulo lénatí sí Priskila mua Akwila, yó Yudafɔ ofiakpa, mua Yudafɔ ámu buɔe asúntó le há aba. 20 Bokokóli mu bæe, ɔtráa tsia amú wá kpalobí, omotsulá. 21 Táme bréá ɔɔɔɔɔɔ yó á, òlebláa amú ɔbée, “Ní Bulu lótsulá á, néyinkí ba mli wá.” Inu olowie ntsusu-yibito tsú Efeso unu náti.

22 Bréá òlekplí Kaesarea a, ɔlɔɔv yó Yerusalem yéha ɔpasua ámu tsia. Múú oleyinkí kplí yó Antiokia a. 23 Oletsia Antiokia unu kpalobí. Mú ɔma a, ɔlenatí unu beki Galatia pú Frigia ɔsulósu, ɔɔe akasípú amu Bulu asún bláa, púwá amú ɔwunlín.

Apolo Bulu Asún Ɔkanda Efeso Múa Korinto

24 Alɔ bré ámutɔ á, Yudayin ɔkvá butetí mu Apolo laba ɔbu Efeso wúluto. Bɔkwú mu Aleksandria, wúlu ání ibu Egipte ɔmátó. Oyin tɔí, oyin Bulu asun wanlínhé amu é wankláán. 25 Bosuná mu anɔ Wíe ɔkpa ámu. Mú su Yesu iwɔ ɔnɔkwali amu blí tɔhíé wá mu ansigyí. Táme Asú Ɔɔɔɔpú Yohane *asúɔ ámu pé oyin. 26 Apolo ménya ifú. Ɔlɔwa klun súná ató Yudafɔ ofiakpa unu wankláán. Bréá Priskila mua Akwila bonu mu asun blíhé a, bekpa mu yáa wóyító yósuná mu Bulu ɔkpa ámu wankláán ðun alhá oyin yaí. 27 Bréá Apolo lɔbwe agywun ɔbée, ɔbɔyɔ Akaiia ɔsulósu á, ahógyipu amu bɔwa mu atɔtɔ-ɔnlin. Bɔwanlín ɔwulú sísí unu ahógyipu bæe, buhɔɔ mu wankláán. Bréá oloyówie unu á, ɔlehiɔ búa ahá ání una Bulu awɔtɔlesu bahɔ Yesu gyi. 28 Apolo mua Yudafɔ ámu begyi Bulu asun wanlínhé amu iwɔ nwéen, ɔlɔtɔí lé asúntó túmisu púgyi amúsú. Ɔlɔpu Bulu asun wanlínhé amu súná amú ání Yesu gyí Kristo, (ohá ámúú Bulu ladá mu ofúli amu).

Paulo Bulu Asún Okanda Efeso

19 ¹Bréá Apolo bu Korinto a, Paulo lódu yátsun ɔ́súsú awúlusu bedali tíi Efeso. Ɖlɔtu akasípú aku unu. ²Mú ɔ́lɛfuté amú ɔ́bée, “Mlulénya Ɖɛ Wankíhé bréá mlulóhogyi?”

Bele mú ɔ́nɔ́ bɛɛ, “Anumókúnú kí ání Ɖɛ Wankíhé ku bu unu.”

³Paulo létrá futé amú ɔ́bée, “Asú mɔ́mu bɔ́bɔ mli?”

Bele mú ɔ́nɔ́ bɛɛ, “Yohane asú ámu bɔ́bɔ anu.”

⁴Paulo lébláa amú ɔ́bée, “Yohane lóɔ́ ahá ání badámlí kluntɔ́ asú. Ɖlebláa amú ɔ́bée buhɔ́ɔ́ ɔ́há ámúú obuo mu ɔ́bá ámuvsu gyi. Mugyí Yesu.”

⁵Bréá ahá ámu bonu asún ánfu á, bɛha bɔ́bɔ amú asú anu Wíe Yesu dátɔ́. ⁶Mú ɔ́ma a, Paulo lópu ɛbɛ dínká amú nwnusu, Ɖɛ Wankíhé leba amúsú. Bɛblí ɔ́blí bábábá, blí Bulu ɔ́nɔ́ asún é. ⁷Amú féé bóbwe ayin dúanyɔ́.

⁸Paulo lélatsiá yɔ́ Yudafɔ́ ofíakpa unu. Ɖlɔwa klun tɔ́í lé asúntɔ́ súná amú tsra asa kéké. Omenya ifú, méni bɔ́hɔ́ asún ámúú ɔ́deblí tsú Bulu iwíegyí ɛwɛ ámuvsu gyi. ⁹Táme amú aku bɔ́wa kluntɔ́ odwin, bumɔ́hɔ́ mu asúnsú gyi. Bɔ́tɔ́í wɔ́ anu Wíe Ɖkpa ámúú Paulo dé amú súná ámu ahátɔ́ unu. Mú su Paulo lékpa akasípú amu náti, oletsíá súná amú atɔ́ oyin ɔ́kúá butetí mu Tirano atɔ́ ɔ́kasíkpa. ¹⁰Paulo lósuná amú atɔ́ nfinyɔ́ kéké. Mú su Yudafɔ́ pú Griikifɔ́ ání bubu Asia ɔ́mátɔ́ féé bonu anu Wíe asún ámu.

Skewa Abí Asún

¹¹Bulu lótsun Paulosu bwé ofúla akpɔ́nkpɔ́ntɔ́ ku. ¹²Ahá bɔ́kulá mu adúkubi pú mu ɛwɛsu atɔ́ yédunká alɔ́pusu, benya ulɔ́tsá, ɔ́ɛ laláhe é ledali ahátɔ́. ¹³Yudafɔ́ aku é bubu nsiné unu bunu budeki gya *ɔ́ɛ laláhe lé ahátɔ́. Bɔ́wa klun bɛɛ, bópu anu Wíe Yesu dá gya ɔ́ɛ laláhe lé ahátɔ́. Mú su bɔ́kplón wa ɔ́ɛ laláhe bɛɛ, “Dalí Yesu amúú Paulo dé mu ɛwɛ asún ɔ́kan da ámu dátɔ́.” ¹⁴Igyí ahapú ɔ́handɛ ɔ́kúá butetí mu Skewa abi yinhé abasíénɔ́ létsiá bwé ínu.

¹⁵Ɖke ɔ́ku ɔ́ɛ laláhe léfuté amú ɔ́bée, “Nyin Yesu, nabí Paulo, mli é mé, amendí mligyí?” ¹⁶Ɖhá ámúú ɔ́ɛ laláhe bu

mutu ámu lótu wíé amútó, dá amú, títu amú atadie féé. Inu amú féé bɔpu amú yaya pú amú iwɪ nɔ sɪ dɔl wóyí ámutó. ¹⁷Yudafo pú Griikifóá bubu Efeso inu féé bonu asún ánfɪ. Ifú lekítá amú. Mú su bɔpu obú há anɪ Wíé Yesu. ¹⁸Ahá ámúbohogyi amuto tsɔtsɔtsɔ beɛ amú lakpan blí. ¹⁹Amútó aku bugyi okó alepú. Botsu okó ámu nwulú ba bɔwa mú féé ogyá ahá ansító inu. Bobu amú nwulú ámu ibíá á, ɔɔbwe sika futútú mpím-aduenu (50,000)^e. ²⁰ɪna anɪ Wíé Yesu túmisu mu asún ámu lenya ɔkpa kléí wankláán.

Gyu

Demetrio Mva Mu Aba ɪkó Le Wá Efeso

²¹Asún ánfɪ féé ɔma a, Bulu ɔɲé ámu léha Paulo ɔbwe agywun ání ɔbɔyɔ Makedonia pú Akaia ɔsulúsu, fówun ɔyɔ Yerusalem. Mú Paulo léblí ɔbéé, “Ní nowíé inu á, ilehián ání néyéki Roma wúluto é.” ²²Mú su ɔɔwa mu abvápu abanyó, bugyi Timoteo mva Erasto sísí Makedonia. Mu onutó olesi tsíá Asia ɔmátó kpalóbí.

²³Alɪ bré ámutó á, anɪ Wíé ɔkpa ámú bude ahá suná ámu su asún kɔɔkɔntɪ ku lɛda Efeso inu. ²⁴Oyin ɔkúá ɔɔbwe sika futútú ató, butetí mu Demetrio bu inu. Oyin ánfɪ ɔpú sika futútú bwé ɔkpi yílé Artemi^f ɔtswékpa akusubi ání ɔɔɔɔ mu ɔtswékpa yílé ámu fé. Mva mu aba agyú má ánfɪ ayɔpú butenyá kóba tsɔtsɔtsɔ tsú mótó. ²⁵ɔletɪ mu aba ámu pú ahá ání butɔbwe agyú má ámu odu fia. Mú ɔɔɔɔ amú ɔbéé, “Mí apíó, mɔyin ání agyú má ánfɪ sú anɪ féé anlawá alé ní. ²⁶Yéé mɔtsie mɔdɛnu, mɔdɛwúun tɔá Paulo dɛbwe? Alatá ahá bláa ta Efeso wúluto pú Asia ɔmátó féé fía ɔbéé, ɔkpi ání ahá bapú ɔbɔ pwé bomegyí ɔɔɔ. Alatá ahá ɔnó mlé tá, bude mu asúnsú hógyi. ²⁷Megyí anɪ agyú má wule ibéyintá. ɔhaa méétrá bu ɔkpi tsíhé Artemi ɔtswékpa yílé ámu. ɔkpi ámu dá é bófwi lé ɔyító. Táme tekɪ mogyí ɔkpiá ahá féé butɔtswe Asia ɔmátó pú ɔyító féé ní.”

^e 19:19 Sika futútú mpím-aduenu (50,000) bɔbwe ɔbakóle níí lafakúle-aduasa (130) ɔkóká. ^f 19:24 Artemi gyí ɔkpi kɔɔkɔntɪ ɔku dá.

²⁸Bréá ɔɔɔm amu bonu asún ánfí á, benya ɔbló, súra okitikíti bɛɛ, “Ɔkpi kɔɔnkɔɔnti aní Efesofɔ ɔkpi Artemi gyí!” ²⁹Kpokiti lɛda wúlu amɔtɔ fɛ́ɛ. Ahá ámu bekitá Paulo abúopu Gaio mua Aristarko ání botsú Makedonia srí pú amú ya wúlu ofíakpa. ³⁰Paulo onutó lékléá ɔbɔyɔ ofíakpa unu, ɔyɔtɔí kpla ɔɔɔm amu, táme akasípú amu bumeha mu ɔkpa. ³¹Ɔmá ámɔtɔ ahande akɔɔnkɔɔnti akvá bugyi Paulo anyawíe é ɔɔwa obí lóyóbwií ipa há mu bɛɛ, ɔmáyo ofíakpa unu. ³²Kpokiti lɛda ofíakpa unu. Áni bɛɛ alí, aní é bɛɛ alí. Amútɔ ahá tsɔtsɔtsɔ bumebi tɔ́á svá befia unu. ³³Yudafɔ ámu aku ɔyɔ ofíakpa unu. Bowutá Aleksandro sísí ɔbuntɔ, bude mu asún ání ɔyéblí bláa. Ínu sv Aleksandro lótsu íbí fúá, ɔbɛɛ amule mu ɔnɔ. ³⁴Táme bréá bowun ání Yudayin ogyi á, belasúra okitikíti, blí asun kua kule dɔnhwírí anyɔ kéké bɛɛ “Ɔkpi kɔɔnkɔɔnti aní Efesofɔ ɔkpi Artemi gyí!”

³⁵Ínu fɛ́ɛ ɔma a, wúlu atɔ ɔwanlínú léha ɔɔɔm amu bekpá ɔnɔ bun. Múy ɔlebláa amú ɔbɛɛ, “Efesofɔ ayin, ma méyín ání Efeso nfi gyí aní ɔkpi kɔɔnkɔɔnti Artemi pú mu íbwi ámúb ɔlekpa tsú ɔsúsú ámu nwun? ³⁶Ɔhaa má unvá ɔbétalí gyí asún ánfí iwí nwéén? Mlunya klun, ménu mlumóoko mli. ³⁷Ahá ánfí mlilakpá ba nfi ánfítɔ ɔkuku mɔkúwí tɔtɔ tsú ɔtswékpa unu. Bumɔkúblí asvansu kúsú líí aní ɔkpi tsíhé Artemisv. ³⁸Táme ní Demetrio mua mu aba agyómá ayɔpú amu bɛɛ bubu ɔku iwí asún á, asún agyípú bubu unu, asún ogyíkpa é bu unu. Béталí pú asún ámu ya unu kpéblí mú. ³⁹Ní mlubu asun bambá ku tsía ínutɔ mú á, béталí yéblí mú ɔtíné ámúb aní fɛ́ɛ anutefia gyi asún ámu. ⁴⁰Tsúfé ní anuméki wankláán á, abénya asún ání anlahaan wúlu amu agywun nde. Ní befité aní é á, anuméénya asvansu púlé mú ɔnɔ.” ⁴¹Olenya blí asún ánfí tá alí, ɔleha amú fɛ́ɛ bedasáín.

Paulo Yinkí Yó Makedonia Múa Griikifɔtɔ

20 ¹Kpokiti amu ɔma a, Paulo léba beti akasípú amu fɛ́ɛ fíá, t́í kplá amú, wá amú atetɔ-ɔnlun. Ɔleklá amú asa ɔɔpɔ ɔkpa ɔyɔ Makedonia ɔsulúsu. ²Oleki nsuné unu ɔpasua ámusv t́í kplá amú asa olobowie Griikifɔ ɔsulúsu.

³Oletsiaá unu tsra asa. Bréá ɔlobwe agywun ɔbéé, méfa ɔpu yó Siria ɔsulúsu á, olowun ání Yudafo bude mu téé abukita mu. Mú su ɔlobwe agywun ɔbéé mélayótsun Makedonia ɔsulúsu. ⁴Ahá ání bekpa mu ya unu gyí Beroiayin Sopater, ogyi Piro mu bi; Tesalonikafɔ Aristarko mva Sekundo pú Derbeyin Gaió; amúa Timoteo pú Asiafo Tihiko mva Trofimo. ⁵Alí ahá ání begyankpá yógyo aní Troa wúluto. ⁶Israelfɔ begyi amú *Bodobodo Mátúhé *Nke ɔma a, anulétsiá ntsusu-yibito tsú Filipi wúluto. Anulénatí nkená owító. Eke núúsí a, anulóɔtu nkpa agyápu amu Troa wúluto. Aní féé anulétsiá unu nkensiénó.

Eutiko Tsinkí Tsú Lowuto

⁷Kwasieda, igyi ndawótswí ámutɔ eke gyankpapu ntúpwesu á, anuléfia abégyi ató abato fé alá aní Wíe lósuná aní. Íniá Paulo dékléá ɔbénatí ɔyi kehe su á, ɔlɔtɔi kplá amú alu yéha ɔyínsiné. ⁸Nkandíe tsɔtsɔɔtsɔ bu ɔsúsú obu ámú anuléfia mútɔ ámutɔ. ⁹Oyimbi ɔkúvá butetí mu Eutiko lódu bian nfánsrí ɔnó, ɔde asún ámu nu. Íniá Paulo lóɔtɔi wá ɔpá su á, didí lowie mu, fúru mu. Olekpa tsú ɔsúsú abansúru saasi nfánsrítɔ unu beda ɔsulúto. Bréá boyótsu mu a, alawú féé. ¹⁰Mú Paulo lékplí yó unu, yémlí bun musu, látá mu pútá, blí ɔbéé, “Opúni mátsií mli, ɔhé bu mutɔ.” ¹¹Paulo léyinkí dú yó ɔsúsú unu, mva mu aba ámu nyɔ bebiabía bodobodo gyi. ɔlɔyɔ mu tó amusu alu yófun ɔyi kehe, ɔlenatí. ¹²Mú ahá ámu békpa kebi ámu ya wóyí á. Ansí lehie gyi amú ání ɔbu nkpa.

Paulo Troa Tsu Yó Mileto Wúluto

¹³Anulégyankpá yówie ntsusu-yibi ámutɔ ayó Aso wúluto yótsu Paulo unu. Tsúfé Paulo léha aní ibi ɔbéé, ɔbótsun ayabito ɔkpa ká tíí unu. ¹⁴Bréá ania munyɔ anuléyéfia aba Aso wúluto unu á, olowie ntsusu-yibi ámutɔ, anuléfa yó Mitilene wúluto. ¹⁵Anulénatí unu ɔyi kehe, anulókusú unu yówie Kio. Eke nyɔɔsi a, anulókusú unu yówie Samo wúluto. Mú eke sáásí é á, anulétra kusú unu yówie Mileto wúluto. ¹⁶Paulo mékléá obéyintá bré

Asia ɔmátó. Mú su ɔmekplí Efeso wúluto, tsúfé ɔdekɔsí ání ní ɔbétalí á, obóyówie Yerusalem asa abugyi Pentekoste nke ámu.

Paulo Efeso ɔpasua Ahande Klá

17Bréá anlóyowie Mileto wúluto á, Paulo lówa abí sísí Efeso ɔpasua ahande ɔbéé, bubá ɔɔtu mu. 18Bréá ahande amu bebefia mu a, ɔlebláa amú ɔbéé, “Mlyin alíá mía mlynɔ anlósputsiá tsú eke gyankpapu ání neba Asia ɔmátó. 19Mlyin alíá neba iwiasɩ yó agyómá há mí Wíe, pú alíá Yudafo ɔkɔsú líí mí sú, nowun ipian, su kúrää. 20Mlyin ání mmɔpu asún ání ibékpa mli njáín mli bréá neda Bulu asún ámu ɔkan dunsu pú mli wóyító. 21Alíá ɔɔtɔí kplá Yudafo pú Griikifo féé mbéé, busii lakpan bwe abudamli ba Bulu wá, abubɔho aní Wíe Yesu gyi.

22“Séi ání á, ɔnyó Yerusalem, fé alíá ɔnye Wankíhé labláa mi. Mmeyín tóá ibéba misu unu. 23Táme móá ɔnye Wankíhé tebláa mí wúlugyi wúlusu, nyin gyí, asun wunhe pú obuda da gyo mí. 24Táme mmotsu mú asunbogya. Mboún alíá nómɔ agyómá ámúb aní Wíe Yesu léha mí ámu ɔnó. Agyómá ámu gyí, nébláa ahá Bulu awitɔle asun wankláán ámu.

25“Séi ání á, nyin ání mli ahá ání nebedá Bulu iwíegyí iwɩ asún ɔkan mlito áníto ɔkuku méetrá wun mi ekekeke. 26Mú su nde mli bláa mbéé, ní mlito ɔku ménya nkpa ání utamatá á, megyí mí su omenya. 27Tsúfé nabláa mli tógyítóá Bulu déklé ɔbéé mlibí.

28“Mú su mlíkú mli iwɩ pú ahá ámúb ɔnye Wankíhé lópuwá mli ibito ámussu wankláán. Mlíkpa Bulu ɔpasua ámúb ɔleyaí tsun mu onutó mu bi lowusu ámu wankláán. 29Nyin ání nenátí á, akvá bugyi fé nkpataku, bubu iyin béba bowie mlito, dá ɔpasua ámu sáín. 30Mlito aku óó ɔkɔsú, dámlí ɔɔkwali amu póbítia mlito aku buo iwɩ. 31Mú su mlida iwɩsu. Mlíkaín ání netsiá mli wá nfinisa sóón, pú ansí ntsú yíri iwɩ súná mli ató ɔpa onyé.

32“Mú su séi á, ndepu mli wá Bulu mu mu awitɔle asún ámuto. Mu awitɔle asún ámu iwá mli ɔwunlín, tha amlidan, talu lu kínkín, amlinya ató ámúb ɔlehie yáí há mu ahá ámúb

bamlí mu kle amu. ³³Bréá mbu mli wá á, mmeppe ansí zhaa sika pepe, mu sika futútú ntée mu atósú. ³⁴Mli onutó mlyin ání mí ibi anfi nɔpuyó agyómá nyá tóá ide mía mí aba ámu hián féé. ³⁵Natsun ɔkpagyíɔkpasu súná mli alíá mlópu ibi yó agyómá, púgyi ahá ání twi ma amú ɔnlun buale. Mlikain aní Wíe Yesu onutó asun blíhésv. ɔbéé, ‘Bulu toyúlá zhá ání otekíé ató dun zhá ání butekíé mu.’ ”


³⁶Bréá Paulo léblí asún ánfí tá á, mua amónyo féé beda akpawunu bó mpái. ³⁷Amú féé bosu bréá belatá aba pútá, klá aba. ³⁸Tóá ulɔwa amú ahumuti gyí mú ámúú ɔleblí ɔbéé, mumétrá wun amú ekekekeke ámu. Besi mu ɔkpa yówie ɔpu ɔnó, olowie ntsusu-yibitɔ.

Paulo Yerusalem Yo

21 ¹Bréá anulégyí nkla tá á, anulówie ntsusu-yibitɔ, nátí laa yó Ko wúlutɔ. Eke nyɔɔsi a, anulóyo Rodo. Tsú unu á, anuléba Patara osubúnɔ. ²Anulénya ntsusu-yibi kuá yó Foinike osubúnɔ, anulówie mútɔ. ³Bréá ayó á, anulówun ɔsulúv kuá butetí mú Kipro sísí. Anulési mú tswi bunasu ífón, tswi yó Siria ɔmátɔ. Anuléyekplí Tiro osubúnɔ, tsúfé unú béle ntsusu-yibi ámutɔ ató ní. ⁴Anulótu akasípú aku unu, anulétsiá amú wá nkensiénó. ɔɲe Wankíhé léle súná amú ɔbéé, Paulo máyo Yerusalem wúlutɔ. ⁵Ani nke lɔfon, anulótúá aní ɔkpasu. Bréá anidénatí á, akasípú amu, amú aká pú amú abí féé beyési aní ɔkpa alu yówie ɔpu ɔnó. Inu á, aní féé anuléda akpawunu bó mpái. ⁶Anulégyí nkla, anulówie ntsusu-yibi ámutɔ pú ayó, amú é beyinkí yó wóyí.

⁷Aniléduká ɔpusu tsú Tiro alu bowie Ptolemai osubúnɔ. Bréá anulówie unu á, anuléyeha ahógyipu ání bubu unu itsiá, anulétsiá amú wá ekewúle. ⁸ɔyi kehe a, anulókusu tsú unu ba Kaesarea osubúnɔ. Anulóyoɔswí Bulu asún ɔkan ɔdapú Filipino wóyí. Oyin ánfí gyí ahá abasiénó ámúú bele Yerusalem bee, butsáa ahande agyómá yó ámutɔ ɔkule. ⁹Filipo bu abi tshé abaná, bumɔkúyó ayin wá ki. Bulu ɔnósú atóipú mu abi tshé ánfí bugyi. ¹⁰Anulégyí nke kpalobí unu. Eke ɔku Bulu ɔnósú ɔtɔipú Agabo lótsu Yudea ɔmátɔ ba unu.

Gyu



Tiro otsubúnc ni. (Gyumagyihe 21:3)

11 Olenya bowie laa alí olotsu Paulo osiéts ófé klí mu onutó ibi pú mu ayabi. Múú c̣leblí c̣béé, “Ŋhe Wankíhé c̣béé, ‘Alí Yudafoá bubu Yerusalem béklí c̣há ámús c̣bu ófé ánti, pú mu wá ahá ání bumegyí Yudafo ibuto ní.’ ”

12Bréá anulónu asún ánfí á, ania ahá ámúú bubu unu ámu fée anulókokóli Paulo aniaa omáyo Yerusalem. 13Inu Paulo léfuté aní obée, “Ntogyi sú mlidésú, mlilahá iwí lawú mí alí? Mí mú á, megyí klí ámúbé békiklí mī Yerusalem amu pé nalá iwí yáí há. Mboún nalá iwí yáí ání nówu aní Wíe Yesu su é.”

14Paulo onó lodun aní. Mú su anlési mu tóí wa. Múb anuléblí aniaa, “Ibá mótó alí aní Wíe déklé.”

15Inu oma a, anulókulá aní ató du yó Yerusalem. 16Ania Kaesareafó akasípú aku lóyo unu. Bekpa aní ya oyin okwá butetí mu Mnason wóyító bee, aswú mu wá. Akasípú agyankpapu amuto okule ogyi, otsú Kipro omátó.

Paulo Yerusalem Wie

17Bréá anulówie Yerusalem unu á, ahógyipu amu boho aní atúu. 18Oyi kehe ania Paulonyo anuléyeki Yakobo. Opasua ahande amu fée beba unu. 19Paulo lówa amú onó, olebláa amú tógyítóá Bulu latsun musu bwé ahá ání bumegyí Yudafoto. 20Bréá bonu Paulo asún ánfí á, amú fée bekanfú Bulu. Múb bebláa mu bee, “Opíó nu, Yudafó mpím-mpím ání badámlí kluntó fée bude Mose mbla ámutó kinkíinkín. 21Táme aku babláa amú bee, fasúná Yudafó ání bubu omá bámbású fée fee, bumágyi Mose mbla ámusu. Oma é á, fee bumátin amú abí keté, bumágyi aní amándíé ésú. 22Ibwébwéébwé á, ahá bónu ání faba nfi. Nkálí abóbwe tsú mú iwí? 23Abébláa fu tóá fubwée. Ayin abaná akwá bubu anito baká ntam há Bulu. Ilehían ání bógyuráa iwí. 24Kpa amú ya, amlyogyuráa iwí. Ka amú ato yintáhé fée ikó, méni békpa amú nwun. Inu obéha ahá fée bébi ání futegyí Mose mbla ámusu. Inu su fú iwí asún ámúbé bonu ámu uma mótó. 25Anilawánlín owulú sísí ahógyipwá bumegyí Yudafó dodo. Anilówanlín aniaa, anulablí ání bumágyi atogyiheá bapúhá ikpi. Bumágyi obugya pú obwíá bapúsa m. Bumáwa atsi múa ayin asún é.”

26Mú su bréá oyi leke a, Paulo lékpa ayin abaná ámu ya, musa amúnnyo boýogyuráa iwí. Okoyo Bulu otswékpa unu yéblí ekeá amú iwígyuráa amu iwómo onó, obéba boho afodíe há amútó okugyíoku.

Paulo Kutá Bulu Ɔtswékpa

27Bréá nkeniénsú ámu íbá bɔfun a, Yudafo akvá botsú Asia ɔmátɔ bowun Paulo Bulu ɔtswékpa unv. Ɖɔɔm amú bubu wunsinésú unv ámu féé benya ɔbló Paulosu, bekitá mu. 28Bɔsurá okitikíti beɛ, “Israelfo ayin, mlɔdali ba oo! Oyin ámúú ɔna ɔde ahá atɔ suná, yíntá amú agywun ámu ni. Mudéksú líí ɔmá ánfí, Mose Mbla pú Bulu ɔtswékpa amvsu ní. Alakpá Griikifo kóráá ba Bulu ɔtswékpa wunsinésú nfi. Mú sv alapú ifin da ɔwankíkpa amv.” 29Bεblí mú alí, tsúfé bowun Efesoyin ɔkvá butetí mu Trofimo mva Paulo wúlu amvɔ dodo. Íni sv bukí beɛ Paulo lópu oyin ámu yáa Bulu ɔtswékpa unv.

30Wúlu amvɔ féé leda kpokiti. Ahá bedali tsu amú wóyítɔ srí ba bekitá Paulo, bebitía mu dáli ɔtswékpa wunsinésú unv, fin iban ámu. 31Bréá bude mu da, budekléá bómo mu a, ɔkv léyεbláa Romafɔ ísá akɔpú ɔhande ɔbéɛ, “Kpokiti ladá Yerusalem wúluto.” 32Inunv ɔhande amv lékpa ísá akɔpú ámu akv pú amú ahande akv besrí yó unv. Ɖɔɔm amv benya wun amú alí besi Paulo dá. 33Ɖhande amv lénatí yótv Paulo, ɔleha mu ísá akɔpú ámu bekitá mu, wá mu íkan anyɔ. Múv ɔléfité ahá ámu ɔbéɛ, “Ma gyí oyin ánfí? Ntv alabwé?” 34Ɖɔɔm amv bude okitikíti, budetɔtú. Akv beɛ alí, akv é beɛ alí. Okitikíti amv ɔnɔ lɔwa ɔnlun. Mú sv ɔhande amv mébu ɔnɔkwaltá íbu asún amvɔ. Íni sv ɔleha ɔbéɛ, bukpa Paulo ya ísá akɔpú ámu otsiákpá. 35Bréá bowie obu-ɔnɔ ɔɔvkpá á, ɔɔm amv bude íyin wa. Mú sv ísá akɔpú ámu botsu Paulo wá nkɔnkɔ. 36Ahá ámu féé bubuo Paulo, bude okitikíti beɛ, “Mliha awuna mo mu! Mliha awuna mo mu!”

Paulo lwi Ɖnóle

37Bréá bowie obu ámu ɔnɔ, bóɔv wíé amú otsiákpá unv á, Paulo lébláa ɔhande amv ɔbéɛ, “Nobwíí ípa, mbláa fu asvanku.”

Ɖhande amv léfité mu ɔbéɛ, “Fotonú Griiki ɔblí? 38Mú sv megyí fúgyí Egypteyin amúú ɔleha kpokiti leda bré kuto,

ɔlekpa ahá amɔpú mpím-na (4,000) buo iwɪ ya *dimbísú ámu ni?”

³⁹ɪnu Paulo léle mú ɔnɔ ɔbéé, “Yudayin ngyi mí mú. Tarso ání ibu Kilikia ɔmátɔ bɔkwí mí. Megyi wúlubitɔ notsú. Nobwíí ipa, ha mí ambla ahá ánfɪ asún.”

⁴⁰ɪsá akɔpú ɔhande amu léha mu ɔkpa. Mú su Paulo léyelí obu-ɔnɔ ɔɔvɔká nu, bwé ahá ámu ibi békasu. ɪnu lóto diin. Mú Paulo lébláa amú asún *Hebri ɔblítɔ ɔbéé,

22 ¹“Mí así, apíó aba, mlyaa asu mí anle mí ɔnɔ amlnu.” ²Bréá bonu ání Hebri ɔblítɔ Paulo détoí á, nu loto diin. Mú Paulo lóyo mu asúnsú ɔbéé,

³“Yudayin ngyi. Tarso wúluto bɔkwí mí Kilikia ɔsulúsu, táme Yerusalem nfi beyaí mí. Gamaliel lósuná mí anɪ anáin mbla ámu wankláán. Nɔwa nsi Bulusúm iwɪ fé alíá mli é mlidé mu súm nde. ⁴Ahá ání buna anɪ Wíe ɔkpa ánfɪsu á, nedunká amúsú. Nɔmɔ aku kúraá. Nekítá amótɔ atsi múa ayin aku, kíklɪ amú yótswɪ obu. ⁵Bulu *igyí ɔhapú dehen pú Yudafɔ asún agyípú amu féé bétalí gyi asún ánfɪ iwɪ adánsɪ. Amú wá nɔhɔ ɔwulú tsú pú neya apíó ání bubu Damasko wúluto, mí anyekítá alɪ ahá ámu wa amú ɪkan, pu amú ba Yerusalem, abubiti amú ɪsu.

Paulo Klɔntɔdamlí lwɪ Asún Blí

(Gyumagyihe 9:1-19; 26:12-18)

⁶“Èkéá nɔpu ɔkpa nɔyɔ, neta Damasko wúluto wie tá, ɪbɔbwe fé ɔpa dóduanyɔto á, ɔsáwule pé, wankɪ kuá mú ɔnɔ ihíé bu ɔnlɪn, itsú ɔsúsú ɔwankɪ wúlí mísú. ⁷Múá nówun a, nda ɔsulúto. ɪnu nonu ɔme kv. ɔme amu léfité mí ɔbéé, ‘Saulo, Saulo, ntogyi sú fɔdɪn mísú alɪ?’ ⁸ɪnu nefité mbéé, ‘Fú ma ni, Owíé?’ Mú ɔme amu lébláa mi ɔbéé, ‘Mí Yesu, Nasaretyin ámuú fɔdɪn mísú amu ni.’ ⁹Mí aba ámuú mía amúnyɔ aniná ámu bowun wankɪ amu, táme bumonu asún ání ɔme amu dé mí bláa. ¹⁰Nefité mbéé, ‘Owíé, nto mbwéé?’ Anɪ Wíe lébláa mi ɔbéé, ‘Kusu, afuyɔ Damasko wúluto. Bébláa fu tógyítá Bulu lahá fú ɔbéé fubwéé.’ ¹¹Wankɪ amu ɔnɔ bu ɔnlɪn. Mú su mmetrá wun tɔto. ɪni su mí aba ámu lékítá mí ibi, kpá mí ya Damasko wúluto.

12“Oyin ɔkúá butetí mu Anania, otenyá Bulu ifú bu wúlu amuto. Otegyi Mose mbla ámusu wankláán. Mú su Yudafo ání bubu wúlu amuto féé butetí mu idayilé. 13Oyin ání léba belí mí ansító, bláa mi ɔbéé, ‘Opíó Saulo, bwii ansíbi afuku ató.’ Inunu mí ansíbi lobwií, nowun mu. 14Ɔlebláa mi ɔbéé, ‘Ani anáin Bulu ámu léle fú yái ɔbéé, fubébi mu apé, afubi mu Bi Yilé Ɔbwepó ámu, afonu mu ɔme. 15Tsúfé féba begyi mu iwí adánsie, bláa ahá féé asún ání fonu pú múá fowun. 16Nto futráa fuygo? Kusv kokoli ani Wíe, afuha abubo fú asú, ɔfwí fú lakpan féé le.’

Paulo Bulu Asún Ɔkanda Ɔmátófo

17“Bréá neyinkí yó Yerusalem wúluto nde mpái bo Bulu ɔtswékpa inu á, nowun ató. 18Mútó á, nowun ani Wíe Yesu, ɔlebláa mí ɔbéé, ‘Wa ɔsa bwe, afudali Yerusalem nfi. Tsúfé bumɔɔho fú adánsie ání fégyi tsu mí iwí.’ 19Inu nebláa mu mbéé, ‘Mí Wíe, amó onutó buyin ání netsiá yó Yudafo ofiákpa yéktá ahá ání boho fu gyi, dá amú, wá amú obu. 20Buyin ání bréá boho fú ɔdansiyin Stefano a, mbu inu. Nelí amú ɔma mbéé bumɔɔ mu, nɔho ámu atadie kúráá kítá.’ 21Táme ani Wíe lébláa mi ɔbéé, ‘Nati, nówa fú foyo tsútsúútsú, ahá ání bumegyí Yudafo wá.’ ”

22Ahá tsɔtsɔɔtsɔ amu beya asu nú Paulo asun blíhé alu boɔu bréá ɔleblí ɔbéé, Bulu lówa mu ahá ání bumegyí Yudafo wá. Inu boɔvra okitikíti kúklúkúú, blí bee, “Mlile mu inu! lma aleá obétsiá ɔsulúu anfisv!” 23Inu boɔvra okitikíti, nyá ɔbló wóí amú atadie tswi tsalífwí, kpá isi tswi wá afútó. 24Múú isá akɔpú ɔhande amu lébláa mu ahá ɔbéé, “Mlikpa Paulo, amlipv mu ya mli otsiákpá. Mlipiti mu ató ɔbli ɔnɔkwali, abí tóá svá ahá ámu bude okitikíti svra mu nwunsu alí.” 25Bréá beklí Paulo tá, bee abuda mu a, ɔlefté isá ɔkɔpú ɔhande ɔkúá ɔlú mu wá ɔbéé, “Mbla leha ɔkpa ání mlipiti Romayin oduá bumɔkúgyi mu asún, há mu ipón ató?”

26Bréá isá akɔpú ɔhande amu lónu asún ání á, ɔleyébláa mu ɔhande amu ɔbéé, “Fakle afuse wulv manta iwí. Saa Romayin oyin ámu gyí oo!”

27 Múú ÷hande amu léba Paulo wá, befité mu ÷béé, “Bla mi, lélé Romayin fugyi?”

Paulo lébláa mu ÷béé, “Romayin ngyi.”

28 Múú ÷hande amu lébláa mu ÷béé, “Mí mú á, ɩko kɩɩkɩɩntɩ neka asa nemlí Romayin.”

Táme Paulo lébláa mu ÷béé, “Mí mú á, Romayin onutónutó ngyi.”

29 ɩnɩnɩnɩ ahá á múú beɛ abufite Paulo asún ámu féé badásáín. Ifú lekítá ÷hande amu onutó ó, bréá ÷lebi ání Romayin Paulo gyí asa alahá bawá mu ɩkan.

Gyu

Paulo Yudafɔ Asún Agyípú Ansító Lú

30 ɔyi kehe a, ÷hande amu lékléá ÷bébi t́á Paulo lóbwɛ, sù Yudafɔ buɛ asún kláa dɩnká musu. Mú su ÷leha bɔwɔ́ Paulo lé ɩkan amutɔ, ÷leha betɩ Bulu igyí ahapú dehen pú Yudafɔ asún agyípú amu befia. Múú ÷leha bekpa Paulo belí amó ansító.

23 ¹ Paulo lótsu ansí kɩ Yudafɔ asún agyípú amu díín. Múú ÷lebláa amó ÷béé, “Mí apíó Israelfɔ, nyin mí klɩntɔ ání mmɔkútsiá nkpa laláhe Bulu ansító bɔtu nde.” ² Múú igyí ÷hapú dehen Anania lébláa ahá á múú bulí mantáa mu amu ÷béé, budáa mu ɩnósú. ³ ɩno Paulo lébláa mu ÷béé, “Fú Bulu ÷béda. Fabwé ɩwɩ fé buntíiá bakpá mú afá futútú, fabetsiá asɩ fɛɛ fɔpɩ Mose Mbla gyi mí asún. Fude ahá bláa fɛɛ budá mí ansító. Fú mú megyí mbla ámu fatón a?”

⁴ Aha akvá bulí mantáa Paulo befité mu beɛ, “Bulu igyí ÷hapú dehen fudesia alɩ á?”

⁵ Paulo lébláa amó ÷béé, “Mí apíó, mmeyín mbéé, mugyí Bulu igyí ÷hapú dehen. Tsúfé bɔwanlín wá Bulu asún ámutɔ beɛ, ‘Máblí ÷há ání ɔde fú ɩmású gyí ɩwɩ asun laláhe.’ ”

⁶ Bréá Paulo lówun ání Yudafɔ asún agyípú amutɔ aku bugyi *Sadukifɔ, aku é bugyi *Farisifɔ á, ɔɩsɩrá okitikíti asún ogyíkpá ɩnu ÷béé, “Mí apíó, mí ánfɩ nɩlú á, Farisiyin ngyi. Mí anáin é á, Farisifɔ bugyi. Mí é nohogyi ání awupú bélakúsú. Mú ndeblí su bakpá mí ba asún ogyíkpá nfi ní.”

⁷Olenya blí alí pé, ahá tsotsɔtsɔ amutɔ leye anyɔ. Farisifo ámu pú Sadukifo ámu bɔwa aba nwéengyí bí. ⁸Tsúfɛ Sadukifo buteblí bɛɛ, kusú tsú afúlítɔ kuku má unu. Bulu-abɔpu pú ɔɲe laláhe kuku é ma unu. Táme Farisifo mú bohogyi ání ínɪ fɛé bu unu. ⁹Ínɪ léha nwéén amu ɔnɔ lehie wá ɔnlɪn. Mbla asunápúbá bɔgyi Farisifo bɔkusú líí blí bɛɛ, “Anumókúwun tsitsa kuku oyin ánfɪ iwɪ. Fíalɪ ɔɲé ku ntéé Bulu-ɔbɔpu ɔku lébláa mu.”

¹⁰Nwéén amu ɔnɔ lehie wa ɔnlɪn, ideklé imli ukó. Inu isá akɔpú ɔhande amu lénya ifú ání bɔbwe títi Paulo. Mú su ɔlebláa isá akɔpú ámu ɔbéɛ, “Mliwa ɔsa kpa Paulo ya mli otsiákpá unu.”

¹¹Mú onyé á, anɪ Wíe lébelú Paulo wá, bláa mu ɔbéɛ, “Wa klɪn! Alí ánfɪ fagyi mí iwɪ adánsɪe Yerusalem nfi á, alí kén fuyégyi mú Roma wúlutɔ é ní.”

Paulo Mɔ Iwɪ Agywun Kítá

¹²Mú ɔyi kehe a, Yudafo ámu aku befia, kítá Paulo iwɪ agywun. Beka ntam bɛɛ ní bumɔkúmɔ Paulo buméegyí atɔ, bumóonu ntsu. ¹³Ahá ámúbɔ beka ntam amu budɔn advana (40). ¹⁴Bɔyɔ Bulu igyí ahapú dehen pú Yudafo ahande wá, yébláa amú bɛɛ, “Anɪlahíé ká ntam anɪaa, ní anumókúmɔ Paulo anuméeda tɔtɔ ɔnɔ. ¹⁵Mú su tɔá anɪdéklé anɪaa fúá Yudafo asún agyípu amu mliwéé ha anɪ gyí, mliki ansí wa abí sɪsɪ isá akɔpú ɔhande amu mliaa, ɔpú Paulo ba, amlɪlanu mu asúntɔ. Anɪladá iwɪsu anɪaa, obótsutsúa obowie nfi anɪlamɔ mu.”

¹⁶Paulo mu bitepu ɔku lónu asún ánfɪ fɛé. Mú su ɔlesrí yó isá akɔpú otsiákpá unu yówi tsá Paulosu. ¹⁷Inu Paulo létɪ isá akɔpú ɔhande ɔku, bláa mu ɔbéɛ, “Kpa ɔyasubi ánfɪ ya mli ɔhande wá. ɔde asvanku, ɔbébláa mu.” ¹⁸Isá akɔpú ɔhande amu lékpa ɔyasubi ámu ya amú ɔhande wá, yébláa mu ɔbéɛ, “Obu ɔdɪpú Paulo ɔbéɛ, nkpa ɔyasubi ánfɪ ba fu. ɔde asvanku, ɔbébláa fu.”

¹⁹ɔhande amu lékúta ɔyasubi ámu ibɪ, kpá mu yáa utsétó yéfíté mu ɔbéɛ, “Amansu fubu ání fébláa mí?”

²⁰Ɔyasubi ámu lébláa mu ɔbéɛ, “Yudafɔ ahande babwé agywun beɛ bépina wa abí fú wá beɛ, fukpá Paulo ba obowun amú ɔke, abolanu mu asún ámutɔ wankláán. ²¹Táme máhɔ mǔsú gyi, tsúfé amú ayin ání budun advana (40) beɛ bɛɲaín ɔkpatɔ gyo Paulo, mǔ mu. Amú fée baká ntam beɛ, ɔtɔ méeda amú ɔnɔ, kpéfɔn bréá bamó mu. Fú nkule bugyo séi ání fótšulá kpá mu ba.”

²²Mú ɔhande amu léda ɔyasubi ámu ɔlá ɔbéɛ, “Máyébláa ɔhaa fɛɛ fawí asún ánfɔ tsá mǔsú.” Olesi mu ɔkpa.

Paulo Le Ya Kaesarea

²³Ɔnu ɔhande amu létɔ isá akɔpú ahande abanyɔ, ɔlebláa amú ɔbéɛ, “Mlile isá akɔpú lafanyɔ (200), mpɔnkɔsu adunkápú aduesienɔ (70) pú pía atšwípu lafanyɔ (200) abukusu onyeni dokwebátɔ yɔ Kaesarea. ²⁴Mliha Paulo mpɔnkɔ, odunká amúsú yɔ. Mlikpa mu, amliha mu oyowie ɔmású ogyípú Felike wá pisii.” ²⁵Ɔhande amu lówanlín ɔwulú mántá musu ɔbéɛ,

²⁶“Mí Klaudio Lisia dé ɔwulú ánfɔ wanlín sísí fú, ɔmású ogyípú onumnyampu Felike. Nde fú itsiá ha. ²⁷Nde fú ibi ha ání Yudafɔ lékitá oyin ánfɔ, budekléá bómu mu, táme mía isá akɔpú tsɔtsɔɔtsɔ anilóyɔhɔ mu lé amú ibi. Tsúfé nonu ání Romayin ogyi. ²⁸Ndeklé mbée, nébi tɔá ɔɔbwe. Mú su nɔpu mu ya amú Yudafɔ asún agyípú ansítɔ. ²⁹Ɔnu nowun ání amú mbla iwɔ nwéen budegýí. Mú su ɔmɔkúbwé lakpan kukvá bómu mu, ntée bówa mu obu. ³⁰Táme ɔku laba bowi tsá mǔsú ɔbéɛ, Yudafɔ ámu aku babwé agywun beɛ bómu mu. Inú ɔɔbwe agywun mbée, nɔpu mu sísí fú. Nabláa mu anyabá ámu é mbée bupúu amú asún ba fu. Nafun nfi. Nehá fú itsiá gyágyáágyá.”

³¹Isá akɔpú ámu ɔɔbwe dínká amú ɔhande asun blíhésu. Onyé-onyé ámu bekpa Paulo kɔnkɔɔnkɔn alu yówie Antipatri wúlutɔ. ³²Bréá yí leke a, beha mpɔnkɔsu adunkápú amu bekpa mu yáa Kaesarea, ayabitɔ anatípú amu beyinkí yɔ amú otsukpá. ³³Bréá mpɔnkɔsu adunkápú amu boyówie unu a, ɔpu Paulo pú ɔwulú ámu wá ɔmású ogyípú amu ibtu.

³⁴Ɔmású ogyípú amu lékla ɔwulú ámu, ɔlefíté Paulo ɔbéé, “Nkúnu yin fugyi?” Bréá ɔlebu ání Kilikia ɔmátó Paulo otsú á, ³⁵ɔlebláa Paulo ɔbéé, “Ní fú anyabá ámu bebá á, nónu fú ɔnó asún.” Ihu ɔlebláa amú ɔbéé, buyú Paulo yɔwa Owíe *Herode wóyító, abugyo mu iwi.

Paulo Ɔnótun

24 ¹Nkenú ɔma a, igyí ɔhapú dehen Anania muva Yudafó ahande aku pú Mose mbla ɔbipú ɔkuá butetí mu Tertulo beba Kaesarea. Bebá bekla asún ání bubu tsu Paulo iwi súná ɔmású ogyípú Felike. ²Beti Paulo belí. Mú Tetulo lékla mu asún ɔbéé,

“Onumnyampu Felike, fahá iwilwii laba ɔmá ánfító. Fú nyánsa lalá ató tsɔtsɔtsɔ bwé aní ɔmá ánfító. ³Fú bwehé legyi aní ansí ɔtínegyíótíné. Fúdé ató bwe. ⁴Mmedéklé mbée néyintá fú bré tsɔtsɔ. Mú su nokókóli fu, nya klun ha aní, afunu aní asún tinbí ánfí. ⁵Anilawun ání ató oyintápú oyin ánfí gyí. Ɖtéhá kpokiti tedá Yudafó ɔyító ɔtínegyíótínéá ɔtɔyó. Ɖtráa ogyí Nasaret ɔpasua ámu Bulu igyí ɔhapú. ⁶⁻⁷Alakle ɔpu ifin da Bulu ɔtswékpa iwu, asa ɔkláa ogyá anulékutá mu.⁸ ⁸Ní fú onutó fefíté mu a, fówun ání asún ánfí anudéblí tsú mu iwi ánfí fée bu mútótó ntée uma mútótó.” ⁹Ihu ámu fée botsulá músú beé, asún ámú alablí ámu bu mútótó.

Paulo Ɔnóle Felike Ansító

¹⁰Ɔmású ogyípú Felike lóbwe Paulo ibi ɔbéé, ɔlé mu ɔnó. Ihu Paulo léblí ɔbéé,

“Nyin ání fude asún gyí ɔmá ánfító ulawá ɔpá. Ínu su ibu mu ɔdwe ání néle mí ɔnó fú ansító. ¹¹Nobwíí ipa, fétalí fíté nú ání ibu mútótó ɔyɔ Yerusalem yósum Bulu, umɔkúduw nke dúanyɔ. ¹²Mí anyabá ánfí bumowun mía ɔhaa agyi

⁸24:6b-8a Ínu bu nwulú dada amu akutɔ: Anulɔbwe agywun ání abɔpu aní onutó mbla gyi mu asún. Táme isá akɔpú ɔhande Lisia lɔpu mu túmi bɔhɔ mu lé aní ibitɔ. Mú ɔma a, ɔlebláa aní ɔbéé, apó mu asún ba fu.

nwéen Bulu ɔtswékpa unu. Bumowun mí anha kpokiti ida Yudafɔ ofiákpa kuku ntée ɔtinetine wúlu amuto. ¹³Buma asvansvá bɔpɔgyi adánsie ání amú asún ánífu bu mútó. ¹⁴Táme natsúlá ání ntosúm aní anáin Bulu tsun aní Wíe ɔkpa ámú bude mú ti ɔpasua laláhe amusu. Nɔho Mose Mbla ámu pú múbá Bulu ɔńsú atɔpú amu bɔwanlín tswi é féésú gyi. ¹⁵Nde ɔkpa kú fé alá amú é bude ɔkpa kú ání Bulu ɔbókusúa aha yilé pú aha laláhe féé tsú afúlitó eke kú. ¹⁶Íni su ntɔbɔ mbódí ání mí klun méetsiá há mí pón Bulu mva anyánkpusa féé ansító brégyíbré.

¹⁷“Íniá nedali Yerusalem ulawá ɔpá á, nayínkí ba unu, napú atokiehé nebá mí ahá abɔpɔha ahiánfɔ, mí anha Bulu igyí. ¹⁸Mú ɔbwekpá mbu Bulu ɔtswékpa unu. Bréá nɔgyvráa iwí tá amándíé ámu ɔń á, beba bɔtu mí unu. Megyí mía ɔɔm kuku lɔyɔ unu. Kpokiti kuku é meda unu. ¹⁹Yudafɔ aku botsu Asia ɔmátó ba bubu unu. Ní nɔbwe itɔ laláhe ku á, teki amú kúrää ɔbéba bebláa fu, mía amúnɔy abéblí mú. ²⁰Ní íbɔwa alé kúrää á, ha ahá ání onutó abubli tsitsa oduá Yudafɔ asún agyípú amu bowun mí iwí, bréá bɔpu mí ya amú ansító. ²¹Asun kua kule péá nɔkplón blí bréá nlí Yudafɔ asún agyípú amu ansító gyí, ‘Mludé mí asún gyí nde, tsúfé nohogyi ání awupú bélakúsú tsú afúlitó.’ ”

²²Íniá onumnyampu Felike yin aní Wíe ɔkpa ámu wankláán su á, olotu asún ámu híé. ɔleblí ɔbéé, “Ní isá akɔpú ɔhande Lisia ɔbá nfi á, nówun alá nómɔ asún ámu ɔń.” ²³ɔlebláa isá akɔpú ɔhande ámu ɔbéé, ogyóo Paulo iwí wankláán, ɔha mu otsia iwilwiito. ɔhá mu aba ɔkpa abuki musu.

Paulo Felike Mva Mu Ka Drusila Ansító Lú

²⁴Nke kpalobí ku ɔma a, Felike mva mu ka Drusila ání ogyi Yudayintse beba. Felike léha beyékpa Paulo ba, ɔlobɔtɔ tsú mu hógyi ání ɔbu Kristo Yesuto iwí súná amú. ²⁵Táme bréá ɔdetɔ tsú yilébwe, iwɔsɔgyí pú Bulu asún ogyíké amú ɔbá ámu iwí á, ifú lektá Felike. Mú su ɔlebláa Paulo ɔbéé, “Ku yinki asa. Nenyá bré wankláán ku á, nélatí fú.” ²⁶Bré

ámuto fée Felike léki ɔkpa ání Paulo obódunká tɔku beha mu ɔnɔ. Mú su ibu nu bu unu á, alapina wa abí bayéti Paulo, mu munyo batóí.

²⁷Nfinyo ɔma a, Felike lénatí. Porkio Festo lébetsiá mu obíasú. Íniá Felike déklé ɔbéé, mu asún iwá Yudafɔ ámu ɔdwe su á, olesi Paulo wá obu náti.

Paulo Roma Owie ɔkpa Wá Yo

25 ¹Ɖmású ogyípú Porkio Festo lébetsiá obíasú Kaesarea. Mú eke sáásí a, ɔɔɔdu yó Yerusalem. ²Unu Bulu *igyí ahapú dehen pú Yudafɔ ahande aku ɔɔɔpu Paulo unu asún yótswi mu ansító. ³Ɖɔɔwe agywun ání bóyɔwa obúun ɔkpatɔ, mɔ Paulo. Mú su ɔyókulí Festo beɛ, ɔpú Paulo ba Yerusalem. ⁴Táme Festo lébláa amú ɔbéé, “Paulo da obu Kaesarea wúluto dodo. Imɔɔwa ɔpá mí é néyinkí yó unu. ⁵Mliha mli ahande amu aku abubuɔ mi yo unu, abuyebli tsitsa oduá alabwé.”

⁶Festo létrá tsiá Yerusalem nkekwe ntée nke dú asa oleyinkí yó Kaesarea. Olowie unu á, ɔɔɔwa ɔyóɔpu Paulo ba, oletsíá asún ámuɔ ɔyi kehe. ⁷Paulo lénya wíé unu ali, ahande amú botsu Yerusalem ba amu bekafia mu, kla asún tsɔtsɔɔtsɔ dínká muɔ. Táme bumetalí nyá tɔtɔ púsúná ání asún ámu ibu mútɔ. ⁸Mú Paulo léle mu ɔnɔ ɔbéé, “Mmɔkútún Yudafɔ mbla kuku, ntée bwé tɔku pú ifin da Bulu ɔtswékpa amu ntée pú lalahe kuku é gyi Roma owie dehen.”

⁹Festo déklé ɔbéé mu asún iwá Yudafɔ ámu ɔdwe. Mú su ɔlefuté Paulo ɔbéé, “Fudeklé fée fýyɔ Yerusalem, mí anyegyí fú asún unu?”

¹⁰Paulo léle mú ɔnɔ ɔbéé, “Roma Owie Dehen asún ogyíkpa nli. Nfi ilehián ání bégyi mí asún. Fú onutó fuyin ání mmɔkúbwé Yudafɔ tɔtɔ. ¹¹Ní natún mbla, ilehián lowu á, mmɔkútín ɔkpa mbée bumámɔ mí. Táme ní asún áni Yudafɔ bablí dínká mísú anfi ma mútɔ á, ɔhaa má ɔkpa ání ɔbɔpu mí wá amú ibitɔ. Mú su mú ɔpúɔ mí asún ya Roma Owie Dehen onutó ogyi mú.”

¹²Ἰνυ Festo mua mu ahande boyo abriwa wá. Múu ɔlebebláa Paulo ɔbé, “Fú onutó fée, Roma Owíe Dehen ogyí fú asún. Mú su abópu fú ya mu wá.”

Festo Agripa Paulo Iwi Asún Bláa

¹³Nke ku ɔma a, Owíe Agripa mua Berenike beba Kaesarea. Bebá beha Festo nwunkpa. ¹⁴Betsiá unu wá ɔpá. Mú su Festo lébláa amú Paulo iwi asún. ɔbé, “Felike lówa oyin ɔku obu nfi, olesi mu wá náti. ¹⁵Bréá ɔyo Yerusalem a, Bulu igyi ahapú dehen pú Yudafo ahande beba beblí asún tsɔtsɔtsɔ dínká musu, bláa mi bee nháa mu ipón, abumo mu. ¹⁶Táme nebláa amú mbée, ‘Ima aní Romafɔ amándiétó aní béha ɔku ipón, nkéti mua mu anyabá bafia gyi asún.’ ¹⁷Mú su ekeá mía Yudafo ámu anulóbowie Kaesarea nfi á, mmesi wá obiátú. ɔyi kehe kótóó neha boyo oyin ámu ba, netsiá asún ámusu. ¹⁸Nki mbée mu anyabá ámu bénya tsitsa ku tsú mu iwi, táme bumenya. ¹⁹Mboún amú Bulusúm pú Yesu ɔkú alawú tsun, táme Paulo ɔbé, ɔtráa otsie nkpa iwi asún budebutí. ²⁰Mú su mmowun aliá ɔyo asún ámutɔ. Nefité Paulo mbée, obótsulá abuyo Yerusalem, yégyi asún ámu unu. ²¹Táme ɔleblí ɔbé, mudekléa mu asún iyú Roma Owíe Dehen ansítú. Mú su neha boya mu obu yófun bréá nópu mu sísi Roma Owíe Dehen.”

²²Mú Agripa lébláa Festo ɔbé, “Mí é ndeklé mbée nónu asún ánti tsú mu onutó ɔntótú.” Festo lébláa mu ɔbé, “ɔke néha bópu mu ba, ɔbele asún ámutɔ suna fú.”

Paulo Agripa Ansítú Lú

²³ɔyi kehe a, Agripa mua Berenike behíhie iwi, isá akɔpú pú wúlu ahande bobuo amú ba. Festo léha bekpa Paulo ba unu. ²⁴Mú ɔleblí ɔbé, “Owíe Agripa mua ahá aní bafia nfi féé, mlilawun oyin ánti ɔlú? Yudafo aní bubu nfi pú Yerusalem féé boya mu asún ba mi. Bee, mehián aní ɔbétrá tsiá nkpa. ²⁵Bréá ɔyo asún ámutɔ á, mmowun tóá alabwé su bómu mu. Táme mu onutó ɔbé, mpúu mu asún ya Roma Owíe Dehen. Mú su nabwé agywun mbée,

Gyu

néha bópu mu ya. ²⁶Táme mmowun tsitsa kuku mu iwí ání nówanlín mántá musu bópu mu ya. Mú sù nakpá mu ba mlí ansító ní, títriu fú Owíe Agripa. Ndekléá atéte asún ámutò, òtínéá ileyéyi a, mí anya asvanku wanlín sísí mu. ²⁷Tsúfè nawun ání uma aláá bópu obu òdipú sísí, bumòwanlín t́á alabwé mántá musu.”

Paulo Iwí Onóle Agripa Ansító

26 ¹Múú Owíe Agripa lébláa Paulo òbée, “Nahá fú òkpa, kusu le fú onó.” Paulo lótsu ibi fúá, lé mu onó òbée, ²“Owíe Agripa, nawun ání òkláa lawá mí ogyá nlí fú ansító, nde mí onó le tsú asún ánfí Yudafo bakla dínká mísú anfi iwí. ³Múá ibu ansigyí kúráá gyí, foyin Yudafo amándíé pú t́á butegyí mú iwí nwéen féé. Iní su kókoli, nya klón afonu mí onó.

⁴“Yudafo féé buyin mí tsiátó. Buyin aláá nòputsíá mí òmátó tsú mí nyebito pú aláá nòputsíá Yerusalem wúluto. ⁵Amú féé buyin mí dodoodo. Ní budeklé a, amú onutó bétalí bláa fu ání Farisiyin ngiyi wankláán. *Farisifo é butegyí Yudafo Bulusúm mbla ámusu wankláán òvñ òpasua kugyíku. ⁶T́á svá nde nlí nfi, fude mí asún gyí gyí, nde òkpa kú ání Bulu òbòbwe dínká mu asún ámúbú òleka mú iwí ntam há aní anáin amusu. ⁷Aní abusuan dúanyò ámu féé bòpu ansí dínká ntam anfisú ání ibéba mótó há amú. Mú sù bude Bulu sùm ekekegyíeke ní. Nanáin, ntam anfi sù Yudafo bude asún kláa dínká mísú ní. ⁸Ntogyi sù mlí Yudafo ánfí mú mlímétalí hógyi ání Bulu òbétalí kúsúa ahá tsú afúlitò?

⁹“Teki mí óó nohogyiá nóbwe tógyít́á nétalí pótin Yesu Nasaretyin amu gyumagyihe òkpa. ¹⁰Iní gyí t́á nóbwe Yerusalem ní. Bulu igyí ahapú òehen amu beha mí túmi bée, nkíta Bulu ahá ámu tswí obu. Ní bómò amú é á, mí é ntotsúlá mbée bumóò amú. ¹¹Netsiá yó Yudafo ofiákpa kugyíkuto, ntehá butekítá amú, bíti amú isu, híé amú buteblí Yesu iwí abususu. Amú iwí òbló su ntedínká amúsú yó òmá bámbású yékítá amú, bíti amú isu.

Paulo Uklontɔdamlí lwi Asón

(Gyumagyihe 9:1-19; 22:6-16)

12“Mú ɔkpa eke ɔku Bulu igyí ahapú dehen amu beha mí nɔyɔ Damasko wúluto yɔbwe ní. 13Bréá nna ɔkpatɔ nɔyɔ á, Nanáin, ubwe fé ɔpa dóúanyɔtɔ, wanki ku lɔwankí tsú ɔsúsú wólí mísú. Uɔwankí dun owí. Uɔwankí wólí mía mí aba ámúú aniná ámusu. 14Inu aní fée anilédida. Nonu ɔme ku *Hebri ɔblítɔ ɔbéé, ‘Saulo, Saulo, ntogyi sù fúdin mísú alí? lwi tɔi fudewa.’ 15Múú nefité mbée, ‘Owíé, fú ma ni?’ Múú aní Wíe lébláa mi ɔbéé, ‘Mí Yesu ni. Mísú fúdin ní. 16Nabele lwi ɔwan súná fú, méni fɔbwe mí osúmpú. Kusu, afuyébláa ahá tɔá fawun tsu mí lwi nde, pú múá néle súná fú. 17Nɔkɔ ho fu tsú ahá ámúú nde fú wa sísí, bugyi fú onutó ahá Yudafo pú amúá bumegyí Yudafo ibitɔ. 18Fóbwií amú ansí, bédali tsu oklúntɔ ba wankitɔ. Féle amú tsú *Satan túmi asi ba Bulu wá, méni obési amú lakpan kíé amú, fówun bénya otsiákpá ahá ámúú Bulu latsun amú hógyisu bwé amú mu ahá amutɔ.’

Gyu

Paulo Gyumagyihe lwi Asón

19“Nanáin Agripa, iní su nɔbwe dínká ató ámúú nowun itsú ɔsúsú ámusu. 20Gyankpapu a, nɔyɔ Damasko wúluto. Mú ɔma a, nɔyɔ Yerusalem pú Yudea ɔmátɔ fée. Nɔyɔ ahá ámúú bumegyí Yudafo ámu é wá. Neyébláa amú mbée, busii lakpan bwe, abudamli ba Bulu wá, abutsia tsiátɔ aní ilosuná aní badámli klontɔ. 21Iní sù Yudafo ámu bekitá mí bréá mbu Bulu ɔtswékpa unu beé bómo mí ní. 22Táme Bulu dé mí kpa alu bɔfun nde. Mú sù nlí nfi nde, nde mli nyebí-ahande fée tɔá nawun bláa ni. Asón aní Mose mua Bulu ɔnɔsú atɔɔpú amu beblí beé ubéba mútɔ kén ndeblí. 23Beé, ‘Ilehián aní Kristo, (ɔhá ámúú Bulu ladá mu ofúli amu) obówun iwɔsun wú, méni ɔbɔbwe ɔha gyankpapu aní ɔbɔkusu tsú afúlitɔ. ɔbɔpu wanki ba Yudafo pú ahá aní bumegyí Yudafo é.’ ”

24Bréá Paulo léblí iní á, ɔmású ogyípú Festo lɔkplun wa Paulo ɔbéé, “Paulo, fú nwun layíntá! Fú ɔwulóbi dubidubi amu lahá fude gbedé lo.”

²⁵Múú Paulo lébláa mu ɔ́bée, “Onumnyampu Festo, mmedé gbedé ɔ́. Ɖɔ́kwali onutónutó nde mli bláa. ²⁶Nanáin Agripa yin asún ánfí fée iwí. Nétalí bláa mu faan. Nahogyi ání megyí asun ɔ́áínhé igyi há mu, tsúfée bumɔ́bwe mú ɔ́áín. ²⁷Nanáin Agripa, fɔ́hɔ́ Bulu ɔ́ɔ́sú atɔ́pú asun wanlínhé amusu gyi? Nyin ání fɔ́hɔ́ músú gyí.”

²⁸ɔ́nu Owíe Agripa lébláa Paulo ɔ́bée, “Fahogyi fée fétalí dámlí mí bwé Okristoyin bré tinbí ánfíto?”

²⁹Paulo lébláa mu ɔ́bée, “Bré tinbí o, bré tsɔ́tsɔ́tsɔ́ o, mí mpái ání ndeɔ́ há Bulu gyí, fúá ahá ánfí mlidé mí asun blíhé nu nde ánfí fée mléba ɔ́ɔ́bwe fé mí. Táme bumáwa mli tkan anfi mú.”

³⁰ɔ́nu á, Owíe Agripa mua ɔ́má sú ogyípú Festo pú Berenike mua ahá ámúú butsie unu ámu fée ɔ́kɔ́sú dáli. ³¹Beyéluú itsétó, amú wulewule budeblí bee, “Oyin ánfí mókúbwé tɔ́tɔ́á ilehián ha mu lowu ntée mu obuwa.” ³²Múú Owíe Agripa lébláa Festo ɔ́bée, “Teki ní oyin ánfí méblí ɔ́bée, Roma owíe dehen kóún ogyíi mu asún á, teki fétalí sí mu.”

Paulo Puya Roma Wúluto

27 ¹Bréá beblí alí tá á, bekitá agywun bee, abótson ɔ́pusu yó Italia ɔ́mátó. Ɖɔ́pu Paulo mua obu adípú aku é wá Romafɔ́ usá akɔ́pú ɔ́hande ɔ́kúá butetí mu Yulio ibitɔ́. Ɖhande anfi bu Roma Owíe Dehen Augusto usá akɔ́pú ɔ́pasuato. ²Anlówie ntsusu-yibi kúá itsú Adramitio fún, iyó ɔ́pu ɔ́nó awúluá ibu Asia ɔ́mátó. Makedoniayin Aristarko, otsú Tesalonika amu é bu anitɔ́. ³Ɖyi kehe a, anléluú Sidon ɔ́pu ɔ́nó. Usá akɔ́pú ɔ́hande Yulio lówun Paulo nwe, ɔ́leha mu ɔ́lɔ́yɔ́ mu aba wá, méni béha mu atóá ibéhián mu. ⁴Anlókútsú tsú unu, afú lefia aní ɔ́pu amusu. Múú anlóyɔ́tsun Kipro ɔ́sulúw awunso fún, tsúfée afú ámu medétsúun unu mú. ⁵Anlótsun ɔ́pusu yótsun Kilikia pú Pamfilia fónsú yówie Likia ɔ́sulúw, Mira wúluto. ⁶Usá akɔ́pú ɔ́hande amu lówun ntsusu-yibi kúá itsú Aleksandria wúluto iyó Italia ɔ́mátó, ɔ́lele aní wá mútó.

⁷Anidín ɔpu amusu putɔɔ. Mú su anilégyí nke tsɔtsɔtsɔ ɔkpatɔ. Ilepian aní asa anulówie Knido. Afú ámu méha aní ɔkpa. Mú su anulópu yótsun mantáa Kreta ɔmá. Inu á, anulópukplí tsun Salmone wúlu ɔsaasí fún. Tsúfé afú medétsún inu mú. ⁸Íniá anulótsun ɔpu ɔnɔ-ɔnɔ kúrää ó á, ilepian aní asa anulóbowie ɔtunekvá butetí inu “Osubúno Wankláán,” ibu mantáa Lasea wúluto.

⁹Nke tsɔtsɔtsɔ lóɔtsun, nkeá butɔpúkí ɔnɔ kúlí lakpansikíé é ulɔtsun. Nke ámutɔ é á, ɔpu amu ideda. Mú su músú tsun lɔwa ifú. Íni su Paulo lótsí kplá amú ɔbéé, ¹⁰“Mí awié, nawun ání ní anuméki wankláán aní ɔkpa ání natít a, abóhulú ató tsɔtsɔtsɔ. Megyí ató pú ntsusu-yibi ámu wule, aní onutónutó é abésin mótó.” ¹¹Táme isá akɔpú ɔhande amu lóhɔ ntsusu-yibi ámutɔ ɔhande pú mu wie asón sí Paulo. ¹²Íniá osubúnɔ inu uma aleá abétsiá inu nyankputswiébi su á, amótó ahá tsɔtsɔtsɔ beblí beé abénatí inu. Amú ansí dún ání abóyówie Foinike, igyi Kreta osubúnɔ, ibu owí ɔkplíwíékpá fún, tsíá inu nyankputswiébi amu.

Atsufú Kpɔnkpɔntí ɔpusu Tsúbun

¹³Inu afú kuá itsú gyɔpɔsu lówa tsúbun brevu bi. Íni su ahá ámutɔ akv bosusúu ání amú agywun ámu békanáa. Mu su belatsú símpiá utehá ntsusu-yibi telíí tsukole wá ntsusu-yibi ámutɔ, ɔɔputsun Kreta ɔpu ɔnɔ-ɔnɔ. ¹⁴Táme umɔwa ɔpá kuku afú kpɔnkpɔntí kv lókusú tsú Kreta ifúnsú. Afú ámu dá gyí “Binasu-owí-ɔdalíkpa-afú.” ¹⁵Afú ámu lébefia aní. Íniá anumétalí sánkíá ntsusu-yibi ámu su á, anulési iwí há afú ámu, ulɔpu ntsusu-yibi ámu náti. ¹⁶Ulɔpu mú srí yótsun mantáa ɔpu nsuné ɔsulúv kuá butetí mú Kauda asi. Ulɔwa ɔnlun asa betalí tsú ɔklunbi ámúv butɔpólé ahá ání bude ntsu wie, isian ntsusu-yibi ámu ɔma amu wá yibi ámutɔ. ¹⁷Inu ntsusu-yibi ámutɔ agyómá ayɔpú bebitía ɔklunbi ámu wá ntsusu-yibi ámutɔ. ɔɔpu ɔfé klí ntsusu-yibi ámu kínkíínkín, méní uméemaín. Benya ifú beé afú ámu íbótsvan ntsusu-yibi ámu yówie Libia osubúnɔ osublúv. Mú su bele tati ání isian ntsusu-yibi ámusu, méní ntsusu-yibi ámu bénatí putɔɔ.

Mú óó á, afú ámu lótsvan ntsusu-yibi ámu náti ɔwunlínsú. ¹⁸Mú ɔyi kehe a, afú ámu ɔnɔ lehié wá ɔnlun. Mú su bɔwa amú atɔ svráhé le wá ɔputɔ bi. ¹⁹Ɔke sáásí a, bele ntsusu-yibi ámu iwi ntobí kugyíkúá amú ibi léda wá ɔpu amutɔ. ²⁰Anitráa anumédé owí múa ntsrakpabi wúun nke tsɔtsɔɔtsɔ, afú ámu ɔnɔ é utráa bu ɔnlun. Mú su aní ansí metrá dinká tɔɔsu dun lowu.

²¹Nke tsɔtsɔɔtsɔ lɔtsun, ahá ámu butráa bumédé atɔ gyí. Inu Paulo lókúsú líí amú féé ansítɔ, bláa amú ɔbéé, “Mí awié, teki ní mlílónu mí ɔme, anuménatí Kreta otsubúnɔ a, teki anumókú befia ipian, húli aní atɔ ali. ²²Táme séi á, mbláa mli amlinu. Mliwa klun, tsúfé anutɔ ɔkuku móowu, ntsusu-yibi ánfí wule obéyintá. ²³Ígye onyé á, mí Buluá ntosúm lówa mu ɔbɔpu mí wá. ²⁴Ɔlebláa mi ɔbéé, ‘Paulo, mánya ifú. Ibwébwéébwé á, féli Roma Owíe Dehen ansítɔ. Bulu lawá awitɔle há fú. Mú su alahɔ ahá ánfí fúa amúnyc mlíná ánfí féé nkpa.’ ²⁵Mú su mí awié, mlunya klun, tsúfé mí ansí dun ání Bulu ɔbéha íbéba mútɔ fé alíá mu ɔbɔpu labelbláa mi. ²⁶Táme ibwébwéébwé á, afú ámu íbéda aní ya ɔpu nsiné ɔsulúv kusu.”

²⁷Ɔke dúanasí onyé á, afú ámu bu músú ide anida yáa nsiné inu ɔpuá bútetí mú Adriasu. Mú ɔyínsiné á, ntsusu-yibi ámutɔ agyúmá ayɔpú bosusúu ání anlatá ɔsulúv tu tá. ²⁸Mú su ɔpu ɔfé kápú ɔpu amu oklú ki. Benya ayabi lafakule advanyɔ (120). Bré kpalobí ɔma betrá kapú mú ki a, benya ayabi adukwebá (90). ²⁹Ifú lekítá ntsusu-yibitɔ agyúmá ayɔpú ámu ání abódu abutású. Mú su beda asímpi ání butɔpókítá ntsusu-yibi líí ana kéké síán mú ɔma, sí mú wá ɔpu amutɔ. Bokokóli Bulu beé ɔyí ikée amú. ³⁰Agyúmá ayɔpú amu aku bekleá bésrí dalí ntsusu-yibi ámutɔ. Mú su beki ansí lé ɔklun kusubi ámu dinká ɔpu amusu híéé, fé símpi ámu budepusíán ɔklun ámu ɔnɔsú. ³¹Táme Paulo lébláa ísá akɔpú ámu pú amú ɔhande ɔbéé, “Ní ntsusu-yibi ámutɔ agyúmá ayɔpú bumetsiá mútɔ á, mluméenya nkpa.” ³²Mú su ísá akɔpú amu beka ɔklun kusubi ámu ɔfé tun, há afú lótsvan mú náti.

³³Ɔyí íbá beke a, Paulo lóbwíí ipa há amú fée ɔbée, bugyí ató. Ɖleblí ɔbée, “Kwasieda anyo sósón ní, atogyihe medínká mli ɔwólí. Mlumókúgyi tɔtɔtɔ. ³⁴Nobwíí ipa há mli, mli gyi ató ngya, méni mli mómóowu. Mli tɔ ɔkuku nwunsu-imi kule kúrání mósɔfwí.” ³⁵Paulo lótwí tá á, ɔlele bodobodo ipín, dá Bulu ipán amú fée ansító, ɔlemaín ku wá gyí bi. ³⁶lnu anto okugyíɔku lówa klun gyi ató. ³⁷Ani ahá lafanyo aduesienósie (276) bu ntsusu-yibi ámutó. ³⁸Bréá amú fée begyi ató alíá bétalí á, bele ayó amú ɔbu ntsusu-yibi ámutó ámu fée wá ɔputó, há ntsusu-yibi ámu leta odwin.

Ntsusu-yibi Ámu Bwiebwie

³⁹Bréá ɔyí deké a, agyómá ayɔpú ámu bowun ání ɔpu amu bámbi lowie ɔsolúu kusu, táme bumebi otsubúno odúá igyi. lnu bɔbwe agywun bee békan ntsusu-yibi ámu ya unu. ⁴⁰Mú su bekakáa símpí ámu tintun wa ɔputó. Besankí ntsusu-yibi ámu mpaí é. Múú botsu tati yílé amú isian ntsusu-yibi ámu ansító ámu fúá, fíá afú ámu, bɔpu bɔyó ɔpu ɔnó. ⁴¹Táme ntsusu-yibi ámu lɔyódu ɔesusu, sin unu, ɔpu amu leda wólí ɔklun amu ɔma máín-máín mú.

⁴²Isá akɔpú ámu bɔbwe agywun bee bómo obu adípú ámu fée, méni ɔkuku méepití dali, srí. ⁴³Táme amú ɔhande léklé ání ɔbóhɔ Paulo nkpa. Mú su ɔmeha amú ɔkpa ání bumóɔ obu adípú ámu. Táme ɔlebláa amú ɔbée, ɔhagyíɔha ání ɔbétalí á, otúu wie ɔpu amutó, ɔputí dali. ⁴⁴Ɖma a, ɔleha atráhe amu é bɔdu dínká ntsusu-yibi ámu afunsu yówie ogbémgbesu. Amú fée begyi mbala ámusu, bɔyó ogbémgbesu unu.

Malta Wúluto Asún

28 ¹Ani fée aniléɔnká ogbémgbesu amusu. Ɖma asa anilébi ání ɔpu nsiné ɔsolúu kuá butetí mú Malta ni. ²Nyankpu détswíe, su atsalí bu unu. Táme unu atsiápú amu begyi ani buale dúdá ogyá ɔpu ɔnó unu há ani, ani fée anilétsiá mú asi. ³Paulo lékpa ngayibí ɔbée amupowa ogyá ámutó. Saa ube bu mútó. Ogyá ámu okunkúu su ube ámu lótswi yi Paulo ɔbiweto. ⁴Bréá unu atsiápú amu bowun ání

iwɔ ámu yí mu a, bebláa aba bee, “Ahá ɔmɔpú oyin ánfɔ gyí. lɔu mótɔ́ ání aladálɔ ɔpu amɔtɔ, táme anɔ ɔkpɔ ámúú ɔtebíí ɔu ámu médekle ɔbée otsía nkpa.” ⁵lɔu Paulo lówunáa ɔbɔ, iwɔ ámu lékpa wíe ogyá, táme tɔtɔ mɔ́bwe Paulo. ⁶Amú fée besi bulí budekú. Buki bee Paulo obópunya, ntée ɔbétɔn wu. Táme bréá belú wá ɔpá tɔtɔ méba a, beladámí amú agywun bí bee, “Ɔkpɔ ɔku ɔhá ánfɔ gyí.”

⁷Ɔhande ɔku bu ɔsulúv ku ɔpu nsúné ɔu. Mu dá gyí Publio. Ɔlɔhɔ anɔ atúu, kpá anɔ ya mu wóyítɔ, anulétsiá mu wá nkensá kéké. ⁸Alɔ bré amɔtɔ á, owísó lakítá ɔhande amu mu si, mu iwɔtɔ latú; ɔda. Paulo léyeki mu, ɔlɔpu ɔbɔ dínká musu bɔ́ mpái há mu, iwɔ lɔwa mu ɔnlɔn. ⁹Mú ɔma a, ɔlɔpu alɔpɔvábá bubu ɔsulúv amusu fée ba, Paulo létsa amú ɔlɔ. ¹⁰Anulétsiá ɔu tsra asa, ɔufɔ ámu ɔbɔwa anɔ numnyam, kíe anɔ atɔ́ tsɔtsɔwɔtsɔ. Bréá anidénatí á, ɔlɔpu atɔ́á íbéhián anɔ ɔkpatɔ fée sí anɔ ɔkpa.

Roma Wúluto Yɔ

¹¹Anilóyɔ ɔpu ɔnɔ́ yótsu ntsusu-yibi kvá ɔlatsiá ɔu nyankpɔtswíebi amu fée. Itsú Aleksandria wúluto. Besré atabí akvá bugyi ɔkpɔ yi ntsusu-yibi ámu ansítɔ. ¹²Anuléyelí ɔpu nsúné ɔsulúv ku ɔsubúnɔ, butetí mú Sirakus, anulétsiá ɔu nkensá. ¹³Tsú ɔu á, anilóbomlí tsɔn bowie wúlu yíle kvá butetí mú Regiosu. Mú ɔyi kehe a, afú ku lówa tsóvɔn bí tsu ayasi fún. Nkenyɔ́ ɔma a, anilóyowie ɔsubúnɔ kvá butetí mú Puteoli. ¹⁴Anuléfía ahógyipu aku ɔu. Bokokóli anɔ bee, atsía amú wá nkensíénɔ. Anilókusú tsú ɔu á, anilóyɔ Roma wúluto. ¹⁵Apíó ání bubu Roma wúluto bonu ání abá. Mú su amótɔ́ aku beba íbíá ogyíkpá, butetí ɔu Apia. Aku é beba ɔtɔnekvá butetí ɔu Afɔ́ Ɔswúkpá Asa, ɔbɔ ɔkpatɔ befia anɔ. Bréá Paulo lówun amú á, mu ansí legyi, ɔleda Bulu ɔpán.

Bulu Asún Ɔkanda Roma Wúluto

¹⁶Bréá anilóyowie Roma wúluto á, Roma aban léha Paulo ɔkpa ání ɔbétalí yétsiá ɔtínéá odeklé, táme isá ɔkɔpú ɔku obógyo mu iwɔ brégyíbré.

17 Eke sáásí a, Paulo létí Yudafo ahandeá bubu unu fée fia. Múú òlebláa amú òbée, “Mí apíó, ibu mútśá mmọ́pu lalahe kukubku gyi mí ọmátśfọ, mmeyintá aní anáin amándíé kuku é. Táme aní ahande ání bubu Yerusalem bekítá mí ya Romafo. 18 Bọ́yọ́ mí asúntś á, teki bekleá bési mí, tsúfẹ bomowun tsitsa kuku mí iwí asa bẹe bumóó mí. 19 Táme Yudafo ámu bumotsulá ání busíi mí. Amú bwehé su nọkúlí ọkpa mbée, Roma Owíe Dehen onutó ogyíi mí asún. Megyí bẹe mbu mí ọmá iwí asvansu. 20 Mú su natí mlí fia ní. Tsúfẹ ọhá ámúú Israelfọ buđe mu ọkpa kí amu sú nda ịkan anfitọ.”

21 Amú é bebláa Paulo bẹe, “Anímókúhọ ọwulú kuku tsú Yudea ọmátś tsú fú iwí. Aní apíó Yudafo ámutọ ọkuku é mókútsú unu bebláa aní asun laláhe kuku tsú fú iwí. 22 Táme ha aní abí fú agywun. Tsúfẹ anyin ání ahá buteblí asun laláhe tsú Bulusúm ọpasua ánfí fúbu mútś ánfí iwí ọtínegyíọtíné.”

23 Mú su mva Yudafo ámu behie ekeá béfia. Eke ámu lófún a, Yudafo tsọtsọwtsọ beba befia Paulo wóyí unu. Paulo létọ́ kplá amú. Ọ́ọ́pu Mose Mbla pú Bulu ọ́nśú atọ́pú amu asun wanlínhé lé Bulu iwíegyí ámu iwí asúntś súná amú tsú nyanki pọ́n owí. Ọ́ọ́bọ́ mbódí ání ọ́bédamlí amú abuhọ́ Yesu Kristo iwí asún ámusu gyi. 24 Amútś aku bohogyi, táme aku bumohogyi. 25 Amú wulewule amu ọ́nọ́ mọ́bwe kule, bọ́wa asún ámu príi bí. Táme Paulo létrá bláa amú asun kua kule asa bedasáin. Ọ́lebláa amú òbée, “Ọ́je Wankíhé lébláa mlí anáin ọ́nọ́kwali amu tsun Bulu ọ́nśú ọ́tọ́pú *Yesiasu. Ọ́bée,

26 ‘Yọ́ ahá ánfí wá afọ́yẹbláa amú fẹe,

Bónu lánú, táme bumóonu mú asi.

Béki láki, táme buméebi mú.

27 Tsúfẹ kluntọ́ bu amú odwin.

Batílá asu, bun ansíbi é.

Ní megyí alí á, teki bówun atś

bónu asún,

amú agywun bóbwií.

Bédamlí ba mí wá,

nétsa amú ọ́lọ́.’ ”

28-29 Paulo lómɔ mu asún ɔnɔ ɔbé, “Mú su ndekléá mlibú ání Bulu nkpahɔ́ asún ámu lawíé ahá ání bumegyí Yudafo é wá dodo. Amú mú bóhɔ́ asún ámu.”^h 30 Paulo létsiá un nfinyɔ kéké. Oletsíá mu onutó obu háhɛɔ. Oletsíá hɔ́ afɔ́ ání beba besináa mu féé. 31 ɔlɔwa klɔn dá Bulu iwíegyí ámu twi asún ɔkan, olosuná aní Wíe Yesu Kristo twi asún é ahá féé ansító. ɔhaa métin mu ɔkpa.

^h 28:29 Múts yée 29 bu nwló dada amu akɔtɔ: *Bréá Paulo lébli asún áñfi tá á, Yudafo ámu bɔkɔsɔ náti, amú wɔlɛwɔlɛ bɔna bɔde asún ámu nwéen gyí.*

Ɔwulúá Paulo Lówanlín Sísí Romafɔ

1 ¹Mí Yesu Kristo osúmbi Paulo dé Ɔwulú ánfɔ wanlín sísí mli Romafɔ. Bulu létɔ mí ɔbée, mbóbwɛ mu *sumbí ɔyɔpú. Ɖelele mí yáí ání néda mu *asun wankláán ámu ɔkan.

²Bulu léhɛ asun wankláán ánfɔ yáí tsun mu ɔnósú atɔ́púsu dodoodo, bɔwanlín mú wá mu asun wanlínhé amutɔ. ³Asun wankláán ámu ɔlɔtɔ́ tsú mu Bi, ogyi anɔ Wíe Yesu Kristo ɔwɔ. Anyánkɔpúsa ɔkpasu á, ɔlelɔ Owíe *Dawid abusuantɔ. ⁴Bulu léle súná ání léle mu Bi ní. Ɖlɔtsun *Ɖɔɔ Wankíhé túmito kósúá mu tsú afúlitɔ. Mogyí anɔ Wíe Yesu Kristo. ⁵ɔna musu Bulu lawá awɔtɔle lé mí mu sumbí ɔyɔpú, méni nékpa ɔmá bámbásúfɔ b́hɔ mu gyi, nú mu ɔme. ⁶Mli Romafɔ ánfɔ Bulu latí ɔbée, mlibóbwɛ Yesu Kristo klé é mlibu mútɔ.

Rom

⁷ɔni su mí Paulo nde Ɔwulú ánfɔ wanlín sísí mliá mlibu Roma féé. Bulu lahíé dwé mli, tí mli, pú mli bwé mu ahá. Nde anɔ Sí Bulu mva anɔ Wíe Yesu Kristo kokóli mbée, bogyí mli buale, abuha mli iwilwii.

Paulo Bulu Ipánda

⁸Gyankpapu a, nna Yesu Kristosu nde mí Bulu ipán da mlɔtɔ okugyíɔku nwunsu. Tsúfé mli Kristo hógyi su mli dá de ɔyítɔ féé. ⁹Napú mí klɔn féé nde Bulu súm tsun mu Bi Yesu ɔwɔ asun wankláán ɔkan ámúú ndeda ámusu. Obégyi mi adánsɛ ání ntekáín mli su brégyíbréá nde mpáú bɔ. ¹⁰Ntetsíá kokóli mu ekekegyíeke mbée, ɔsúla finki ɔkpa ha mi, antali besúnáa mli nke ánfɔtɔ. ¹¹Tsúfé ɔdɔn mí ɔwólíá mía mlinyɔ abéfia, méni nébeha mlénɔ Ɖɔɔ Wankíhé

atokiehé ání íbówa mli ɔwɔnlín. ¹²Múá ndeblí gyí, ní nebá mli wá á, mí hógyi bówa mli ɔwɔnlín, mli klé é íbówa mí ɔwɔnlín.

¹³Mí apíó, ndekléá neha mli bi ání nabwébwéébwé agywun ání nébesnáá mli, táme tɔku de mí ɔkpa tíin bɔfun nde. Ndekléá néba unv bɔtɔí kplá ahá, méni bóho Yesu gyi, fé alíá nahá ahá bahɔ mu gyi ɔmá bámbátɔ. ¹⁴Ínu gyí tɔá ilehián ání nóbwe ahá féétɔ ni. Ilehián ání nóbwe mó Griikifɔ pú ɔblí bámbá ablípú, atiansipv pú aha mimláhe féétɔ. ¹⁵Ínu sv mí ansí lapé ání nébláa mli ahá ání mliɔv Roma wúluto é asun wankláán ámu.

Bulu Asun Wankláán Ámu Túmi

¹⁶Bulu asun wankláán ámu uma mí péli. Tsúfé múgyí Bulu túmi ání ɔdepuho ɔhagyíɔha ání ɔloho Kristo gyi nkpa ní. *Yudafɔ gyánpá, asa ahá ání bumegyí Yudafɔ bubuo. ¹⁷Tsúfé asun wankláán ámutɔ Bulu léle alíá ɔɔbwé ɔha yilé ɔbwepú súná. Mú ɔsú-así féé ulí hógyisv. Ínu Bulu asun wanlínhé amv leblí ní. “ɔhá ání mu hógyi sv Bulu latsú mu ání mu asún da ɔkpa obénýa nkpa.”

Lakpan ɔbwepú ɔhagyíɔha Gyí Bulu Ansítɔ

¹⁸Bulu léle mu ɔblɔ súná tsú ɔsúsú. Olenya ɔblɔ ahá ání butamanyá mu ifú, buɔde lalahe bwe, bapú amú owuntɔlun buɔde Bulu asún ání igyi ɔnɔkwali ɔkpa tíin. ¹⁹Bulu ɔbébití amú usv. Tsúfé tɔá ilehián ání bébi tsú Bulu iwí ida amú ansítɔ dodo. Bulu onutó léle mú ɔwan súná ámu. ²⁰Ibo mútɔ ání ɔhaa tamawun Bulu túmiá utamatá pú alíá ogyi. Táme tsú bréá Bulu lóbwe ɔyí ɔpá á, Bulu tsiátɔ meɔjain. Tsúfé mu atɔ bwehé lele mú súná wankláán ání ahá bétalí wun mú, púbí mu. Ínu sv ɔhaa má ɔnɔ kuku lé. ²¹Buyin Bulu, táme bumɔwa mu numnyam ání iletsiá mu, bumɔpv ipán kuku é há mu. Mboún tɔá uma así búɔɔgywíun tsu Bulu iwí. Butamatráa nu mu asún ámu así. Basin oklúntɔ. ²²Butekí amú iwí bee betun ansí, táme bemimláa. ²³Basí Bulu ɔkɔankpapv amv tswí, yɔ buɔde ikpi ání buma nkpa

súm. Bɔpwe amú, ntée sré amú fé nyankpusa ání otowú, ntée mbubwi, ntée mbwi pú awɔ aku.

24Íni su Bulu ladámli ɔma há amú, basí bude atɔ laláheá budeklé tsu amú klwntɔ bwe, amúa amú aba bude iwɪ supáa. 25Butamatráa hɔ Bulu ɔɔkwali amusu gyi. Asún ání uma mótó mboún budehógyi. Íni su bayɔ bude Bulu atɔ bwehé mboún súm, sí atɔ féé ɔbwepú ámu onutó. Kanfú letsia mu bré féé! *Amen.

26Amú bwehé ánti su Bulu lédamli ɔma há amú, buna bude hakpanla bwe. Amú atsi kúráá besi ayin wá di, fé alía ida yaí, amú wulewule buda aba wá. 27Ali kén ayin é besi atsi wá di fé alía butɔbwé mú yáí, buda aba wá ní. Hakpanla anfi bwe su Bulu lébití amú ɪsu ání lekanáa ha amú, bude mú wúun ni.

28Íniá bakíná Bulu bi su á, Bulu ladámli ɔma há amú, bude asukpan susúu, bude tɔá uma aleá ɔha ɔɔbwe bwe. 29Lalahe sɔ́n bu amótó. Iku gyí; lakpanbwe, opotsuawa, olu, ɔnsípe, ahámɔ, mblíkpée, ahámlé, agywun laláhe bwe pú ahátsii. 30Ahá ɔnótin, Bulu asúnkiná, atómábú, iwtsú, iwɪ adábi da. Lakpan ɔkpagyáa, akwípúsu kusólí. 31Butamagywún, butamagyi amú asun blíhésu. Butamadwé ahá, butamawun ahá nwe. 32Íniá buyin ání Bulu mbla ámu losuná ání ɔhá ání otsiá atsiábi anfi odu obówu óó á, megýí íni ánti nkole budebwe. Butráa bude lalahe abwepú é ateto-ɔnlin wa dínká músú.

Bulu Tamakɪ ɔha Ansító

2¹Íni su fúá futsie fude fú aba ulá le, fuma ɔnɔ kuku lé Bulu ansító. Tsúfé fude aku ulá le, táme fude mú odu kén bwe. Mú su ní fude amú ulá le á, iwɪ pón fúdeha. 2Anyin ání Bulu ɔbéha ahá ání bude íni odu bwe ipón. Anyin é ání mu asún da ɔkpa. 3Mú su ní fúde ahá ulá le lakpan ání fú onutó fúdebwe su á, bi ání Bulu é ɔbéha fú ipón. Fuméetalí kɔli dali mu ibi. Ntée fumeyín ali? 4Bulu lalé mu yilé pú mu awɔɔle ɔwan súná fú, alanyá klwɔn há fú, táme fumobu mu. Ntée fumeyín ání alía fédamli klwntɔ yínkí ba mu wá

su alalé mu awitɔle súná fú? ⁵Táme kluntɔ bu fu odwin, asutɔ bu fu onlɔn. Mú su isutɔbití ání ida gyo fú ekeá Bulu Onokwalɔpu obégyi asún utráa démoní tsía. ⁶Bulu obéka ohagyícha ɔkɔ mu bwehé onɔ. ⁷Aku bapú ansí dínká ání bénya numnyam, idayilé pú nkpa ání utamatá. Mú su banyá klɔn buɔe yilé bwe ekekegyíeke. Amú Bulu obéha nkpa ání utamatá ní. ⁸Táme akvá bubu onsípe, bakíná onokwali amu pú yilébwe, bubuo lalahe mú á, Bulu obópu oblɔ gyi amú asún, bití amú isu wankláán. ⁹Asun wunhe múa iwɔsun béba lalahe abwepú féésú. Ibégyankpá tú *Yudafɔ, asa ibótɔ ahá ání bumegyí Yudafɔ. ¹⁰Táme Bulu obówa yilé abwepú numnyam, há amú iwilwii, trá ha amú aye. Obégyankpá há Yudafɔ, asa ibótɔ ahá ání bumegyí Yudafɔ. ¹¹Tsúfé Bulu tegyi asún onokwalɔsu, otamakɔ ohaa ansítɔ.

¹²Ahá ámúú bumeyín Mose Mbla ámu, buɔe lakpan bwe ámu óó bɔfwi. Táme Bulu móɔpu mbla ámu gyi amú asún. Ahá ámúú buyin mbla ámu asa buɔe lakpan bwe ámu mú á, Bulu obélú mbla ámusu há amú ipón. ¹³Tsúfé megyí ahá ání buyin Mose Mbla ámu asún da okpa Bulu ansítɔ. Mboún ahá ání butegyi músú. ¹⁴lbu mútɔ́á ahá ámúú bumegyí Yudafɔ bumeyín Mose Mbla ámu. Táme ní amú onutó buɔe mbla ámusu gyí a, buɔesuná ání buyin yilé múa lalahe amú kluntɔ. ¹⁵Amú bwehé ánti desuná ání Bulu lówanlín mbla ámu dínká amú klɔnsu. Amú klɔn de adánsɛ gyí ání lélé buyin mú. Tsúfé bré kutɔ á, amú agywun tehá amú ipón, bré kutɔ é á, itehá amú asu. ¹⁶Alí kén ibéba eke ámúú Bulu obótɔsun Yesu Kristosu gyi tɔ́á ahá babwé nǎintɔ iwɔ asún ní. Alí Kristo iwɔ asun wankláán ámúú nde mú okan da ámu idesuná ní.

Yudafɔ Pú Mose Mbla

¹⁷Fú fee Yudayin fugyi, fú ansí dɔn Mose Mbla ámusu, fúɔepu ɔbɔ sí kántɔ́ fee Bulu mu bi fúgyi. ¹⁸Fuyin Bulu apé, tsúfé fakásí Mose Mbla ámu. Mú su fuyin tɔ́á ɔbɔ alé. ¹⁹Futeki fú iwɔ ansibi abwiepú okpapú, fúgyi fé okandíe há ahá ání bumeyín Bulu, basin oklúntɔ. ²⁰Fú fee fugyi aha

mimláhe ansí ɔ́tɪnpv. Fétalí súná ahá ání bumeyín ɔ́lala t́sá ibu alá. Tsúf́é fatsúlá f́ee Mose Mbla ámv sv fabí t́ogyít́, fabí ɔ́ɔkwali kugyíku é. ²¹Táme íntá f́ude ahá yilé suná á, ntogyi sv fumóosuná f́ú iwí ḿú? Fude ɔ́kan da bláa ahá f́ee bumáwi at́, táme f́ú onut́o f́udewi? ²²F́ee bumát́ɔ mbva, táme f́ude mbva t́ɔ? F́ee bumásuim ikpi, táme futowí ɔ́kpiasí at́. ²³Futotsú iwí Mose Mbla ámv sv, táme futepán ḿúsú. Íni sv f́ude Bulu kpóí. ²⁴Bulu asun wanlínhé amv léblí ɔ́béé, “Mli Yudafo bwehé sv ahá ání bumegyí Yudafo buɔ́de Bulu iwí asun laláhe blí.”

Rom

²⁵Ní mlidé Bulu mbla ámvsv gyí á, mli *ketétún bu labi. Táme ní mlitamagi ḿúsú á, mlygyí fé ahá ání bumetun keté. ²⁶Ní ɔ́ku métun keté, ɔ́de Mose Mbla ámvsv gyí a, ogyi fé keté ɔ́tɪnpv Bulu ansít́. ²⁷Mli Yudafo mlyin mbla ámv, tsúf́é b́owanlín ḿú tswí mli, betun mli keté é, táme mlit́epán Mose Mbla ámvsv. Ḿú sv ɔ́há ání ɔ́metun keté ḱuráá, táme ɔ́de mbla ámvsv gyí ɔ́béle mli ilá. ²⁸Tsúf́é megyí keté ɔ́tɪnpv gyí Yudayin onut́o. Ketétún onutónut́o bu unv. Megyí ɔ́yulúsv ketétún keke. ²⁹Ní ɔ́ku gyí Yudayin onutónut́o á, mv klunt́ɔ t́osúná. Ketétún onut́o itsú klunt́ɔ. Bulu ɔ́ɣé ámv t́ɔ́bwe ḿú, megyí mbla ámvú b́owanlín tswí amvsu gyí. ɔ́há ání Bulu ɔ́ɣé ámv iletun mv keté á, Bulu onut́o t́ékánf́ú mv, megyí nyankpusa.

3 ¹Mómú labi ḿɔmv *Yudafo bubv dun ahá ání bumegyí Yudafo? Nt́ee labi ḿɔmv *ketétún bu? ²Ibu ḿút́sá labi ámv ihíé itsɔ́! Gyankpavu gyí, Bulu ĺɔpv mv klunsv asún wá Yudafo ibit́ɔ. ³Ibu ḿút́ ání amút́ aku bumɔ́ɔ Bulu asún ámvsv gyi. Táme amú t́siát́ anfi odu ibétalí há Bulu obési t́sá ɔ́lehie ání ɔ́ɔ́bwe lóó? ⁴Ekkekéke! Megyí ali ígyi! Ní afunupv ahá f́éé bgyi óó á, Bulu ḿú á, ɔ́ɔkwali ɔ́gyi. Igyi fé alíá Owíe *Dawid lébláa Bulu ɔ́béé,

“Ní f́ɔ́t́í á, ahá bublí beé f́ú asún igyi ɔ́ɔkwali.

Ní begyi f́ú asún é á, bublí beé f́ú asún da ɔ́kpa.”

⁵Ní aní t́siát́ laláhe lalé Bulu t́siát́ wankláán súná á, mómú ní ɔ́de aní isv butí aní t́siát́ laláhe sv á, nkáli abéblí? Abéblí anaa, Bulu má ɔ́kpa bítí aní isv? (Nyankpusa asun

blíhé ndeblí á.) ⁶Ekεkεεεε! lma mótɔ alí. Ní Bulu asón meda ɔkpa á, nkáli obégyi ɔyítɔ ahá féé asón?

⁷Ɔku ɔbéfité ɔbéε, ní mí ɔkɔkwalmáwá lalé súná ání Bulu bu ɔkɔkwali, ulatsú mu dá fúá á, mómú ntɔ sù Bulu ɔbétrá ha mí pón ɔbéε lalahe ɔbwepú ngyi? ⁸Ní igyi ali á, mómú ntɔ sù anuméebli aniaa, “Mliha abwe lakpan, fówun Bulu tsiátɔ wankláán uln ɔwan?” Fé ali ámúú aku bude mí ɔnɔ tun beε, nna ndeblí ámu. Bulu ɔbéha amú ipón alíá ulekanáa.

Ɔhaa Mégyí Yilé Ɔbwepú

⁹Nkáli mee abéblí pómó mú ɔnɔ? Mú su aní Yudafo anudun ahá ámúú bumegyí Yudafo ámu lóó? Ekεkεεεε! Anumódun amú ɔkpagyíɔkpasu. Nablí bɔtsun mbéε, ukule Yudafo pú ahá ámúú bumegyí Yudafo ámu féé bugyi. Tsúfé lakpan lagyi amú féésú. ¹⁰Bulu asón leblí ɔbéε,

“Ɔhaa asón meda ɔkpa Bulu ansítɔ. Ɔbakúle kúráá médalí mótɔ.

¹¹ Ɔhaa tamanú Bulu asón asú;
ɔhaa tamadúnká Bulu ɔkpa.

¹² Amú féé badámlí ɔma há Bulu,
ámú féé bafwí.

Yilé ɔbwepú ɔkɔku má unu. Ɔbakúle kúráá médalí mótɔ.”

¹³Bulu asón ámu létrá blí ɔbéε,

“Butekle asukpan blí.

Butɔpú amú ɔnɔ mlé ahá.

Amú ɔnótɔ asun blíhé tɔmó fé uwo elín.”

¹⁴Bulu asón ámu létrá blí ɔbéε,

“Ulwí pú asun-sunsín blí butegyí di.”

¹⁵Ɔletrá blí ɔbéε,

“Ahámɔ ma amú ɔpá.

¹⁶ Ɔtínegyíɔtínéá buna á, bude ahá yintá, bude ahá ipiantɔ wa.

¹⁷ Bumeyín ɔkpa ání itɔpú iwilwii ba.”

¹⁸Bulu asón ámu ku é leblí ɔbéε,

“Butamanyá Bulu ifú.”

19Séi á, anyin ání asúngyíasún ání Mose Mbla ámu losuná á, ida ha Yudafo ámú bɔpu mbla ámu há ámu. Mú su ɔkuku méenya ɔkpa lé asvansu ɔnó bréá Bulu dé ahá féé asún gyí. 20Tsúfé Mose Mbla ámusu gyí méetalí há ɔha ogyi asu Bulu ansító. Há mbla ámu utehá anutebí ání lakpan abwepú anigyí.

Alá ɔha Tegyi Asu Bulu Ansító

21Séi á, Bulu lasúná ɔkpa ání ɔtɔtsun músú há ɔha asu. lmená Mose Mbla ámusu gyísu. Táme Mose Mbla ámu pú Bulu ɔnósú atɔpú amu asun wanlínhé léblí ɔkpa ámu iwí asún yáí. 22ɔkpa ámu gyí ɔkpa ání Bulu tɔtsun há ɔha asu mu ansító ní. Yesu Kristo hógyisu Bulu tɔtsun ho ɔhagyíɔha. Ma fugyi o, ma fumegyí o, nkúnu fotsú o, nkúnu fumotsú o, ɔhaa mótsun ɔtsan Bulu ansító. 23Tsúfé ahá féé babwé lakpan. Mú su bahúli Bulu numnyam. 24Awitɔle Bulu lawá há ani. Mú sù nyankpusa obégyi asu mu ansító ní. Awitɔle anfi ina Kristo Yesusu. Muléka nyankpusa nwunsu iko. 25-26Anyánkpúsa bude lakpan bwe tsú bré ɔpá, táme Bulu lénya klun há amú, ɔmebití amú usu. Séi á, Bulu labɔpu Yesu bó afɔdie, pú mu obugya lé ani iwí mbusuo, méni abótsun mu hógyisu nyá lakpansikíé. Bulu lɔbwe mú ali púsúná ání mu asún da ɔkpa, méni ibósuná nke ánfito ání yilé ɔbwepú ogyi. Ototsú ahá ání bɔho Yesu gyi ání amú asún da ɔkpa mu ansító.

27Séi mé, tɔku bu unvá abótsu iwí músú? Tɔto má unu. Ntogyi sù anuméetalí tsú iwí? Mose Mbla ámu su lóó? Ó-o! Ani hógyi su anuméetalí tsú iwí. 28Megyí atɔ wankláán ámú Mose Mbla losuná ani bwe ámu su antegyí asu Bulu ansító. Ina Kristosu hógyisu abégyi asu Bulu ansító. 29Yudafo nkule Bulu ógyi? Megyí ahá ání bumegyí Yudafo mú Bulu ogyi? Ee! Amú é amú Bulu ní. 30Bulu ɔkule pé bu unu. Mú su ina hógyisu olotsulá ání Yudafo asún da ɔkpa. Ina hógyi kénsú ɔbho ahá ámú bumegyí Yudafo ámu é ání amú asún da ɔkpa. 31Mú su ilehián ání abóho Yesu gyi, sí Mose Mbla ámusu hógyi lóó? Ekekeke! Megyí ali ígyi. Yesu hógyi téhá antekítá mbla ámutɔ kínkíínkín.

Rom

Abraham lwi Asún Lasúná Altá Hógyi Bu Labi

4 ¹Séi á, amansu aní *Yudafɔ abéblí tsú aní náin *Abraham lwi? Ntɔ olowun tsu Bulu aháɔ asún ánfɔ lwi? ²Ní yilébwe sù Abraham légyí asu Bulu ansítɔ á, múmú ɔbu tɔá ɔbɔputsú lwi, táme megyí Bulu ansítɔ. ³Nkálí Bulu asun wanlínhé amu léblí? Ɖleblí ɔbéɛ, “Abraham lɔ́hɔ Bulu gyi. Mú su Bulu lótsu mu ání mu asún da ɔkpa.” ⁴Ní ɔku ɔyɔ agyómá á, buteká mu ɔkɔ. Megyí atokiehé ɔkɔká ámu gyi. Igyi tɔá ilehián ání obénya tsú mu agyómá ɔyɔtɔ. ⁵Táme megyí ahá bwehé su, mboún amú hógyi sù Bulu totsú amú ání amú asún da ɔkpa. Tsúfé Bulu téhá lakpan abwepú ání bɔhɔ mu gyi butegyí asu mu ansítɔ. ⁶Owíe *Dawid léblí oyúla asún ánfɔ kén dodo. Ɖlɔtɔí tsú ahá ání Bulu mékɔ amú bwehé asa olotsu amú ání amú asún da ɔkpa lwi. Ɖlɔwanlín mú wá Bulu asun ámutɔ ɔbéɛ,

⁷“Bulu layúla ahá ání alasi amú lakpan kíe amú, alagyúra amú!

⁸Ahá ámúú Bulu lasí amú lakpan kíe amú, ɔméɛtrá kaín mósú ámu bégyi ɔdwe!”

⁹Keté atínpu nkule bú ɔdwegyí anfi Owíe Dawid dé mú lwi asún blí ánfɔ? Ó-o! Ahá ámúú bumetun *keté ámu é bubu mútɔ. Kaín ání anɔlakla asvanku Bulu asun wanlínhé amutɔ. Ania, “Abraham lɔ́hɔ Bulu gyi. Mú su Bulu lótsu mu ání mu asún da ɔkpa.” ¹⁰Bré mɔmu Bulu lótsu mu ání mu asún da ɔkpa? Ɖletun keté asa lóó? Ekekeke! Bulu lótsu mu ání mu asún da ɔkpa dodo. ¹¹Ɖma-ɔma asa ɔlebetun keté púhie mu nsu. Ilosuná ání mu hógyi sù Bulu lótsu mu ání mu asún da ɔkpa. Ínu su ogyi fé ahá ámúú bumetun keté, táme bɔhɔ Bulu gyi, Bulu lótsu amú ání amú asún da ɔkpa ámu. Mú su ogyi amú féé ɔsí ní. ¹²Ogyi keté atínpu amu é ɔsí. Tsúfé megyí amú ketétun su, mboún amú Buluhógyi su. Fé alí ámúú Abraham lɔ́hɔ Bulu gyi asa betun mu keté ámu.

Tɔá Bulu Léhie Yáí Mu Ahógyipu

¹³Bulu léhie Abraham mva mu abí-aná ání ɔyítɔ féé ubɔbwe amú klé. Megyí beɛ Abraham légyi Mose mblasu,

su Bulu léblí asón ánfí. Táme íniá ɔlɔɔ Bulu gyi, Bulu é lótsu mu ání mu asón da ɔkpa mu ansító su. ¹⁴Ní ahá ání bude Mose Mbla ámutɔ obégyi Bulu ató á, múmú ɔha Bulu hógyi igyi kpaali. Bulu nhuhé há ɔha é ma labi koku. ¹⁵Tsúfé Bulu ɔbls mbla ámu tetí. Táme ní mbla má unu á, mblatun é uma unu.

¹⁶Mú alí su ina hógyisu ahá bétalí nyá atóá Bulu léhíe yáí há amú. Atokiehé ámúú ɔbópvhá *Abraham abí-aná ámu íbéda amú íbi. Megyí ahá ání butegyi mblasu nkule bú, táme ahá ání bɔhɔ Bulu gyi fé Abraham é. Tsúfé Abraham gyí aní fée ɔsí. ¹⁷Fé alí ámúú Bulu asun wanlínhé amu íleblí ɔbéé, “Napú fú bwé ɔmá tsɔtsɔɔtsɔ ɔsí ámu. *Abraham gyí aní fée ɔsí Bulu ansító.” Tsúfé olohogyi ání Bulu téhá awupú nkpa, ɔtehá tóá uma unu yáí uteba mútɔ fé tóá íbu unu yáí. ¹⁸Bréá ɔtɔ má unuá Abraham ɔbópɔ mu ansí dínká múú á, ɔlɔɔ Bulu gyi ání ɔbóbwe mu ɔmá tsɔtsɔɔtsɔ ɔsí alí ámúú ɔleblí yáí ámu. Bulu lébláa mu ɔbéé, “Fú abí-aná békílé fé ntsrakpabi.” ¹⁹Alí bré ámutɔ á, Abraham laho níí lafakule (100). Mú su aladan tsun kwíúú. Alí kén mu ka *Sara é ɔkwíúúni lawú, ɔméétrá kwí ní. Oyin íni fée, táme ɔmekpa mu hógyi ɔma. ²⁰Íni fée ɔma a, omegyí nwéen ɔbéé, itó ámúú Bulu léhíe mu amu ímééba mútɔ. Mboún ɔlektá mu hógyito kínkíínkín, ɔlekanfú Bulu mú su. ²¹Tsúfé ɔhíé oyin ání Bulu ɔbétalí bwé itó ámúú alahíé há mu amu. ²²Mu hógyi aní sù Bulu léblí ɔbéé, mu asón da ɔkpa ní. ²³Megyí mu nkule su ɔwanlín wá Bulu asón ámutɔ beé, “Bulu lótsu mu ání mu asón da ɔkpa.” ²⁴Aní é, aní su ɔwanlín mú. Ní anúlɔhɔ Bulu gyi a, obótsu aní ání aní asón da ɔkpa. Mvgyí ɔhá ání ɔlɔkusúa aní Wíe Yesu tsú afúlitɔ. ²⁵Aní lakpan sù Bulu léha bele mu há ɔmɔ mu. Bulu lókusúa mu tsú afúlitɔ, méni obótsu aní é ání aní asón da ɔkpa.

Isogyí Bulu Ansító

5 ¹Aní hógyi sù Bulu latsú mú ání aní asón da ɔkpa. Mú su aní Wíe Yesu Kristo lalá aní Bulunyo nsiné. ²Hógyi su ɔkpa lafínkí há aní nya. Íniá aní Wíe Yesu sù Bulu

Rom

awitɔle anfi laba anisu, anɔlapó hogyi nyá ɔlúkpá nya a, ihíé bu anɔ ɔdwe. Tsúfɛ anidín ansí ání abébenya mu numnyam amv kv. ³Ansí utrása de anɔ gyí ání anidé ipian wúun. Tsúfɛ ipian téhá anɔwá nsi. ⁴Nsiwa tehá anitebí tsíá alíá ilegyi Bulu ansí. Ní abí tsíá alíá ilegyi mu ansí á, abédunká ansí musu. ⁵Ansí pudínká Bulusu mééha péli méekitá anɔ. Tsúfɛ Bulu lótsun *Ɔɣe Wankíhé amóú ɔɔpohá anɔ ámusu pú mu ɔdwe wá anɔ klɔntɔ.

⁶Bréá anutrása anigyí lakpan abwepú, animá ɔwɔnlín á, Kristo lóbowu há anɔ lalahe abwepú bréá Bulu onutó léhiɛtɔ. ⁷Ní ɔkv asún da ɔkpa kúrása á, ubówa ɔnlɔn asa ɔkv obótsulá wú há mu. Fíalɔ ɔha yilé mú á, ɔkv ɔbówa klɔn wú há mu. ⁸Táme tsá ilosuná ání Bulu tehíé dwé anɔ gyí, bréá anigyí lakpan abwepú á, ɔleha Kristo lóbowu há anɔ. ⁹Na Yesu Kristo obugya amóú ɔɔwɔlí asi ámusu Bulu lési anɔ lakpan kíé anɔ, tsú anɔ ání anɔ asún da ɔkpa. Kristo su ɔbéle anɔ kokooko. Ɔméɛbutí anɔ isu lakpan abwepú isu-ɔbutíkɛ amv. ¹⁰Teki Bulu alupú anigyí. Táme tsóvɔn mu Bi ámu lowusu á, alabwé anɔ mu anyawíé kláklá. Ínía anɔlabwé mu anyawíé su á, ɔbóhɔ anɔ nkpa kokooko. Tsúfɛ Kristo é bu nkpa. ¹¹Megyí mú wule. Múá utrása dɔn kúrása gyí, anidé ɔdwe gyí. Tsúfɛ anɔ Wíé Yesu Kristo lalá anɔ Bulunyo nsiné. Mú su anɔlabwé Bulu anyawíé.

Adam Mva Kristo

¹²*Adam nkule bwehé su lakpan léba ɔyítɔ. Mu lakpan ámu sú lowu léba ɔyítɔ. Ínɔ su lowu lénya túmi ɔhagyíɔhasu, tsúfɛ ahá féé babwé lakpan. ¹³Lakpan bu ɔyítɔ asa Bulu lópu mu mbla ba Mose. Táme bréá Bulu mókúpú mbla ámu ba mu a, olobun ansíbi lakpansu. ¹⁴Tsú Adam brésú ɔɔtu Mose brésú lowu legyi iwíé anyánkópúsa féésú. Ibu mútɔ ání buɔɔtɔn mbla kvkv fé Adam, táme amó é bowu.

Akú alíá *Adam léklé ɔlɔn ɔmapv amv. ¹⁵Adam ná ɔtsan há Yesu Kristo. Tsúfɛ Bulu awitɔle amv megyí fé Adam lakpan ámu. Adam nkule lakpan sú ahá féé bowu. Táme Yesu Kristo nkule awitɔlewa su Bulu laláwá awitɔle, pú mu

atokiehé há ahá tsotsɔɔtsɔ. Mu atokiehé ámu ibu bíá dun lowu ámu. ¹⁶Tsá anyánkɔ́sa benya tsú Bulu atokiehé ámuɔ una ɔtsan há tsá benya tsú Adam lakpan ámuɔ. Mu lakpan kule pé amu léha ɔhagyíɔha légyi pón Bulu ansító. Múlɔ́pu lowu ba, táme lakpan tsotsɔɔtsɔ ɔma a, Bulu atokiehé kule pé léha Bulu lótsu ahá féé ání amú asún da ɔkpa mu ansító. ¹⁷ɔbakúle lakpan su lowu légyi iwíe ahásv. Táme alá Bulu lahié wá awítóle há ahá ibu wánwan. Alatsun Yesu Kristo nkolesu tsú aní ání aní asún da ɔkpa, ania munyɔ abégyi iwíe aní nkpatɔ féé.

¹⁸Íni su alí ámuɔ ɔbakúle lakpan su Bulu léha ahá féé pón ámu a, alí kén ɔbakúle yilébwe su Bulu lahá ahá féé bagyi asu mu ansító, alahá amú nkpa ání itamatá é ní. ¹⁹Alí ámuɔ una ɔbakúle asuɔ-ɔnlun su ahá féé bemlí lakpan abwepú ámu a, alí kén una ɔbakúle obú su Bulu obótsu ahá tsotsɔɔtsɔ ání amú asún da ɔkpa ní.

²⁰Bulu lópu mbla ámu ba, méni ahá bówun lakpan ání budebwe wankláán. Táme bréá lakpan dékleí á, Bulu awítóle é idekleí tsía. ²¹Lakpan légyi ahásv, uléha ahá bowu. Alí kén Bulu lawá awítóle tsú ahá ání amú asún da ɔkpa mu ansító ní. Íni lahá ahá batsun aní Wíe Yesu Kristosu nyá nkpa ání itamatá.

Kristo Su Anubu Nkpa

6 ¹Nkált abéblí séi? Ilehían ání abóyɔ aní lakpanbwesu, méni Bulu awítóle bómoní tsía? ²Èkekeke! Igyi fé anilawú, mú su lakpan ma túmi anísv. Ntogyi su abétrá tsía bwé lakpan? ³Bré ámuɔ ɔɔɔ aní *asú ámu a, ania Kristo Yesunyɔ anilóbwe kule. Mliyín mú alí? Alí bré ámuɔ á, ania Kristonyɔ lówu, ⁴bopolá aní, tsúfé ania munyɔ anilabwé kule. Mú su alí ámuɔ aní Sí Onumnyampu amu lókusú mu tsú afúlito ámu a, alí kén aní é abétsiá itsiá pɔpwetɔ ní.

⁵Mú su íniá ania munyɔ anilóbwe kule mu lowutɔ á, alí kén ania munyɔ lóbwe kule mu kusú tsú afúlito é ní. ⁶Mlhubí ání bréá beda Yesu mántá *oyikpalíhe amusu á, mua aní tsiátɔ dada amu lówu, méni anumétrá bwe lakpan nkɔ́bí.

Rom

⁷Tsúfé ní ɔha owú á, ɔtamatráa bwe lakpan. Lakpan má musu túmi. ⁸Ínúá ania munyɔ anulawú su á, anibu hógyi ání ania munyɔ abétsiá nkpa. ⁹Aniyin ání Bulu lókusúa Kristo tsú afúlitɔ. Ɖméetrá wu ekekeke. Lowu utráa ma musu túmi. ¹⁰Yesu lówunáa wu ɔsáwule, méni ɔbéle lakpan unv. Táme ínúá otsie nkpa á, otsie ha Bulu. ¹¹Mli é mliki mli iwí ání mlulawú há lakpan, amlile mli iwí le mú túmi asi. Mlitsia nkpa ha Bulu, tsúfé mliha Kristo Yesunyɔ mlilabwé kule.

¹²Ínu su mlumáha lakpan igyi mli nyankpusa-oyí ání íbówu ánfisu, méni umécha ɔwólí laláhe igyi mliɔ, amlibwe tɔ́á ideklé. ¹³Mlimápu mli nyankpusa-oyí iwí ató há lalahewé. Mboún mlipu mli iwí féé ha Bulu, fé ahá ání alakúsúa amó tsú afúlitɔ ba nkpatɔ, ɔpu mli bwe tɔ́á ida ɔkpa. ¹⁴Ma alá lakpan ɔbétrá gyi mliɔ, tsúfé séi mlitráa mlumá Mose Mbla ámu asi. Bulu awitɔle asi mboún mliɔ.

Yilébwe Nkpábi Anigyí

¹⁵Ínu ɔma a, amansu abéblí? Ibo alá abétrá bwe lakpan séi ání ánumá mbla ámu asi, anibu Bulu awitɔle mboún asi? Ekekeke! ¹⁶Mliméyín ání ní mleba iwiasí há tɔku, mlidé mú apé bwe, mlidé mú súm fé mli wíe a, mlilabwé mú nkpábi? Ní mleba iwiasí há lakpan á, múmú mlówu, táme ní mleba iwiasí há Bulu á, mlégyi asu mu ansítɔ. ¹⁷Mlilóbwe nkpábi há lakpan bré kutɔ. Séi á, mlilapú mli klun féé ho atosunáhé amúbú bapúhá mli ámu, mlidé músú gyí. Mú su nde Bulu ipán da. ¹⁸Bulu lahá mlilagyi iwí lé lakpan ibutɔ, mlilabwé nkpábi há yilébwe. ¹⁹Alíá íbóbwe mlónu asún ání asi, sú napú nkpábi tsiátɔ nde mli suná. Bré kutɔ á, mlilóbwe mli iwí nkpábi há hakpan múa lalahewé. Alí kén ilehián ání mlóbwe mli iwí nkpábi ha yilébwe, méni mlífun yi nu.

²⁰Bré ámuú mligyí nkpábi há lakpanbwe ámu a, yilébwe má túmi mliɔ. ²¹Labi mɔmu mlilénya tsú lakpan ámuú mlilóbwe, nde ibo mli péli amutɔ? Mú labi gyí lowu. ²²Táme séi mú á, Bulu lahá mlilagyi iwí lakpanbwe túmi asi. Mlilamlí mu nkpábi. Labiá mlénya tsú mútɔ gyí; mlétsiá tsiátɔ́a ílɔfun yi, nyá nkpa ání utamatá. ²³Tsúfé lakpanbwe

ikoká gyí lowu, táme Bulu atokiehé gyí nkpa ání utamatá. Mú ɔɔpɔgyi anɪ buale tsun ania anɪ Wíe Kristo Yesu ikulebwesu ní.

Mbla Ámu Itráa ma Túmi Akristofɔsu

7 ¹Mí apíó, mli fée mliyin Mose Mbla ámu. Mliyin ání bréá ɔha tsie nkpa á, ɔbu mbla asi. ²Fé ní ɔtsi tsia okúlu, mu kulu amu mókúwú á, ɔbu mu kulu amu asi. Táme ní mu kulu amu owú a, alagyi iwɪ, okúlu wóyí mbla kuku utráa medé mu. ³Mú alɪ su ní mu kulu amu mókúnyá wú, ɔdálɪ mu ɔma a, alatɔ mbua. Táme ní mu kulu amu owú mú á, ɔtráa ɔma okúlu wóyí mbla asi. Mú su ní ɔláyétsiá oyin bámbá á, ɔmɔkútɔ mbua. ⁴Mí apíó, alɪ kén igyi há mli ní. Mli é bréá mliɔhɔ Kristo gyi a, mliɪa munyɔ mliɔwɪ. Mú su mlitráa mliɪmá Mose Mbla asi. Séi á, mliɪabwé ɔhá ámúú Bulu lókusúɪa tsu afúlito ámu klé, méni mlóbwe yilé há Bulu. ⁵Tsúfé bréá anɪbu anɪ tsiátɔ dada amɔtɔ á, mbla ámu léha anɪ ɔwólɪ laláhe legyi anɪsu. Mú su anɪɔbwe tɔá ɪtɔpú lowu ba. ⁶Táme séi mú á, Bulu lahá anɪlagyi iwɪ tsú mbla ámúú tekɪ anɪbu mú asi ámu ɪbitɔ. Ania Kristonyɔ lówu. Mú su mbla ámu utráa ma túmi anɪsu. Anɪlagyi iwɪ, anɪdé Bulu súm tsun ɔkpa pɔpwe ání ɔɔɔ Wankíhé dé anɪ sunású. Megyí ɔkpa ání mbla wánlínhé amu lósuná anɪsu.

Rom

Mbla Ámu Múa Lakpanbwe

⁷Mú su anɪdéblɪ aniaa, ɪtɔ laláhe Mose Mbla ámu gyí? Ekekeke! Mbla ámu ɪbéha abébi tɔá lakpan gyí. Tekɪ ní mbla ámu ɪmeblɪ ɔbéɛ, “Mápe ansí fú bá atósú” a, tekɪ mmebi tɔá gyí ɔnsípe. ⁸ɪna alɪ mbla ání su lakpan lénya ɔkpa pú ɔnsípe kugyíku wá mítɔ. Tsúfé ní mbla ámu má unu á, tekɪ lakpan má túmi mísú. ⁹Mí onutó netsiá bré kutɔ, mmebi mbla ámu. Táme bréá nebebi mú á, nowun ání napán músú. Lakpan ɔbwepú ngyi. Mú su nówu. ¹⁰Nowun ání mbla ámúú nkɪ mbéɛ, ɪbéha mí nkpa ámu lópu lowu ba mi. ¹¹Tsúfé lakpan lénya ɔkpa tsun mbla ámusu mlé mí, mó mí.

¹²Tsiátɔ mbla ámu mú á, tsitsa kuku ma mú iwɪ. Mú nhuhé kugyíku lowankí, ida ɔkpa, ibu alé é. ¹³Mú su idesuná ání Bulu mbla ánfí ibu alé ánfí lópu lowu ba mi? Ekekekeke! Megyí alí ígyi. Lakpan lótsun itɔ wankláán ámusu pú lowu ba mi. lna mbla ámusu lakpan léle iwɪ súná ání itépi ma ale.

Atsá ldeko Nyankpusato

¹⁴Anyin ání ɔhétɔ atɔ mbla ámu gyí, táme mí mú á, nyankpusa ngyi. Nabwé lakpan ɔkpábi. ¹⁵Mmetálí bí mí tsiátɔ, tsúfé megyí tsá ndeklé ntɔbwé, tsá mmedéklé mboún ntɔbwé. ¹⁶Ní tsá mmedéklé ndebwe mú á, natsúlá ání Mose Mbla ámu ibu alé. ¹⁷Idesuná ání megyí mí dé alí atɔ ánfí bwe. Mboún lakpan túmiá ibu misu téhá ntɔbwé mú. ¹⁸Nyin ání bré ánfí mbu mí tsiátɔ dada anfitɔ á, itɔ wankláán kuku má mítɔ, tsúfé nyankpusa ngyi. Ntekleá nɔbwe yilé, táme nakásián. ¹⁹Mmedé yiléá ndeklé bwe. Lalahe amú mmedékléá nɔbwe ámu mboún ndebwe. ²⁰Ní nde lalahe amú mmedékléá nɔbwe ámu bwe á, múmú idesuná ání megyí mí onutó dé mú bwe. Mboún lakpan túmi amú ibu mitɔ ámu dé mú bwe.

²¹Mú su nawun ání mbla ánfí lagyi misu. Ní ndekléá nɔbwe yilé á, lalahe kóún ntɔbwé. ²²Tsúfé nhíé ndekléá négyi Bulu mbla ámusu tsú mí kluntɔ. ²³Táme ntowun ání mbla ku dé mbla amú ibu mí kluntɔ ámu isá ko, gyi músú, bwé mí lakpan ɔkpábi. Uhá lakpan amú ibu mitɔ ámu ide mí bwehé kugyíkusu gyí. ²⁴Ki ipian kpɔnkpɔɔnkpɔntiá mbu mútɔ! Ulapú mí iya lowutɔ. Ma ɔbéle mí tsú mútɔ? ²⁵Táme aní Wíe Yesu Kristo su nde Bulu ipán da ání alalé mí!

Mí kluntɔ mú á, tekí ndekléá nɔbwe Bulu mbla ámu ɔkpábi. Táme tsiátɔ laláhe amú ibu mitɔ ámu lahá nabwé lakpan ɔkpábi mboún.

Nkpatsiá Dínká Bulu ɔhé Ámu Asúnsú

8 ¹Ínu su séi á, Bulu méetrá ha ahá ání amúa Kristo Yesunyɔ babwé kule ipón. ²Tsúfé Kristo Yesu su ɔhe Wankíhé túmi ání utehá nkpa lahá anlagyi iwɪ tsú

lakpanbwe múa lowu ibtɔ. ³Mose Mbla ámu métalí lé anu tsú anu lakpantɔ. Tsúfé anu tsiátɔ dada amúb utehá anutɔbwé lakpan ámu imeha anumégyí mbla ámu atosunáhésv. Táme Bulu lótsun ɔkpa ɔɔpwesv ho anu. Ɖlɔwa mu Bi onutó lébá fé nyankpusa ání ɔtɔbwé lakpan, táme mu mú ɔmɔbwe lakpan. Bulu lótsun mu lowusu mɔ anu tsiátɔ dada amúb lakpan legyi músú ámu. ⁴Ɖlɔbwe mú ali, ménu ní anubuo Ɖɔɔ Wankíhé amv a, abétalí tsiá tsiátɔ wankláán amúb teku mbla ámu lósuná ámu, anumétrá tsiá anu tsiátɔ dada amv. ⁵Tsúfé lalahe ahá ání tsiátɔ dada amúb ɔtɔbwé lakpan ide amúsú gyí butɔgywún. Táme ahá ání bubuo Ɖɔɔ Wankíhé amv a, tɔá Ɖɔɔ ámu tekle butɔgywún. ⁶Ɖhá ání lakpan lagyi mu tsiátɔsv tenyá lowu tsú mútɔ. Táme ɔhá ání Ɖɔɔ Wankíhé lagyi musv mú tenyá nkpa múa iwilwii. ⁷Tsúfé ɔha ání lakpan lagyi mu tsiátɔsv tolú Bulu. Ɖtamagyi Bulu mblasv, tsúfé ɔméetalí gyi músú ekekekeke. ⁸Ahá ání lakpan lagyi amú tsiátɔsv buméetalí gyi Bulu ansí.

⁹Táme Bulu Ɖɔɔ bu mlɔtɔ lélé. Mú sv mlumétrá tsiá mli tsiátɔ amúb lakpan legyi músú ámu. Mlɔbwe tɔá Ɖɔɔ Wankíhé amv tekle. Ní ɔku má Kristo Ɖɔɔ ámu a, omegyí mu kle. ¹⁰Ibv mútɔá lakpan sv mli nyankpusa-oyí ání obówu. Táme ní Kristo bu mlɔtɔ á, mli ɔkláa bu nkpa. Tsúfé Bulu latsú mli ání mli asún da ɔkpa mu ansítɔ. ¹¹Bulu lókusúa Kristo tsú afúlitɔ lélé. Mú sv ní mu Ɖɔɔ bu mlɔtɔ á, múmú ɔbótsun Ɖɔɔ ámusv há mli nyankpusa-oyí amúb ibówu ámu nkpa ɔɔpwé.

¹²Ínu sv mí apíó, imehián ání abétrá tsiá anu tsiátɔ dada amv, bwé tɔá anu ɔwólí laláhe tekle. Mboún lehián ání abɔbwe tɔá Ɖɔɔ Wankíhé tekle. ¹³Tsúfé ní mletsíá mli tsiátɔ dada amutɔ á, mlówu tsítsá. Táme ní mlɔtsun Bulu Ɖɔɔ ámusv kíná mli nyankpusa-oyí ámu apé bwe á, mlétsíá nkpa ání itamatá. ¹⁴Tsúfé ahá ání bahá Bulu Ɖɔɔ de amú kpa gyí Bulu abí. ¹⁵Megyí Ɖɔɔ ání ibéha mlɔbwe nkpábi, tsiá nyá ifú Bulu lópuwá mlɔtɔ. Mboún Ɖɔɔ ámu lɔbwe mli Bulu abí. Ɖɔɔ ámu sv anutetálí su kpolí Bulu anaa, “Abba, mí Sí!” ¹⁶Ɖɔɔ ámu totsúlá há anu ání lélé á, Bulu abí anugyi.

17Ní Bulu abí anɔ́yí á, múmú anɔ́yí mu atɔ́ agyípu. Ania Kristonyɔ obégyi mu atɔ́. Tsúfɛ ní awun Kristo ipian ámu ku á, múmú abénya mu numnyam amu é ku.

Numnyam Ání Abénya Ekekú

18Ní neki numnyam ání ida gyo anɔ́, Bulu ɔ́béle súná anɔ́ á, ipian ánfɔ́ anudéwúun bré ánfɔ́ ɔ́mɔ́fun mú ɔ́tɔ́netɔ́ne. 19Bulu atɔ́ bwehé féé buhíé bude ɔ́kpa kí ha ekeá Bulu ɔ́béle mu abí numnyam ɔ́wan. 20Tsúfɛ Bulu atɔ́ bwehé féé lasí ida keke. Megyí mú onutó apé igyi. Mboún mulɔ́bwe mú alɔ́, ɔ́ha mu atɔ́ bwehé féé ɔ́kpa 21ání ekekú á, ɔ́béha amú féé bégyi ɔ́wɔ́, buméetrá yintá ekekekeke. Mu atɔ́ bwehé ámu ibénya mu abí ɔ́wɔ́yí pu amú numnyam amu ku. 22Anyin ání bɔ́tɔ́ nde á, Bulu atɔ́ bwehé féé ide ɔ́wɔ́sɔ́n wúun. ɔ́dekɔ́mí fé alɔ́ ɔ́kwú todwíín ɔ́tsɔ́. 23Megyí Bulu atɔ́ bwehé ámu nkɔ́le dékɔ́mí. Anɔ́ ámuɔ́ alapú mu ɔ́ɔ́jé, igyi mu atokiehé gyankpawá wá anɔ́tɔ́ ámu é anudékɔ́mí anɔ́ klɔ́ntɔ́. Anhíé anɔ́sɔ́ie anɔ́gyó ekeá Bulu ɔ́béha anɔ́ nyankpɔ́sa-oyí ánfɔ́ obégyi ɔ́wɔ́, ɔ́bɔ́bwe anɔ́ mu abí. 24Tsúfɛ ɔ́kpakú anɔ́ sɔ́ ɔ́lɔ́hɔ́ anɔ́ nkpa. Butamakú tɔ́á fúbu ɔ́kpa, tɔ́á fuma ɔ́kpa buteki. 25Ní anudé tɔ́á anɔ́má ɔ́kpa kí a, anɔ́tenyá klɔ́n tsíá gyo mú.

26ɔ́ɔ́je Wankíhé amu tetsá anɔ́ anɔ́ pɔ́ntɔ́. Tsúfɛ anɔ́mɛ́yín alɔ́ abɔ́kulí Bulu atɔ́, ibégyi mu ansí. ɔ́ɔ́jé ámu onutó tehíé kími púkólí Bulu atɔ́ há anɔ́, dɔ́n alɔ́ anɔ́ onutó abétalí. 27Bulu yin ɔ́hagyíɔ́ha klɔ́ntɔ́ asún. Mú sɔ́ oyin mu ɔ́ɔ́jé ámu agywun. Tsúfɛ ɔ́ɔ́jé ámu tokókóli Bulu há mu ahá alɔ́ Bulu onutó dé mú klé.

28Anyin ání Bulu tehá tógyítɔ́ tɔ́wá alé há mu adwepú. Amúgyí ahá ání mu onutó ɔ́letɔ́ mu nhɔ́hé ɔ́nɔ́ ní. 29Tsúfɛ ahá ámuɔ́ Bulu yin yaí ámu a, amú ɔ́lele. Ahá ámuɔ́ ɔ́lele ámu ɔ́letɔ́ ɔ́béé, bubélan mu Bi ámu. Fówun mu Bi ámu ɔ́bɔ́bwe ɔ́déhen mu abí tsɔ́tsɔ́tsɔ́tɔ́. 30Ahá ámuɔ́ Bulu yin yaí dodo amu ɔ́letɔ́. Ahá ámuɔ́ ɔ́letɔ́ ámu olotsu ání amú asún da ɔ́kpa mu ansítɔ́. Ahá ámuɔ́ olotsu ání amú asún da ɔ́kpa ámu ɔ́lɔ́wa numnyam.

Yesu Bulu Odwe Dwanle

³¹Amansu antráa anibu blí tsú íni iwí? Ní Bulu bu aní wá á, ma obétalí kósú líí anisu? Dhaa má unv! ³²Bulu mékiná mu onutó mu Bi ámu si há lowu aní fée nwunsu. Olesi mu há faan. Nkálí sù omóopu ató tráhe fée tsía mu Bi ámutó há aní? ³³Ma obétalí ká asún dínká ahá ámú Bulu lalé ámvsu? Bulu lóó? Ekekekeke! Mugyí ohá aní alatsú aní aní aní asún da okpa mu ansítú. ³⁴Ma obétalí há aní ipón? Dhaa má unv! Tsúfé Kristo Yesu gyí ohá aní olobowu há aní, Bulu lókusóba mu tsú afúlito. Alayó otsie Bulu gyopisu, ode mu kokóli aní nwunsu. ³⁵Ma ntée nto obétalí títi ania Kristonyo nsiné odwetó? Asun wunhe lóó, ntée ikplán? Ní budun anisu lóó, ntée akón? Yayá natí lóó, ntée lowu? ³⁶Tsúfé bowanlín wá Bulu asun wanlínhé amutó bee,

“Fó su bude aní mo ekekegyíeke.

Bude aní kú fé akúfa aní bapú beya omokpá.”

³⁷Táme íni féeétó a, odwe ámú Kristo bu ha aní ámu su anlagyi usu dáfa. ³⁸Tsúfé nhíé nyin aní toto méetalí ká odweá Bulu bu ha anitó. Lowu o, nkpa o, *Bulu-abopu o, túmi kugyíkuvá utráa de iwíe gyí osúsú o, atóá ibu nu séi pú múbá íbéba o. ³⁹Tógyítóá ibu osú pú así ntée osulúv ayasu kukuvuku méetalí ká odwe ámú Bulu ladwé aní tsun aní Wíe Kristo Yesusu ámutó ekekekeke.

Ahá Aní Bulu Lalé

9 ¹Mía Kristonyo anilabwé kule. Mú su onokwali asún ndeblí séi. Dje Wankíhé dé mí kpa. Mú su mí klun é de mí bláa aní mmedé afunu wa. ²Mí pí Israelfo su asún ihíe de mí háan, ahvmutiá umeká itin de mí. ³Ní íbówa aléá nénya ulwí, mía Kristonyo nsiné béyintá, méni bénya nkpa aní utamatá kúráá á, teki nópu iwí há. ⁴Mí pí Israelfo gyí ahá aní Bulu léle púbwé mu abí. Amú olele mu numnyam súná. Oleka ntam há amú, pú mu mbla wá amú íbutó. Olosuná amú okpa aní bóputswe mu. Olebláa amú tsá alahíe aní obópohá amú fée. ⁵Amú léln tsu Israelfo anáin akponkponnti ámutó.

Rom

Múá idun kúráá á, amútó Kristo amu lébelun ɔsulúv anɔsu. Kanfú letsiá *Kristo, (ɔhá ámúú Bulu ladá mu ofúli amu), ogyi Bulu, ató féesú ogyípú amu bré féesú! *Amen!

⁶Ínu imosuná ání Bulu asún ámúú ɔleblí tswi amu uméeba mútɔ. Tsúfé megyí Israelfɔ ámu fée gyí Israelfɔ onutónutó. ⁷Megyí *Abraham abí fée gyí mu abí onutó. Tsúfé Bulu lébláa Abraham ɔbéé, “*Isaktɔ fú abí-aná bédalu tsu.” ⁸Ínu lósuná ání megyí ahá ání botsú Abraham abí féesú gyí Bulu ahá. Abraham abí-aná ámúú Bulu léhie há mu amu nkule gyí Bulu ahá. ⁹Tsúfé tɔá Bulu léhie Abraham gyí, “Néyinkí bá ofiébá sesebre. Néba a, fú ká *Sara lakwíí obiyímbi.”

¹⁰Megyí ínu wule. Rebeka lókwíí atabí há aní náin Isak. ¹¹Táme bréá ɔmɔkúnyá kwíí amú, abudan bi yilé ntée lalahewe á, Bulu lébláa Rebeka amú twi asún. Bulu lóbwe mú alí, méni ibósuná aní ání ɔkpa ámúú ɔtɔtsun músú hɔ ahá ámu umená aní bwehésú. Mboún ina mu nkule pé apé pú alíá ɔtelé mu ahásu. ¹²Asa Rebeka ɔbɔkwíí nyebí ámu a, Bulu lébláa mu ɔbéé, “Ɖdéhen obósum ɔkusu.” ¹³Fé alíá bɔwanlín wá Bulu asun wanlínhé amutɔ beé, “Ntɔdwé *Yakob dun *Esau.”

¹⁴Séi á, nkálí abéblí? Abéblí aníaa, Bulu asún meda ɔkpa lóó? Ekekeke! ¹⁵Tsúfé Bulu lébláa Mose ɔbéé, “Ahá ání nówun amú nwe á, amú nówun nwe. Amúá nahíéá négyi buale a, amú négyi buale.” ¹⁶Mú su megyí ɔha apé ntée mu nsiwa Bulu teki. Mboún mu onutó nwewúun igyi. ¹⁷Bɔwanlín wá Bulu asun wanlínhé amutɔ beé, Bulu lébláa Egipte owíe Farao ɔbéé, “Atoku anyɔ ání su neyaí fú iwíe, alíá nótson fusu lé mí túmi súná, pú alíá ɔyítɔ ahá fée bónu mí dá, kanfú mí.” ¹⁸Ínu su ní Bulu ɔhíé ání obówun ɔku nwe á, otowun mu nwe. Ní ɔhíé ání ɔbéha ɔku ɔbówa kluntɔ odwin é á, ɔtehá mu ɔtɔwá kluntɔ odwin.

Bulu Ɖblónya Pú Mu Ahá Nwewúun

¹⁹Mlɔtɔ ɔku ɔbéfité ɔbéé, “Ní alí igyi ní mú á, ntogyi sù Bulu dé nyankpusa ipón ha? Ma ɔbétalí tin Bulu ɔkpa?” ²⁰Táme nde mli fité mbée, fúgyi ma ání féle Bulu ulá? Ɖlɔ

ɔbétalí fité mu ɔpwepú ɔbée, “Ntogyi su fapwé mí ali?”
 21 Aliágyialíá igyi á, ató ɔpwepú tópu obón pwé tóá odeklé.
 ɔbétalí pú obón ipin kule pwé nlonyo. ɔbópu kule bwé ɔló
 nu ntsu, kpá nsúó wá kuletó.

22 Ali kén igyi há Bulu ní. ɔbu ɔkpa lé mu ɔbló súná, ménu
 ahá bówun mu túmi. Táme ɔlehie nyá klun há ahá ámúú
 olenya ɔbló amúsú amu. Teki ulɔfun ání ɔbéhi amú. 23 Bulu
 bu ɔkpa lé mu numnyam kpɔnkɔnti ámu ɔwan ahá ámúú
 ɔlele yái ání obówun amú nwe, ɔwa amú numnyam amusu.
 24 Anigyí ahá ámúú ɔlele yái ámu ni. Megyí Yudafo nkuletó
 ɔlele ahá. ɔlele ahá ání bumegyí Yudafo aku é. 25 Bulu lébli
 mu ɔnósú ɔtáípu Hosea ɔwulótó ɔbée,

“Néti ahá ámúú teki bumegyí mí ahá ámu mí ahá.

Ahá ámúú teki ntamakle amú asún ámu ɔbóbwe
 mí adwepú.

26 ɔtíné ámúú teki nebláa amú mbée, ‘Megyí mí ahá
 mlgyí’ ámu a,

unfo néti mbée, ‘Bulu ɔkɔankpapu abí’ ní.”

27 Bulu ɔnósú ɔtáípu *Yesaia lókplun bláa Israelfo ɔbée, “Ní
 Israelfo bekléí fé ɔpu ɔnó usi kúráá á, amótó ahá kpalobí
 pé nóho nkpa. 28 Tsúfé ɔbɔsasú aní Wíe obégyi ɔyító ahá féé
 asún, búa mú wankláán.” 29 Tsúfé Bulu ɔnósú ɔtáípu Yesaia
 légyankpá wanlín wá Bulu asun wanlínhé amuto ɔbée, “Ní
 mí Wíe Bulu, túmi féé Owíe mési aní abí-aná aku yái á, teki
 aní féé abéhi fé Sodom móa Gomorafó.”

Israelfo Bulu Máhogyi

30 Nkáli anidébli ngya? Anidébli aníaa, ahá ámúú
 bumegyí Yudafo ámu bumɔbo mbódí kuku, asa Bulu léha
 amú asu! Hógyi sú benya mú. 31 Táme Israelfo ámúú amú
 ansí lepe, bude mbla ámusu gyí, Bulu ɔha amú asu ámu
 bumetalí. 32 Ntogyi su? Tsúfé bumepe ansí pú hógyi dúnká
 mú. Uɔbwe amú fé mbla ámusu gyísu Bulu ɔbótson ha amú
 asu. Ínu su bosutíin “Ibwi ámúú utelé ahá dá” ámusu dida
 kpla. 33 Ibwi ánfu twi asún bɔwanlín wá Bulu asun wanlínhé
 amuto beé,

“Bulu ɔbée, ‘Mliki!

Ndepu Ibwi^a tswi *Sion wúluto.

Ahá bósutiin ibwi ámusu dida.

Péhi méekitá ɔhagyíɔha ání ɔlɔɔ mu gyi.’”

10 ¹Mí apíó, tśá ntekle mí klvntɔ, pú mpái ání ndeɔ gyí, Bulu ɔbɔɔ mí ahá Israelfɔ. ²Nétalí gyi amú wɔ adánsɛ mbée, amú ansí lahié pé Bulusúm wɔ, táme bumeyín ɔkpa ání bótson mósú súm mu wankláán. ³Tsúfé bumeyín ɔkpa ání Bulu tɔtsun mósú há ahá asu. Mú su beyírí wɔ buɔe amú ɔkpa dunká, méni bégyi asu Bulu ansítɔ. Mú alí su bumeba iwasi há ɔkpa ámúú Bulu tɔtsun mósú há ahá asu ámu. ⁴Ɔnɔkwali amu gyí, Kristo lómɔ Mose Mbla ámu féé ɔnɔ. Mú su ɔhagyíɔha ání ɔlɔɔ mu gyi obégyi asu Bulu ansítɔ.

Nkpahɔ Bu Iwu Há Ɔhagyíɔha

⁵Mose lówanlín tsú ɔhagyíɔha ání ɔteki mbla ámu ání mósú Bulu ɔbótson tsu mu ání mu asún da ɔkpa wɔ ɔbée, “Ɔhagyíɔha ání otegyi mbla ámusu ɔbótson mósú nyá nkpa.” ⁶Táme hógyisu butɔtsun gyi asu Bulu ansítɔ. Bulu asun wanlínhé amu léblí ɔbée, “Máfíté wɔ fée, ‘Ma ɔbɔɔ yɔ ɔsúsú?’” (Fefíté alí á, ilosuná ání fýɔɔɔ Kristo tsúa ɔsúsú ba.) ⁷Ntéé fíté wɔ fée, “Ma ɔbékplí yɔ ɔsulú ayasi?” (Fefíté alí á, ilosuná ání fýɔɔɔ Kristo tsúa afúlito ba.) ⁸Mboún asún ání Bulu asun wanlínhé amu léblí gyí, “Bulu asún ámu ima ífú fú wá. Iwu fú ɔnótɔ, iwu fú klvntɔ dodo.” Asún ámu gyí hógyi asún ámúú anidéblí ámu ni. ⁹Ní fobwíí ɔnɔ blí fée, “Yesu gyí aní Wíe,” fɔpú fú klvntɔ féé hogyi ání Bulu lókusúa mu tsú afúlito á, Bulu ɔbɔɔ fu nkpa. ¹⁰Tsúfé iklvntɔ ɔha tɔpúɔ Kristo gyi. Fówun Bulu obótso mu ání mu asún da ɔkpa. Ɔnɔ é ɔha tɔpúblí ɔbée, Yesu gyí mu wie, méni Bulu ɔbɔɔ mu nkpa. ¹¹Alí kén Bulu asun wanlínhé amu léblí ɔbée, “Péhi méekitá ɔhagyíɔha ání ɔlɔɔ mu gyi ekekeke” ní. ¹²Iwu su imefáhuon ání Yudayin fugyi, ntée fume gyí Yudayin.

^a9:33 *Ibwi* ámu gyí Kristo.

Tsúfé owíe ɔkule pé ası amú fée bubu. Ɖbópu mu yilébwe gyi ahá ání bosu kpolí mu fée buale. ¹³Alı kén Bulu asun wanlínhé amu léblí ɔbéé, “Ɖhagyíɔha ání otosu kpolí anı Wíe obénya nkpa” ní.

¹⁴Táme nkálı bétalí su kpolí ɔhá ání bumɔho mu gyi? Nkálı bétalí ho ɔhá ání bumɔkúnú mu ıwı asún gyi? Nkálı bónu mu ıwı asún ní ɔhaa méda mú ɔkan súná amú? ¹⁵Nkálı bétalí dá mú ɔkan súná amú, ní bumɔkúwá amú? Bulu asun wanlínhé amu léblí ɔbéé, “łhíé bu akíle ání fówun ání ɔha ɔbá beda Bulu *asun wankláán ɔkan!” ¹⁶Táme megyí Israelfo fée lóho Bulu asun wankláán ámu. Tsúfé Bulu ɔńsú ɔɔɔpú *Yesaia lówanlín wá mu ɔwıłótɔ ɔbéé, “Mí Wíé, ɔha móho anı asun blíhé amusu gyi.” ¹⁷Táme asun wankláán ámu téhá butohogyi. İna Kristo asún áńfi blísú ahá butonú mu asún. Mú nu sú ahá butoho mu gyi.

¹⁸Mbéé, bee nú bumonu asún ámu? Bonu! Tsúfé Bulu asun wanlínhé amu léblí ɔbéé,

“Amú ɔme lawíé ɔyítɔ fée,
ámú asún é lawíé tsútsúútsú.”

¹⁹Ntráa fıte. Israelfo bumonu mu asún ası? Múá Mose lébláa amú gyankpapu gyi,

“Bulu ɔbéé, ‘Nópu ɔmá ání bumegyí Israelfo wá mlı ansıpepe.

Nóyulá ɔmá mímláhe púwá mlı ɔbló.’ ”

²⁰Bré bámbátɔ a, Yesaia lówa klun bláa amú ɔbéé, “Bulu ɔbéé,

‘Ahá ání bumedé mí dunká lémentí mí.

Ahá ání bumefıté mísú nele ıwı ɔwan súná.’ ”

²¹Táme Israelfo ámu mú á, Bulu léblí amú ıwı asún ɔbéé, “İnıá natéı ıbutɔ bré fée ání nóho amú atúu ó á, butráa bude asuto-ɔnlun wa. Bumedé mí bu.”

Bulu Israelfo Nwewúun

11 ¹Nde mlı fıte mbée, mú su Bulu lakíná mu onutó ahá léle? Ó-o! Mí onutó áńfi óó Israelyin ngıyı. Abraham abı-anátɔ notsú. Benyamin abusuantɔ obı ngıyı. ²Megyı bee

Bulu lakíná mu onutó ahá amú ɔlele amú yái ámu. Mlukain ali ámú Bulu asun wanlínhé amu léblí tswi ɔbéé, Bulu ɔnósú ɔtɔ́pú *Elia lékla Israelfɔ ɪwɪ asún súná Bulu amusu. ³Ɔbéé, “Mí Wíé! Israelfɔ bamó fú ɔnósú atɔ́pú féé. Babwíé fú afɔɔɔe-asubwi é féé. Ulasí mí nkukúnú nkule. Budekléá bómo mí é.” ⁴Bulu léha Elia mbuai ɔbéé, “Ó-o! Megyí fú nkule lásí. Tsúfé nalé ahá mpím-sienó (7,000) ání bumɔkútswe ɔkpi Baal^b kɪ há mí ɪwɪ.” ⁵Ali ígyi nde nke ánfɔ é ní. Bulu lawá awɔtɔle lé Israelfɔ kpalobí aku yái. ⁶Ní alawá awɔtɔle lé aha aku á, múmú utrása megyí ɔha bwehé su ɔbéle mu. Tsúfé ní una ahá bwehésú mú á, teki mu awɔtɔle amu ilesian.

⁷Mú nkáli ilegyi? Israelfɔ ɪbɪ mɛda itó ámú bepe ansí buɔɔɔɔká ámu. Amútó ahá kpalobí akvá Bulu léle yái nkule ɪbɪ léda mú. Ɔleha atráhe ɔɔwa asɔtɔ-ɔnlun bréá ɔɔe ahá tɪ. ⁸Bulu asun wanlínhé amu léblí ɔbéé, “Bulu léha ɔlelun amú ɔwɔlɪ. Mú su bótu nde bumɛtálí pú amú ansíbi wun ató, pú amú asu é nú asún.” ⁹Owíé *Dawid é léblí ɔbéé,

“Amú ɔɔwe ogyíkpa ɪbwéé mpósa abuda mútó.

ɪbwéé agbláa, ɪkpa kɪta amú.

ɪbwéé uma, abusrei dida mútó, ɪbwe ɪsubtí ha amú.

¹⁰Ansító ɪklún amú, ménu buméetrá wun ató.

Ha abɔtsia ɪpíantó bré féé.”

¹¹Mú su ntrása ndefíté mbéé, *Yudafɔ basréi dida, buméetalí trá kusú? Ekekekeke! Amú lakpan su Bulu lóhɔ ahá ání bumegyí Yudafɔ nkpa. Fówun ɪpe amú ansí. ¹²Séi á, anyin ání Yudafɔ lakpan sú ɔmá féé banyá atɔ wankláán. Amú dida lawá labi há ahá ání bumegyí Yudafɔ. Ní belányá nkpahóó mú á, múmú labi ání ahá ání bumegyí Yudafɔ bénya uma blító.

Ahá Ání Bumegyí Yudafɔ Nkpahóó

¹³Ahá ání mlumégýí Yudafɔ, mli nde asún ánfɪ bláa गया a. Kristo *sumbí ɔyɔpú gyi. Ɔlɔwa mí sumbí mli wá. Mí

^b 11:4 Baal gyí ɔkpi ɔkvá ahá ámú begyankpá tsía ɔsulúv amusu asa Israelfɔ beba betsiá unv ámu bosúm.

gyumagyihe legyi mi ansí. ¹⁴Fíali nétalí há mí ahá Yudafo ansí bépe, fówun Bulu obénya ɔkpa ho amótó aku nkpa. ¹⁵Bréá Bulu lédamlí ɔma há Yudafo á, uleha ɔmá atráhe fée ɔɔbwe Bulu anyawíe. Ní igyi ali mú á, brégyíbréá Bulu ɔbóho amú é á, ɔbówe fé afúli fée bakúsú tsú afúlito.

¹⁶Ní belé ɔkuto gyankpapo há Bulu igyi a, múmú uto ámu fée igyi mu kle. Ní Bulu bú oyí nlín á, idesuná ání oyí ámu abámbi é igyi mu kle. ¹⁷Bekpalí oyí bámbi pú bambá tsá músú. Yudafo gyí oyí ámu. Mli ahá ání mlimégyí Yudafo gyí bámbi bambá ámú bapú betsa músú ámu, ménu mlénya oyí ámutó ntsu wankláán ámu ku. ¹⁸Mú ali su á, mlimáki mlíaa mli dun oyí ámu onutó abámbi amú Bulu lékpalí lé ámu. Mlimátsu iwí amú ansító, tsúfé oyí ámu nlín tamanu ntsu lé mlito. Mli mboún tonu ntsu lé móto púdan.

¹⁹Fíali mli aku mléblí mlíaa, “Bekpalí abámbi amu, ménu aní é abénya oyíkpa.” ²⁰Ibu móto ali. Itsú alí Israelfo bumohogyi sù Bulu lékpalí amú tsítsá. Mli é mli hógyi sù Bulu lapú mli tsá músú. Mú su mlimáha nwunto iwa mli ɔdwe. Mliha ifú ikita mli. ²¹Tsúfé Israelfo ámú bogyi oyí ámu onutó abámbi kúráá ɔbwe lakpan, Bulu lébutí amú isu, mú mli? ²²Séi á, mlilawun ání Bulu bu awítóle, táme mu asún bu ɔnlun. ɔbu ɔnlun ahá ání badida hógyitso. Táme alawá awítóle há mli. ɔbówa awítóle há mli ní mli ansí dun musu. Ní megyí ali á, ɔbébutí mli isu mli é. ²³Táme ní Yudafo ámú besi mu hógyi amu beyinkí ɔho mu gyi a, Bulu ɔbélapú amú tsá oyí ámusu. Tsúfé ɔbu túmi ání obéyinkía amú tsá. ²⁴Mli ahá ámú mlimégyí Yudafo ámu mú á, oyí laláhe bámbi mligyí, ɔɔpu mli tsá oyí ámusu. Teki uma un ali. Israelfo mú á, oyí wankláán ámu onutó abámbi bogyi, bekpalí amú tsítsá. Mú su amú yinkía yi mú yintisu móɔwa ɔnlun há Bulu.

Bulu Towun Ahá Fée Nwe

²⁵Mí apíó, asun ɔainhé ku bu unvá ndekléá mlíbí, ménu mliméeki mli iwí ání mlilétun ansí dubi. Asún ámu gyí, Yudafo ámu aku bubu asuto-ɔnlun. Bówa asuto-ɔnlun alu

bɔfun bréá Bulu lahá ahá ání bumegyí Yudafɔ fée baba mu wá. ²⁶Mú ɔma a, Bulu ɔbɔhɔ Yudafɔ fée nkpa. Bulu asún ámu léblí ɔbéɛ,

“*Sion wúluto Nkpa Ɖhɔpu amu ɔbélu tsu.

Ɖbéba beha *Yakob abí-aná fée bési lalahe bwe.

²⁷Íni gyí ntam ání néka há amó

bréá néle amó tsú amó lakpantɔ ní.”

²⁸Íniá Yudafɔ ámu bumɔhɔ asun wankláán ámusu gyi su á, bemlí Bulu alupó, ménu ibɔwa labi há mli ámóú mliumégyí Yudafɔ ámu. Táme íniá bugyi ahá ání Bulu léle su a, amó anáin su otekle amó asún. ²⁹Ní Bulu ɔlé ɔku ntée ɔpú mu atokiehé há ɔku á, ɔtamatráa tse mu agywun. ³⁰Bré kutɔ á, mli ánti mliumégyí Yudafɔ ánti mliumóbu Bulu. Táme séi á, Yudafɔ bumedé Bulu bu. Mú su Bulu lawun mli nwe. ³¹Alí kén Bulu ɔbéba bowun Yudafɔ ámóú bumedé mu bu ámu é nwe fé alíá alawun mli nwe ní. ³²Tsúfé Bulu lótsu mú ání ahá fée bubu asuto-ɔnlu, alíá ibɔbwe obówun amó fée nwe su.

Mliha Akánfu Bulu

³³Óo, mliki Bulu awitɔle wule! Mu nyánsa pú mu asúnbu ma ɔka! Ma ɔbétalí bí mu ɔkpa pú mu asúngyítɔ?

³⁴Bɔwanlín wá Bulu asun wanlínhé amuto beɛ,

“Ma yín aní Wíe nwuntɔ?

Ma ɔbétalí súná mu asún? Ɖhaa má unu.

³⁵Ma lápú tɔku há mu, ɔde ɔkpa kíá ɔbélaka mu ikɔ?”

³⁶Bulu lɔbwe tógyítɔ. Mubú tógyítɔ. Tógyítɔ bu unu há mu. Kanfú ibwée mu kle bré féeétɔ. *Amen!

Tsiátáá Butɔpósum Bulu

12 ¹Íniá Bulu híé ɔde aní nwe wúun alí su á, mí apíó, nde mli kokóli mbée, mliwu mli iwí fée ha Bulu mli nkpatɔ. Ubwée fé igyí ahatɔ wankíhé ha mu. Íni gyí osum ání itsú kluntɔ, ilegýi mu ansí ní. ²Mliumáha ɔsulúv anftsu atsiábi igyí mliwu. Mliha Bulu ɔtse mli agywun, iha mli

tsiátó utse. Fówun mlétalí bí ání Bulu apé bu alé, ibu odwe, ulofun.

³Bulu agyómá ámúb alawá awitole púhá mí ámusu nde mlto okugyíokku bláa mbéé, ohaa máki mu iwí dáfá aliá ogyi. Ohagyíoha obá ansí asi, oki ání omodun hógyi amúb Bulu lapóhá mu amu. ⁴Nyankpusa-oyí iwí ató aní fée anigyí. Ntobí ámuto kugyíku bu mú gyuma ání itegyí nyankpusa-oyí ámusu. ⁵Ali kén ibu mótó ání anutsó, táme ania Kristonyo anulabwé oyulú okule ni. Mú su anigyí ntobí otsan-otsan ání anutsátsáa abasu, anlobwe oyulú okule amu. ⁶Bulu atokiehé ámúb oleha aní ámu ina otsan-otsan. Ilehían ání aní fée abópu mu atokiehé ámu yó agyómá ató ámúb oleha aní ámu onó. Mú su ní oku atokiehé gyí Bulu onó asúnblí á, oha ámu obwée mó aliá mu hógyi losuná mu. ⁷Ní oku klé gyí mu aba ahogyipu buá a, obúa amú. Ní oku klé gyí ató suná á, osúna mú. ⁸Ní oku klé gyí ahá ateto-onlun wa á, owá ahá ateto-onlun. Ní oku é klé gyí ató kie á, olé iwito okie mú. Ní oku klé gyí ahá onó lí á, owáa nsi obwe mú. Ní oku klé é gyí ahá nwe wúun a, obwée mó odweto.

⁹Mlidwe ahá tsu mli klunto. Mlikisi lalahe kugyíku. Mlikita yilébweto kínkíínkín. ¹⁰Mliha mli ansí ipe mli aba Akristofó dwesu, amlibu aba wankláán. ¹¹Mlumáha mli nsiwa bwé ató onó iba asi. Mliha Oje Wankíhé amu owa mli owonlín, amlisum aní Wíe. ¹²Mli okpakú amu su mlunya ansigyí, amlilu kínkín mli ipiantó. Mlibo mpái bré féétó. ¹³Mlibua mli aba Bulu ahá ání bubu ikplántó. Mlyiri iwí ho afóó.

¹⁴Mlyula ahá ání budun mlisu. Mlyula amú, mlimálwú amú. ¹⁵Ní aku bude ansigyí nya á, mlia amónyó mlunya ansigyí. Ní aku budesú é á, mlia amónyó mlisu. ¹⁶Mli fée mlusia wankláán. Mlumátsu iwí. Mlipu iwí manta ahá ání ahá butamabú amú. Mlumáki mli iwí ání mlidun aku.

¹⁷Ní oku opó lalahe gyi mli á, mlimápu lalahe ká mu ukó. Mlibo mbódí amlibwe tóá ibu aléá ahá fée bótsulá dínká mósú. ¹⁸Alhagyíalíá igyi mli mú á, iwilwii itsía mlia ohagyíoha nsuné. ¹⁹Mí apíó adwepú, mlimápu lalahe ká mli

aba ɩko. Mlisi tógyítɔ ha Bulu. Tsúfé bɔwanlín wá Bulu asón ámuɩ bɛɛ, “Bulu ɔbéɛ, ‘Mí, mli Wíe téká ɩko. Mí ɔbéka ahá ako amú lakpan su.’ ” ²⁰Bulu ason wanlínhé létrá blí ɔbéɛ, “Ní akón de fú olupú á, ha mu atɔ ogyi. Ní ɔmɛwóli de mu a, ha mu ntsu onu. Ní fɔbwé mú ali á, ɩbéha péli békítá mu ɔbétse.”^c ²¹Mlumáha lalahe igyi mliɩ, mboún mliɩbwe yilé púgyi lalahesu.

Iwiasɩbá Ha ɔmá Akpapú

13 ¹Ilehián ání ɔhagyíɔha ɔbéba iwiasɩ há ɔmá akpapú. Tsúfé Bulu téhá ɔmá akpapú túmi. ɔmá ɔkpapú ɔkuku má unvá megyí Bulu léyaí mu. ²Íni su ní ɔku ɔkúsú líí ɔmá ɔkpapú ɔkusu á, alakúsú líí Bulu túmisu. Mú su ɔhá ámu dé ɩsubití klé ha ɩwi. ³Tsúfé ɔmá akpapú bumegyá yilé abwepú, lalahe abwepú bugya. Mú su ní fumedékleá funyáa ɔmá akpapú ifú á, múmú bwe yilé abukanfu fú. ⁴Bulu osúmbi ɔhagyíɔha ání bapú mu yái ɔmá ɔnɔ gyí. Mli yilé su buɩe agyúmá yɔ. Táme ní ɔku dé lalahe bwe á, múmú obénya amú ifú, tsúfé bubu ɔkpa bítí ahá ɩsu. Bulu asúmbi bugyi, ɔleha amú ɔkpa ání bubítí lalahe abwepú ɩsu ha mu. ⁵Íni su ɔhagyíɔha ɔbá iwiasɩ ha ɔmá akpapú. Megyí bɛɛ buɩe ifú nya ání bébutí amú ɩsu nkule su. Mboún amú klɩn dé amú bláa ɔbéɛ, ilehián ání bóbu amú.

⁶Íni kén sú ilehián ání mléka tswitswi é ní. Bulu asúmbi ɔmá akpapú bugyi. Bapú amú bré féé buɩe ɔmású kí. ⁷Mlika ɩko kugyíkúvá ɩɩn mliɩ. Mlika tswitswi múa lampóo. Obú ɔkpasu á, mliɩbu amú féé. Ní igyi kanfú é á, mlikanfu amú féé.

Abadwe

⁸Mlumákítá ɔhaa ɩko dun mli abadwe. Ní ɔku dé mu aba dwe á, ɔɩe mbla ámu féésú gyí. ⁹Mose Mbla ámu léblí ɔbéɛ, “Mátɔ mbua.” “Mámɔ ɔha.” “Máwi atɔ.” “Mápe ansí fú ba atɔsú.” Íni pú mbla tráhe amu féé nwun gyí mbla kule ámú

^c 12:20 Igyi fé fakpá ogyá wóli mu ɔtántra.

lɛblí ɔbéɛ, “Dwe fú bá fé fú iwí” ámu. ¹⁰Ní ɔku dé mu ba dwe á, ɔmɔɔpu lalahe gyi mu ekekekeke. Inu su ɔhá ání ɔɔdwe mu aba lagyi mbla ámu féésú.

¹¹Mli onutó mliyin bré oduátó anibu. Bré lafun ání mlétsinkí, tsúfé aní nkpahɔɔ lafun ta dun bré ámúbó anulégyankpá hɔ Kristo gyi amu. ¹²Onyé detsúbun, ɔyí lake ta. Mú su mliha asi oklúntɔ bwehé féé bwe, atsu aní ɔyí kehetɔ akɔtɔ tsan. ¹³Mliha aní tsíátɔ ibwe fé ahá ání butsie wankitɔ. Mlumáha ayinta aní bré yetsiá ɔdwe ogyíkpa, anidé atɔ dedé gyí, anidé ntá núu bu. Anumáwa atsi múa ayin asún. Anumáwa ɔnsípe, anumátre kó. ¹⁴Mboún mli pu aní Wíe Yesu Kristo tin mli iwí. Mlumátrá tsíá tsíátɔ dada amúbó mli ɔwólí laláhe tekle amu.

Rom

Akristofɔ Ulále ɔkpa Laláhesu

14 ¹Mli hɔ mli aba Akristofɔ́á buma ɔwunlín hógyitɔ wa mlitɔ. Ní bee tɔku bu alé ntée uma ale a, mli mágyi amú nwéen. ²ɔku lóhogyi ání ɔbu ɔkpa gyi tógyítɔ, táme ɔku é hógyi ɔnɔ uma ɔnlun. Mú su ɔtamagyi iye. ³ɔkpa má unvá ɔhá ání otegyi tógyítɔ ɔbéle ɔhá ání ɔtamagyi tɔku ulá. Alí kén ɔhá ání ɔtamagyi tɔku é ɔmále ɔhá ání otegyi tógyítɔ ulá ní. Tsúfé Bulu la hɔ amú. ⁴Fúgyí ma ání féha ɔku osúmbi pón? Mu wie nkule pé búu ɔkpa ání ɔbéblí ɔbéɛ, otsie wankláán ntée ometsie wankláán. ɔbétalí tsíá wankláán, tsúfé Bulu ɔbétalí há mu obétsiá wankláán.

⁵ɔku ɔbétalí blí ɔbéɛ, eke ku dun mú aba, ɔku é ɔbéblí ɔbéɛ nke ámu féé igyi kule. ɔhagyíɔha ɔyɔ mu kluntɔ wankláán, otsu múa ibu alé. ⁶Ní ɔku ɔlé eke ɔku ɔbéɛ igyi eke yílé á, ɔde músú gyí pútsú Bulu fúá. Ní ɔku é tegyi tógyítɔ á, ɔde mú gyí pútsú aní Wíe fúá. Ní ɔku é tamagyi iye a, mu é ɔde mú kisi pútsú aní Wíe fúá. Tsúfé amú féé butedá Bulu ipán músú. ⁷Anitɔ ɔhaa métsie nkpa há mu iwí, anitɔ ɔkuku é móowu há mu iwí. ⁸Ní antsie nkpa á, antsie ha aní Wíe. Awú é á, anilawú há mu. Mú su ní anilawú o, antsie nkpa o, aní Wíe bú aní. ⁹Tsúfé Kristo lówu, yínkí kúsú ba nkpatɔ, ménú ɔbɔbwe akɔankpapu pú awupú féé Owíe. ¹⁰Inu su imehián

ání fɛha fú bá ɔ́pɔ́n ntée fɛku fú bá ansító kótíkótí. Tsúfé anɔ́ fɛé abéyélú Bulu ansító, obégyi anɔ́ okugyíɔ́ku asún.

11 Ɔ́wanlín wá Bulu asún ámutɔ́ bɛɛ, “Anɔ́ Wíe Bulu ɔ́bée,

‘Nanyá mbu nkpa ánfɔ́ á,

ɔ́hagyíɔ́ha ɔ́béda akpawunu mí ansító;

ɔ́hagyíɔ́ha ɔ́béle blí ɔ́bée, Bulu ngyi.’ ”

12 Mú su anɔ́ okugyíɔ́ku ɔ́béle mu asún ɔ́nɔ́ Bulu ansító.

Máha Fú Bá Ɖɔɔda Mu Hógyito

13 Mú su mlɔ́ha asi aba ɔ́lá le. Mboún abwée agywun ání anumɔ́ɔ́bwe tɔ́tɔ́a ɔ́béha anɔ́ bá ɔ́kuku méɛsɛɛ́ ntée ɔ́ɔ́da.

14 Séi ínɔ́a namlí Okristoyin su nabí ání atogyihe kuku má unvá mu *ɔ́wi metɔ́n. Táme ní Kristoyin ɔ́ku lóhógyi ání tɔ́ku ɔ́wi metɔ́n a, múmú mu wá mú ɔ́wi metɔ́n.

15 Ní fútegyi tɔ́ku, ɔ́de fú bá háan a, múmú fú bwehé medé ɔ́dwe suná. Máha fú atogyihe ɔ́ha fú bá ání Kristo lówu há mu ɔ́fwi. 16 Mú su máha tɔ́a fuyin ání ɔ́bu alé ɔ́bwe tsitsa ahá ansító. 17 Tsúfé *Bulu iwíegyi ámu imegyí atogyihe ntée atonuhe asún, mboún yilébwe, iwilwii pú ansigyí ání itsú Ɖɔɔ Wankíhé amutɔ́ asún igyi. 18 Ɖhagyíɔ́ha ání otosúm Kristo ɔ́kpa ánfɔ́su á, mu asún tegyi Bulu ansí. Ahá é butobú mu.

19 Ínɔ́ su mlɔ́ha anɔ́ ansí ɔ́pe tɔ́a ɔ́bɔ́pu iwilwii ba, ɔ́bɔ́wa apíó aba ɔ́wɔ́nɔ́lín hógyitɔ́su brégyíbré. 20 Máyintá Bulu gymagyihe fú atogyihe su. Ɖkpa bu unvá abétalí gyi tógyítɔ́, táme ní ɔ́ku dé tɔ́a ɔ́béha mu ba ɔ́bɔ́bwe lakpan bwe mú á, uma ale. 21 Ní ɔ́ku tamagyi iye ku, ntée nu ntá ntée bwé tɔ́a ɔ́béha mu ba ɔ́béɔ́da á, ɔ́bu alé. 22 Mú su tógyítɔ́a fohogyi tsu ntobí ánfɔ́ ɔ́wi á, ha mú ɔ́bwe fúá fú Bulunyo nsiné asún. Ní ɔ́ku opúni medé mu tsií mu bwehésú á, múmú ɔ́kláa lawá mu ogyá. 23 Táme ní mu klun medí mu asi mu atogyihe ku gyí su, ogyi mú á, Bulu lahá mu ɔ́pɔ́n dodoodo. Tsúfé mu atɔ́ ámu gyí melí hógyisu. Tógyítɔ́a ɔ́ha mɔ́pu hógyi bwé igyi lakpan.

Ahá Ansísú Atɔ́ Bwe

15 1 Ilehían ání anɔ́ ahá ání anɔ́ hógyi ɔ́nɔ́ bu ɔ́nɔ́n abénya klun há ahá ání amú hógyi ɔ́nɔ́ uma ɔ́nɔ́n.

Megyí tóá iletsiá aní wule abóbwε. ²Ilehián ání anuto okugyíwku wóbwε tóá ibu alé há mu ba, méni ibéha mu wóbedan hógyitw. ³Tsúfé Kristo kúráá móbwε tóá mu onutó otekle. Mu iwí asún bōwanlín wá Bulu asún ámutw beε, “Asiabí ámúú besia fú ámu féé ilebedinká mísú.” ⁴Asún kugyíkwá bōwanlín wá Bulu asun wanlínhé amutw tsú tututu a, bōwanlín mú ání ibósuná aní ató, wá aní atetw-wnlín, atomi lu kinkíínkín. Fówun abénya klwn kí wkpá ha ató ámúú aní ansí dún músú ámu. ⁵Bulu téhá ahá butenyá klwn. Mutówá ahá atetw-wnlín. Nde mu kulí mbéε, wá amlibwε kule, fé alíá Kristo Yesu lósuná aní. ⁶Íni wóbéha mli féé mlópw wme kule kánfú Bulu, ogyi aní Wíε Yesu Kristo mu St ámu ní.

Rom

Ahá Ání Bomegyí Yudafw Asun Wankláán Bláa

⁷Íni su mlhw aba atúu fé alíá Kristo lóhw mli, méni iwówa Bulu numnyam. ⁸Tsúfé nde mli bláa mbéε, Kristo labwé Yudafw osúmpú, méni ibósuná ání Bulu obégyi mu tó ámúú wlehw amú anáin amusu. ⁹Kristo léba, méni ahá ání bomegyí Yudafw bétu Bulu idayilé, nwe ámúú olowun amú ámu sv. Fé alíá Bulu asun wanlínhé amu ileblí. Asún ámu gyí,

“Aní Wíε Bulu, íni su nówa fú numnyam ahá ání
bomegyí Yudafw ansító.

Nówa lu kánfú fú.”

¹⁰Bulu asún ámu létrá blí wóbéε,

“Mli ahá ání mliwégyí Yudafw, mliá Bulu ahá
mlnya ansigyí!”

¹¹Betrá wanlín beε,

“Ahá ání mliwégyí Yudafw féé, mlikanfu aní Wíε
Bulu.

Wmá féé abí, mlikanfu mu.”

¹²Bulu wówsú wówípw *Yesaia é léblí tswi wóbéε,

“Wá wku wóbelín tsu aní náin Yisai^d abí-anátó.

Mu obébegyi iwíε ahá ání bomegyí Yudafwsv ní.

^d 15:12 Yisai lókwú Owíε Dawid ání ogyi Yesu Kristo mu nain.

Musú bédinká ansí ní.”

¹³Buluá butekɩ ɔkpa há ogyi. Nde mu kokóli mbéé, ɔhá iwɩ lwii mli, ansí igyí mli amlhɔ mu gyi. Mu Ɖɛ Wankíhé ɔháa mli túmi, méni mu ɔkpakú mɔ́ɔkpɔn mli.

Tsá Svá Paulo Léle Iwɩɔ Wánlín Ató Alɩ

¹⁴Mí apíó Akristofɔ, mí onutó nhíé nyin ání aha wankláán mlgyí, mlɩlabí asún tsɔtsɔɩɩ, mlétalí t́í kplá aba. ¹⁵Táme nawá klɩn nhíé nde mli asún bláa ɔwulú ánfɩɔ púkáín mli. Tsúfé Bulu lawá awɩɔle pú agyómá ánfɩ wá mí ɩbɩɔ ɔbéé mbwée. ¹⁶Múgyí, mbóbwe Kristo Yesu osúmbi ahá ání bumegyí Yudaɔɩ. Mú su nde osum agyómá ánfɩ yɔ fé Bulu igyí ɔhapú. Nde ahá ámúú bumegyí Yudaɩ ámu Bulu asun wankláán ámu bláa, méni bémlí igyí aható ání Ɖɛ Wankíhé latɩn mú iwɩ, ilegyi Bulu ansí. ¹⁷Ínɩá míá Kristo Yesunyɔ anɩlabwé kule su á, mbu ɔkpa tsú iwɩ agyómá ánfɩ ndeyɔ há Bulu ánfɩ su. ¹⁸Tsúfé mméetalí blí asvansu tsía atóá Kristo latsun mí asun blíhé pú mí bwehésú bwé ahá ání bumegyí Yudaɩ, méni bóbu Bulu. ¹⁹Ína ofúla múa osúna amúú nɔbwe Bulu Ɖɛ ámu túmitɔ ámusu netalí dá Kristo asun wankláán ámu féé ɔkan, tsú Yerusalem alu yédalɩ Iliriko ɔsulúsu. ²⁰Tsá ɩdɩn mí klɩnsu bré féé, ndekléá nɔbwe gyí, nénatí dá Bulu asun wankláán ámu ɔkan ntínéá bumókúnyá nú Kristo asún kɩ. Mmedékléá nótúá ɔku gyumagyihesu. ²¹Tsúfé bɔwanlín wá Bulu asún ámutɔ beé,

“Ahá ání bumókúnú mu nka kɩ bówun mu,
áhá ání bumókúnú mu asún kɩ é bónu mú asi.”

Paulo Roma Ɖpasua Yésúnáa

²²Ínɩ láchá mmókúnyá ɔkpa ba mli wá bɔɩ nde ní. ²³Táme séi mú á, mí agyómá lamó ɔnó nfi fúnsú. Nfí tsɔtsɔɩɩ ní ndekléá néba mli wá beki mli. ²⁴Mú su nabwé agywun ání ní ndetsúun nɔyó Spania a, nótɩn kɩ mli. Agyi ɔdwe kpalobí á, mlɩlasí mí ɔkpa nayó ɩnu. ²⁵Séi á, nabwé agywun ání négyankpá yó Yerusalem, yóbuá Bulu ahá ání bubu ɩnu. ²⁶Tsúfé Akristofɔá bubu Makedonia pú

Akaia ɔsulúsu bapú ɔdwe dúnká ató bodepusísí Bulu ahá ání bugyi ahiánfo Yerusalem. ²⁷Ibu amú ɔdwe ání bóbuá ahiánfo. Bawun ání ilehián ání bóbuá Yudafo é ká ɔkɔ. Tsúfé banyá Ɔhétó ató, nú nkpahóɔ asón ámu tsú amú wá. Mú su ilehián ání bóduká ɔyító ató ku há amú é. ²⁸Ní ɔkpú kóba ání bɔtswtswi ha mí fée wá amú ibuto á, nóbɔtsun mli wá yó Spania. ²⁹Nyin ání ní nebá á, nópu Kristo oyúla kpɔnkpɔnkpɔnti ba mli.

³⁰Mí apíó adwepú, ndepu aní Wíe Yesu Kristo pú ɔdweá Bulu Ɔhétó lahá mli há mli aba kókóli mli mbée, mlílú mí ɔma, amlubo mpái ha mi kínkíínkín. ³¹Mlubo mpái mlíaa, Bulu ɔléé mí tsu Yudafo ámuú bumɔho mu gyi amu ibuto. Mlubo ha mi, Bulu ahá ání bubu Yerusalem unu abuhɔ ató ámuú napú neya amú ámu. ³²Fówun ní Bulu lótsulá á, néba mli wá ansigyí kpɔnkpɔnkpɔnti, beda ɔkpúnú. ³³Buluá ɔtehá iwílwii, otsía mli fée wá. *Amen!

Itsiáha

16 ¹Nde opio tsihé Foibe le súná mli. Kenkrea wúluto ɔpasuato ahande ɔbápu ogyi. ²Mlubo mu aní Wíe Yesu dátó alíá ilekanáa ání Bulu ahá bóbué, amlubua mu ɔkpagyíɔkpasu alíá odeklé. Tsúfé mu onutó alabúá ahá tsɔtsɔtsɔ, alabúá mi é.

³Nehá Priska mua mu kulu Akwila fée tsiá. Mía amúnɔ létsiá bwé aní Wíe Kristo Yesu agyómá. ⁴Bɔpu amú iwí há ání bówu mí su kúráá. Nde amú ipán da wankláán. Megyí mí nkule. Akristofá bumegyí Yudafo ɔpasua fée bude amú ipán da. ⁵Nehá ɔpasua ámuú betsiá fia amú wóyító ámu é fée tsiá.

Nehá mí ɔdwepú Epaineto tsiá. Múlégýankpá ho Kristo Asia ɔmátó fée ní. ⁶Nehá Maria ámuú olowun ipian mli su ámu tsiá. ⁷Nehá mí aba Yudafo Androniko mua Yunia tsiá. Bawá mía amúnɔ obu kɪ. Bugyi Kristo sumbí ayɔpú ání obú bu amúsú. Begyankpá ho Kristo asa natá bɔho.

⁸Nehá mí píó ɔdwepú Kristotɔ Amplia tsiá. ⁹Nehá aní Kristo agyómá ɔyɔbá Urbano mua mí nyáwíe kláklá

Staki tsiá. ¹⁰Nehá Apele amú alalé súná wankláán ání alapú mu iwí há Kristo amu mua Aristobulo abusuanfɔ fée tsiá. ¹¹Nehá mí bá Yudayin Herodion tsiá. Nehá Narkiso abusuanfɔ ání bugyi Akristofɔ tsiá.

¹²Nehá Trifaina mua Trifosa, bugyi atsi ámú bude Kristo agyómátó kínkíínkín ámu tsiá. Nehá mí ɔdwepú tsíhé Persi, ɔde Kristo agyómá yɔ kínkíínkín ámu é tsiá. ¹³Nehá Rufo mua mu yin ámú mí é ntetí mu mí yín ámu tsiá. Rufo gyí aní Wíe agyómá ɔyɔpú ání alahɔ dá agyómá ámutɔ. ¹⁴Nehá Asinkrito, Flegon, Herme, Patroba, Herma pú apíó Akristofɔ ámú bubu amú wá ámu fée tsiá. ¹⁵Nehá Filologo, Yulia pú Nereo mua mu pio tsíhé pú Olimpa mua Bulu ahá ámú bubu amú wá ámu fée tsiá.

¹⁶Mlulata aba puta Bulu ɔdwetɔ. Kristo ɔpasua ámu fée bude mli tsiá ha.

Tsá Roma Ahógyipu Amu Bubwée

¹⁷Apíó, nokókóli mli, mlikí wankláán, méni mlétalí wun ahá ání bubu mliɔ, bude mli dasáín. Alí ahá ámu butehá ahá buteduda hógyitɔ. Amú atosunáhé tedá mú ámú nosuná mli ámu mɔ. Mlikula iwí le amúsú. ¹⁸Tsúfé ahá ámu odu á, megyí aní Wíe Yesu Kristo budesúm. Amú ɔwólí laláhe budesúm. Bapú amú ɔɔwankí pú ahákanfú buna bude ahá ání bumeyín ɔlala mlé. ¹⁹Táme mli mú á, ɔhagyíɔha lanú alíá mlulapú mli iwí há Kristo. Mú su ibu mi ɔdwe, ansí de mí gyi wankláán mli su. Táme ndekléá mliɔtún ansí, amlibí tsá ibu alé. Mli máwa ibí lalahetɔ. ²⁰Bulu téhá aní iwílwii. Imɔɔwa ɔpá á, ɔbétsa *Satansu mántá ɔsulúvú tántáántán, mlélí mɔsu.

Aní Wíe Yesu Kristo ogyíi mli buale, ɔlu mli ɔma.

²¹Mí bá agyómá ɔyɔpú Timoteo dé mli tsiá ha. Alí mí aba Yudafɔ Lukio mua Yason pú Sosipatro é bude mli tsiá ha ní.

²²Mí mli pío Okristoyin Tertio ání ɔwanlín ɔwulú ánfí há Paulo, nde mli tsiá ha.

23-24 Mí wóyí mu wie Gaio amú ɔpasua ámú butefia mu wóyító amu dé mli tsiá ha. Erasto, ogyi wúlu kóbasu ɔkípu muva aní pío Kwarto é behá mli tsiá.^e

Paulo Bulu Kanfó

25 Mliha akanfu aní Bulu! Mu ɔbétalí tsun Yesu Kristo asún amú nablí ámusu há mlélí kínkíínkín hógyitɔ. Ɔɔpu ɔɔkwali anfi nájín tsú ɔyí ɔpá. 26 Séi mú á, alatsun mu ɔnósú atɔípú amu atɔ wanlínhésu lé mú ɔwan. Fé alíá Buluá ɔbu unu bré féétó lahá ɔmá-ɔmá babí mú, méni ahá féé bóho mu gyi, bú mu.

27 Bulu nkule gyí Bulu. Mu nkule bów nyánsa. Numnyam ání ilekanáa utsóbn aní Wíe Yesusu itu mu bré féétó. *Amen!

Rom

^e 16:24 Mútó yée 24 bu nwulú dada amu akutɔ: *Ani Wíe Yesu Kristo ɔwáa awitɔle ha mli féé. Amen!*

Ɔwulú Gyankpapuá Paulo Lówanlín Sísí Korintofɔ

1 ¹Mí Kristo Yesu *sumbí ɔyɔpú Paulo ání Bulu léti mu apétɔ́ pú aní pió Sostene dé ɔwulú ání wanlín.

²Anídé mú wanlín sísí Bulu ɔpasua ání tɔbu Korinto wúluto, Bulu lalé amú, bwé amú mu ahá. Amúa Kristo Yesu babwé kule, fé aní Wíe Yesu Kristo asúmpúá bobu ɔyítɔ́ féeé, Yesu Kristo gyí aní féeé Owíe.

³Aní Sí Bulu mva aní Wíe Yesu Kristo bugyíi mli buale, abuha mli iwilwii.

Ania Kristo Ukolebwetɔ Oyúla

⁴Ntedá Bulu pán brégyíbré, alúá mli Kristo Yesu kulebwe su alawá awutɔle há mli. ⁵Tsúfé mú su mlilanyá tɔwí tógyítɔ́tɔ́. Múá idun gyí mli tóí pú mli asúnbi féeétɔ́. ⁶Íni lasúná ání asún ámúú anulébláa mli tsú Kristo tɔwí ámu bu mútɔ́. ⁷Íni su ɔhétɔ́ atokiehé kugyíku medé mli hián séi ání mlihié mli dé ekeá aní Wíe Yesu Kristo obótsu ɔsúsú ba bele tɔwí ɔwan ɔkpa kú anfi. ⁸Mu onutó ɔbówa mli ɔwunlín yófun eke ámúú ɔbésankí bá begyi aní asún ámu, méni asansu méetsiá mli tɔwí. ⁹Ɔnɔkwaliɔ Bulu gyí. Múléti mli ɔbée, mliha mu Bi, ogyi aní Wíe Yesu Kristonyɔ mli bóbwe kule.

Ɔpasua Ámutɔ Ukolemábwé

¹⁰Apíó, nɔpú aní Wíe Yesu Kristo kókóli mli ání mli féeé mli bówée kule, méni mli méeɔasaín. Mliha mli agywun tɔwí kule mli asun blíhé kugyíktɔ́. ¹¹Mí apíó, tɔ́á suá nde asún ání blí gyí, akvá botsú Kloe abusuantɔ babláa mli bée,

asún bubu mli nsuné. ¹²Bebli beɛ, mliɔ aku mliaa, “Paulo anibuo.” Abambá beɛ, “Apolo anibuo.” Aku é beɛ, “Petro, butetráa ti mu Kefa anibuo.” Aku é beɛ, “Kristo anibuo.” ¹³Nfíte mli, beye Kristoɔ? Paulo beda mántá *oyikpalíhe amusu há mli, ntée mu dátɔ bɔbɔ mli *asú?

¹⁴Nedá Bulu ipán ání Gaiο mva Krispu ɔma a, mmetrá bɔ mliɔ ɔkuku asú. ¹⁵Mú su ɔhaa méetalí blí ɔbéɛ, mí idátɔ nɔbɔ mu asú. ¹⁶Ké! Nakáín, nɔbɔ Stefano mva mu wóyítɔ ahá é asú. Amú ɔma a, mméekaín ání netrá bɔ ɔhaa asú. ¹⁷Kristo mówa mí ahá asúbɔ. Mboún ɔbéɛ, mbeda *asun wankláán ámu ɔkan. Megyí ɔnɔwanki pú anyánkɔpɔsa agywun nɔpublí mú, tsúfé ní nɔpú mú blí mú á, túmi kukuuku umétrá tsiá Kristo oyikpalíhe amutɔ.

1 Ko

Bulu Túmi Pó Mu Nyánsa

¹⁸Ani Wíe Yesu oyikpalíhesu lowu ɔwɔ asún ámu igyi mimlála há ahá ání budehu. Táme igyi Bulu túmi há anu ahá ání Bulu dé nkpa ání itamatá ha. ¹⁹Tsúfé bɔwanlín wá Bulu asún ámutɔ beɛ,

“Néyintá anyansapu nyánsa.

Mmɔɔho amú agywun wankláán kuku.”

²⁰Ní igyi alí á, múmú ntɔ onyansapu gyí? Ntɔ Mose mbla osunápú gyí? ɔyí ánfítɔ nwéen agyípú me? ɔyítɔ ansutún mé, imegyí mimlála Bulu ansítɔ?

²¹Bulu lɔpu mu onutó nyánsa bwé mú. Nyankɔpɔsa méetalí pú mu nyánsa bí mu ekekeke. Mú su alapú anu mimlá ɔkan amú anidéda ámu ho ahá ání bahɔ mu gyi nkpa. ²²Tsúfé osúna ání itsú Bulu wá *Yudafɔ butekleá bɔpúbí ání asún ámu bu mútɔ. Griikifɔ é á, nyánsa butekleá bɔpúbí ání ɔbu mútɔ. ²³Mú su ní adá ɔkan aniaa, beda Kristo mántá oyikpalíhesu á, ɔtɔkúsú líí Yudafɔsu, igyi mimlála ɔmá bámbásúfɔ é ansítɔ. ²⁴Táme ahá ání Bulu lalé, bvgyi Yudafɔ pú Griikifɔ mú á, Kristo gyí Bulu túmi kɔnkpɔnti pú mu nyánsa há amú. ²⁵Tsúfé Bulu mimlála igyi ansutínla dun nyankɔpɔsa nyánsa. Mu pón é kúráá dun nyankɔpɔsa ɔwunlín.

²⁶Apíó, mlíkauñ alá mlígyí bréá Bulu léti mli. Ahá butamabú mli ɔɔɔɔɔ ání mlilétun ansí. Mli ɔɔɔɔɔ mlímégyí iwí anyapú, ɔɔɔɔɔ é bumotsú abusuan kpikplítɔ. ²⁷Bulu léle ahá ání buma nyánsa ɔyí ánfítɔ, méni ɔbópu amú súpá atiansipɔ. ɔlele ɔyí ánfítɔ apónpu é, méni ɔbópu amú wá awunlínpu pélítɔ. ²⁸ɔlele ahá ání obú ma amúsú, pú amúá buma labi kuku ɔyí ánfítɔ, méni ɔbópu amú wá amúá obú bu amúsú pélítɔ. ²⁹ɔlobwe mú féé alí, méni ɔhaa móotsu iwí mu ansítɔ. ³⁰Bulu su mliá Kristo Yesunɔ mlilabwé kule, alapú Kristo bwé aní nyánsa. Mlúátsú aní ání aní asún da ɔkpa mu ansítɔ, alabwé aní mu ahá. Alahɔ aní lé lakpan nkpábitɔ, há anílagyi iwí. ³¹Mú su fé alá Bulu asún ámu léblí á, “ɔhagyíha ání ɔbéé, mótsu iwí á, ɔpú tɔá aní Wíe labwé tsu iwí.”

Kristo Da Mántá Oyikpalíhesu

2 ¹Mí apíó, bréá neba beda Bulu asun ñáinhé amu ɔkan súná mli á, mmɔpu ɔɔwanki ntée nyánsa kuku bebláa mli Bulu asún ámu. ²Tsúfé bréá mbu mli wá á, nɔbwe agywun ání nótɔí tsú Yesu Kristo pú mu *oyikpalíhesu lowu nkule iwí. ³Bréá neba a, mí awútɔ yóyóyó. Ifú de mí, ndekpunkí. ⁴Megyí mí nyánsa pú mí ɔɔwanki nɔpudá asún ámu ɔkan súná mli. Mboún ɔñé Wankíhé amu túmi léha asún ámu ɔwankí mli. ⁵Uleba alí, méni mlénya mli hógyi tsú Bulu túmitɔ, megyí nyankpusa nyánsatɔ.

Bulu Nyánsa

⁶Táme ní nowíe ahá ání badan hógyi amutɔ wá á, ntɔpú Bulu nyánsa bláa amú asún amú. Megyí nde ɔyi keheto nyánsa, ntée ɔyí ánfítɔ isu agyípú ání béba bɔhulú amú túmi klé. ⁷Nyánsa ánfí anidé mú iwí asún blí ánfí igyi nyánsa ání Bulu lópuñáín asa ɔyí lebelun, ání ɔbópuwá aní numnyam. ⁸ɔyí ánfítɔ otúmípu ɔkuku mébi nyánsa ánfí. Ní bebí mú á, teki bumeda aní Wíe Onumnyampu amú mántá oyikpalíhesu. ⁹Táme fé alá bɔwanlín wá Bulu asún ámutɔ á,

“Tʒá ansíbi mɔkúwun ki, asu mɔkúnú ki,
umɔkúba nyankpusa agywuntɔ é ki a,
mú Bulu lalá yáí há mu adwepó ní.”

¹⁰Táme anlabí íni, tsúfé alalé mú súná aní tsun mu *Dɔɛ Wankíhé amusu. Dɔɛ ámu tokwí tógyítótɔ ki, ɔtelé Bulu asun ɣáinhéá ibu ɔtótótót kúráá súná aní. ¹¹Dhaa tamawun mu ba nwuntɔ, nkéti mu onutó ɔɛ. Alí kén Bulu Dɔɛ ámu nkule tówun Bulu nwuntɔ ní. ¹²Aní mú á, Bulu lópu mu Dɔɛ wá anitɔ, megyí ɔyí ánfutɔ ɔɛ bu anitɔ. Mboún Dɔɛá itsú Bulu wá, méni abétalí nú utó ámút Bulu lapúkíé aní faan amu asi.

¹³Mú su megyí aní onutó nyánsa asún anidé mli bláa. Mboún asún aní itsú Dɔɛ Wankíhé ámu wá. Mú anidépulé Dɔɛtɔ ɔɔkwali asún asi ní. ¹⁴Dhá aní ɔma Dɔɛ Wankíhé méetalí hɔ tʒá itsú Bulu Dɔɛ ámu wá, tsúfé igyi mimlála mu wá. Dhá aní Dɔɛ Wankíhé bu mutɔ tónú asún aní Dɔɛ ámu déblí asi. ¹⁵Mutetalí tété tógyítótɔ nú mú asi. Táme mu mú á, ɔhaa méetalí tété mu asúntɔ, nú mu asi ekekeke. ¹⁶Nkálí íbɔbwe asa bétalí nú mú asi? Igyi fé alíá Bulu asun wanlínhé amu léblí ɔbéé,

“Ma ɔbétalí bí aní Wíe agywun?

Ma ɔbétalí súná mu asún?”

Táme Kristo agywun bu anitɔ. Mú su aní mú abétalí bí mu agywun.

Bulu Asúmpú

3 ¹Apíó, bréá neba mli wá á, mmetalí tʒí mli ansítɔ fé ahá aní Dɔɛ Wankíhé bu amútɔ. Nebláa mli asún fé ahá aní amú agywun idun ɔyí ánfutɔ atósú, bumɔkúdan Kristotɔ. ²Nyɔpu-ntsu neha mli. Mmeha mli atogyihe onutó. Alí bré ámutɔ á, mlumókúfun atogyihe onutó gyí. ³Tsúfé ɔyí ánfutɔ tsiátɔ itráa bu mlitɔ. Mlidé aba lu, mlidétré. Ní mlidé íni bwe mé, imosuná aní mli agywun trá dun ɔyí ánfutɔ atósú, mlgýí fé ɔmátɔfɔ? ⁴Mlitɔ aku mliáa, “Paulo mbuo.” Mlitɔ aku é mliáa, “Apolo mbuo.” Mbéé, íni medésuná aní mlgýí fé ɔmátɔfɔ?

⁵Mbéε, ma gyí Apolo, ntée ma gyí Paulo, sɔ mlidétré anu su? Bulu asúmpú keke anigyí, mlilatsun anu ibuto mlí mu ahógyipu. Anuto okugyíɔku légyi gyuma ání Bulu léha mu. ⁶Mílódu, Apolo lówulí mú ntsu, táme Bulu léha mú uledan. ⁷Megyí odupú mɔ́a ntsu ɔwulípu lóbwe tɔtɔ. Bulu nkule tóbwe, tsúfé mutéhá mú itedan. ⁸Odupú mɔ́a ntsu ɔwulípu féé bugyi kékée Bulu ansítɔ, ɔbéka okugyíɔku ɔku mu bwehé ɔnɔ. ⁹Agyómá ayɔpu mía Apolo anigyí há Bulu. Mligyí Bulu ndɔ, mligyí mu obu é ní.

¹⁰Bulu lówa awitɔle há mí, bwé mí obu oyípu ɔtiansipu. Mú sɔ nɔpu abwi wá obu ámu ntswiasi, aha bambá betalí budepwe dínká mósú ní. Táme ɔhagyíɔha ɔkú wankláán obu ámu pwetɔ. ¹¹Tsúfé ɔhaa méetalí wá ntswiasi bámbá dun mú ámúb ɔda yaí, igyi Yesu Kristo amu. ¹²Ní ɔku ɔpu sika pepe o, sika futútú o, abwi ání ibu bíá o, nyí o, afitáa ntée ipí yi dínká ntswiasi ámusu á, ¹³ɔbú ání kugyíku ibélun ɔwan eke ámúb Bulu obégyi anu asún ámu. Ogyá ɔbɔpusɔ mú ki beε, ɔɔbwe mú wankláán. ¹⁴Ní ogyá ámu mɔhɔ obu ámu yíntá á, Bulu ɔbéda mu ipán. ¹⁵Táme ní obu ámu lóhɔ a, ɔbéhɔe húli atɔ. Bulu ɔbɔhɔ mu nkpa, táme obóflu fé ɔhá ání alarí dalu ogya plenplento.

¹⁶Mluméyín ání *Bulu ɔswékpa mligyí, Bulu ɔhɔ́é ámu tsie mlɔtɔ? ¹⁷ɔhagyíɔha ání oleyintá mu ɔswékpa a, Bulu é obéyintá mu, tsúfé Bulu ɔswékpa lɔwankí. Mu ɔswékpa amu gyí mli á.

¹⁸ɔhaa mámlé mu iwí! Ní mlɔtɔ ɔku dé mu iwí ti ɔtiansipu nde ɔyí ánfɔtɔ á, ilehián ání ɔbɔbwe mu iwí ɔha mimláhe, ménɔ ɔbɔbwe ɔtiansipu onutɔ. ¹⁹Tsúfé ɔyí ánfɔtɔ ansútún igyi mimlála Bulu ansítɔ. Fé alíá ɔɔwanlín wá Bulu asun wanlínhé amutɔ beε, “ɔtiansipu agywun laláhe Bulu tɔpúkítá mu.” ²⁰Bulu asun wanlínhé amu letrá blí ɔbéε, “Bulu yin ání ɔtiansipu agywun itépi ma labi.” ²¹Ínu su ɔhaa mápu ansí dínká ɔhaasu tsú iwí. Mlibú tógyítɔ. ²²Paulo o, Apolo o, Petro o, ɔyí ánfɔtɔ o, nkpa ntée lowu o, nde o, ɔke o, mlibú mú féé. ²³Kristo bú mli, Kristo é gyí Bulu klé.

Kristo Sumbí Ayɔpó

4 ¹Íni su ɔhagyíɔha otsú mú ání Kristo asúmbi keke mía Apolo anigyí, Bulu lapú mu asun ɔhainhé amu agyómá wá anu ibito. ²Tsá ihíé dehián gyí, ɔhá ání bapú agyómá wá mu ibito obégyi ɔɔkwali. ³Mí mú á, ní mlito aku ntée aha bambá bude mí pón ha kúráá á, imegyí ɔɔɔ mí ansító. Mí onutó ó mmókúhá iwí pón ntée asu. ⁴Nyin mí klvntɔ, táme imosuná ání mí asún da ɔkpa. Anu Wíe Yesu gyí mí asún ogyípú. ⁵Íni su mlumákɔsí lé mli aba ilá kpéfun anu Wíe ɔbáke amu. Mu ɔbówankí wúlí oklúntɔ atósú, lé anu agywun ɔwan, asa Bulu ɔbékanfú ɔhagyíɔha alíá ilehián ni.

⁶Mí apíó, mli sù ndepu mía Apolo tsiátó súná mli ató, méni mlónu mú ámúú ahá buteblí bæe, “Mlumányankí tsá bɔwanlín tswisu” ámu asi, fówun mlumóowun ɔhaa tsú iwí. ⁷Ma lébláa fu ɔbéé fudun ɔku? Nto fubvá imegyí Bulu léha fú? Ní Bulu léha fú tógyító á, ntogyi sù fúde iwí tsu fé megyí ha beha fú?

⁸Mludékú ání mlilamwé! Mlilanyá iwí! Mlilawúna mlidé iwíe gyí. Mí su mú á, teki mlidé iwíe amu gyí lélé, méni ania mlinyɔ abégyi iwíe amu. ⁹Ide mí bwe fé Bulu lahá anu *sumbí ayɔpó ánfu anilabwé ɔma agyápu fé ndoun bakpá bɔyómɔ. Tsúfé anlamlí ato kihe há ɔyító féé, Bulu-abɔpu múa anyánkpósa féé. ¹⁰Kristo sù anilabwé aha mimláhe, mli mú mlilatun ansí. Anigyí apónpu, mli mú mlibu ɔwunlín. Ahá bude mli bu, anu mú ɔhaa tamabú anu. Megyí alí mlidé anu kí ni? Ntée megyí alí? ¹¹Bófun séi á, akún múa ɔmewúli de anu, atatidatɔ anida. Bude anu atswe fulí, anumá ɔdikpa. ¹²Anuteyírí iwí pú anu ibi yó agyómá púnýá anu ato hiánhe. Ní bɔlwí anu á, anitoyúlá amú. Ní budun anisu é á, anutotomi. ¹³Ní beblí anu iwí asun laláhe a, anuɔpú ɔdwe lé mú ɔɔ. Bɔfun séi á, anilabwé wúna, bude ipí putsítsá anisu ɔyí ánfito.

¹⁴Mmedé íni wanlín púsúpa mli, mboún ndeputóí kplá mli fé mí abí adwepú. ¹⁵Tsúfé ní ahá mpím-dú (10,000) lósuná mli Kristo iwí asún kúráá á, ɔbakúle pé abí mligyí

ɔɲétɔ. Nɔbwe mli sí Kristo Yesuto bréá neda asun wankláán ámu ɔkan súná mli. ¹⁶Mú su nde mli kokóli, mlukasí mí tsiátɔ. ¹⁷Íni su nde Timoteo wa sísí mli. Mí bí ní, ntɔdwe mu. Ɖbu ɔɔkwali Kristotɔ. Mu ɔbéba bekaín mli tsiátɔ oduá nɔpu mbuo Kristo, ndepusúná ɔpasua kugyíkuá ibu ɔtínegyíɔtíne ni.

¹⁸Mlito aku bude iwɔ tsu. Buki bee, fíali mméetrá ba mli wá ekekeeke. ¹⁹Táme ní anɔ Wíe Yesu lótsulá á, umɔɔwa ɔpá kuku néba mli wá beki bee, asún keke iwɔ atsupú ánfɔ budeblí lóó, ntée lélé bubu Bulu túmi. ²⁰Tsúfé megyí asun blíhé keke *Bulu iwíegyí ámu igyi, mboún Bulu túmi. ²¹Ní nebá mli wá á, ntɔ mpúba? Mpú mpli ba lóó, ntée ɔdwe múa uklun lwiíhéhé?

Mbuatɔ Iwɔ Asún

5 ¹Bahíe bebláa mi bee, mlito aku bude atsi múa ayin asún wa. Ɖmátɔfɔ kúráá bumedé mú odu bwe. Mlito ɔku mú kúráá laswíí mu si mu ka, ²ibu mli ansigyí! Ima mli awirehɔ. Péli medé mli, méni mlégya ɔhá ánfɔ odu lé mli ɔpasuatɔ. ³Íniá mlimédé mí wúun ó á, mbu mlito ɔɲétɔ. Nahá ɔhá ánfɔ ɔbu tsiátɔ anfi odu ipón dododo, fé mbu unu. ⁴Mliti ɔpasua ámu fia anɔ Wíe Yesu Kristo dátɔ. Nétsiá mlito ɔɲétɔ, anɔ Wíe Yesu Kristo túmi é ibétsiá mlito. ⁵Ínu á, mliɔpu mu wa Ɖbunsám ibitɔ, oyinta mu ɔyulúv, méni Bulu ɔbóhɔ mu ɔkláa nkpa anɔ Wíe Yesu ɔbáke amu.

⁶Kpaali mlidé iwɔ tsu. Mliméyín ání bodobodotu-afá kpalobí téhá bodobodo amu féé itotú? ⁷Íni su mlile lalahe ɔbwepú anfi mlito, méni mli iwɔ bétun fé bodobodoá bumɔwa afá mútɔ, tsúfé alí mlíhíé mligyí ní. Megyí bodobodoá bumɔwa afá mútɔ, imotu butɔpúgyí *Katsun Nke? Bamó anɔ Israelfɔsu Katsun Nketɔ *Okúfabi, ogyi Kristo amu, lé anɔ nwunsu mbusuo há anɔ dododo. ⁸Mú su mliha apu bodobodoá imotu, igyi iwítún múa ɔɔkwaliwa gyi Katsun Nke ámu. Mlimáha apu bodobodoá ulatú, igyi tsiátɔ laláhe múa lakpan gyi mú.

⁹Nɔwanlín wá ɔwulú kuá nɔpusísí mlito mbée, mlimápu mbua atɔpú gyi mba. ¹⁰Megyí ɔyítɔ mbua atɔpú, ɔnsipe

awapú, awikplu ntée ikpi atswépu iwɪ asún neblí. Múmú tekɪ mlédalɪ ɔyí ánfɪtɔ asa mlumɔɔwa amú mba ní. ¹¹Tɔ́á nɔwanlín sísí mli gyí, mlumápu ɔhá ání ɔbée Okristoyin mugyi, táme ɔtɔtɔ mbua ntée ɔbu ɔnsípe, ɔtɔtswe ikpi, otesíá mu aba, ɔtɔbú ntá ntée otowí atɔ gyi mba. Mlia ɔhá ámu nyo mlumáwa ibi gyi atɔ kúráá.

¹²Ntɔ sù négyi ahá ání buma ɔpasua ámutɔ asún? Megyí ahá ání bubu mútɔ, buɔe lakpan ánfɪ odu bwe mboún asún lehián ání mlégyi? ¹³Bulu obégyi ahá ámúú buma ɔpasua ámutɔ ámu mú asún. Táme ɔwanlín wá Bulu asun wanlínhé amutɔ beɛ, “Mli mú mliɔya lalahe ɔbwepú le mliɔ.”

Bulu Ahá Wulewule Nsuné Asúngyí

1 Ko

6 ¹Ní mliɔ ɔku mu ba Okristoyin benyá á, ntogyi sù mliɔwá klun púya ɔmátɔfɔ asún ogyíkpá, mliɔtamapú ya Bulu ahá abubli mú? ²Mluméyín ání Bulu ahá obégyi ɔyítɔ ahá féé asún? Ní mli obégyi ɔyítɔ ahá asún á, mú ntogyi sù mluméetalí gyi mli wulewule nsuné asún? ³Ntée mluméyín ání anɪ obégyi Bulu-abɔpu é asún? Ntogyi sù anuméetalí gyi ekekegyíeke asún mú? ⁴Ní asún idá mli nsuné á, ntogyi sù mliɔpúya ɔmátɔfɔ asún agyípu amúú mli ɔpasuafɔ butamabú ámu? ⁵Nde asún ánfɪ wanlín sísí púsúpa mli. Mú su ɔtiansipu ɔkule kúráá má mli ɔpasuatɔ ání ɔbétalí gyi mu aba nsuné asún? ⁶Ntogyi sù ohógyipu ɔbésamáa mu ba, múa idun kúráá pú mu yélu ɔmátɔfɔ ansítɔ?

⁷Alí ámúú asún ibi mli Akristofɔ wulewule nsuné ámu kúráá ilosuná ání mlɪlagyi pɔn dodo. Ntogyi sù mli bá ɔpú ulá gyí mli, ntée osísi mli, mluméesikíé? ⁸Mli mboún latsun gyankpá mlidé mli aba sísí, mlidé lalahe pugyi mli aba? ⁹Ntée mluméyín ání aha laláhe bumóowie *Bulu iwíegyi ámutɔ? Mlumámlé mli iwɪ. Ahá ání butɔwá atsi múa ayin asún, ikpi atswépu, mbua atɔpú, ayin ání butekle amú aba ayin, ¹⁰awikplu, ɔnsípe awapú, ntá abupú, ahá asiapú pú ahá asísipu buméenya ogyíkpá Bulu iwíegyi ámutɔ. ¹¹Tekɪ bré ámu a, alí mliɔ aku mliɔyí ní. Táme Bulu labie mli ntsu,

alabwé mli mu ahá. Alatsun mu Ɔɲé ámu pú aní Wíe Yesu Kristosu tsú mli ání mli asún da ɔkpa mu ansítɔ.

Mli Ɔyulúv Pwá Bulu Numnyam

¹²Mlitɔ ɔku ɔbétalí blí ɔbéɛ, “Mbu ɔkpa bwé tótógyítɔ.” Ee! Táme nde mli bláa mbéɛ, “Megyí mú fée ɔbɔwa labi.” Ɔku é ɔbéblí ɔbéɛ, “Mbu ɔkpa bwé tótógyítɔ, táme mméɛha tɔtɔ méegyí misu.” ¹³Ubu mótɔ́á ɔku ɔbétalí blí ɔbéɛ, “Atogyihe bu unv há ipu, ipu é bu unv há atogyihe.” Ee! Táme mú fée íbéhi ekekú. Bulu mɔ́bwe nyankpusa há atsi múa ayin asún wa. Mboún aní Wíe bú aní ɔyulúv, aní ɔyulúv é bú aní Wíe. ¹⁴Bulu lókúsúá aní Wíe Yesu tsú afúlito. Ɔbɔpu mu túmi ámu kúsúá aní é.

¹⁵Ntéɛ mliméyín mliáa, mli ɔyulúv igyi Kristo nyankpusa-oyí ámu iwí atɔ? Mú nkáli sù mpúv Kristo ɔyulúv yeda obu-ɔ́nɔ́ otsiápu ɔyulúv? Itsúvun misu! ¹⁶Ntéɛ mliméyín mliáa, ní ɔku ɔpú íbɛ da obu-ɔ́nɔ́ otsiápu a, mva munyɔ ɔyulúv labwé kule? Tsúfé Bulu asun wanlínhé amu léblí ɔbéɛ, “Oyin ámu mva ɔtsi ámu babwé ɔyulúv kule.” ¹⁷Táme ní ɔku mva Kristo bɔ́bwé kule a, mva munyɔ babwé ikule ɔɲétɔ é.

¹⁸Mlumápleí atsi ntée ayintɔ. Lakpan kugyíkúá ɔha tɔ́bwé tamakúsú líí mu ɔyulúsv. Táme ní ɔku ɔwá atsi múa ayin asún mú á, alabwé lakpan ání ulókúsú líí mu onutó ɔyulúsv. ¹⁹Ntéɛ mliméyín mliáa, mli ɔyulúv gyí Ɔɲe Wankíhé amu ɔtswékpa obu? Bulu lópu mu há mli, otsie mlitɔ. Mú sv megyí mlibú mli iwí. ²⁰Ibíá kpékpélékpé Bulu lóho mli. Mú sv mlipu mli ɔyulúv wa Bulu numnyam.

Akúlu Mva Aká, Akpanku Pú Asvrapu Atosunáhé

7 ¹Nayɔ́ asun fitéhé amúv mlilówanlín sísí mí ámutɔ kɪ a, Ee! Ubu aléá oyin mɔ́ɔpu íbɛ da ɔtsi. ²Táme mbuatɔ ladubi sv oyingyíoyin onyá mu onutó ɔká, ɔtsigyíɔtsi é onya mu onutó okúlu. ³Ilehián ání okúlu obégyi ɔkátsiá mbla féesú ha mu ka, ɔká é ɔbɔ́bwe mú alí ha mu kulu. ⁴Megyí ɔtsi bú mu iwí, mu kulu bú mu. Alí megyí oyin é bú mu iwí, mu ka bú mu ni. ⁵Mú sv mlimákiná aba ɔdukpa ha, nkéti

mli abanyɔ ámu mliatsúlá ání mlétsiá nke kpalobí, méni mlétsiá bó mpái, asa mlélayɔ aba wá. Mliawun aba mú ɔma, méni Ɖbunsám méetalí sɔ mli kí, ní mliumétalí kítá iwí.

6Ɖkpa ida ání mlóbwe mú alí, táme megyí ɔhíé igyi. 7Mí nkule sv mú á, teki mlétsiá kpanku fé mí, táme ɔhagyíɔha bu móá Bulu lópukíé mu. Ɖmɔbwe aní fée kékée. Ɖhagyíɔha mva mu kle.

8Séi nde akpanku móa asvrapu bláa mbée, ní bótsulá tsíá mí atsiábi a, teki ibu alé. 9Táme ní mliumétalí kítá iwí ntée gyi mli iwísv mú á, mlitsia akúlu móa aká, dvn ání mlénatí dá tsun.

10Táme akúlu móa aká awíé mú á, mbla ku bu unvá megyí mí, mboún aní Wíe Yesu lówa há amú. Ɖbée, ɔká mákiná mu kulu. 11Táme ní ɔmáín mu kulusu a, ɔkíta iwí ntée oyínki yɔ mu kulu wá. Okúlu é mákiná mu ka.

12Mli aha tráhe mú á, mí onutó dé mli íni bláa. Megyi aní Wíe Yesu dé mú blí. Ní ohógyipu yínhé tsíá ɔtsiá ome gyí ohógyipu, táme ɔtsi ámu latsúlá ání mva munyɔ bétsiá á, ɔmákiná mu. 13Ní ohógyipu tsíhé é tsíá oyin ání ome gyí ohógyipu, táme alatsúlá ání mva munyɔ bétsiá á, mu é ɔmákiná mu. 14Tsúfé ohógyipu tsíhé ámu sv Bulu ɔbɔho mu kulu. Alí kén ohógyipu yínhé ámu sv Bulu ɔbɔho mu ka é ní. Ní megyí alí á, Bulu móotsu amú abí ání amú asún da ɔkpa mu ansítɔ, táme íni sv Bulu latsú amú ání amú asún da ɔkpa mu ansítɔ. 15Táme ní okúlu ntée ɔká ání ome gyí ohógyipu dékléá obékiná mu tsiába ohógyipu a, ohógyipu amu osíi mu ɔnati. Mbla kuku meklí mu, tsúfé Bulu létí aní ɔbée, abétsiá iwilwiitɔ. 16Ohógyipu tsíhé, fuyin ní fú ɔbɔho fú kúlu nkpa? Ntée ohógyipu yínhé, fuyin ní fú ɔbɔho fú ká nkpa?

Tsia Alá Fúgyi

17Mú sv ɔhagyíɔha ɔpúv tɔá aní Wíe Yesu léha mu asa Bulu létí mu tsia. Múgyí tɔá ntebláa ɔpasua kugyíku ní. 18Ní ɔku létin *keté asa Bulu létí mu a, ɔmálayínkí yébwé mú iwí tɔtɔtɔ. Ní ɔku é métin keté asa Bulu létí mu é á, ɔmáyétin. 19Ketétin ntée ketémátin megyí tɔtɔ. Bulu mbla ámusv gyí

mboún gyí asún. ²⁰Ohagyíoha otsía alá ogyi asa Bulu létu mu. ²¹Okpábi fugyi asa Bulu létu fú? Imáhan fu. Táme ní okpa ibá ání fégyi iwí á, kusu músú. ²²Tsúfé ní okpábi fugyi asa aní Wíe létu fú á, alahá fagyi iwí. Alí kén ohá ání otsie mu iwísu asa aní Wíe létu mu é gyí okpábi séi há Kristo ní. ²³Bulu lóhó mli ibiá kpéklékpéé. Iní su mli mábwe mli iwí nkpábi há anyánkpósa. ²⁴Mí apíó, alígyíalíá ohagyíoha gyí asa Bulu létu mu a, okpóu mú alí tsia.

Mbitebí Múa Asurapu

²⁵Mli mbitebíá mli mókútsía akúlu kí mú á, mma mbla kukvá itsú aní Wíe wá há mli. Táme aní Wíe mua mu nwewúun, alahá mí nyansa ání mlétalí hó mí gyi. ²⁶Asún ání nde há mli gyí, oyító lawá onlun séi. Mú su nahogyiá ibu aléá ohagyíoha obétsiá alá otsie yaí. ²⁷Ní fúbu oká á, mákiná mu. Ní kpanku fúgyi é á, mátepi tsía. ²⁸Táme ní fetsiá oká á, fómokúbwé lakpan. Ní obitebíá omókútsiá okúlu kí é otsiá a, omókúbwé lakpan. Asun wunheá ibéba tekí ndetsu kúsú akúlu múa akású. Mú su nde iní blí.

²⁹Mí apíó, múa ndeblí gyí, bré itinbí ulasí. Iní su tsú séi á, ohá ání obu oká obwéé fé ohá ání oma. ³⁰Osun ígyi o, odwe ígyi o, iwinya ígyi o, obwéé iwí fé aswansu medín musu. ³¹Ahá ání bude oyí ánfúto ató pubwé toku bomápu amú ansí féé dínká músú. Tsúfé oyí ánfú pú mútú ató féé béba botson.

³²Mmedékléá asún iháan mli. Ohá ání oma oká okpó mu ansí dínká aní Wíe agyúmású, méni obégyi mu ansí. ³³Táme oká mu wie mú okpó ansí dínká oyító atósú, méni obégyi mu ka ansí. ³⁴Mú su mu agywun tobwé anyo. Alí kén otu kpanku é tesi mu iwí há aní Wíe, oyulúv múa onétó féé, méni obégyi Bulu ansí ní. Táme okúlu mu wie mú okpó mu ansí dínká oyító atósú, méni obégyi mu kulu ansí.

³⁵Mli yilé su nde asún ánfú blí. Mmedé mli itin ka. Mboún nde kléá mli bwéé tóá ida okpa, amlisi mli iwí féé há aní Wíe Yesu.

³⁶Ní oyin ofíté otssu, owun ání oméetalí kítá iwí, otu ámu é déklé odan tsun a, oyékpáin mu. Megyí lakpan igyi.

³⁷Táme ní ɔ́lábwé agywun ání oméetsiá mu, ɔ́bétalí kítá iwí tsíá kpanku á, ɔ́bu ɔ́kpa bwé t́sá odeklé. Ní ɔ́bétalí kítá iwí á, múmú ɔ́kíta iwí. Ibw alé dvn. ³⁸Ibw aléá obétsiá ɔ́ká, táme ní ometepí tsíá a, ibw alé dvn.

³⁹Mbla léklí ɔ́tsi ání oméekiná mu kulu yófvn mu owuké. Táme ní oyin ámu owú á, ɔ́bu ɔ́kpa tsíá oyin ání odeklé. Táme ilehián ání ɔ́há ámu ɔ́bɔ́bwe Okristoyin. ⁴⁰Mí nkule su mú á, ní otsie kpanku á, ansí bégýi mu dvn. Nyin ání Bulu Ɖɔ́ɔ́ ámúú ibw mitɔ́ ámu sù natálí nde mli asún ánfí bláa.

Ɖkputɔ Atogyihe

8 ¹Muha abli ɔ́kputɔ-atɔ́ gyí iwí asún ámúú mlúswanlín sísí mí ámu.

Mludéblí mliaa, “Ani fée anyin asún.” Ibw mútɔ́, táme mliɔ́ ání asúnbi tehá ɔ́ha totsú iwí, ɔ́dwe é itehá ɔ́ha tedan. ²Ní ɔ́ku ɔ́béé, muyin asún dubi a, ɔ́mɔ́kúnyá bí t́sá idehián. ³Ɖhá ání ɔ́ɔ́dwe Bulu á, Bulu é yin mu.

⁴Mú su nkáli anudéblí tsú ɔ́kputɔ atɔ́ gyí iwí? Ani fée anyin ání ɔ́kpi mégyí tɔ́tɔ́tɔ́. Anyin ání Bulu ɔ́kule pé é bu unv, ɔ́kuku trá ɔ́ma ɔ́tinetine. ⁵Íniá ikpi múa túmi tsɔ́tsɔ́tsɔ́ bubu ɔ́sú múa asi ó á, ⁶ani mú anyin ání Bulu ɔ́kule pé bu unv. Mugyí ani Sí, ɔ́sú múa asi Ɖbwepú. Mu anutsie nkpa há. Ani Wíe ɔ́kule pé é bu unv. Mugyí Yesu Kristo. Musu Bulu lótsun bwe tógyítɔ́. Mu kén su anutsie nkpa ní.

⁷Táme megyí Akristofɔ́ fée yín alí asún ánfí. Ikpísúm lamántá amú dodo. Íni su ní begyi ɔ́kputɔ-atɔ́ á, bude mú tsu ání basúm ɔ́kpi ámu ni. Mú su ifin lada amú, tsúfé bumɔ́kúdan hógýitɔ́. ⁸Megyí t́sá antegyí sù ania Bulunyo nsuné bówa alé. Ntɔ́ anulégyí o, ntɔ́ anumégyí o, tɔ́tɔ́ meyintá ani iwí.

⁹Táme mliki wankláán ání ɔ́kpa ánfí mliɔ́ gyi ɔ́kputɔ-atɔ́ ánfí uméeha ɔ́há ání ɔ́mɔ́kúdan hógýitɔ́ ɔ́méedida. ¹⁰Ní ɔ́há ání ɔ́mɔ́kúdan hógýitɔ́ owun fú ánfí fée fuyin asún, fude atɔ́ gyí ɔ́kputɔ́ á, ibw alé? Múmú yée fude mu atetɔ́-ɔ́nlín wa fée, ogyíi ɔ́kputɔ́ atɔ́ ánfí mu onutó oyin ání uma ale anfi ní o. ¹¹Múmú fapú fú asúnbi mlé fú píó wá. Fahá fú píó

ánfi ɔmɔkúdan hógyitɔ, Kristo lówu há mu anfi lafwí. ¹²Ní fɔpú alá gyi fú pío Okristoyin ání ɔmɔkúdan hógyitɔ, fehá mu ɔbwé t́á oyin ání uma ale á, Kristo fapú alá gyi a. ¹³Mú su ní t́á négyi ibéha mí pío Okristoyin ɔbɔbwe lakpan á, mméetepí trá gyi iye ekekeeke, ménu uméeha mu ɔdida.

Sumbí ɔyɔpú Túmi Pú Mu Gyumagyihe

9 ¹Mlúki mlíaa mmetsie mí iwɔsu? Ntée megyí *sumbí ɔyɔpú ngyi? Mmɔkúwun aní Wíe Yesu kí? Megyí mí gyumagyihe sù mlílamlí aní Wíe klé nde? ²Ní mmegyí sumbí ɔyɔpú há aku á, mlí mú mlíyin ání sumbí ɔyɔpú ngyi. Tsúfɛ ínúá mlígyí Akristofɔ á, ilegyi adánsie ání aní Wíe sumbí ɔyɔpú ngyi.

³Ínu gyí t́á ntɔpólé mí iwɔ ɔnɔ súná ahá ání butelé mí alá ní. ⁴Míá Barnaba mú animágyi at́s, nu ntsu? ⁵Animá ɔkpa tsía ohógyipu, kpá mu buo iwɔ, fé sumbí ayɔpú atráhe amu pú aní Wíe apíó múa Petro aná? ⁶Ntée míá Barnabanyɔ mú ayɔ́ agyúmá kí aní iwɔsu? ⁷Ísá ɔkɔpú onutó téká iwɔ ɔkɔ? Ekekeeke! ɔdɔɔpɔ ɔmɔmu tamagyi mu ndɔɔ-at́s? Mbwi ɔyaípú ɔmɔmu tamagyi mu ɔbwi yáíhɛ?

⁸Anyánkɔpúsa agywun ndepublí ínu? Yée Mose Mbla óó ɔleblí alí á? ⁹Tsúfɛ bɔwanlín wá Mose Mbla ámutɔ bee, “Butamawá ɔnantswieá ɔde ayó da ɔnɔ ɔkan.”^a Fahogyi fɛe nnantswie iwɔ dé Bulu hián sù ɔleblí asún ání? ¹⁰Megyí aní sù ɔde asún ání blí? Aní sù ɔde mú blí a. Bɔwanlín wá Bulu asún ámutɔ bee, “Ífíle ɔwɔpɔ mua at́s ɔkɔtípú f́éé bugyo t́á bénya tsú agyúmá ámutɔ bayɔ́ ámutɔ.” ¹¹Ní anɔlabláa mlí asun wankláán ámu, igyi ɔjétś abíá anɔladú wá mlíwá á, aní mú animá ɔkpa nyá aní ɔyít́ atohiánhe tsú mlí wá? ¹²Ní aku bubu ɔkpa nyá at́s tsú mlí wá á, animá ɔkpa dun amú?

Táme animótsu kuku lé ínutɔ. Anɔlapú kluntɔ pisii ho tógyít́, ménu animɔɔpɔ tɔtɔtɔ tin Kristo asun wankláán ámu ɔkpa. ¹³Mlíméyín mlíaa, Bulu ɔtswékpa inu agyúmá

^a9:9 Deut. 25:4. Kí atɔ táanheá bu ifun 490, (1 Ti. 5:18). Mú así gyí, “Butamalé ɔkwén pú ibi tsítisi ɔsulótɔ.”

ayɔpɔ é bubu ogyíkpa unu? Ntée mlíméyín ání *afɔɔɔ-
asubwi amu asɩ asúmpɔ butegyɩ mú asɩ atɔ? ¹⁴Alɩ kén anɩ
Wíe léhɩe ání mu asun wankláán ámu ɔkan adapú é bugyí
atɔ tsu ahá ání bude labi nya tsú asún ámutɔ wá ní.

¹⁵Táme mí mú mmɔkúpɔ alɩ ɔkpa ání mbu anfi nyá tɔtɔ
tsú mli wá. Megyí bɛɛ ndekléá néfi mú asɩ, sɔ nde asún ání
wanlín sísí mli. Ibu mí aléá nówu, dun ání nɔhulú itɔ ání
nɔpɔtsú iwɩ ání. ¹⁶Táme ní nde asun wankláán ámu ɔkan
da a, imegyí tɔá nɔpɔtsú iwɩ. Tsúfé ɔhíé igyi há mí. Bulu
ɔbébutí mí isv ní mmɛda mú ɔkan. ¹⁷Ní mí onutɔ léblí mbée
nɔbwe mú á, teki Bulu ɔbéda mí ipán. Táme megyí mí onutɔ
apétɔ nde mú bwe. ɔkpábi ngyi, Bulu lóbu mí ɔnɔkwalɩpɔ
pú agyúamá ání wá mí ibutɔ. ¹⁸Ikɔká mɔmu nénya tsú mútɔ
ngya? Múgyí néda asun wankláán ámu ɔkan, buméeka mí
tɔtɔ. Teki mbu ɔkpa púkle tɔku há mí iwɩ, táme mmɔɔbwe
mú alɩ.

¹⁹Ntsie mí iwɩsv. Mma ɔhaa asɩ, táme nabwé iwɩ ɔkpábi
há ɔhagyíɔha, méni nékpa ahá tsɔtsɔtɔ ba Kristo. ²⁰Ntɔbwé
iwɩ fé Yudayin ní mbu Yudaɔtɔ, méni nétalí nyá Yudaɔ
ámu. Mma Mose mbla asɩ, táme ntɔbwé iwɩ fé ahá ání
bubu mú asɩ, méni nétalí nyá amútɔ aku. ²¹Alɩ kén ní mía
ɔmátɔɔá buma Mose mbla asɩ aniná á, ntɔbwé iwɩ fé amú,
méni nétalí kpá amú ba Kristo ni. Íni medésuná ání mma
Bulu mbla ámu asɩ, tsúfé ntobú Kristo mbla ámu. ²²Ntɔbwé
iwɩ fé ahá ání amú hógyi ɔnɔ ma ɔnlun, méni nétalí há amú
bédan Kristotɔ. Ntedamlí iwɩ ɔkpa ɔtsan-ɔtsansu há ahá féé,
méni nétalí kpá amútɔ aku ba Kristo.

²³Asun wankláán ámu sɔ ntɔbwé íni féé, méni mí é nénya
ogyíkpa mútɔ. ²⁴Mlukau ání ní ahá busrí a, okugyíɔku teyíru
iwɩ, táme ɔbakóle tégyi isv, butekíé mu atɔ? Mli é mliyíru iwɩ
sri, méni mlégyi isv, békie mli atɔ. ²⁵Ɔsrú otsíipú okugyíɔku
tekítá iwɩ, méni ɔbésrí púhɔ idá ání utamatsíá yó. Táme anɩ mú
anidé íni bwe, méni abɔhɔ idá ání umɔɔfwɩ ekekeke. ²⁶Íni sv
megyí kpaali nsrí. Mí ansí dun tɔkusv. Ntamatswɩ atswé wá
afútɔ. ²⁷Ntesen ansítɔ, bwé mí iwɩ ɔkpábi, méni ní nedá asún
ámu ɔkan súná ahá ta á, Bulu méébláa mi ɔbéé, nabwé tsítsá.

Ikpɔ́súm Iwɪ Oláda

10 ¹Mí apíó, ndekléá mlíbú tʒá Bulu lóbwe há anu anáin amu fée bímbí ámu. Oléha agyinde lobun amú féesú, oléha ɔpu pepe bunkpatɔ lése, olékpa amú fée tson ɔpu amutɔ. ²Bulu lópu agyinde mʒa ɔpu amu bó amú fée *asú, pʒsúná ání bugyi Mose abúopu. ³Amú fée begyi ɔɣétɔ atogyihe oloku ɔkule amu. ⁴Bonu ɔɣétɔ ntsu oloku ɔkule amu tsú butá ámúú ilekpa amú ámutɔ. Kristo gyí butá ámu ni. ⁵Táme ínu fée ɔma a, Bulu ansí megyi amú ɔdudɔ iwɪ, oléhi amú dimbí ámusu unu.

⁶Ntobí ánfɪ iléba amúsú ánfɪ fée igyi atosuanhe há anu, méni amú lalahe amu odu bwe méedunká anu ɔwólɪ, ⁷ánmóosúm ikpɪ é fé amú. Tsúfé Bulu asun wanlínhé amu ileblí ɔbéé, “Ahá ámu betsiá asɪ gyí atɔ, nu ntá, kúsú kóm.” ⁸Mlumáwa atsi mʒa ayin asún fé alíá amútɔ aku bɔbwe, iléha amútɔ mpím adwanyɔ-sa (23,000) benya lowu ekewóle. ⁹Mlumáha asɔ Kristo kɪ fé alí ámúú amútɔ aku bɔbwe, awɔ bodundun amú mʒ ámu. ¹⁰Mlumále Bulu ilá fé alíá amútɔ aku bɔbwe, Bulu lópu ɔbɔpu sísí, ɔlɔbɔmɔ amú.

¹¹Ntobí ánfɪ iléba amúsú fée igyi atosuanhe há anu. Bɔwanlín mʒ tswɪ, púdá anu ahá ánfɪ ɔyí ɔnómɔbí latú anu ánfɪ olá.

¹²Mú sv ní fukɪ fee fulú kínkíínkín Kristo hógyitɔ á, kɪ wankláán, méni fuméedɪda. ¹³Bɪ ání fú isókɪ amu mɔtsun ɔtsan há aha tráhe klé. ɔnɔkwalɪpu Bulu gyí. ɔméesha isókíá idun fu iba fusu. Táme ní fowíé isókɪtɔ á, Bulu obósuná fú ɔkpa ání fótson mʒsú tálí líí mʒ ɔnʒ, méni fédalɪ mʒtɔ.

¹⁴Mú sv apíó adwepú, mlumáwa iwɪ ikpɔ́súmtɔ ekekekeke. ¹⁵Atiansɪpu mlygyí. Mú sv mli onutó mlyɔ asún ánfɪtɔ amlíkɪ. ¹⁶Ní adá Bulu ipán, anu anu Wíe Yesu ɔpúnúasɪ ewe ámutɔ ntá á, imosuná ání ania Kristo obugya labwé kule? Ní abíá bodobodo amu é ye aba á, mʒ é imosuná ání ania mʒ ɔyulúv labwé kule? ¹⁷Íniá anu tsó ó á, bodobodo ipin kule antegyí. Mú sv anu fée anlábwé ɔyulúv kule fé bodobodo ipín ámu.

18Mlɔpukɩ Israelfɔ, megyí ahá ámúbú butegyɩ afɔɗɩe-atɔ ámu tɔbwé kule afɔɗɩe ámu bɔtɔ? 19Mú su nkáli mí asún ánfɩ desuná? Blí ndeblí mbée, ɩkpi ntée atogyihe amúbú bapóhá amú igyí amu ibu labi? 20Ekekekeke! Tɔ́á ndeblí gyí, ní akpɩpú behá ɩkpi igyí a, *ɔɲe laláhe bɔpɩhá, megyí Bulu. Mú su mmedékléá mliɩ ɔɲe laláhe mlɔbwe kule. 21Mluméetalí pú anɩ Wíe ewe tin ɔ́ɔ́, láyɔpɩ ɔɲe laláhe ewe é tin ɔ́ɔ́. Mliɩ Kristo mluméetalí wá ɩbɩ gyi atɔ́, mliɩ ɔɲe laláhe é amlɩwa ɩbɩ gyi atɔ́. 22Ní abwé mú alɩ á, anɩmɔ́ɔwa Bulu ɔ́blɔ́ fé Israelfɔ? Ntée anikíá anɩbu ɔ́wɩnlín dɩn Bulu?

23Ahá buteblí bee, “Anɩbu ɔ́kpa bwé tógyítɔ́.” Ibu mútɔ́ alɩ, táme megyí mú féé bu labi. Fudeblí fee, “Anɩbu ɔ́kpa bwé tógyítɔ́.” Táme megyí mú féé tɔ́búa anɩ. 24Mlumáki mli nkule klé, mboún mluki mli aba é klé.

25Tɔ́á mlɩbwée gyí, mlɩwɩ ibíású iye kugyíku. Mlumáfité mú ɩwɩ asvansu, mli klɩn é umáha mli pón. 26Tsúfé bɔwanlín wá Bulu asún ámuɔɔ bee, “Bulu bú ɔ́yí múa mútɔ́ atɔ́ féé.”

27Ní ɔ́mátɔ́yín ɔ́tí fú atɔ́ ogyíkpá, iletsiá fú á, fayɔ́. Táme ní fɔ́yɔ́ á, máfité mú ɩwɩ asvansu, fú klɩn é umáha fú ɩpón. 28Táme ní ɔ́ku ɔ́bláa fu ɔ́bée, “Ɔ́kpɩɔɔ-atɔ́ igyi” á, alíá uméehan ɔ́há ámu su mágyi atɔ́ ámu. 29Megyí alíá ɩbéhan fu su, mboún ɔ́há ámu su. Múú ntogyi sú tɔ́á ɔ́ku désúsúu ibétin mí ɩwɩgyí ɔ́kpa?

30Ní ntedá Bulu ɩpán atogyihesu asa ntegyi mú á, ntogyi sú ɔ́ku ɔ́béle mí ɩlá atɔ́ ámu su?

31Mú su ní fudegyí o, fudenúu o, bwe mú féé pɩwa Bulu numnyam. 32Mlumáha mli tsiátɔ́ itin Yudaɔ́ pú Griikifɔ́ ntée Bulu ɔ́pasua ámu Kristo wá ba ɔ́kpa. 33Ntamakle mí nkule yilé. Tógyítɔ́á ntɔ́bwé á, ntɔ́bɔ́ mbódí ání néha ahá ansí bégyi amú, méni Kristo ɔ́bɔ́hɔ́ amú nkpa.

11 1Mlukasi mí tsiátɔ́, fé alíá mí é nekasí Kristo klé.

Alíá Atsi Bóputsiá Ɔ́pasuato

2Mí apíó, ntekánfú mli, tsúfé mli ansí dɩn mísú. Mlídébwe dínká Kristo atosunáhé amúbú nɔ́pɩhá mli ámu su. 3Táme ndekléá mlɩnúu mú asi ání oyngyíoyin bu Kristo asi,

1 Ko

ɔtsigyíɔtsɪ bu oyin asɪ, fé alá Kristo é bu Bulu asɪ. ⁴Íni su oyingyíoyin ání obun atɔ́ nwun asa ɔde mpái bɔ́ ntée ɔde asún ání Bulu lapúwá mú ɔnɔ́ blí médeé Kristo bu. ⁵Táme ɔtsigyíɔtsɪá ɔmeklí nwun asa ɔde mpái bɔ́ ntée ɔde asún ání Bulu lapúwá mu ɔnɔ́ blí é médeé mu kulu bu. Igyi fé alakpá nwun. ⁶Ní ɔmɔ́ɔpɔ atɔ́ klí nwun á, múmú ɔkpáa mú. Táme ní ɔtsɪ ɔkpá nwun, ɪbu mu péli a, ɔpúv atɔ́ klí músú. ⁷Bulu lɔ́bwe oyin fé mu ɪwɪ, púwá mu ɪwɪ numnyam. Mú su mehián ání ɔbɔ́pɔ atɔ́ bun nwun asa obósum Bulu. Táme ɔtsɪ mú á, Bulu lɔ́bwe mu púwá oyin numnyam. ⁸Tsúfé oyin médalɪ tsu ɔtsɪtɔ, ɔtsɪ mboún lédalɪ tsú oyintɔ. ⁹Megyí ɔtsɪ sú Bulu lɔ́pwe oyin, mboún oyin sú ɔɔpwe ɔtsɪ. ¹⁰Íni su ilehián ání ɔtsɪ ɔbéklí nwun, púsúná ání ɔbu túmi asɪ, tsúfé Bulu-abɔ́pɔ bude mu kí. ¹¹Íniá anɪa Kristonyɔ anɪlabwé kule su á, ɔtsɪ léhián oyin, oyin é léhián ɔtsɪ. ¹²Tsúfé alɪ ámúbú ɔtsɪ gyankpapɔ lédalɪ tsu oyintɔ ámu a, alɪ kén ɔtsɪ é lɔ́kwú oyin ní. Táme Bulu lɔ́bwe tógýítɔ.

¹³Mli onutó mliɔ asún ánfɪtɔ amlíkɪ. ɪbu aláá ɔtsɪ méeklí nwun asa ɔbɔ́bɔ́ mpái há Bulu? ¹⁴Fé aláá Bulu léle ɔyítɔ á, uma aláá oyin obési mu imi ɪbɔ́wa ɪwí fé ɔtsɪ klé. ¹⁵Imi tɪntɪn igyi numnyam há ɔtsɪ, tsúfé Bulu lɔ́pɔ mú há mu fé nwun-abúntɔ. ¹⁶Táme ní ɔku dé mú ɪwɪ nwéen gyí a, asún ání mbo blí gyí, mmotsulá dínká kukusu dun íni. Alɪ kén Bulu ɔpasua atráhe féé bumotsulá dínká músú ní.

Ɔpúnúasɪɔ

(Mateo 26:26-29; Marko 14:22-25; Luka 22:14-20)

¹⁷Mméekanfú mli asún ánfɪ neba bebláa mli ánfɪ mútɔ. Tsúfé yilé kuku tamadálɪ tsu mli ifiátɔ. Lalahe kóun utetí há mli. ¹⁸Gyankpapɔ a, babláa mi be mli tamabwé kule ní ɔpasua ámu befia. Nahogyi ání asún ánfɪ ku bu mútɔ. ¹⁹Lélé mú á, ilehián ání nwéengyí bétsiá mlɪtɔ, méni mlówun ɔnɔ́kwálá ɪbu mútɔ. ²⁰Táme beblí be, ní mlefia a, megýí ɔpúnúasɪɔ su mlitefia. ²¹Tsúfé mli tamagyo aba. Aku butegyí amú atɔ́, butamahá aba. Mú su aku butonu bu, aku é butsie akún. ²²Mli onutó mli má wóyíá mlitegyi atɔ́, nu ntá

mútɔ? Ntée mlidékleeá mlósupáa Bulu ɔpasua ámu, amlíwa ahiánfɔ ámu péltɔ? Amansu mblí tsu ínu iwí? Nkánfu mlí? Íntɔ mú á, ekekeeke, mméekanfú mlí!

²³Tsúfé tɔ́á nosuán tsu aní Wíe wá kén nde mlí bláa a. Aní Wíe Yesu léle bodobodo ipín onyé ámúb bele mu há ámu, ²⁴ɔleda Bulu ipán, bíábía mútɔ, blí ɔbéé, “Mí ɔyulúá ndepuhá mlí ní. Mlitsia bwe ínu pukain mísú.” ²⁵Alí kén atogyihe amu ɔma a, olotsu ntá-ewe ámu, blí ɔbéé, “Ntá-ewe ánfí gyí mí obugya ání Bulu dépusí ntam ɔɔpwe amúb íbu mlía mɔnyɔ nsuné ámuvsu ní. Brégyíbréá mlónu mú á, mlínu mú pukain mísú.”

²⁶Tsúfé brégyíbréá mlidé bodobodo anfi gyí, nu ntá tsú ewe ánfítɔ á, mlidé aní Wíe lowu ámu ɔkan da kpéfɔn bréá obéyinkí bá. ²⁷Mú sv ɔhá ání obégyi alí bodobodo anfi, nu ntá tsú aní Wíe ewe ánfítɔ mábú ɔkpasu á, alagyi aní Wíe ɔyulúv pú mu obugya amu iwí pón. ²⁸Ínu sv ilehián ání mlóyɔ mlí nwuntɔ wankláán, asa mlégyi bodobodo anfi, nu ntá-ewe ánfítɔ. ²⁹Tsúfé ní mlímóbu aní Wíe Kristo ɔyulúv, mlilégyí bodobodo amu, nu ntá ámu é dínká ifinsu á, Bulu ɔbéha mlí ipón mú sv. ³⁰Mú sù mlítɔ ahá tsɔtsɔɔtsɔ bapɔn, aku budelɔ, aku mú kúráá bawú ní. ³¹Ní anutɔyɔ aní nwuntɔ wankláán asa a, tekí Bulu mééha aní pón. ³²Táme ní aní Wíe ɔlé aní ulá, bítí aní isu á, ɔmééha ania ɔyítɔ ahá féé ipón kule.

³³Ínu sv mí apíó, ní mleyéfia ɔpúnú ámu así á, mlitsia gyo aba. ³⁴Ní akún de ɔku á, ogyíi ató tsu wóyítɔ asa ɔba, ménu mlí ifía amu iméeti isubítí há mlí. Mí onutó néba bebláa mlí tɔ́a mlíbwée tsu asun tráhe amu iwí.

Ɖɛ Wankíhé Atokiehé

12 ¹Séi á, apíó, ndekleeá néle *Ɖɛ Wankíhé atokiehé asún amú así wankláán súná mlí.

²Mlyin ání bréá mlígyí ɔmátɔfɔ á, bosuná mlí asunakpan, uléha mlílóyɔ mlidé íkpiá butamatɔ́í sum. ³Mú sv ndekleeá mlíbú múá itsú Bulu wá. Ɖhagyíɔha ání ɔdepu Ɖɛ Wankíhé tɔ́í méetalí lwíí aní Wíe Yesu. Ɖhá ání Ɖɛ Wankíhé dé mu kpa nkule ɔbétalí blí ɔbéé, “Yesu gyí mí Wíe.”

⁴Bulu atokiehé ɔtsan-ɔtsan bu unu, táme Ɖɛ Wankíhé amu kén teye mú fée. ⁵Bulusúm agyómá igyi ɔtsan-ɔtsan, táme aní Wíe amu kén aní fée anidésun. ⁶Ɖkpa ɔtsan-ɔtsansu Bulu tɔyɔ agyómá tsun anisu, táme Bulu ámu kén dé mú fée bwe tsun aní féesú. ⁷Bulu telé mu Ɖɛ ámu ɔwan tsun ɔkpa ɔkusv anitɔ okugyíɔkutɔ, ménu abópukpá aba. ⁸Ɖɛ Wankíhé tehá ɔku tɔpú nyánsa tóí kplá ahá, ɔtehá ɔku é tebí asún. ⁹Ɖtehá ɔku tehié hɔ Bulu gyi, ɔtehá ɔku é tetsá ahá ub. ¹⁰Ɖɛ Wankíhé amu kén tehá ɔku túmi ɔtɔpúbwé ofúla, ɔtehá ɔku é teblí asún ání Bulu lópuwá mu ɔnɔ. Ɖtehá ɔku tetálí bí ɔɛéá itsú Bulu wá pú múá itsú *ɔɛ laláhe wá. Ɖtehá ɔku teblí ɔblí bámbá, ɔku é tonú mú asi. ¹¹Ɖɛ Wankíhé amu nkule tɔbwé íni fée, oteye atokiehé ánti há ɔhagyíɔha alá odeklé.

Ɖpasua Ámu Igyi Nyankpusa-oyí Ɖkole

¹²Nyankpusa-oyí iwí ató itsɔ, táme mú fée lóbwe nyankpusa amu. Alí kén igyi Kristo é ní. Mu ɔpasua ámu gyí mu nyankpusa-oyí ámu ni. ¹³Anitɔ aku anigyí Yudafɔ, aku Griikifɔ, aku nkpábi ntée adíhɛ, táme bɔpu Ɖɛ Wankíhé amu bɔ aní fée asú wá Kristo ɔyulúv kule amutɔ, Bulu lópu Ɖɛ ámu kén núná aní fée.

¹⁴Táme mégyí toku kule lóbwe nyankpusa-oyí ámu, mboún iwí ató ɔtsan-ɔtsan. ¹⁵Ní yabi ɔblí ɔbé, “Mma nyankpusa-oyí ámu iwí, tsúfé megyí ubi ngyi” á, ilosuná ání megyí nyankpusa-oyí ámu iwí ató ogyi? ¹⁶Ní isv é ɔblí ɔbé, “Mma nyankpusa-oyí ámu iwí, tsúfé megyí nsíbi ngyi” á, ilosuná ání megyí nyankpusa-oyí ámu iwí ató ogyi? ¹⁷Ní nsíbi nkule gyí nyankpusa-oyí ámu fée á, nkáli ɔbɔbwe obónu asún? Ntée ní isv nkule gyí nyankpusa-oyí ámu fée á, nkáli ɔbɔhɔ ató afú? ¹⁸Táme Bulu lópu iwí ató tsɔtsɔtsɔ bwé nyankpusa-oyí ámu, ɔɔpu kugyíku yi ɔtínéá odeklé. ¹⁹Ní iwí ntobí ámu igyi toku kule a, nkáli nyankpusa-oyí ámu ibɔbwe? ²⁰Iwí ntobí ámu itsɔ mú, táme mú fée lóbwe nyankpusa-oyí amu ni.

²¹Mú sv nsíbi méetalí bláa ubi ɔbé, “Fuma labi há mí!” ekekεεεε. Nwun é méetalí bláa yabi ɔbé, “Fuma labi há

mí!” ²²Ní akí a, iwí ató ámúú anidékú aniaa ulɔɔɔn amu iwí téhíán nɪ. ²³Mú ámúú anidékúá obú uma mósú ámu antobú dun nɪ. Ɖtíné ámúú anitamakleá ahá buwúun amu é antɔpú ató tin nɪ. ²⁴Táme anitamapú ató tin anɪ iwí ntobí ámúú ibu akíle amv. Bulu lɔbwe anɪ iwí ató ámu alɪ, ménɪ abóbu mú ámúú uma numnyam amu, kí mósú wankláán. ²⁵Fówun ikulebwe bétsiá amúú, ménɪ gyɔɔɔi okpítá bina a, bina é lakpítá gyɔɔɔi. ²⁶Ní nyankpusa-oyí ámu iwí tɔku dé ɔsin wúun a, nyankpusa-oyí ámu fée towun mú. Ní bekánfú mútɔ ku é á, ansí tegyi nyankpusa amu.

²⁷Yoo, ayó nkpa. Kristo ɔyulúv kule amu mli fée mligyí. Mligyí mu ɔpasua ámu nɪ. Mlɪtɔ okugyíɔku gyí mu nyankpusa-oyí ámu iwí tɔku. ²⁸Bulu léhíhíe ínɪ fée wá mu ɔpasua ámutɔ. Gyankpapu, *sumbí ayɔpú. Nyɔɔɔsi, Bulu ɔnósú atɔpú, saasi, ató asunápú. Mú ɔma a, ofúla abwepú. Amúá bubu ulɔtsá túmi, buale agyíú, ahande pú ɔblí bambá ablípú. ²⁹Amú fée gyí sumbí ayɔpú? Ekekeke! Amú fée gyí Bulu ɔnósú atɔpú, ntée ató asunápú, ntée ofúla abwepú? Iméeba mútɔ alɪ! ³⁰Amú fée bu ulɔtsá atokiehé? Amú fée téblí ɔblí bambá, ntée amú fée tetálí nú ɔblí bambá ámu asi? ³¹Mlɪɔ mbódí amlidunka atokiehé ámutɔ múbá idehíán dun.

Nélasúná mli ɔkpa ání idun ínɪ tsía mútɔ.

Ɖdwe

13 ¹Ní ntetálí blí anyánkpúsa pú Bulu-abɔpu ɔblí fée, táme ntamadwé mí aba á, ngyi fé ɔkan ntée gbémgbléín ání bude mú da, idelín kúklókúú. ²Ní mbu Bulu ɔnó asúnblí, Bulu asun ñaínhé bi pú hógyi kpɔnkɔntiá ntetálí púpúlí abu, táme mma mí bá iwí ɔdwe á, múmú mma labi kuku. ³Ní nɔpú mí ató fée kíe ahíánfɔ, nɔpú mí iwí há mbée buwáa mí ogyá, táme mma mí bá iwí ɔdwe á, mma labi há ɔhaa.

⁴Ahá ɔdwepú tenyá iklun, ɔbu awitɔle. Ɖma olu, ɔtamaká ɔnótɔ, ɔtamatsú iwí. ⁵Otobú ató, ɔma ɔnsípe. Ɖtamakósí nyá ɔblí, ɔtamahɔ asún wá iwitɔ. ⁶Ɖtamatsúlá asukpan,

ɔwɔkwali otobuo. ⁷Otenyá klɔn há tógyítɔ, ɔwɔhɔ asúnsú gyi. Mu ansí tedínká asúnsú, ototomi é.

⁸Ɔdwe mú itamatá, táme Bulu ɔnɔ asúnblí bómɔ ɔnɔ. Ɔblíu bámbá blí béka itin, asúnbi é íbéba bɔtsun. ⁹Tsúfé anumókúnyá bí tógyítɔ tá, anumókúnyá blí Bulu ɔnɔ asún é yi. ¹⁰Táme ɔhétɔ atokiehé ánfɔ fée imɔfun. Ní múá íwɔfun yi íbá á, íni fée bɔfwɔ.

¹¹Igyi fé íni. Bréá ngyi kebi á, nɔwɔí fé kebi. Mí atɔ bwehé pú mí asun susúhe fée íwɔwe fé kebi. Táme séi ánfɔ nadan a, nasí nyebito bwehé ámu fée bwe. ¹²Séi á, anidé atɔ kú fulaa fé ogyásito anidé mú kú. Bré íku béba a, abówun mú wankláán. Séi á, anɔ atɔbɔ mɔfun. Ɔma a, abéba bebɔ mú fé alíá Bulu yin anɔ.

¹³Ɔwɔkwali a, atoku asa ánfɔ obétsiá ní. Hógyi, ɔkpakú pú ɔdwe, táme ɔdwe dɔn mú fée.

Ɔhe Wankíhé Atokiehé Bámbá

14 ¹Mɔdunka ɔdwe ɔkpa, amɔdunka ɔhétɔ atokiehé é. Múá idɔn a, Bulu ɔnɔ asúnblí. ²Tsúfé ní ɔku dé ɔblíu bambá blí á, megyí anyánkɔpɔsa ɔdebláa, Bulu ɔdebláa. Ɔhaa tamanú mú asɔ, tsúfé mu ɔhɛ dé asun ɔhɛnhé blí. ³Táme ɔhá ání ɔde Bulu ɔnɔ asún blí mú á, ahá ɔdebláa, ɔdepuwá amú abudan hógyitɔ. Ɔdepuwá amú ɔwunlín, ɔdepuwáí amú íklɔn é. ⁴Ɔhá ání ɔde ɔblíu bambá blí nkɔle tényá ɔwunlín Bulusúmtɔ. Táme ɔhá ání ɔde Bulu ɔnɔ asún blí mú tɔwá ɔpasua ámu ɔwunlín.

⁵Tekɔ ndekléá mɔ fée mléblí ɔblíu bambá, táme ní mɔdɛ Bulu ɔnɔ asún blí á, íbɔ mɔ alé dɔn. Tsúfé Bulu ɔnɔsú ɔwɔpú dɔn ɔblíu bambá ɔblípú. Nkétɔ ní ɔblíu bambá ɔblípú ámu tetálí lé mú asɔ, méni ɔpasua ámu bénya tɔku tsú mútɔ. ⁶Mí apíó, ní naba mɔ wá séi beblí ɔblíu bambá ku, mmele mú asɔ á, labi mɔmu íbɔwa há mɔ? Táme ní neblí asún, nehá mlébi asún, ntée neblí asun lesúnáhé ku, ntée neblí Bulu ɔnɔ asún ku, ntée súná mɔ atɔ á, íbɔwa labi há mɔ dɔn.

⁷Mɔpɔkɔ ítɔsá fedá mú itotsúlá, fé íkwe, ɔténtɛ ntée ɔkpe aná. Ní fumɛda mú itsula wankláán á, butamanú mú asɔ.

⁸Ní klunsi ɔdapú mébɛ dá mú á, ɔhaa tamanú mú asi, dídá atɔ yɔ isá. ⁹Alí kén ní mlidé ɔblí ání ɔhaa médé mútɔ nu blí á, mlidétɔí wá afútɔ ní. ¹⁰ɔblí tsɔtsɔwɔtsɔ bu ɔyítɔ. Kugyíku ulɔfun, ibu mú ablípú anulé. ¹¹Táme ní ɔku dé ɔblí ku blí, mí é mmedé mútɔ nu á, ntamanú mu asi, mu é ɔtamanú mí asi. ¹²Mú su íniá mlihié mlidé *ɔɲe Wankíhé atokiehé ámu dunká á, mlikuli múá íbɔwa ɔpasua ámu ɔwunlín.

¹³Íni su ɔhá ání ɔteblí ɔblí bámbá ɔkúlí Bulu mú asinu, méní ɔbétalí le mú asi súná mú anupú. ¹⁴Tsúfé ní ndepu ɔblí bámbá bó mpái á, mí ɔɲé dé mú bó, táme mmedé asún ání ndeblí asi nu. ¹⁵Nkáli mee nɔbwe? Nɔbɔ mpái ɔɲétɔ bré kutɔ, pú mí agywun é bó mú bré bámbátɔ. Alí kén nɔwa ulu ɔɲétɔ, pú mí agywun wá mú bré kutɔ é ní. ¹⁶Tsúfé ní fúde Bulu kanfú ɔɲétɔ pé á, nkáli íbɔbwe ɔhá ání ɔmedé mú asi nu ɔbétsa fú? Nkáli bétsa fú Bulu ípán da ní bumédé asún ání fudeblí asi nu? ¹⁷Fíali fude Bulu ípán da wankláán, táme ítamawá fú bá ɔwunlín.

¹⁸Nedá Bulu ípán ání nteblí ɔblí bambá dɔn mlitɔ okugyíɔku. ¹⁹Táme ní afia a, ntekleá néblí asún anu pé ání ɔhagyíɔha obónu mú asi, íbɔbɔwá amú é dún ání néblí asún mpím-dú (10,000) ɔblí bámbátɔ ání ɔhaa mónu mú asi.

²⁰Mí apíó, mliúbwe agywun fé nyebí. Mliúbwe íwí fé kebi-bɔbwe lakpanbwetɔ, táme mliugywun fé ahande. ²¹Bɔwanlín wá Bulu asún ámutɔ bɛe,

“Nɔtɔí tsun afɔwɔsú, bébláa mí ahá ɔblí bambá.

Mú ó á, mí ahá bumóonu mí ɔme.” Aní Wíe léblí. ²²Íni su ɔblí bambá blí igyi osúna há ɔmátɔfɔ, megyí ahógyipu. Bulu ɔnɔ asún blí é igyi osúna há ahógyipu, megyí ɔmátɔfɔ.

²³Ní ɔpasua ámu ifia, ɔhagyíɔha dé ɔblí bambá blí, ɔha bambá pú ɔmátɔyín bebá mlitɔ á, buméebí bɛe, mli nwan layíntá? ²⁴Táme ní mli féé mlidé Bulu ɔnɔ asún blí, ɔmátɔfɔ ntée ahá ání butamanú mútɔ bebá mlitɔ á, amú onutó bóyɔ asún ámutɔ, nú íwiasí ání babwé lakpan. ²⁵Íbéha amú kluntɔ asún bélin ɔwan, béda akpawunu, kánfú Bulu bɛe, “Lélé, Bulu bu mlitɔ.”

ጋpasua Ámuto Nhuhé

²⁶Mí apíó, ní mlẹbá befia Bulu osúmkpá, mlito ọku tọwá ọlọ, ọku tosúná atọ, ọku towun atọ, ọku teblí ọblíu bábábá, ọku é tonú mú así á, bubwée mú pọwá ọpasua ámu ọwunlín. ²⁷Ní aku béblí ọblíu bábábá á, bubwée ahá abanyó. Ní butso kúráá á, abasá. Bublí mú ikule-kule, ménu ọku ọbéle mú así. ²⁸Ní ọhaa má ofiákpa uná ọbéle mú así mú á, bukpa ọnó bun, amóba amú Bulu abuto nklobító. ²⁹Bulu ọnósú atọpú abanyó ntée abasá butó, atráhe abuyo amú asun blíhé amuto. ³⁰Táme ní Bulu ọlé atọ súná ọkúá otsie ofiákpa uná á, Bulu ọnósú atọpú ámu osí tọ, ọhá ámu ọblí tóá alawun. ³¹Mlú fée mlétalí blí Bulu ọnó asún ámu ikule-kule, ménu mlú fée mlósuán tọku tsú mútọ pọwá ọwunlín. ³²Bulu ọnósú atọpú amu bunyáa túmi ọhẹ ámu ọde amú kpa amúsú, ménu bóto há amú aba ọkpa. ³³Tsúfẹ Bulu asún lolwií, omegyí basabasa.

³⁴Ní ọpasua ámu ifia a, atsi bubwée díín. Buma ọkpa tó. Bubá ọwasi fé alá Mose Mbla léblí. ³⁵Ní budekléá bónu asvankuto á, bufíte amú akúlu wóyítọ, tsúfẹ ọbu pélía ọtsi ọbóto ofiákpa.

³⁶Mlulahogyi mlíaa, mlí wá Bulu asún ámu ilotsuá así? Ntée mlí nkule látsọ mú nu? ³⁷Ní ọku dékí ání Bulu ọnósú atọpú mugyi, ntée ọbu Ọhétọ atokiehé ku á, ọwánkí mu ání aní Wíe onutó mbla ígyi ndewanlín sísí mlí. ³⁸Ní ọmọhọ asún ání á, mlí é mlumáhọ mu asún.

³⁹Mí apíó, ọnu su mlipri ání mléblí Bulu ọnó asún, táme mlumábláa ọhaa mlíaa, ọmáblí ọblíu bambá. ⁴⁰Mlúbwe tógyítọ dinka mú ọkpasu wankláán, ifun.

Kristo Kusú tsú Afúlitọ

15 ¹Mí apíó, séi á, nkáun mlí *asun wankláán ámu ọ neda mú ọkan súná mlí, mlíshọ mú sú gyí, mlí hógyi ọlú mú sú ámu. ²Asún ání ọbéha mlí nkpa ání itamatá, ní lélé mlíshọ mú sú gyí ni. Táme ní mlekíná mú sú hógyi mú á, mlí hógyi labwé kpaalu!

³Tsúfɛ asún ání ihíe dehián bɔpohá mí nɔpɔba mli ígyi. Múgyí, Kristo lóbowu aní lakpan sɔ, fé alíá Bulu asun wanlínhé amu léblí. ⁴Bopolá mu, Bulu lókusúa mu tsú afúlitɔ eke sáásí fé alíá Bulu asun wanlínhé amu íleblí. ⁵Ɖelele iwɛ ɔwan súná Petro. Mú ɔma a, ɔlele iwɛ ɔwan súná sumbí ayɔpɔ dúanyɔ ámu féé. ⁶Íni ɔma a, ɔlele iwɛ ɔwan súná mu abúopu tsɔtsɔtsɔá budun ahá lafanu (500) ɔtsáwule. Amótɔ akw bawú, táme ɔdudɔ butráa butsie nkpa. ⁷Ɖelele iwɛ ɔwan súná Yakobo é. Ɖma a, ɔlele iwɛ ɔwan súná sumbí ayɔpɔ ámu féé.

⁸Ítráhe-tráhe a, ɔlele iwɛ ɔwan súná mí onutó ánfɛ nesin ɔma ba anfi. ⁹Tsúfɛ mígyí sumbí ayɔpɔ ámutɔ ɔkusɔ nɛ. Teki mmɔfun ání bétɛ mí sumbí ɔyɔpɔ kóráá, tsúfɛ nedínká Bulu ɔpasua ámusɔ. ¹⁰Táme Bulu awitɔle sú nde namlí alí. Mu awitɔle amu umɔbwe kpaali. Tsúfɛ nayɔ agyómá dɔn amótɔ okugyíɔkw. Táme megyí mí ɔwonlín nɔpɔyɔ mú. Mu awitɔle amu dé mí kpa. ¹¹Íni sɔ ní mlétrá da asún ámu ɔkan o, amú o, múá idehián gyí mlílɔhɔ aní asún ámusɔ gyi.

Ani Kusú Tsú Afúlitɔ

¹²Ní anutedá Bulu asún ámu ɔkan aníaa, Bulu lókusúa Kristo tsú afúlitɔ á, ntogyi sú mlitɔ akw mú beɛ, awupú bumɔ́ɔkusú tsú afúlitɔ? ¹³Ní awupú bumɔ́ɔkusú mú á, idesuná ání Bulu mókusúa Kristo é. ¹⁴Ní Kristo mókusú tsú afúlitɔ á, tekɛ aní asun wankláán amu ɔkanda igyi kpaali. Mli músú hogyi é igyi kpaali. ¹⁵Ní Bulu tamakúsúa awupú mú á, múmú afunu anidéwa tun Bulu ɔnɔ, blí aníaa alakúsúa Kristo tsú afúlitɔ. Ní ɔtamakúsúa awupú á, múmú asún ánfɛ uma mútɔ. ¹⁶Ní ɔmɔ́ɔkusúa amú mú á, múmú ɔmɔ́kusúa Kristo é ní. ¹⁷Ní ɔmɔ́kusúa Kristo a, múmú kpaali mlílaha mu gyi. Idesuná ání mlílasin lakpantɔ. ¹⁸Múmú ítráa desuná ání Kristo ahógyipwá bawú é bafwí. ¹⁹Ní ɔyí ánfɛtɔ nkpa nkolesú aní ansídɔn Kristosɔ mú á, múmú aní ílá bu nwe dɔn ɔhagyíɔha.

²⁰Táme ɔnɔkwálá ída gyí, Bulu lakúsúa Kristo tsú afúlitɔ. Kristo labwé ahá ání Bulu ɔbɔ́kusúatɔ ogyankpapu. ²¹Alí

ámú lowu léba tsun nyankpusasu ámu a, alí kén kusú tsú afúlito é ɔleba tsun nyankpusasu ní. ²²Tsúfé alí ámú ahá butowú amúa *Adam ukulebwe su ámu a, alí kén amúa Kristo ukulebwe su amú fée bénya nkpa ní. ²³Táme anito okugyíoku bu mu bré. Kristo Bulu légyankpá kúsúa tsu afúlito. Ní Kristo oyínkí bá a, mu é ɔbókúsúa mu ahá fée. ²⁴Mú ɔma a, Kristo obégyi ɔɣétó túmi laláhe, iwíegyí pú túmiá ide ɔyísú gyí féesú asa ɔyí ɔbómɔ ɔnó. Mú ɔma a, obéyinkía iwíegyí ámu wá aní Sí Bulu ibuto. ²⁵Tsúfé ilehián ání Kristo obégyi iwíe kpéfun bréá alagyi mu alupú féesú, pú mu ayabi tsá amúsú. ²⁶Olupú tráhe ání ɔbéhu gyí lowu. ²⁷Tsúfé Bulu asun wanlínhé amu ɔleblí ɔbé, “Bulu lópu tógyító wá mu asi.” Íni imosuná ání Bulu bu Kristo asi. ²⁸Ní Kristo ogyi tógyítósú tá á, ɔbópu iwí wá Bulu asi. Muléha mu túmi dínká tógyítósú, fówun Bulu é obégyi tógyítóá ibu ɔtínegyíɔtínésú.

²⁹Ní Bulu mókúsúa awupú á, ntogyi sù ahá buɔe asú ɔ há há ání bawú? Ntogyi sù béha bóbɔ amú asú há amú? ³⁰Ntéɛ ntogyi sù aní mú abópu aní nkpa pléí brégyíbré? ³¹Mí apíó, nekáse, ntefia alowusu ekekegyíɛke! Igyi tsá ntɔpútsú iwí ání mlá aní Wíe Kristo Yesu mlílabwé ukule. ³²Mú su kpaali nɔkɔ Efesofá bugyi fé mbwíkítá-atɔ? Ní Bulu mókúsúa awupú mú a, “Múmú mláha agyi, awí, anu, tsúfé ɔke sesebre anílawú.” Fé alá ɔwanlín wá Bulu asún ámuɔ.

³³Mlímáha ahá ání buteblí asún ání odu abumle mlí! Tsúfé ahande beɛ, “Mba laláhe gyí teyíntá ɔha.” ³⁴Mlilabwe agywun wankláán, amlísi lakpan bwe. Tsúfé mlíto aku butépí bumeyín Bulu. Nde asún ání wanlín sísí mlí púsúpa mlí.

Ɔyulúá Abópukósú Tsú Afúlito

³⁵Ɔku ɔbéfté ɔbé, “Nkálí Bulu ɔbókúsúa awupú? Ɔyulúu mɔmu bópukósú?” ³⁶Ɔha mimláhe! Bí ání ní fodú ató-abí á, utɔpló asa utɔkwe. ³⁷Megyí itóbí ámú ɔɔpúwá ɔsulúto ámu gyí ɔbán amúú utedan amu. ³⁸Bulu tehá mú ɔyulúu ɔɔpwe

ání mu onutó odeklé. Dtehá ató-abí kugyíku mú ɔyulúv ɔtsan.

³⁹Alí ámúbú ató-abí ɔtsan-ɔtsan búv unv ámu a, alí tógyító ɔyulúv igyi ɔtsan ní. Anyánkpwása, mbwí, mbubwí pú ntsutso aye féétó okugyíku ɔyulúv ɔtsan.

⁴⁰Ɖsúsú-ató bu unv, ɔsulúsv-ató é bu unv. Mú féé ibv ɔyulúv ɔtsan-ɔtsan. Ɖsúsú klé numnyam ɔtsan, ɔsulúsv klé é numnyam ɔtsan. ⁴¹Owí numnyam igyi ɔtsan há ɔtsra. Ɖtsra klé é igyi ɔtsan há ntsrakpabi. Ɖtsrakpabi kugyíku ná ɔtsan, mú numnyam é una ɔtsan há mú bá.

⁴²Alí ibóbwe bréá Bulu ɔbókusúa awupú ní. Aní ɔsulúsv-ɔyulúv anfi itowú, pló anfi ibótson ɔtsan há múá Bulu ɔbókusúa tsu afúlító, tsúfé mú mú imóowu ekekeke. ⁴³Aní ɔyulúv anfi ɔpɔɔn bréá bopúlá mú, táme ní Bulu ɔkúsúa mú á, itenyá ɔwɔnlín, wá numnyam. ⁴⁴Ɖsulúsv-ɔyulúv igyi séi, táme ní Bulu ɔkúsúa mú á, ibóbwe ɔɣétó ɔyulúv. Tsúfé alí ámúbú ɔsulúsv-ɔyulúv bu unv ámu á, alí ɔɣétó klé é bu unv ní. ⁴⁵Bulu asun wanlínhé amu lébláa aní ɔbéé, “*Adam gyankpapu amu lóbwe ɔkɔankpapu.” Táme Adam tráhe, ogyi Kristo amu mú gyí Ɖɣéá ɔtehá nkpa. ⁴⁶Ɖsulúsv-ɔyulúv anitegyankpá nyá asa anitebenya ɔɣétó klé. ⁴⁷Ɖsulútv-isi Bulu lópupwé nyankpwása gyankpapu, ogyi Adam amu. Kristo, amúbú obuwo amu mú otsú ɔsúsú. ⁴⁸Nyankpwása okugyíku bu ɔsulúsv-ɔyulúv fé Adam, táme aní ɔsúsú-ɔyulúv mú bóbwe fé Kristo klé. ⁴⁹Alí ámúbú angyí fé ɔsulúsv Adam amu a, alí kén abóbwe fé Kristo amúbú otsú ɔsúsú ámu é ekekú ní.

⁵⁰Apíó, tśá ndeblí gyí, aní ɔyulúv anfi igyi ɔyulúv múa obugya anfi iméenya ogyíkpá *Bulu iwíegyí ámutɔ. Tśá iteyíntá uméetalí nyá ogyíkpá tśá utamayíntátó.

⁵¹Táme mliyaa asu amlinu asun ɣainhé kvá Bulu lalé súná mí. Ɖbéé, megyí aní féé obówu, táme aní féé ɔyulúv bétse. ⁵²Ní ɔkpe tráhe ifúlí pé á, aní féé abétse ɔtsáwule pé. Bulu ɔbókusúa awupú ámu. Amó ɔyulúv uméetrá yintá, ɔbétse aní nkpa atsiápú é féé. ⁵³Tsúfé ilehián ání Bulu ɔbétse aní ɔyulúv anfi itowú pló anfi, há aní ɔyulúbá utamawú,

utamaplɔ. ⁵⁴Ní ibá mútɔ́ ání Bulu latse tɔ́á itowú, bwé mú tɔ́á itamawú, tɔ́á utɔplɔ́ é lábwé tɔ́á itamaplɔ́ á, unú Bulu asun wanlínhé anfi íbéba mútɔ́ ní. Ɖbéé, “Batú lowu asu plíplíplíplí. Isugyí onutó laba.”

⁵⁵Bulu asun wanlínhé ku é léblí Ɖbéé, “Óo lowu, nkúnu fú ɔkpe bu?

Nkúnú fú isugyí bu?”

⁵⁶Lakpan igyi ɔkpe ání utɔmɔ́, Mose mbla ámu é itehá lakpan túmi. ⁵⁷Nkáli kúráá abɔ́kuku da Bulu ipán? Múláhá anulatsun aní Wíe Yesu Kristosu gyi asu.

⁵⁸Mú su apíó adwepú, mlilu kínkíínkín, mlumákpínkí. Mlisi mli iwí féé ha Bulu agyómá brégyíbré, tsúfé mlyin ání mli gymagyihe mɔ́ɔbwe kpaali.

Itswitswi Ha Yerusalem Ahiánfɔ

16 ¹Itswitswi ha Bulu ahá ání bubu Yerusalem asón ámu é á, mlubwe mú fé ali ámúú nebláa ɔpasua ámúú ububu Galatia ɔmátɔ́ mbée bubwée mú ámu. ²Ɖhagyíɔha ɔkú mu kɔ́ba alíá otenyá ɔnɔ́, ɔle ku yaí Kwasiédagyíkwasieda. Mlumágyo mlíaa mbá asa amlitswitswi mú. ³Ní nebá á, nówanlín nwulú há ahá ání mli onutó mléle mlíaa, bupúú atɔ́ ámu ya Yerusalemfɔ́ ámu, púlé amú súná amú. ⁴Ní íbu aléá nɔ́yɔ́ á, múmú bóbuo mi yɔ́.

Paulo Ɖkpatu Nnihé

⁵Ní ɔ̀kú́sú tsú Makedonia a, néba mli wá, tsúfé ndekléá nɔ́tsun unu asa néba. ⁶Fíali nétsiá mli wá kpalobí. Fíali kúráá nétsiá unu nyankpu múa atsalí bré ámu féé, fówun mlílasí mí ɔkpa nayɔ́ ɔ́tínegyíɔ́tínéá nɔ́yɔ́. ⁷Séi mú á, mmedékléá néba beka tsun mli wá keke. Ní Bulu lótsulá á, nétsiá mli wá kpalobí.

⁸Táme nétsiá Efeso nfi kpéfun Pentekoste eke ámu. ⁹Tsúfé ɔkpa kpɔ̀nkpɔ̀ntí lafínkí há mí ání nɔ́yɔ́ agyómá ání íbɔ́wa labi. Ibu mútɔ́á mí alupú tsɔ́tsɔ́tsɔ́ bubu nfi mú.

¹⁰Ní Timoteo owíé mli wá á, mlumáha ifú ikita mu, tsúfé aní Wíe agyómá ámu kén ɔdeyɔ́ fé mí. ¹¹Mlumáha ɔ́haa ɔkú

mu ansító kótíkótí. Mlisi mu ɔkpa wankláán oyinki bɔtu mí, tsúfé ntsie ngyo mua aní apíó atráhe amu.

12 Aní pío Apolo asún ámu a, nalíi musu mbée, obúo apíó ámu ba mli wá, táme omedékléá ɔbéba séi. Ní onyá ɔkpa á, ɔbéba.

Asún Tráhe

13 Mhda iwɔsu, amlulu kínkíínkín mli hógyito. Mliwa klun, amlwa wɔ ɔwonlín. 14 Mlɔpu ɔdwe bwe mli tógyító.

15 Mí apíó, mlyin ání Stefana mua mu wóyító ahá gyí agyankpapuvá bedamlí kluntɔ Akaiia nsáuntɔ. Basí wɔ há, bude Bulu ahá ámu súm. 16 Nokókóli mli, mliɔba iwɔasi ha amúba ahá ání béba betsiá amúto, bópu nsi yó agyómá ámu.

17 Ansí lagyi mi ání Stefana mua Fortunato pú Akaiiko baba mí wá. Tsúfé bude mli ɔbwekpá bwe. 18 Bawá mí atetɔ-ɔnlun wankláán, fé alí amúto bɔwa mli ámu. Mliɔba ahá ánti odu.

19 ɔpasua amúto ibu Asia amu féé bude mli tsiá ha. Akwila mua Priska pú ɔpasua amúto ibu amú wóyító amu é behá mli tsiá wankláán aní Wíe idátɔ. 20 Apíó aba ámu féé behá mli itsiá gyágyágyá.

Mlulata aba puta Kristotɔ.

21 Mí Paulo onutó lapú mí ibu wanlín íni, ndepvhá mli tsiá.

22 Ní ɔku tamadwé aní Wíe Yesu a, ulwú dɔn musu!

Marana-ta! (Mú asi gyí, “Aní Wíe, ba!”)

23 Aní Wíe Yesu Kristo ogyíi mli buale.

24 Anta aní Wíe Kristo Yesu ikulebwe su ntehié dwé mli féé. *Amen!

Ɔwulú Nyɔɔsɔ́ Paulo

Lówanlín Sísí

Korintofɔ

1 ¹Mí Paulo ání una Bulu apétɔ nabwé Kristo Yesu *sumbí ɔɔpú mva aní pió Timoteo dé ɔwulú ánfɔ wanlín.

Anidé mú wanlín sísí Bulu ɔpasua ání ibu Korinto wúluto pú Bulu ahá ání bubu Akaia ɔsulúsu féé.

²Aní Sí Bulu mva aní Wíe Yesu Kristo bugyíi mli buale, abuha mli iwilwii.

Paulo Bulu Ipánda

³Mliha akanfu Bulu. Mbugyí aní Wíe Yesu Kristo mu Si pú mu Bulu. Mbugyí aní Síá otowun aní nwe pú aní Buluá otolwíi aní klun ɔkpagyíɔkpasu! ⁴Otolwíi aní klun aní asun wunhe kugyíkɔtɔ, méni aní é abétalí pú klun lwiíhé ámúú anulanyá tsú mu wá ámu lwíi aní aba klun amú asun wunhetɔ. ⁵Alí ámúú Kristo léhie wun ipian kɔnkpɔnkpɔnti, aní é anidé mú ku wúun amu a, alí kén Bulu ná Kristosu ɔhíé ɔde aní klun lwíi ní. ⁶Mú su ní anidé ipian wúun a, mli iwilwii pú mli nkpahɔɔ su anidé mú wúun. Tsúfé Bulu dé aní klun lwíi, méni aní é abólwíi mli klun, fówun mlétalí nyá klun, tomi wun aní ipian ámu odu kén. ⁷Ifú medé aní mli su, tsúfé anyin ání ania mlynɔ dé ipian ámu wúun. Mú su Bulu obólwíi mli klun fé aní.

⁸Apíó, ibu aléá mlébi ání iwɔsun ámúú anlówun Asia ɔmátɔ ámu ɔnɔ lehie wá ɔnlun. Iekle dun aní. Ifú lekítá aní, aníkí ání abówu kokooko. ⁹Ɔnɔkwali asún, ulɔbwe aní fé bahá aní lowu ipón. Táme alá anımɔɔpɔ ansí dínká aní iwɔsu, mboún Buluá ɔtɔkúsúa awupúsú, su uléba alí. ¹⁰Lélé

mú á, ɔlele anɪ tsú lowutɔ. Anlahogyi ání obétsiá lé anɪ brégyíbré. ¹¹Ɖbéle anɪ, tsúfé mlúdé mpáí bɔ anɪ nwunsv. Ínɪ sv ahá tsɔtsɔtsɔ béda Bulu ipán anɪ nwunsv, tsúfé alawá awitɔle há anɪ, mpáí ámúú ahá tsɔtsɔtsɔ budɛbɔ há anɪ ámv sv.

Paulo Nhɪhé Tse

¹²Abétalí pú ibi sí kántɔ anɪaa anɪ klɪn mókúhá anɪ pón anɪ nkpatɔ, títriu anɪa mlɪnyɔ nátutɔ. Megyí anɪ ɔsulúv anɪfɪsv nyánsa anɪlópɔv anɪdé anɪ agyúmá yɔ, mboún Bulu awitɔle sù anɪlatálí lé iwitɔ anɪdé tógyítɔ bwe ɔnɔkwalɪsv. ¹³⁻¹⁴Tsúfé megyí asún ání mlɪméetalí kla, nu mú asɪ anɪtɔwánlín sísí mlɪ. Ibv mótɔ́á mlɪmédé mú asɪ nu yi, táme nahogyiá mlóbonu mú asɪ wankláán ekekú. Fówun mlɪ é mlétalí pú anɪ tsú iwɪ, fé alíá anɪ é abópɔv mlɪ tsú iwɪ anɪ Wíe ɔbáke amv.

2 Ko

¹⁵Mí ansí dɪn asún ánfɪsv. Mú sv nɔbwe agywun ání néba mlɪ wá, méni mlénya oyúla anyɔ. ¹⁶Múgyí, nótɪsv mlɪ wá yó Makedonia. Ní neyínkí é nélatɪsv mlɪ wá; fówun mlétalí sí mí ɔkpa, néyínkí ba Yudea ɔmátɔ. ¹⁷Mléfíté mlɪaa, ntogyi sù nalátse mí agywun. Ntée nabwé fé ɔyítɔ ahá ámúú buteblí bɛɛ, “Ee” latsé amú ɔnɔ bɛɛ “Ó-o” amutɔ ɔku? ¹⁸Alɪ ámúú Bulu bv ɔnɔkwali, ɔtamawá afunu amv a, alí mí “Ee” igyi mí “Ee” ní. ¹⁹Tsúfé Bulu mv Bi Yesu Kristo amv tamablí ɔbéé “Ee” latsé mú ɔbéé “Ó-o.” Mv mú á, “Ee” kóún ototsúlá. Mv iwɪ asún ɔkan mía Silas pú Timoteo anɪléda súná mlɪ ní. ²⁰Tsúfé mutótsúlá “Ee” há Bulu nhɪhé kugyíku iteba mótɔ́. Mú sù akánfú Bulu tá á, anteblí anɪaa, “*Amen!” nɪ. ²¹Bulu téhá anɪa mlɪnyɔ anɪtetálí líí kínkíínkín anɪa Kristonyɔ ikulebwetɔ. Mvgyí ɔhá ání ɔleda anɪ ofúli. ²²Mv kén lópɔv *Ɖɛ Wankíhé amv wá anɪ klɪntɔ, púhíe anɪ nsu; isuna ání mvbú anɪ, ɔbɔbwe tɔ́á ɔlehíe há anɪ.

²³Bulu ɔbíti mí isv ní megyí ɔnɔkwali ndɛ mlɪ bláa. Alíá mméeba bowun tsitsa kuku blí tsú mlɪ iwɪ sù mmetrá bɔtsɪn unv. ²⁴Anɪmédékléá íbɔbwe fé anɪdé mlɪ híe alíá mlópɔv mlɪ hógyi yó agyúmá. Mboún alíá ansí bégyi mlɪ

sú anta mɔnyɔ anidé agyómá yɔ. Anyin ání mli hógyi su mlílí kínkíínkín dodo.

2 ¹Mú su nabwé agywun ání mméetrá ba bɔwa mli awirehɔ. ²Tsúfé ní nebá bɔwa mli awirehɔ á, ma ɔbéha ansí bégyi mi dun mli ámúbú nawá awirehɔ ámu? ³Mú sú nɔwanlín ɔwulú gyankpapo amu sísí mli ní. Fówun ní nebá á, mli ámúbú mléha ansí bégyi mi ámu mɔmúéla há awirehɔ mboún ikita mí. Tsúfé mí ansí dun mli féésú ání ní ansí de mí gyí a, mli é ansí bégyi mli. ⁴Megyí ansigyí nɔpɔwánlín ɔwulú ámu. Asún ihíé de mí háan, ndesú asa nɔwanlín mú! Táme megyí alá néha mlégyi awirehɔ su nɔwanlín mú. Mboún alá mlébu ání ntehié dwé mli su.

Lakpansikíé

⁵Ɔhá ámúbú ɔɔpɔ asún ba ɔpasua ámɔɔ ámu mɔkúrpú ɔlala gyi mi. Ní beɛ bukú mú á, ɔpasua ámu féé alapú asún gyí. (Mmedékléá nɔdun mú blí.) ⁶Isɔbití ámúbú mli ɔdɔdɔ mlélébití mu amu ɔtsɔ mu. ⁷ɔlafun ání mlésikíé mu, yíá mu klun ngya. Fówun asún mɔɔdun mu, iwɔ móowu mu. ⁸Mú su nokókóli mli, mlile suna mu ání mlitráa mlɔbɔ mu iwɔ ɔdwe. ⁹Ndekléá nébi ní mlitegyi mí asún ámu féésú. Mú su nɔwanlín ɔwulú ámu ni. ¹⁰Ní mlesíkíé ɔku á, mí é nasíkíé mu. Ní nesíkíé mu é á, mli sú nasíkíé mu Kristo ɔdátɔ, ní ilehián ni, ¹¹méni Ɔbunsám oméenya anɔ iwɔ ɔkpa, tsúfé anyin ikpa ání ɔtɔtsun mósú féé.

Paulo Klun Médi Mu Asi

¹²Bréá neba Kristo *asun wankláán ámu ɔkan ɔdakpá Troa wúlɔɔ á, nowun ání anɔ Wíe lafínkí ɔkpa há mí. ¹³Táme mí klun médi mí asi, tsúfé mmɔɔtɔ mí píó Tito unu. Mú su neklá amú ká tsun yɔ Makedonia nsáɔtɔ.

Isɔgyí Kristo ɔdátɔ

¹⁴Táme nde Bulu ipán da ání Kristo isɔgyí su alabwé anɔ ndoun, alakpá anɔ buo iwɔ, anidé mu isɔgyí amu nke gyí. Ní ayɔ ɔtínegyíɔtíne a, ɔtɔtsun anɔsu bláa ahá ámu Kristo asun

wankláán ámu, fé alíá ofobí fánfán tɔwá ɔfan yɔ tsútsúútsú. ¹⁵Lélé mú á, Kristo gyí atɔ tɔhé, angyí mú ɔfan ání idekusú há Bulu, há ahá ání buɗe nkpa nya pú amúá buɗefwi féé. ¹⁶Itobon ahá ání buɗefwi, kpá amú ya lowutɔ, utɔwá ahá ání ɔɗe amú nkpa hɔɔ ɔfan, kpá amú ya nkpatɔ. Ma mee lɔfun ha gyuma ánfɔ odu yɔ? Ɖhaa má unu. ¹⁷Ani mú anumégyí fé ahá ɔɗuɗɔá buɗe Bulu asún ámu fe púkle kɔba. Ínúá Bulu lówa anɔ su á, aniteblí mú ɔnɔkwaliɔ fé Kristo asúmbe ání bulí Bulu ansítɔ.

Bulu Ntam Pɔpwe Asúmpú

3 ¹Asún ánfɔ anidéblí ánfɔ itráa desuná ání anidé iwɔ kanfú súná mli lóó? Ntée ilehián ání abɔpu anɔ adánsɔ nɔwulú bá mli, ntée abɔho mú tsú mli wá fé alíá aku butɔbwé? ²Ekekekeke! Mli onutó tsiátɔ gyí adánsɔ nɔwulúá bawánlín dínká anɔ klonsu, ɔhagyíɔha dé mú wúun kla, púbí ání anidé agyómá wankláán yɔ. ³Mlɔgyí ɔwulúá Kristo lówanlín, ulɔtsun anɔsu ba. Táme megyí oyípe ɔɔpɔwánlín mú, Bulu Ɖkɔankpapu amu Ɖɔɔ ɔɔpɔwánlín mú. Megyí abwi pétéplé anyɔsu^a é ɔlɔwanlín mú dínká, mboún anyánkɔusa klonsu.

⁴Anɔbu ɔkpa blí alɔ, tsúfé Kristo su anɔ ansí dɔn Bulusu. ⁵Anɔyin ání anumɔfun ání abétalí bwé tɔtɔ anɔ onutó iwɔsu. Bulu sú anɔlɔfun ha tógyítɔ bwe. ⁶Muláhá anɔlabwé mu ntam pɔpwe amu asúmpú. Megyí ibɔ Bulu lɔpɔwánlín mú mú, mboún *Ɖɔɔ Wankíhé amu. Tsúfé mbla wanlínhé amu utɔpú lowu ba, táme Ɖɔɔ Wankíhé klé amu mú utɔpú nkpa ba.

⁷Mbla dada amúú Bulu lówanlín dínká abwi anyɔsu ámu ulɔpu lowu ba. Táme mú numnyam léha Mose ansítɔ léhie wankí asa ɔɔpɔba Israelfɔ. Bréá numnyam amu ɔnɔ ide asɔbá ó á, bumetalí kɔ mu ansítɔ. ⁸Ínúá mbla wanlínhé amu lénya numnyam alɔ á, múmú Ɖɔɔ Wankíhé amu gyumagihe numnyam íbéhie dɔn mú! ⁹Mbla wanlínhé amúú itehá

^a 3:3 *Abwi pétéplé anyɔ* amúú Bulu lówanlín mu Mbla dú dínká mósó há Mose amu.

anitegyi ipɔn ámu kúráá ibu numnyam. Múmú nkáli Dɛ Wankíhé gyumagyihe amúú ihíé bu numnyam dun mú ámu ibɔ́bwe? Tsúfé itehá anitegyi asu Bulu ansító! ¹⁰Múmú idesuná ání Bulu mbla dada amu itráa ma numnyam kúráá. Pɔ́pwe anfi numnyam lagi músú. ¹¹Tsúfé ní Mbla dada amúú imetsiá wá ɔ́pá ámu ibu numnyam ali á, múmú pɔ́pwe anfi ibétsiá bré fée ánti klé ibéhié dun mú!

¹²Ani ansí din ntam pɔ́pwe anfisv. Mú sv anibv ɔ́kpa tóí faan. ¹³Anumégýí fé Mose ání oletsiá pú tati bun nwun, méni Israelfɔ bumóowun mu ansító wankí, bréá mú ɔ́nó ude asbá. ¹⁴Táme mú óó á, Bulu léha amú klwntɔ lówa odwin bɔ́fun nde. Mú sv ní bude Bulu mbla dada amu kláa amú ofiakpa a, butamanú mú asi, tsúfé tati ámu létin amú agywun. Tɔ́tɔ méetalí bwíí tati ámu lé amú agywunsv, nkéti amúa Kristo babwé kule. ¹⁵Bótv nde kúráá ní bude Mose mbla ámu kláa a, tati ámu itráa bun amú agywunsv. Mú sv butamanú mú asi. ¹⁶Táme ní ɔ́ha onyá dámlí klwntɔ ba aní Wíe wá pé, Kristo labwíí tati ámu lé mu agywunsv. ¹⁷Aní Wíe amúú asún ánti idetɔ́í tsú mu iwí ámu gyí Dɛ Wankíhé amu ni. Ɖtínegýíɔ́tínéá Dɛ ámu ibu a, iwígyí tétsiá unv. ¹⁸Aní Wíe dé tati ámu bwíí lé aní fée ansító. Mú sɔ́ anidé mu numnyam amu le súná ní. Mu Dɛ ámu lahá anidé mu lían, tsúfé mu numnyam amu itráa dewankí anɔ́ tsía.

Ɖlɔ́tɔ Siade

4 ¹Bulu láwun aní nwe pú agyómá ánti wá aní ibɔ́tɔ. Mú sv abatɔ tamawú aní. ²Anilakíná tɔ́á ibu péli pú oklúntɔ ató fée. Animédé ahá mlé, animédé Bulu asún ámu é damlí bun. Mboún anidé ɔ́nɔ́kwali amu onutó blí pólé iwí súná ahá fée, iwanki amú alíá anigyí Bulu ansító. ³Ní tɔ́kv ibun asun wankláán amúú anidéblí ámusv kúráá á, ahá amúú budefwi ámu nkule ibun há. ⁴Ɖbunsám gyí ɔ́yí laláhe anfisv ogyípú. Mulápú ató tin ahá ánti butamahɔ Bulu gyi anfi ansíbi. Mú sɔ́ bumédé asun wankláán amúú igyi wanki amu asi nu ní. Wanki amu gyí Kristo. Muléhié lian Bulu numnyam ni. ⁵Tsúfé animéná animédé aní onutó iwí asún

ɔkan da. Yesu Kristo ɪwɪ asɔn ɔkan anɔdɛda anɪaa, mɔgyɪ anɪ Wɪe. Tɔ́á anɪteblí tsú anɪ ɪwɪ gyí, Yesu sɔ anɪlabwé mɪ asúmpú. ⁶Tsúfɛ Bulu á múbú ɔleblí ɔbéɛ, “Wankɪ ɪdálɪ tsu oklúntɔ!” ámu kén lahá mu wankɪ amu ɪdewankí anɪ klɔntɔ. ɪlahá anɪlabí ání mu numnyam amu ɪdewankí Yesu Kristo ansítɔ.

⁷Táme anɪgyí fé nɔ́ pwehé ání siadɪɛ bu mútɔ́. Siadɪɛ ámu gyí wankɪ múa túmɪ ánfɪ ɪdewankí anɪ klɔntɔ. ɪdesuná ání túmɪ kpɔnkpɔɔnkpɔntɪ ánfɪ imotsú anɪ, Bulu wá itsú. ⁸Bude anɪ háan ɔkpagyíɔkpasu, táme bɔmɔkútálí sá anɪ tin. ɪwu de anɪ klí, táme ɪmɔkúkpɔn anɪ. ⁹Budɪn anɪsɔ, táme Bulu mɔkúsí anɪ há. Bɔtefɪn anɪ dá, táme Bulu sɔ anɪmɔkúwú. ¹⁰Anɪlatsúlá ɪde anɪ ɔyɪlɔbɔ anɪ ipian brégyíbré, anɪdɛwu fé Yesu, méni mu nkpa ámu ɪbéɪn ɔwan anɪtɔ. ¹¹Yesu súm sɔ anɪ nkpa atsiápú anɪ anɪtefia lowu brégyíbré. Alíá ɪbɔbwe mu nkpa béɪn ɔwan anɪ ɔyɪlɔbɔ anɪ ɪdewu ánfɪtɔ sɔ. ¹²ɪni désuná ání lowu dé anɪ laláa, mɪ é mɪdɛ nkpa ání ɪtamátá nya.

¹³Táme anɪbu múbú anɪdɛ Bulu asɔn ámu ɔkan da. Tsúfɛ anɪlɔhɔ mu gyi fé alíá ɪsraɪɪl ɪlɔ ɔwapú ámu ɪsɔwanlɪn wá Bulu asɔn ámutɔ ɔbéɛ, “Nɔhɔ Bulu gyi. Múlahá sɔ nde mú ɔkan da ní.” ¹⁴Anɪyin ání alɪ á múbú Bulu ɪsɔkúsú anɪ Wɪe Yesu tsú afúlɪtɔ ámu a, alɪ kén ɔbɔkúsú anɪ, ɔbékpa anɪa mɪnyɔ féé ba mu ɪwɪ wá ní. ¹⁵ɪni féé bɔ́wa labi há mɪ, méni ní Bulu híé ɔde awɪtɔle wa, kpá ahá ɔdudɔ ba Kristo wá á, béhɪɛ dá mu ɪpán, wá mu numnyam.

Hógyi Putsiá

¹⁶Mú sɔ abatɔ tamawú anɪ. ɪbu mútɔ́á anɪ ɔyɪlɔbɔ anɪ ɪdewu mú, táme Bulu dé anɪ ɔkláa ɔwɔnlɪn wa ekekegyíɛke. ¹⁷Tsúfɛ ɪwɪɔsɪn kpalobí ánfɪ anɪdɛwúun séi ánfɪ ɪbéha abénya numnyam kpɔnkpɔɔnkpɔntiá ɪtamátá, ɪdɔn ɪwɪɔsɪn ánfɪ. ¹⁸Mú sɔ anɪmɛdé ɪwɪɔsɪn ánfɪ anɪdɛwúun anɪ bu. Múá nyankpusa ansíbi tamawun ɔkpa anɪdɛkí. Tsúfɛ ɪwɪɔsɪn ánfɪ ɪbéba bɔtsɔn. Ansigyí á múbú ɪbu ɔma, ɪbétsiá bré féé ámu ɔkpa anɪdɛkí.

5 ¹Ani ɔyulúv anfi igyi fé kantankpa ání anutsie mútɔ́. Ní bobwíé mú á, Bulu ɔbéha aní obu bámbá ɔsúsú. Múmú á, megyí nyankpusa léyi mú. Mu onutó léyi mú, imóobwie ekekeeke. ²Tsúfé séi kúráá ide aní ipian ɔsulúsv-ɔyulúv anfitɔ́. Anihíé anigyó ekeá ɔbɔpu aní ɔsúsú-ɔyulúv wá aní fé atadié. ³Mómú animɔɔbwe fé ɔhéá ima ɔyulúv, aniná yaya. ⁴Ide aní ipian, anidékmí bré ání anutráa aníbu aní ɔyulúv dada anfitɔ́. Megyí bee anidékléá awú, adali ɔyulúv anfitɔ́. Mboún anidékléá Bulu ɔwáa aní ɔsúsú klé amúbú itamawú plɔ́ ámv, méní ibégyi mú ání itowú plɔ́ ánfisv. ⁵Bulu onutó léla aní yái há mú, ɔɔpu Dɔɔ Wankíhé amv wá anitɔ́. Múgyí ibwiá ɔledínká mósú ní.

⁶Mú sv anutɔwá klvn brégyíbré. Ibv mútɔ́á bré ání aníbu ɔsulúsv-ɔyulúv anfitɔ́ á, aníbu ifɔ́ aní Wíé wá. ⁷Íni sv hógyi anílapú anutsie nkpa, megyí tɔ́á ansíbi dewúun. ⁸Ee! Anihíé anidé klvn wa, tsúfé tɔ́á anihíé anidéduká gyí abówa ifɔ́ ɔsulúsv-ɔyulúv anfi wá, ayetsiá aní Wíé wá. ⁹Mú sv ní aníbu ɔsulúsv nfi o, ɔtine bambá o, tɔ́á idin aní klvsv bré féé gyí, abɔbwe tɔ́á ibégyi aní Wíé ansí. ¹⁰Tsúfé aní féé abéyélu Kristo ansítɔ́, obégyi anitɔ́ okugyíɔkv asún, ká mv ɔkv aní ɔsulúsv-ɔyulúv anfi bwehé ɔnɔ́. Yilé igyi o, lalaha igyi o.

Bulu Onyawíele

¹¹Anihíé anyin ání ilehián ání abénya aní Wíé ifú. Mú sv anidéɔtí kplá ahá anaa, amú é bunyáa mv ifú. Bulu híé oyin aní. Nahogyi ání mli é mliyin aní mli klvntɔ́. ¹²Megyí iwí anutráa anidétsu súná mli. Mboún anidé mli ɔkpa suná, méní mlótsu iwí aní sv. Fówun ní ahá bude iwí tsu tɔ́á ɔha tɔpú ansíbi wun sv, imegyí tɔ́á ibv ɔha klvntɔ́ sv á, mlénya kv bláa amú. ¹³Tsúfé ní bee aní nwun layíntá kúráá á, Bulu asún igyi. Táme ní bee aní ansítɔ́ da mú á, ida ha mli. ¹⁴ɔdwe amúbú Kristo bv ha aní ámv dé aní kpa, tsúfé anílanú iwíasi ání mv nkule lówu há ahá féé. Mú sv mv ahá féé bawú. ¹⁵Olowu há ahá féé lélé, méní ahá ání bénya nkpa pɔpwe amv bumétrá tsiá nkpa alá budeklé. Mboún bétsiá nkpa há Kristo amúbú olowu, Bulu lókusúa mv há amú ámv.

16Íni su antráa anumédé ɔhaa kú fé alá ɔyító ahá buteki mu. Ibo mótóá bré ámu anulétsiá kú Kristo fé alá ɔyító ahá buteki mu, táme antráa anumédé mu kú alí. 17Mó su ní ɔha mua Kristo ɔɔbwé ukule a, alabwé ɔha ɔɔpwe. Mu tsiátó dada amu féé ulatsun. Mu tsiátó labwé ɔɔpwe! 18Nkpa ɔɔpwe anfi itsú Bulu wá. Múlótsun Kristosu bwé aní ánti anígyí mu alupú ánti mu anyawíe. Alapú agyúmá ánti wá aní ibitɔ, ɔbée alée aha bambá é anyawíe ha mu. 19Tsúfé Bulu lótsun Kristosu ɔde ɔyító ahá damlí bwé mu anyawíe. Ɖtráa ɔmedé amú lakpan iwí akúnta bu há amú. Íni ɔɔɔpwa aní ibitɔ ɔbée, abláa ahá ní.

20Kristo atsiámi anígyí, Bulu détoí tson anisu há mli. Mó su anlíí Kristo ɔlúkpá anidé mli kokóli aníaa, “Mliha Bulu ɔbwe mli mu anyawíe!” 21Tsúfé Kristo móbwe lakpan kuku! Táme Bulu lópu mu bó afɔdie aní lakpan su, méni ɔbótsun ania munyɔ ukulebwesu tsú aní ání aní asún da ɔkpa mu ansító.

6 1Ania Bulunyɔ anidé agyúmá yɔ. Mó su anidé mli kokóli aníaa, mli máha Bulu awitɔle amú mli lanyá ámu ibwe kpaali. 2Tsúfé Bulu lébli mu asun wanlínhé amutɔ ɔbée,

“Bréá mí bré lofun ání nówun ahá nwe a,
nonu mli ɔme.

Mí nkpa ɔhóke amu ulofun é á, negyi mli buale.”

Mlinu! Bré ámu láfun a. Nde gyí mli nkpa ɔhóke amu ní!

3Animédékléá abétin ɔhaa aní Wíe wá ba ɔkpa, méni ɔhaa méenya asvansu blí tsú aní agyúmá ánti iwí. 4Mboún aní bwehé féétó a, anitelé súná ání Bulu asúmbi anígyí ɔɔɔkwalsu. Anitotomi aní iwíɔsin, aní ikplán pú aní asun wunhe kugyíku étó. 5Bepítí aní ató, wá aní obu, bekpa bun anisu dá aní. Anulóyɔ agyúmá ání idun aní. Nkekú anitamadídi, nkekú é anutetsiá akún. 6Anulótsun aní tsiátósu lé súná ání ifin kuku má aní iwí. Anyin asún, anutenyá uklon. Aníbu awitɔle, Ɖɔɔ Wankíhé amu tsie anitɔ. Anutehíe dwé ahá é tsú aní kluntɔ. 7Anitedá Bulu asún ámu ɔkan ɔɔkwalsu pú Bulu túmitɔ. Yilébwe gyí isá-akotóá anidépu kó

ahá, anidéputin anɪ wɪ é. ⁸Aku butobú anɪ, aku é butɔsúpa anɪ. Aku butekánfú anɪ, aku é butɔkpɔ́í anɪ. Anɪ asún da ɔkpa, táme buɔe anɪ bu afunupu. ⁹Fé anumégyí tɔtɔ ahá ansítɔ́, táme ahá anɪgyí. Fowun anɪ fɛe anidéwu ní, táme kɪ, anɪbu nkpa. Butesian anɪ mɔ, táme anitedáli mútɔ́. ¹⁰Anɪbu wɪɔsɪntɔ, táme Kristo su anɪbu ansigyítɔ́. Ahiánfɔ anɪgyí, táme anɪlahá ahá bamlí wɪ anyapú. Anɪmá tɔtɔ, táme anɪbu tógyítɔ́ Kristo su.

¹¹Korintofɔ! Anutehíé nyá mɪ wɪ ansigyí, lé wɪtɔ bláa mɪ asún. ¹²Anɪtamakólá wɪ mɪsɔ, táme mɪ mú mɪɪdɛ wɪ kulá anɪsɔ. ¹³Nɛ mɪ asún bláa fé mí onutɔ abí. Mɪ é mɪmápu asɔnsɔ ɲáín anɪ.

Ɔmátɔ́fɔ Pɔgyi Mba

¹⁴Mɪa ɔmátɔ́fɔ mɪmágyi mba. Nkálɪ yilɛ múa lalahe bétalí tsíá tsukule? Nkálɪ wankɪ múa oklún é bɔ́bwe kule? ¹⁵Kristo mɔa Ɖbunsám^b bétalí bwé agywun kule? Ekekeke! Nkálɪ ohógyipu mɔa ɔhá ání ɔma hógyi bɔ́bwe kule? ¹⁶Nkálɪ bɔ́tswe ɔkpi Bulu ɔtswékpa? Tsúfé anɪgyí Bulu Ɖkɪankpapu amɔ ɔtswékpa nɪ. Igyi fé alíá bɔwanlín wá Bulu asún ámutɔ beɛ,

“Bulu ɔbéɛ, ‘Nétsiá mí ahátɔ,
mía amúnyɔ abénatí.
Nɔ́bwe amó Bulu,
amó é bɔ́bwe mí ahá.’ ”

¹⁷Bɔwanlín wá Bulu asún ámutɔ é beɛ,
“Anɪ Wíe Bulu ɔbéɛ,
‘Mɪɪɪɪ amútɔ́, amɪmaɪn wɪ le amúsú.’ ”

Betrá wanlín wá Bulu asún ámutɔ beɛ,
“Mɪmáwa ɪbɪ lalahɛtɔ,
mí anɔ mɪ.”

¹⁸Betrá wanlín wá Bulu asún ámutɔ beɛ,
“Bulu ɔbéɛ, ‘Nɔ́bwe mɪ Sí,
mɪ é mɪɔ́bwe mí abí.’ ”

^b6:15 Paulo létɪ Ɖbunsám ɔbéɛ, ‘Belial.’

Alí aní Wíe Otúmípu dèblí ní.”

7 ¹Mí apíó adwepó, Bulu lahié ntobíá igyi ahi yáí aní. Mú su mliha afwí ibí le tógyítá íbókpoí aní ɔyulúv pú aní ɔkláa féétó. Mliha anya Bulu ifú, ménu íbéha aní iwí bétun, ifin kuku méetrá tsiá aní iwí.

Paulo Ansigyí

²Kókoli, mlímákulá iwí anísv! Anímókópú lalahe gyi ɔhaa. Anímókúyíntá ɔhaa, anímókúsísi ɔhaa é. ³Megyí ipón nde mli ha sù nde asún ánfí blí. Tsúfé nablí bɔtsun mbée, anitekile mli asún. Lowuto o, nkpatɔ o, aníméetan mli sv ekekeke. ⁴Ntetálí bla mli mí kluntɔ asún, nde iwí é tsu mli sv wankláán. Aní ipian féé ɔma a, mlilawá mí atetɔ-ɔnlun. Ansigyí kpɔnkpɔnti ku labúlá mí kluntɔ.

2 Ko

⁵Tsúfé bréá anilówie Makedonia a, aníménya ɔkpa dá ɔkpónú. Atsun nfi asún, ayínkí nfi utré. Mú sv ifú letsiá aní ayetɔ. ⁶Táme Buluá otolwíí ahá ámúb iwí lawú amó uklun amu lékpa Tito ba aní, púlwíí aní uklun. ⁷Megyí mu íbá amu nkule léha uklun lólwíí aní, mboún asún ání ɔɔpɔtsúa usv ba é. Ɖlebláa aní ɔbée, mlihié mlidékléá mlówun mi. Alí asún ámu lahan mli, mlilanú iwiasí ání mlímébi bwé pú alí mlilahíé tsúlá dínká mí klésv, sv ansí letrá gyi mi tsiá.

⁸Tsúfé ní mí ɔwulú ámvto asún lehan mli kúrää á, mí mú umehan mi. Uv mótáá ílehan mi bré kutɔ, tsúfé nowun ání íleha awírehɔ lékutá mli kpalobí. ⁹Ansí de mí gyí séi. Megyí alíá ílɔwa mli awírehɔ sv. Mboún alíá awírehɔsú amu ílahá mliladámli kluntɔ sv. Tsúfé mli awírehɔsú anfi odu Bulu tekile ni. Mú sv mí asún ámu imeyintá tɔtɔ tsú mli iwí. ¹⁰Tsúfé awírehɔsúá igyi Bulu apé tɔpú kluntɔdamli bá. Ltehá anutenyá nkpa. Mú odu bv ɔsun, táme uma ɔsun. Ɖyítɔ awírehɔsú mú á, lowu ítɔpúba. ¹¹Mliki tóá awírehɔsúá igyi Bulu apé latí há mli! Ulahá mlilatsú íkv lé asún ámvto, mlidésuná ání mli asún da ɔkpa sv ɔblí é de mli. Ulsíí mli opúni, ílahá mlihié mlidékléá mlówun mi, mlilatsúlá dínká mí klésv. Mlihié mlidédunká ání mlébutí lalahe ɔbwepó ámu usv. Lélé, mlilalé súná ání mlímégyi pón asún ánfítɔ.

¹²Nɔwanlɛn ɔwulɔ sɛsɛ mli, tɛme megyɛ ahɛ ɛnfi su. Megyɛ ɔhɛ ɛmɔɔ ɔɔɔwe ulɛ, ntɛɛ ɔhɛ ɛmɔɔ ɔɔɔpu ulɛ gyɛ mu amu su. Alɛ nɛle sɛnɛ mli Bulu ansɛtɔ ɛnɛ mlulatsulɛ dɛnkɛ mɛ klɛsu mboɔn su. ¹³Ɔnɛ lahɛ wɛ anɛ atɛtɔ-ɔnlɛn.

Mɔɔɛ idɔn kɔrɛɛ ɛ, ansɛ legyɛ anɛ, brɛɛ anɛlɔwun ɛnɛ mli fɛɛ mlɛlahɛ ansɛ de Tito gyɛ, tsufɛ mlɛlahɛ uklɔn ladɛ mu asɛ. ¹⁴Nɛ nekɛnfɔ mli mu ansɛtɔ kɔrɛɛ ɛ, mlɛmɛha pɛlɛ mekutɛ mɛ. Alɛ ɛmɔɔ asɛn ɛmɔɔ anɛlɛblɛɛ mli ɛmu fɛɛ igyɛ ɔɔɔkwɛlɛ amu a, alɛ kanfɔ ɛmɔɔ nekɛnfɔ mli mu ansɛtɔ ɛmu ɛ laba mɔtɔ nɛ. ¹⁵Nɛ Tito ɔkɛɛn alɛɛ mli fɛɛ mlɛteyɛɛ asɛ hɛ mu, hɔ mu asɛn blɛhɛ, pɔ alɛɛ mlɛtenyɛ ifɛ kpɛnkɛ mu ansɛtɔ ɛ, ɔtɛtrɛɛ nya mli iwɛ ɔdwe tsɛɛ. ¹⁶Ansɛ ihɛɛ de mɛ gyɛ ɛnɛ nɛtalɛ pɔ ansɛ dɛnkɛ mlɛsu ɔkpɛgyɛɔkpɛsu.

Akristofɔ Atɔkie

8 ¹Apɛɔ, anɛdɛklɛɛ mlɛbɛ awɛtɔlɛɛ Bulu lawɛ hɛ ɔpasuɛ ɛmɔɔ bubu Makedonia ɔmɛtɔ ɛmu. ²Ɔnɛɛ bubu ipɛɛn mɔɔ asɛn wunhɛ tsɔtsɔɔtsɔɔ kɔrɛɛ ɛ, bɔpu amɔ ohɛɛn futɔtɔtɔtɔ lɛ amɔ awɛtɔlɛ kpɛnkɛɔnkɛntɛ sɛnɛ ansɛgyɛsɔ tsɛn amɔ atokɛhɛtɔ. ³Nɛblɛ mbɛɛ, bekɛ atɔ dɔn alɛɛ bɛtalɛ kɔrɛɛ, tsɛ amɔ klɛntɔ. ⁴Bɛtsɛɛ kɔlɛ anɛ ɔkpa bɛɛ, ahɛ amɔ ɛ abunya ɔkpa wɛ awɛtɔlɛ hɛ Bulu ahɛ ɛnɛ bubu Yerusalem. Fɔwun amɔ ɛ amɔ ɛbɛ bɔwɛ osum agyɔmɛɛ ɛnfiɔ. ⁵Bɔbwe dɔn alɛɛ anɛlɔsusɛu. Gyankpɛpu a, bɛsɛ amɔ iwɛ hɛ anɛ Wɛɛ, belɛsɛ amɔ iwɛ hɛ anɛ Bulu apɛtɔ. ⁶Mɔ su anɛlahɛ Tito amɔ olegyankpɛ behɛ mlɛlɔwɛ nɛsɛ ɛmu anɛɛɛ, ɔtrɛɛ yɛnkɛ behɛ amɛlɛwɛ nɛsɛ mɔ mli awɛtɔlɛ agyɔmɛɛ ɛmu ɔnɔ wanklɛɛn. ⁷Mlɛlafun ɔkpɛgyɛɔkpɛsu, tsufɛ mlɛhɛ mlɛbu hɔgyɛ, mlɛyɛn tɔlɛ, mlɛlɛtɛn ansɛ. Tɔtɔ tamakpɛn mli, mlɛtehɛ dwɛ anɛ ɛ. Nɛklɛɛ mlɛbɔɔ mbɔdɛ awɛtɔlɛ agyɔmɛɛ ɛnfi ɛtɔ dɔn ɔhɛgyɛɔhɛ.

⁸Mmɛdɛ mli hɛɛ mbɛɛ, mlɛbwɛɛ mɔ. Mboɔn nɛɛpu mli ɔdwe kɛpɔ akɔɛɛ bɔdɛprɛɛ ɛnɛ amɔ ɛ bɔbɔɛ. ⁹Tsufɛ mlɛyɛn alɛɛ anɛ Wɛɛ Yesu Kristo lɔdwe ahɛ, wɛ awɛtɔlɛ. Iwɛ onyɛpɔ ogyɛ tɛktɛ, tɛme anɛ su ɔɔbwe iwɛ ohɛɛnɛ, mɛnɛ abɔtsɛn mu ohɛɛn ɛmɔsu bwe iwɛ anyɛpɔ.

¹⁰Mí agywun gyí, ní mlɔmɔ agyómá ámúbú mlíléfi así ofíku ámu ɔnɔ á, íbɔwa labi há mli. Tsúfé mlgyí ɔpasua gyankpapu ání mlílɔbwe agywun ámu, mli kén léfi mú así. ¹¹Mlɔwuna bwe mú mɔ ɔnɔ. Mlile íklɔntɔ bwe mú, fé alíá mlíléfi mú así. Mlíkie mú mli ɔwɔnlín ɔnɔ, méní íbékanaá agywun ámúbú mlílɔbwe ámu. ¹²Ní íhíé igyi mli apéá mléha á, mlíkie tɔ́á mlibu. Mútegyi Bulu ansí, megyí múá mímá. ¹³Megyí bæ, anídékléá abéha íwí bólwií aku, íwí íkli mli mú; mboún alíá íwí bólwií mlíá amúnycɔ féé kékéé. ¹⁴Séi mlibu atɔ́ tsɔtsɔ́á mlétalí púbúá amú. Múmú ní íwá alé há amú, íwí leklí mli é á, amú é bétalí búá mli, méní mlíá amúnycɔ féé mlénya kékéé. ¹⁵Mlíkaun ání Bulu asun wanlínhé amu léblí ɔbéé, “ɔhá ámúbú ɔlekpa tsɔtsɔtsɔ́ amú ménya mú dubi. ɔhá ámúbú ɔlekpa kpalobí ámu é klé íɔfun mu.”

Tito Mva Mu Aba

¹⁶Adá Bulu ípán ání alahá Tito é latsúlá dínká mli klésv fé mí. ¹⁷Bréá anúlɔ́wa mu aníaa ɔbá mli wá á, olotsulá. Mu onutó óó, íbu mu ɔdwe ání ɔbétrá ba íwí. ¹⁸Anídé mva opió ɔku wa sísí mli. ɔpasua ámu féé bude mu kanfú, asun wankláán ámu ɔkan da su. ¹⁹Makedonia ɔpasua ámu féé léle mu ání aníá múnycɔ anátí kí, ahɔ atokiehé ámu ya Yerusalem. Anídé atɔ́ ánfí bwe púwá aní Wíé numnyam, méní íbósuná ání aní onutó latsú dínká íwísv ání abɔ́bwe mú.

²⁰Anídé aní íwí kí wankláán, méní ɔhaa mééle aní ílá, tsú alíá anúlɔ́pu anídé atokiehé ámusu kí. ²¹Tɔ́á anídésusúu gyí, alíá abɔ́bwe múá ída ɔkpa Bulu mva anyánkpúsa féé ansítɔ́.

²²Ínɔ́ sv anílapú aní apíó ámvtɔ́ ɔku mántá Tito anású. Anílasɔ́ mu kí, anílawun ání ɔhíé ɔbu nsi. Alahɔ mli gyi séi. Mú sv ɔhíé odekléá ɔbétsa aní agyómá ámu yc. ²³Ní ɔku léfuté musu á, mlibla mu mlíaa, mía múnycɔ dé agyómá yc púsúm mli. Makedonia ɔpasua lɔ́wa apíó atráhe amúú mva amúnycɔ bebá ámu. Ínɔ́ désuná ání Kristo bude numnyam wa. ²⁴Mú sv mlile mli ɔdwe suna amú. Isuna ɔpasua ámu féé ání mli sv aníbu ɔkpa tsú íwí.

Akristofá Buma Tɔto Buá

9 ¹Imehián ání nɔwanlín mli ɔwulú tsú alíá mlidé Bulu ahá ání bubu Yerusalem buá iwí. ²Tsúfé nyin ání mlihié mlidékléá mlóbuá amú. Nagyí mli iwí adánsie súná amú mbée, tsú ofíku ɔpá Akristofá bubu Akaia ɔsulúsu beda iwísu yáí ání bóbuá. Mli nsiwa lahá ogyá ku lawíé amú ɔdudɔɔɔ. Mú su amú é bafi mú así. ³Táme nde apíó ání wa sísí mli, isuna ání megyí kpaali negyí mli iwí adánsie súná amú. Mlida iwísu, fé alíá nebláa mli yáí, amlíka mli tswitswí féé. ⁴Tsúfé ní Makedonia Akristofɔ ámutɔ aku bobuo mi ba unu, bowun ání mliwókúdá iwísu fé alíá nebláa amú á, abósupáa amú ansítɔ, táme mlósupáa dun mli. ⁵Mú su nabwé agywun ání néha Tito muv mu aba ámu abugyankpa ba mli wá, iha amlidunka tɔá mliléhie ání mléha yáí. Táme mliha mú tsú mli kluntɔ, megyí ɔhíé igyí.

⁶Mlíkaun ání ɔhá ání odú kpalobí á, kpalobí ɔɔkɔpótí, táme ɔhá ání odú tsɔtsɔ tɔkɔpótí tsɔtsɔ. ⁷Mlɔɔ okugyíɔku ɔháa múá ɔbétalí tsu mu kluntɔ. Imábwe ɔhíé, tsúfé ɔhá ání ɔɔpú ɔdwe kíé atɔ asún Bulu tekle. ⁸Bulu téhá mli tɔá mlidéhián brégyíbré, dun alíá ilehián mli. Mú su mlénya tɔá ide mli hián brégyíbré. Ibófun mli sian, mlópubwé yilé há aha bambá. ⁹Fé alíá ɔwanlín wá Bulu asún ámutɔ bee, “Bulu ɔha telé iwíɔ kíé ahiánfɔ atɔ.

Mu yilébwe tamatá.”

¹⁰Bulu téhá adɔɔpɔ atɔ-abí butodú, ɔtehá ahá atogyihe. Mli gyí fé amú. ɔbéha mli atɔ-abíá mlópu iku kíé ahá, atogyihe tsɔtsɔɔtsɔ bédali tsu mli yilébwe ámutɔ. ¹¹ɔbéhie yúlá mli ɔkpagyíɔkpasu, méni mlówa awíɔle há ahá brégyíbré. Inu ibéha ahá ámu béda Bulu ipán, atɔ ámú mli lapútsun anísu há amú ámu su. ¹²Tsúfé atoku anyɔ ɔbédali tsu mli atɔ hahé ánífitɔ. Megyí atɔ ámú mli lapúhá Bulu ahá ámú atɔ de amú hián, bubu Yerusalem amu nkule, mboún ibéha ahá tsɔtsɔɔtsɔ béhie dá Bulu ipán. ¹³Tsúfé ní mléhá amú á, ibéha békanfú Bulu. Ibósuná ání lélé mlidé Kristo asun wankláán ámú mli lóhɔ amusu gyí, mlidé

awitɔle é wa há amúa aha bambá. ¹⁴Béhié káín mlisu, bó mpái há mli, tsú awitɔle kpɔnkpɔnti á múú Bulu lapúhá mli ámu sv. ¹⁵Adá Bulu ipán há mu atokiehé ánfɪ idun blí ánfɪ!

Paulo Gyumagihe Ɖɔ́le

10 ¹Ubu mútɔ́á mlitɔ́ aku mliteblí mlíaa, ní mbu mli wá á, mí asún lolwií, táme ntɔ́wánlín mí nwulú túmisu. Táme mí Paulo nde mli kokóli mbée, mlipúkɪ alá Kristo asún lolwií, ɔ́leba iwiasɪ. ²Mlitɔ́ aku budeblí beɛ, mí bwehé lalian ɔ́yítɔ́ ahá. Mú sv ní netrá ba unu á, nawun ání ilehián ání mí ansítɔ́ bówa ɔ́nlun. Kókoli, mli máha ampu tsiátɔ́ anfi odu ba unu. ³Ubu mútɔ́á yí ánfɪtɔ́ anibu, táme megyí yí anfitɔ́ agywun anidépukɔ́ isá. ⁴⁻⁵Megyí ɔ́yítɔ́ akɔ́tɔ́ anidépukɔ́. Bulu akɔ́tɔ́á ibu túmi anidépúbwíé okpikplikpa kugyíkuá itɔ́kúsú líí Bulusu. Anitɔ́púyíntá afunu asún kugyíkuá ahá butɔ́pútsú iwɪ, itehá amú butamabí Bulu. Anitɔ́púdámli agywun laláhe kugyíku, há itobú Kristo. ⁶Ní mli aha tráhe amu mlilapú iwɪ há Kristo, mlidé mu asúnsú gyí a, abébití ahá á múú bude asutɔ́-ɔ́nlun wa ámu é asu.

2 Ko

⁷Mliki ɔ́ɔ́kwali amúú ida mli ansítɔ́ ámu. Ní mlidékúá Kristo bú mli á, múmú mliki mú wankláán, amlibi ání mubú anɪ é. ⁸Ní nde iwɪ tsu túmi á múú anɪ Wíe lapúhá anɪ ámu sv dubɪ a, uma mí péli. Tsúfé ɔ́ɔ́pvhá anɪ ɔ́béɛ, apúbva mli amludan. Megyí ɔ́béɛ, apúyinta mli. ⁹Imábwe mli fé nde nwulú wanlín, púwá mli ifú. ¹⁰Tsúfé aku beɛ, “Mákpla Paulo. Mu asun wanlínhé bu odwin, ɔ́ɔ́púhíé ahá. Táme ní mu onutó ɔ́bu anɪ wá á, lolwií, mu asun blíhé é uma ibíá!” ¹¹Iwánkɪ ahá ámu ání asún ání anitɔ́wánlín sísí ahá kén anitɔ́bwé ní anibu amú wá ní.

¹²Lélé mú á, amendɪ anigyíá abópu iwɪ kápú ahá ánfɪ bude iwɪ kanfú ánfɪ? Amú wulewule dépu iwɪ kápú aba, bude ansí pudínká abasu. Mimlá igyi amú. ¹³Anɪ mú anumóotsu iwɪ dáfá, mboún ɔ́kpa á múú Bulu léhié há anɪ ámu ɔ́nɔ́ abótsu iwɪ fun. Múgyí agyúmá ání anilabwé bɔ́tu mli ní. ¹⁴Anilégyankpá pú Kristo asun wankláán ámu ba mli. Mú sv ní anidé mli asún bláa a, anumókútɔ́í dáfá.

¹⁵Anumédépu ɔhaa agyúamá é tsú iwɪ. Mboún anidé ɔkpa kí ání mli hógyi bédan. Agyúamá ámúbú anidéyɔ mlɩɩ ámu é ɩbékléí tsía. ¹⁶Múmú abétalí dáfá mlɩsu yéda asun wankláán ámu ɔkan ɔmá bámbá ésú, ménu ɩmɔɔbwe fé anɩlapú ɔtínéá ɔku lagyankpá yó agyúamá tsú iwɪ.

¹⁷Táme Bulu asun wanlínhé amu léblí ɔbéé, “ɔhagyíɔha ání ɔbéé, mótsu iwɪ á, ɔpúbú tsá anɩ Wíe labwé tsu iwɪ.”

¹⁸Tsúfé ní Bulu ɔkánfú fú gyí asún, iwɪ kanfú mú kpaali ígyi.

Paulo Mva Sumbí Ayɔpú Afunupu

11 ¹Mlɩnya klɩn, amlɩnu mí mimlála kpalobí ánfɩ asɩ! Kókoli, mlɩnya klɩn ha mɩ. ²Mmesi mli tswɩ fé alɩá Bulu tamasi mli tswɩ. Tsúfé mligyí fé obitebíá omeyín oyin, napú mli há oyin ɔkɩlé, ogyi Kristo. ³Táme alɩ ámúbú iwɔ ámu lópu mu alape mlé *Hawa amu á, ifú de mí ání ɔku ɔbémlé mli, mli ansí bédinkí ɔnɔkwaliwa pú ɔdwe wankíhé amúbú mliɩv ha Kristo amusu. ⁴Tsúfé nyin ání ní ɔku ɔbá beda Yesu bámbá ɔku iwɪ asún ɔkan súná mli, imegyí ɔmɩamúbú aniléda mu iwɪ asún ɔkan súná mli ámu a, mlókwási hogyi. Ní mlenyá ɔhé bámbá kvá una ɔtsan há múámúbú mlilégyankpá nyá ámu é á, mlóhɔ mú gyí. Alɩ kén ní mlonú asun bambá ání una ɔtsan há múámúbú anilébláa mli ámu é á, mlókwási hɔ músú gyí nɩ!

⁵Mmedéhógyiá ahá ánfɩ bude iwɪ tɩ “*Sumbí ayɔpú akpɔnkpɔntɩ” ánfɩ buɔɔn mɩ ɔkpa ɔkɩkusu. ⁶Ní mmeyín tɔí kúráá á, nyin asún ání ndeblí. Nahogyiá anulahá asún ánfɩɩ ɩlawánkí mli ɔkpagyíɔkpasu.

⁷Ínúá ɔɔpu iwɩasɩbá pú obú há mli bréá neda Bulu asun wankláán ámu ɔkan súná mli, mmɔhɔ mli tɔɩɩ su yéé tsitsa ɔɔbwe á? ⁸ɔpasua bámbá atɔ ɔɔswí, púbá ɔyɔ agyúamá há mli. Mú su netalí súm mli, mmɔhɔ mli tɔɩɩ nɩ. ⁹Bréá mbu mli wá, iwɪ leklí mí á, mmesi ipian tswɩ mlɩɩ ɔkɩkusu. Mboún apíó ámúbú botsu Makedonia ba amu léha mí mí atohiánhé. Ínɩ su mmesi ipian dínká mlɩɩ ɔkɩkusu, mméesi dínká é. ¹⁰Ínúá ɔnɔkwali nenyá ndeblí tsú Kristo

ɪwɪ mú á, ɔhaa méetalí ká mí itin ɔbéɛ, mmápu asún ánfɪ tsú ɪwɪ Akaia ɔsulúsu fée. ¹¹Ntogyi su? Ntamadwé mli lóó? Ekekeke! Bulu yin ání ntɔdwé mli!

¹²Nɔ́bwe mí agyúamá fé aliá nde mú bwe dodo. Nɔ́bwe mú pútɪn amú ɔkpa, ní bude ɪwɪ tsu beɛ, gyuma kule ania amúnɔ anidébwe. ¹³Afunupu bugyi. Bapina bwe ɪwɪ fé Kristo sumbí ayɔpú, buna bude mli mlé. ¹⁴Táme uma wánwan! Tsúfé ɔbunsám kúráá tekti ansí bwé ɪwɪ fé *Bulu-ɔɔɔpu wankíhé! ¹⁵Mú su uma wánwan ání mu asúmpú anfi é bapina bwe ɪwɪ fé yilé abwepú. Amú ɔnómɔ béle amú bwehé kugyíku ɔwan.

Paulo Asun Wunhe

¹⁶Ntráa nde mli bláa mbéɛ, ɔhaa mábu mí ɔha mimláhe. Táme ní mlidé mí bu ali óó á, mlitsu mú ali, mí é anya ɔkpa tsú ɪwɪ kpalobí. ¹⁷Ani Wíe tamatɔ́í ali, támɛ nabwé ɪwɪ fé ɔha mimláhe. ¹⁸Ahá tsɔtsɔtsɔ butotsú ɪwɪ fé ɔyítɔ́ ahá, su mí é nótɔsu ɪwɪ. ¹⁹Ee á, íniá mliaa atiansipu mligyí óó á, mltotsúlá há aha mimláhe. ²⁰Tsúfé ní ɔku ɔpú mli bwé nkpábi kúráá á, mltotsúlá. Ní ɔpú mli nyá ɪwɪ, ogyi iwíe mliɔ, obú mli tɔku odu, ɔdá mli ɪɔtɔ kúráá á, mltotsúlá há mu. ²¹Mlii mma ansítɔ́-ɔnlɪn. Ee, natsúlá. Mí klé ma unu.

Táme tógyítɔ́á ɔku labwé ɔdeputsú ɪwɪ á, mí é nétalí pú mí kle tsú ɪwɪ. (Táme nahogyi ání igyi mimlála.) ²²Ní beɛ *Hebrifɔ búgyi á, mí é Hebriyin ngyi. Ní Israelfɔ é bugyi á, Israelyin mí é ngyi. Ní beɛ botsú *Abraham abí-anátɔ́ a, unu mí é notsú ní. ²³Beɛ Kristo asúmpú bugyi? Mblí mú mimlásu, ndun amú! Nayírɪ ɪwɪ yɔ́ agyúamá dun amú. Nadí obu dun amú. Badá mí dun amú. Nesian wu bré tsɔtsɔtsɔtsɔ. ²⁴Yudafɔ banwén mí mpli tsé advasa-kwebá (39) tse nu kéké. ²⁵Romafɔ é bapítí mí atɔ́ tse sa kéké. Beda mí abwi ɔsáwule. Tse sa kéké ntsusu-yibi labun mi, nasin ntsutso ekewóle owítɔ́. ²⁶Mí ɔkpa tsɔtsɔtsɔ tutɔ́ á, nafá ntsu akpɔnkpɔntɪ, natsun ogyo atswapú ɪbɪtɔ́ dáli. Natsun ɔmá bámbásúfɔ pú anɪ pi Yudafɔ fée ɪbɪtɔ́ dáli. Natsun awúlusu pú adimbísú, nafá ɔpu. Natsun ahá ámúbú bude amú ɪwɪ ti beɛ, Akristofɔ ámu aná fée ɪbɪtɔ́ dáli. ²⁷Nayɔ́



Bɔpu Paulo wá lakpátɔ, lé mu tson ikwito, kplí mu yi buntii ání bɔpwe wá wúlu amu ɔma. (2 Korintofɔ 11:33)

agyómá kpéklé, ulapián mí kɪ. Ntamadídi nkekú. Ntetsiá akún mɔ́a ɔmewóli, nteklí ɔ́ɔ, ntedí atsalɪ, nátí yayá aná fée. ²⁸Ínu fée ɔma a, tɔ́a ɪdɪn mí klɪnsɪ, ntɔgywɪn mú ɪwɪ ekekegyíeke gyí ɔpasua ámu fée aléwa. ²⁹Ma lópɔn, mmotsu kuku lé mu asúntɔ́? Ma bekpá wá lakpantɔ, umɔwa mí ɔ́blɔ́.

³⁰Ní beɛ ntsú ɪwɪ á, ntobíá itehá mí hógyi tɛba asɪ nɔ́pɪtsú ɪwɪ. ³¹Bulu, ogyí anɪ Wíe Yesu mu Sɪ, ɔ́lekanáa kanfú bré féétɔ́ ámu yin ání mmedé afunu wa. ³²Owíe dehen Areta léha mu ɔ́má́sú ɔ́kípɪ léyete mi Damasko wúlu ɔ́ɔ, ɔ́kita mí. ³³Táme bɔpu mí wá lakpátɔ, lé mí tson ikwito, kplí mí yi buntii ání bɔpwe wá wúlu amu ɔma, nesrí sí mu.

Paulo Atowunhe Pú Mu Atɔ Lesúnáhé

12 ¹Ilehíán ání nótsu ɪwɪ, táme tɔ́tɔ́tɔ́ ɪma ɪwɪtsútɔ́. Táme mbli atɔ́a nowun pú tɔ́a anɪ Wíe lalé súná

mí. ²Nfí dúana (14) ní, bɔwan mi ya ɔsúsú saasɔ. (Mí nyankpusa-oyí lɔyɔ unu o, mí ɔkláa o, mméetalí bí. Bulu nkule yín.) ³⁻⁴Fé alá nakúblí á, bɔwan mi ya *Paradiso. (Mí nyankpusa-oyí lɔyɔ unu o, mí ɔkláa o, mméetalí bí. Bulu nkule yín.) Nonu asún ání uma blítɔ, ɔhaa é má ɔkpa blí mú. ⁵Nétalí pú itɔ ámúbú nowun amu tsú iwɪ, táme mmóɔpu mí atɔ bwehé tsú iwɪ. Ntobíá itehá mí ɔwunlín ɔnɔ teba asɪ ntɔpútsú iwɪ. ⁶Ní mbée nótsu iwɪ kúrää á, mmóotsu iwɪ fé ɔha mimláhe, tsúfé néblí ɔnɔkwali. Táme mmóɔbwe. Mmedékléá ɔhaa ɔkú mi dafa alá mí tsiátɔ gyí, ntée asún ámúbú nɔpɔba amu.

⁷Alá mmóɔpu ntobí ánfɪ ibɔ ifú, ibɔ wánwan, Bulu lalé súná mí ánfɪ tsú iwɪ sɔ á, ɔɔpu owu ku wá mí awútɔ, igyi Ɖbunsám-ɔɔpu. Itedá wɔ mí, ménɪ mmóotsu iwɪ. ⁸Nakókóli anɪ Wíe Yesu tse sa kéké mbée, ɔlé itɔ ámu mítɔ. ⁹Táme asún ání ɔtebláa mi brégyíbré gyí, “Mí awɔtɔle pé gyí tɔá fehián. Tsúfé ɔhá ání mu ɔwunlín ɔnɔ laba asɔ mí túmi tehié lun ɔwan.” Ínɪ sɔ ibɔ mi ansigyí ání nɔpu tɔá itehá mí ɔwunlín ɔnɔ teba asɪ tsú iwɪ, ménɪ Kristo túmi ámu íbéhɪe bun misɔ. ¹⁰Kristo sɔ ansí bégyi mi brégyíbré. Ní mí ɔwunlín ɔnɔ íba asɪ, budé mí sia, mbu ikplántɔ, budɪn mísú, ntée iwɪ de mí ɔsɪn, tsúfé ní mí ɔwunlín ɔnɔ íba asɪ á, mú ntelányá ɔwunlín ní.

Korinto Ɖpasua Iwɪ Asún

¹¹Nabwé iwɪ fé ɔha mimláhe, táme mlɪláhá ulaba alɪ. Tekɪ ílehíán ání mléblí asɪn wankláán tsú mí iwɪ. Tsúfé ibɔ mútɔá mmegyí tɔtɔ, táme ndun “sumbí ayɔpú akpɔnkpɔntɪ” ánfɪ mú. ¹²Bréá mbu mlɪ wá á, notomi bwé tɔá ibɔ wánwan pú osúna múa ofúla ɔtsan-ɔtsan, púsúná mlɪ ání lélé sumbí ɔyɔpú ngyi. ¹³Ntɔ dé mlɪ háan? Tɔá nɔbwe mlɪtɔ, mmɔbwe ɔpasua bámbátɔ gyí, mmesi iwɪ tswɪ mlɪsɔ. Kókoli, mlɪsikie mí!

¹⁴Séi á, otse saasɪ ndebweá néba mlɪ wá á. Mméeba besi iwɪ tswɪ mlɪsɔ, tsúfé mmedé tɔtɔ futé tsú mlɪ wá. Mlɪ onutɔ ndehíán. Kebi tamatsú mu sɪ wá akɔnkɔ, mu sɪ tótsú mu wá

akonko. ¹⁵Ubu mi ɔdweá néyintá tógyítá mbu mli su, sí mí iwí fée kúráá há mli. Ínǎá nde mli dwe dubi alí á, ntogyi su ɔdweá mli mú mlibu há mísú dedinkí?

¹⁶Fíali mlilawun ání lélé, mmeba besi iwí tswi mli su, táme mlidéblí mli aa, nofwifwí ansí. Ndepu ató tsun mli omuá wá mli ɔnɔ. ¹⁷Ɔkpa ɔmɔmsu? Nɔtsun ahá ámbú nɔwa mli wá ámbu ɔkusú sísi mli lóó? ¹⁸Bréá nokokóli Tito, nɔwa mua aní pío Okristoyin amu mli wá mé, olebesisí mli? Ekekeke! Tsúfé agywun kule mía mnyo anidépúbwé toku kule.

¹⁹Fíali mlidé mú tsu bré ánfito fée mli aa, anidétóí púká iwí lé. Megyí alí ígyi. Akristofɔ anígyí, anidétóí Bulu ansító. Mí adwepú, anidé tógyító bwe púwá mli ɔwonlín. ²⁰Tsúfé ifú de mí ání néba mlumésíe wankláán. Mú su mí asun blíhé bɔwɔ mli asu. Fíali nɔbɔtu utré, ɔnsupe, ɔbló, olu, ahásia, ahá iwí asúnblí, iwítsú pú abasuda mlito. ²¹Nhíé nde ifú nya ání ní nebá unu á, mí Bulu ɔbétrá ba mi así mli su. Nósu, tsúfé mlito aku mlumókúsí mli lakpan dada amu bwe, dámlí kluntó sí mbuató, hakpanla pú ɔwólí laláhe amu.

Uklá Pú Ɔláda

13 ¹Otse saasi nebá mli wá á. Bulu asún leblí ɔbéé, “Asa mléha ɔku ipón á, mlunu adansífo abanyó ntée abasá ɔnɔ.” ²Bréá neba mli wá otse nyɔɔsi a, neda ahá ámbú bude lakpan bwe ámu fée ɔlá. Ntráa nde amú aha tráhe fée ɔlá da, tsúfé ní nebá unu á, néhe bití amú isu. ³Tsúfé mlidékléa mlébi ání lélé Kristo détoí tsun misu. Kristo ɔwonlín ɔnɔ mɔkúba así mlito. Mu túmi é ihíé tso mlito. ⁴Ubu mútá mu *oyikpalíhesu lowu ilosuná ání alapɔn, táme séi á, otsie nkpa Bulu túmito. Bréá ania mnyo anilóbwe kule a, anilɔpɔn, táme séi ania mnyo anutsie nkpa Bulu túmito. Mú anidépukpá mli ní.

⁵Mlyo mli nwuntó ki bee, ahógyipu onutó mlygyí? Mlukapu mli iwí ki bee, lélé Kristo Yesu bu mlito? Mlilawun ání ɔbu mlito? Ní mlumókúwun mu mlito mú á, múmú megyí ahógyipu onutó mlygyí. ⁶Nahogyiá mléba bebi ání

Kristo ahogyipu onutó angyí. ⁷Anidé Bulu kokóli aniaa, mlumátrá bwe lalahe koku. Megyí aliá ibósuná ání angyí Kristo ahogyipu onutó sv. Táme ní ahá budekú bee megyí Kristo ahogyipu onutó angyí ó á, ɔhá mli mú amlubwe t́á ida ɔkpa. ⁸Tsúfé aní mú anuméetalí kúsú líí ɔɔkwali asún ámusu, dun ání abéha mú ibóyɔ nkpá wule. ⁹Ní aní mú aní ɔwunlín ɔɔ́ laba asi, mli klé ulawá ɔnlun á, ansí bégyi aní. T́á anidé Bulu kulí gyí, ɔhá amlilalu kínkíínkín, amludan Kristo hógyitɔ. ¹⁰Íni sù nagyankpá nde ɔwulú ánfu wanlín sísí mli, asa amba unv ní. Méni ní nebá á, mmóobotsu ibi mli. Tsúfé ndekléá nɔpu túmi ámúú aní Wíe lapóhá mí ámu búa mli amludan. Mmóɔpuyíntá mli.

¹¹Apíó, itráhe a, ansí igyí mli. Mliɔ mbódí amlulu kínkíínkín, amludan Kristo hógyitɔ. Mliwa aba ɔwunlín. Mli agywun ibwé kule, amltsia iwilwiitɔ, méni Bulu ámúú ɔɔɔdwé aní, ɔtehá aní iwilwii amu obétsiá mlitɔ bré féé. Nehá mli itsiá gyágyáágyá.

¹²Mliha aba itsiá, amlilata aba puta ɔdwesu.

Bulu ahá ámúú bubu nfi ámu féé behá mli itsiá gyágyáágyá.

¹³Aní Wíe Yesu Kristo bualegyí, Bulu ɔdwe pú ɔhe Wankíhé kulebwe itsiá mli féésú.

Ɔwulúá Paulo Lówanlín Sísí Galatiafɔ

1 ¹Mí *sumbí ɔɔɔpó Paulo dé ɔwulú ánfɔ wanlín. Megyí anyánkɔpósa ntée ɔhaa lówa mí. Yesu Kristo mva anɔ Sí Bulu ámbú ɔɔkɔsúa mu tsú afúlitɔ ámu lówa mí. ²Nde mú wanlín sísí ɔpasua ání ɔbu Galatia ɔsulósu fée. Mía Akristofɔá bubu nfi fée anidé mli itsiá ha anɔ,

³“Anɔ Sí Bulu mva anɔ Wíe Yesu Kristo bugyí mli buale, abuha mli iwilwii.”

⁴Yesu anfi lési ɔwɔ há bɔmɔ mu anɔ lakpan su, méni ɔbéle anɔ tsú ɔyí laláhe anfitɔ; fé alɔ ámbú anɔ Sí Bulu léhie yáí ámu. ⁵Akánfu Bulu bré fée. *Amen!

Asun Wankláán Kuku Má Inɔ Ɔma

⁶Mli Galatiafɔ, mli ɔwɔ lawá mí ifú ání mlɔlawúna yinkí Bulu ɔma. Bulu lótsɔn Kristo awɔtɔlesu tí mli ɔbéé, mlɔbɔbwe mu ahá. Mliki alɔ mlɔlawúna mlidé asun bambá hɔ mliaa, múgyí *asun wankláán ámu. ⁷Táme ɔna ɔtsan há asun wankláán ámu. Aha akɔ dékléá béyintá mli agywun, abutse Kristo asun wankláán ámu. ⁸Táme ní anɔ, ntée *Bulu-ɔɔɔpɔ ɔku kúráá lótsu ɔsúsú bá, beda asun wankláán bambá ku ɔkan súná mli, ɔna ɔtsan há mú ámbú anulébláa mli ámu a, Bulu ɔlwí mu. ⁹Nakú blí asún ánfɔ, támé ntráa nde mli bláa mbée, ní ɔku ɔbá beda Bulu asun wankláán bambá ku ɔkan súná mli, ɔna ɔtsan há mú ámbú anulébláa mli ámu a, Bulu ɔlwí mu.

¹⁰Megyí bée, ndekléá ahá budwée mí. Ó-o! Bulu mboún ndekléá ɔdwée mí. Ní ntráa ndekléá ahá budwée mí á, teku mmegyí Kristo osúmbi.

Paulo Sumbí Ɔyɔpú Bwe

¹¹Mí apíó, ndekléá iwánkɩ mlɩ ání Bulu asun wankláán ámúú nde mú ɔkan da ámu imotsú nyankpusa agywuntɔ.

¹²Megyí ɔhaa wá notsúá mú, ntée ɔku lósuná mí. Yesu Kristo onutó léle mú súná mí.

¹³Tsúfé mlɩlanú mí tsiátɔ asún, alíá ngyi bréá mbuo *Yudafɔ-osum ámu, pú alíá nehie dínká Bulu ɔpasua ámu, nɔɔ mbódíá néhu amú féé. ¹⁴Nɔhɔ gyankpa mí abato Yudafɔ-osum ámutɔ, pú alíá nɔwa nsi gyi mí anáin amándíé kugyíkusu.

¹⁵Táme Bulu lówa awɩtɔle há mí. Ɖlele mí yáí tsú bréá mbu mí yín iwɩtɔ, ɔletɩ mí ɔbéé, nyɔ mu agyómá. ¹⁶Ɖlele mu Bi ámu súná mí, méni néda mu iwɩ asun wankláán ɔkan ahá ání bumegyí Yudafɔtɔ. Mmɔyɔ ɔhaa wá mbée, osúna mí asún alɩ bré ámutɔ. ¹⁷Mmɔyɔ Yerusalem mbée, noyówun Kristo sumbí ayɔpú ámúú bubu unu asa neba amu é. Mboún nenatí laa yɔ Arabia ɔsulúsu, neyinkí ba Damasko wúlutɔ. ¹⁸Yesu léle iwɩ súná mí, mú ofi-saasɩtɔ á, nɔyɔ Yerusalem yówun sumbí ɔyɔpú Kefa ání butetráa tɩ mu Petro, netsiá mu wá nke dúanu (15). ¹⁹Mmetrá wun sumbí ɔyɔpú ɔkuku dɩn anɩ Wíe Yesu mu gyama Yakobo.

²⁰Ɖɔkwali asún ndewanlín sísí mlɩ. Bulu yin ání mmedé afunu wa.

²¹Mú ɔma a, nɔyɔ Siria pú Kilikia ɔsulúsu. ²²Alɩ bré ámutɔ á, Akristofɔ ɔpasua ámúú ibubu Yudea ɔsulúsu ámu bumɔkúnýá bí mí. ²³Múá budenu tsú mí iwɩ féé gyí, ahá budebli beé, “Oyin ámúú ɔdun anɩsu ámu ná ɔde hógyi amúú anɩdé mú asún blí, ɔde anɩ itin ka ámu kén ɔkan da.” ²⁴ɩna mí su bekanfú Bulu.

Paulo Mva Sumbí Ayɔpú Atráhe Amu

2 ¹Nfí dúana ɔma a, mía Barnaba anlékpa Tito buo iwɩ, yínkí yɔ Yerusalem. ²Bulu léle súná mí ání nyɔ unu, sú nɔyɔ. Alíá mí agyómá mɔɔbwe kpaali su á, negyankpá lé asúntɔ súná ɔpasua ahande amu nkule utsétɔ. Nebláa amú

*asun wankláán á múú nna nde mú ɔkan da ahá ání bomegyí *Yudafɔɔ ámu. Botsulá dínká mósú. ³Ibu mótɔ́ ání Griikiyin Tito amúú anlékpa buo iwí ámu gyí, táme bomehɛ mu beɛ, ɔ́tín *keté. ⁴Ibu mótɔ́á Akristofɔ́ afunupu akvá beki ansí bowie anitɔ́ bekleá ɔ́tín keté. Tsúfé bodunká ání béyintá iwíutsiá amúú Kristo Yesu lahá aní ámu; abubwe aní amlí nkpábi ha Yudafɔ́ mbla ámu. ⁵Táme anumési iwí há amú kpalobí kóráá, méni ɔ́nɔkwálá ibú asun wankláán ámutɔ́ iméetse ha mlí.

⁶Ɔpasua ahande amúú bubu inu ámu bomebláa mi asvansu beɛ, mpútsia asún wankláán á múú ndeblí ámutɔ́. (Ínɔ́á nde amú tí ahande kóráá á, megyí beɛ, amú hande amu ibú mi labi, tsúfé Bulu mú tamakí ɔ́haa ansítɔ́.) ⁷Táme ahande amu bowun ání Bulu lópu asun wankláán ámu há mí ɔ́béɛ, ndáa mú ɔkan ahá ání bomegyí Yudafɔɔ,^a fé alíá ɔ́ɔpuhá Petro é ɔ́béɛ, ɔ́dáa mú ɔkan Yudafɔɔ. ⁸Tsúfé Bulu léha Kefa ání butetráa tí mu Petro túmi, ogyi mu *sumbí ɔ́yɔpú Yudafɔɔ. Mu kén láhá mí túmi, ngyi mu sumbí ɔ́yɔpú ahá ání bomegyí Yudafɔɔ é ní. ⁹Ibu á, ilwankí Yakobo mu Petro pú Yohane amúú buhíé bugyi ɔpasua ámu ɔtan ámu ání Bulu lápú alí agyómá ánfí kíé mí. Mú su ɔ́bwa mía Barnaba ibí, púsúná ání anílabwé kule. Botsulá ání mía Barnaba ayɔ́ agyómá ahá ání bomegyí Yudafɔɔ, amú é abuyɔ́ agyómá Yudafɔɔ. ¹⁰Múá bodunká tsú aní wá gyí, akáin amúú ahá ání buma tɔ́ɔsu. Mú kén gyí tɔ́á ndekléá nóbwe é ní.

Paulo Iynwa Wá Petro

¹¹Táme bréá Petro léba Antiokia wúlutɔ́ á, nɔ́wa iyun wá mu ahá ansítɔ́, tsúfé tɔ́á ɔ́ɔbwe itépi ma ale. ¹²Bréá ɔ́leba a, mu ahógyipuá bomegyí Yudafɔ́ butɔ́wá ibí gyi atɔ́, táme Yudafɔ́ aku benya tsú Yakobo wá ba pé, ɔ́lebutí iwí lé ahá ámutɔ́, tsúfé ɔ́de ahógyipu amúú beɛ butín keté ámu ifú nya. ¹³Ínɔ́á ndeblí á, Yudafɔ́ atráhe amu é bubuo Petro apinabwebí ánfí. Barnaba óó léyinkí yɔ́ obuo amú. ¹⁴Nowun

^a 2:7 Ahá ání bomegyí Yudafɔ́ támatun keté. Yudafɔ́ gyí keté atínpu.

ání amú bwehé ámu umekanáa ɔɔkwaliá ibu asun wankláán ámutɔ. Mú su nebláa Petro ahá ámu féé ansító mbéé, “Petro, Yudayin fugyi, táme fumedé Yudafo amándíésú gyí. Ɖmátófo amándíésú fudegyí. Ntogyi sù fude ahá ámúú bumegyí Yudafo ámu hie féé, bubwée Yudafo amándíé ání fakíná?”

Hógyisú Bulu Tɔtsun

Hɔ Yudafo Pú Ɖmá Bámbásúfo Nkpa

15Yudafo lókwú mía funyɔ. Megyí ahá ámúú bumegyí Yudafo, bumeyín Bulu mbla ámutɔ atsú. 16Táme aní Yudafo Akristofo ámu mú anyin ání megyí Mose mbla ámusu gyí su Bulu totsú ɔha ání mu asún da ɔkpa mu ansító, nkéti Yesu Kristo hógyi. Mú su anilahɔ mu gyi, méni Bulu ɔbótsun mu hógyi amusu há aní asu ní. Tsúfé ní mbla ámusu gyí su mú á, teki ɔhaa méegyí asu Bulu ansító. 17Anidédunká ání Bulu ɔtsúun aní Kristo hógyisu, otsu aní ání aní asún da ɔkpa mu ansító. Táme ní Yudafo aku bude aní mboún kú lakpan abwepú á, múmú imosuná ání asukpan Kristo dé aní suná a? Ekekekeke! 18Ní nakíná Mose mbla ámu, láyó nde músú gyí a, múmú ilosuná ání itɔ laláhe nɔyɔ ndebwe á. 19Tsúfé Mose mbla ámu ilosuná ání nawú. Uleha negyi iwɪ, méni nétsiá nkpa pɔpwe há Bulu. Míá Kristonyɔ beda mántá *oyikpalíhesu ɔhétó. 20Mú su ntsie nkpa séi, táme megyí mí onutó tsie nkpa ɔsolúv anfisv. Kristo, ogyi Bulu mu Bi ámu tsie mitɔ. Múlódwe mí, bowu há mí. Mu hógyi sù ntsie nkpa. 21Mú su mmedé Bulu awitɔle amu kiná. Tsúfé ní Mose mbla ámu sù ɔha obégyi asu Bulu ansító á, múmú kpaali Kristo lówu!

Mbla Ámusu Gyí Ntée Kristo Hógyi

3 1Óo Galatiafo aha mimláhe! Ma lálé mli ansí alí? Megyí mli onutó ansító behie lé súná mli alíá beda Yesu Kristo mántá oyikpalíhesu, mós mu? 2Nfíte mli asun kua kulé. Mose Mbla ámusu gyí léha mlúnya *Ɖhe Wankíhé amu lóó, ntée *asun wankláán ámúú mlúlonu, mlúdé músú hógyi amu su? 3Aha mimláhe mlúókuku mlygyí alí á? Ínúá mlúópu Ɖhe

Wankíhé amu tsúa mli Kristotɔtsiá asu mé, mli onutó túmi mltaa mlɔpɔmɔ mú ɔnɔ nya? ⁴Kpaali sù mlulówun ipian ámu fée asun wankláán ámu su? Megyí kpaali su! ⁵Ntráa fite mli. Mli Mose mbla ámusu gyí sù Bulu lapú Ɖɛ Wankíhé ámu há mli, ɔde ofúla é bwe mlitɔ? Ekekeke! Alíá mlilónu asun wankláán ámu, hɔ mɔsú gyí sù ɔɔpɔhá mli.

⁶Mlɔpɔki anɔ náin *Abraham. Ibo Bulu asun wanlínhé amutɔ ání, “Abraham lóhɔ Bulu gyi. Mú su Bulu lótsu mu ání mu asún da ɔkpa.” ⁷Mú su ilehián ání mlébiá ahá ámú bɔhɔ Bulu gyi amu gyí Abraham abí onutó ní. ⁸Bulu asun wanlínhé amu léblí yáí ání Bulu ɔbɔtsun ahá ámú bumegyí Yudaɔ ámu hógyisu, tsú amú ání amú asún da ɔkpa. Íni sù Bulu lébláa Abraham asun wankláán ámu dodoodo ɔbé, “Fɔsú nɔtsun yulá ɔsolúsu ahá fée.” ⁹Abraham lóhɔ Bulu gyi. Mú su Bulu lóyulá mu. Mú su séi ání á, Bulu ɔbɔpɔ oyúla amú ɔɔpɔyúlá Abraham amu yúlá ahá ání baho Kristo gyi.

¹⁰Táme ulwú dun ahá ání amú ansí dun Mose mbla ámusu gyísu. Tsúfé bɔwanlín wá Bulu asún ámutɔ bɛɛ, “Bulu lalwí ɔhagyíɔha ání omegyí mbla ámú bɔwanlín wá Bulu mbla ɔwolúts ámu féesú.” ¹¹Séi á, Iawánkí ání ɔhaa má unvá mu mbla ámusu gyí su Bulu obótsu mu ání mu asún da ɔkpa. Tsúfé Bulu asun wanlínhé amu léblí ɔbé, “Ɖhá ání mu hógyi su Bulu latsú mu ání mu asún da ɔkpa obénya nkpa.” ¹²Mbla ámusu gyí mená hógyisu, táme Bulu asun wanlínhé amu léblí ɔbé, “Ɖhagyíɔha ání otegyi mbla ámusu ɔbɔtsun mɔsú nyá nkpa.”

¹³Táme anɔ sù Kristo lémlí ɔha Iwíhé bréá beda mu mántá oyikpalíhe amusu. Mú su ɔlele anɔ tsú ulwú ámú mbla ámu létí há anɔ ámu asu. Tsúfé Bulu asun wanlínhé ámu léblí ɔbé, “Ulwú dun ɔhagyíɔha ání beda mántá oyísú.” ¹⁴Kristo lówu, méni Bulu ɔbɔpɔ oyúla amú ɔlehɛ há Abraham amu kén yúlá ahá ání bumegyí Yudaɔ, méni abɔtsun anɔ Kristo Yesu hógyisu nyá Ɖɛ Wankíhé amú ɔlehɛ ámu.

Mbla Ámu Pó Bulu Nhíhé

¹⁵Mí apíó, mpɔv nde tsiátɔ asún kv flo asún ání ha mli. Alí ámú ɔha ɔdínká ibwi mu asúnsú ɔbé, ɔku ogyí mu atɔ,

ɔhaa má ɔkpa tse mú, ntée lé iku mótó ámu a, alí igyi ntam amú Bulu léka há Abraham amu é ní. ¹⁶Aní náin Abraham muv mu nanyɔ Bulu léka ntam há. Alí asún ánfɔ imosuná ání mu aná tsɔtsɔtsɔ, mboún mu na ɔkule pé. Mu na ámu gyí Kristo a. ¹⁷Asún ání ndeblí gyí, Bulu léka ntam há aní náin Abraham, ɔledinká ibwi músú púsúná ání obégyi músú. Mbla ámú ɔlɔwa há Mose ní lafana advasa (430) ɔma amu méetalí ká ntam amú ɔledinká ibwi músú ámu, ntée tse mú ekekeke. ¹⁸Tsúfé ní mbla ámusu gyí su ɔha ibi béda agyapadié ámú Bulu léhie yáí ámu a, múmú megyí hie Bulu léhie mú yáí Abraham. Táme ɔɔkwali amu gyí, kie ɔlɔpkié mu.

¹⁹Múmú labi mɔmu mbla ámu bu? Bulu lɔpu mú é mántá músú, méni ibósuná ahá tɔá lakpan gyí. Táme ɔlɔwa mbla ámu ání ibétsiá alu yɔfun bréá Abraham mu na ámu ɔbéba. Mvgyí mu atɔ ogyípú ní. ɔlɔpu mbla ámu há mu abɔpu ɔpu ɔɔwa Mose ibi. Múlɔbwe Bulu múa Israelfɔ nsuné ɔlapú ní. ²⁰Nsuné ɔlapú tamalí há ɔbakúle, táme ɔbakúle Bulu gyí.

Labiá Mbla Ámu Ibo

²¹Bulu mbla ámu ɔlɔkusú líí mu nhíhé ámú ɔlehie yáí ámusu? Ekekeke! Ní mbla ku ibétalí há aní nkpa ání utamatá á, teki abétalí gyí asu Bulu ansító, ní anilégyí músú. ²²Táme Bulu asun wanlínhé amu ɔleblí ání lakpan lagyi ɔyító ahá féésú plíplíplíplí. Mú su atɔ ámú Bulu léhie yáí ámu igyi Kristo ahógyipu klé.

²³Táme asa Yesu Kristo hógyi lébá ɔyító á, mbla ámu ɔleklí aní fé obu adípú. ɔhaa ménya mu iwɔ, ɔɔfun bréá Bulu lébele Kristo hógyi ɔwan. ²⁴Mú su mbla ámu lɔbwe anisu ɔkípu ɔɔfun bréá Kristo léba, méni Bulu obótsu aní ání aní asún da ɔkpa mu ansító, tsúun aní Kristo hógyisu. ²⁵Ínɔá Kristo hógyi laba su á, imehián ání mbla ámu ɔbétrá bwe anisu ɔkípu.

²⁶Tsúfé mli Kristo Yesu hógyi su mli féé mlɔlabwé Bulu abí. ²⁷Mli ahá ání mli Yesu Kristo mlɔlabwé kule tsun *asúbɔsu mlɔlatsú mu tsiátó féé. ²⁸Mú su Yudayin ntée Griikiyin trá ɔma unu. ɔkpábi ntée ɔdéhie, ɔtsi ntée oyin trá ɔma unu. Tsúfé mli féé mlɔlabwé kule mli Kristo Yesunyɔ

ukulebwetɔ. ²⁹Íniá mlɪlabwé Kristo klé su á, mlɪlabwé Abraham abí-aná onutó, pú mu ató agyípu. Íni su utó ámúú Bulu léhɛ yáí Abraham amu igyi mli klé.

4 ¹Mlyɔ asún ánfɪtɔ ki. Ní ɔha owú, sí mu agyapadiɛ yáí mu abí bréá bumɔkúdan a, bugyi fé nkpábi. lɔv mótóá amúbú amú sí ató féé, ²táme ilehián ání bēba iwɪasi há amúsú ɔkípu alu yófun nfi oduá amú sí lósuná ání buhɔ, asa abɔpu ató ámu wa amú ibɪtɔ. ³Alɪ anɪ é angyí asa Kristo léba ni. Anɪlóbwe nkpábi há ɔhé, ntée túmiá ide ɔyí ánfɪsu gyí. ⁴Táme bréá bré ámu onutó lɔfun a, Bulu lówa mu Bi sísí, ɔha tsihé lókwí mu wá mbla ámu asi. ⁵Bulu lówa mu ání ɔbá bɔhɔ anɪ ahá ámúú angyí nkpábi há Mose mbla ámu tsu nkpábitɔ, ménɪ ɔbóbwe anɪ mu abí onutó.

⁶Bulu lódunká ání obósuná ání mlɪlabwé mu abí. Mú sù ɔɔpu mu Bi ámu ɔhé wá anɪ uklɪntɔ ní. ɔhé ámu téhá antokpólí mu anɪaa, “Abba, mí Sí!” ní. ⁷Mú su opió, futráa fɔmegyí ɔkpábi, mboún Bulu mu bi. Íniá mu bi fugyi su á, mu ató féé igyi fú klé.

Galatiafɔ lwi Ipián

⁸Bréá mlɪmɔkúnýá bí Bulu á, mlɪlóbwe nkpábi há ikpiá bumegyí tɔtɔ. ⁹Táme séi mlɪlabí Bulu, ntée nébli mbée, alabí mli. Ntogyi sù mlɪdékléá mléyinkí yósum túmi ánfɪ uma labi kukukɔ? Ntogyi sù mlétrá yinkí yóbwe amú nkpábi fé bré ámu? ¹⁰Mlɪdé amándíé ku bwe nke kutɔ, tsra kutɔ, bré kutɔ pú nfi kutɔ. ¹¹Mli bwehé ánfɪ su ifú bu mutɔ. lde mí bwe fé ipian ámúú ndewúun mli su ámu féé ɪbóbwe kpaali.

¹²Mí apió, nokókóli mli, nabwé mí wɪ fé mli. Ntráa mma mbla kukɔ asi. Mú su mlɪtsia mí atsiábi. Megyí bɛe mbée, mlɪlapú lalahe kukɔ gyi mu, sù nde íni bí. ¹³Mlɪlakáín ání wɪ ma mí ɔnlɪn asa neba ɪwɪ beda Bulu *asun wankláán ámu ɔkan eke gyankpapu? ¹⁴Ísókí kpɔnkpɔntɪ mí ɪɔ ámu lóbwe há mli, táme mú óó á, mlɪmóbu mí tɔku. Mboún mlɪlóbwe mu fé Bulu-ɔbɔpu, ntée Kristo Yesu onutó kúráá. ¹⁵Ansí lehié gyi anɪ alɪ bré ámutɔ! Ntɔ lébá? Mí onutó nowun ání ní mlétalí á, tɛkɪ mlɪlólótí mli ansíbi wá mí alɪ

bré ámutɔ. Mú ntɔ dé mli séi? ¹⁶Alí ámutú nde mli ɔɔkwali bláa amu su namlí mli olupú?

¹⁷Ahá ámutú budekléá mligyí Yudafo mblasu ámu buma mli iwɪ agywun wankláán kuku. Tóá budeklé gyí bémain mli lé mísú, méni mlékle amú asún. ¹⁸Ibu aláá ahá bódunká ání mlidwée amú, agywun wankláán ɔkpasu. Megyí bréá mbu mli wá wule. ¹⁹Mí abí adwepú! Iwɪ trá ide mí ɔsun há mli, fé ɔtsíá ikwú de mu dwiín. Nkétɪ mlilanyá Kristo tsiátɔ mlɔɔ asa iwɪ bési mí ɔsun. ²⁰Ihíé de mí háan ha mli. Ní mí nkule su mú á, tekɪ mbu mli wá séi, méni nétse mí tótu.

Hagar Mva Sara Nfántóhún

²¹Nfíte mli ahá ámutú mlidékléá mlóbuo Mose mbla ámu. Mlumónu asún ání ɔleblí así? ²²Bɔwanlín wá Bulu asún ámutɔ beɛ, Abraham lókwú abi yinhé anyɔ. Ɔkule mu yin gyí ɔkpábi, onyɔɔsi mu yin gyí ɔdíhie. ²³Ɔkpábi amu lókwú mu bi keke, táme ɔdíhie ámu mú á, Bulu léhie mu yái ání méha mu obí asa ɔlɔkwú. ²⁴Mliha anu asún ánfɪ así tsun ɔkpa ánfɪsu. Atsi abanyó ánfɪ bulí há ntam anyɔ ání Bulu léka. *Hagar líí há Sinaibusu klé, tsúfé nkpábi mu abí bugyi. ²⁵Sinaibu ámu bu Arabia ɔmátɔ. Iíí há nde Yerusalem wúlu. Yerusalem pú mútɔ ahá féé bugyi nkpábi, Mbla ámu su. ²⁶*Sara mú gyí ɔdíhie, ɔlíí há ɔsúsú Yerusalem. Mvgyí anu yín ní. ²⁷Tsúfé Bulu asún wanlínhé amu léblí ɔbée,

“Ɔtsɪ mákwípú, nya ansigyí!

Ɔtsíá ikwú mɔkúdwíín mu kɪ, kplun, afusura okitikíti ansigyísú.

Tsúfé ɔtsɪ ámutú mu kulu lési mu tswɪ amu obénya abí tsɔtsɔɔtsɔ,

dun ɔmvamúbú mu kulu da mu wá ekekegyíeke ámu.”

²⁸Mí apíó, séi á, mlilabwé Bulu ahá tsun mu tóá ɔlehie yáísú; fé alá ɔlehie yái asa bɔkwú *Isak. ²⁹Alí bré ámutɔ á, obí ámutú bɔkwú mu keke, ogyi Ismael amu lédinká Isak amúbú bɔkwú mu *Ɔɲe Wankíhé túmitɔ ámusu. Alí kén igyi há anɪ nde ní. ³⁰Táme nkáli Bulu asun wanlínhé amu léblí?

Ɔbée, “Gya ɔkpábi amu mu bi, tsúfé megyí ɔkpábi mu bi ámu mu ɔdíhie mu bi ámu obégyi amú sí ató.” ³¹Mú su apíó, megyí ɔkpábi amu abí anígyí. Ɔdíhie ámu abí anígyí.

Mlɩkɩ Mlɩ Iwɩgyɩsu

5 ¹Ani iwɩgyí su Kristo lahá anlagyi iwɩ! Mú su mlɩlu kínkíínkín. Mlɩmátrá tsulá abubwe mlɩ nkɔpábi ha mbla ámu.

²Mlɩnu! Mí Paulo dé mlɩ bláa ání ní mlesí iwɩ há, betɩn mlɩ *keté a, ilosuná ání tó ámúú Kristo lóbwe ámu uma mlɩ labi kuku. ³Ntráa nde mlɩ ɔlá da mbée, ɔhagyíɔha ání ɔleha betɩn mu keté á, ilehián ání obégyi Mose mbla ámu féésú. ⁴Nde mlɩ bláa mbée, mlɩ ahá ámúú mlɩdé mbla ámu su gyí, méni Bulu obótsu mlɩ ání mlɩ asún da ɔkpa mu ansító ámu mlɩlamáin iwɩ lé Kristosu. Bulu awɩɔle amu ɩlatswɩ mlɩ pan. ⁵Ani mú aní ansí dɩn ání Bulu obótsu aní ání aní asún da ɔkpa mu ansító. ɩni gyí tóá anɩdé ɔkpa kíu tsɩn Ɖɣe Wankíhé amúú ɔde agyómá yɔ anɩɔ, tsɩn aní hógyisu ámu su ní. ⁶Tsúfé ní ania Kristo Yesu anígyí kule a, ketétɩn ntée ketémátɩn mehián. Múá idehián gyí anɩbu hógyiá itehá anɩɔdwé Bulu pú aní aba.

⁷Teki mlɩdé mbódí bɔ asa. Ma kóún latin mlɩ ɔkpa ɔbée, mlɩmátrá buo ɔnɔkwali amu? ⁸Megyí Bulu bwehé igyi, tsúfé muléle mlɩ. ⁹Mlɩkain ání bodobodotu-afá kpalobí téhá bodobodo amu féé itotú. ¹⁰Ani Wíe lahá nahogyi, ání mlɩmétrá hɔ ɔha bambá atosunáhé dɩn mí nkule klé. Bulu ɔbébutí ɔhá ámúú ɔde mlɩ agywun damlí ámu ɩsu.

¹¹Mí apíó, ní ntráa nde ɔkan da blí mbée, ilehián ání ahá butɩn keté á, mómú ntogyi sú Yudaɔ butráa budɩn mísú? Mómú ní nde Kristo oyikpalíhesu lowu ámu é ɔkan da á, yée ɔhaa méedɩnká mísú o. ¹²Mí su mú á, teki ahá ámúú bude mlɩ háan bɛɛ, ilehián ání mlétɩn keté ámu bawúna flo amú iwɩ.

¹³Mí apíó, Bulu léle mlɩ ɔbée, mlɩbégyi iwɩ. Táme mlɩmátsɩn mlɩ iwɩgyí amusu láyótsu mlɩ tsiátó dada amu. Mboún mlɩpu ɔdwe sum mlɩ aba, ¹⁴tsúfé Mose mbla ámu féé ɩlú mbla kule pé ámúú ɩdeblí ɔbée, “Dwe fú bá fé fú iwɩ.”

ámusu. ¹⁵Táme ní m̀lilabwé m̀li iwɪ fé mbwíkítá-atɔ, m̀lɪdé aba f̀nɪ, m̀lɪdé aba lalá a, múmú m̀lɪkɪ wankláán; ní megyí alɪ mléhu aba.

Tsiátó Dada Pó Dɛ́tɔ́ Atsiábi

¹⁶Mú su nde m̀li bláa mbéé, m̀liha Dɛ́ Wankíhé amu ɔkpa m̀li. Mú m̀mú m̀lɪmɔ́ɔbwe t́á m̀li tsiátó dada tekle. ¹⁷Tsúfé t́á anɪ tsiátó dada tekle ihíé na ɔtsan há t́á Dɛ́ Wankíhé amu tekle. T́á Dɛ́ Wankíhé amu tekle é ihíé na ɔtsan há t́á anɪ tsiátó dada tekle. Atoku anyɔ́ ánfɪ ɔ̀kɔ̀sú lú abasu, méni m̀lɪmɔ́ɔbwe t́á m̀lɪtekle. ¹⁸Ní Dɛ́ Wankíhé amu dé m̀li kpa á, múmú m̀lɪmá Mose mbla ámu asɪ.

¹⁹Tsiátó dada bwehé telɪn ɔwan. Múgyí; atsɪ múa ayin asúnwa, agywɪn laláhe bwe, ifintotsiá, ²⁰ɪkptswéé, afátópleí, olu, utré, fú nkule klé dunká, ɔ̀bɔ́kpán, ɔ̀nsɪpé, aba asimánú, iwɪmaín lé fú abasu, ²¹ɔ̀kabágyáa, ntábu, pléikpada pú múa ɪletan ɪnɪ aná. Mú aná iwɪ asún nde m̀li bláa, fé alá nebláa m̀li yaí. Mbéé, ahá ání butɔ́bwé ɪnɪ odu buméenya *Bulu iwíegyí ámutɔ́ agyapadié kuku.

²²Táme ní Dɛ́ Wankíhé amu dé anɪ kpa á, mú abi swiehé ání íbétsiá anɪtɔ́ gyí, ɔ̀dwe, ansigyí, iwɪlwii, uklunya, awɪtɔ́le, yilébwe, ɔ̀nɔ́kwali, ²³ɪlwií pú iwɪsɔ́gyí. Mbla kukukuku má unvá iletin alɪ ntobí ánfɪ ɔ̀kpa. ²⁴Ahá ání bɔgyi Kristo klé bamó amú tsiátó dada pú amú ɔ̀wɔ́lɪ laláhe Kristo Yesu oyikpalíhe amusu. ²⁵Dɛ́ Wankíhé amu lahá anɪ nkpa ɔ̀pɔ́we. Mú su m̀liha agyi mu asúnsú. ²⁶Anímátsu iwɪ súná aba, ntéé wá aba ɔ̀bɔ́, ntéé pé ansí aba ató́sú.

Uku Tsu Lé Aba Asúntó

6 ¹Mí apíó, ní m̀lɪtɔ́ ɔ̀ku ɔ̀bwé lakpan ku á, m̀li ahá ámú Dɛ́ Wankíhé de m̀li kpa ámu m̀lɪnya klɔn tɔ́ kpla mu pɔ́tɔ́. Táme m̀lɪkɪ m̀li iwɪ wankláán, méni m̀li é m̀lɪmédɪda ɪsókɪ amu odutɔ́. ²Mlɪtsu ɪku le m̀li aba asúntó. Ní m̀lɪdé mú bwe alɪ á, m̀lɪdé Kristo mbla ámusu gyí nɪ. ³Ní ɔ̀ku dé mu iwɪ kí ɔ̀béé m̀ɔ́fun tógyítótót, táme omegyí tɔ́tɔ́ a, ɔ̀de mu iwɪ mlé. ⁴M̀lɪkpa m̀li onutó tsiátó kɪ. Ní ɪbu alé

á, mómú mlétalí pú ibi sí kántó mli bwehé su, mlimóɔpu kápú ɔha bambá klé. ⁵Tsúfé anuto okugyíɔku ɔbósura mu onutó ato svráhé.

⁶Bulu asún ámu akasípú buyée ato wankláán ání bubu iku ha amú asunápú.

⁷Mlimámlé mli iwi. ɔhaa tamamlé Bulu. ɔhagyíɔha ɔbókpótí tsá olodu. ⁸Ní ɔku lódu tsiátó laláhe wá mu klunto á, lowu ɔbókpótí tsú mótó. Táme ní ɔleha ɔɔɔ Wankíhé amu lódu tsiátó wankláán wá mu klunto á, ɔbókpótí nkpa ání utamatá tsú mótó. ⁹Mú su yilébwe mákpɔn ani, tsúfé ní abato mowu ani á, abókpótí nkpa ání utamatá mú brétó. ¹⁰Mú su brégyíbréá anyá mú iwi ɔkpa á, mliha abwe yilé ha ɔhagyíɔha, títriu ani apíó ahógyipu.

Itsiáha Pú ɔláda

¹¹Mliki ato wanlínhé akpɔnkpɔntiá napú mí onutó ibi wánlín sísí mli! ¹²Ahá ámúú buededunká ání bégyi asu ahá ansító ámu líi mliɔ bɛɛ, mliháa abutun mli *keté ní. Megyí tɔtɔ sù bude íni bwe. Alá Yudafo buméedunká amúsú bɛɛ, budebli bɛɛ Kristo oyikpalíhesu lowu ámu pésú ɔha ɔbótsun nya nkpa. ¹³Keté atínpu amu onutó óó butamagyi Mose mbla ámusu. Táme budekléá mliún keté, méni bóptsú iwi súná amú aba ání bahá mliulatun keté. ¹⁴Mí mú á, imába mótó ání nótsu iwi ɔyí ánfito tɔtɔɔtɔsu, dun ani Wíe Yesu Kristo *oyikpalíhesu lowu ámu. Tsúfé mu lowu ámu su ɔyító tsiá utráa ma mí labi, mí é mma labi kuku há mú. ¹⁵Ketétún ntéé ketémátun megyí tɔtɔ. Múá idehián gyí ɔha obémlí ɔha pɔpwe. ¹⁶Iwilwii múa nwewúun utó ahá ámúú bude mbla ánfisu gyí amu, pú ahá ání bwhié bgyi Bulu ahá!^b

¹⁷Asa nékpa mí asún opulu á, mbláa mli. Mliɔ ɔhaa mátrá wa mí tó. Tsúfé mí iwi apiná ánfi idesuná ání Yesu ɔkpábi ngyi.

¹⁸Mí apíó, ani Wíe Yesu Kristo ogyíi mli buale. *Amen!

^b6:16 Ahá ání bwhié bgyi Bulu ahá gyí Israel pɔpwe amu ni.

Ɔwulúá Paulo Lówanlín Sísí Efesofó

Itsiáha

1 ¹Mí Paulo ání Bulu apé su nabwé Kristo Yesu *sumbí ɔyɔpó, dé ɔwulú ánfí wanlín sísí mli Bulu ahá ání mlahɔ Kristo Yesu gyi, mla monyɔ mlahbwé kule, mlibu Efeso wúlutɔ. Nde mli itsiá ha.

²Ani Sí Bulu mva ani Wíe Yesu Kristo bugyíi mli buale, abuha mli iwilwii.

Ɔsúsú Oyúla Ání Anbu Kristotɔ

Efe

³Mliha akanfu ani Wíe Yesu Kristo mu Si pú mu Bulu. Tsúfé tsun ania Kristonyɔ ikulebwetɔ á, alapú ɔhétɔ atɔ́a íbékpa ani féé yúlá ani tsú ɔsúsú. ⁴Asa Bulu lóbwe ɔyí á, ɔlele ani bwé mu kle tsun ania Kristonyɔ kulebwesu, ání abwée ahá ání amó iwí letin, ifin kuku má ani iwí mu ansítɔ.

⁵Ínɔ́á Bulu tɔdwé ani su á, ɔɔbwe agywun yáí ɔbée, mɔ́pu ani bwé mu abí tsun Yesu Kristosu. Inu gyí tɔ́a olekle, igyi mu apé ní. ⁶Mliha akanfu Bulu, mu awitɔle anfi ibu numnyam, ɔɔwa tsun mu Bi ɔdwepúsú há ani faan anfi su. ⁷Ɔɔpu mu Bi ámu obugya ká ani nwunsu ikɔ, sí ani lakpan kíé ani. Awitɔle anfi Bulu léhie wá há ani ánfí ibu ifú dɔbi. ⁸Mu nyánsa pú mu asún-asinu lalé mú féé ɔwan súná ani tsun ɔkpa tsɔtsɔwtsɔsu.

⁹Alahá anulabí mu asun ɔhainhé ání ɔlekiklí yáí dodoodo ɔbée, mɔ́bwe tsun Kristosu. ¹⁰Mu asun ɔhainhé amu gyí, ní bré ámu ifun a, mɔ́bwe mu atɔ bwehéá ibu ɔsú mɔ́a asi féé kule, púwá ani Wíe Kristo asi.

¹¹Bulu tehá mu nwuntɔ asún pú mu apé teba mótɔ brégyíbré. Mu onutó léle aní ɔbéé abwée mu abí tsun ania Kristonyɔ uklebwetɔ. Tsúfé alí ɔlobwe agywun yáí dodoodo ni. ¹²Ɔlele aní agyankpapu ámúú aní ansí dun Kristosu ámu ɔbéé, abékanfú mu numnyam.

¹³Alí ilegyi ha mli é ní. Bré ámúú mlílónu ɔnɔkwali asún, igyi *asun wankláán ámúú ulɔhɔ mli nkpa ámu, ho músú gyi ɔpá mlia Kristonyɔ mlílóbwe kule. Bulu lópu mu Ɔɣe Wankíhé amu hie mli nsu, púsúná ání mubú mli, fé alí ámúú ɔlehie yáí ɔbéé móbwe ámu. ¹⁴*Ɔɣe Wankíhé amu gyí ntswiasíá idesuná ání aní ibi béda agyapadie ámúú Bulu léla yáí há mu abí ámu ni. Idesuná ání alaká aní nwunsu ukɔ, púwá mu numnyam.

Paulo Mpái

¹⁵Mú alí su, tsú bréá nonu ání mlilahɔ aní Wíe Yesu gyi, pú alíá mlitɔdwé Bulu ahá féé á, ¹⁶mmɔkúsí Bulu ipán da mli nwunsu. Ní nde mpái bɔ á, ntekáín mli su. ¹⁷Ntokókólí aní Wíe Yesu Kristo Bulu, numnyam Ɔsí ámu mbée, ɔhá mu Ɔɣé ámu ɔha mli nyánsa. Ule mu ɔwan súná mli, méni mlébi mu wankláán. ¹⁸Ntokólí mu mbée, obwíi mli ansí, amliwun atɔ wankláán ámúú ɔbéé, mlibéki ɔkpa ha ámu, méni mlébi ání atɔ ámúú ɔlelayáí há mu ahá ámu ihíé bu bíá. ¹⁹Ɔhá amlibu ání mu túmi dun túmi kugyíku há aní ahógyipu. Mu túmi ánfu ɔma a, kuku má unu. ²⁰Mú kén ɔlele súná bréá ɔlɔkusúá Kristo tsú afúlitɔ, pú mu yéyáí mu gyɔpɔsu ɔsúsú unu ní. ²¹Lnú Kristo dé iwíe gyí awíe féé, túmi kugyíku, *ɔɣe laláhe pú ɔmásógyí túmi féésú ni. Mu dibia dun dibia kugyíkuvá ibu nu séi pú ɔyí ámúú ibéba amutɔ. ²²Bulu lópu tógyítɔ wá mu asi, ɔlɔpu mu bwé tógyítɔ nwun há mu ɔpasua. ²³Ɔpasua ámu gyí Kristo ɔyulúv. Kristo wá ɔpasua ámu tenyá túmi kugyíku tsú. Mutéhá tógyítɔ tɔwá alé yi ɔtínegyíɔtíne.

Tsú Nkpa Dadatɔ Ba Pópwetɔ

2 ¹Asa mlilémlí Akristofɔ á, asutɔ-ɔnlun móa lakpanbwe su mligyí ɔɣétɔ aha wuhé. ²Alí bré ámutɔ á, mlilétsiá

ɔmátɔ́fɔ atsiábi. Mlulóbuo *ɔɲe laláhe féé owíe ɔbunsám. Mɔgyí ɔɲe laláhe ání ide agyómá yɔ ahá ámúú butamabú Bulu ámúú ní. ³Lélé mú á, aní féé anlétsiá amú atsiábi, bwé lalaheá aní ɔwólú léklé. Anulóbuo tɔ́á aní ɔyulúú pú aní agywun létsiá súná aní. Tsiátɔ́ aní sù teki Bulu ɔbébití aní tsu fé aha atráhe ni.

⁴⁻⁵Táme ínía Bulu nwewúun itsɔ, ɔtehié dwé aní su á, ɔlotsun ania Kristonyɔ ukulebwesu há aní nkpa, bré ámúú anígyí aha wuhé Bulu ansítɔ́ aní lakpan su ámu. Mu awitɔ́le sù ɔlɔhɔ aní nkpa. ⁶Ania Kristo Yesunyɔ ukulebwe ání su Bulu lakúsúá ania munyɔ tsú lowutɔ́, alahá aní otsiákpá Kristo wá. Ania munyɔ abégyi iwíe ɔsúsú. ⁷Bulu léle mu awitɔ́le kpɔnkpɔɔnkpɔnti ání súná aní tsun Kristo Yesusu, méni ahá ání bétrá lɔn féé bówun ání mu awitɔ́le lomóní dɔn tógyítɔ́. ⁸Bulu awitɔ́le pú mli Kristo hógyisu Bulu lótsun hɔ mli nkpa. Íni motsú mli, Bulu atokiehé igyi. ⁹Megyí mli bwehé wankláán kuku su, méni mlitɔ́ ɔkuku mɔ́ɔpu ibi sí kántɔ́. ¹⁰Bulu lábwe aní alí ání anígyí. Alabwé aní aha ɔɔpwe tsun ania Kristo Yesunyɔ ukulebwesu, méni abóbwe yilé ání mu onutó ɔlela yáí há aní ɔbéé abwée.

Kristotɔ́ ukulebwe

¹¹Mú su mlíkain ání teki ɔmátɔ́fɔ mligyi. Bré ámu a, Yudafo butetí mli beɛ, “Ahá ání bumetun *keté,” bótetí amú iwí keté atínpu. (Táme ketétín amu ó á, nyankpusa ɔyulúsu pú ibi ɔnɔ́ atɔ́ igyi.) ¹²Mlúkain ání alí bré ámúú á, mliméyín Kristo. Afɔ́ mligyi. Mlimégyí Yudafo ɔkpagyíɔkpasu. Mlumá ogyíkpá Bulu nhíhé ámúú ɔleka mú iwí ntam há Yudafo ámúú. Múá idun kúráá á, mli ansí medín tɔ́ɔsu, mliméyín mu é. ¹³Táme séi á, mli Kristo Yesunyɔ mlilabwé kule. Íni su Kristo latsun mu obugya amúú ɔletséi wólí há ania mlunyɔ ámusu, kpá mli ahá ání teki mli bu ífɔ́ ání ba Bulu wá. ¹⁴Tsúfé Kristo onutó lapú iwílwii wá Yudafo pú ɔmá bámbásúfɔ nsúné, bwé aní afunka anyɔ ámu féé kule. Alalé olu ámúú ulɔbwe buntíi wá aní nsúné ámu. ¹⁵ɔleka Yudafo mbla pú amú amándíétɔ́, méni afunka anyɔ amú bóbwe

ɔpasua ɔɔpwe ikule mutɔ. Fówun mua amónyɔ bóbwe kule, iwilwii bétsiá amú nsuné. ¹⁶Ɔlotsun mu *oyikpalíhesu lowu ámusu lé olu lé amú nsuné. Oyikpalíhe amusu ɔlotsun tswi amúa Bulunyo ɔnɔ ntsu. ¹⁷Bréá Kristo lébá a, ɔleda Bulu iwilwii asún ámu ɔkan há ahá féé. Mli ɔmátɔfɔ ání mli Bulunyo nsuné bu ífɔ pú Yudafo ání amúa Bulunyo nsuné ma ífɔ féétɔ. ¹⁸Kristo su ɔkpa latíí há aní afunka anyo ámu féé. *Ɔɔɛ Wankíhé ámu su abétalí ba aní Sí Bulu ansítɔ.

¹⁹Íni su mlitráa mli mégyí afɔɔ. Mli Bulu ahá mlilabwé ikule, mli gyí Bulu wóyí abí. ²⁰Mli gyí fé obuá bayi. Yesu sumbí ayɔpú ámu pú Bulu ɔnɔsú atɔpú amu gyí mú nkpa bí. Kristo Yesu onutó gyí obu ámu ɔtan. ²¹Mu su obu ámu itsa aba hógyitɔ. Mutéhá mú itomóní bwé Bulu ɔtswékpa obu wankíhé. ²²Íniá mli Kristonyo mlilabwé ikule su á, ɔde mli Yudafo ámu pɔtsá abasu, ɔde obu ání Bulu obétsiá mútɔ ɔɔtɔ yíi.

Paulo Ɔmá Bámbásúfɔ Bulu Asún Bláa

3 ¹Mí Paulo nda obu Kristo Yesu *asun wankláán ámú nde ɔkan da mli ahá ání mli mégyí Yudafo ɔnɔ ámu su. ²Nyin ání mlilanú awitɔleá Bulu lówa há mí, pú agyómá ánfɔ wá mí íbɔtɔ ɔbéé, mbwéé, iwa labi ha mli. ³Bulu léle mu asun ɔnɔnhé ámú ɔlekíklí yaí ámu ɔwan súná mí. Mú nawánlín kútúklí á. ⁴Ní mlekla ɔwulú ánfɔ a, íbɔwankí mli ání nanú Kristo íwɔ asun ɔnɔnhé amu asi. ⁵Tsú ɔyí ɔpá á, Bulu múkúlé asun ɔnɔnhé anfi súná nyankpusa ɔkuku. Táme séi ánfɔ á, alabele mú ɔwan tsun mu Ɔɔɛ ámusu súná ahá ámú alalé, bɔgyi mu sumbí ayɔpú pú mu ɔnɔsú atɔpú wankíhé amu. ⁶Mu asun ɔnɔnhé amu gyí, Bulu layúlá ɔmá bámbásúfɔ é fé Yudafo, tsun mu asun wankláán ámusu. Amúa Yudafo bamlí ɔlepe ɔkuletɔ atɔ agyípú, alabwé amúa Yudafo kule. Mú su babwé ɔyulúv kule. Amú é bénya atɔ ámú Bulu léhie ání ɔbéha Yudafo tsun Kristo Yesusu ámu ku.

⁷Ína Bulu awitɔle pú mu túmisu ɔlɔbwe mí mu asun wankláán ámu osúmpú. ⁸Íbu mútɔá kebikusu ngyi Bulu

ahá féétɔ́. Táme Bulu lówa awitɔle há mí ɔbée, ndáa Kristo oyúla amúbú idun blí ámu iwɛ ɔkan ha ahá ání bumegyí Yudafɔ. ⁹Mulówa mí ɔbée, nháa anyánkɔ́sa féé abubu alíá ɔdepu mu asun ñáínhé amu yó agyómá. Mulóbwé ɔsú múa asi, ɔɔpu mu asún ánfɛ ñáín tsú ɔyí ɔpá. ¹⁰Ɔɔbwé mú alí, méni ɔbótsun mu ɔpasua ámusu lé mu nyánsa ɔtsan-ɔtsan súná ɔhe laláhe awíe pú atúmipúá bubu ɔtínéá bude iwíe gyí féé. ¹¹Íni gyí tóá Bulu léhuhíe yaí asa ɔlele ɔyí ní. Alahá mú ulaba mútɔ́ séi tsun aní Wíe Kristo Yesusu. ¹²Íniá anilahɔ mu gyí, ania munyɔ anilabwé ikule su á, abétalí wá klun yó mu ansítɔ́ faan, anumétrá nya ifú. ¹³Mú su nde ipa bwíí há mli mbée, mli máha abato iwu mli, iwɛɔsun ánfɛ ndewúun ha mli ánfɛ su, tsúfé ibówa labi há mli.

Kristo Ɔdwe

¹⁴Íni su mí akpawunu iyi asi, nde aní Sí ámu kokóli. ¹⁵Mutɔ́ abusuan kugyíkuá ibu ɔsú múa asi lelun tsu. ¹⁶Mubúú oyúla akɔ́nkɔ́ntɛ há mu abí. Mú su nde mu kokóli mbée, mu Ɔhé ámu ɔhíe wa mli ɔkláa ɔwunlín tsu mu oyúla kɔ́nkɔ́ntɛ atokiehé ámutɔ́, ¹⁷Kristo ɔtsun mli hógýisu tsia mli kluntɔ́ brégyíbré. Nde mu kulí mbée, ɔhá amlile nín yɔ ɔtótɔ́, Buludwe pú mli abadwetɔ́, amlilu kínkíínkín. ¹⁸Fówun mliá Bulu ahá atráhe mlétalí bí ání Kristo ɔdwe lehié móní, lehié téí, ihíe bu iswí, lehié fúá, lehié wíe ɔtótɔ́. ¹⁹Ntráa nde mu kokóli mbée, ɔhá amlibu Kristo ɔdwe amúbú nyankɔ́sa ɔkuku méetalí nú mú asi yi amu. Fówun mli tsiátɔ́ bóbwe fé Bulu klé.

²⁰Íniá Bulu túmi de agyómá yɔ anitɔ́ su á, ɔtetalí bwé atɔ́ há aní dun alíá anitɔ́kúlí mu, ntée anitosúsu. ²¹Íni su mliha akanfu Bulu. Anyánkɔ́sa ilíntɔ́ féé bukánfu mu atɔ́ akɔ́nkɔ́ntɛ amúbú ɔdebwe Kristo Yesu pú ɔpasua ámutɔ́ ámu su, tsú séi yófun bréá utamatá. *Amen!

Ania Kristonyɔ Uklebwe

4 ¹Íni su mí ánfɛ nda obu aní Wíe agyómá yɔ su ánfɛ nde ipa bwíí há mli mbée, mli tsía tsiátɔ́ oduá ulekanáa

alɔ́a Bulu léle mli ɔ́bée, mlibétsiá. ²Mliba iwiasɔ́, amlilwii. Mlunya klun ha aba, amludwe aba. ³Ɖɛ Wankíhé amu lahá mlibabwé kule. Mú su mlibo mbódí amlitsia iwilwiitɔ́, ménu ukulebwe ámu ibétsiá mlitɔ́ yó. ⁴Ɖyulúv kule iwɔ́ ntobí anɔ́ fée anɔ́yí. Ɖɛ Wankíhé kule pé bu unv. Alɔ́ kén Bulu léle anɔ́ fée ɔ́bée, abéki toku kule pé ɔ́kpa ní. ⁵Owíe ɔ́kule; hógyi kule; *asúbɔ́ kule. ⁶Bulu ɔ́kule. Mɔ́gyí anɔ́ fée Ɖsí. Mudé anɔ́ féesú gyí, ɔ́de agyúmá yɔ́ tsvn anɔ́ féesú, otsie anɔ́ féeótɔ́.

⁷Kristo lówa awitɔ́le ye atokiehé há anɔ́ fée ɔ́bée, apúyɔ́ mu agyúmá, ⁸fé alɔ́a ɔ́wanlín wá Bulu asún ámutɔ́ bɛɛ,

“Bréá ɔ́lɔ́yɔ́ ɔ́súsú á,
ɔ́lekpa ndoun buo iwɔ́,
kíe ahá ató.”

⁹Ní ɔ́wanlín wá Bulu asún ámutɔ́ bɛɛ, “Ɖlɔ́yɔ́ ɔ́súsú” á, idesuná ání Kristo légyankpá kplí wíe ɔ́sulútv. ¹⁰Múmú idesuná ání ɔ́há ámúv ɔ́lekplí wíe ɔ́sulútv ámu kén lóyɔ́ ɔ́súsú, ɔ́tínéá ulɔ́fúá dvn ni, ménu ɔ́bɔ́bulá ɔ́sú múa asɔ́ fée, há mú ufun. ¹¹Kristo onutó lóbwe anutɔ́ aku mu *sumbí ayɔ́pú. Aku Bulu ɔ́nɔ́sú atóipú. Aku mu *asun wankláán ámu ɔ́kan adapú. Aku é akpapú pú asunápú. ¹²Kristo léle amú alɔ́, ménu Bulu ahá bétalí yó mu agyúmá, púwá Kristo ɔ́yulúv ukule; ígyi mu ɔ́pasua ámu ɔ́wunlín, ¹³ménu anɔ́ fée abɔ́bwe kule hógyitɔ́, bí Bulu mu Bi ámu. Fówun abédan, fun ɔ́kpagyíɔ́kpasu fé Kristo. ¹⁴Íni su animéetrá bwe fé nyebíá ahá ání amú ɔ́nɔ́ bu ɔ́dwe bétalí pú amú atosunáhé pɔ́pwe kugyíku bemlé, fé alɔ́a ntsu tedá ɔ́klun ya ɔ́tínegyíɔ́tínéá ideklé. ¹⁵Mboún mliha abláa aba ɔ́nɔ́kwali asún ámu ɔ́dwetɔ́, ménu abédan tógyítótɔ́, bwé fé Kristo, ogyi ɔ́pasua ámu nwon. ¹⁶Ína musu ɔ́yulúv, ígyi ɔ́pasua ámu ɔ́tínegyíɔ́tíné itsa aba, ide aba wankláán. Ní nyankpusa-oyí iwɔ́ ntobí ámu fée ide mú agyúmá yɔ́ wankláán á, Kristo tehá mú itedan ɔ́dwetɔ́.

Nkpa Dada Múa Pópwe

¹⁷Mú su nde mli ɔ́lá da anɔ́ Wíe idátɔ́ mbée, mlimátrá tsiá fé ahá ání bumeyín Bulu. Itóá mɔ́ɔ́wa labi há amú iwɔ́ butɔ́gywín. ¹⁸Amú nwuntɔ́ lóklun. Mú su buma nkpa

ɔɔpwe amúú itsú Bulu wá ámu, tsúfé bumeyín tɔtɔ. Iklunto bu amú odwin. ¹⁹Lalahɛbwe tamawá amú péli, butekle hakpanla kugyíku bwe. Butɔbwe lalahɛ kugyíku, butamatálí kítá iwi.

²⁰Táme mli mú á, megyí tsiátɔ anfi odu mlulékasí tsú Kristo iwi. ²¹Nyin ání mlilanú Yesu iwi asón, basúná mli ɔɔɔkwaltá iwu mɔtɔ é. ²²Mú su mlisi mli tsiátɔ dada amúú mlulétsiá ámu. Mli ɔwólí lalahɛ lémlé mli alí bré ámɔtɔ, ulɛha mli tsiátɔ leyintá. ²³Mliha Bulu ɔbwe mli klɔn pú mli agywun ɔɔpwe. ²⁴Mlitsia tsiátɔ ɔɔpweá igyi Bulu atsiábi, mú iwi letin, una dínká ɔɔɔkwali ɔkpa ámɔsu.

²⁵Mú su mlitɔ okugyíɔku ɔmátrá wa afunu. ɔhagyíɔha ɔbláa mu ba Okristoyin ɔɔɔkwali. Tsúfé aní féé angyí nyankpusa-oyí ɔkɔle amu iwi atɔ. ²⁶ɔblɔ́ ɔkítá mli á, mlumáha mú iha amlibwe lakpan. Imátsiá mlitɔ yófun owi tahé. ²⁷Mlumátepí há ɔbunsám ɔkpa ɔmle mli, amlibwe lakpan. ²⁸Owikplu mátrá wi atɔ. ɔpúu mu iwu yɔ agyómá, méní obénya tɔku kpá mu iwi, nyá iku é há ahá ání buma kuku. ²⁹Mlumáha ason lalahɛ kuku idali tsu mli ɔnɔ. Mboún múá ibɔ́búá ɔha, ibɔ́bwe yilé, wá labi, wá mú anupú ɔwunlín. ³⁰Mlumábwe tɔ́a íbéhan ɔɔɔ Wankíhé amu. Tsúfé mu Bulu lɔpɔhiɛ mli nsu, púsúná ání mubú mli, mɔ́hɔ mli nkpa eke ámu ni. ³¹Mlilɛ ɔnsupekpan, olu pú ɔblɔ́kpán, utré, isia pú lakpan kugyíku agywun le mlitɔ. ³²Mboún mliwa awitɔle ha aba. Mliwun aba nwe, amlisi lakpan kie aba fé alí amúú Kristo su Bulu lési mli klé kíé mli ámu.

Akristofɔ Atsiábi

5 ¹Íniá Bulu abí ání ɔtehié dwé mlygyí su á, mlitsia mu atsiábi. ²Mliɔwe aba ɔkpagyíɔkpasu, fé alíá Kristo lɔɔwe aní, tsúlá ɔɔmɔ mu aní su. ɔlɔpɔ mu iwi bwé atɔ hahé pú afɔɔɔɔ-abɔtɔ́a iwu ɔfan fánfáánfán há Bulu, ilegyi mu ansí.

³Bulu latin mli iwi. Mú su mlumáwa atsi múa ayin asón, wá hakpan, ntée ɔnsípe. ⁴Mú ɔma a, uma aléá mléblí asón ání iwu péli pú múa uma anulé, ntée wá ɔplɔkpan. Mboún

mlɪda Bulu ipán brégyíbré. ⁵lwánkɪ mlɪ ání mbua ɔɔɔpú, ɔhakpan ntée ɔnsípe ɔwapú ɔkuku méenya ogyíkpa Kristo mba *Bulu iwíegyí ámutɔ. (Tsúfé ɔnsípe ɔwapú gyí fé ɔkpu ɔtswépu).

⁶Mlumáha ɔkpa ɔhaa ɔpúv asún ání uma labi kuku mlé mlɪ. Tsúfé tsiátɔ laláhe anfi odu sù Bulu tenyá ɔblɔ bíttí ahá ání bubu asutɔ-ɔnlun usv ní. ⁷Mú sv mlumápu amú gyi mba. ⁸Bré ámv a, oklúntɔ mltsie mlidé lakpan bwe, táme séi á, mla anɪ Wíenyɔ mlɪlabwé ukule. Mú sv mltsie wankitɔ. Ínu sv mlɪ tsiátɔ isúna ání mltsie wankitɔ. ⁹Tsúfé ɔhá ání ɔbu wankitɔ ɔɔbwé yilé. Mv asún da ɔkpa, ɔbu ɔɔkwali. ¹⁰Mú sv mlɔɔ mbódí amlɪkasɪ tɔ́á Bulu tekle. ¹¹Mlumágyi mba. Labi kuku uma mútɔ. Mboún mlɪle amú bwehé ɔwan. ¹²Íhíé bu pélu ání béblí ntobíá ahá butɔɔbwé ñáintɔ iwɪ asún kúráá. ¹³Táme ní itɔ wankíhé iwánkí wólí tɔ́á ibv oklúntɔsv á, itemlí itowunhe. ¹⁴Tsúfé atɔ wankíhé telé tógyítɔ ɔwan. Mú sù beblí bee,

“Ɖɔɔɔpú, tsinki.

Kusv tsu afúlitɔ,

Kristo ɔwankɪ wvli fúsú.” nɪ.

¹⁵Ínu sv mlɪkɪ mlɪ tsiátɔ wankláán. Mlumátsiá nkpa fé aha mimláhe, mboún mltsia fé atiansipu. ¹⁶Ní mlenyá bréá mlɔpɔbwé itɔ wankláán á, mlumáyintá mú. Tsúfé lalahébwe lamóní alɪ bré ánfítɔ. ¹⁷Mú sv mlumábwe mimlála. Mboún mlɔɔ mbódí amlɪbɪ tɔ́á anɪ Wíe tekle, amlɪbwe mú.

¹⁸Mlumánu ntá bú, tsúfé iteyíntá ɔha. Mboún mlɪha Ɖhé Wankíhé amv ɔbula mlɪ brégyíbré. ¹⁹Mlɪpu Bulu asún wá ulv, amlɪwa ulvá Ɖhe Wankíhé lɔpɔwá mlɪ klɔntɔ putɔɪ kpla aba; amlɪwa ulv é tsu mlɪ klɔntɔ kanfv anɪ Wíe. ²⁰Mlɪda anɪ Sí Bulu ipán tógyítɔ́tɔ́ brégyíbré, anɪ Wíe Yesu Kristo idátɔ.

Akristofɔ Akúlu Múa Aká Tsiátɔ

²¹Mlɪba iwɪasɪ ha aba fé alɪá mlɪteba iwɪasɪ há Kristo.

²²Ɖtsɪ, ba iwɪasɪ ha fú kúlu fé alɪá futɛba iwɪasɪ há Kristo. ²³Tsúfé okúlu bu túmi mv kasv, fé alɪá Kristo bu túmi ɔpasua ámusv. Ɖpasua ámv gyí mv ɔyulúv, Kristo

amu onutó gyí mú ɔlepú. ²⁴Alí á múú ɔpasua ámu teba iwiasí há Kristo amu a, alí kén ɔká é ɔbá iwiasí ha mu kulu tógyítótó ni.

²⁵Akúlu, mlidwe mli aká fé alí á múú Kristo lódwe ɔpasua ámu, tsúlá bɔmɔ mu mú su ámu. ²⁶Kristo lótsulá bɔmɔ mu pútín ɔpasua ámu iwí há Bulu. Olebie ɔpasua ámu ntsu, pú mu asún ámu gyúra mú iwí. ²⁷Omekleá ifin pú asvansu bétsiá ɔpasua ámu iwí, ntée mú ɔtunekv íbɔkpukpúú tiá, méni íbɔwa mu onutó ámu akíle fé obitebí, ɔbékpa mu ba mu iwí wá. ²⁸Alí kén lehián ání oyin ɔbódwe mu ka fé mu iwí ní. Oyin ání ɔtɔdwé mu ka tɔdwé mu onutó iwí. ²⁹Tsúfé ɔhaa tamalú mu iwí, bulá ɔtebúlá mu iwí, kí mu iwísv wankláán fé alíá Kristo é tɔbwé há ɔpasua ámu. ³⁰Tsúfé aní féé anígyí Kristo ɔyulúv iwí ntobí. ³¹Fé alíá bɔwanlín wá Bulu asún ámutɔ bee, “Íni su oyin ɔbénatí sí mu sí muv mu yin, yémantá mu kasv. Fówun amú abanyó ámu bɔbwe ɔyulúv kule” ni. ³²Ɔnɔkwali, Bulu asún ñaínhé anfitɔ bu odwin. Ndekú mbée, Kristo muv ɔpasua ámu iwí asún igyi. ³³Mli é mli asún igyi. Mú su ntráa nde mli bláa mbée, oyingyíoyin ɔdwée mu ka fé mu onutó iwí, ɔtsi é obu mu kulu.

Abí Múa Akwúpú

6 ¹Abí, mli aní Wíenyɔ mlílabwé kule. Mú su mlíbu mli akwúpú. Tsúfé múgyí tɔá ida ɔkpa ání mlóbwe ní. ²Íni gyí mbla ámutɔ gyankpapvá ɔlehie oyúla mántá músú ní. “Bu fú sí múa fú yín, ³méni íbɔwa alé há fú. Fówun fédan fulí nwun fú nkpa ánfítɔ.”

⁴Abí así, mlímátsiá wá mli abí ɔbló. Mboún mliyai amú, amlisuna amú ató alíá aní Wíe tekle.

Nkpábi Pú Amú Awíe

⁵Nkpábi, mlíbu mli awíe. Mlunya amú ifú, amlíbu amú tsu mli klontɔ fé alíá mlítobú Kristo. ⁶Mlímábwe yilé amú ansító alíá békánfú mli sv. Táme fé Kristo nkpábi a, mlíbwé ató tsu mli klontɔ fé alíá Bulu tekle. ⁷Mlíle iwítv yɔ agyúamá

ansigyísú ha amú, fé Kristo mlidé mú yɔ há, megyí nyankpusa. ⁸Mlidunka ansí ání aní Wíe ɔbéka ɔhagyíɔha ɔkɔ, ɔtɔ wankláán kugyíkuá ɔɔbwe sv. Ní ɔkpábi fugyi o, futsie fú iwɔsv o.

⁹Awíe, mli é mlíkita mli nkpábi wankláán, fé alíá nablí ɔɔtsun. Mlumábwe amú kpóunkpóun. Mlíkaun ání mliá amúnɔ féé owíe ámu bu ɔsúsú. Mu mú ɔtamakí ɔhaa ansítú.

Bulu Akɔtɔ

¹⁰Mí asún tráhe-tráhe gyí, apíó, mlitsun ania aní Wíenyɔ ɔkɔlebwesv amlíha mu ɔwa mli ɔwɔnlín tsu mu túmi kpɔnkpɔntí ámutɔ. ¹¹Mlidida ɔsá-akɔtɔ fééá Bulu lahá mli ɔbéé, mlipúko ɔɔbunsám, ménu mlétalí líí mu ɔmle ámu ɔnɔ. ¹²Tsúfé megyí ania anyánpóusa dékɔ. Mboún ania ɔɔɔtɔ túmi laláhe, atúmipu pú *ɔɔɔe laláheá bubu ɔyí klúnhe anfitɔ pú ɔtínegyíɔtíné dékɔ. ¹³Mú sv mlidida Bulu akɔtɔ ámu féé, ménu ekeá lalahe ku ifwíe mlitɔ á, mliuméesrí, mlétalí líí mú ɔnɔ, trá nya ɔɔɔe wá ɔwɔnlín líí kínkíínkín.

¹⁴Mú sv mlíkusu, amlída iwɔsv. ɔnɔkwaltwa ibwée ɔféá ɔklí mli osíésú. Yilébwe ibwe mli kántɔ-atíntɔ. ¹⁵Iwɔsvuda há iwílwii asun wankláán ámutɔ kutá pú mú blí ibwée mli ɔsátɔ ntukvta. ¹⁶Ínu féé ɔma a, mlíkita Kristo hógyi amutɔ brégyíbré. Ibwée mli atíntɔá mlíspɔtin mli iwí, ménu ɔɔbunsám mbun píɔnpíɔn ámutɔ ɔdetsún amutɔ kuku ɔmɔɔwɔ mli. ¹⁷Mlipu Bulu nkpahɔɔ amv bwe mli kutupa. Mlíkita Bulu asún ámutɔ, ibwe mli ɔsátɔ ɔdayí ání *ɔɔɔe Wankíhé amv tehá mli. ¹⁸Mlíha Bulu ɔɔɔe ámu ɔkpa mli, amlíbo mpái brégyíbré. Mlíkuh Bulu, ɔtsa mli ɔkpagyíɔkpasv. Mú sv mlidunka ansí iwɔsv. Mliumási mpái ɔɔ há Bulu ahá féé. ¹⁹Mlíbo mpái ha mu. Ní nobwíí ɔnɔ á, Bulu ɔpúsv mu asún ámu wa mí ɔnɔ; ɔha mí antali wa klɔn bli asun ɔɔáínhé amúú ibv mu asun wankláán ámutɔ ámu féé. ²⁰Asún ámu iwí sumbí ɔyɔpɔv ngyi. Mú ɔkanda sú nda obu ní. Mlíbo mpái mlíaa, Bulu ɔhá mí antali wa klɔn bli mú alíá ilehián.

Uklá

²¹Osúmibi ɔnɔkwaltpu aní pío ɔdwepú Tihiko gyí aní Wíe agyómá ámutɔ. ɔbébláa mli mí iwí asún féé, ménu mlébi



Efe

Romaƒɔ lsa Ɖkɔpɔ (Efesofɔ 6:11-17)

alɔ́a ngɔi pú tɔ́a ndebwe. ²²ɔ́nɔ kóún sɔ nde mu wa mlɔ́ wá ní. Ndeklé mbée, ɔ́bebláa mlɔ́ alɔ́a tógyítɔ́ ide músú yɔ́ nfi. Ɖɔɔi kpla mlɔ́ pɔ́wa mlɔ́ ɔ́wɔnlín.

²³Ɖsí Bulu muva anɔ́ Wíe Yesu Kristo buháa mlɔ́ ahógyipu amu fée iwilwii. Buháa amlɔ́tsia dwe aba, mlɔ́ ansí idinka Bulusu bré fée. ²⁴Ogyíi ahá ání butamasí anɔ́ Wíe Yesu Kristo dwe fée buale.

Ɔwulúá Paulo Lówanlín Sísí Filipifo

Itsiáha

1 ¹Mí Paulo pú aní pío Timoteo ání anɔgyí Kristo Yesu asúmpú dé Ɔwulú ánfí wanlín sísí mli Bulu ahá ání mliɔ Filipi wúluto, mliá Yesu Kristo mlilabwé kule. Mliá mli ɔpasua ahande pú amú abvápu fée anudé mú wanlín sísí.

²Aní Sí Bulu mva aní Wíe Yesu Kristo bugyíi mli buale, abuha mli iwilwii.

Paulo Atókulí Pú Ipánda

³Ntedá mí Bulu ipán ní nekáín mliɔ brégyíbré. ⁴Brégyíbréá nde mpái bɔ há mli fée á, ansí tegyi mi. ⁵Tsúfé tsú ekeá mlútsɔ *asun wankláán ámu nu á, mlidé aní tsa anudé mú ɔkan da bɔtu nde. ⁶Nyin ání Bulu ámúú olefi agyómá wankláán ámu así mlito ámu kén ɔbɔyɔ músú alu yófun Kristo Yesu ɔbáke amv. ⁷Ulekanáa ání nósusúu mli fée iwí alí, tsúfé ntehíé dwé mli. Ínɔ́á nda obu, ntée ndekɔ asun wankláán ámu nwunsv, mlilíí mí ɔma a, aní fée Bulu dé buale gyí. ⁸Bulu yin ání ntosúsu mli iwí, ntehíé dwé mli fé alá Kristo Yesu tɔdwé mli.

⁹Nde Bulu kokóli mbée, ɔhá amlidwe aba dvn alí, amlitvn ansí, nú asón ámu é así wankláán, ¹⁰méni mlébi tɔ́á ihíé ibv alé, amlitsia nkpa ání mú iwí letvn, ɔlala uma mú iwí, alu yófun ekeá Kristo ɔbélaba. ¹¹Yesu Kristo ɔháa mv yilébwe ibvula mlito fé alá oyí toswíé abí, ipu numnyam múa kanfú ha Bulu.

Paulo Ukantodi Léha Bulu Asún Lekléi

12Mí apíó, ilehián ání mlébi ání ikplán anfi ɔlatú mí ání lahá asun wankláán ámu lakléi tsía. 13Tsúfé ɔhagyíɔha ání ɔbu nfi, pú isá akɔpúá butogyo owíe wóyí aná fée babí ání Kristo-búo su nda ikantɔ. 14Mí ikantodi su apíó tsɔtsɔtsɔ bapú ansí dínká aní Wíesu. Buhíé buɔe klɔn wa dá asun wankláán ámu ɔkan, ifú medé amú.

15Ibu mútá mí iwí olu pú mí iwí ahin sù aku buɔe Kristo iwí asún ámu ɔkan da. Táme amú aku é balé klɔntɔ buɔe mú bwe. 16Alí ahá ání buɔepu mí iwí ɔdwe dá asun wankláán ámu ɔkan. Tsúfé buyin ání Bulu lópu mí ba nfi ání mbéprí mu asún ámu nwun. 17Ahá ámú búmedé Kristo iwí asún ámu ɔkan da tsú amú klɔntɔ ámu mú á, amú nkɔle inya su buɔe mú bwe. Nda ikantɔ su buɔekléá béyintá mí iwí tsía.

18Táme umedé mí han, ní yilé sù buɔe mú bwe o, lalaha su o. Múá ide mí hián gyí, banyá buɔe Kristo asún ámu ɔkan da ní. Íni sù ansí ihíe de mí gyí ní. 19Tsúfé nyin ání mli mpáí pú Yesu Kristo ɔɔé ámu ɔbékpa mí, néɔali ikplán anfitɔ. 20Nhié nyin, mbu hógyi ání mmɔɔbwe tɔá íbéha péli békutá mí. Mboún nétrá wa iwí ɔwunlín, méni ní lowu ígyi o, nkpa ígyi o, mí tsiátɔ fée íbówa Kristo numnyam. 21Tsúfé ní ntsie nkpa á, ntsie ha Kristo. Ní nowú é á, íbówa mli labi ɔun. 22Táme ní ntráa ntsie ɔyítɔ á, négyi gyuma ání íbówa labi há mí. Íni su mmowúun múá nlé. 23Nagyígyáa, táme íbu mli aléá néyétsiá Kristo wá mboún. Múbu alé ɔun. 24Táme mli su íbu aléá nétsiá nkpa. 25Nyin alí. Mú su nétsiá mli wá abóyɔ agyómá ámu, méni mlédan, nya ansigyí mli Kristo hógyi su. 26Múmú bréá neyínkí bá mli wá á, mlénya ɔkpa kánfú Kristo Yesu, ɔtɔ ámú alabwé há mí ámu su.

27Tɔá idehián séi gyí, mliha mli tsiátɔ ikana Kristo asun wankláán ámu. Múmú ní nebá mli wá ó, mmeba ó, nónu ání mlíí kínkíínkín íkɔlɔbwetɔ; mlíé hógyi amú íbu asun wankláán ámɔtɔ ámu é nwun prí. 28Mlumánya ahá ání bókusú líí mli su ifú ɔkpa ɔkɔkusú. Mli íklɔnwa íbóbwe osúna há amú ání Bulu onutó ɔbéhi amú fée, táme ɔbóhɔ mli mú

nkpa. ²⁹Tsúfé megyí Kristo hógyi nkule sù Bulu lópuhá mli. Mboún alá mlówun ipian há mu é. ³⁰Isá ámú mliówun ání ndeko ámu kén mliédékó á. Mú kéntó ntráa mbu ni.

Mlikasi Kristo Iwiasibá

2 ¹Mli Kristonyo mliabwé kule. Mú su alawá mli ateto-onlun. Mu odwe lalwíí mli klun. Mli mu Dḡé ámu kulebwe su alahá mli mli aba mliabwé kule, mliédé ɩku tsu lé mli aba asóntó, mliédé aba nwe wúun. ²Mú su mliabwe kule, amlitsula dwe aba tsu mli kluntó. Mliabwe agywun kule, amliyó agyómá wa abatɔ puha mí ansigyí ifun. ³Mliábwe awunsípú. Mliátsu iwi. Mboún mliaba iwiasi, amlitsu mú ání mli aba budun mli. ⁴Mliámdunká mli nkule klé. Mliúdunka mli aba é klé. ⁵Mliha mli agywun ɩbwe fé Kristo Yesu klé.

⁶Ínía ɔlelian Bulu ɔkpagyíɔkpasu ó á,
ɔmɔbwe agywun ání obótsu mu iwi ání mba
Bulu bugyi kékée.

⁷Mboún olesi mu tógyító ɔmagyáa,
bwé mu iwi osúmpú.
Bɔkwí mu fé alá bɔkwí ɔhagyíɔha.

⁸Mu nyankpusabwetó á, ɔleba iwiasi.
Olobu ató alu wú *oyikpalíhesu,
fé lalahe ɔbwepú.

⁹Íni su Bulu lótsu mu fúá ya ɔsúsúsú,
há mu dá ání idun adá féé,

¹⁰méni ntobíá bubu ɔsú múa asi
pú ɔsulúv ayasi béda akpawunu há mu;

¹¹ɔhagyíɔha ɔbéle blí ání “Yesu Kristo gyí Owíe!”
pówá aní Sí Bulu numnyam.

Mliwanki Fé Ntsrakpabi

¹²Íni su apíó adwepú, alí ámú mliabwé mí bré ámú mbu mli wá ámu a, ínía mma mli wá ó á, mliabwé mbódí amlibwe mú alí. Mliɩv ifú múa kpinkí yɔ mli nkpahɔ́ agyómá ámu mɔ ɔnó. ¹³Tsúfé Bulu onutó dé agyómá yɔ mliɩv. Alahá mliatsúlá mliédé mu apé múa tóá otekle bwe.

¹⁴Mlumátóí ntée gyi tógyítá mlóbwe iwí nwéen, ¹⁵méni ɔlala méetsiá mli iwí; mli iwí bétin, fé Bulu ahá bré ánfu mltsie lakpan kugyíku abwepú ɔyí ánfuto. Mliwanki fé ntsrakpabi amú ansító. ¹⁶Mliyo músú amlibla ahá asón ámúú utehá nkpa ámu, méni mli su nétalí pú ibi sí kántó ekeá aní Wíe Kristo ɔbélaba, ání mí mbódí ntée mí gyumagyihe mɔbwe kpaali.

¹⁷Táme ní ibéba mótó ání bópu mí obugya wúlí así fé ntá mli hógyi iwí afɔdie pú Bulu agyómá ání mldéyɔsu kúráá á, ibówa mí ɔdwe. Ansí bégyi mía mliɔyó féé. ¹⁸Mú su iwá mli ɔdwe, ansí igyi aní féé.

Timoteo Mva Epafrodito

¹⁹Ní aní Wíe Yesu lótsulá á, umówa ɔpá nówa Timoteo mli wá. Ní oyínkí bebláa mi ání mltsie wankláán á, ansí bégyi mi. ²⁰Mma ɔhá ání olotsu iku lé mli asóntó dun mu. ²¹Tsúfé atráhe amu féé bude amú onutó klé kú, megyí Yesu Kristo klé. ²²Táme mliyin alá Timoteo lagyi mu iwí adánsie wankláán. Alatsá mí aniladá *asun wankláán ámu ɔkan fé obí móa ɔsí. ²³Mú su nde ɔkpa kú ání ní nenyá wun tóá ibéba misu nfi pé á, nówa mu mli wá. ²⁴Nahogyiá aní Wíe ɔbékpa mí, umówa ɔpá mí onutó néba mli wá.

²⁵Táme ɔbwe agywun ání nélayínkía Epafrodito sísí mli. Aní pío ání mía munyɔ anidé agyómá yo, anidéko asun wankláán ámu nwunsu. Mvgyí mli bí ání mliłówa mlíaa, ɔbá beki misu ní. ²⁶Tsúfé ɔde mliɔ kaín dubi. Lhíé de mu háan, tsúfé mliłónu mu ɔɔ. ²⁷Lélé mú á, alaló sian wu, táme Bulu lówun mu nwe. Megyí mu nkule, mía munyɔ féé, méni awirehɔ mótó dun mi kítá. ²⁸Mú su nhíé ndekléá nókɔsí wá mu mli wá, méni ní mléláwun mu a, ansí bégyi mli. Mí é mí asun susúhesu békalá kúká. ²⁹Mlihue pu ansigyí hɔ mu fé mli bá Okristoyin, amlipu obú ha mva ahá ání bugyi fé mu. ³⁰Tsúfé olesi mu nkpa há Kristo agyómá ámu. Olekle owu mótó bréá ɔlí mli dátó, mu nkule ɔde tógyítá teki ní mliɔ nfi mlóbwe há mí bwe.

Yesu Lówu Hɔ Anɩ Nkpa

3¹ Itráhe a, mí apíó, anɩ Wíe su mɩnya ansigyí. I mɔkókpon mɩ ání nétrá wanlín asun kua kule anfi sísí mɩ. Igyi asún ání íbékpa mɩ é. ²Mɩkɩ aha laláhe anfi bugyi fé akíai anfi wankláán. Lalahe abwepú bugyi, bude ahá háan bɛɛ butún *keté kpaali. ³Tsúfé anɩ ahá ámúú anutɔpú *Ŋhe Wankíhé súm Bulu ámu gyí keté atínpu onutó ní. Mú su abétalí tsú iwɩ utó ámúú Kristo Yesu labwé há anɩ ámu su. Anitamapú ansí dínká tʒá nyankpɔsa lapú íbɩ bwésú. ⁴Mí onutó óó mbu ɔkpa pú ansí dínká mú anású. Ní ɔku ɔbée, mbu ɔkpa pú ansí dínká mósú á, mí mboún búu ɔkpa pú ansí dínká mósú dun. ⁵Tsúfé bɔkwí mí, tun mɩ keté eke kwésí. Israelyin ngyi. Benyamin abusuantɔ notsú. Mú su *Hebriyin onutónutó ngyi. Mose mbla ámuvsu gyí ɔkpasu é á, Farisiyin ngyi. ⁶Nehɩe wá nsi, dínká Kristo ɔpasua ámuvsu. Ngyi Mose mbla ámuvsu wankláán, ɔlala metsiá mí iwɩ. ⁷Táme ntobí anfi bré ámu ntekíá íbu mɩ labi anfi féé á, Kristo su nde itráa megyí mí tɔtɔ. ⁸Múá idun mú kóráá gyí, ní nɔpúki alá nɔpubí mí Wíe Kristo Yesu a, nawun ání íbu labi dun tógyít. Nawun ání nahúli ntobí anfi ntekíá íbu mɩ labi anfi féé, alá Kristo ɔbéda mɩ íbu su. ⁹Íni su íniá mbu mu wá su á, megyí Mose mbla ámuvsu gyí ɔbéha négyi asu Bulu ansító. Kristosu hógyi mboún ɔbéha négyi asu Bulu ansító. ¹⁰Mí agywun gyí, ndekléá nébɩ Kristo pú túmi ámúú Bulu lópukúsúa mu tsú afúlitɔ ámu tsía. Ndekléá nówun ipian fé alá Kristo lówun ipian wú, ¹¹méni ɔkpagyíɔkpasu á, mí é Bulu ɔbókúsúa mɩ tsú afúlitɔ!

Srí Búo Kristo

¹²Mmedéblí mbée, mí íbu lada ntobí anfi féé ntée Bulu labwé mí nafun. Ntráa nde nsi wa alá íbɔbwe mí íbu béda tʒ ámu su ámúú Kristo Yesu íbu lada mɩ ámu. ¹³⁻¹⁴Mí apíó, mmedéblí mbée, mí íbu lada mú. Nde mú ámúú idetsún amvsu táan. Múá ida mí ansító ɔkpa ngya. Mí ansí lapé, méni nénya siadie ámúú Bulu ɔbótsun Kristo Yesusu tí

mí nójɔ mu wá ɔsúsú ámu. ¹⁵Ilehián ání aní ahá ámúb anuladan hógyitɔ ámu fée abóhɔ alí asún ánfí. Ní ɩku mójwankí mli á, Bulu ɔbójwankí mútɔ súná mli. ¹⁶Táme mliha akita ɔɔkwali amúb Bulu lasúná aní ámutɔ.

¹⁷Mí apíó, mlikasi mí tsiátɔ. Mlikasi atɔ tsu ahá ámúb bakási aní tsiátɔ ámu wá. ¹⁸Tsúfé ntetsiá bla mli asún ánfí. Napú ntsú ntráa nde mli bláa mbée, ahá tsɔtsɔtsɔ tsiátɔ losuná ání Kristo oyikpalíhesu lowu ámu alupú bgyi. ¹⁹Ahá ánfí béhi. Amú apu gyí amú Bulu. Amú numnyam é gyí péli. ɔsulúsu atɔ ɩwí pé butosúsu. ²⁰Táme aní mú á, ɔsúsú gyí aní otsiákpá. ɔtíné ámúb anidé aní ɔhópu, ogyi aní Wíe Yesu Kristo ɔkpa kí ání obótsu ba amu. ²¹Mubúu túmi, otegyi tógyítɔsú. Mu ɔbéba betse aní ɔyulúw wuhé ánfí, bwé mú fé mu numnyam ɔyulúw amu.

4 ¹ɩni su apíó adwepú, ntɔdwé mli. ɩdin mí ɔwólí ání nówun mli, tsúfé mli su ansí de mí gyí, nénya ipánda é! Mí adwepú, alí ilehián ání mlélí kínkín mli Kristo hógyitɔ ní.

Tsá Bubwée

²Nde mí apio tsihé Euodia mua Sintike kokóli ání bunúu aba asi, tsúfé aní Wíe abúopu bgyi. ³Mí agyómáyɔbá onutó, nde fú é kókoli mbée, futú kpla amú abubwe kule. Tsúfé bawá nsi tsá mía Klement pú atráhe amu anuladá *asun wankláán ámu ɔkan. Bulu lawánlín amú adá wá nkpa ání itamatá atsiápú ɔwulútɔ.

⁴Mlihe nya ansigyí aní Wíe su brégyíbré! Ntráa nde mli bláa mbée, mlihe nya ansigyí!

⁵Mliha ɔhagyíɔha owun ání mliólwií. Aní Wíe íbábu lafun. ⁶Tɔtɔ umáhan mli. Mboún kugyíkuá igyi á, mliɔ mpái kokoli Bulu dunka músú, amlida mu ipán. ⁷Ménu Bulu ɔbéha mli iwilwii ání ɩɔn bí, íbékpa mli klɔn pú mli agywun, mliha Kristo Yesu ɩkulebwetɔ.

⁸Utráhe a, mí apíó, mliɔ mli agywun dunka tsá igyi ɔɔkwali, tsá íbétí obú, tsá ɩda ɔkpa, tsá mú ɩwí letin, tsá itegyí ahá ansí pú tsá ahá békánfúsú. Mligywun tsá íbu

alé, ahá butekanfó aná iwí. ⁹Mhlyo músú amlipu ntobí ánfí nasúná mli ánfí, múá mllónu tsú mí wá pú múa mllówun mli nobwe féé wa mli tsiátó, méní Bulu ámúó ɔtehá iwílwii amu ɔbékpa mli.

Ipánda

¹⁰Bulu lahá ansí ihíe de mí gyí, tsúfé mllatráa kaín mísú. Nawun ání mllumókúsí mí iwí gywíin, táme talí mllimétalí lé mú súná. ¹¹Mmedé asún ánfí blí púsúná ání mbu ikplánto, tsúfé nakásí, nabí alíá tóá mbu ibófun mli, ní mbu óó, mma óó! ¹²Nasúan alíá nóputsiá ní mbu óó, mma óó. Nabí alíá tsiátó kugyíkɔtɔá mbu ibégyi mli ansí. Ní ntsie akún o, namwé o, mbu o, mma o. ¹³Ntetalí bwé tógyító, tsúfé Kristo tɔwá mí ɔwɔnlín.

¹⁴Mú alí óó á, ibu aléá mllatsú iku lé mí ikplán anfito. ¹⁵Mú ɔma a, Filipifo, mhlyin ání bréá ɔtso mli Yesu Kristo iwí asun wankláán ámu bláa, nedali Makedonia ɔmátó á, mli ɔpasua ánfí nkule dé mí buá, mli dé mí ató sisí ní. ¹⁶Bréá ntráa mbu Tesalonika wúluto kúráá, iwí lékplan mli á, mllétsiá sisí mí. ¹⁷Megyí bee nde tɔku kulí tsú mli wá. Mboún ndekléá mlinyá tɔku dinka awitole amúó mli déwa há mí ámusu. ¹⁸Mí ibu lada tógyítóá mllópuhá Epafrodito mli aa ɔpú ba mli. Ito kúráá dubi. Mú su nanyá tógyítóá ibéhián mli. Ito ánfí mllabwé ánfí igyi fé mllahá Bulu igyi ání ibu ɔfan fánfáánfán, ilagyi mu ansí. ¹⁹Mí Bulu ɔbéha mli tógyítóá ide mli hián tsú mu numnyam ató tsɔtsɔtsoá ibu ania Kristo Yesunyo ikulebweto. ²⁰Numnyam ibwée aní Sí Bulu klé bré féé. *Amen!

Uklá

²¹Nehá Bulu ahá ání bugyi Kristo Yesu klé féé itsiá. Apíóá bubu mí wá nfi é behá mli itsiá. ²²Bulu ahá atráheá bubu mí wá nfi féé bude mli itsiá ha. Títriu amúá botsú Roma owíe dehen wóyító.

²³Aní Wíe Yesu Kristo ogyíi mli buale.

Ɔwulúá Paulo Lówanlín Sísí Kolosefɔ

Itsiáha

1 1-2 Mí Paulo ání Bulu apé sɔ nabwé Yesu Kristo sumbí ɔyɔpú pú aní pío Timoteo dé ɔwulú ánfɛ wanlín.

Anidépusísí aní apíóá bugyi Bulu ahá, bubu Kolose wúluto, bubu ɔɔkwali há Kristo Yesu, mua amúnɔ é babwé kole.

Aní Sí Bulu mua aní Wíe Yesu Kristo bugyíi mli buale, abuha mli iwilwii.

Ipánda Mpái

3 Anitedá aní Wíe Yesu Kristo mu Sɔ Bulu ipán brégyíbréá anidé mpái bɔ mli nwunsu. **4** Tsúfé anlanú ání mlúɔhɔ Kristo Yesu gyi, mliɔ ɔdwe é há Bulu ahá féé. **5** Mli dé ɔkpa kí ha tóá bapúyái há mli ɔsúsú; fé alá mliyin tsú bréá mlilégyankpá nu ɔɔkwali asún ámúú igyi Bulu asun wankláán ámu. **6** *Asun wankláán ámu kén dékleí wá ɔyító, ide ahá tsiátó tsée ɔtínegyíɔtíne; fé alá iletse mli tsú ekeá mlilónu mú, mlilébi ání lélé Bulu tegyi ahá buale. **7** Aní osúmba ɔdwepú Epafra gyí ɔhá ání ɔɔpɔ asun wankláán ámu ba mli. Yesu Kristo osúmbi ɔɔkwaliɔ ogyi, ɔde mli buá aní ɔfansu.^a **8** Mliléba bebláa aní ɔdweá *Ɔɔe Wankíhé amu lapówá mliɔ.

9 Mú sɔ anumókúsi mpái bɔ mli nwunsu tsú ekeá anilónu mli ɔwɛ asún ánfɛ. Anidé Bulu kokóli anaa, ɔháa amlibi mu apé kugyíku wankláán. Ɔháa mu Ɔɔe Wankíhé amu ɔha

^a **1:7** Mli ɔfansu bu nwulú dada amu akuto.

mlɪ nyansa mʉa asʉn asunu f  , ¹⁰m  nɪ ml  tal   tsi   tsi  t     w  a anɪ W  e numnyam, amlɪgyi mu ans     kpagy  kpasu.   h  a amlɪbwe yil   br  gy  br  , tr   bɪ Bulu tsi  . ¹¹⁻¹²Ania   h  a mu t  mi   m     n   bɪ   nlɪn iwa mlɪ   wunl  n, amlɪtalɪ tomi, nya klɪn, p   ansigy   da anɪ S   Bulu ip  n. M  l  h   mlɪlafun   n   mlɪa mu ah   ml  nya agyapadi     m  b   lal   y  i mu iw  gy   wank  h  t     mu iku. ¹³Ts  f   m  l  l   anɪ ts     h     m  b   de okl  nsu gy  i amu t  mi asɪ, p   anɪ ba mu Bi   dwep     mu iw  gy   amut  . ¹⁴Mu Bi   nfɪsu   l  tsun h   anɪ,   las   anɪ lakpan ki   anɪ n  .

Kristo Dun T  gy  t  

¹⁵  h  a tamawun Bulu, Kristot     lelun   wan.   bu unu asa Bulu l  bwe t  gy  t  ,   dun Bulu it   bweh   kugy  ku. ¹⁶M  s   Bulu l  tsun bwe t  gy  t     bu   s   m  a asɪ. M  b   butowun p   m  b   butamawun f   ,   j  t   aw  e,   m  s  gy   t  mi, at  mip  , p   ɪsu agy  p   f   . M  s   Bulu l  tsun bwe   y  i f   , p  w   mu numnyam. ¹⁷  bu unu asa t  gy  t   lefi asɪ. M  s   at     mu f    ɪde agy  m   y   w   abat  . ¹⁸Mugy  i nwun h   mu nyankpusa-oy  i, igyi   pasua   mu,   de m   nkpa ha. M  l  gyankp   k  s   ts   af  lɪt  , ogyi t  gy  t   nkp   ogy  p  . ¹⁹Ts  f     bu Bulu   dwe   n   mu tsi  t   f    b  tsi   mu Bi   mut  . ²⁰M  s   Bulu l  tsun yink  a t  gy  t   ba mu ɪwɪ w  .   l  tsun mu obugya am  b   wul   asɪ br  a beda mu m  nt   *oyikpal  he amusu p   iwɪlwii w   m  a t  gy  t   nsun  . M  a   bu   s  s   p   m  b   bu   sul  su f   .

²¹Tekɪ mlɪ    ml  l  daml  i   ma h   Bulu, mlɪgy  i mu alup   mlɪ as  n sus  he p   mlɪ bweh   lal  he su. ²²T  me s  i   ,   tr  a megy  i alɪ. Kristo l  bwe nyankpusa, olowu. Bulu l  tsun mu oyikpal  hesu lowu   m  su l   mlɪa m  ny   nsun  . M   su ifin p   asvansu m   mlɪ ɪwɪ,   b  kpa mlɪ ba mu ans  t  . ²³T  me   lehi  n   n   ml  h   as  ns     nfi gyi, l  i k  nk  i  nk  n. Ml  m  ha abutse mlɪ agywun le it     m  b ml  d   m     kpa k  i, asun wankl   n   mu lap  ba mlɪ   m  su. Asun wankl   n   nfi os  mp   m   Paulo ngyi n  . As  n   nfi   kan b  deda   y  t   f       n  .

²⁴Ibu mi ansigyí ání nde ipian wúun mli su. Tsúfé nde iwɔsun ámúú Kristo lówun sian amu ku wúun ha mu ɔpasua, igyi mu nyankpɔsa-oyí ámu. ²⁵Bulu lópu mu asún wankláán ámu wá mí ibitɔ, ání ndáa mú féé ɔkan suna mli, ampusum ɔpasua ámu. ²⁶Ɔlɔpu asún ánfɔ ɣáín bímbí ɔpá, táme alalé mú ɔwan súná mu ahá séi. ²⁷Ibu Bulu ɔdwe ání ɔbéle mú ɔwan súná mliá mlimégyí Yudafo. Asun ɣáínhé amu gyí, Kristo tsie mlɔ. Ibu ibiá, ibu numnyam é. Múdésuná ání abénya mu numnyam amu iku ní. ²⁸Mu iwɔ asún anudé ahá féé bláa, anudé amú ɔlá da, pú nyánsa ámúú Bulu lahá anu ámu súná amú ató; méni bófun, abékpa amú ba Bulu, amúá Kristo ikulebwetó. ²⁹Íni su nahíé ndeprú, pu Kristo túmi ámúú ibu mitɔ ámu yó agyómá ní.

2 ¹Ndekléa mlibú iprú ání ndeprú ɔwunlínso, mliá ɔpasua ámúú ibu Laodikea pú ahá ámúú bumɔkúwun mi ku amu féé nwunsu. ²Nde mú bwe púwá amú ɔwunlín, abubwe kule, dwe aba, nu asún asɔ wankláán, méni bónu Bulu asún ɣáínhé amúú igyi Kristo amu féé asɔ. ³Kristotɔ Bulu lópu mu atonyahéá igyi mu nyánsa pú mu asúnbi féé wá.

⁴Nde mli asún ánfɔ bláa, méni ɔhaa mɔɔpu asún ání ibu anulé kuku bemlé mli. ⁵Ibu mútá mbu ifó mli wá, táme ntosúsu mli iwɔ brégyíbré. Ansí é ide mí gyí ání mlɔtsie wankláán, mliú kínkínkín Kristosu hógyito. ⁶Íniá mlɔlahɔ Kristo Yesu gyi ání mugyí mli Wíe su á, mliɔ mósú mliá munyɔ amlɔbwe kule. ⁷Mli é mliɔ lu kínkínkín Kristo hógyito, amlɔnya ɔwunlín tsu mliá munyɔ ikulebwetɔ. Mliɔ mósú amlɔhɔ mu iwɔ asún ámúú bude mli suná, igyi ɔɔkwali amu, fé alá oyí nlin tɔyɔ ɔtɔtɔtɔ, yódúnká ntsu há mú utedan, amlɔda Bulu ipán é brégyíbré.

⁸Mlimáha ɔkpa ɔhaa ɔmle mli, pu mu ansitún móa afunu asún ání igyi amándíéá anyánpɔsa bɔwa kuku, itsú ɔɣé ntée túmiá ide ɔyí ánfɔsu gyí, imotsú Kristo wá beha amlumli mu nkpábi. ⁹Tsúfé Kristotɔ Bulu tsiátɔ onutónutó ámu féé ibu nyankpɔsa ɔkpasu. ¹⁰Íniá mliá Kristonyɔ mliabwé kule su mlɔlafun. Mugyí ɔhá ání ɔbu túmi ɔɣétɔ atúmipu pú ɔsu agyípu féésú.

¹¹Mliha munyo uklebwe su aladínkí mli tsiátó dada amu lé mli su fé alí ámú bútetun *keté, dínkí awuli lé músú ámu. ¹²Bréá bɔbɔ mli asú á, bopulá mli tsiátó dada amu fé alíá bopulá Kristo; Bulu lókúsú mli ba nkpatɔ fé alíá ɔlɔkúsú Kristo, tsúfé mlilóhogyi ání Bulu bu túmi kúsú mu tsú afúlitó. ¹³Teki mli lakpan pú mli tsiátó dada amú bú búmɔkúdínkí lé mli su ámu su mlilówu fé ɔhá ání ɔmɔkútun keté. Táme séi á, Bulu lakúsú aɔia Kristonyɔ ba nkpa pɔpwetɔ, alasi aní lakpan féé kíe aní. ¹⁴Ɖledunkí asún ámú bú búwanlín wá Mose mblatɔ, ide aní ulá le ámu lé anisu, yéda mú mántá Kristo *oyikpalíhe amusu. ¹⁵Bulu lóswí ɔhétó atúmipu pú isu agyípu túmi, ɔlekutá amú ndoun, lé amú ɔwan, wá amú pélitɔ, bré olegyi amúsú Kristo oyikpalíhe amusu.

¹⁶Mú su mlumáha ɔhaa ɔle mli ulá mli atogyihe, mli atonuhe, nkegyí, ɔtsra pɔpwe nke, ntée Yudafo *ɔkpónú ɔdaké aná su. ¹⁷Yiyí keke íni féé igyi há ató ámú bú íbéba amu onutó. Mú onutónutó ámu léln ɔwan Kristotɔ. ¹⁸Mlumáha ɔkpa ɔhaa ɔmle mli amliba iwiasí sum Bulu-abɔpu, amlihuli ipán ání Bulu léhɛ yái mli. Ní ɔbéé alawun tɔku tsú mú iwí kúráá pó á, ɔyító ansítún láhá mu ɔde iwí tsu. ¹⁹Ɖhá ánfí odu lamáín iwí lé Kristo amú bú ógyi ɔpasua ámu nwun ámu su. Tsúfé ɔpasua ámutɔ aní féé anilétsa abasu, Kristo amú bú ogyi nwun ámu dé aní ɔwunlín wa, méni abédan alíá Bulu déklé.

²⁰Mliha Kristonyɔ lówu. Mú su mlitráa mlímá ɔyító túmi kuku asi. Ntogyi sú mlitráa mlidé mbla ánfí anású gyí? ²¹Beɛ, “Mágyi íni. Mápú ibi da íni, mátsu íni é!” ²²Ní bɔpú ntobí ánfí féé bwé ató tá á, iteyíntá. Anyánkpuása onutó mbla pú amú atosunáhé igyi. ²³Anidé mbla ánfí kú fé tóá nyánsa bu mútó, íbéha abówa alé Bulu ansító, abéba iwiasí há mu, wá iwí ɔsun aɔiaa íbéha abébu gyi iwí su. Táme íni aná féé íméetalí há aníméegyí iwí su.

Nkpa Pɔpwe Tsiá

3 ¹Mú su ní Bulu lakúsú mliha Kristonyɔ ba nkpa pɔpwetɔ á, mlidunka atóá íbu ɔsúsú, ɔtíné ámú bú Kristo tsie Bulu gyɔpɔsu ámu. ²Mliha agywun unu ató iwí, megyí ɔsulúsú

klé. ³Tsúfé mlɪlawú, Bulu lapú mliha Kristonyɔ nkpa onutó ñáín mutɔ. ⁴Ekéá ɔbéle Kristo amúb ogyi mli nkpa onutó ámu ɔwan súná ɔyí á, eke ámu kén ɔbéle mliha munyɔ ɔwan mu numnyamtɔ ní.

Tsiátɔ Dada Múa Pópwe

⁵Mú su mliɔ tsiátɔ dada amúb ɪbu mliɔ ámu. Múgyí; atsi múa ayin asúnwa, ifintotsiá, ɔwólɪ laláhe múa péɪla. ɔyí ánfɪtɔ atɔ wankláán umápe mli ansí, tsúfé ɔnsípe igyi fé ɔkpɪsúm. ⁶Ntóbí ánfɪ odu abwepúsú Bulu tehíe nyá ɔblɔ ní. ⁷Mú aná mliɔbwé bréá mli gyí ɔmátɔfɔ ní.

⁸Séi gyí bréá mléle ɔblɔ, ɔblɔkpán, ɔlu, abakpɔí, asukpan blí aná lé mliɔ ní. ⁹Mliɔmáwa afunu súná aba, tsúfé mliɔlasi mli tsiátɔ dada amu pú mú bwehé féé. ¹⁰Mliɔlálátsú tsiátɔ pɔpwe. Bulu gyí mú ɔbwepú, ɔde mú bwe pɔpwe lian mu ɪwɪ bré ánfɪ mliɔdé mu bi ánfɪ. ¹¹Tsiátɔ pɔpwe anfi mú á, ɪmefáhun ání Griikiyin ntée Yudayin fugyi. Fetun *keté ntée fɪmetun, ɔkputɔpu ntée okudasíyin, ɔkpábi ntée ɔdíhe fúgyi. Kristo gyí tógyítɔ, ɔbu amú féétɔ.

¹²Mú su ɪniá Bulu lalé mli púbwé mu ahá ání amú ɪwɪ latun pú mu adwepú á, mliha nwewúun, awɪɔlewa, ɪwɪasɪbá, ɪlwií pú klɔnya itsia mliɔ. ¹³Mliɔnya ɪklɔn ha aba. Ní ɔku mu mu ba benya á, mliɔsikie aba fé alíá Kristo lési mli klé kíe mli. ¹⁴Múá ɪɔɔn a, ɔdwe tɔbwé anɪ féé ɪkɔle. ɪbwée mli tati díɔdáhé. ¹⁵Mliha Kristo ɪwilwii igyi mli klɔnsu, tsúfé mútɔ Bulu latí mli bowa; mliha mu nyankpɔsa-oyí ámu mliɔlabwé kɔle ni. Mliɔda mu ɪpán é brégyíbré. ¹⁶Mliha Kristo asún ámu ɪhe bula mli klɔntɔ, ɪha mli nyánsa. Mliɔputɔ kpla aba, suna aba atɔ. Mliɔwa *Israelfɔ ɪɔ, ɔsankuosu ɪɔ pú ɔñétɔ ɪɔ mli klɔntɔ pɔtsu Bulu fɔva, pɔɔda anɪ Sí Bulu ɪpán. ¹⁷Mli atɔ bwehé pú mli asun blíhé féé ɪbwée anɪ Wíe Yesu ɪdátɔ, amlɔpu ɪpán ha anɪ Sí Bulu tsun musu.

Akristofɔ Tsiátɔ

¹⁸Aká, mliɔba ɪwɪasi ha mli akúlu alíá ɪlekanáa ha ahá ání bugyi Kristo klé.

19Akúlu, mli é mlidwe mli aká. Mlumábwe amú kpóunkpóun.

20Abí, mlibu mli akwuípú, tsúfé mú Bulu tekle ni.

21Akwuípú, mlumáwa mli abí ɔblɔ́, méni iwi móowu amú.

22Nkpábi, mlibu mli ɔsulúsu awíe tógyítá mlóbwetɔ. Mliha amú ansí igyi mli iwi brégyíbré, megyí amú ansító wule. Mlibwe mú tsú klontɔ, tsúfé mlitobú aní Wíe. 23Mlibwe tógyítá tsu mli klontɔ, fé aní Wíe mlidé mú bwe há, megyí anyánpósa. 24Mlikaun ání aní Wíe ibutɔ mlénya mli ikóká ání alalá yái mu abí. Tsúfé Kristo gyí Owíe ání mlidésun. 25Táme ní ɔbwé tóá uma ale a, ɔbéka fú ikɔ, tsúfé ɔtamaki ɔhaa ansító.

4 1Nkpábi awíe, mliɔ tóá iwu alé, igyi ɔɔkwali kpa mli nkpábi, tsúfé mli é mlibu Owíe ɔsúsú.

2Mlikuta mpaubótá. Mliɔnka ansí iwísu, ipánda é itsia mli klontɔ. 3Mlibɔ mpái ha aní é. Bulu ofínki ɔkpa ha aní atali da Kristo iwi asun ɔainhé amu ɔkan. Mú su nda obu ní.

4Mlibɔ mpái mliaa, ndáa mú ɔkan wankláán, alíá ilehián.

5Mliki mli nátitɔ ɔmátɔfɔtɔ. Ní ɔkpa ifínki há mli á, mli máyintá mú. 6Mli itá iwa anulé, iwa labi, méni mlétalí lé ɔhagyíɔha asun futéhé ɔnɔ wankláán.

Uklá

7Ania opió ɔdwepú Tihiko dé aní Wíe agyómá yɔ. Osúmpú ɔɔkwaliɔ ogyi. ɔbébláa mli alíá mí iwi gyí féé. 8Nawá mu mli wá mbée, ɔbébláa mli alíá aní iwi gyí, ɔwa mli atetɔ-ɔnlɔn. 9Mva aní pió ɔdwepú ɔɔkwaliɔ Onesimo, ogyi mli pɔ amu ɔbéba bebla mli asún ání ilaba nfi féé.

10Aristarko, mí bá ání mía munyɔ anɔda obu ɔhá mli itsiá. Alí kén Marko, ogyi Barnaba mu pio ámu é ɔhá mli itsiá ní. Mliɔ Marko ɔfɔ́ wankláán, ní ɔlɔtsun ba mli wá fé alíá nebláa mli yái. 11Opió Yesu, butetráa ti mu Yusto é ɔhá mli itsiá. Ahá abasá ánti pé gyí Yudafoá mía amúnnyɔ anudé *Bulu iwíegyí ámu iwi agyómá yɔ ní. Amú tékítá klun wá mí iwitɔ ní.

12Epaфра, otsú mli wá, ogyi Kristo Yesu osúmbi amu é ɔhá mli itsiá. ɔtehíe bɔ mpái há mli ání Bulu ɔwáa mli ɔwunlín,

ɔha amlifɔn, amlitali bwe Bulu apé kugyíku. ¹³Nétalí gyí mu ɔwɛ adánsɛ ání ɔhíé ɔde agyúmá yɔ mlɛa Akristofɔ́a bubu Laodikea pú Hierapoli idátɔ́. ¹⁴Anɛ ɔdwepú Luka, ogyi ɔlɔ ɔtsapú mva Dema behá mli itsiá.

¹⁵Nehá anɛ apíó Laodikeafɔ́ ámu itsiá. Nehá Nunfa mva ɔpasua ámuú ɔbu mu wóyítɔ́ ámu é itsiá. ¹⁶Ní mlékla ɔwɔlú ánfɛ súná ɔpasua ámu tá á, mlɛpɔsɛsɛ Laodikeafɔ́ é. Mlɛkla ámu klé ámuú nɔpɔsísí ámu ámu é. ¹⁷Mlɛbla Arkipo mlɛaa, ɔmɔɔ agyúmá ámuú Bulu lɔpɔwá mu ɔbutɔ́ ámu ɔnɔ́ wankláán.

¹⁸Mí Paulo, onutónutó lawá ɔbu ɔwɔlú ánfɛ asɛ. Mlɛmátan ání nda obu.

Bulu ogyíi mli bvalɛ.

Ɔwulú Gyankpapuá Paulo Lówanlín Sísí Tesalonikafɔ

1 ¹Mí Paulo, mía Silwano pú Timoteo dé Ɔwulú ánfɔ wanlín sísí Ɔpasua ání ígyi anɔ Sí Bulu mva anɔ Wíe Yesu Kristo klé, ɔbu Tesalonika wúluto.

Anɔ Sí Bulu mva anɔ Wíe Yesu Kristo bugyíi mlɔ buale, abuha mlɔ iwilwii.

Tesalonikafɔ Hógyi

²Ní anudé mpái bɔ há mlɔ brégyíbré á, anutedá Bulu ɔpán mlɔ féé nwunsv. ³Anɔtetsíá káín anɔ Sí Bulu mlɔ hógyi gyumagyihe. Alá mlɔdé mbódí bɔ dwé aba, pú alá mlɔlatomi há mlɔ ansí dɔn anɔ Wíe Yesu Kristosv kínkíínkín. ⁴Apíó, anyin ání Bulu tɔdwé mlɔ, alalé mlɔ púbwé mv kle. ⁵Tsúfé megyí Ɔnɔ keke anɔlɔpv bebláa mlɔ *asun wankláán ámv. Mboún mlɔlówun Ɔɔɔé Wankíhé amv túmi é. Ínɔ léha mlɔlébɔ wankláán ání asún ámv igyi Ɔnɔkwali. Mlɔlówun tsiátɔ oduá anɔlɔpɔtsíá mlɔtɔ é, alá ɔbɔbúá mlɔ sv. ⁶Mlɔlékasí anɔ anɔ Wíe tsiátɔ. Tsúfé asún ámv sv mlɔlówun ɔwɔɔsv tɔtɔɔtɔɔ, táme mlɔlɔpv ansigyí ání itsú *Ɔɔɔé Wankíhé wá hɔ mú. ⁷Mú sv ɔleha ahógyipúá bubu Makedonia Ɔsulúsv pú Akaia Ɔmátɔ féé beki mlɔ bwehé, buo mú. ⁸Tsúfé megyí Makedonia pú Akaia wule anɔ Wíe asún ámv lekleí tsú mlɔ wá yó. Mboún mlɔ Bulu hógyi asún é lakléí yó Ɔtíneyíɔtíné. Mú sv asvansv má unvá abétrá blí tsú mú ɔwɔ. ⁹Tsúfé amú onutó bude alá mlɔlɔpvkítá anɔ bréá anɔlébá mlɔ wá blí. Alá mlɔlési ɔkɔ súm ba mlɔdé Bulu Ɔkɔankpapu Ɔnɔkwali pv amv mboún súm. ¹⁰Pú alá mlɔgyó bréá Bulu mv Bi Yesu

ámúú ɔɔkɔsúba tsu afúlitɔ ámu ɔbélatsú ɔsúsú bá. Mogyí ɔhá ání ɔde aní le tsú Bulu ɔblɔ ámúú íbá ámutɔ ní.

Paulo Tsiátɔ Tesalonika Wúluto

2 ¹Apíó, mli onutó mliyin ání aní mli wá bá mɔbwe kpaali. ²Mliyin alíá bɔwa aní amumvɔ, súpa aní Filipi wúluto asa anilébá mli wá. Mliyin ání aku bumotsulá, behie kúsú líí anísv; táme aní Bulu lówa aní ɔwunlín, anilébláa mli *asun wankláán ámu. ³Tsúfé megyí afunu asún anudéblí. Mú su nde mli kokóli. Megyí agywun laláhe kuku ígyi, anumédé mli mlé é. ⁴Bulu lóhɔ anísv gyi, ɔɔpɔ mu asun wankláán ámu wá aní íbutɔ. Mú anudéblí ní! Megyí anyánkpusa ansítɔ anudékú blí mú, Bulu yin aní klontɔ. ⁵Mlihié mliyin ání megyí ɔnɔ dédé anúlɔpɔ ba mli. Animéba bɔwa afunu kuku é súná mli, púnýá ɔkɔ tsú mli wá. Bulu gyí aní ɔdansiyin. ⁶Anumódunká kanfú tsú nyankpusa ɔkuku, mli, ntée ɔha bambá wá. Kristo *sumbí ayɔpú anígyí. Mú su tekí aníbu ɔkpa sí iwí tswí mli sv, ⁷táme anulólwíí há mli, kí mli fé alíá abí-oyín tekí mu onutó abísú. ⁸Anítehié klé mli asún. Mú su megyí Bulu asun wankláán ámu nkule anúlɔpɔ ba mli, mboún anlési aní iwí é há mli, tsúfé mlílamlí aní adwepú. ⁹Apíó, yée mlékaín agyómá ání anúlɔyɔ ɔpa múa onyé púnýá tóá ilehián aní? Alíá anuméesi ipian tswí mli sv bréá anidé Bulu asun wankláán ámu ɔkan da súná mli sù anúlɔbwe mú alí.

¹⁰Mli ahógyipɔ amv pú Bulu gyí aní adansíɔ alíá anúlɔpɔtsíá mlitɔ. Aní iwí letín, aní asún da ɔkpa, ɔlala é metsiá aní iwí. ¹¹Mliyin ání anulékpa mlitɔ okugyíɔkɔ fé alíá abí-ɔsí tekpá mu abí. ¹²Anúlówa mli atetɔ-ɔnlun, lwíí mli klun, tóí kplá mli aníaa, mlítsiá tsiátɔá ilegíyi Bulu ansí. Múletí mli ɔbée, mlíbénýa mu iwíegíyí pú mu numnyam amv íkɔ.

¹³Tóá svá anutedá mu ipán brégyíbré é gyí, bréá anúlɔpɔ mu asún ámu ba mli á, mlímótsu mú ání nyankpusa wá itsú. Mboún mlílóhɔ mú ání lélé, itsú Bulu wá; tsúfé mú Bulu dépyɔy agyómá mli ahógyipɔ amutɔ ní. ¹⁴Apíó, mlílamlí

fé Bulu ɔpasua ání ububu Yudea ɔmátɔ, bugyi Kristo Yesu klé amu. Mlúwun ipian mli pɪ ubitɔ, fé alɪ ámúbú amú é bowun ipian amú pɪ Yudafɔ ɪbitɔ ámu. ¹⁵Yudafɔ lómɔ Bulu ɔnɔsú atɔípú pú anɪ Wíe Yesu. Amú kén lagya anɪ lé ɔmá ámvtɔ. Butamakle ahá asún, butamagyi Bulu ansí. ¹⁶Bɔkvsú líí anɪsv ká anɪ itin bæ, anímábla ahá ání bumegyí Yudafɔ nkpahɔ́ asún ámu, Bulu ɔhɔ amú nkpa. Ínɪ bwe lahá amú lakpan labiayi. Mú sv ulahá Bulu lanyá ɔblɔ́, ɔbébutí amú ɪsv.

Paulo Lékléá ɔbélayékti Tesalonikafɔ

¹⁷Apíó, anulénatí mli wá ɔpá anímókúsí mɪsv kaín. Mú sv anihíé anidé ɔkpa dunká ání abéla bowun mli ansítɔ́, tsúfé anidé mɪsv kaín dɔbɪ. ¹⁸Anulékléá abélaba mli wá. Mí Paulo onutó ó nabwé agywun ání néyinkí bá ɪvɪ ita tsefɪnɪ, táme ɔbunsám méha ɔkpa. ¹⁹Ma sù anɪ ansí dɪn? Megyí mli sv ansí de anɪ gyí ání abénya ɔkpa tsú ɪwɪ anɪ Wíe Yesu ansítɔ́ bréá ɔbéba? ²⁰Lélé mú á, mɪgyí anɪ numnyam pú anɪ ansigyí.

Timoteo Tesalonika Yɔ

3 ¹Mú sv bréá anímébí alɪá mli tsiátɔ́ igyi, ɪde anɪ háan a, anɪlɔ́bwe agywun anɪaa, anɪ mú abétsiá Atene wúlutɔ́, ²awa anɪ pío Timoteo, ogyi anɪ Bulu agyómáyɔbá Kristo *asun wankláán ámu ɔkandatɔ́ sɪsv mli, ɔbɔwa mli ɔwunlín. ɔtɔɪ kpla mli amlɪlu kínkíínkín hógyitɔ́, ³ménu mltɔ́ ɔkɔkv méeyinkí ɔma asun wunhe anɪ sv. Mli onutó mɪyin ání igyi t́sá ɪda yaí há anɪ Akristofɔ́ dodo. ⁴Tsúfé bréá anɪbu mli wá á, anulébláa mli ání bédunká mɪsv. Lélé bedunká mɪsv fé alɪá mɪyin. ⁵Ínɪ sv bréá netsiá mmetsiá á, nɔwa Timoteo mli wá mbéɛ, ɔbékti alɪá mlidé hógyi amvtɔ́. Tsúfé ɪbétalí ba ání ɔbunsám lasɔ́ mli kɪ, há anɪ gymagyihe labwé kpaali.

⁶Timoteo layínkí pú asun wankláán tsúa mli wá ba anɪ séi, tsú mli hógyi pú mli abadwe ɪwɪ. Alabláa anɪ ɔbéɛ, mli é mlidé anɪsv kaín dɔbɪ. Mlídékléá mlúwun anɪ, fé alɪ ámúbú anɪ é anúdékléá abówun mli ámu. ⁷Mú sv apíó, mli hógyi lawá anɪ atetɔ́-ɔnlɪn, anɪ ipian pú anɪ asun wunhe féétɔ́;

⁸Tsúfɛ mlílí aní Wíe hógyito kínkíínkín. Mú su aní klvɔn ládí aní así. ⁹Ípán mɔmɔ abókuku da Bulu mlí su, ansíá ide aní gyí mu ansító su? ¹⁰Anutehíé bó mpáú kókóli Bulu ɔpa múa onyé aníaa, ɔhá ayinki bowun mlí, méni abósuná mlí tśá íbéha mlí hógyi bófun.

¹¹Aní Sí Bulu onutó mva aní Wíe Yesu bufínki ɔkpa ha aní aba mlí wá. ¹²Aní Wíe ɔhá mlí apíó aba pú ahá fée dwe ɔnó iwa ɔnlɔn, fé alí ámúbú anitɔdwé mlí ámu. ¹³Ɔwá mlí ɔwɔnlín, méni aní Sí Bulu omóowun ɔlala mlí iwí, ifin kuku é méetsiá mlí iwí mu ansító, aní Wíe Yesu mva mu ahá fée ɔbáke amu.

Tsiátśá Ilegyi Bulu Ansí

4 ¹Apíó, útráhe a, anulósuná mlí tsiátó, méni Bulu ansí bégyi mlí iwí. Lélé mú á, alí mlí tsiátó gyí ní. Séi á, anihíé anudé mlí kokóli aní Wíe Yesu dátó aníaa, mlíbwée mú dɔn alí. ²Tsúfɛ mliyin mbla ámúbú anulówa há mlí aní Wíe Yesu idátó ámu. ³Bulu dékléá mlíháa mlí iwí itɔn. Mú su mlímáwa atsi múa ayin asón. ⁴Mlító okugyíɔku ɔbí alíá ɔbékutá iwí, iwítún pú obú ɔkpasu. ⁵Ímábwe ɔwóli laláhe ɔkpasu, fé alíá ahá ání bumeyín Bulu butɔbwé. ⁶Mlító ɔkuku másisií mu ba, swíí mu mu ka. Tsúfɛ aní Wíe ɔbébití ahá ání butɔbwé mú odu ísu. Anudé mlí ɔlá da, fé alíá anulóku bláa mlí yái. ⁷Tsúfɛ Bulu méti aní ɔbéé, abá bɔɔ mbua; mboún ɔbéé, ifin kuku mátsiá aní iwí. ⁸Mú su ɔhagyíɔha ání omegyí atosunáhé anísu á, megyí nyankpusa omédébu. Mboún Bulu ámúbú ɔɔpu mu Ɔɔɔe Wankíhé há mlí ámu.

⁹Imehián ání abówanlín asvansu tsú mlí aba akristofɔ dwe iwí sísí mlí. Tsúfɛ Bulu onutó lasúná mlí alíá mlídwée mlí aba dododo. ¹⁰Ɔnɔkwali a, mlídé apíó ahógyipvá bubu Makedonia ɔmátó fée dwe dodo. Mú su apíó, anudé ipa bwíí há mlí aníaa, mlítráa dwe aba dɔn alí. ¹¹Mlípudínka iwísu ání mlétsiá tsiátó wankláán. Mlípɔ mlí íbɔ yó agyómá púki mlí iwísu, fé alíá anilébláa mlí, ¹²méni mlíaa ahá ání bumegyí ahógyipɔ mlétsiá wankláán, mlíméstrá pu ansí dínká ɔhaasu.

Ani Wíe Yesu Yinkí Bá

¹³Apíó, anidéklé aniaa mlibú ɔɔkwali ání ibu Akristofɔá bawú iwí, méni mliméetsiá gyi awireho fé ahá ání amú ansí medín tɔtɔsu. ¹⁴Anulóhogyi ání Yesu lówu kúsú tsú afúlitɔ. Alí kén anulóhogyi ání Bulu ɔbékpa ahá ámúú boho mu gyi asa bowu ámu ba ni.

¹⁵Ani Wíe onutó atosunáhé anidé mli suná séi á. Aní ahá ání anutráa anutsie nkpa asa aní Wíe ɔbáke ibófun a, anuméegya awupú ámu nkpa yéfia mu. ¹⁶Tsúfé aní Wíe ɔbókplón túmisu, *Bulu-ɔɔɔpu dehen ɔbéle ɔɔ, bófulí Bulu ɔkpe é bréá aní Wíe onutó dékplí tsú ɔsúsú ɔbá. Ahógyipvá bawú bégyankpa kúsú. ¹⁷Mu ɔma a, aní akɔankpawu é féé abóyɔtu amú nwulútaato, aní féé abéyefia aní Wíe afútɔ. Tsú eke ámu a, abétsiá aní Wíe wá bré féé. ¹⁸Mú su mliɔv asún ánfí kíta iklon wa aba iwíto.

Iwísvda Gyo Ani Wíe Ibá

5 ¹Apíó, imehián ání abówanlín bré pú ekeá asún ánfí ibéba sísí mli. ²Tsúfé mli onutó mliyin ání aní Wíe ɔbáke amú ibéba bofwie anitɔ, fé alíá owikplu teba onyé. ³Bréá ahá bee, “Owí latá, asún latá” á, alí bré ámuto béhi ní. Ibófwie amútɔ fé alíá ikwú tekan ɔtsi ɔtsáwule pé. Dhaa méedali mótɔ. ⁴Táme apíó, mli mú mliyin asún ánfí. Mú su mlimétsiá oklúntɔ, méni eke ámu méeba bofwie mliɔ fé owikplu. ⁵Wanki móa ɔyi keheto abí mli féé mligyí. Megyí onyé ntée oklúntɔ abí anigyí. ⁶Mú su mliha agyo, animádidi fé aha bambá. Mliha adunka ansí iwísv, akí iwísv wankláán. ⁷Onyé, adidípú butedídi. Onyé, nta abupú é butɔbú ntá. ⁸Táme aní mú á, wankitɔ abí anigyí. Mú su mliha agyi iwísv. Mliha Kristo hógyi pú aní abadwe ibwe kántɔ-atíntɔ tin aní kántɔ. Mu ɔkpakú ání ɔbóho aní nkpa ibwée kutupa ání ibun aní nwun. ⁹Megyí alíá Bulu obénya ɔbló wa aní, bíti aní isv sù ɔlele aní. Mboún alíá ɔbótsun aní Wíe Yesu Kristosu ho aní nkpa sv. ¹⁰Kristo lówu há aní, méni mu bábu a, ní anlawú o, anubu nkpa o, ania munyɔ abétsiá. ¹¹Mliɔv

asún ánfɔ kɩta klun wa aba iwɩtɔ, pɔwa aba ɔwɩnlín, fé alɩá mlɩdé mú bwe dodo.

Uklá

¹²Apíó, abwíí ipa há mli, mlibu mli ɔnɔ alíupúá buhíé bude agyómá yɔ mlɩtɔ, bude mli anɩ Wíe tsiátɔ suná.

¹³Gyuma ámúú budegyí amu su mlihiɛ bu amú, amlɩdwe amú. Iwilwii itsía mliha mli aba nsuné.

¹⁴Apíó, anidé mli ɔlá da anɩaa, mlɩtɔɩ kpla awɩlyɔpú. Mliwa afúpú atetɔ-ɔnlun. Mlibua amúá bapɔn, amlɩnya klun ha ɔhagyíɔha. ¹⁵Mliki ání ɔhaa mɔɔpu lalaha ká mu ba ɩkɔ. Mboún mlibwe yilé há aba pú ahá féé.

¹⁶Ansí igyí mli, ¹⁷amlibɔ mpái brégyíbré. ¹⁸Mlɩda Bulu ipán tógyítɔtɔ. Múgyí tɔá Bulu dédunká tsú mli wá mli nkpatɔ, bré ánfɩ mliha Kristo Yesunyɔ mlɩlabwé ɩkɩle anfi ní.

¹⁹Mlumákiná tɔá ɔɩe Wankíhé amu tekle bwe.^a ²⁰Mlumábu Bulu ɔnɔsú atɔípu asún ámu tɔku odu. ²¹Mlɩsɔ tógyítɔ kɩ, amlɩkɩta múá ɩbu alétɔ kínkíínkín. ²²Mlikina lalaha kugyíku.

²³Bulu téhá anɩ iwilwii. ɔtún mli iwɩ ɔkpagyíɔkpasu. ɔkú mli nyankpɩsa-oyí, mli ɔɩé pú mli ɔklásu tsú lalaha kugyíkɔtɔ, ménɩ ɔlala méetsiá mli iwɩ anɩ Wíe Yesu Kristo ɔbáke amu. ²⁴Bulu létɩ mli. ɔnɔkwalɩpu ogyi, ɔbóbwe mú.

²⁵Apíó, mlibɔ mpái ha anɩ é.

²⁶Ahá ahógyipu amu féé itsiá gyágyáágyá. Mlɩlata aba puta ɔdwesu.

²⁷Nde mli bláa anɩ Wíe idátɔ mbée, mlɩkla ɔwɩlú ánfɩ suna ahógyipu amu féé.

²⁸Anɩ Wíe Yesu Kristo ogyíi mli buale.

^a 5:19 Ntée Mlumádun ɔɩe Wankíhé ogyá ámu.

Ɔwulú Nyɔɔsɔ́á Paulo

Lówanlín Sísí

Tesalonikafɔ

1 ¹Mí Paulo pú Silwano mua Timoteo dé ɔwulú ánfɔ wanlín sísí ɔpasua ání ibu Tesalonika wúlutɔ, mligyí anɩ Sí Bulu mua anɩ Wíe Yesu Kristo klé.

²Anɩ Sí Bulu mua anɩ Wíe Yesu Kristo bugyíi mli buale, abuha mli iwilwii.

Ipánda

³Apíó, ilehián ání abéda Bulu ipán mli nwunsu brégyíbré. Tsúfé mli dédédáan hógyitɔ tsía. Ɔdweá mli bu ha aba é demoní tsía. ⁴Mú su anɩtɔpú mli tsú iwi Bulu ɔpasua kugyíku ansítɔ; mli nsiwa pú hógyiá ibu mli tɔ, budun mli su, isóki dé mli tɔ, mli latomi su.

⁵Íni déle súná ání Bulu asúngyí da ɔkpa. Tsúfé obótsu mli ání mli lafun ha mu iwíegyí ámú mli dé ipian wúun mú su ámú tɔ yɔ. ⁶Ɔnɔkwali pu Bulu gyí. Ɔbéka ahá ámú bude mli iwɔsuntɔ wa ámu akɔ. ⁷Ɔbéha iwi bólwií ania mli ání mli dé iwɔsin wúun, eke ámú anɩ Wíe Yesu ɔbékplí tsú ɔsúsú bele iwi ɔwan mua mu abɔpu atúmipu amu. ⁸Ogya plenplentɔ ɔbéba bebití ahá ámú bumeyín Bulu^a ámu isu. Tsúfé butamapú anɩ Wíe Yesu iwi *asun wankláán ámu bwé tɔ tɔ. ⁹Amú isubití gyí, amú anɩ Wíenyɔ nsiné bówa ífɔ, mu túmi mɔɔwankí wúlí amúsú, obéyintá amú bré féétɔ. ¹⁰Isubití ánfɔ íbéba eke ámú ɔbéba, Bulu ɔbówa mu numnyam aha wankíhé ansítɔ. Ifú békítá ahógyipu. Mli é

^a 1:8 Bumeyín Bulu, tsúfé bumebu mu.

mlétsiá amú́tɔ́, tsúfɛ mlɔ́hɔ mu iwɪ adánsɛ ámú́bú anlégýí suná mli ámusu gyi.

¹¹Mú su anutɔ́bɔ́ mpáí há mli aniaa, Bulu ɔ́há amlifun nkpa ámú́bú ɔ́letɪ mli ɔ́bée, mlubétsiá ámutɔ́. Mu túmi iháa amlitali bwe yilé ání mlidékléá mlɔ́bwe, pumɔ́ mli hógýi agyómá ɔ́nɔ́. ¹²Ní mletálí bwé íni á, mli su ahá bɔ́pu numnyam há anɪ Wíe Yesu, mu é ɔ́bɔ́wa mli numnyam; fé alí ámú́bú anɪ Sí Bulu mua anɪ Wíe Yesu Kristo awitɔ́le gyí ámu.

Yesu Mua Mblasu Mágyípu Amu

2 ¹⁻²Mí apíó, nobwíí ipa há mli. Anɪ Wíe Yesu Kristo íbá, pú alíá abɔ́bwe kule yéfia mu asún ání mlilanú umákɔ́sí kpunkí mli klun, ntée iha opúni itsii mli. Ní aku bæe, Ɖɛ Wankíhé lalé súná amú lóó, ntée íbu anɪ asun blíhé ntée anɪ ɔ́wulú kutɔ́ ání anɪ Wíe ɔ́báke amu laba dodo kúráá á, mlumáhogyi. ³Mlumáha ɔ́haa ɔ́mle mli ɔ́kpagyíɔ́kpasu. Eke kpɔ́nkpɔ́ntɪ ánfɪ uméeba, nkétɪ ahá bakúsú líí Bulusu, ɔ́há ámú́bú ɔ́tamagyi Bulu mblasu, ɔ́béhi ámu lalin ɔ́wan asa. ⁴Obótsu iwɪ fúá, kúsú líí Bulu, íkpi pú tógýítɔ́á anyánkpúsa butosúmsú, blí ání ɔ́dun amú féé. Obéyetsiá Bulu ɔ́tswékpa unu kúráá, blí ɔ́bée mvgýí Bulu.

⁵Mlumókúkáín ání ntebláa mli asún ánfɪ bréá mbu mli wá? ⁶Mlyin tɔ́á ide mu ɔ́kpa tíin dodo. Nkétɪ mu ɔ́wanlébí lafun. ⁷Tsúfɛ Bulu mblasumágyi túmi ánfɪ ide agyómá yɔ́ ɣáintɔ́ dodoodo, táme ɔ́ku dé mú ɔ́kpa tíin. Mú su nkétɪ ɔ́há ámu ladáli unu. ⁸Ínó mblasu mágyípu amu ɔ́bélin ɔ́wan ní. Táme anɪ Wíe Yesu oyínkí ba a, mu ɔ́nɔ́tɔ́ afú keke íbɔ́mɔ́ mu, mu numnyam é íbɔ́wankí wólí musu yíntá mu. ⁹Ní mblasu mágyípu anɪ ɔ́lun ɔ́wan á, ɔ́bɔ́pu *Satan afunu túmi kpɔ́nkpɔ́ntɪ bwé osúna pú ofúla. ¹⁰Ɖbótsun owuntɔ́lun ɔ́kpa ɔ́tsan-ɔ́tsansu mlé ahá ámú́bú Bulu ɔ́béhi amú ámu. Bulu ɔ́béhi amú, tsúfɛ bumekle ɔ́nɔ́kwali amu asún, ménɪ Bulu ɔ́bɔ́hɔ́ amú nkpa. ¹¹Ínɪ su Bulu ɔ́bɔ́pu afunu ɔ́ɣéá mú ɔ́nɔ́ bu ɔ́nɪn wá amú́tɔ́, ménɪ bɔ́hɔ́ afunu asúnsú gyi. ¹²Ɖbéha ahá ánfɪ bumɔ́hɔ́ ɔ́nɔ́kwali amusu gyi, butekle lakpan bwe ánfɪ féé upón.

Mli Nkpahɔ Su Bulu Léle Mli

¹³Apíóá aní Wíe tɔdwé, ilehián ání abéda Bulu ipán mli nwunsu brégyíbré. Tsúfé tsú bréá ɔyí lelun ɔpá Bulu léle mli ání ɔbɔtsun mu Ɖɛé ámu pú mu ɔɔkwali asún ámúbú mlahogyi amusu tun mli iwí, púhɔ mli nkpa. ¹⁴Ínu sù ɔɔtsun *asun wankláán ámúbú anulébláa mli ámusu tí mli ɔbéé, mlibétsiá aní Wíe Yesu Kristo numnyam amuto ní. ¹⁵Mú su apíó, mli lu kínkíínkín, amlíkita ɔɔkwali ámúbú anulásuná mli ámutɔ, múá anulébláa mli pú múá anuláswanlín sísí mli féé.

¹⁶⁻¹⁷Aní Wíe Yesu Kristo onutó mba aní Sí Buluá ɔɔdwé aní, alawá awitɔle wá aní atetɔ-ɔnlun ání umɔɔmɔ ɔnɔ ekekekeke, anidé itɔ wankláán ɔkpa kú, ɔwáa mli ɔwunlín mli asun blíhé pú mli bwehé kugyíkuto.

Mpáɔ

3 ¹Utráhe-tráhe a, apíó, mli ɔ mpái ha aní. Aní Wíe asún ámu ikósi klei. Ahá abusu obú hɔ mú fé ali ámúbú mli é mlíshɔ mú ámu. ²Mli ɔ mpái, Bulu ɔle aní tsu awuntɔlnpu pú aha laláhe ibtu. Tsúfé megyí ahá féé lóhɔ aní Wíe gyi.

³Táme aní Wíe bu ɔɔkwali. Ɖbɔwa mli ɔwunlín, hɔ mli lé lalahe Ɖwepú ámu ibtu. ⁴Aní Wíe lahá anilahogyi ání mlidé ntobí ámúbú anulásuná mli ámu féé bwe, mli méesi bwe é.

⁵Ɖkpáa mli, amlinu ɔdweá Bulu bu asi ɔɔ ɔtɔtɔtɔ, ɔha amlitomi fé Kristo.

Tsiátɔ Wankláán

⁶Apíó, anidé mli ɔlá da aní Wíe Yesu Kristo idátɔ aníaa, mli mápɔ Akristofɔ ámúbú buna budetsún, butamakle agyómá, bumédé atosunáhé ámúbú anulásuná mli ámusu gyí wa mba. ⁷Mli onutó mliyin ání ilehián ání mlétsiá aní atsiábi. Tsúfé anumówa ɔwuliyɔ, náti tsuntsun bréa aníbu mli wá. ⁸Anumégyi atɔ ɔhaa wá, kíná mú ikɔ ka. Mboún anulásyɔ agyómá ɔpa mba onyé kínkíínkín, ménu anuméesi

ipian tswɪ mlɪtɔ ɔkukubkusu. ⁹Megyí bæɛ, anɪmá ɔkpa bláa mlɪ anɪaa, mlɪkú anɪsu, sù anɪlɔ́bwe mú alɪ. Mboún anɪlɔ́bwe mú súná mlɪ, ménɪ mlɪ é mlɔ́bwe mú odu. ¹⁰Bréá anɪbu mlɪ wá kúráá á, anɪlɔ́wa mbla há mlɪ anɪaa, “ɔhá ání ɔmɔyɔ agyómá mágyi atɔ.”

¹¹Anɪlanú ání mlɪtɔ akɪ butsie kpaalɪ, bumedé agyómá kukubku yɔ. Okéngyé buna budewa tsun. ¹²Anɪdé amó ɔlá da anɪ Wíe Yesu Kristo ɪdátɔ anɪaa, busɪi natí tsun, abuyɔ agyómá nya amó atogyiɛ.

¹³Táme apíó, mlɪ mú á, yilébwe ɪmáta mlɪ ɔɲé. ¹⁴Ní ɔku mégyi asún ánfɪ anɪlawánlín sísí mlɪ ánfɪsu á, mlɪkɪ mu wankláán. Mɪia munyɔ mlumágyi mba, ménɪ péli békítá mu. ¹⁵Táme mlumálu mu, mboún mlɪtɔɪ kpla mu fé mlɪ píó.

ɪklá

¹⁶Iwilwii Owíe amɪ onutó ɔhá mlɪ iwilwii bré féétɔ ɔkpagyɔkpasu. Anɪ Wíe otsía mlɪ féé wá.

¹⁷Mí Paulo onutó lapú mí ɪbɪ wanlín ɪnɪ. Mí dá ánfɪ ntɔwánlín wá mí nwuló féé asɪ, púsúná ání ɪtsú mí onutó wá ní.

¹⁸Anɪ Wíe Yesu Kristo ogyíi mlɪ féé buale.

Ɔwulú Gyankpapuá Paulo Lówanlín Sísí Timoteo

Itsiáha

1 ¹⁻²Mí Paulo ání aní Nkpa Ɖhópu Bulu mua Kristo Yesuá aní ansí dín mvsu lóbwé mí *sumbí ɔɔɔpú, dé Ɔwulú ání wanlín sísí fú Timoteo ání fúgyi mí bí onutó Yesu hógyi amvɔ.

Aní Sí Bulu mua aní Wíe Kristo Yesu bɔgyíi fú buale, abuwun fú nwe ha fú iwilwii.

Afunu Atosunáhé

³Bréá ndenatí nɔyɔ Makedonia nsáintɔ á, nebláa fú mbée, futsíá Efeso ɔmátɔ, afvka ahá ámúɔ bude afunu atɔ suná ámv itin. ⁴Mú ɔma a, da amú ɔlá abusi bré yintá há ɔtewa pú anáin ɔlínɔ kláa tɔntúntín. Nwéengyí keke ɔɔpúba. Itamahá ahá abvtsia nkpa Bulu hógyitɔ. ⁵Tɔ́á svá aníaa fvkáa amú itin gyí, alá Okristoyin okugyíɔku ɔbɔdwe mu ba, mu klvn méeha mu ipón, obénya agywun wankláán múa hógyi onutó. ⁶Aku bumobuo ali ɔkpa ání. Mú sv bafwí yɔ bude asún ání uma así blí. ⁷Budekléá ɔbwe Mose *mbla asunápú, táme bumedeé ɔtɔ ámúɔ budesuná ámv así nu. lde amú bwe fé buyin mú, táme bumeyín mú.

⁸Aniyin ání mbla ámv bu alé, ní ɔɔpúsúná atɔ ɔkpa wankláánsú. ⁹Táme iwánkɔ aní ání megyí yilé abwepú sv Bulu lówa mbla ámv. Mboún ahá ání butamagyí mósú, ahá ání amú asvɔ bu amú ɔnlɔn, ahá ání butamanyá mu ifú, lakpan abwepú, ahá ání amú iwɔ méɔn, ahá ání butɔkpɔ́í

Bulu, ahá ání butómó amú akwúpú pú aha bambá, ¹⁰mbua atópú, ayin ání butekle amú aba ayin pú atsiá butekle amú aba atsi, anyánpúsa ibiá agyípú, afunupu, ahá ání beká ntam butamagyi mósú pú tsiátósá umekanáa atosunáhé wankláán ámú ¹¹Bulu Onumnyampu, ikanfú gyi mu kle amu lópuhá mí obéé, ndáa mú okan amu.

Bulu Paulo Bvaleyí

¹²Nedá aní Wíe Kristo Yesu ipán ání alawá mí owunlín, bú mí onokwalipu obéé, nyóó agyómá ánfí púsum mu. ¹³Teki míteblí mu iwí asun laláhe, ntedínká mu ahásu, súpá amú ní. Táme olowun mi nwe, tsúfé mmohó mu gyi ali bré ámutó, mmeyín tásá ndebwe é. ¹⁴Óo, hie ki aliá ohíé obu awitole! Oheha mí nanya mu hógyi pú mua mí abadweá ibu ania Kristonyo ukulebweto. ¹⁵Asún ánfí ibu mótó, ilehián ání ohagyíoha obóho mósú gyi. Mógyí, Kristo Yesu léba oyító bele lakpan abwepú. Mígyí amótó olaláhe ni. ¹⁶Táme íni su Bulu lówun mi nwe, há Kristo Yesu léle mí ánfí ngyi lakpan obwepú kpokpookpooknti ánfí ní. Méni ohagyíoha obébi ání Bulu tehié nyá klun há ohá ání obéba bohó mu gyi, nyá nkpa ání utamatá. ¹⁷Mliha awa Bulu numnyam, akanfu mu aniaa, “Fúgyí Owíeá fú iwígyí tamamó onó. Bulu Okukúnú okule, butamapú ansíbi wun fu. Fubu unu bré féé, futamawú! *Amen.”

¹⁸Mí bí Timoteo, ató ámú Bulu léle súná tsú fú iwí ámu sú nde mbla ánfí wa há fú. Pú asún ánfí yo agyómá, afupuko atosunáhé wankláán ámu nwunsu. ¹⁹Kita fú hógyito. Bwe tásá fuyin fú klunto ání ibu alé, tsúfé aku babwé tásá buyin ání ima ale. Mú su ilahá amú hógyi lawú. ²⁰Amótó aku gyí Himeneo mua Aleksandro. Napú amú wá Obunsám ibito. Obíti amú isu, méni bébiá mehián ání féblí Bulu iwí abususu.

Bulusúm Mbla

2 ¹Itásá ndedunká ání mligyánkpa bwe gyí, mlukokoli Bulu ahá féé nwunsu, amlibo mpái ha amú. Mluku Bulu ató

há amú, amlida mu ipán ÷hagyí÷ha nwunsv. ²Ilehián ání mlóbwé mú alí há awíe pú ahande é, méni asuto bólwií aní, abétsiá iwilwiit÷, atalí sum Bulu ÷kpagyí÷kpasv. ³Íni búv alé, aní Nkpa ÷hópv Bulu tekle ni. ⁴Tsúfé odekléá ÷bóh÷ ahá féé nkpa, méni bébi ÷n÷kwali amv. ⁵Bulu ÷kukúnú ÷kule bu unv. Nsiné ÷lapú ÷kule pé é bu Bulu muva anyánkpósa nsiné. Mogyí Kristo Yesu, ogyi nyankpósa amv. ⁶Mulési mu nkpa há púh÷ ahá féé nkpa. Asún ánti Bulu lópvhá ÷yí féé mú bré wankláántó ni. ⁷÷n÷kwali nde mli bláa, mmedé afunu wa. Íni sù Bulu léle mí ÷béé, mbwée mu asún ÷kan ÷dapú, mu sumbí ÷y÷pú pú osunápú ha ahá ánti bumegyí Yudaf÷, mí ambla amú ÷n÷kwali asún tsú Yesusu hógyi iwí ní.

⁸Ndekléá ÷pasua kugyíkvto á, ayin ánti amú iwí letun butsiú ibi fva b÷ mpái. ÷bló ntée nwéengyí mátsiá amútó. ⁹Atsi ámu é budída tati ÷kpa wankláánsú. Amú at÷ didáhé máw÷ ansíbi. Bumádun imi bwe, wá sika ató, didá atatiá ibv ibiá dubi. ¹⁰Atsiá bee butenyá Bulu ifú bubwée yilé. Mú ÷béha bówa akíle ni. ¹¹Ilehián ánti bétsiá así díín, ba iwiasí súan ató. ¹²Mm÷kóhá atsi ÷kpa mbée, busúna ayin ató, ntée bugyí ayinsv. Mboún butsiá díín. ¹³Tsúfé *Adam Bulu légyankpá bwé asa ÷l÷bwe *Hawa. ¹⁴Megyí Adam é *Satan lémlé, mboún Hawa ÷lemlé, ÷l÷kvsú líí Bulu mblasv. ¹⁵Táme Bulu ÷bóh÷ ÷tsi nkpa tsun ikwísv.^a Ní ÷letalí kítá mu hógyi pú mu abadwet÷, ÷leha mu iwí letun, oletsíá nkpa é wankláán.

÷pasua ÷hande Bwe

3 ¹Asún ánti bu mútó. Ní ÷ha ÷bwé agywun ánti móbwe ÷pasua ÷hande a, alakle agyómá wankláán. ²Imehián ánti ÷lala bétsiá ÷pasua ÷hande iwí. ÷bwée ÷ka ÷kule otsiápv, mu agywunt÷ da, otegyi iwísv, obú bu musv, ÷t÷h÷ afó, otosúná ató é wankláán. ³÷mábwe nta ÷bvpú ntée ÷há ánti ÷bv iyun. ÷bwée ÷há ánti ÷leba iwiasí, mu asún lolwií.

^a 2:15 Tsvn ikwísv, ntée Tsvn mu abi kwíhészv. Idesuná ánti Tsvn obíá ÷tsi ámu ÷b÷kwísv, ntée tsvn Yesu ikwísv.

Ɖmábwe ɔtrépu, ɔmábwe kóba ɔdwepu. ⁴Ɖbwée ɔhá ání ɔteki mu wóyísú wankláán, mu abí beba iwiasi, butobú mu ɔkpagyókpasu. ⁵Tsúfè ní ɔha méyín mu wóyísú kí wankláán á, nkálu ɔbétalí kí Bulu ɔpasua ámusu? ⁶Ɖmábwe ɔhá ání ɔledamlí kluntɔ mɔkúwá ɔpá. Ní megyí ali á, ibéha mu obótsu iwí, Bulu ɔbétítí mu usu fé Ɖbunsám. ⁷Ínu fée ɔma a, ilehián ání ahá ání buma ɔpasua ámutɔ kúráá bétí mu ɔdayilé. Ní megyí ali á, ɔbékpa wíé Ɖbunsám yibitɔ súpa.

Ɖpasua Ɖhande Ɖbvápu

⁸Ɖpasua ɔhande ɔbvápu é ɔbwée ɔhá ání obú bu musu, ɔma nnonyo, ɔtamabú ntá, ɔma sika ɔnsípe. ⁹Ilehián ání ɔbékutá hógyi asún ámúbú ilalun ɔwan ámutɔ wankláán, mu klun é méétrá ha mu ipón. ¹⁰Mligyankpa pu agyómá iku wa mu ibitɔ, pusu mu kí beɛ ɔlala ma mu iwí, asa amlíha mu ɔbwe ɔpasua ɔhande ɔbvápu. ¹¹Ali kén mu ka^b é ɔbwée ɔtsiá obú bu musu, ɔtamablí ahá iwí asun laláhe, otegyi iwíusu, ɔbu ɔnɔkwali tógyítótɔ ní. ¹²Ɖpasua ɔhande ɔbvápu ɔbwée ɔka ɔkule ɔtsiápu, ɔtetálí kí mu abí pú mu wóyísú wankláán. ¹³Ahá butobú ɔpasua ɔhande ɔbvápu ání ɔɔyɔ mu agyómá wankláán. Itehá mu ɔtetálí tóí tsú mu hógyiá ɔbu Kristo Yesutɔ.

Asun Ɖjainhé Kpɔnkpɔnkpɔnti

¹⁴Nde ɔwulú ánfí wanlín sísí fú, táme ndun ansí ání nókɔsí ba usu. ¹⁵Múmú ní nde ɔpá wa kúráá á, ɔwulú ánfí ibéha fébu tsiátɔ oduá ilehián ání ɔha obétsiá Bulu wóyí, igyi Bulu Ɖkɔnkpapu ɔpasua ámutɔ. Ɖpasua ámu gyí ɔtan pú ntswiasi kpékplékpée há ɔnɔkwali asún ámu ní. ¹⁶Ɖnɔkwali, aní Bulusúm iwí asún ámúbú ilalun ɔwan ámu lómoní. Múgyí, Kristo^c léle mu iwí súná fé nyankpusa.

Ɖje Wankíhé léle mu suná ání yilé ɔbwepu ogyi.
Bulu-abɔpu bowun mu,

^b 3:11 Mu ka ntée ɔpasua ɔhande ɔbvápu tsíhé ^c 3:16 Bulu bu nwulú dada amu akutɔ.

ahá beda mu asún ɔkan súná ɔmá féé.
 Ɔyító ahá bɔho mu gyi,
 Bulu lótsu mu ya ɔsúsú numnyamto.

Afunu Ató Asunápó

4 ¹Ɔɔɛ Wankíhé amu lahié lé blí ɔbéé, bré tráhe amuto á, aku bési Kristosu hógyi. Béyaa asu nú afunu ɔɛé asún pú *ɔɛ laláhe atosunáhé. ²Apinabwebí abwepú afunu ató asunápó anfi bugyi. Amú klun tamatráa ha amú ipón.^d ³Amúdé ahá hie beé, bukísi atogyihe ku, bumátsiá aká mba akúlu é ní. Táme Bulu onutó lóɔwe atogyihe amu, ání ahógyipvá babí ɔnɔkwali amu budáa mu ipán, abugyi. ⁴Tógyítá Bulu léle bu alé. Mú su uma aléá abékisí koku. Ilehían ání abóho kugyíku, dá mu ipán. ⁵Tsúfé Bulu asún pú mpái ámúú anilabó wólí atogyihe amusu ámu lahá mú lamlí Bulu klé.

Kristo Osúmpú Wankláán

⁶Ní fɔpú asún ání tswi apió ámu ansító á, fɔɔwe Kristo Yesu osúmbi wankláán ání bapú hógyi amuto asún, pú atosunáhé wankláán ámu búlá fú, fude mútó. ⁷Máyaa asu nú atsi dehen ɔte pú mba imotsú Bulu iwí. Mboún hie fú iwí, afusum Bulu wankláán. ⁸Tsúfé ní fúde nyankpusa ɔyulúú anfi hie á, labi kpalobí ku bu mútó. Táme ní fɔpú Bulusúm híé fú iwí á, ibu alé dun. Tsúfé oyúla bu mútó há aní séi ání antsie nkpa, pú nkpa ámúú ibéba amuto. ⁹Asún ání bu mútó, ilehían ání abóho mú. ¹⁰(Nkpa ání sú anidé iwí laláa ɔɔ agyómá ɔwɔnlínsú), aní ansí dun Bulu Ɔkiankpapu, ogyi ahá féé Ɔlepú, títriu ahógyipu anfusu ní.

¹¹Suna amú ató ání, afuha amú abugyi mósú. ¹²Máha ɔhaa obu fú kebi. Mboún fú tóto, fú nkpatiátó, fú ahádwe, fú Bulu hógyi pú fú iwitún ibwée atosuanhe ha amú. ¹³Ní mlefia a, bɔ mbódí afotsia kla Bulu asún suna amú. Da asún ámu ɔkan, afusuna amú ató alu yófun bréá néba. ¹⁴Mákiná

^d4:2 Amú klun labwé fé tóá bapú dátó wá ogyá, lé tó mú.

Bulu atokiehé ámúú ɔɔpɔhá fú tsun mu ɔɔsú atɔ́púsu, bréá ɔpasua ahande ɔɔpɔ ibi dínká fúsú amu. ¹⁵Tsia bwe ínu aná, afusi iwɪ ha mú, méni ahá bówun ání fúde nkpa yɔ. ¹⁶Tsia kɪ fú tsiátɔ́ pú atosunáhé amu. Tomi bwe mú alɪ, méni fɔ́hɔ fúa asún ámu anupú nkpa.

Tsá Abóbwe Há Ahógyipu

5 ¹Mákplɔn wa oyin dehen. Mboún tɔɪ bla mu asún fé fú sí. Kita nyasubi ámu fé alá fékítá fú apio yinhé. ²Kita atsi dehen amu fé fú yín, afukita mbitebí ámu é fé fú apio tshé. Máwa amú mba.

³ɔpasua ámu bukú asurapúá buhíé buma ɔbuápɔsu. ⁴Táme ní ɔsurapɔ ɔku bu abí ntée aná á, ha amú abubu tsá ilehián ání bégyankpá bwé há amú akwúpú ntée amú aná Bulusúm ɔkpasu, puka amú akɔ. Múgyí amúsú kɪ, tsúfé mútegyi Bulu ansí ní. ⁵ɔsurapúá ɔhíé ɔma ɔhaa ɔpú ansí dínká Bulusu, tsía ɔɔ mpái ɔpa onyé, kúlí Bulu tsá ide mu hián. ⁶ɔsurapúá mu kle gyí nkpagyí kotóó mú lawú asa ɔna ɔyítɔ́. ⁷Bla ɔpasua ámu asún ánfɪ, méni ɔhaa méeblí ɔsurapɔ ɔkuku iwɪ asun laláhe. ⁸Ní ɔku mékɪ mu abusuanfɔsu, títriu mu wóyítɔ́ ahásu á, múmú aladámlí ɔma há hógyi amu. Ínu su mu lakpan dɔn ɔhá ání ɔmɔhɔ Bulu gyi.

⁹ɔsurapɔ oduá mu idá bétsiá asurapɔ adá ɔwulótɔ́ gyí, ɔsurapúá alahɔ tsú nfí aduesie púya, ɔɔwa ɔɔkwali há mu kulu.^e ¹⁰ɔbwéé ɔhá ání ahá buyin ání ɔɔbwe yilé, fé abísúki, afɔ́hɔ, olosúm Bulu ahá,^f ɔɔbúa ahá ání bude iwɔsun wúun, ɔɔbwe agyómá wankláán kugyíku.


¹¹Máwanlín asurapúá bumɔkúdan adá wá ɔwulú ámuɔ, tsúfé ní amú ɔwólɪ ihá amú ɔɔbwé agywun ání bélatsiá akúlu a, buméétrá talí súm Kristo ɔɔkwalisu. ¹²Ínu íbéha bégyi pón, tsúfé batón amú ntam ání beka há Bulu. ¹³ɔma a, butebí ɔwulɔyɔ wa, yíntá bré náti kí ahá wóyítɔ́. Megyí ɔwulɔyɔ wule, butemlí ahá iwɪ asún ablípú, náti wá ɔɔ ahá

^e5:9 ɔsurapúá ɔmɔkúkiná okúlu kɪ. ^f5:10 olosúm Bulu ahá ntée ɔɔfwí ahógyipu ayabiasi.

asúntó, blí asún ání imehián ání bébli. ¹⁴Ínu su ndekléá asurapu amúú bumɔkúdan amu buwúna tsia akúlu kwu abí, abuki amú wóyísú, méni buméeha aní alupú^g ɔkpa abubli aní iwí asun laláhe kuku. ¹⁵Nde asún ánfí blí, tsúfé asurapu aku badámlí yó bubuo ɔbunsám dodo. ¹⁶Ní Okristoyintse ɔku bu asurapu mu abusuantɔ á, ɔkú amúsú. ɔmási amú tswi ɔpasua ámusu, méni ɔpasua ámu bénya ɔkpa kí amúá buma ɔhaasu.

¹⁷Ilehián ání ɔpasua ámu béka ɔpasua ahandeá bude amú kpa akɔ wankláán, wá amú numnyam. Títriu amúá butɔbɔ mbódí Bulu asún ámu ɔkanda pú mú suná iwí. ¹⁸Tsúfé Bulu asun wanlínhé amu ilebli ɔbéé, “Butamawá ɔnantswieá ɔde ayó da ɔnó ikan.”^h Uletrá blí ɔbéé, “Agyómá ɔyɔpú buteká ɔkɔ.” ¹⁹Ní ɔku ɔdá ɔpasua ɔhande asún súná fú á, máhɔ mú, nkéti fanú mú tsú ahá abanyó-abasá ɔnó asa. ²⁰Wa iyin wa ɔhande amúú ɔde lalahe bwe ámu ɔpasua ámu ansító, méni atráhe bénya ifú.

²¹Nlí Bulu mua Kristo Yesu pú Bulu-abɔpu ání alalé ansító, nde fú hie mbée, fugyí asún ánfisu wankláán. Máki



“Butamawá ɔnantswieá ɔde ayó da ɔnó ikan.” (1 Timoteo 5:18)

^g5:14 Ntéé olupú ^h5:18 Deut. 25:4. Mú asi gyí, “Butamalé ɔkwén pú ɔbu tsítsi ɔsɔlɔɔ.”

ɔhaa ansító ntée fúti futáto ki. ²²Mákɔsí tsíá yái ɔha ɔpasua ɔhande. Máwa ibi ɔha bambá lalaheweto. Ha fú iwí itun brégyíbré.

²³Fú ɔmétɔ ɔ ɔ ámu su mátsiá nu ntsu wole, tsia nu ntá kpalobí-kpalobí.

²⁴Aku lakpan mejaín. Mú su butɔkɔsí wun mú bítí amó us. Aku klé é lejaín, ɔma asa utelin ɔwan. ²⁵Alí kén yilébwe tamaɔaín ní. Ní umɔkɔsí lun ɔwan kúráá á, utebelun ɔwan ɔma.

6 ¹Ilehián ání nkɔbíá bubu ɔpasua ámutɔ béhie bú amó awíe, méni ɔhaa mɔkɔkɔí Bulu mva aní atosunáhé amu. ²Ilehián ání amúá amú awíe bubu ɔpasua ámutɔ bóbu amú awíe amu dun. Séi kúráá ilehián ání bóbu amú dun ni, tsúfé ahógyipu bugyi, butɔdwé amú é.

Afunu Atosunáhé Pú Atonyahé Onutó

Íni aná gyí tɔá fusúna amú, afowa amú ateto-ɔnlun abubwe ní. ³Ní ɔku lósuná atɔ laláhe ku, múa aní Wíe Yesu Kristo asun blíhé pú Bulusúm atosunáhé amu umená á, ⁴idesuná ání ɔhá ámu dé iwí tsu. Omeyín tɔto, nwéenkpangyi labúlá mutɔ. Múá itedáli tsu mútɔ gyí ɔnsípe, utré, isia pú agywun laláhe. ⁵Asún ání imedéhián iwí nwéen ahá ánti odu butenátí gyí. Amú agywun lawú, butamablí ɔɔkwali. Amú odu butosúsu ání Bulusúm igyi ɔkpa kuá fótson músú nyá iwí.

⁶Labi kɔnkɔnti bu Bulusúmtɔ ní tɔá anibu yaí legyi aní ansí. ⁷Tsúfé anumɔpu tɔto ba ɔyítɔ, anuméetalí pú tɔtoɔto é náti. ⁸Mú su ní anibu atogyihe pú atɔ dudáhé a, mliha mú kpán igyi aní ansí. ⁹Ahá ání butekleá bunyáa atɔ á, ibwébwéébwé butekpá wíe usóki pú ayibitɔ. Amú mimlála tekpá amú yówie iwíɔsun múa lalaheto, hí amú. ¹⁰Tsúfé kɔbadwe tɔpú lalahé kugyíku ba. Mú ɔma aku bagya alí, bafwí dali hógyi amutɔ, ulahá amú bude awireho tɔtoɔtoɔto gyí ni.

Paulo Asún Tráhe

¹¹Timoteo, fu mú á, Bulu ɔha fugyi. Mú su ha íni aná iwa ífó fú wá. Hie fú iwí, afubwe tɔá ida ɔkpa. Bɔ mbódí

afvha yilébwe, Bulusúm, hógyi, ɔdwe, klunya pú iwiasibá itsía fútó. ¹²Kɔ hógyi ɪkɔ wankláán ámu. Fú ibi béda nkpa ámúú itamatá, Bulu obékie aní mú ɔma amu. Nkpa ánfí sù Bulu létí fú ní. Mú su fobwii ɔnɔ ahá tsɔtsɔtsɔ ansító, gyi fú hógyi iwí adánsɪ ní. ¹³Nlú Bulu, ogyi tógyító nkpa ɔhapú mu Kristo Yesuá olegyi iwí adánsɪ wankláán Pontio Pilato ansító, nde fú hɛ, ¹⁴mbéɛ, fukíta mbla ánfí féétó wankláán. Mási mótó kpéfun ekeá aní Wíe Yesu Kristo ɔbéle iwí ɔwan. ¹⁵Bulu ɔkukúnú ɔkule amu ilehián ání abékanfú. Mu nkule pé gyí Otúmípu, awíe féétó Owíe. Mu ɔbéle Kristo súná bré wankláán ámúú mu onutó ɔlehɛ yái ámutɔ. ¹⁶Mu nkule pé tamawú, otsie ɔwankíkpa ání ɔhaa tamatálí kpókpé mánta mu. ɔhaa mókúwun mu kí, ɔhaa móowun mu é ekekeke. Mu kle gyí obú múa túmi bré féé! *Amen!

¹⁷Bla ɔyí ánfítɔ iwí anyapú fɛɛ, bumátsu iwí. Bumápu ansí dínká kɔba anfi iméetsiá yó ánfísu. Mboún bupúú ansí dínka Bulusu. Mutéhá aní tógyítóá abóponyá ansigyí ɔyí ánfítɔ. ¹⁸Bla amú fɛɛ, bupúú amú kɔba bwe yilé, amú yilébwe imoni. Busánki ibitɔ abukie ató. ¹⁹Ní bude íni bwe á, bude atonyahé yái há bré ámúú ibá ámu. Amú ibi béda nkpa onutó ámu.

²⁰Timoteo, kítá ɪtɔ ámúú Bulu lahá fú ámu wankláán. Asún ání uma asi, imosuná Bulusúm mádalɪ fú ɔnɔ. Máwa iwí mimlá nwéngyí ání itamasúná Bulusúmtó. Aku butɔwá afunu bɛɛ, asúnbi igyi. ²¹Tsúfé aku batsun músú sí Kristosu hógyi.

Bulu ogyí mli buale.

Ɔwulú Nyɔɔsiá Paulo

Lówanlín Sísi

Timoteo

1 ¹Mí Paulo mú á, Bulu apé su ngyi Kristo Yesu sumbí ɔɔɔpú. Ɖlɔwa mí ɔbéé, nyéda nkpa ámúbú ɔlehie tsun Kristo Yesusu ámu ɔkan.

²Mídé ɔwulú ánfu wanlín sísi fú, mí bí ɔdwepú Timoteo. Aní Sí Bulu mva aní Wíe Kristo Yesu buwúun fu nwe, abugyi fu buale ha fú iwilwii.

Ipánda Pú Ateto-ɔnlun Wa

³Nedá Bulu ipán. Mu ndepu klun ání umedé mí ipón ha súm, fé mí anáin. Timoteo, ní nde mpái bɔ ɔpa mba onyé á, ntekáin fúsú brégyíbré. ⁴Ní nekáin ntsúá felun bréá ndenatí sí fúsú a, ntekleá nówun fu, méni ansigyí bóbulá mító. ⁵Ntekáin hógyiá fubu ɔɔkwalisu. Hógyi anfi odu légyankpá tsíá fú ná Loito ní. Uetrá tsíá fú yín Eunike étó. Nahogyiá mú odu bu futɔ ní. ⁶Íni su nde fú kaín ání foháa Bulu atokiehé ámúbú ɔleha fú bré ámúbú ɔɔpu ibi dínká fúsú ámu ɔnó iwa ogyá tsíá mótó. ⁷Tsúfé Bulu méha aní ɔɔéá abópunyá ifú, mboún múá itehá aní túmi, ɔdwe pú iwisugyi.

⁸Mú su máha aní Wíe asún ámu blí iwa fú péli. Máha mí obudi é iwa fú péli. Mboún wa klun Bulu túmitɔ, afotsula wun iwɔsun ání ilehián *asun wankláán ámu su. ⁹Bulu lóho aní nkpa. Ɖleti aní ɔbéé, abémlí mu aha wankíhé. Megyi tɔtɔ anulóbwe su. Mboún igyi tɔá mu onutó ɔɔbwe agywun ání ɔɔbwe asa ɔyi lebelun. Ɖbéé, ɔbówa awitɔle há aní, dwé aní tsun ania Kristo Yesunyɔ ikulebwesu. ¹⁰Táme séi á, Bulu lalé mu awitɔle ámu ɔwan tsun aní Ɖhópu Kristo Yesu íbasu.

Muléyintá lowu túmi, ɔlele nkpa ání utamatá ɔwan súná an tson ason wankláán ámusu.

¹¹Bulu layáí mí mu ason wankláán ámu ɔkan ɔdapú, mú sumbí ɔyɔpú pú mú osunápú. ¹²Mú sù nde iwɔɔsin ánfí odu wúun ni. Táme mmedé péli nya, tsúfé nyin ɔhá ání nahogyi. Nyin ání ɔbétalí gyo itó ámúú ɔɔɔpɔwá mí ibitɔ ámu iwí alu yófun mu ɔbáke. ¹³Kita ɔɔkwali asún ámúú nosuná fú ámutɔ. Yɔ músú afuho Kristo gyi tsa. Dwe fú aba, tsúfé fúa Kristo Yesunyɔ mlilabwé kole. ¹⁴Ɔɔɔe Wankíhé ámúú ɔbu anitɔ ámu ɔtsáa fú, afutali gyo itɔ wankláán ámúú ɔleha fú ámu iwí.

¹⁵Fuyin ání ahá ámúú bubu Asia, Figelo múa Hermogene bubu amótɔ amu féé banátí sí mí. ¹⁶Aní Wíe owúun Onesiforo wóyítɔ ahá nwe, tsúfé mulétsiá wá mí ansigyí. Omenya mí obudí péli. ¹⁷Bréá ɔleba Roma wúlutɔ á, olodunká mí kpéfɔn bréá olowun ni. ¹⁸Aní Wíe owúun mu nwe mu ɔbáke amu! Fuyin alá ɔɔɔbúá mi nkpa tsɔtsɔɔtsɔɔ Efeso wúlutɔ.

Isá Ɔkɔpú Wankláán

2 ¹Íni su mí bí, ha Bulu awitɔle ámúú ɔɔɔpɔtsun Kristo Yesusu ámu iwa fú ɔwunlín. ²Pu asún ámúú neblí, fonu ahá tsɔtsɔɔtsɔ ansítɔ ámu wa ahá ání bubu ɔɔkwali ibitɔ, méní amú é bétalí súná aha bambá.

³Tomi afuwun iwɔɔsin ámúú anidéwúun amu, fé Kristo Yesu isá ɔkɔpú wankláán. ⁴Isá ɔkɔpú ɔkuku tamatráa kí ɔma, tsúfé odekléá obégyi mu ɔhande ansí. ⁵Alí kén ɔsrú otsíipú ɔkuku tamanyá usgyí atokiehé, nkéti alagyi ɔsrú amu mblasu ní. ⁶Ɔɔɔɔpɔwá ɔbu nsi tégyankpá dá atɔ pɔpwe ɔnó. ⁷Gywun asún ánfí nabláa fú ánfí iwí. Aní Wíe é ɔbéha fonu mú féé asi.

⁸Kan Yesu Kristo, Owíe *Dawid mu na ámusu. Mu Bulu lókusúba tsu afúlito. Múgyí ason wankláán ámúú ndeblí ámu ni. ⁹Asún ánfí sù nde iwɔɔsin wúun, bawá mí ikan fé lalahe ɔbwepú ní. Táme bumɔkúwá Bulu asún ámu mú ikan. ¹⁰Ahá ámúú Bulu lalé ámu su natomi ɔkpagyíɔkpasu nde iwɔɔsin

wúun, méni Bulu ɔbɔtsun Kristo Yesusu ho amú nkpa, amú ibi béda numnyam amóú utamatá ámu. ¹¹ Asún ánfí bu mótó.

“Ní ania munyɔ awú á,
ania munyɔ obétsiá nkpa.

¹² Ní atomi wun iwɔɔsun á,
ania munyɔ abégyi iwíe.

Ní akíná mu a,
mu é obékiná aní.

¹³ Ní anumá ɔɔkwali a,
mu mú á, ɔɔkwaliɔ ogyi,
tsúfé ɔtamatú atsonó tswi, lápú mu ɔdandu tsú
mú ekekekeke.”

Agyú má ɔyɔpúá Olegyi Bulu Ansí

¹⁴ Tsia kain amú asún ánfí. Tɔi kpla amú Bulu ansító fée, bumátsiá tré asúnsú. Labi kuku uma mótó, tsúfé mú odu abwepú butehí. ¹⁵ Bɔ mbódí afɔho idá Bulu ansító, fé agyú má ɔyɔpúá mu agyú má ma mu péli, otosúná ɔɔkwali asún ámu wankláán. ¹⁶ Asún ání uma asi, imosuná Bulusúm mádali fú ɔnó, tsúfé itehá ɔha mua Bulunyɔ nsiné ɔwá ífí. ¹⁷ Alí amúb ɔɔ tekléí ámu a, alí asún ánfí ablípú asún é tekléí ní. Amú aku gyí Himeneo mua Fileto. ¹⁸ Bafwí dali ɔɔkwali ɔkpa ámusu yó budebli bee, kusú tsú afúlitɔ laba ɔbɔtsun, bude aku hógyi yintá. ¹⁹ Táme ntswiasí amúb Bulu lówa há hógyi amu ulí kínkíínkín. Asún ání ɔɔwanlín dínká ntswiasí ámusu gyí, “Aní Wíe yin ahá ání bugyi mu kle.” Nyɔɔsi é gyí, “ɔhagyíɔha ání ɔteti mu iwɔ ɔbéé Okristoyin a, osíi lalahe bwe.”

²⁰ Megyí sika pepe múa sika futútú ató pé tetsiá wóyí yílétó. Oyí múa isi ató é tetsiá inu. Butobú iku dun ku. ²¹ Ní ɔku ɔlé mu iwɔ lé



*Sika pepe múa sika futútú
pó oyí múa isi ató ní.
(2 Timoteo 2:20)*

lalaheweto á, Bulu telé mú yái. Alabwé chá ání alási iwí há, ɔbu labi, mu Wie Bulu ɔbɔpu mu gyi gyuma wankláán kugyíku. ²²Íni su le fú iwí tsu nyasubi móa mbitebí mbagyító. Fówun fúa ahá ámúb butɔpú uklun wankíhé kpólí Bulu ámu ansí bédinká yilébwe, hógyi, ɔdwe pú iwílwíisu. ²³Le fú iwí tsu nwéengyi ání uma labi, ito wankláán kuku méedalí tsu mótótó, tsúfé fuyin ání itré pé itetí. ²⁴Uma aleá aní Wíe osúmpú ɔbɔbwe ɔtrépú. Mboún ilehián ání ɔbɔwa awitɔle há ɔhagyíɔha, ɔbɔbwe osunápú wankláán, otenyá klun há ahá ání amú asún bu ɔnlun. ²⁵Ilehián ání obénya klun tóí kplá ahá ání butɔkúsú líí Bulu asún ámusu. Fíalí Bulu obówun amú nwe, há amú bédamlí kluntɔ, bí ɔɔkwali amu, ²⁶íha amú ansí iba asi. Fíalí íbéha amú bédalí tsu ɔbunsám amúb ɔbéé bugyíi mu asúnsú, abubwe mu apé ámu ayibito.

Nke Tráhe Amuto Asún

3 ¹Táme mí bí Timoteo, bí ání ɔyító bɔwa ɔnlun nke tráhe amuto. ²Tsúfé ahá bɔbwe awunsípú, bɔbwe kɔba adwepú. Bóho amú iwísu gyi, bótsu iwí, bésia ahá, bumóonu amú akwípú asún, buméeyi ahá aye, amú iwí méetin, ³bumɔɔdwe ahá, buméesi asún kíé, bɔbwe ahá iwí asún ablípú, buméetalí gyi iwísu, bɔbwe awuntɔlupu, bumɔɔdwe ito wankláán kuku. ⁴Béle ahá há, bumóosusúu asún iwí, béki amú iwíá budun ɔhagyíɔha, bɔdwe ɔyító ansigyí sí Bulu. ⁵Bɔbwe iwí fé Bulu budesúm, táme békiná mu túmi. Le iwí le ahá ánífti oduto. ⁶Amú odu butebítíwíé ahá wóyító, dámlí atsiá amú ansító ma ɔnlun agywun. Atsi ámu odu á, lakpan lamlí amú ato suráhé, ɔwólí laláhe labúlá amótó. ⁷Butekleá bónu ɔhagyíɔha atosunáhé, táme buméetalí bí ɔɔkwali amu ekekeke. ⁸Alí amúb Yane mu Yambre bɔkúsú líí aní náin Mosesu ámu a, alí ahá ánífti é bakúsú líí ɔɔkwali asún ámusu ní. Amú agywun lawú. Hógyito é á, buma ɔlíkpá. ⁹Táme bumɔɔɔ nkpá dun alí, tsúfé amú mimlá béln ɔwan, ɔhagyíɔha obówun. Alí íleba Yane mu Yambresu ní.

Paulo Asún Tráhe

¹⁰Timoteo, fú mú fuyin mí atosunáhé féeé, mí tsiátó, t́á ɔkpa ngya, mí hógyi, mí iklunya, mí ahá iwí ɔdwe pú alíá notomi wun ipian, ¹¹alíá ahá bedunká mísú pú mí asun wunhe. Múá ɔlɛba misu Antiokia, Ikonion pú Listra ɔmátó. Notomi, aní Wíe léle mí tsú mú féeétó. ¹²Lélé mú á, ɔhagyíɔha aní odekléá obóbuo aní Wíe Kristo Yesu, ɔbwée Bulu apé á, ahá butedínká musu. ¹³Táme aha laláhe pú ahá asisípu mú á, bóyo amú lalahɛbwesu dun ali. Bénatí mlé ahá, ahá é bémlé amú. ¹⁴Táme fú mú á, kítá fú ɔnɔkwali amúb fakásí, fú onutó fahɔ músú gyí amutɔ kínkíínkín, tsúfé fuyin ahá ámúb bosuná fú ató ámu wankláán. ¹⁵Tsú fú nyebitɔ ɔpá febi Bulu asun wanlínhé amu. Mú ɔbétalí há fú nyánsa f́pɔhɔ Kristo Yesu gyi ni. Mú su Bulu ɔbóhɔ fu nkpa é ní. ¹⁶Bulu asun wanlínhé ámu féeé itsú Bulu onutó wá. Ibu aléá bópusúná ɔha, púkíná asún há ɔha, pútswíí ɔha, púbúlá ɔha, íbéha yilébwe bémantá mu, ¹⁷méni íbéla Bulu ɔha bwé wankláán, ɔb́fun ha gyumagyihe wankláán kugyíku.

4 ¹Nlí Bulu muva Kristo Yesuá ɔbéba begyi akɔankpapu pú awupú asún, obébegyi iwíe ansító, nde fú ɔlá da mbéé, ²fudáa Bulu asún ámu ɔkan. Ní fúbu ɔkpa o, fuma ɔkpa o, mási mú blí. Nya klun afutswii amú. Kina asún ha amú. Wa amú atetɔ-ɔnlin, afusuna amú atosunáhé wankláán ámu. ³Tsúfé bré ku íbá, ahá buméetrá ya asu nú atosunáhé wankláán ámu. Bɔbwe t́á íletsíá amú, náttí dúnká ató asunápú oduá bósuná amú t́á budekléá bónu. ⁴Békiná ɔnɔkwali asún ámu yóbuo ɔte. ⁵Táme fú mú á, ha fú ansí íba asu ɔkpagyíɔkpasu. Tomi afuwun iwɔɔsun. Blí asun wankláán ámu wankláán, afubwe agyómá ámúb Bulu léha fú ámu mɔ ɔnɔ.

⁶Mí mú á, bré lafun aní bópu mí obugya wúlí asu fé ntá há Bulu fé afɔdte-abotó. Mí lowu lafun. ⁷Nakó íkó wankláán ámu tá. Natsíí ɔsrú amu é tá. Nakítá hógyi amutɔ kínkíínkín. ⁸Séi á, t́á ída gyo mi gyí usogyí atokiehéá Bulu ɔpóhá ahá aní babwé yilé, aní Wíe Yesu, ogyi asún ogyípú ɔnɔkwali pu amu ɔb́púhá mí eke yilé ámúb obéyinkí ba amu. Táme

megyí mí nkule ɔ́bɔ́bwe íni há. Ɖbéha ahá ámú bude mu yinkí bá ɔkpa kí amu é fée.


Paulo Onutó Iwɪ Asún

⁹Bɔ mbódí afukɔsi ba mí wá, ¹⁰tsúfé ɔyítɔ atɔ de Dema ansigyí wa. Mú su alayínkí mí ɔma, náti ɔyɔ Tesalonika wúluto. Kreske ɔyɔ Galatia, Tito é ɔyɔ Dalmatia. ¹¹Luka nkule bu mí wá nfi. Mú su ní febá á, kpa Marko buo iwɪ, tsúfé ɔtetsá mí agyómá yɔ. ¹²Nawá Tihiko sísi Efeso. ¹³Tsu mí ligá pú mí nwulú ámú nesi tswɪ Karpo wá Troa wúluto ámu ba mi. Mátan nwulú ámú idun nwulú-kpákpású amu ésú.

¹⁴Kɔ́ɔbrɪ atɔ ɔbwepú Aleksandro lópu lalahe ku gyi mi. Ulehan mi wankláán. Anɪ Wíe ɔbéka mu ukɔ. ¹⁵Kí fú iwɪ wankláán musu, tsúfé ɔɔkɔsú líi anɪ asun blíhé féesú.

¹⁶Bréá ahande beha bee nlée mí ɔnɔ á, ɔhaa mélu mí ɔma. Amú fée besrí sí mí. Bulu osíkíe amú. ¹⁷Táme anɪ Wíe lélu mí ɔma, ɔɔwa mí ɔwunlín. Mú su netalí bláa

amú asún ání nde fée, méni ahá ání bumegyí Yudafo fée bónu. Alí Bulu lópulé mí tsú lowuto ní. ¹⁸Anɪ Wíe ɔbéle mí tsú lalahe kugyíkuto. Ɖbékpa mí putɔɔ alu yówie mu ɔsúsú iwíegyí ámutɔ. Numnyam ibwée mu kle bré féeftɔ. *Amen.



*Nwulú mɔ́a ɔwanlɪn-atɔ
ni. (2 Timoteo 4:13)*

Uklá

¹⁹Nehá Priska mɔ́a mu kulu Akwila pú Onesiforo wóyítɔ ahá fée itsiá. ²⁰Erasto lésin Korinto wúluto, Trofimo é délɔ. Mú su nesi mu yái Mileto wúluto. ²¹Bɔ mbódí afɔba asa atsálbí ifun. Eyubulo mɔ́a Pude, Lino mɔ́a Klaudia pú apíó ámu fée behá fú itsiá.

²²Anɪ Wíe ɔkpáa mli, ogyi mli buale.

Ɖwulúá Paulo Lówanlín Sísí

Tito

Itsiáha

1 ¹Mí Bulu osúmbi Paulo, ngi Yesu Kristo sumbí ɔɔɔpó dé ɔwulú ánfí wanlín.

Bulu léle mí ɔbéɛ, mbeha ahá á múú alalé ámu abutra nya hógyi tsiá. Mí ansuna amú abubi ɔɔɔkwálá íbéha amú bétsiá tsiátzá ilegýi mu ansí. ²Fówun íha amú abudínka ansí nkpa ání ítamátású. Bulu tamawá afunu! Múléhíe mú yái asa ɔyí lebelin. ³Aní Nkpa Ɖhóɔɔ Bulu léle mu asún ánfí ɔwan mu onutó brétó, ɔɔɔpúwá mí íbitɔ ɔbéɛ, ndáa mú ɔkan.

⁴Nde ɔwulú ánfí wanlín sísí fú Tito, ání fúgyi mí bí onutó Kristo hógyi amutɔ.

Aní Sí Bulu mu a ní Ɖhóɔɔ Kristo Yesu bugýíi fú buale, abuha fú iwílwíi!

Tito Gyumagyíhe Kreta

⁵Tzá suá nesi fú yái Kreta ɔmátó gyí alíá fómɔ aní agyúmá ɔnɔ ínu, yái ɔpasua ahande wúlugyíwúlusu fé alíá nebláa fu. ⁶Imehián ání ɔlala bétsiá ɔpasua ɔhande íwi. Ɖbwéé ɔká ɔkule otsiáɔ, mu abí bugýi ahógyíɔ. Bubúu ató; bumábwe nyebí laláhe. ⁷Ínǎ Bulu agyúmású ɔpasua ɔhande amu dékí su á, ɔlala mátsiá mu íwi. Ɖmábwe ɔhá ání ɔtamahɔ ahá asún, ntéé ɔtɔkósí nyá ɔbló, ntéé ɔtɔbú ntá, ntéé otekle íkó ntéé ɔbu sika ɔnsíɔ. ⁸Mboún ɔbwéé ɔhá ání ɔtɔhɔ afóó, ɔtɔbwé yilé, ɔbu nyánsa, mu asún da ɔkpa, mu íwi letun, otegyi íwísu. ⁹Ɖbwéé ɔhá ání asún á múú bosuná mu amu íbu mútó. Ílehián ání ɔbékítá mútó kínkíínkín, ménu

Tito

ɔ́bétalí há ahá bóbuo atosunáhé wankláán ámu, tálí gyi ahá ání bégyi atosunáhé amu nwéen é́sú.

¹⁰Tsá svá nde íni blí gyí, ahá tsɔtsɔtsɔ bakúsú líí atosunáhé wankláán ámusu, buɗe asún ání uma labi pumlé ahá. Títriu ketétún mblasu agyípú amu dé íni bwe ní. ¹¹Ilehián ání mléka amú itin, tsúfé buɗe atsá imehián ání bosunátó. Íni lahá abusuan tsɔtsɔtsɔ bafwí ɔkpa. Buɗe mú bwe é púdúnká sika ɔkpa laláhesu tsú ahá wá. ¹²Kretafɔ ámu onutó yébi ɔhapú ɔku kúráá léblí ɔbéé, “Afunupu, mbwíkítá-atɔ, apotsuapu pú awuliyɔpú Kretafɔ bugyi.” ¹³Ɔɔkwali asún ánti gyí. Mú su kina ha amú kínkíínkín, méni amú Kristo hógyi ɔnó bówa ɔnlun. ¹⁴Abusi Yudafo ɔte nu, si ahá ámúb bakíná ɔɔkwali amu atosunáhé é́sú gyí. ¹⁵Ɔhá ání mu iwí létin Bulu ansító á, tógyító iwí létin ha mu. Táme tɔtɔ iwí métin ha lalahe ɔbwepúbá ɔtamaho Yesu gyi. Lélé mú á, mu agywun layíntá, mu klun é ulasí mu ipón ha su ɔtamabí yilé ntée lalaha. ¹⁶Butɔpú ɔnó blí bæe buyin Bulu, táme amú bwehé losuná ání bumeyín mu. Bubu Bulu nyányáa, butamabú mu, butamatálí bwé ito wankláán kukuuku é.

Atosunáhé Wankláán

2 ¹Táme fú mú á, suna amú tsá ilekanáa atosunáhé wankláán ámu. ²Suna ayin dehen amu abugyi iwísu, abubwe ahá ání obú bu amúsú, butegyí iwísu. Buhíe kita amú hógyito kínkíínkín. Buɗwée ahá wankláán, abuhie tomi. ³Suna atsi dehen é abutsia tsiátóá ilekanáa Bulu osúmpú. Bumábwe ahá iwí asún ablípú, ntée ntakpan anúpu. Mboún busúna tsá ibu alé. ⁴Amú atosunáhé iha mbitebí ámu abudwe amú akúlu pú amú abí. ⁵Bugyií iwísu, abuha amú iwí utn. Bubwée atsiá buteki amú wóyísú wankláán, butɔbwé yilé, butobú amú akúlu, méni ɔhaa mɔ́ɔkpɔ́í Bulu asún ámu.

⁶Tɔi kpla niasubi é abugyi iwísu tógyítóá bóbwetɔ. ⁷Fú onutó é ɔɔ mbódí afule tsiátó wankláán suna, fú bwehé kugyíkutɔ. Ha fú ansí ipe, afusuna ɔɔkwali asún ámu tsu fú kluntɔ. ⁸Suna ɔɔkwali amu, méni ɔhaa méetalí kusú líí

fú atosunáhésu. Fówun péli békítá fú alupú, ní bumenya ɔlala blí tsú aní iwí.

⁹Suna nkpábi é abubu amú awíe ɔkpagyíɔkpasu. Bubwée tógyító igyi amú awíe amu ansí. Bumátsiá lé amú asón ɔnó. ¹⁰Bumáwi amú awíe, mboún buwáa ɔnɔkwali ha amú tógyítótó, méni amú bwehé béha ahá ansí bégyi aní nkpa Ɖhópu Bulu atosunáhé amu iwí.

¹¹Tsúfé Bulu lalé mu awítóle ɔwan. Múgyí, odekléá ɔbóho anyánkpusa féé nkpa. ¹²Mu awítóle amu ɔlasúná ání ilehián ání abési lalahe bwe, sí aní ɔwólí laláhe ɔmagyáa, gyi iwísu, bwé yilé, aní asón igyi mu ansí ɔyí ánfító. ¹³Bré ánfí anidé ɔkpa kú há eke yílé ámú Bulu Ɖkponkpon, ogyi aní Ɖhópu Yesu Kristo ɔbéle mu numnyam ɔwan ánfí. ¹⁴Mulótsulá bɔmɔ mu aní su, méni ɔbéle aní tsú lakpan kugyíkuto. Ɖtin aní iwí, pu aní bwe mu onutó ahá, aní ansí ipe yilébwesu.

¹⁵Suna íni aná, afutó kpla amú abugyi músú. Fubu ɔkpa wá iyun wá amú, ní bumedébi bwé. Máha ɔhaa ɔkí fú ansító kótíkótí.

Okristoyin Tsiátó

3 ¹Tsia kaun amú abuba iwíasi ha ɔmá akpapú, abugyi ahande mblasu, abubu amú. Bukú ání bóbwe tóá igyi yilé brégyíbré. ²Bumáblí ɔhaa iwí asun laláhe, bumágyi nwéen é. Mboún bubwée ahá ání bolwíí, abuba iwíasi ha ɔhagyíɔha. ³Tsúfé bré ámu a, aha mimláhe aní é anígyí. Asuto lówa aní ɔnlun. Anilófwí, mlí nkpábi há ɔwólí laláhe pú atóá ɔwá ɔha ansigyí. Aniléyintá bré súsulalahe múa tóá ide aní ansí pe iwí. Ahá bolu aní, aní é anilólu amú. ⁴Táme aní nkpa Ɖhópu Bulu léle mu awítóle pú ɔdweá ɔbu ha aní ɔwan. ⁵Ɖlele aní, táme megyí yilé kuku anilóbwe su, mboún mu nwewúun su. Ɖlɔtsun Ɖɔɔ Wankíhé amusu fwí aní lakpan lé anísu, ɔlélakwíí aní, há aní nkpa pɔpwe. ⁶Ɖlɔtsun aní Ɖhópu Yesu Kristosu, tséí Ɖɔɔ Wankíhé amu wólí anísu. ⁷Ɖlɔbwe aní alí, méni ɔbówa awítóle há aní, tsú mú ání aní asón da ɔkpa, fówun aní ibi béda nkpa ání utamatá ámú anidé mú ɔkpa kú amu. ⁸Asón ánfí bu mótó.

Yiri iwɪ afusuna mú wankláán, méni ahá á múú amú ansí dɪn Bulusu ámu bétsiá bwé yilé brégyíbré. Múgyí tsá ɪbu alé, ɪbówa labi há ɔhagyíɔha ni. ⁹Mápu iwɪ wá mimlá nwéngyí, anáin ɪlɪntɔ kláa, pú mbla ámu iwɪ utrétɔ. Labi ma mútɔ kugyíkutɔ. ¹⁰Tɔ kpla ɔhá ání ɔtetí utré wá ahá nsiné tse nyɔ pé. Mú ɔma a, si mu asún. ¹¹Bi ání ɔhá ámu odu nwuntɔ bu oklún. Oyin ání lalahe mudebwe. Alahá mu iwɪ pón dodo.

Paulo Asún Tráhe

¹²Nenyá wá Artema ntée Tihiko fú wá pé, bɔ mbódí afubɔtu mí Nikopoli wúlutɔ, tsúfé nabwé agywun ání nétsiá unu atsalɪ bí. ¹³Bɔ mbódí afusi mbla osunápú Sena mu Apolo ɔkpa wankláán. Tɔtɔ umáhián amú ɔkpatɔ. ¹⁴Ha anu pi amu é abubi alíá butɔbúa aba agyómá yɔ wankláán, méni bétalí kɪ ahá ání buma tɔtɔsu. Fówun bumóɔbwe ahá ání amú iwɪ mówa labi.

¹⁵Ahá á múú bubu mí wá nfi ámu féé behá fú itsiá. Ahá ahógyipu amúú butɔdwé anɪ ámu itsiá.

Bulu ogyíi mlɪ féé buale.

Ɔwulúá Paulo Lówanlín Sísí

Filemon

Itsiáha

1-2 Mí Paulo ání nda obu Kristo Yesu su pú aní pío Timoteo dé Ɔwulú ání wanlín. Aní dé mú wanlín sísí fú aní pío Ɔdwepú, fúgyi aní agyúmágyá Filemon, fú aní pío tsíhé Apia mua aní agyúmágyá ání ogyi ísá Ɔkɔpú Arkipo mua Kristo Ɔpasua á múú butefia fú wóyító amu fée. 3 Aní Sí Bulu mua aní Wíe Yesu Kristo bogyíi mli buale, abuha mli iwilwii.

Filemon Ɔdwe Pú Mu Hógyi

4 Opío Filemon, ntédá Bulu ipán fú nwunsv brégyíbréá nde mpái bɔ. 5 Tsúfé ndenu alá fude Bulu ahá fée dwe, fúde aní Wíe Yesu hógyitɔ kínkíínkín. 6 Nde Bulu kokóli mbée, ɔháa afutali bla ahá fú hógyi twi asún, ménu íbéha fónu ito wankláán ání anilanyá Kristo búotɔ asi. 7 Mí pío, Ɔdweá fúbu lahá ansí de mí onutó óó gyí, ulawá mí atetɔ-ɔnlun. Tsúfé fú awitɔle lahá Bulu ahá klun ladí amú asi.

Paulo Ipabwíi Onesimo Nwunsv

8-9 Iní su nétalí wá klun kólí fú ató. Tektí mbu Ɔkpa híé fú mbée, fubwée tóá ilehián Kristo su. Táme Ɔdwe á múú mbu ha fú ámu su ndekléá nókulí fú mboún. Mú su tsu mú ání mí oyin dehen Paulo, ngyi fú nyáwíe Yesu su, séi nda obu dé fú kúlí. 10 Nde fú kokóli mbée, fuwúun mí bíá nda obu asa nakwíi mu, ogyi Onesimo nwe. 11 Mu dá ámu asi gyí ɔbu labi. Tektí ɔmɔwa labi há fú bréá ɔlesrí sí fú, táme séi mú ɔbu labi há mía funyɔ.

Flm

12Ntɔdwé mu tsú mí klvntɔ, táme nde mu yinkía sísí fú.
 13Teki ndekléá néha mu otsia fú otsiákpá mí wá nfi, ɔtsa mí
 bré ánfí nda obu Bulu *asun wankláán ámu ɔkan da su ánfí.
 14Táme mmedékléá nɔ́bwe tɔtɔ tsun fú ɔma. Mmedékléá
 néhúe fú é. Ndekléá itsu fú klvntɔ.

15Tsu mú fεε, Onesimo lésrí sí fú bré itinbítɔ́, ménu ɔbéla
 betsiá fú wá bré féé. 16Ɔtráa omegyí ɔkpábi. Alamlí opió
 ɔdwepú onutónutó há mí. Múá idun a, falányá ɔkpábi pú
 opió dun mi séi.

17Mú su ní fuyin ání fú bá gyí mí á, múmú kpla mu wa
 twɔtɔ fé alíá fɔ́bwe mí. 18Ní ɔɔpɔ ulá ku gyi fu, ntée ɔde
 fú ikɔ ku á, bu mú tswi mi. 19Mí Paulo onutó lapú mí ibi
 wanlín íni, “Néka fú.” (lma aleá nébli mbée, fú onutó ámu
 óó á, mílɔ́hɔ fu nkpa.) 20Íni su mí pío ɔdwepú, aní Wíe su
 wa labi ha mi. Ha klvntɔ idu mí así Kristo su.

21Nyin ání fónu mí ɔme bwé dínká tɔ́á nawánlínso. Nyin
 ání fɔ́bwe mú dun alí kúrúá. 22Mú ɔma a, bɔ mbódí afula
 ɔdikpa yai mí, tsúfé nde ɔkpa kíúá Bulu ɔbɔsɔ fu ɔnɔ́, néba
 mli wá.

Uklá

23Epaфра ání mía munyɔ anuda obu Kristo Yesu su ɔhá
 fú itsiá. 24Alí kén mí agyúmáýɔbá Marko mua Aristarko pú
 Dema mua Luka é behá fú itsiá ní.

25Aní Wíe Yesu ogyíi mli buale.

Ɖwulúá Bɔwanlín Sísí Hebrifo

Bulu Asún Ina Mu Bi Ámuvu

1 ¹Bímbí ámu a, Bulu lótsun ɔkpa ɔtsan-ɔtsansu tóí kplá anu anáin bré tsɔtsɔtsɔtsɔ tsun mu ɔnósú atópúsu. ²Táme séi ánfu ɔyí ubá bɔmɔ ɔnɔ ánfu mú á, alatóí kplá anu tsun mu Bi ámuvu. Mvgyí ɔhá ání Bulu léle ání ógyi mu ató ní. Mu Bi ánfisu ɔlɔtsun bwe tógyító. ³Muvu Bulu Ɖkɔnkpɔnti numnyam ɔwánkí tsun. Mvgyí ɔhá ání ɔlehie lian Bulu, ɔde mu asún ámbú ubu túmi ámu pukí tógyítósú ni. Bréá ɔlɔgyvráa anu tá á, oletsíá ɔsúsú Bulu Otúmípu amu gyɔpɔsu.

Bulu Mu Bi Ámu Lófuvá Dvu

⁴Bulu lótsu mu Bi ámu fúá dvu *Bulu-abɔpu féé. Alí kén ɔleha mu dá dvu amú ní. Inu lósuná ání ɔdvu amú féé. ⁵Tsúfí Bulu mókúbláa mu abɔpu amutɔ ɔkukuvuku kí ɔbéé,

“Mí B́ gyí fú,
nde nabwé fú Ś.”

Ntéé bláa amútó ɔkuku ɔbéé,

“Nóbwe fú Ś,
fú é fóbwe mí B́.”

⁶Inu ɔma asa Bulu ɔbówa mu Bití ámu sísí ɔyító á, ɔleblí ɔbéé,
“Mí abɔpu féé busúm mu.”

⁷Tóá ɔleblí tsú mu abɔpu amu mú iwí gyí,
“Nabwé mí abɔpu fé afú.”^a

^a 1:7 afú ntéé ɔhé. Ɖhé múa afú leltan aba Griiki ɔblító.

Nabwé mí asúmpú fé ogya plenplen.”

- 8 Táme ɔlebláa mu Bi ámu mú ɔbéɛ,
 “Óo Bulu, fú iwíegyí méeta ekekekeke!
 Yilébwɛ gyí fú iwíegyí akɔnfra.
 9 Yilébwɛ futekle. Futekísí lalahɛ féé.
 Mú su mí, fú Wíe Bulu nalé fú, dá fú ofúli.
 Napú ansigyí wá fútɔɔ dɔn fú aba.”

- 10 Bulu asɔn wanlínhé amu létrá blí ɔbéɛ,
 “Mí Wíé, fúlówa ɔsulúv ntsɔwɔsɔ bréá fefi ɔyí asɔ.
 Fú onutó ɔbɔ ɔɔɔɔwé ɔsósó.
 11 Mú féé bófwɔ, táme fú mú fétsiá bré féé.
 Mú féé bóbwɛ dáda fé tatida.
 12 Fókuntá mú fé tati.
 Fétse mú fé atadiɛ.
 Táme fú mú futamatse.
 Fú nkpa mɔ́mɔ ɔnɔ ekekekeke.”

- 13 Bulu mébláa mu ɔɔɔɔ ɔkɔkɔ ɔbéɛ,
 “Tsia mí gyɔɔɔɔ,
 yɔfɔn bréá nɔɔɔ fú alupú bwé fú ayabi oyíkpa.” fé
 alá ɔlebláa mu Bi ámu.

14 Ntɔ mɛɛ Bulu-abɔɔɔɔ bɔgyi? Megyí ɔɔɔ bɔgyi, Bulu tɔwá
 bɔtɔbúa ahá ání ɔɔɔɔ amú nkpa?

Nkpahɔ́ Kpɔ́kpɔ́kpɔ́kpɔ́ntɔ

2 ¹Ínu su ilehián ání abékutá ɔɔkwalɔ asún ámúbú anɔlanú
 ámɔtɔ kínkíínkín, ménu uméedali anɔ ɔbɔ. ²Tsúfé mbla
 ámúbú Bulu lówa há anɔ anáin tsɔn mu abɔɔɔɔ amu igyi
 ɔɔkwalɔ. Ínu su ahá ámúbú bɔwa asɔtɔ-ɔnɔn, bɔmegyi músú
 ámu benya ɔsubutí ání ida ɔkpa. ³Nkáli anɔ mú abétalí srí
 ɔsubutí ámu, ní akíná nkpahɔ́ kpɔ́kpɔ́kpɔ́kpɔ́ntɔ ánfɔ? Anɔ
 Wíe onutó légyankpá blí mú asún. Ahá ámúbú bonu mú ámu
 é begyi mú ɔwɔ adánsɛ súná anɔ bɛɛ, ɔbɔ mótɔ. ⁴Bulu onutó

é lóbwe ofúla pú osúna ɔtsan-ɔtsan mu túmitɔ, ɔleha ahá mu *Ɖɔɛ Wankíhé atokiehé bréá iletsiá mu, púdínká ibwi músú ání ɔnɔkwali igyi.

Nkpahóɔ Ɖkpa Osunápú

⁵Bulu mɔ́pɔ ɔyí ámúbú íbá, anidé mú iwɪ asún blí ámu wá mu abɔpu íbutɔ ɔbéɛ, bugyíi músú. ⁶Mboún fé alá ɔku lówanlín wá Bulu asún ámúto ɔtineku ɔbéɛ,

“Óo Bulu, nto nyankpusa gyí, sù fú ansí idun musu ah?

Nto nyankpusa gyí, su fúteki musu?

⁷Bré itinbí kutɔ pé feba mu así dun fú abɔpu.

Fɔpu numnyam pú obú dínká musu,

⁸feha mu ɔde ató féésú gyí.”

Ní Bulu asún ánfɪ déblí ɔbéɛ, “Ató féé” á, idesuná ání tɔto mesian ání ɔmedé músú gyí. Séi ánfɪ á, anumókúnyá wun ání ɔde ató féésú gyí. ⁹Táme anɪlawun Yesu. Bulu léba mu así dun mu abɔpu bré itinbí kutɔ. Awɪtole Bulu lówa bwé mú alɪ, tsúfé ɔleha Yesu lówu ɔhagyíɔha nwunsu. Anɪlabí ání séi á, Bulu lapú numnyam pú obú dínká musu, iwɪɔsun ámúbú olowun, wú ámu su. ¹⁰Bulu, ató féé Ɖlepú pú músú Ɖkípu amu ɔbékpa mu abí tsɔtsɔtsɔ ba mu numnyamto. Mú su íbu aláá ɔlɔtsun Yesu amúbú ogyi amú Nkpa Ɖhópu amu lowusu há mu ɔlɔfun, méni ɔbɔ́hɔ amú nkpa.

¹¹Yesu amúbú ɔtɔgyúráa ahá lé amú lakpantɔ ámu mva ahá ámúbú alagyúra amu féé babwé Ɖsí ɔkule abí. Mú su uma mu péli ání ɔbéti amú ɔbéɛ mu apíó. ¹²Ɖlebláa Bulu ɔbéɛ,

“Nékla fú bwehé súná mí apíó.

Nékanfú fú anɪ ofiákpa.”

¹³Ɖleblí bré bámbátɔ é ɔbéɛ, “Nɔ́pu ansí dínká Bulusu.” Ɖletrá blí ɔbéɛ, “Kɪ, mía abí ámúbú Bulu lapuhá mí ámu líí á.”

¹⁴Ínɪá anyánkpúsa abí ámúbú Bulu lópuhá mu amu bugyi su á, ɔlobwe mu iwɪ nyankpusa fé amú, méni ɔbɔ́tsun mu lowusu swíí Ɖbunsám túmi, yíntá mu. ¹⁵Ɖkpa ánfɪ pésú ɔbétalí tsun há ahá ámúbú benya lowu ifú, su ɔobwe nkpábi amú nkpatɔ féé ámu bégyi iwɪ ní. ¹⁶Tsúfé ida yaí ání megyí

Bulu-abɔɔpu nkpa ɔhɔkpa ɔleba, mboúin Abraham abí-aná. 17Íni su ilehián aní ɔbélian mu apíó tógyítót, méni ɔbɔbwe amú *igyí ɔhapú dehen aní obówun ahá nwe, wá ɔnɔkwali Bulu ansít. Fówun ɔbétalí bɔ amú lakpan iwí afɔɔɔ há Bulu, obésikíé amú. 18Bɔɔ mu kí, mu onutó é ɔlɔtsun iwɔɔsintɔ. Mú su ɔbétalí gyí ahá aní butɔɔ amú kí é buale.

Yesu Dun Mose

3 1Íni su apíó aba aní Bulu latí mli wá ɔsúsú ayɔɔpút, mliɔpu ansí dínka Yesusu. Mvgyí Bulu sumbí ɔɔɔpú pú mu *igyí ɔhapú dehen amú anidé mu iwí asún blí ámu ni. 2Oɔwa ɔnɔkwali há Bulu, Bulu léle mu ɔbéé, ɔbɔɔ mu agyómá fé alí ámú Mose lɔwa ɔnɔkwali há Bulu, Bulu lɔpu mu wóyí féé wá mu ibutɔ ámu. 3Táme obú bu Yesusu dun Mose, fé alí butobú wóyí oyípu dun wóyí ámu. 4Wóyígyíwóyí á, ɔha léyi mú, táme ató féé ɔbweɔpú gyí Bulu. 5Mose lɔbwe osúmpú ɔnɔkwaliɔwá ɔde Bulu wóyísú kí. ɔlebláa amú asún aní Bulu ɔbéblí ekekú. 6Táme Kristo lɔbwe obí ɔnɔkwaliɔwá ɔde Bulu wóyísú kí. Bulu wóyít abí angyí, ní anilɔwa klun kítá mu ɔkpakítɔ kínkíínkín yɔfun mú ɔnómkéké.

Bulu Ahá Bédá ɔkpúnú

- 7Mú su ibu Bulu asún ámutɔ aní *ɔɔɔ Wankíhé léblí ɔbéé,
 “Nde, ní mlonú Bulu ɔme a,
 8 mliwáwa asutɔ-ɔnlun, fé alí mli anáin Israelfɔ
 bɔbwe bréá bɔkúsú líí Bulusu,
 ɔɔ mu kí dimbí ámusu.
 9 Inú mli anáin bɔɔ mli kí ni.
 Ibu mútɔá bowun mí bwehé níí advana (40) kéké.
 10 Íni su nanya ɔblɔ wa amú, blí mbée,
 ‘Butedáli mí ɔma brégyíbré,
 kína mí asúnsú gyí.’
 11 Mú su nanya ɔblɔ ká ntam mbée,
 ‘Ní bówie mí ɔkpúnú ɔdakpá unu fíín! Neká
 nɔtún!’ ”

¹²Mí apíó, mlíkí wankláán ání mlítɔ ɔkuku méenya klɔn laláhe ání itamahɔ Bulu gyi, méni uméeha mu ɔdal Bulu ɔkiankparɔ amu ɔma. ¹³Mboún mlítɔi kpla aba ekekegyíekeá ɔyí lɛke, beti mú “Nde,” fé alíá Bulu asɔn wanlínhé anfi ideblí. Fówun lakpan méemlé mlítɔ ɔkuku, há mu ɔwa asɔtɔ-ɔnlɔn. ¹⁴Tsúfé ní akítá aní hógyitɔ kínkíínkín, fé bré ámúú anilótsɔ hógyi amu yófun mú ɔnómo a, ania Kristonyɔ abékan, bwé toku kole.

¹⁵Fé alíá Bulu asɔn wanlínhé amu léblí. ɔbéé,

“Nde, ní mlonú Bulu ɔme a,
mlumáwa asɔtɔ-ɔnlɔn, fé alíá mli anáin Israelfɔ
bɔksú líí Bulusu.”

¹⁶Amendi lónu Bulu asɔn blíhé, táme bɔksú líí musɔ? Megyí ahá ámúú Mose lékpa tsú Egyipte ɔsulósu ámu féé? ¹⁷Amendi Bulu lénya ɔbló wá nfi advana (40) kéké? Megyí amú kén lóbwe lakpan, bowu sin *dimbísú unu ní? ¹⁸Amendi Bulu léka ntam há ɔbéé, “Ní bówie mí ɔkpúnú ɔdakpá unu fíín! Neká nɔtún?” Megyí ahá ámúú bɔksú líí musɔ ámu? ¹⁹Múmú ulawánkí aní ání amú Bulu máhógyi sú bumɔyɔ ɔsulósu amusu yéda ɔkpúnú.

4 ¹Nhíhíé ámúú Bulu lóbwe ɔbéé, mɔpu mu ɔkpúnú ɔdakpá há aní ámu utráa da. Mú su mlíha akí wankláán, méni uméeba ání mlítɔ ɔku oméenya unu yó. ²Tsúfé beda *asɔn wankláán ámu ɔkan súná aní, fé amú, táme bumɔhɔ asún ámusu gyi. Mú su umowa labi há amú. ³Tsúfé aní ahá ámúú anilahɔ músú gyi amu obówie mu ɔkpúnú ɔdakpá unu. Ahá amúú bumɔhɔ músú gyi amu mú á, Bulu léblí tswí ɔbéé,

“Nenya ɔbló, ká ntam mbéé,

‘Ní bówie mí ɔkpúnú ɔdakpá unu fíín! Neká
nɔtún!’ ”

lbu mútɔ ání Bulu léhíhíé ɔkpúnú ɔdakpá unu yáí tsú bréá ɔlele ɔyí ɔpá. ⁴Tsúfé bɔwanlín eke síénósí amu iwí asún wá Bulu asɔn ámutɔ beé, “Eke síénósí a, Bulu léda ɔkpúnú tsú mu gymagyihe féétú.” ⁵Fé alíá anulanú bɔtsɔn a, Bulu ɔbéé,

“Ní bówie mí ɔkpónú ɔdakpá unv fiín! Neká nɔtún!” 6Íni dēsúná ání aku mú bówie unv. Táme ahá ámúbú begyankpá nú asun wankláán ámu bumenya unv yó, tsúfé bumobu mu. 7Íni sv Bulu létrá hie eke bámbá, ɔletí mú “Nde.” Nfí tsɔtsɔɔtsɔ ɔma a, ɔlɔtsun Owíe *Dawidsu tóí tsú alí eke ánfí iwí, fé alíá íbu Bulu asún ámutɔ ɔbéé,

“Nde, ní mlonú Bulu ɔme a,
mlumáwa asutɔ-ɔnlun.”

8Ní amú ɔkparú *Yosua léha beda ɔkpónú á, tekí Bulu métrá hie eke bámbá. 9Íni sv *ɔkpónú ɔdaké kvá ina ɔtsan ɔda gyo Bulu ahá, fé alíá Bulu léda ɔkpónú eke siénósí amu. 10Tsúfé ɔhá ání olowie ɔkpónú ɔdakpá unv é ladá ɔkpónú tsú mu é mu gyumagiye kugyíkutɔ, fé alí ámúbú Bulu léda ɔkpónú tsú mu kle kugyíkutɔ ámu. 11Mú sv mliha abɔ mbódí awie ɔkpónú ɔdakpá unv, méni anitɔ ɔkuku méesin ɔkpatɔ fé alí ámúbú Israelfɔ ámu bɔwa asutɔ-ɔnlun, besin ɔkpatɔ ámu.

12Tsúfé Bulu asún ámu íbu nkpa, itɔyó agyómá. Íbu ogyá dun ɔdayí íya anyɔ kugyíku. Íteká ɔha alí yówie mu ɔkláa pú mú ɔhé ofiakpa, mu ntsakpá pú mu awú nfɔtɔ. Ítegyí aní agywun pú tśá anitekúle tsú aní kluntɔ asún. 13Tɔtɔɔtɔ tamanjáín Bulu! Tógyítɔ da yayá mu ansítɔ. Mu abóyóbu aní tsiátɔ akúnta kugyíku súná ní.

Aní Bulu Igyí ɔhapú Dehen

14Aníbu *igyí ɔhapú dehen kpɔnkpɔntí ání aladá fá ɔsúsú yó ɔbu Bulu wá. Mugyí mu Bì Yesu. Íni sv mliha akíta Yesu anfí anidé mu iwí adánsie gyí anfitɔ kínkíínkín. Anímádunkí ansí musu. 15Tsúfé mu mú omegyí ɔhá ání omóonu aní así ní anímétálí gyí iwísv. Ogyí ɔhá ání bɔɔ mu kí ɔkpagyíɔkpasu fé aní, táme ɔmɔbwe lakpan ekekekeke. 16Íni sv mliha awa klun, ayɔ Awitɔlepɔ Bulu obíá así. Fówun obówun aní nwe, wá awitɔle, kpá aní aní ohíánke.

5 1Lé butelé igyí ɔhapú dehen okugyíɔku tsú mu aba anyánkpúsatɔ, ɔtelí amú nwun Bulu ansítɔ. ɔtɔhɔ atɔ hahé pú lakpan afɔdié-abɔtɔ tsú amú wá, púhá Bulu igyí. 2Mu onutó é ɔtamatalí gyí iwísv bré tsɔtsɔɔtsɔɔtɔ. Mú sv

otenyá klun há ahá ání bumeyín olala pú amúá bafwí okpa. ³Mú su ilehián ání ɔbɔbɔ afɔɔɔ há mu onutó lakpan, fé alíá ɔtɔbɔ há mu ahá. ⁴Ohaa tamawá mu iwí numnyam ɔbéé, Bulu igyí ɔhapú dehen mɔgyi. Mboún Bulu tétí ɔha, bwé mu mu igyí ɔhapú dehen, fé alíá ɔlobwe *Aaron.

⁵Alí kén Kristo onutó é mɔwa iwí numnyam ání Bulu igyí ɔhapú dehen mɔgyi ní. Mboún Bulu lébláa mu ɔbéé,

“Mí Bí gyí fú.

Nde nabwé fú Sí.”

⁶Bɔwanlín wá Bulu asún ámu ɔtineku é beé, Bulu ɔbéé,

“Bulu igyí ɔhapú fúgyi bré féétó,

fé *Melkisedek.”

⁷Bréá Yesu tsie nkpa ɔsolúv anfisv á, ɔlɔpv kokóli múa isú bɔ mpái, kplón kúklókúú, pú mu atɔ kulíhé tswí Bulu ání ɔbétalí hɔ mu nkpa ansító. Mu iwiasibá sum Bulu su Bulu lónu mu mpái. ⁸Ibu mótóá Bulu mu Bi ogyi mú, táme ɔlɔtsun iwɔsintɔ asa ɔletalí bí alíá Bulubu ihíé igyi. ⁹Íniá ɔlobwe tógyítóá Bulu lówa mu bwe sv á, olemlí okpa ání ahá ání butobú mu féé bótɔsun mósú nyá nkpahɔɔ ání itamatá. ¹⁰Bulu léle mu súná ání ogyi mu igyí ɔhapú dehen, fé alíá ɔleyáí Melkisedek.

Mlumási Hógyi Amvto

¹¹Mbu asún tsɔtsɔɔtsɔá abéblí tsú Melkisedek asún ánfu iwí. Táme mú asile súná mli ibówa ɔnlun. Tsúfé séi á, mlitráa mlumédé asún así nu ɔsasv. ¹²Teki bɔfun alí bré ánfutɔ á, mlulamí asunápú, táme mlilétrá hián ɔhá ání obósuná mli atɔ gyankpapv á ibv Bulu asún ámvto. Múgyí, mliléhián atosuanhéá ulɔɔn fé nyópv-ntsu. Megyí múá ibv ɔnlun fé atɔ wihé ntéé atogyihe onutó. ¹³Táme kebi ɔbɔwe tónyópú. Omeyín tóá gyí yilébwe. ¹⁴Ohande tégyi tóá ibv ɔnlun, tsúfé alatsuntsun ntobító kí, alakásí bí yilé múa lalahe.

6 ¹Mú sv mlumátrá butía aní ayabi ya ɔma. Mliha akasí múá ibéha aní abóyɔ nkpa, así Kristo iwí atosunáhé gyankpapv amvto plá laplá. Mehián ání abétrá suná ató tsú Bulu hógyi pú klvntɔdamlí tsú bwehéá utetí lowu iwí,

²atosunáhé tsú *asúbɔ, ibi pudínká ɔhasu,^b afúlikusú pú Bulu asúngyí eke tráhe amu iwí. ³Ní Bulu lótsulá á, múmú múá ibéha abóyɔ nkpa sɔ́n abósuná mli ngya.

⁴Ní ahá ání bawun Bulu wanki amu ki, badá ɔsúsú atokiehé ɔnɔ ki, banyá Ɖɛ Wankíhé amu é ki, ⁵badá Bulu asún ámú ibu alé ámu pú bré ámú ibéba amu ɔ túmi ɔnɔ ki, ⁶mú ɔma bedida hógyitɔ á, butamatálí trá damlí kluntɔ. Tsúfé amú onutó ámu trá bude Bulu mu Bi ámu da mántá *oyikpalíhesu, tsú mú líi bɛɛ, ahá bubwée mu ahinlá ní.

⁷Anyánkpúsa aku bugyi fé ɔsulá itonu ntsuá nyankpu détswie wulí músú, atɔ tɔwá alé, wá labi há ahá ámu su ámú bɔɔ mú ámu. Bulu toyúlá alí ahá ánfí odu. ⁸Táme aku é bugyi fé ɔsulú ání tunkpa múa awu aná tɔkwe músú, butamawá labi. Ní bumeki wankláán á, Bulu ɔbɔlwí amú, wá amú ogyá.

⁹Táme apíó adwepú, ní nde íni blí ó á, opúni medé mí tsií. Tsúfé nyin ání mlidé atɔ wankláán bwe, idesuná ání Bulu laho mli nkpa. ¹⁰Tsúfé tɔ́a ida ɔkpa Bulu tɔbwé. Ɖméetan mli gymagiye pú ɔdweá mlulalé súná mu tsú mu ahátsatɔ, mlitráa mlibu músú. ¹¹Nhíé ndeklé mbée, mlitɔ okugyíɔku ɔbɔwa iwí ɔwunlín, bwé mú yɔ́fun mú ɔnɔmɔ, fówun itɔ ámú mli ansí ɔnɔ músú ámu ibéba mútɔ há mli. ¹²Mmedékléá mli mlí ɔɛ́tɔ awuliyɔpú. Mboún mlíkasi ahá ámú amú hógyi pú amú iklunya su amú ibi béda itɔ ámú Bulu léhie yáí ámu.

Bulu Lédunká Ibwi Tɔ́a Ɖlehie Yáísú

¹³Bréá Bulu léka ntam há *Abraham a, ɔhaa má unvá ɔɔun mu Bulu. Mú su mu onutó iwí ɔlɔ́puká ntam. ¹⁴Ɖbée, “Nekáse, néhie yúlá fú. Néha fú abí-aná békleí tsɔtsɔɔtsɔ!” ¹⁵Abraham lénya klun. Mú su olenya itɔ ámú Bulu léka ntam ɔbée méha mu amu. ¹⁶Ní ɔku ɔbéka ntam a, ɔhá ání

^b6:2 *Ibi pudínká ɔhasu* igyi amándíé ání ɔpasua ahande butɔbwé púwá ahá ání balé há gyuma ku gyí ɔpasua ámu ɔwunlín, ntée pútsá ahá ulɔ, ntée púkúlí Bulu Ɖɛ Wankíhé há amú.

ɔdun mu idá ɔtɔpóká ntam amu. Isuna ání nwéengyí kuku má mu ntam amu iwɪ. ¹⁷Íni su bréá Bulu dékléá obósuná ahá ámúbú ɔlehɛ tɔ ámu há ámu ání ɔméesetse mu agywun ekekeeke á, ɔletanu mu iwɪ. ¹⁸Bulu tamawá afunu! Mu tɔ ámúbú ɔlehɛ yáí ámu, pú ntam amu igyi atoku anyɔ ání uméesetse ekekeeke. Íni su anɪ ahá ámúbú anlasrí tanu mu amu anɪbu tɔ́á abɔpɔwá iwɪ ɔwunlín, akɪta tɔ́ ámúbú anɪdé ɔkpa kú amutɔ kínkíínkín. ¹⁹Anɪ ɔkpakú anfi lakítá anɪ yáí fé alá ɔtan tekítá obu líí. Anɪ ɔkpakú anfi tekpá anɪ, anɪtɔsun tati ámúbú isian ɔsúsú ɔwankíkpatɔ ɔwankíkpa obu-ɔnɔ́ ámutɔ wíé mótɔ́. ²⁰Anɪ su Yesu lagyankpá yɔ́ ɔbu obu ámutɔ unu dodo. Alamlí *igyí ɔhapú dehen ání ɔbu unu bré féétɔ́ há anɪ fé Melkisedek.

Bulu Igyí ɔhapú Melkisedek

7 ¹*Melkisedek anfi á, owíe ogyi Salem. ɔlobwe ɔsúsúúsú Bulu amu igyi ɔhapú. Eke ɔku Abraham lóyɔ́kɔ awíe abaná aku isá, gyí amúsú. Bréá oleyinkí ɔbá á, olefia Melkisedek. Melkisedek lóyulá mu. ²Abraham léye atɔ́á olenya tsú isá ámutɔ idú, ɔlɔpu idúsí há Melkisedek. Idá ánfɪ asɪ gyí, “Yilébwe Owíe.” Mu idá kule é gyí “Iwilwii Owíe,” tsúfé Salem asɪ gyí, “Iwilwii.” ³Bulu asún meblí asvansu tsú Melkisedek akwíúpú ntée mu ulntɔ, mu kwí ntée mu lowu iwɪ. ɔlelian Bulu mu Bi ámu. Bulu igyi ɔhapú ógyi bré féétɔ́.

⁴Mlɪkɪ alɪá Melkisedek gyí ɔha kɔnɪkɔnɪkɔnɪkɔntɪ ɔku. Anɪ náin Abraham kúráá léye mu atɔ́á olenya tsú isátɔ́ idú, pú iku kule há mu. ⁵Mose Mbla léha Lewi abí-aná, bugyi igyi ahapú ámu ɔkpa ání buhɔ́ atɔ́ yée *idútɔ́ kule tsu amú ahá Israelfɔ́ wá. Ibu mótɔ́ ání Abraham abí-aná amú é bugyi. ⁶Melkisedek anfi mótsú Lewi abí-anátɔ́, táme ɔlɔhɔ́ Abraham atɔ́ yée idútɔ́ kule, yúlá Abraham mboún ámúbú Bulu léka ntam há ámu. ⁷Nwéengyí ma mú iwɪ ání ɔhá ání otoyúlá dun ɔmúvá budevulá. ⁸*Yudafɔ́ igyi ahapú ámúbú butɔhɔ́ Israelfɔ́ atɔ́ idútɔ́ kule amu butowú, táme ɔlɔhɔ́ Abraham atɔ́yeto idúsí anfi mú trá otsie nkpa fé alá Bulu asun wanlínhé amu déblí. ⁹Ní

Heb

anumɔwa afunu a, abétalí blí aniaa, bré ámúú Abraham lópu mu ató idútó kule há mu amu a, Lewi abusuan ámúú butɔhɔ Israelfɔ ató idútó kule amu é beka mú tsun *Abrahamsu. ¹⁰Tsúfé Lewi bu mu nain Abraham iwɔtɔ, bumɔkúnyá kwíí mu asa mu nain lópu mu ató idútó kule há Melkisedek.

¹¹Ibu mótó ání Mose mbla ámu léblí ání Bulu igyí ahapú butsúu Lewi abusuantɔ. Ní bétalí há ɔha ɔbɔfun a, tekti Bulu métrá le mu igyí ɔhapú bámbá ání ogyi fé Melkisedek, omotsú *Aaron abusuantɔ. ¹²Ní betse igyí ahapúle mbla ámu a, múmú ilehián ání bétse Mose mbla ámu é. ¹³Tsúfé aní Wíe anfi anudé mu wɔ asún blí ánti otsú abusuan bámbátó. Abusuan ánti ɔhaa mɔkúsúm *afɔɔɛ-asubwi amusu ki. ¹⁴ɔhagyíɔha yin ání Yuda abusuantɔ aní Wíe anfi otsú. Mose méti abusuan ánti ɔdá bréá ɔde abusuan oduá bɔbwe Bulu igyí ahapú wɔ asún blí.

Bulu Igyí ɔhapú Bambá Ání Ogyi Fé Melkisedek

¹⁵Bulu mbla ánti tsée latráa wankí aní tsía, tsúfé igyí ɔhapú bámbá labele wɔ ɔwan fé Melkisedek. ¹⁶Mbla dada amu ilosuná ání Lewifo nkule ɔbwée igyí ahapú, táme megyí beɛ mu anáin botsú Lewifɔtɔ sù ɔɔbwe igyí ɔhapú. Mboún mu nkpa ání umɔmɔ ɔnɔ ekekekeke túmitɔ ɔna ɔɔbwe igyí ɔhapú. ¹⁷Tsúfé bɔwanlín wá Bulu asún ámutɔ beɛ, “Bulu igyí ɔhapú fúgyi bré féétó, fé Melkisedek.” ¹⁸Idesuná ání balé igyíha mbla dada amu ibwi, tsúfé umɔwa ogyá, umɔwa labi é. ¹⁹Tsúfé Mose mbla ámu métalí bwé tɔtɔtɔ ifun. Séi á, Bulu lapú aní ɔkpakí wankláán ání ɔdun mbla dada amu yáí mú otsiákpá. Múá íbékpiá aní mantáa Bulu.

²⁰Bulu léka Yesu wɔ ntam ání ɔbɔbwe mu igyí ɔhapú bré féétó. ɔmeká igyí ɔhapú bámbá ɔkukukuku wɔ ntam. ²¹Yesu wɔ ntam ání ɔleka bréá ɔɔbwe mu igyí ɔhapú gyí,

“Mí Bulu, naká mí wɔ ntam ání
igyí ɔhapú fúgyi bré féétó.
Mméelatse mí agywun!”

²²lna ntam anfi su Yesu labɔbwe ɔma ɔlúpú há Bulu nhíhé ání íhé bu alé dun nhíhé dada amu.

²³Bulu igyí ahapú ámúbú betsiá nhíhé dada amu ɔnó ámu buhíé butɔ, tsúfé butowú sí agyómá ámu tswi. ²⁴Yesu mú bu unv bré féétó. Mú sv mu Bulu igyíha mómóm ɔnó ekekeeke. ²⁵Mú sv ɔtetálí hɔ ahá ání butɔtsun musu ba Bulu wá féé nkpa plíplíplí. Tsúfé otsie Bulu wá, ɔde mu kokóli amú nwunsv bré féétó.


²⁶Yesu gyí Bulu igyí ɔhapú dehen onutó ání anidéhián ni. Mu iwí letin, tsitsa kuku uma mu iwí. Lalahe kukuvuku é uma mutɔ. Bulu léle mu lé lakpan abwepú ɔkpasu, há mu otsiákpá fváhé ɔsúsúsú. ²⁷Imehián ání mu mú obégyankpá bɔ mu lakpan iwí afɔdie, fé igyí ahapú dehen atráhe amu. Amú mú betsiá bɔ há amú onutó lakpan ekekegyíeke, asa bɔbɔ há ahá atráhe. Ɖsáwule pé mu mú ɔlɔbɔ afɔdie há ahá féé lakpan, bréá ɔlɔpu mu iwí bɔ afɔdie ahá féé nwunsv. ²⁸Mose mbla léha ahá ání bapɔn bɔbwe Bulu igyí ahapú dehen. Táme mbla ámu ɔma a, Bulu léka ntam lé mu Bi. Alahá mu Bi ámu labwé mu igyí ɔhapú dehen ání ɔlɔfun bré féétó.

Ani Igyí Ɖhapú Dehen

8 ¹Asún ání ndeblí féé gyí, aníbu Bulu *igyí ɔhapú dehen ání ógyi alí, otsie Bulu Otúmípu amu obíá gyɔpɔsv ɔsúsú. ²Ɖde Bulu igyí ha Ɖwankíkpátɔ Ɖwankíkpá onutó ání ibv ɔsúsú unv. Mú mú á, Bulu onutó léyi mú, megyí nyankpɔsa.

³Bulu igyí ɔhapú dehen okugyíɔku á, mu agyómá gyí, ɔbɔpu ahá ámu atɔ hahé pú amú afɔdie-abɔtɔ há Bulu. Iní sv ilehián ání aní Bulu igyí ɔhapú dehen Kristo é obénya tɔá ɔbɔpuhá Bulu. ⁴Ní ɔsulúv anísv ɔbu a, teki ɔmɔbwe Bulu igyí ɔhapú ekekeeke. Tsúfé Bulu igyí ahapú onutó bubu unvá butehá Bulu igyí Mose mbla ɔnó. ⁵Igyí ahapú amu butɔtswe Bulu igyí ɔhakpá ání ulélan ɔsúsú *tati-obu ámu. Iní sv Bulu léda Mose ɔlá bréá ɔbɔbwe tati-obu ámu ɔbéé, “Kí ání fɔbwe tógyítɔ fé obu ámúbú nele súná fú ibusv unv ámu odu pépéépé.” ⁶Táme Yesu igyíha agyómá ámúbú Bulu léha mu amu léhié fúá dun ɔsulúsv igyí ahapú dehen amu klé. Ntam

Heb



Bulu ɔtswékpa tati-obu ní. (Hebrifo 8:5)

ɔɔpwe á múú ibu ania Bulu nsuné, Yesu gyí mú ɔma ɔlúpú amu é thíé bu alé dun ntam dada amu. Tsúfé ɔlehie atoyiléá mɔ́bwe há aní wá mútɔ́.

⁷Ntam gyankpapu amu umɔ́fun. Ní ulɔ́fun a, teki nyɔɔsi metrá hián. ⁸Táme Bulu lówun ání anyánkɔ́sa bomebí bwé. Mú su ɔleblí ɔ́bé,

“Eke ɔku íbá. Mí mli Wíe déblí.

Mía Israelfɔ́ pú Yudafɔ́ abéka ntam ɔɔpwe.

⁹Imɔ́ɔbwe fé mú á múú iletsiá mía amú anáin nsuné, bré á múú nekítá amú ibi, kpá amú dalí Egipte ɔsulúsu ámu.

Tsúfé bomegyi mí ntam amusu.

Íni su nesi amú iwí há amú.

¹⁰Ntam anfi obétsiá mía Israelfɔ́ nsuné eke ámu ni. Mí mli Wíe déblí.

Nɔ́pu mí mbla wá amú nwuntu, nɔ́wanlín mú dínká amú klonsu.

Nɔ́bwe amú Bulu, amú é bɔ́bwe mí ahá.

¹¹Amútɔ́ ɔkuku méetrá suná mu pio,

ntée mu ba obée,
obú Bulu.

Tsúfé amú fée bébi mí.

Tsú nyebísú yófun ahandesu.

¹²Nési amú lakpan kíé amú.

Mméetrá kaín lalaheá babwésú.”


¹³Ní ani Wíe dé ntam pɔpwe iwí asún blí á, múmú ilosuná ání dada amv utráa ma labi mu ansító. Tóá uladan bwe dáda a, wu itowú.

Ɔsulúsv Móa Ɔsúsú Bulusúm

9 ¹Bulusúm mbla letsíá Bulu ntam dada amutɔ. Bɔbwe *tati-obu ání bósum Bulu mótó ɔsulúsv nfi. ²Bɔpu tati tin *tati-obu ámu ɔnó, bɔpu ukule é ká mótó. Beti obu gyankpapu amutɔ bɛɛ, Ɖwankíkpa. Ɖkandíe-oyí ání butonywé nkandíe bian músú pú ɔpúnú ání bodobodoá bapóhá Bulu igyí idin músú bu unv. ³Obu nyɔɔsi amú ubu tati nyɔɔsi amv ɔma amutɔ butetí, Ɖwankíkpatɔ Ɖwankíkpa ni. ⁴Sika pepe *afɔdiɛ-asubwi bu unv. Bulu *Ntam-dáka ání bɔpu sika pepe píatá mú iwí fée é itsie unv. Butɔwá ɔhíén ogyá afɔdiɛ-asubwi ámusv. Atoku asa búv Bulu Ntam-dáka ámutɔ. Múgyí, sika pepe ɔlankabi ání atogyihe kvá beti mú *mana bu mótó, *Aaron oyi yíáhé amú ɔlɔpɔí ámu pú abwi pétéplé anyɔ amú Bulu lówanlín mu mbla dínká músú ámu é bu mótó. ⁵Bɔbwe Kerubim anyɔá bubv numnyam, bugyi ntobí akvá bubv abámba dínká ntam-dáka ámu obuasusu. Amú fée betinkí amú abámba fia aba, ilobun dáka ámusv. Amú nsné unv Bulu tesí ahá lakpan kíé amú ní. Táme megyí séi abéle asún ánfí así.

Heb

⁶Alí bela ntobí ámu yáí unv ní. Bulu igyí ahapú ámu butowíé obu gyankpapu, igyi Ɖwankíkpa amutɔ ekekegyíeke yóyɔ amú agyómá. ⁷Bulu igyí ɔhapú dehen pé towíé obu nyɔɔsi, igyi Ɖwankíkpatɔ Ɖwankíkpa amutɔ. Ɖtsáwule pé otowíé unv ofító. Ilehíán ání ɔbɔpu ɔbwi obugya ání ɔbɔpubó afɔdiɛ há Bulu mu onutó nwunsv pú ahá lakpan ání bɔbwe, bumeyín sv ya unv. ⁸Tóá Ɖɔɔe Wankíhé amv désuná tsú ntobí



Bulu Ntam-dáka ní. (Hebrifo 9:4)

ánfí iwí gyí, Ɖwankíkpatɔ Ɖwankíkpa unu ɔkpa lefin wa amú bréá *tati-obu ámu gyí amú Bulu ɔtswékpa. 9Íni igyi atosuanhe há nde ɔyi kehe. Idesuná ání ibu mútɔ́á butɔpó

ato hahé pú afɔdiε-abɔtɔ há Bulu igyí, táme uméetalí há mú ɔhapú ámu klɔn isi mu ipɔn ha ání mu iwí latɔn tsú mu lakpantɔ. ¹⁰Tsúfé ntobíá igyi, atogyihe, atonuhe pú amándíé ání nyankpusa tɔpúgyúra iwí keke mbla ámu losuná. Bulu lɔbwe mbla ámu féé há nyankpusa, ání ɔkíta mótɔ bɔfun bré ánti alabwé ɔkpa pɔpwe ání bɔpubwé mú ánti, animéetra bwe dáda amu.

¹¹Kristo labɔbwe Bulu igyí ɔhapú dehen há ato wankláán ámúú ilaba ámu. Mu *tati-obu ání ɔbu mótɔ bu ɔsúsú. Inu tati-obu ámu dun ɔsolúsu klé, ulɔfun dun mú é. Megyí nyankpusa lɔbwe mú mú, imotsú ɔyí ánti é. ¹²Megyí atrukpa pú nnantswie yínhé obugya Kristo lɔpuya ɔwankíkpatɔ ɔwankíkpa inu. Mu onutó obugya ɔlɔpuya inu, ɔlɔpká aní nwunsu iko ɔtsáwule pé, anúlénya nkpa ání utamatá. ¹³Mose mbla ámu ɔnɔ á, akpaláa pú nnantswie obugya pú ɔnantswiebí ání bawá mu ogyá, alahɔ nsúo butowúnya wulí ahá ání ifin lada amú, púgyúra amú. ¹⁴Ní betalí bude mbwí obugya kúrää putin ahá iwí á, ntogyi su Kristo obugya méetalí tun ahá iwí dun? Kristo lótsun ɔnɔ ámúú ibu inu bré féé ámúsu, pú mu iwí lé mbusuo ání ulɔfun há Bulu. Mu obugya amu íbétin aní kluntɔ tsú bwehéá íbékpa aní wá lowutɔ iwí, méni abétalí súm Bulu ɔkiankpapu amu.

¹⁵Íni su Kristo gyí ntam pɔpwe ání ɔbu Bulu mva anyánpúsa nsiné ɔma ɔlípú, méni ahá ámúú Bulu latí ámu bénya atɔ ámúú itamayintá, ɔlehε yái há amú ámu. Tsúfé Kristo lowu ámu ilahá amú bagyi iwí tsú lakpan ámúú bɔbwe bré ámúú bubu ntam gyankpapu amu así ámutɔ.

¹⁶Ní ɔku ɔwánlín nhúhé há mu atótɔ yéε tswí a, otowú asa itɔyɔ agyúmá. ¹⁷Tsúfé nhúhé ámu uma labi bréá ɔhá ámu onutó tsie nkpa. Mu lowu ɔma itɔwá labi. ¹⁸Íni sù bɔpu obugya sí Bulu ntam gyankpapu amu ésú asa ulɔyɔ agyúmá ní. ¹⁹Tsúfé bréá Mose lékla mbla ámu féé súná Israelfɔ tá á, ɔlɔpu ntsu fráa nnantswie pú akpaláa obugyatɔ, pú kufa iwí imi pepe múa ífá kvá butetí mú Hisop wúnya obugya fráhe amu wulí mbla ɔwulú ámu pú ahá ámu féésú. ²⁰Múú ɔleblí ɔbéε, “Obugya ání ndepusí ntam ání Bulu laká há mlisu ní.”

²¹Alí kén ɔɔɔɔ obugya amu ku wúnya *tati-obu pú ntobí ámúú butɔpútswe Bulu ámu féésú ní. ²²Lélé mú Bulu mbla ámu ɔnó á, abétalí blí anaa, obugya butɔpúgyúra tógyító. Ní bumɔɔɔ obugya lé mbusuo á, lakpansikíé tamaba.

Kristo Afɔɔɔ Télé Aní Tsú Lakpantɔ

²³Alí ilehián aní bɔɔɔwe amándíé ánfí púgyúra ntobí ánfí ígyi fé ɔsúsú klé amu ní. Táme ɔsúsú klé amu ilehián afɔɔɔ aní ihíé dun ɔsulúsu klé anfi. ²⁴Íni sù Kristo mówie *tati-obuá nyankpusa lóɔɔ mu ibi bwé, ígyi fé ɔsúsú klé amu odutɔ ní. ɔsúsú ɔɔɔɔ yélí Bulu ansító, ɔɔɔ mu kokóli ha aní. ²⁵ɔmɔɔɔ mu iwí yɔɔɔ afɔɔɔ tsenyɔ-tsesa, fé alí ámúú Bulu ígyí ahapú dehen amu butɔpú mbwí obugya ya ɔsulúsu ɔwankíkpatɔ ɔwankíkpa unu ofífígyíofí ámu. ²⁶Ní alí ígyi á, tekí ilehián aní Kristo obétsiá wun iwíɔsun wú tsé dú tsé lafa, tsú bréá ɔyí lefi así ɔpá. Mboún alalé iwí ɔwan ɔyí ɔnɔmɔbí ánfí, pú mu iwí ɔɔɔ afɔɔɔ ɔtsáwule pé púlé ahá tsú amú lakpantɔ. ²⁷Ígyi fé alíá ida yáí aní ɔtsáwule pé ɔha obówu. Mú ɔma a, Bulu obégyi mu asún. ²⁸Alí kén Kristo lóɔɔ mu iwí bɔ afɔɔɔ ɔtsáwule pé, púlé ahá tsɔtsɔtsɔ tsú amú lakpantɔ ní. Mú su ní ɔlé iwí ɔwan otse nyɔɔɔ a, imehián aní ɔbétrá bwe tɔtɔ tsú lakpan iwí. Mboún ahá aní buhíé butsie bugyo mu nkpa ɔbá ɔɔɔ.

10 ¹Alí ámúú Mose mbla léle súná aní bupúha Bulu ígyí amu ilelian mú ámúú ibéba amu keke. Mú onutó ámu Kristo labɔɔwe á. Afɔɔɔ oloku ɔkule amu betsiá bɔ há Bulu ofífígyíofí. Táme umetalí há ahá ámúú butebeha ígyí amu abufun Bulu ansító. ²Ní iletalí tin amú iwí Bulu ansító ɔtsáwule pé á, tekí besi afɔɔɔ ámu ɔɔ, amú klun é ilesi amú ipón ha aní babwé lakpan. ³⁻⁴Tsúfé nnantswie yínhé pú atrukpa obugya méetalí lé nyankpusa tsú mu lakpantɔ ekekekeke. Mboún ha utehá mu ɔtekáin mu lakpansu ofífígyíofí. ⁵Íni su bréá Kristo ɔbá ɔyító á, ɔlebláa Bulu ɔbéé, “Megyí atɔ hahé múa afɔɔɔ fúdedunká.

Mboún ɔyulúv fela yáí mí.

⁶Fú ansí megyi mbwí tóhé pú lakpan afɔɔɔ iwí.

7 Múú neblí mbéé, ‘Mí Bulu, mí ní.
Nebá bɔbwe fú apé,
fé alá bɔwanlín mí iwí asún wá
fú asun wanlínhé amuto.’ ”

8 Olegyankpá blí ɔbéé, “Megyí afɔɔɔie múa ato hahé, mbwí tshé pú lakpan afɔɔɔie fúdedunká. Fú ansí megyi mú iwí.” ɔleblí alí, táme mbla ɔkpasú ilehián ání bɔbwe mú. 9 Múú ɔletrá blí ɔbéé, “Mí Bulu, mí ní. Nebá bɔbwe fú apé.” Mú su Bulu lalé afɔɔɔie dada amu ibwi, pú Kristo afɔɔɔie ámu wá mú otsiákpá. 10 Yesu Kristo lɔbwe Bulu apé, pú mu iwí bɔ afɔɔɔie aní nwunso ɔtsáwule pé, há bré féé. Mú su aní iwí latin.

11 Igyí ɔhapú okugyíɔku telí bɔ afɔɔɔie oloku ɔkule amu ekekegyíeke. Afɔɔɔie-abɔɔɔ á múú otenyá pú bɔ mú tsé dú tsé lafa ámu kén ɔɔpú bɔ mú ní. Táme afɔɔɔie ánfí méetalí lé ahá tsú amú lakpantɔ ekekeeke. 12 Kristo mú lénya bɔ lakpan iwí afɔɔɔie ɔtsáwule pé ámu a, iletá féé, oleyétsiá Bulu gyɔɔɔisu. 13 Tsú alí bré ámutɔ ɔpá otsie unu ogyo bréá Bulu ɔbɔpu mu alupú bwé mu ayabi oyíkpa. 14 Mu afɔɔɔie kule pé ámu ulahá ahá á múú Bulu lapú amú bwé mu kle amu bafun ha bré féé, ɔlala kukukuku itráa ma amú iwí.

15 ɔɔe Wankíhé é légyi mú iwí adánsie súná aní. Olegyankpá blí ɔbéé,

16 Aní Wíe ɔbéé,
“Ntam anfi obétsiá mía amúnyɔ nsiné,
bré á múú íbá ámutɔ ní.

Nópu mí mbla wá amú kluntɔ,
wánlín mú wá amú nwuntɔ.”

17 ɔletrá blí ɔbéé, “Mméetrá kaín amú lakpan pú amú lalahesu ekekeeke.” 18 Mú su ní Bulu lasí lakpan kíé á, múmú mú iwí afɔɔɔie kuku itráa medéhián é.

Mlha Akpukpe Manta Bulu

19 Íni su mí apíó, Yesu obugya amu su aníbu ɔkpa wíé ɔsúsú ɔwankíkpátɔ ɔwankíkpá unu faan. 20 Mu lowu ámu su alafínkí tati á múú bɔpuká obu ámutɔ ámu há aní. Múgyí ɔkpa ɔpɔweá itehá aní nkpa ní. 21 Aníbu Bulu *igyí ɔhapú

dɛhɛn kpɔnkpɔnkpɔntɪ ɔkɔvá ɔdɛ Bulu ahásv kú. ²²Mú sv mlɪha apu uklɔn ání ɪbu ɔnkɔkwali, pú hógýiá mú ɔnɔ́ bu ɔnlɪn kpukpɛ manta Bulu. Tsúfɛ alapú Kristo obugya gyúra anɪ. Anɪ klɔn méɛtrá ha anɪ pón, alapú ntsu wánkíhé é fwí anɪ ɪwɪ. ²³Mlɪha akɪta tɔ́ ámúb anidé mú ɪwɪ adánsɛ gyí, anidé mú ɔkpa kú amɔtɔ kínkín, tsúfɛ ɔnkɔkwaliɔ Bulu gyí. ɔbɔ́bwe tɔ́á ɔlɛhɛ ání mɔ́bwe há anɪ. ²⁴Mlɪha akɪ alíá ɪbɔ́bwe abówa aba ɔwɔnlín, ɔdwe múa yilébweɔ. ²⁵Mlumáha asi anɪ ofiakpa yɔ, fé alíá aku budɛbwe. Mboún mlɪha atra wa aba ɔwɔnlín tsíá. Tsúfɛ mlɪdɛwúun ání anɪ Wíe ɔbáke ámu ɪdɛkpupé bá.

²⁶Mí apíó, lakpan ɪwɪ afɔdɛ kɔku ɪtráa ma ɪnɔ há anɪ, ní akɪ ansí bwé lakpan bréá anɪlabí ɔnkɔkwali amu. ²⁷Mboún tɔ́á ɪlasí gyí, abétsiá ifúsú gyo Bulu asún ogyíkɛ pú ogyá kpɔnkpɔnkpɔntɪ ámúb ɪbɔ́hɔ Bulu alupú ámu. ²⁸Ní ahá abanyɔ́-abasá begyi ɔku ɪwɪ adánsɛ, ání alakíná Mose mbla ámusv gyí a, butɔmɔ́ mu. Butamawun mu nwe. ²⁹Múmú ní ɔku ɔkɪ Bulu mu Bi ámu ansítɔ́ kótíkótí, omobu ání mu obugya amúb Bulu lópsí mu ntamsv, ɪlogyuráa mu ɪwɪ ámu bu ɪbíá, olesia Bulu awɪtɔlɛ ɔɲɛ ámu mú á, mu ɪsvɔtí ání ɔbɛhɛ nyá méɛba kú. ³⁰Tsúfɛ anyɪn ání Bulu léblí ɔbɛɛ, “Mí, mlɪ Wíe téká lalahe ɪkɔ. Mí ɔbɛka aha laláhe ako amú lakpan sv.” ɔlɛtrá blí ɔbɛɛ, “Mí, mlɪ Wíe obégyi mí ahá asún.” ³¹ɪbu ifú ání fékpa wíé Bulu ɔkɪankpapu amu agbláɔ.

³²Mlumátan bré ámúb Bulu wankɪ lówankí wólí mlɪsv ámusv. Mlɪkain ání alɪ bré ámɔtɔ á, mlɪlótɔsun ɪwɪɔsun tsɔtsɔɔtsɔɔ, táme mlɪlélí kínkíínkín. ³³Betsiá síá mlɪ, wá mlɪ ɪwɪɔsun ahá ansítɔ́. Bré kɔtɔ́ é á, mlɪlétsa ahá ání buɔɛ ɪwɪɔsun ámu odu wúun. ³⁴Mlɪlósú ha obu adípú. Bréá ahá bɔɔpɔ ɔwɔnlín swí mlɪ atɔ́ á, mlɪlési há amú ansigyísú. Tsúfɛ mlyɪn ání mlɪbu atɔ́á ɪbu alé dɔn mú, ɪbétsiá bré féétɔ́. ³⁵Mú sv ɪmákpɔn mlɪ. Mlɪkɪta ɪwɪ, amlɪlu kínkín, tsúfɛ mlɪbu ɪkɔká kpɔnkpɔnkpɔntɪ Bulu wá. ³⁶ɪlɛhián ání mlótomi, ménɪ mlétalí bwé Bulu apé, fówun mlénýa ɪtɔ́ ámúb Bulu léhɛ yáí há mlɪ ámu. ³⁷Tsúfɛ bɔ́wanlín wá Bulu asɔn wanlínhé amɔtɔ bɛɛ,

“Iméegyí nke kuku Bulu obówotií.

Omówa ópá.

³⁸Ahá ání amó hógyi su Bulu latsú amó ání amó asún da ɔkpa obétsiá nkpa.

Táme ní amútó ɔku mówa klɔn kítá iwɪ mu hógyitɔ, oleyinkí ɔma mú á, Bulu ansí méegyí mu iwɪ.”

³⁹Táme animégyí fé ahá ání badámlí ɔma há Bulu, bafwí. Mboún anigyí ahá ání amó hógyi laho amó nkpa.

Hógyi

11 ¹Hógyi gyí ansí pɔdínká tóá fumɔkúwun, táme fude mú ɔkpa kísv. ²Ahá amúó betsiá bímbí ámu hógyi sù Bulu ansí légyi amó iwɪ.

³Ani hógyi sù anulébu ání asún Bulu léblí púlé ɔyí. Mú su tóá ansíbi towun ledalu tsu tóá ansíbi tamawuntɔ.

⁴Hógyitɔ *Habel lópv mu atɔ hahé ání ɪbu alé dun mu dehen *Kain klé há Bulu igyí. Mu hógyi su Bulu ansí legyi muva mu atɔ hahé ámu iwɪ, olotsu mu ání mu asún da ɔkpa. ɪbu mútótá olowu dododo, táme mu hógyi amu su ɔtráa ɔdetó bɔfun nde.

⁵Hógyi su Enok mówu asa Bulu lótsu mu, ɔhaa mówun mu. Bulu asun wanlínhé legyi mu iwɪ adánsɪe ání olegyi Bulu ansí asa olotsu mu náti. ⁶Mlɪkɪ, ɔhaa méetalí gyi Bulu ansí ní ɔmɔhɔ mu gyi. Tsúfé ilehián ání ɔhá ání ɔbéba Bulu wá obóhogyi ání Bulu bu ɪwɪ, ɔteká ahá ání butodúnká mu ɪkɔ.

⁷Hógyitɔ *Noa lónu asún ání Bulu lébláa mu tsú tóá ɪmɔkúnýá ba iwɪ. Olobu Bulu, sré dáka kpɔnkpɔnkpɔntɪ, púhɔ muva mu wóyító ahá nkpa, bréá ntsu ɪɔbulá. Mu hógyi amu sù ɔyító ahá begyi pón, ɔɔbwe ɔhá ání mu asún da ɔkpa Bulu ansító.

⁸Hógyi léha *Abraham lóbu Bulu bréá Bulu lébláa mu ɔbéé, ɔdálɪ mu ɔmátó, ɔyɔ ɔsulúv ání mu Bulu léhie há musv. ɔlenatí dálɪ mu ɔmátó, omeyín ɔtínéá ɔyó. ⁹Hógyi léha ɔɔyɔbwe ɔfɔɔ ɔsulúv amúó Bulu léhie yáí há mu

amusu. Tati-obuto oletsia unu. Ali ken *Isak mua *Yakob ani Bulu lehie wulubu amu yai ha e betsia tati-mbuto wulubu amusu ni. ¹⁰Tsufe Abraham letsia tati-obuto, ogyo wulu kponkpwonkpontia Bulu leda, imobwie ekekeke.

¹¹Hogyi leha Abraham mua mu ka *Sara benya obi kwii. Lbu mutso ani badan tsun ikwusu, Sara e menya ikwii. Abraham lohogyi ani Bulu obegyi tsa alahie yaisu. ¹²Inu su ma kein ani buma uklato, butso fe ntsrakpabi ntee opu onu isi belun tsu Abraham ani aladan tsun ikwusuto.

¹³Hogyito aha anfi fee bowu. Lbu mutsa amu ibi meda atsa Bulu lehie yai ha amu asa bowu. Tame bowun mu sisi, amu ansi legyi mu iw. Botsu mu ani afoso pu okpa atupu bugyi yai anfito. ¹⁴Aha ani botsu mu ali budele suna ani bude ma ani woswe amu onuto kle dunka. ¹⁵Ni bude ma amuu bedali tsu mutso amu iw susuu a, teki bodunka okpa yinki yo unu. ¹⁶Tame wusu ma ani ibi akile dun mu amuu bedali mutso amusu amu ansi dun. Mu su uma Bulu peli ani beti mu bee, amu Bulu. Tsufe alala wulu kponkpwonkponu ku yai ha amu.

¹⁷Hogyi leha Abraham lekiti mu bi *Isak woswo afodie ha Bulu breaa Bulu loso mu ki. Lbu mutsa obi anfi Bulu lehie mu ani woskwii ni, tame wotswe mu kpokpu. Wokusu pu mu bi wokunu wule amu woswo afodie amu. ¹⁸Lbu mutsa ali bre amuto a, Bulu lablala mu wbee, "Fu bi Isak abi-ana woswe fu abi-ana ni." ¹⁹Tame Abraham lotsu mu ani Bulu wbetali tsinki Isak. Lela mu, okpa woku a, wलयaya Isak fe waha ani Bulu lakusa tsu afulito.

²⁰Hogyi leha Isak loyula mu atabi Yakob mua *Esau. Mu ansi dun ani Bulu woswe tsa wlehie ha amu ekeku.

²¹Hogyito breaa Yakob wba bowu a, oloyula *Yosef abi anyo amu, olobun mu oyi yiahesu sum Bulu.

²²Hogyito breaa Yosef wba bowu a, wleli wbee, Bulu wbele Israelfo tsu Egipte wmatso. Mu su wleda amu wla wbee, bumasi mu awu tswi unu.

²³Hogyi leha breaa wkwii Mose a, woku mu nain tsra asa. Tsufe bowun ani wbu akile. Mu su bumanya owie amu mbla ani wowa tswi ifu.

²⁴Hógyi léha Mose lékiná ání bumáti mu Egyipte owie mu bi tsíhé mu bi bréá ɔledan. ²⁵Olotsulá ání buwáa mu Bulu ahá iwɔsuntɔ, dun ání obénya lakpanbwe iwɔ ansigyí bré itinbí. ²⁶Olotsulá ání busúpa mu *Kristo su. Tsúfé íbéhie wá labi há mu dun ání obénya Egyipte atonyahé féé. Mu ansí dun íkɔá Bulu ɔbéka mu ekekúsú.

²⁷Hógyi léha Mose lénatí Egyipte ɔmátɔ, omenya owie amu ɔbló ífú. Mu ansí dun Bulu ání ɔhaa tamapú ansíbi wunsu. Mú su olotomi, omeyinkí ɔma. ²⁸Hógyi léha mu ɔleha Israelfɔ befi *Katsun Nke gyí asu. ɔleha amú bɔpu obugya kpá amú obu-ɔnɔ, méní *Bulu-ɔbɔpuá ɔtɔmɔ ahá ɔmɔɔpu íbi da amú bití.

²⁹Hógyi léha Israelfɔ bɔtsun ɔpu Pɛpɛ amutɔ fé ɔsulúw wulhesu búna. Táme bréá Egyiptefɔ é bæ abutsun a, ɔpu amu lékitá amú.

³⁰Hógyi léha Israelfɔ benatí bómlí abuntíi ání bɔpu gyi íban wá Yeriko wúlu nken síénɔ, ilobwie bun gbloo. ³¹Hógyi léha obu-ɔnɔ otsiápú Rahab mówu tsía ahá ání bumɔhɔ Bulu gyitɔ. Tsúfé ɔlɔhɔ Israelfɔ ansí awakupu afɔw wankláán.

³²Ilehián ání nétrá wanlín iku é? Bré mɔtsɔ ání nɔwanlín Gideon mu Barak pú Samson, Yefta mu *Dawid, Samuel mu Bulu ɔnɔsú atɔpú amu hógyi iwɔ asún. ³³Hógyi léha amú bɔkɔ ɔmá-ɔmá gyi amúsú, bɔbwe tɔá ida ɔkpa. Benya atɔá Bulu léhie há amú, beha agyatá ndatɔ leklí. ³⁴Bodun ogyá kpɔnkpɔnti, bumésin ísá. Hógyi léha amú bɔkɔ benya ɔwunlín, amú aku benya íkɔ túmi, gyi amú anyabású. ³⁵Bulu létsinkí atsi aku afúli há amú. Ahá bepítí amú aku atɔ alu mɔ amú. Mú óó á, bumotsulá kíná Bulu. Uɔwa amú ɔdweá bómu amú dun ání béyinkí Bulu ɔma, méní Bulu ɔbɔkusú amú, bénya nkpa ání íbu alé dun.

³⁶Bɔbwe amútsɔ aku ahinlá, pítí amú mpli. Bɔwa amú aku íkan, pú amú tswi obu. ³⁷Beda amútsɔ aku abwi mɔ, pú saa bóí akutɔ, aku é besin ɔdayí ɔnɔ. Amú aku é bedi akúfa múa akpaláa nwulú-kpákpátɔ nátí kí, aku bedi akún. Bedunká akusu, wá amú aku é iwɔsuntɔ. ³⁸Teki megyí ɔyí ánfí odutɔ ahá ánfí bétsiá asa. Adimbítɔ múa abusu benatí kí fé ɔkun abɔpú, tsía dí abwi alatɔ múa mbótɔ.

³⁹Amú hógyi sù Bulu ansí légyi amú féé iwí. Ɖkuku ibi mēda t́á Bulu léhɛ yáí. ⁴⁰Tsúfé at́á ibu alé, ib́owa labi iwí Bulu ĺbwe agywun yáí há ania amúnycó féé. Mú su amú nkule buméetalí nyá mú, ýofun bréá Bulu labwé ania amúnycó féé anilafun mu ansító.

Ani Sí Bulu

12 ¹Anibu ɔɔm anfi bɔpu hógyi tsíá ánfu odu bómlí anu. Mú su mliha anu é atswi tógyít́á ide anu bitía ya ɔma pú lakpan ání ilakíklí anu kínkíínkín tsalífwi, atomi tsii ɔsrú amúbú ida anu ansító ámu. ²Mliha apu ansí dínka Yesusu. Múgyí anu hógyi nfiasí pú mú ɔ́nɔ́mɔ. Íniá oyin ansigyí oduá ida gyo mu su á, olotomi wun ipian *oyikpalíhesu wú. Omobu kpóí ání b́ókpóí mu tɔtɔ, alayó otsie Bulu owíe obiá ámu gyɔpɔsu.

³Mlipuki ipian ání olotomi wun lakpan abwepú ibitɔ, bréá bolu mu, wá mu iwɔsɔntɔ, méni ɔ́ɛ méeta mli, mluméesi mu hógyi. ⁴Iwíá mlidépri le iwí lakpantɔ á, mlumókútálí pri ýofun bréá mlési mli nkpa há. ⁵Mlumátan ut́í ání Bulu ĺt́í kplá mli ánfu mli gyí mu abísú. Ɖbée,

“Mí bí, ní nebítí fú isu á, máhɔ mú lalaha su.

Ní ɔ́wá iyin wa fu á, máha mú ikpɔn fu.

⁶Tsúfé ɔ́há ání ntɔdwé á, mu ntɔwá iyin wa.

Ɖhá ání ɔ́púbwé mí bí á, mu ntebítí isu.”

⁷Tomi wun ipian fé isu buɔe fú bití. Bulu dé mli isubití fé mu abí. Tsúfé obi ɔ́mɔmu bu unvá mu si tamabítí mu isu? ⁸Ní ɔ́mebití fú isu fé alíá ɔ́ɔbwé mu abí féé á, idesuná ání megyí mu bi onutó fúgyi, klétobi fugyi mu. ⁹Anu ɔ́sulúv anfisú así butebítí anu isu, anitóbú amú é. Ntogyi sù animóotsulá ba iwiasí há anu Sí Bulu dɔn amó, anya nkpa ání utamatá? ¹⁰Bré itinbí pé anu ɔ́sulúsu así butɔpúbítí anu isu alíá buɔeklé. Bulu mú á, alíá ab́owa alé su ɔ́tebítí anu isu, méni anu é anu iwí bétun fé mu. ¹¹Ní buɔe anu isu bití á, itehan anu alí bré ámɔtɔ. Ansí tamagyí anu. Táme isubití ámu ɔ́ma a, anitɔbwé yilé, tsíá iwilwiitɔ.

Atosunáhé Pú Oláda

12Mú su mli máha abatɔ iwu mli, akpawunuto ikpunku mli. Mliwa iwɔ ɔwunlín! 13Mliha mli tsiátɔ iwa alé, méni abubúpu amu buméesin tsukule, mboún bénya ulotsá.

14Mliɔ mbódí amliha iwilwii itsia mliha ɔhagyícha nsuné. Mlitsia nkpa ání mú iwɔ letin, tsúfé ɔhá ání mu iwɔ métin móowun anɔ Wíe. 15Mliki ání mlitɔ ɔkukuvuku mɔɔhulú Bulu awitɔle amu. Mlitɔ ɔkuku é mási asún wá mu kluntɔ, méni ɔmɔɔpu asún wá mli nsuné, iyinta mlitɔ aku. 16Mliki ání mlitɔ ɔkuku é mɔɔbwe mu iwɔ mbua ɔtɔpú, ntée ɔhá ání ɔtamabú Bulu fé *Esau. Mlɔɔpu mu hande tse ɔtsáwule atogyihe. 17Fé alá mliyin yaí á, ɔma a, olobodunká obi dehen oyúla tsú mu si wá, táme mu si lékiná mu ha. Ibo mútɔ́á ɔlehie su kokóli mu si, táme omenya mútɔ́ ɔkpa.

18Megyí ibvá mlétalí pu ibi da asi mlilaba. Ɖínéá oklún tuun pú afú kpɔnkpɔɔnkpɔnti bu, ogyá é idetsíí fé Sinaibu ámúú Israelfɔ bɔyɔ mú asi bréá Bulu dépu mu mbla há amú ámu asi mlilaba. 19Inú bonu ɔkpe lɔfulí kúklóókú, bonu ɔme kpɔnkpɔɔnkpɔnti ku lelun bláa amú asún, su bokokóli bee itsia ali, bumedékléá betrá nu asvansu. 20Tsúfé bumetalí gyí mbla ámúú Bulu lówa há amú ɔbéé, “Ní ɔbwi ɔku kúráá iwɔ ida ibu ámu a, budáa mu abwi mɔ” ámu su. 21Tɔ́á bowun unu lówa amú ifú. Mú su Mose óó léblí ɔbéé, “Ifú lahá mí ndekpunkí!”

22Mli mú á, *Sionbu asi mlilaba. Bulu Ɖkɔankpapu amu wúlu yilé, igyi ɔsúsú Yerusalem pú Bulu-abɔpu mpím-mpím ansí ogyíkpa mlilaba. 23Bulu bití ámu abí, bugyi ahá ámúú bawánlín amú adá ɔsúsú ámu ofiakpa mlilaba. Bulu, ogyi ahá féé asún ogyípú amu wá mlilaba. Mlilaba ahá ámúú Bulu latsú amú ání bafun amu akláa wá. 24Yesu wá mlilaba. Mgyí Bulu mua anyánpúsa nsuné ntam ɔma ɔlúpú ni. Yesu obugya wúnyáhe amúú ulɔpu yilé ba dun *Habel obugya amu wá mlilaba.

25Mú su mliki wankláán, méni mli méekiná Bulu ámúú ɔde mli asún bláa amu. Tsúfé Israelfɔ ámúú bekiná asún ání ɔlɔwa Mose blí Sinaibu asi nu ámu bumetalí srí sí isubití

ámv. Ní aní é akíná ɔhá ánfí ɔdetɔí tsú ɔsúsú ánfí ɔme nu á, aní usbutí bódun amú klé. ²⁶Bréá Bulu lótoí Sinaibusu á, mu ɔme léha ɔsulúv lekpunkí. Táme séi á, alahíé ɔbéé, “Nétra kpunkí ɔsulúv ɔtsáwule, kpínkí ɔsúsú é tsia mótó.” ²⁷“Nétra kpunkí mú ɔtsáwule” aní idesuná ání Bulu ɔbékpunkí atɔ bwehé ámv, lé mú unv. Tśá uméekpunkí ekekekeke pé obésian.

²⁸Mú sv mlíha ada Bulu ipán. Tsúfé iwíegyí ání uméekpunkí abénya tsú mu wá. Mlíha abu mu, anya mu ifú, méni abégyi mu ansí. ²⁹Tsúfé lélé mú á, ogyá aní Bulu ámv gyí, ɔtɔhɔ atɔ plíplíplíplí.

Alá Abégyi Bulu Ansí

13 ¹Mlíkita mlí aba Akristofɔ dweto kínkíínkín. ²Mlímatan afɔɔhɔsv. Tsúfé móléha aku bɔhɔ Bulu-abɔpv afɔɔ, umɔwankí amú ní. ³Mlíkaun obu adípúsú, fé mlíha amúnycɔ dá obu. Mlíkaun ahá ání bude iwɔsvin wúunsv, fé mlíha amúnycɔ dé iwɔsvin ámv wúun.

⁴Akúlu múa aká bubúu aba amú abatsiátɔ. Ɖkuku mádali mu ba ɔma, tsúfé Bulu ɔbébutí ahá ání buda ahá ání bumegyí amú akúlu ntée amú aká wá, pv mbua atɔpv fée isv.

⁵Kóba asún umádun mlí ɔdwe wa. Tśá mlíbu igyí mlí ansí, tsúfé Bulu lablí ɔbéé, “Mméenatí sí mlí, ntée kína mlí ekekekeke.” ⁶Mú sv abétalí wá klun blí aníaa,

“Mí Wíe Bulu gyí mí ɔbvápv.

Mú sv tɔtɔ mɔɔwa mí ifú.

Nto nyankpɔsa ɔbétalí bwé mí?”

⁷Mlíkaun mlí nkpa agyápv amúv begyankpa bláa mlí Bulu asún ámvsv. Mlíki alá bɔpvtsiá, amlínya hógyi fé amú.

⁸Alí amúv Yesu Kristo gyí igye ámv a, alí ógyi nde, alí kén obétsiá bré fée é ní. ⁹Mú sv mlímáha atosunáhé ɔtsan-ɔtsan igyi mlí ansí, ibutia mlí le ɔkpa wankláán ámvsv. Ibv alá mléha Bulu ɔbɔwa awítɔle há mlí ɔhétɔ ɔwunlín, megyí atogyihe mbla, ání utamawá labi kuku há músú agyípúsv gyí.

¹⁰Aníbv *afɔdte-asubwi kvá igyí ahapú amúv beha Bulu igyí ɔsulúsv nfi ámv buma ɔkpa gyí músú atɔ. ¹¹Bulu igyí ɔhapú dehen tɔpv mbwí obugya wíe Ɖwankíkpatɔ

Ɔwankíkpa unu yóbo amú lakpan iwí afòdie, butópú aye amu mú ya mmuátse, yówa mú ogyá. ¹²Íni sù Yesu é lówu mmuátse, méni ɔbópu mu onutó obugya gyúra mu ahá, amú lakpan su ní. ¹³Mú su mliha adali yɔ mu wá mmuátse unu, abukpɔi ania munyɔ. ¹⁴Tsúfé animá wúluá ibétsiá yó ɔsulósu nfi. Anigyó wúlu amúb íbá ámu. ¹⁵Mú su mliha atsun Yesusu akanfu Bulu, íbwe afòdie ání anidépuhá mu ekekegyíeke. Múgyí ɔnótó asún ání anidépúwá aní Wíe numnyam ni. ¹⁶Mlímátan awitɔlewasu. Mliye mli atótó ha aba, tsúfé mú aná gyí afòdieá itegyí Bulu ansí ní.

¹⁷Mlibu mli nkpa agyápu, amliba iwiasí ha amú. Tsúfé butamadá ɔkpúnú mli ɔklásukú su. Buyin ání béyele alíá bɔpuki aní ɔklásu ɔnó Bulu ansító. Mliha amú abubwe amú agyómá ansigyísó, megyí nwesu. Ní megyí alí á, imówa labi kuku há mli.

¹⁸Mlitsia bɔ mpái ha aní. Nyin ání aní klɔn medé aní pón ha, táme anidékléá abétsiá tsiátó wankláán brégyíbré. ¹⁹Nhíé ndekléá mlibó mpái, Bulu ɔháa mí ansanki ba mli wá nkenyó ánfítɔ kótóó.

Mpái Tráhe

²⁰⁻²¹Iwilwii Ɔhapú Bulu, ɔɔkɔsúa aní Wíe Yesu Kristo tsú afúlító ámu ɔháa amlitali bwe yilé kugyíkúá odeklé. Nde mu kokóli mbée, ɔtsún Yesu Kristosu ɔbwe tóá odeklé anitɔ. Yesu gyí akúfa Ɔkpapú kpɔnkpɔntiá Bulu lópu mu obugya ká ntam amúb íbu unu bré féé, mu mu akúfa, bugyi mu ahá amu nsiné ní. Numnyam íbwée mu kle yófun bréá itamatá! *Amen.

Uklá

²²Mí apió, íbu mótóá ɔsuló kútúklú nawánlín sísí mli. Táme nobwíí ipa, mliyaa asu amlunu mótó asún ání ndepúwá mli ɔwunlín. ²³Nde mli íbi ha ání balé aní pío Timoteo obu. Ní ɔɔwa ɔsa bɔtu mí nfi mú á, nékpa mu abéba beki mli.

²⁴Nehá mli nkpa agyápu pú Bulu ahá atráhe féé itsiá. Akristofó amúb bubu Italia ɔmátó ámu é behá mli itsiá.

²⁵Nde Bulu kokóli mbée, ɔwáa awitɔle ha mli féé! *Amen!

Yakobo

Ɔwulú

Itsiáha

1 ¹Mí Yakobo ání ngyi Bulu mva aní Wíe Yesu Kristo osúmbi dé Ɔwulú ání wanlín sísí mli Bulu ahá^a ání mluladásáin wá ɔyító fée. Nde mli itsiá ha.

Ansigyínya Ukplántɔ

²Apíó aba, ní mlowíe ukplán mva asun wunhetɔ á, ansí ihíe gyi mli. ³Tsúfé mliyin ání ní bɔɔ mli hógyi ki a, itehá mlutotomi tálí líí mli asun wunhe fée ɔnɔ. ⁴Ní mletálí tomi líí mú ɔnɔ á, íbéha mlédan, wá alé, fún tógyítótó. ⁵Ní mlɔtɔ ɔku léhián nyánsa á, ɔkúli Bulu. Ɖbéha mu faan. Ɖmóɔwa mu péltɔ, tsúfé Bulu tɔpú awitɔle há ahá fée nyánsa. ⁶Táme ní fókulí mu a, pu hógyi kuli mu. Másusúu fée ɔmééha fú. Tsúfé ní fumohogyi ání ɔbéha fú á, fugyi fé ɔpuá ídá yó nkpa, íladá yó ɔma. ⁷⁻⁸Ɖhá ání ogyi alí, mu agywun tamalíí tsukule ɔmádinká ansí ɔbéé, ménya tɔtɔtɔ tsú aní Wíe Bulu wá, tsúfé mu agywun igyi anyɔ.

Ohian Pú lwunya

⁹Ansí igyí Okristoyin ání ɔma tɔtɔ, tsúfé Bulu latsú mu fúá. ¹⁰Ní Bulu ɔbá wí onyapú é así á, ansí igyí mu. Tsúfé mu nkpa bótswun fé oyí ntswítswí. ¹¹Alí ámúú owí ɔnɔ íwá ɔnlín, ítɔ ífá, mú ntswítswí tɔbú kpákpáa; ífá ámu alé tetá ámu a, alí kén wí onyapú déyɔ ɔdebá alu obówu ní.

^a 1:1 Yakobo létí Bulu ahá ɔbéé, *abusuan dúanyɔ* ámu.

Isóki

12Bulu toyúlá chhá ání ototomi ikplántɔ. Tsúfé ní ɔledali mótɔ́ á, Bulu ɔbéda mu ipán, há mu nkpa ání utamatá, igyi usugyí-ipa ámúbú ɔlehie ɔbéé, mórpuhá ahá ámúbú butɔ́dwé mu amu. 13Ní bɔɔɔ ɔku kɪ a, ɔmáblí ɔbéé Bulu lásɔ mu kɪ, tsúfé chaa méetalí sɔ Bulu kɪ ɔbéé, ɔbwéé lakpan. Bulu é tamaso chaa kɪ ɔbéé, ɔbwéé lakpan. 14Nyankpusa onutó ɔwólí laláhe témlé mu, bitía mu wá usókitɔ. 15ɔwólí laláhe tɔkwíí lakpan. Lakpan é igyi chasu á, utɔpú lowu ba.

16Mú su apíó adwepú, mlumáha chaa ɔmle mli. 17Atɔ wankláán pú atokiehé yilé kugyíku itsú ɔsúsú. Itsú aní Sí Bulu, ɔsúsú atɔ wankíhé ɔbwepú ámu wá. ɔtamatsɛ fé ɔpa múa onyé. 18Mu apétɔ ɔɔpu mu ɔnɔkwali asún kwíí aní, méní abóbwé agyankpavu mu atɔ bwehé féétɔ.

Asónnu Pú Músúgyí

19Apíó adwepú, mlinu. Mlúkɔsi nu asún asi. Mli ɔnɔ máwa ɔsa. Mlumákɔsí nyá ɔblɔ́ é. 20Tsúfé ɔblɔ́ tamabwé tɔ́á Bulu tekle. 21Mú su mliɛ tsiátɔ laláhe kugyíku le mli nkpatɔ, amlisi lakpan bwe. Mboún mlíba iwiasi, amlíhɔ Bulu asún ámúbú aladú wá mliɔ ámu. Mú ɔbéha mli ɔkláa obénya nkpa ní.

22Mlíbwe dínka Bulu asún ámusu, mlumábwe mú anupú keke. Ní mlɔbwé mú anupú keke a, iwí mlúémélé. 23Chhá ání onú Bulu asún, omegyí músú gyí fé chhá ání alakɪ mu iwí ahuhwétɔ. 24Onyánátí mú asi pé á, alatan alá olowun mu iwí. 25Táme chhá ání ɔleyaa asu nú Kristo mbla ámúbú ulɔfun, utehá antegyí iwí ámu, ɔmetan músú, ɔde músú gyí a, Bulu obóyulá mu ɔkpagyíɔkpasu.

26Chagyíɔha ání ɔbéé mude Bulu súm, táme ɔtamakítá iwí mu tótɔ́ á, ɔde iwí mlé. Mu Bulusúm igyi kpaali. 27Bulusúm oduá mú iwí letɪn, asvansu ma mú iwí, aní Sí Bulu tekle gyí, mléki awumbi múa asvrapusu amú ikplántɔ. Mléki ání ɔyí ánfɪtɔ lakpanbwe é iméegyí mliɔ.

Fitátɔ Futí Kí

2 ¹Mí apíó, ní mlílahɔ numnyam Owíe Yesu Kristo gyi a, mlumáfutí fitátɔ kí. ²⁻³Ní iwí onyapúbá ɔdudí tatiá ibw ibiá, ɔlɔwa sika atɔ pú ohiániá ɔdudí tatida bebá mlí Bulu osúmkpá a, mlímáha iwí onyapú ámu otsiákpá, bláa mu mliaa, obétsiá oyilékpá nfi; bláa ohiáni ámu mú mliaa, otsiá así ɔtunekv unv, ntée odúnka ɔtunekv lu. ⁴Ní mlobú ahá amú iwínya sv á, mlímókúpú agywun laláhe gyi asún ní?

⁵Apíó adwepú, mliyaa asv amlínu. Bulu léle ɔyí ánfítɔ ahiánfɔ ɔbéé, bunyáa hógyi ání mú ɔnɔ bu ɔnlun, abutsia mu iwíegyí ámutɔ, fé alí ámúb ɔlehie yáí ɔbéé, mɔpohá ahá ámúb butɔdwé mu amv. ⁶Táme mlí mú á, mlítɔkpóí ahiánfɔ. Nfíte mlí, megyí iwí anyapú ánfí tesísi mlí, tswín mlí mánsu, sáma mlí wúlu ahande wá ní? ⁷Megyí amú dé Kristo idayilé ámúb idín mlísv ámu kpóí ní?

⁸Bulu mbla ámu féé nwon, bɔwanlín wá Bulu asvn wanlínhé amutɔ gyí, “Dwe fú bá fé fú iwí.” Ní mlídé músú gyi lélé á, múmú mlídé itɔ wankláán bwe. ⁹Táme ní mlofúti fitátɔ kí a, mlílabwé lakpan. Bulu mbla ámu lahá mlí ipón. ¹⁰Tsúfé fúá fegyí mbla ámu féésú, táme fepán kule pé á, fagyí pón ání fatún mbla ámu féé. ¹¹Tsúfé Bulu léblí ɔbéé, “Mátɔ mbua.” Mu kén léblí ɔbéé, “Mámɔ ɔha” é ní. Mú sv ní fvmókútɔ mbua, táme famɔ ɔha a, fvmókúkíná Bulu mbvasv gyí ní? ¹²Bulu ɔbɔpv mbla ánfí utehá anutegyí iwí ánfí gyi ahá asún. Mú sv mlíkí wankláán, mlí asvn blíhé pú mlí bwehétɔ. ¹³Tsúfé ɔhá ání ɔtamawun ahá nwe á, Bulu omóowun mu nwe. Táme ní futowun ahá nwe á, Bulu obóowun fv nwe mu asún ogyíké.

Hógyi Pú Bwehé

¹⁴Apíó aba, ní ɔku ɔbéé, mɔhɔ Bulu gyi, táme mu bwehé mosuná alí á, labi mɔmu mu hógyi amv bu? Mú odu íbétalí há mu ɔkláa obénya nkpa? ¹⁵⁻¹⁶Ní fowun fú aba aku buma atɔ didáhé pú ɔyí keheto atogyihe, táme

fumeha amú, febláa amú fee, “Nehá mli itsiá. Mlutsia wankláán. Bulu ɔkpáa mli, ɔha mli tśá ide mli hián” a, labi mɔmv fú asun blíhé amv ɔlɔwa? ¹⁷Alí hógyi igyi ní. Hógyi oduá yilébwe há fú bá uma mótś á, igyi hógyi wúhé.


¹⁸Ɔku ɔbétalí blí ɔbéé “Fvbu hógyi. Mí é ntɔbwé yilé.” Néle bláa mv mbéé, “Suna mí fú hógyi amú yilébwe uma mótś ámv. Mí é nósuná fú mí hógyi tsú mí yilébwetś.” ¹⁹Fú hógyi desuná ání Bulu ɔkule pé bu mv? lbu alé! Táme bu ání *ɔɛ laláhe féé bohogyi alí. Mú sv butenyá mv ifú, kpínkí kpakpakpa. ²⁰Fú ɔha mimláhe, fudekléá fówun ání hógyiá itamabwé yilé igyi hógyi kpaalí? ²¹Ani náin Abraham lóbwe yilé Bulu ansítś, tsúfé olotsulá kpá mv bi *Isak yáa pututś, teki ɔyómɔ mv bś afɔɔde há Bulu. ²²Mlilawun alí nanáin Abraham hógyi pú mv bwehé lenatí? Mv bwehé sv mv hógyi ɔɔfun. ²³Alí Bulu asun wanlínhé anfi ɔleba mótś ní. Ɔbéé, “Abraham lóhɔ Bulu gyi. Mú sú Bulu lóbu mv yilé ɔbwepú,” tí mv mv nyawie ni. ²⁴Íni sv séi á, mlibi ání yilébwe téhá Bulu totsú ɔha ání mv asún da ɔkpa mv ansítś, megyí mv hógyi pé.

²⁵Alí ɔleba ha obu-ɔnś otsiápú Rahab é ní. Bulu lótsu mv ání mv asún da ɔkpa, tsú tśá ɔɔbwe sv. Ɔɔɔɔ *Yudafɔ akvá beba buɔe ansí wa ki mv ɔmátś ɛáin, ɔleha amú betse ɔkpa srí.

²⁶Alí ámúɔ ɔɛ uma ɔhatɔ ógyi itowuhé ámv a, alí ní yilébwe memá hógyisu é igyi hógyi wúhé ni.

Ɔdandu

3 ¹Mí apíó, mli féé mlumábwe iwí atś asunápú. Tsúfé Bulu obégyi ani atś asunápú anfi asún kínkíínkín. ²Ani féé anɔpán brégyíbré, táme ní ɔku tamapán mv tótɔ á, múmú ɔɔfun. Ɔbétalí gyi mv iwísv ɔkpagyíɔkpasv. ³Apúkí, dátɔbi ku pé butɔpúwá ɔɔnɔɔ ɔnś, púdámli mv, súná mv ɔkpa pú tśá ɔbwéé. ltehá otobú ani. ⁴Mlúki ntsusu-yibiá idun ntsu ansítś. Ilomoní, afú kɔnɔkɔnti tópú mú nátí. Táme ɔtabu pátáplábi ku tédámli mú, súná ɔtínéá iyɔɔ. ⁵Alí ani



*Dátɔbi kv pé butɔpúwá ɔpɔnkɔ
ɔnɔ, púdámílí mv, súná mv ɔkpa
pú tɔ́á ɔbwée. (Yakobo 3:3)*

ɔdandu é igyi ní. Igyi anɔ iwɔ
itɔ́ túkúríbí kv. Táme itetálí
blí asún akpɔnkpɔntɔ pútsú
iwɔ.

Igyi fé ogya plenplenbi ání
itɔwá ipú yílé ogyá. ⁶Igyi
itɔ laláheá iteyíntá atɔ́ féé
anɔ iwɔ. Itɔkpɔ́í nyankpɔsa,
yíntá mv nkpatiátɔ́ féé.
Isɔbití ogyá ání itamaduntɔ
ɔdandu ogyá ántɔ́ tetsánkí
tsú. ⁷Nyankpɔsa tetálí bwé
pututɔ-mbwi, mbubwi, awɔ
pú ntsutso mbwi akugyíaku
butemántá. ⁸Táme ɔhaa

mɔ́kútálí bwé ɔdandu ɔmanta kv. Itɔ laláhe ɔdandu gyí.
ɔtamatsiá díín. Elín ání itɔmɔ́ sɔ́n bɔ́ mú. ⁹Anitɔpú anɔ
ɔdandu kánfú anɔ Wíe pú anɔ Sí Bulu. Mú kén anitɔpúlwií
ahá nɔ. Táme Bulu onutɔ́ lɔ́bwe nyankpɔsa fé mv iwɔ. ¹⁰ɔnɔ́
kule pé ámutɔ́ ikánfú múa ulwí tedáli tsu. Mí apíó, uma aleá
ibéba alɔ́. ¹¹Ntsuá ibu anúle pú ntsuá uma anúle bétalí lun
tsu ɔbún kuletɔ́? ¹²Mángo oyí bétalí swíé kankaba? Ntée
baflé oyí bétalí swíé mángo? Ekekeke! Alí ntsuá ibu anúle
méetalí lun tsu ɔbún ání mótɔ́ ntsu ma anúletɔ́ ní.

Nyánsa Ání Itsú Bulu Wá

¹³Ní ɔkv bu nyánsa múa asún asinu mlitɔ́ á, múmú ɔpúv
mv tsiátɔ́ wankláán le mú suna tsun mv bwehé pú mv
iwiasɔ́bá ání itsú mv nyánsatɔ́. ¹⁴Táme ní olu pú ɔnsípe tsiátɔ́
bu mutɔ́ á, múmú ɔmápv ibi sí kántɔ́, blí ɔbé mvbu nyánsa.
Ní ɔblí alɔ́ á, alawá afunu dínká ɔnɔkwali amusu. ¹⁵Nyánsa
ánfɔ́ odu motsú ɔsúsú. Itsú ɔyítɔ́ atɔ́ ɔmagyáa, tsiátɔ́ laláhe,
pú ɔɔhe laláhe wá. ¹⁶Tsúfé ɔtínegyíɔ́tíne ání olu pú ɔnsípe
bu a, aba asumánú pú laláhebwe tetsiá unu. ¹⁷Táme ɔhá ání
mv nyánsa itsú ɔsúsú á, gyankpav, mv iwɔ letun. Ololwií,
ɔtɔ́dwé ahá, ɔteba iwiasɔ́. Otowun ahá nwe, ɔtɔ́bwé yilé.

Ɔtamafúti futáto ki, Ɔtɔbwé ató tsú mu kluntɔ. ¹⁸Ahá nsiné Ɔlapú todú iwilwiiá itɔpú yilébwe ba.

Ɔyító Ató Dwe

4 ¹Ntɔ tétí ikó múa utré wá mli nsiné? Megyí Ɔwólí laláhe ání ideklé igyi mliɔ tɔpúba? ²Mliɔlapú Ɔnsípe mliɔdé ató klé, mliɔmédé mú nya. Íni su mliɔdé ahá mɔ. Mli ansí depe ahá atósú. Mú sù mliɔdétré kó ní, táme mli ɔbí méeda mú ki. Tóá svá mliɔményá gyí, mliɔtamakúli Bulu Ɔha mli. ³Ní mliɔkúli kúráá á, Ɔtamahá mli, tsúfé agywun laláhe mliɔtɔpúkúli mu. Alíá mliɔpɔwá iwí ansigyí su mliɔdé mu kulí. ⁴Mliɔladámlí Ɔma há Bulu. Mliɔméyín ání ní mliɔdé Ɔyító ató dwe á, mliɔdé Bulu lu? Ní fudeklé fée fódwe Ɔyító ató á, futɔbwé Bulu olupú. ⁵Ntéé mliɔdékú mliɔaa, kpaali Bulu asun wanlínhé amu ɔleblí Ɔbéé, “Bulu tamatsúlá Ɔɔhé ámbú Ɔɔpɔwá anitɔ ámusu?” ⁶Íni sù Ɔtɔpú awitɔle tsɔtsɔtsɔ kpá aní, fé alíá Bulu asun wanlínhé amu ɔleblí ní. Ɔbéé,

“Ɔtɔkósú líí iwí atsupósú,

táme Ɔtɔpú awitɔle kpá iwiasí abápu.”

⁷Mú su nde mli bláa mbée, mliɔbá iwiasí ha Bulu. Mliɔkusu lu Ɔbunsámsú, Ɔbésrí náti mli wá. ⁸Mliɔkpɔkpe manta Bulu, Bulu é Ɔbékpɔkpe manta mli. Lakpan abwepú, mliɔfwí ɔbí le lakpanbwetɔ. Ahá ání mli agywun igyi anyɔ, mliha mli kluntɔ itun. ⁹Mliɔsu, amliha mli iwí iwa mli nwe, mli lakpan su. Mli mósí ɔdámli isú, mli ansigyí imli péli. ¹⁰Mliɔba iwiasí Bulu ansító, méni obótsu mli fúá.

Aba Iwí Asún Blí

¹¹Apíó adwepú, mliɔmátrá blí mli aba iwí asún. Mliɔmátrá tsii aba, kpóí aba. Ɔhagyíɔha ání Ɔlele mu ba ɔlá ntée gyi mu asún á, ilosuná ání Ɔdeblí Ɔbéé, Bulu mbla ámu uma ale. Íni désuná ání alatsú mu iwí ání Ɔdɔn mbla ámu. Ní Ɔdɔn mbla ámu a, múmú Ɔmedé Bulu mbla ámu bu. ¹²Bulu lówa mbla ámu. Mu pé Ɔbétalí pú mú gyi aní asún. Mu pé Ɔbétalí hɔ aní nkpa, ntée mó aní. Ní igyi alí mú á, fúgyí ma ání fégyi fú bá asún?

Ansí Pvdínká Ɖkesu

¹³Mliya asu amlnu. Mli ahá ámbú mltēblí mltāa, “Nde ntée Ɖke abóyɔ wúlu yilé kusu, yétsiá unu ofi Ɖkule gyi ibiá nyá iwí” ámu. ¹⁴Mbéé, mliyin Ɖketɔ? Mliyin alíá mli nkpatasiátó bóbwe? Mligyí fé agyinde, utedáli dinká, táme utamawá ɔpá kuku, itɔfwí. ¹⁵Mú su tṣá ilehián ání mléblí gyí, “Ní Bulu lótsulá há aní nkpa á, abóbwe íni ntée íni.” ¹⁶Ní imegyí alí á, ilosuná ání mlidé iwí tsu, pú ibi sí kántó. Lakpan iwitsú ánfí odu gyí.

¹⁷Mú su ɔhá ání oyin itɔ wankláán, táme ɔtamabwé á, ɔde lakpan bwe.

Iwí Anyapú Asún

5 ¹Iwí anyapú, mliṣu amlṣura okitikíti, tsúfé ipian kpɔnkpɔnti ibá mliṣu. ²Séi ánfí á, mli atonyahé féé lapló. Atéple bawí mli atati. ³Mli sika ató é ilakpóí, wí nkanu. Mú nkanu ámu obégyi mli iwí adánsiē, yíntá mli ɔyulúv fé alíá ogyá teyíntá ató. Mlilakle ató tsɔtsɔɔtsɔ yáí kpaali, bré ánfí ɔyí ibá bɔmɔ ɔnó ánfí. ⁴Mlikaun ání ahá ámbú mliṣbɔ ipa, bɔyɔ agyúmá mli ndɔɔ, táme mlilékiná amú iko ka ámu isú lató Bulu, túmi féé Owíe amu. ⁵Mlilatsiá ɔsulúv anfiṣu, gyi nkpa múa ɔdwe púwá nfo fé nnantswie há mli ɔmɔké. ⁶Mlilahá ɔhá ání mu asún da ɔkpa ipón, mó mu, ɔmepriú iwí.

Uklunya Múá Mpáibɔ

⁷Apíó aba, mlunya klun tsia gyo aní Wíe Yesu Kristo ibá. Mliki alíá ɔdɔɔpu tenyá klun tsíá gyo nyankpu gyankpapu múa tráhe, pú alíá otetsiá gyo bréá ɔsulúv amu ibéha atɔ pɔpwe bówie wóyí. ⁸⁻⁹Mli é mlunya klun amlulu kínkín, tsúfé aní Wíe, ogyi asún ogyípú amu ibá lafun. Mú su mlumátsiá tóí mli abasu, méni ɔméeha mli ipón.

¹⁰Apíó, mliṣu Bulu ɔnósú atóipú amúbú beblí Bulu asún ámu bwe mli atosúanhe. Bowun asún tsɔtsɔɔtsɔ, táme benya klun. ¹¹Mliki alíá anitobú amú. Itsú alíá botomi amú asun wunhetɔ su. Mlikaun Hiob é iwí asúnsú. Alíá olotomi mu

asun wunheto. Inu su Bulu lóyulá mu mú oma. Lélé, Bulu bu awitole. Otowun ahá nwe.

¹²Mí apíó, ndeklé mbéé mlibú wankláán ání mlumátánu ɔsúsú ntée ɔsulú, ntée ká tɔtɔtɔ. Mli “Iin!” ibwéé “Iin!” mli “Ó-o!” é ibwéé “Ó-o!” méni Bulu mééha mli pón.

¹³Ní ɔku dé ipian wúun mlitɔ á, okókoli Bulu. Ní ansí de ɔku gyí é á, ɔwáa ulu kanfu Bulu. ¹⁴Ní ɔku délɔ mlitɔ á, ɔtí ɔpasua ahande abuba bokókoli Bulu, abukpa mu ofobí anu Wíe idátɔ. ¹⁵Ní bokókoli anu Wíe hógyitɔ á, ɔbétsa mu ulu, ɔbókusú. Ní alabwé lakpan ku á, Bulu obési mú fée kíé mu. ¹⁶Mú ali su mlile mli lakpan bli, amlíkoli Bulu ha aba, méni ɔbétsa mli ulu. ɔhá ání mu asún da ɔkpa mpái tɔwá ogyá. Itɔyɔ agyómá wankláán. ¹⁷Nyankpusa *Elia é gyí fé mía funyo. Olokokóli Bulu kínkíínkín ání nyankpu mátswie. Lélé imotswie nfinsa múa ifun. ¹⁸ɔlélakólí mu ání itswie. Lélé nyankpu létií, uléha atɔ lelawa alé ɔsulú.

¹⁹Mí apíó, ní mlitɔ ɔku ɔdida hógyitɔ á, ɔku ɔsánkia mu ba. ²⁰Mlibi ání ɔhá ámu lalé ɔkláa tsú lowu ání teku obówutɔ. Mú su Bulu obési mu lakpan tsɔtsɔtsɔ kíé mu.

Petro

Ɔwulú Gyankpapo

Itsiáha

1 ¹Ɔwulú ánfɛ itsú mí Petro ání ngɛi Yesu Kristo *sumbí ɔyɔpú wá.

Nde mú wanlín sísí mli ahá ání Bulu lalé bwé mu abí, mlɛladásáin yóbwɛ afɔ́w Ponto, Galatia, Kapadokia, Asia yédalɛ Bitinia ɔmátɔ́ fée. ²Ɔsí Bulu lalé mli fé alɛ ámú ɔlɛhɛ́ mú yáí ání íbá mótɔ́ ámu. Bulu latsɔn *Ɔɛ Wankíhé amusu bwé mli mu ahá, méni mlóbu Yesu Kristo, mu obugya é íbógyɔráa mli.

Bulu ɔhíe gyi mli buale, ɔha mli iwilwii tsɔtsɔtsɔ!

Ɔkpakí Ání Imóɔbwe Kpaali

³Mliha akanfɔ Bulu. Mugyí anɛ Wíe Yesu Kristo mu Si pú mu Bulu ní. Mu nwewúun kpɔnkpɔnkpɔntɛ ámu su alakúsúa anɛ Wíe Yesu Kristo tsú afúlitɔ póhá anɛ nkpa pɔpwe. Ínɛ lahá anɛlanú iwiasɛ ání anɛ ɔkpakí móɔbwe kpaali. ⁴Mú su anɛ ansídɛn ání anɛ íbɛ bédá siadɛ yílé ámú Bulu léhɛ ání ɔbɔpɔhá mu abí ámu. Alalá mú yáí ɔsúsú wankláán há mli, atɔ́á itamayíntá, itamaplɔ́, itamakpá é. ⁵Siadɛ yílé ánfɛ igyi mli ahá ámú mlɛlahogyi amu klé. Mli hógyi su Bulu túmi bun mlɛsu, ide mlɛsu kí alɛ yɔ́fɔn atɔ́ fée nkpa ɔhóke ámú Bulu lalá yáí ání ɔbéle mú ɔwan ɔyí ɔnómóké ámu.

⁶Íbu mótɔ́ ání ísókɛ ɔtsan-ɔtsan ide mli tu, mlɛdé asún wúun, táme itɔ́ ánfɛ mli ansídɛn mósú ánfɛ su ansí mókúsí mli gyí. ⁷Tɔ́á suá mlɛdé asún wúun gyí, mú obósuná ání

mlalaho Yesu gyi lélé ní. Tó butótó sika pepe ání utetalí yíntá kúráá kí bee, wankláán igyi. Alí kén bópu asun wunhe so mli hógyi ání ibu labi dun sika pepe kí bee, lélé mlalaho Yesu gyi, ménu mlétalí líí kínkín ní. Ubá alí á, békanfú mli, wá mli numnyam, há mli idayilé eke amúú Yesu Kristo obéle wí wwan ámu. ⁸Ibu mótó ání mli mókúwun Yesu kí, táme mli tódwé mu. Mli méné mu wúun mó, táme mli dé musu hógyi. Iní su ansigyí kponkponkponnti ání onó méetalí bí labulá mli. ⁹Tsúfé mli dé mli nkphóó amúú mlénya tsú mu hógyito ámu nya.

¹⁰Bulu onósú atópú amu beblí nkpa ání Bulu obóho mli ání asún tswi. Betetéé mu awitole asún áníto wankláán, ménu bónu mú así. ¹¹Kristo Oné letsíá Bulu onósú atópú anfito, tsíá súná amú, beblí yáí alíá Kristo obówun ipian. Mú oma a, numnyam kponkponkponnti béba. Mú su besen ansító ání bébi bréá nkphóó anfi ubéba pú chá oduá íbótsun musu ba. ¹²Bulu léle súná amú ání megyí amú só bude asún ámu okan da, mboún mli su bude mú okan da. Séi mú mli lanú asún ámu. Tsúfé Bulu lówa mu Oné Wankíhé tsú onósú bebláa *asun wankláán ámu okan adapú alí asún ání, amú é beda mú okan súná mli. Bulu-abopu kúráá ansí tepé ání bónu alí asún ání así.

Iwítúntó Tsíá

¹³Iní su mli da wísu amlíkita wí. Mli pu mli ansí féé duka awitole amúú Bulu obówa há mli ekeá aní Wíe Yesu Kristo obékpí tsú onósú bele wí wwan ámusu. ¹⁴Mli bu Bulu fé alí amúú nyebí butobú amú akwípú amu. Mli máha tsiátó laláhe amúú iletsíá mli to bré amúú mli méyín to to tsú Yesu wí ámu igyi mli su. ¹⁵Mboún mli ha mli wí utun mli bwehé féétó, fé alí amúú Bulu amúú oleti mli ámu wí létun amu. ¹⁶Tsúfé okwanlín wá Bulu asún ámu to bee, “Bulu obéé, ‘Mli ha mli wí utun, tsúfé mí wí létun.’ ”

¹⁷Mogyí chá ání mli tetí mli aa, mli Sí ní mli dé mpái bo ní. Otamakí cha ansító ní ode ahá asún gyí. Mboún ohagyícha bwehé otópogyí mu asún. Mú su mli pu Bulu-ifúnya bwe mli

bwehé kugyíku nke tráhe anfi ilasí mli ɔyí ánfɔ. ¹⁸Tsúfé mlyin t́á ɔɔpuká mli nwunsu ɔkɔ, há mlɔlagyi ɔwɔ tsú mli anáin amándíé laláhe ámúú iletin mli ɔkpa ámúú. It́ó ámúú ɔɔpuká mli nwunsu ɔkɔ ámu megyí fé sika pepe móa sika futútú ání utetálí yíntá. ¹⁹Kristo obugya ání ihíé bu ibiá ɔɔpuká mli nwunsu ɔkɔ ámu. Kristo gyí fé *okúfabiá ɔɔɔun ha mbusuo kugyíku le, piná kuku ma mu ɔwɔ. ²⁰Asa Bulu lóbwe ɔyí á, ɔlehíé t́á íbéba Kristosu yáí. Mli śú Bulu lalé mu súná bré tráhe anfi. ²¹Kristo lahá mlɔlahɔ Bulu gyi. Bulu lókúsúa mu tsú afúlitɔ, wá mu numnyam. Mú śú mli ansídɔn Bulusu, mlidé t́á alahíé ɔkpa kí ni.

²²Mlɔlagyi d́nká ɔnɔkwali ámúú ɔbu Kristo ɔ ámusu. Mú su mlɔlatɔn mli ɔwɔ há Bulu, mlidé aba dwe fé apió. Megyí ansítɔ-ɔdwe mlidépuhá aba. Mlyɔ mósú amlidwe aba wankláán tsu mli klɔntɔ. ²³Bulu lakwíí mli pópwe. Megyí nyankpusa ání oméetsiá nkpa wá ɔpású ɔɔtsun kwí mli. Mboún Bulu asún ámúú ɔbu nkpa, ɔbu unu bré féét́ ɔmusu ɔɔtsun kwí mli. ²⁴Bɔwanlín wá Bulu asún ámúú be, “Anyánkpúsa bugyi fé ífá. Amú numnyam é igyi fé ífá ntswítswi. Ifá towú, mú ntswítswi t́ɔbú kpákpáa, ²⁵táme aní Wíe asún ámu mú bu unu bré féét́.”

Asún ánfɔ gyí asun wankláán ámúú mú ɔkan adapú beda súná mli ámu ni.

2 ¹Mú su mlile agywun laláhe kugyíku le mlɔ. Mlumátrá mlé aba, ntée bwé apinabwebí. Mlumátrá pe ansí abasu, ntée tsii aba. ²Mlɔbwe mli ɔwɔ fé nyebí ɔɔbwe, amlɔha Bulu asún ámúú iletin, t́ɔt́ mefráa mót́ ámu idinka mli ɔwólí brégyíbré, fé alí ámúú nyópu-ntsu tedínká nyebí ɔwólí amu. Méni íbéha mlédan, nyá nkpahɔ́ tsú Bulu wá. ³Mlɔlakápú aní Wíe amu kí, mlɔlawun ání ɔbu awítɔle.

Akristo ɔ Babwé Aha Pópwe Há Bulu

⁴Mú su mlɔkpukpe ba aní Wíe Yesu Kristo wá. Mlygyí nkpa Owíe ni. Kristo gyí fé íbwiá ahá bekiná mú ání uma labi, táme Bulu léle mú ání ɔbu labi mu ansít́. ⁵ɔ́hét́ asún nebá beblí á. Mlɔba Bulu wá bré ánfɔ mlɔbu nkpa ánfɔ, ɔbwe

mli fé abwiá ɔdepuyi obuá bótswé mu mótó. Ɔbwe mli mu igyí ahapú ání amú iwí létɪn, amlɪtsɪn Yesu Kristosu ha Bulu igyí ámúbú mu Ɖɛ́ losusúu suná mli, itegyí mu ansí ámu. ⁶Tsúfé ɔɔwanlín wá Bulu asún ámuɔɔ bɛɛ,

“Bulu ɔbɛɛ, mlíkɪ, nalé ibwi ání ibu labi,
púbwé okonkísúbwi yáí *Sion wúluto.

Ɖhagyíɔha ání ɔɔɔɔ anɪ Wíe, ogyi okonkísúbwi
ámusu gyi a,

péli méekítá mu ekekekeke.”

⁷Ibwi ánfɪ híé ibu labi há mli ahá ání mliɔɔhɔ Kristo gyi. Táme há ahá ání bumóɔhɔ Kristo gyi mú á, Bulu asún ámu ɪleblí ɔbɛɛ,

“Ibwi ánfɪ obu ayípu bekiná ní.

Táme múlébemlí ibwi ání ihíé bu labi dun mú féé
ní.”

⁸Asa é á,

“Ínu gyí ibwiá ahá bósutíin músú dida ní.”

Bósutíin músú, tsúfé bumegyí Bulu asún ámu. Alí Bulu léhie yáí ání íbá ha amú nu.

⁹Táme mli mú á, mligyí ɔmá ání Bulu lalé. Owíe amu igyí ahapú. Ɖmá wankíhé ání Bulu lapú mli bwé mu onutó ahá nu. Mvlalé mli tsú oklúntɔ pú mli ba mu ɔkandíe wánkíhé amu asi ɔbɛɛ, mlibéda ofúla amúbú alabwé ámu iwí ɔkan.

¹⁰Tekɪ bré ámu a, megyí Bulu ahá mligyí. Táme séi mú á, mlɪlabwé Bulu ahá. Bré ámu a, tekɪ Bulu nwewúun uma mɪsu. Táme séi mú á, mu nwewúun laba mɪsu.

Bulu Nkpábi

¹¹Apíó adwepú, nhíé nde mli ɔlá da. Afɔɔ mligyí, mlíméetsiá ɔsulúv anɪsu wá ɔpá. Mú su mlɪle iwí tsu nyankpusa ɔwóli laláhe amúbú ɪɔkɔ mli ɔkláa ísá ámuɔɔ.

¹²Ínuá mli ɔmátɔfɔ tsie su á, mlɪtsia tsiátɔ wankláán, méni ní budeblí bɛɛ mli tsiátɔ uma ale a, bówun mli yilébwe, fówun békanfú Bulu eke amúbú ɔbɛ́ba beki amú gymagyihe amu.

¹³Anɪ Wíe Yesu su mli bu aban mva ɔhagyíɔha ání bapú túmi wá mu ɪbuɔ. Mli bu ɔmá ɔkparú ání ɔde ɔmá ámu féésú

gyí. ¹⁴Mlibu ɔ́má sú akípu amúú ɔ́má ɔ́kparú lalé ɔ́bée, bubíti lakpan abwepú isu, abukanfu yilé abwepú ámu. ¹⁵Mlibwe yilé puka asun laláhe amúú aha mimláhe buteblí mábí su tsú mli iwí ámu itin. Tsúfé ɔ́kpa ánfísu Bulu déklé ɔ́bée, mlibwée mú ní. ¹⁶Mltsia nkpa fé ahá ání butsie iwísu, táme mliwápú mli iwísutsiá ámu tin ansíbi bwé lalahé. Mboún mltsia nkpa fé Bulu asúmpú. ¹⁷Mlibu ɔ́hagyíɔ́ha, amlidwe mli aba ahógyipu. Mlinya Bulu ifú, amlibu mli ɔ́má ɔ́kparú.

Asúmpú lwiasibá

¹⁸Nkpábi, mlinya mli awíe ifú, amlipu obú ha amú. Megyí amúá bolwíí, bubu awítɔ́le há mli nkule. Mlibu amúá bubu owuntɔ́lun mlisu é. ¹⁹Ní ileba mótó ání behá mlowun iwíɔ́sun kuku kpaali, táme Bulu sú mlotomi hɔ́ mú faan a, Bulu ansí bégyi mli iwí. ²⁰Labi mɔ́mu ibu ní fatomi, badá fú fú lakpan su? Kuku ima mótó. Táme ní fɔ́bwé yilé asa fotomi beda fú á, Bulu ansí tegyi fú iwí. ²¹Asun wunhe ánfí aná su Bulu létí mli ní. Tsúfé mli su Kristo onutó é lótomi tsun asun wunhetɔ́ púbwé mfántóhún há mli, méni mli é mlótun mósú. ²²Bɔ́wanlín wá Bulu asun wanlínhé amutɔ́ beé, “Ɔ́mɔ́bwe lakpan kuku. Ɔ́memlé ɔ́haa é.” ²³Besia mu, mu mú omesia ɔ́haa. Bréá ɔ́de ipian wúun a, ɔ́meká ɔ́haasu, táme ɔ́ɔ́pu mu ansí dínká Bulu, asún ogyípú ɔ́nɔ́kwalipu amusu. ²⁴Yesu Kristo onutó lóhɔ́ aní lakpan féé súra, beda mu mántá *oyikpalíhe amusu, méni abégyi iwí tsú aní lakpantɔ́, tsíá nkpa há yilébwé. Tsúfé bɔ́wanlín wá Bulu asún ámutɔ́ beé, “Mu iwí nlo ámutɔ́ mli ényá mli ɔ́lɔ́tsá.” ²⁵Tsúfé mli gyí fé akúfa fwhé, fé alí amúú bɔ́wanlín wá Bulu asúntó ámu. Táme séi mú á, mli layínkí bá mli buo Yesu, mli ɔ́klásu ɔ́kípu pú mu ɔ́kparú ámu.

Akúlu Múa Aká

3 ¹Atsi, mlibu mli akúlu alí kén, méni ní amótó aku bumɔ́hɔ́ Bulu asúnsú gyi kúráá, bowun mli tsiátó a, íbétse amú, megyí mli obétepi trá bláa amú asvansu. ²Tsúfé bówun mli tsiátó wankláán pú alá mlitehíé bú ató. ³Mli

alé umátsu mli imi bwe, atati yilé dudá ntée sika atóá ibu ibiá watɔ. ⁴Mboún mliha mli alé itsu mli kluntɔ. Aléá utamayíntá gyí múá ibu alé, ilolwií. Mútehíé gyi Bulu ansí ní. ⁵Tsúfé alí kén bímbí ámu atsiá bɔpu amú iwí há Bulu, pú ansí dínká musu bobu amú akúlu, su bɔwa akíle ni. ⁶Alí kén *Sara lóbu mu kulu, oletsiá tí mu ɔbéé, “Mí wíé” ni. Mu abí mligyí, ní mlɔbwé yilé, mluménya tɔtɔ ifú.

⁷Alí kén mli ayin é, ní mlta mli aká mlibu unv á, mlibu ání buma awútɔ ɔwɔnlín fé mli. Mliwun amú nwe, amlipɔ obú ha amú. Tsúfé mlta amónyɔ obénya Bulu atokiehé á múbú igyi nkpa ámu. Mlikuta mli aká tsɔn ɔkpa ánfisu, méní ní mlidé mpái bɔ á, tɔtɔ méetin mli ɔkpa.

Ipiánwúun Yilébwé Sv

⁸Utráhe-tráhe a, mli féé mliha mli agywun ubwe kule. Mlisu ha aba, amlidwe mli aba Akristofɔ. Mliwun aba nwe, amliba iwiasɩ ha aba. ⁹Mlumápu lalahe ká lalahe ɩkɔ. Ntée ní ahá besíá mli á, mlumásia amú ká ɩkɔ. Mboún mliyula amú, tsúfé Bulu létí mli ání mlibóyulá ahá, méní obóyulá mli. ¹⁰Bɔwanlín wá Bulu asún ámɔtɔ beé,

“Ní ɔku déklé ɔbéé, mu tsiátɔ iwá alé,
otsia ansigyítɔ a,
mómú osíi ahá iwí asun laláhe blí,
osi afunu wa.

¹¹Osíi lalahe bwe, ɔbwéé yilé.

Odúnka iwílwii, ogyáa mú ɔkpa.

¹²Tsúfé Bulu ansí bu yilé abwepúsú.

Ɖteyaa asu nú amú atɔ kulíhé.

Táme ɔtɔkúsú líí lalahe abwepúsú.”

¹³Ma ɔbɔpu lalahe gyi mli, ní mli ansí ipé yilébwesu?

¹⁴Táme ní ɩleba ání mlidé ipianwúun yilébwé sv kúráá á, nwon lává mli olú. Opúni mátsíí mli, mlumánya ɔhaa é ifú.

¹⁵Mboún mlibi tsu mli kluntɔ ání Kristo gyí mli Wíé, mu iwí letin. Mlída iwísu, méní brégyíbré ní ɔku léfité hógyi á múbú ibu mlitɔ ámu iwí asún á, mlébi lé mú ɔnɔ wankláán.

Táme mlunya klun, amliba iwiasɩ le mú ɔnɔ. ¹⁶Mli klun máha

mli pón tɔtɔ iwɪ, méni ní bude asun laláhe blí tsú mli tsiátɔ wankláán ámú mliɔpu mliɔbuo Kristo amu iwɪ á, péli békítá amú. ¹⁷Ní igyi Bulu apé ání fowúun ipian kúrání á, ɪbu aláá fówun ipian yilébwe su, dun ání fówun ipian lalahebwe su. ¹⁸Tsúfé Kristo é lówu ahá lakpan su ɔtsáwule pé. Mu asún da ɔkpa, táme olowu há lakpan abwepú fée, méni ɔbékpa mli ba Bulu wá. Bɔmɔ mu nyankpusa-oyí, táme Bulu lókusú mu ɔɔtɔ. ¹⁹ɔlɔtsun ɔɔtɔ ámú yéda asún ámu ɔkan há afúli amú buda obu ámu. ²⁰Afúli amu gyí, ahá ámú bumobu Bulu asún, Bulu lénya klun há amú bré ámú aní náin *Noa dé dáka kpɔkpɔɔnkpɔntɪ sré ámu. Ahá ikwe pé lɔtsun ntsublá ámú nyá nkpa. ²¹Ntsu ánti léli há *asúbɔ. Alí ámú ahá ámu bɔtsun ntsublá ámú nyá nkpa ámu a, alí kén asúbɔ ánti dé mli nkpa hɔɔ ni. Megyí mli iwɪ ifin asúbɔ tɔfwí. Mboún igyi ipabwií há Bulu ání mli klun idí mli asi, umátrá ha mli pón. Asúbɔ ánti lahɔ mli nkpa tsun Yesu Kristo kusú tsú afúlitɔ ámú. ²²Alayɔ ɔsúsú yétsiá Bulu gyɔpɪsú séi. Bulu-abɔpu, ɔɔtɔ awíe pú túmi kugyíku bubu mu asi.

Nkpatsiá Há Bulu

4 ¹Kristo lówun iwɔsun. Mú su mlɪda iwɪsu mli é, amlɪpu mu ɔkpa ámu alí kén. Tsúfé ɔhá ání owun iwɔsun lalé mu iwɪ lé lakpantɔ. ²Íni su ɔmátrá ha ɔwólɪ laláhe igyi musu. Mboún ɔhá Bulu apébwe itsia mu kluntɔ mu nkpa ání ɪlasi ɔyí ánti fée. ³Asa mlɪlébemlí Akristofɔ á, mlɪléyintá bré tsɔtsɔtsɔ tsíá bwé tɔá ahá ání bumeyín Bulu butekle bwe. Mú aná gyí; atsi múa ayin asúnwa, ntábu, pléikpada múa ntakpan onúkpa yɔ pú ikpɪswéé ání igyi mli akísítɔ. ⁴Itobwíe ɔmátɔfɔ ámu ɔnɔ ání séi mlɪtráa mlɪmédésrí buo amú yɔbwe laláhe. Mú sù btesíá mli ní. ⁵Táme béle amú bwehé fée ɔnɔ Bulu ansítɔ. Mu ɔbá begyi akɪankpapu pú awupú fée asún ní. ⁶Mú sù beyéda Bulu asún wankláán ámu ɔkan há awupú ní. Amú lowu ámu igyi ɪsvá Bulu labítí amú ɔyɪlú, fé alíá ɔtebítí ɔhagyícha ɪsu. Beyéda Bulu asún ámu ɔkan há amú, méni amú ɔkláa obénya nkpa fé alíá Bulu bu nkpa.

Bulu Atokiehé Kítá Wankláán

⁷Tógyító ɔ́nóɔ lafun ta. Mú su mlíkita iwí, amlíha mli agywuntó idi, méni mlétalí b́ó mpái. ⁸Múá idun mú fée gyí, mlidwe aba tsu mli kluntó. Tsúfé ɔ́dwe ánfí odu ɔ́béha mlétalí sí ahá lakpan kíe amú ní. ⁹Mlupu ansigyí hɔ́ mli aba Akristofó afɔ́, mli máblí mlíaa ilakpon mli. ¹⁰Bulu lakíe ɔ́hagyíɔ́ha ató ɔ́tsan-ɔ́tsan. Mú su ɔ́hagyíɔ́ha ɔ́kíta mu kletó wankláán, amlipukpa aba. ¹¹Ní ɔ́ku klé gyí Bulu asónblí á, ɔ́blí asún ání itsú Bulu wá. Ní ɔ́ku klé gyí ahá súm á, ɔ́púv ɔ́wunlín ámú Bulu lahá mu amu fée súm mu aba. Íni ɔ́béha ahá békanfú Bulu tsun Yesu Kristosu tógyítótó. Numnyam múa túmi igyi Bulu klé bré féeftó. *Amen.

Akristofó Ipiánwúun

¹²Mí apíó adwepú, mli máha asun wunhe kpɔ́nkpɔ́nkpɔ́nti ánfí budepusó mli kí anfi íbwie mli ɔ́nó. Mli máki mú ání asun pɔ́pwe dé mli tu. ¹³Mlíha ansí mboún igyi mli ání mlidé Kristo asun wunhe amu ku wúun, méni ansí betrá hie gyí mli eke ámú mu numnyam bélin ɔ́wan ámu. ¹⁴Ní ahá bude mli sia Kristo búo su á, idesuná ání nwun lawá olú. Bulu Numnyam ɔ́ɔ́e Wankíhé amu bu mlitó. ¹⁵Mlitó ɔ́kukú ɔ́máwun asún ahámó, ntée owi, ntée lakpanbwe, ntée okéngyéwa su. ¹⁶Táme ní mligyí Akristofó su mlidé asún wúun a, umáwa mli péli. Mboún mlíkanfu Bulu ání Kristo idá dín mlisu.

¹⁷Tsúfé bré lafun ání Bulu obégyi ɔ́hagyíɔ́ha asún. Obégyankpá gyi mu onutó ahá asún. Ní Bulu obéfi mú asi tsú anisu á, múmú nkálí ahá ámú búmɔ́hɔ́ mu *asun wankláán ámusu gyi amu klé b́óbwe? Ibéhie wá ifú. ¹⁸Bɔ́wanlín wá Bulu asúntó beɛ,

“Ní íb́owa ɔ́nlun asa Bulu ɔ́b́hɔ́ yilé abwepú nkpa á, múmú nkálí íbégyi ha lakpan abwepú pú ahá ání butamabú Bulu é? Iméetepí wá alé há amú.”

¹⁹Mú su ahá ámú igyi Bulu apé ání buwúun asún ámu bupúv amú iwí fée wa amú ɔ́lepú ámu íbitó, abukita yilébwetó kínkínkín. Otegyi mu asúnsú brégyíbré.

Bulu Akúfasu Kú

5 ¹Séi á, ndeklé mbée, nótóí kplá mliá mligyí ahande Kristo ɔpasuato. ɔpasua ɔhande mí é ngyi. Ntráa ngyi ipian ámúú Yesu lówun amu iwí adánsie ogyípú. Mí é nénya mu numnyam amúú íbélun ɔwan ámu íku. ²Nde mli kokóli mbée, mliki ahá ámúú Bulu lapúwá mli íbuto amusu wankláán fé akúfa ɔkparú. Imábwe mli fé bude mli hie, mboún mlibwe mú tsu mli kluntɔ alíá Bulu déklé. Megyí sika ɔnsípe su, mboún ɔdweá mlibu ha osum ámu su. ³Mlimábwe ahá ámúú Bulu lapúwá mli íbuto ámu kpóunkpóun. Mboún mltsia tsiátɔ wankláán ání íbɔbwe nfántúhún há amú, ⁴méni ekeá Kristo, ogyi akúfa akparú Owíe amu ɔbá á, ɔbéha mli ísugyí-ípa ání íbu numnyam, íméekpa ekekekeke.

⁵Nyasubi múa mbitebí, mli é mliɔu obú há mli ahande. Mli féé mliɔu iwiasíba kpa aba. Tsúfé ɔɔwanlín wá Bulu asún ámutɔ bee, “Bulu ɔkósú líí iwí atsupósú, táme ɔɔwá awítɔle há ahá ání beba iwiasí.” ⁶Mú su mliba iwiasí, amlɔu mli iwí wa Bulu túmi kpɔnkɔɔnkɔntí ámu así, fówun obótsu mli fúá mu bré wankláántɔ. ⁷Mliɔu mli asun wunhe féé wa Bulu íbuto, tsúfé ɔɔgywún mli iwí.

⁸Mlikiita iwí, amlidinka ansí iwísu, tsúfé mli olupú, ogyi ɔɔunsám ná odekpoún, odeki fé gyatá, ɔde ɔku dunká kiita wi. ⁹Íni su mlikiita mli hógyitɔ kínkíínkín, amlitin mu ɔkpa. Mlibi ání mli aba Akristofɔ ání bubu ɔyítɔ féé bude ipian ánfu odu wúun. ¹⁰Táme Bulu híé ɔbu awítɔle há mli tógyítɔtɔ. Mólátí mli ba mu numnyamto tsun mliha Kristonyɔ íkulebwetɔ. Mu numnyam amu bu unu bré féétɔ. Ní mlowun ipian kpalobí á, ímɔɔwa ɔpá mu onutó obótsu mli kúsú, há mléyínkí líí. ɔɔɔwa mli ɔwunlín, há mléle nlin Kristoto. ¹¹Mubú íwígyí bré féétɔ. *Amen!

Uklá

¹²Silwano létisa mí ɔɔwanlín ɔwulú kútúklú ánfu sísí mli. Nyin ání opió Okristoyin ogyi, ɔbu ɔɔkwali. Ndekléá

nówa mli ɔwunlín, mí angyi adánsɛ suna mli ání asón ánfɪ nabláa mli ɔwulú ánfɪɔ fée idesuná ání íni gyí Bulu awɪɔle onutónutó ámu ni. Mlɪkɪta mótó kínkíínkín.

¹³Mli apíó ahógyipu amúú bubu *Babilon ɔpasuatɔ behá mli itsiá. Mí bí Marko é ɔhá mli itsiá. ¹⁴Mlipu aba-ɔdwe amúú ibu Akristofɔɔ ámu ha aba itsiá brégyíbré. Nde Bulu kulí mbée, ɔháa mli ahá amúú mlyí Akristofɔ ámu fée iwilwii.

Petro

᠘wulú Nyɔɔsi

Itsiáha

1 ¹Mí Yesu Kristo osúmbi pú mu sumbí ɔyɔpú Simon Petro dé ɔwulú ánfɪ wanlín.

Nde mú wanlín sísí mli féeá mlulanyá hógyiá ibu labi fé anɪ klé, Bulu mva anɪ ɔlepú Yesu Kristo yilébwe lahá anɪlanyá ámu.

²Bulu ɔhíe gyi mli buale, ɔha mli iwilwii, tsúfé mlɪlabí mva anɪ Wíe Yesu Kristo tsía.

Bulu Ahá Tɪ Pú Tśá Odedunká

³Íniá anɪlabí Yesu wankláán su á, Bulu lahá anɪ tógyítśá abɔpɔtsiá nkpa ání itegyɪ mu ansí. ɔleti anɪ mu onutó túmitɔ ɔbée, abénya mu numnyam pú mu yilébwe. ⁴Mu túmi kɔɔnkɔɔnkɔɔntɪ ámu kén ɔɔpɔkíe anɪ atɔ yiléá ibu bíá. Mú ɔlehɪe yái ání ɔbɔpɔhá anɪ ní. ɔlehɪe ání ɔbéle anɪ tsú ɔyítɔ ɔwɔlɪ laláhe ámuɔ iteyíntá nyankpɔsa amɔɔ, atsúvɔn múśú tsiá mu atsiábi. ⁵Íniá Bulu labwé íni há mli su á, mlɪtsɔn mli hógyisu amlɪbwe yilé ɔkpagyíɔkpasu. Mlɪtsɔn mli yilébwe ámuśu amlɪbɪ asún. ⁶Mlɪtsɔn mli asúnbɪ ámuśu amlɪgyi iwɪśu. Mlɪtsɔn mli iwɪśuɔgyí amɔśu amlɪwa nsi. Mlɪtsɔn mli nsiwa ámuśu amlɪsum Bulu. ⁷Mlɪtsɔn mli Bulusúm ámuśu amlɪwa awɪɔɔle. Mlɪtsɔn mli awɪɔɔlewa ámuśu amlɪdwe mli aba Akristofɔ. ⁸Ní íni aná dedán mlɪɔ á, ibósuná ání mlɪlabí anɪ Wíe Yesu Kristo. Mu bɪ ámu désuná ání mlɪlawá labi, swíe abí ní. ⁹Táme ní tsiátɔ anɪ aná uma akɔɔ á, butamawun yɔ tsútsú. Amú

ansíbi labwíé. Batan ání Bulu lófwí amú lakpan dada amu lé amú iwí.


¹⁰Mú su mí apíó adwepú, mlisen ansító. Bulu létí ahá, ɔlele aku há mu iwí. Mlha mli bwehé isuna ání lélé mlibu amútó. Ní mlidé íni bwe á, mliméedida ekekeeke. ¹¹Lbá alí á, Bulu obéfinkí ɔkpa gbagyaa há mlówie aní Wíe pú aní ɔlepú Yesu Kristo iwíegýí ámúú itamamó ɔnó ámutó.

¹²Mméesi mli asún ánfí káín. Ibu mútótá mlyin mú dodo. Mlulu mli ɔnɔkwali amusu kínkíínkín. ¹³Ee, nawun ání íniá nanya mbu nkpa ánfí mú á, ibu alé ání nétsiá káín mli asún ánfí brégyíbré. ¹⁴Tsúfé aní Wíe Yesu Kristo lahá mí nabí ání mí nke utráa mɔtsó ɔsulúu anítsu. ¹⁵Mú su nótson ɔkpagyíɔkpasu há mlétsiá káín músú mí ɔma.

Kristo Numnyam

¹⁶Megyí nyánsa anlópusré ɔte bɔwa súná mli tsú aní Wíe Yesu Kristo túmí pú mu yínkí ba amu iwí. Mboún anuléhie pú aní ansíbi wun mu numnyam. ¹⁷Tsúfé aní ansító aní Sí Bulu lópu obú móa numnyam kpɔnkpɔɔnkpɔntí há Yesu, bréá Bulu Onumnyampu amu ɔme ledali tsu ɔsúsú ɔbéé, “Óni gyí mí Bí ɔdwepúá olegyi mi ansí ní.” ¹⁸Aní onutó lónu ɔme amu tsú ɔsúsú, bréá ania munyɔ anlíí ibu wankíhé amusu.

¹⁹Íni su anlahíé wun ání asún ámúú Bulu ɔnósú atóipú amu beblí tswí amu ihíé ibu mútó. Ibéhie wá alé há mli, ní mleyaa asu nú mú, gyi músú. Tsúfé amú asún ámu igyi fé ɔkandíéá idewankí oklúntó yófun bréá ɔyí ɔbeke, bake ɔtsrakpabi amu ɔbówankí mli kluntó. ²⁰Íwánkí mli ání megýí Bulu ɔnósú atóipú amu onutó apé bɔpuswánlín Bulu asún ámu. ²¹Tsúfé megýí amú onutó lópu amú agywun blí Bulu ɔnó asún



*ɔkandíéá idewankí
oklúntó ní. (2 Petro 1:19)*

atɔ asunápú anfi bugyi fé pututɔ-mbwiá buma agywun. Butɔkwíí amú keke, ahá butekítá amú, mɔ amú. Buteblí asun laláhe tsú tsá bmonu mú asɩ iwɩ. Amú lalahewɛ béhu amú fé pututɔ-mbwi. ¹³Alí ámúú bahá ahá buɔe asún wun amu su Bulu ɔbɔpu asun wunhe ká amú akɔ. Butegyí ɔdwe nketo, tsúfé ansigyíla butɔbwé. Butɔbwé pélula, kpóí iwɩ, butowíe anitɔ anɩ nkegyítɔ. Buɔe iwɩ mlé. ¹⁴Tɔtɔ uma amú ansigyí dun mbvatɔ. Butamasí laláhe bwe. Butemlé ahá ání amú hógyi melíí tsukule, há búɔbwé lakpan. Bahíé bí ɔnsipe wa. Amú bwehé laláhe anfi su, bugyówi ní! ¹⁵Basí ɔkpa wankláán ámu tswi, yó bubuo Beor mu bi Bulu ɔnɔsú ɔtɔpú *Bileam bwehé laláhe. Ɔɔdwe sika ání obénya tsú lalahewetɔ. ¹⁶Mú su Bulu léha mu afrímú lɔtɔí wa mu, uléha olesi mu gbedéla amu bwe.

¹⁷Afunu atɔ asunápú anfi buma labi kuku. Bugyi fé ntsuá ulakpí ntée nyankpuá ulabilá tuun, afú latsvan mú náti. Ínɩ su amú otsiákpá ání Bulu lalá yáí amú gyí oklún tuuntɔ. ¹⁸Butotsú iwɩ, ká ɔnɔtɔ, pú amú ɔwólɩ laláhe tun ɔnɔ, mlé ahá butelábwé lakpan ání besi bwe imɔkúwá ɔpá. ¹⁹Butehíé ahá beɛ, ní begyi amú atosunáhésu á, bégyi iwɩ. Táme amú onutó bugyi nkpábi há tsiátɔ laláhe. Tsúfé nyankpusa gyí ɔkpábi há tsá ide musu gyí. ²⁰Ahá ání babí anɩ Wíe pú anɩ Ɔlepú Yesu Kristo, sí ɔyítɔ ɔwólɩ laláheá iteyíntá nyankpusa bwe, beyinkí yébitíwíé mútɔ, igyi amúsú á, amú tsiátɔ teláyíntá dun alíá igyi yáí. ²¹Ní bumetepí wun ɔkpa wankláán ámu kúráá á, teku ɩbu alé há amú dun ání bówun mú yínkí ɔma, sí mbla wankíhé amúú ɔɔpuhá amú ámusu gyí. ²²Amú bwehé ántɩ lahá yébi anfi laba mútɔ. “Kɩaɩ tékpláí, lápú mu ɔdandu tsú” pú “Febie ɔprákuo ntsu alíagyíalíá á, ɔteláyébie ɔdiba.”

Antɩ Wíe Ɔbáke

2 Pe

3 ¹Mí apíó adwepú, ínɩ gyí ɔwulú nyɔɔsá ndewanlín sísí mɩ ní. Nɔepu nwulú anyɔ ántɩ káín mɩ, ménu mlɔgywún mú iwɩ wankláán. ²Ndekléá mlíkáun asún ámúú Bulu ɔnɔsú atɔpú wankíhé amu beblí yáí ámusu. Mlíkáun

anɪ Wíe, ogyi anɪ ɔlepú Yesu Kristo mbla á múbú ɔlɔtsun mu sumbí ayɔpúsú wá há mli ámusu. ³⁻⁴Gyankpaw a, ndekléá nékaín mli ání nke tráhe amutɔ á, ahinlá abwepú aku bóbuo amú onutó ɔwɔli laláhe. Bómɔsí mli, fíté mli beɛ, “Yéɛ Yesu léblí yáí ɔbéɛ, mélayínkí bá a? Mú nki mu mé? Tsú anɪ anáin lowu brésú ɔpá á, ɔtɔɔtɔ mɔkútɛ. Ali á múbú ilenya igyi ámu nɪ.” ⁵Bakɪ ansí tan ání ɔnɔ Bulu lɔpublí asún bímbí ámu, ɔsú múa asɪ lɛlɪn, ɔsulúv lɛdalɪ tsu ntsutso. Ntsu é ɔlɔpubwé mú. ⁶Ntsu kén ɔleha ulɔbulá yíntá bímbí ɔyí ámu. ⁷ɔnɔ ámu kén ɔletrá publí ání ɔsú múa asɪ ánfɪ mú íbétsiá yɔfɪn ekeá obégyi ahá á múbú butamanyá mu ífú ámu asún, pú ogyá hí tógyítɔ.

⁸Táme apíó adwepú, mli mátan íni músú. Ekewóle igyi fé nfí-ɔpím, nfí-ɔpím é igyi fé ekewóle anɪ Wíe ansítɔ. ⁹Ahá bukɪ beɛ, Bulu tesi tsiá tɔá alahíéá ɔbɔbwesɪ. Megyí ali ígyi, mboún klun otenyá há mli; ménɪ ɔhagyíɔha ɔbédamlí kluntɔ sí lakpan bwe, tsúfé omedékléá ɔhaa ɔbɔfwɪ.

¹⁰Táme anɪ Wíe ɔbáke amu íbófwie ahátɔ, fé alíá owikplu tofwíé ɔhatɔ. Eke ámu a, ɔsúsú bósurá okitikítí kóklóklúbú ɲa. Ogyá béɲlaín ntobíá ɔlɔpubwé ɔsú múa asɪ féé. ɔsulúv múa músú atɔ é féé bóho plíplíplíplí. ¹¹Ínɪá lélé Bulu obéyintá ɔyítɔ atɔ féé ali á, tsiátɔ mɔmu ilehián ání mlóputsiá, íbégyi Bulu ansí? Ilehián ání mli iwɪ bétɪn, mlósúm Bulu. ¹²Mlutsia tsiátɔ anfi pukɪ ɔkpa ha Kristo ɔbáke amu, amlɪha mú ikɔsɪ ba. Bulu ɔbɔpu ogyá hí tógyítɔ ɔsúsú eke ámu. Mú okunkúu é íbéɲlaín unu atɔ féé. ¹³Táme Bulu léhɪɛ ání ɔbɔbwɛ ɔsú múa asɪ pɔpwe há anɪ. ɔtínéá ahá ání amú asún da ɔkpa bétsiá. Mú anigyó ní.

¹⁴Mú sv apíó adwepú, ínɪá mli gyó íni sv á, mli yɪrɪ iwɪ amlutsia tsiátɔá mú iwɪ letɪn, ɔlala méetsiá mli iwɪ Bulu ansítɔ, ménɪ iwílwii bétsiá mli munyɔ nsúné. ¹⁵Mli mátan ání ahá nkpahɔɔ sú anɪ Wíe dé iklun nya, fé alíá anɪ pío ɔdwepú Paulo lɔpu nyánsa ání Bulu léha mu wánlín asún ánfɪ kén sísí mli. ¹⁶Asún ánfɪ aná iwɪ ɔlɔtɔí tsú mu nwulú féétɔ nɪ. Táme mu asún ámu iku asunu bu ɔnlɪn. Mú sv ahá ání butamakási tɔtɔ pú ahá ání amú hogyi melíí tsukule

butedámlí Paulo asón ámv, fé alí ámú butedámlí Bulu asun wanlínhé bun amv. Mú ɔbéha Bulu ɔbéhi amú ní.

¹⁷Táme apíó adwepú, íniá mliyin mú alí sv á, nde mli ɔlá da yái. Mludinka ansí iwısv, méni ahá ánfı butamagyi mblasv ánfı bumóɔpv amú atosunáhé laláhe amv bemlé mli, amlıdıda. ¹⁸Mboún mliɔ músú, méni anı Wíe pú anı ɔlepú Yesu Kristo awıɔle pú mv bı bómoní mliɔ. Numnyam ıbwée mv kle tsú séi púya bré féeťó! *Amen.

Yohane

ጋግሥ ግላግግግ

Nkpa Asún

1 ¹Anidé ጋግሥ áñfi wanlín sísí mli tsú Asún ámbú itehá nkpa, ibu unu asa ግyí lelín amu iwí. Aní onutó anilónu mu asún, pú ansíbi wun mu, kí mu, pú ibi da mu. ²Bulu léle Nkpa ጋhapú áñfi ግwan súná aní, anilówun mu. Anidé adánsiግe gyí, bláa mli aníaa, mutéhá nkpa ání itamatá ní. Mva ጋsí ámu nyጋ bu unu yáí, asa alalé mu ግwan súná aní. ³Asún ání anilónu pú tጋá anilówun anidé mli bláa, méni ania mlinyጋ abóbwe kule. Tsúfé ania ጋsí ámu pú mu Bi Yesu Kristonyጋ gyí kule. ⁴Anidé mú wanlín sísí mli, méni ania mlinyጋ ansigyí bófún.

Bulu Lówankí

⁵Asún ání anilónu tsú mu Bi ámu wá, anidé mli bláa gyí, Bulu lówankí. Oklún kvkvuku má mutጋ. ⁶Mú sv ní anidéblí aníaa, ania munyጋ anidé mbagyí, táme anitráa aniná oklúntጋ á, anidé afunu wa. Animédébwē dínká ጋጋkwali asún ámu sv. ⁷Táme ní aniná wanki amutጋ, fé alí ámbú mu onutó ጋna ámu a, ikulebwē bu ania aní aba nsiné. Mú sv mu Bi Yesu Kristo obugya amu tetún aní iwí tsú aní lakpantጋ.

⁸Ní ablí aníaa, lakpan ma aní iwí á, anidé iwí mlé. Animá ጋጋkwali. ⁹Táme ní alé aní lakpan bláa Bulu á, obésikíé aní, tún aní iwí tsú lalahe fééftጋ, tsúfé yilé ጋbwepú pú ጋጋkwaliግግ ogyi. ¹⁰Ní ablí aníaa, animégyí lakpan abwepú á, anilawá mu afunutጋ. Idesuná ání animóhጋ mu asún ámu.

Ani Buale Ogyípó

2 ¹Mí abí adwepú, nde asún ánfí wanlín sísí mli, ménu míméetrá bwe lakpan. Táme ní mlúto ɔku ɔbwé lakpan á, anibu ɔhá ání otokókóli aní Sí ámu há aní. Múgyí yilé ɔbwepú Yesu Kristo. ²Tsúfé mulówu, pú mu obugya lé aní nwunsu mbusuo. Megyí aní nkule pé lakpan, táme ɔyító ahá féé klé.

³Ní anidé Bulu mblasu gyí a, mú ɔbéha abébi ání anulabí mu ni. ⁴Ní ɔku ɔblí ɔbéé, “Nyin Bulu,” táme ɔtamagyi mu mblasu á, ofunupu ogyi. Ɔma ɔnɔkwali. ⁵⁻⁶Táme ní ɔku tegyi Bulu mblasu á, idesuná ání mu Buludwe lɔfun. Tǎá ɔbéha abébi ání kulebwe bu ania Bulu nsúné gyí, anitsie nkpa fé Yesu Kristo.

Mbla Pɔpwe Amu

⁷Apíó adwepú, megyí mbla pɔpwe kuku ndewanlín sísí mli. Mbla dada amúú mlyin tsú bré ámúú mlúlotsɔ hógyi amu ni. Mbla dada anfi igyi asún ání mlulanú dodo. ⁸Táme mbla pɔpwe igyi. Tsúfé Kristo tsiátó pú mli klé lalé mú súná ání mbla pɔpwe igyi. Oklún amu ɔdetsúɔn. Wanki amu onutó ɔdewankí dodo.

⁹Mú su ɔhá ání ɔbéé, ɔna wanki amutɔ, táme ɔde mu ba Okristoyin lu á, idesuná ání ɔtráa ɔbu oklúntɔ. ¹⁰Ɔhá ání ɔtɔdwé mu ba Okristoyin ná wanki amutɔ. Mú su tɔtɔtɔ mééha mu ɔbwe lakpan. ¹¹Táme ɔhá ání otolú mu ba Okristoyin mú tsie oklúntɔ. Ɔna oklúntɔ, su omeyín ɔtínéá ɔyó, tsúfé oklún amu ɔlatin mu ansí.

¹²Mí abí adwepú, nde ɔwulú ánfí wanlín sísí mli, tsúfé Yesu Kristo su Bulu lasí mli lakpan kíé mli. ¹³Mí así, nde ɔwulú ánfí wanlín sísí mli, tsúfé mlulabí ɔhá ámúú ɔbu inu tsú ɔyí nfiasí ámu. Nyasubi, nde ɔwulú ánfí wanlín sísí mli, tsúfé mlulagyi Ɔbunsámsú.

¹⁴Mí abí adwepú, nde ɔwulú ánfí wanlín sísí mli, tsúfé mlulabí Ɔsí ámu. Mí así, nde ɔwulú ánfí wanlín sísí mli, tsúfé mlulabí ɔhá ámúú ɔbu inu asa Bulu lɔbwe ɔyí ámu. Nyasubi,

nde ɔwulú ánfí wanlín sísí mli, tsúfé mli hógyi ɔnɔ bu ɔnlɔ, Bulu asún bu mlɛɔ. Mlɛlagyi Ɔbunsámsú.

15Mú sv nde mli féé bláa mbée, mlumápu mli klɔn dínká ɔyi pú mótɔ atósú. Ní ɔku dé ɔyi ánfí dwe á, ɔméetalí trá dwe aní Sí Bulu é. 16Ɔyítɔ ató ámu iku gyí, atɔ laláheá utedínká ɔha ɔwólí; atóá ɔha towun, utedínká mu ɔwólí pú ntobíá ɔha tɔpótúsú iwɛ. Ínɛ ánfí odu kukuɔku imotsú aní Sí Bulu wá, ɔyi ánfíto itsú. 17Ɔyi ánfí pú mótɔ atóá utedínká ɔha ɔwólí féé detsúvn. Táme ɔhá ání ɔtɔbwé tóá Bulu tekle obétsiá nkpa ání itamatá.

Kristo Alupú

18Mí abí adwepú, bré tráhe nɛ. Mlɛkain ání bebláa mli beɛ, Kristo olupú ámu ɔbéba. Séi ánfí á, Kristo olupú tsɔtsɔɔtsɔ baba. Ínɛ désuná ání lélé bré tráhe nɛ. 19Kristo olupú ánfí betsiá anɔtɔ asa bedali. Ní lélé aní klé bugyi á, tɛki besi tsiá anɔtɔ. Amú anɔtɔdali lósuná ání bumegyí aní apíó Kristotɔ. Mú sv bedali anɔtɔ ní.

20Táme mli mú á, Kristo lapú mu *Ɔɛe Wankíhé amu wá mlɛɔ. Mú sv mli féé mlɛlabí ɔnɔkwali amu. 21Megyí beɛ mlímeyín ɔnɔkwali amu, sù nde asún ánfí wanlín sísí mli. Mboún alíá mlyin ɔnɔkwali amu, pú alí ámúú mlyin wankláán ání ɔtínéá ɔnɔkwali amu bu a, afunu kukuɔku ima unv ámu sv.

22Ma gyí ofunupu kpɔnkpɔntɛ ánfí? Mvgyí ɔhá ání olekiná ɔbéɛ, “Megyí Yesu gyí Kristo, (ɔhá ámúú Bulu ladá mu ofúli amu).” Idesuná ání alakíná Ɔsí Bulu muva mu Bi Yesu Kristo amu. Mú sv mvgyí Kristo olupú ámu nɛ. 23Tsúfé ɔhá ání okíná Bulu mu Bi ámu lakíná mu Sɛ Bulu é ní. Táme ɔhá ání ɔlɔɔ mu Bi ámu lahɔ mu Sɛ ámu é.

24Mú sv mlɛha asún ámúú mlɛlónu tsú bré ámúú mlɛlótɔ hógyi amu isin mlɛɔ. Tsúfé ní isin mlɛɔ á, múmú ukulebwe bétsiá mlɛa Yesu pú Ɔsí Bulu nsuné. 25Ínɛ gyí tóá Kristo léhue ɔbéɛ méha aní, igyi nkpa ání itamatá ámu nɛ.

26Ahá ámúú budekleeá bémlé mli ámu sù nde asún ánfí wanlín sísí mli. 27Mli mú á, Ɔɛe Wankíhé ámúú Kristo

lópwwá mltw ámw bu mltw. Mú sv imehián ání ohaa obétrá suná mltw ató. Tsúfé Dje Wankíhé amw tosúná mltw tógyító. Mw atosunáhé é igyi owokwali onutó. Inu sv mlíkita tóá olosuná mltw, amlitsia Kristotw.

²⁸Inu sv mí abí adwepú, mlitsia Kristotw. Fówun ní obá á, péli méekitá ani, abétalí fia mu. ²⁹Ní mlyin ání yilé obwepú Yesu gyí á, múmú mlubi ání yilé obwepú Bulu mu bi okugyíoku gyí.

Bulu Abí

3 ¹Mlúki alitá anu Sí Bulu tēhíé dwé anu sù butetí anu mu abí. Lélé á, mu abí angyí. Táme tóá svá oyi ánfítw ahá bumeyín anu gyí, bumeyín anu Sí Bulu. ²Mí apió adwepú, séi á, Bulu ahá angyí. Alitá abébemlí wule owokúnýá lé súná anu. Táme anyin ání Kristo obá á, abéltan mu, tsúfé abówun alitá ogyi. ³Owagyíoha ání odun ansí ání méltan mu tēhá mu twi tetin, fé alitá mu twi letin.

⁴Owagyíoha ání otobwé lakpan á, owekusú líi Bulu mblasu. Tsúfé lakpan gyí Bulu mblasomágyi. ⁵Mlyin ání Kristo léba oytó bele anu tsú anu lakpantw, táme mu mú owobwe lakpan kuku. ⁶Inu sv ohá ání muwa Kristo bude mbagyí tamatráa bwe lakpan. Mú sv owagyíoha ání otráa ode lakpan bwe mókúwun Kristo, owokúbí mu é.

⁷Mí abí adwepú, mlumáha ohaa omle mltw. Owagyíoha ání otobwé yilé á, mu asún da okpa Bulu ansító fé Yesu. ⁸Táme Obunsám mu bi, ohá ání otráa ode lakpan bwe gyí. Tsúfé Obunsám dé lakpan bwe tsú bréá oyi lefi asu opa. Bulu mu Bi Yesu Kristo léba oytó beyintá Obunsám gyumagyihe kugyíku.

⁹Ahá ání babwé Bulu ahá butamatráa bwe lakpan, tsúfé Bulu tsiátó bu amútó. Mú sv buméetalí trá bwe lakpan. ¹⁰Tóá abópubí Bulu abí pú Obunsám abí gyí, owagyíoha ání otamabwé yilé, ntée dwé mu ba mégyí Bulu mu bi.

Abadwe

¹¹Asún ání mlúónu tsú bréá mlulémlí Akristofó gyí, adwée aba. ¹²Mlumábwe mltw twi fé *Kain. Owobwe Obunsám mu bi,

mó mu gyama. Nto léha sù ɔɔmɔ mu? Ɔɔɔbwe ito laláhe, mu gyama mú lɔ́bwe ito wankláán su ɔɔmɔ mu.

¹³Mí apíó Akristofɔ, umáwa mli wánwan ní ɔyí ánfito ahá butolú mli. ¹⁴Ani mú anyin ání aniladáli lowu asu yó nkpa ání utamatátɔ, tsúfé anidé ani aba dwe. Ɔhá ání ɔtamadwé mu aba lasin lowuto. ¹⁵Ɔhá ání otolú mu ba gyí ahá ɔmɔpú. Mliyin ání ahá ɔmɔpú ɔkuku má nkpa ání utamatá. ¹⁶Alí ámúbú Kristo lótsulá wú há ani ámu ɔlasúná ani alá ɔdwe gyí. Mú su ilehián ání ani é abówu há ani aba alí kén. ¹⁷Ní ɔku bu atɔ, alawun ání ku de mu ba hián, táme omowun mu nwe há mu a, múmú ɔméetalí blí ɔbéé, mɔɔɔdwé Bulu. ¹⁸Mí abí adwepú, ní igyi alí á, mliumápu ɔnókpan dwé aba. Mboún mliha apu ani bwehé pú ɔnɔkwali dwe aba.

Uklɔnwa Bulu Ansítɔ

¹⁹Ní anitɔdwé aba alí á, mú abébi ání anibuo ɔnɔkwali amu ni. Mú su ní anilí Bulu ansítɔ á, tɔtɔ mééhan ani. ²⁰Ní ani klɔn ihá ani pón kúráá á, Bulu yin asón dun ani klɔn, oyin ani bwehé kugyíku. ²¹Apíó adwepú, ní ani klɔn méha ani pón bréá anilí mu ansítɔ á, ifú méékitá ani. ²²Bulu ɔbéha ani tɔá anidé mu kulí, tsúfé anidé mu mblasu gyí, ani tsiátɔ é légyi mu ansí. ²³Mbla ání Bulu lówa há ani gyí, ahɔ́ mu Bi Yesu Kristo gyi, adwe aba fé alá Yesu lébláa ani. ²⁴Ɔhá ání ɔde Bulu mblasu gyí a, muva Bulu babwé kule. Bulu bu mu klɔntɔ. Tɔá itosúná ani ání ɔbu ani klɔntɔ gyí *Ɔɔe Wankíhé amúbú ɔɔpɔhá ani ámu.

Ɔɔe Wankíhé Pú Ɔɔe Laláhe

4 ¹Apíó adwepú, mliumáho ahá féé ání beé, bubu Ɔɔe Wankíhé amu asúnsú gyi. Mboún mliɔ ɔɔé ámúbú budepusúná atɔ ámu ki. Tsúfé Bulu ɔnɔsú atɔ́pú afunupu tɔɔtɔɔtɔɔ babúlá ɔyí ánfito. ²Ínu apúbí ání ɔɔé ámu itsú Bulu wá ní. Ní ɔku dé atɔ suná, ɔleblí ɔbéé, Yesu Kristo léln fé nyankpusa a, múmú mu atosunáhé amu itsú Bulu wá. ³Táme ní ɔku léblí ɔbéé, Yesu méln fé nyankpusa a,

mómú Dje Wankíhé amu uma mutɔ. Kristo olupú ɔyé á múbú mlulónuá bée, íbéba amu ni. Ulabá ɔyítɔ dodo.

⁴Mí abí adwepú, Bulu ahá mligyí. Mlulagyi Bulu ɔnósú atɔípú afunupu amusu. Tsúfé Dje á múbú íbu mlɔ á mu bu ɔnlin dun múámúú ide ɔyí ánfɔtɔ ahásu gyí amu. ⁵Yesu alupú á mu bumeyín Bulu. Íni su amú atosunáhé fée igyi ahá ání bumeyín Bulu atosunáhé. Mú su ahá ání bumeyín Bulu tóhɔ amú asónsú gyi. ⁶Ani mú á, Bulu ahá anigyí. Mú su ɔhagyíɔha ání oyin Bulu tɔhɔ ani asónsú gyi. Táme ɔhá ání omeyín Bulu tamahɔ ani asón. Íni anitɔpúbí ɔnɔkwali Dje á mu pú afunu klé ni.

Bulu Gyí ɔdwe

⁷Mí adwepú, mliha adwe aba, tsúfé ɔdwe itsú Bulu wá. ɔhagyíɔha ání ɔtɔdwé ahá a, Bulu mu bi ógyi, oyin Bulu. ⁸ɔhagyíɔha ání ɔtamadwé ahá méyín Bulu, tsúfé Bulu gyí ɔdwe.^a ⁹Alíá Bulu léle mu ɔdwe súná ani gyí, ɔɔpu mu Bi ɔkukúnú ɔkule amu sísí ɔyítɔ, méni abótson musu nyá nkpa ání itamatá. ¹⁰Megyí alíá anitɔdwé Bulu gyí Buludwe ɔnɔkwali su. Mboún alíá ɔɔdwe ani, pú mu Bi sísí ani, ání ɔbɔpu mu obugya le ani iwɪ mbusuo gyí ɔdwe.

¹¹Apíó adwepú, íniá Bulu léhie dwé ani ali su á, ilehián ání ani é abódwé aba. ¹²ɔhaa mókóhíé wun Bulu ki. Ní anidé aba dwe á, idesuná ání Bulu bu ani klɔntɔ. Mú su mu ɔdwe lɔfun anitɔ.

¹³Bulu lapú Dje Wankíhé amu há ani. Mú su anilabí ání ania munyɔ anilabwé kule, ɔbu ani klɔntɔ. ¹⁴Anilawun mú ali. Mú su anidé adánsɪe gyí aniaa, ani Sí Bulu lówa mu Bi Yesu Kristo ɔbée, ɔbéle anyánkpúsa fée tsu amú lakpantɔ. ¹⁵ɔhagyíɔha ání olohogyi, ɔleblí ɔbée Yesu gyí Bulu mu Bi á mu a, Bulu bu mutɔ, mu é ɔbu Bulutɔ. ¹⁶Mú su anyin ɔdweá Bulu bu ha ani, anilóhɔ mósú gyí.

Bulu gyí ɔdwe. Mú su ní ɔku tɔdwé Bulu pú mu aba á, ɔbu Bulutɔ, Bulu é bu mutɔ. ¹⁷Íni désuná ání Bulu ɔdwe

^a 4:8 Bulu gyí ɔdwe asi gyí, ɔdwe itsú Bulu wá.

lofun anito ní. Mú su animéenya pélu mu asún ogyíké, tsúfé anulatsiá nkpa oyi ánfito fé Yesu. ¹⁸Ohá ání Bulu odwe bu mutò tamanyá ifú. Mú su ní anidé Bulu pú aní aba dwe á, animéenya Bulu ifú. Tsúfé ahá ání buyin ání Bulu obébití amó isu tényá ifú. Íni su ní oku dé Bulu ifú nya á, ilosuná ání Bulu odwe mofun mutò.

¹⁹Anitòdwe Bulu pú aní aba, tsúfé Bulu légyankpá dwé aní. ²⁰Ní oku léblí obéé “Ntòdwe Bulu,” táme otolú mu ba á, ofunupu ogyi. Tsúfé ohá ání otolú mu ba ání otowun, méetalí dwé Bulu ání omòkòwun kí. ²¹Mbla ání Yesu Kristo lówa há aní gyí, “Ohá ání otòdwe Bulu odwée mu ba é.”

Tsiátó Laláhesugyí

5 ¹Ohagyícha ání olohogyi obéé, Yesu gyí *Kristo, (ohá ání Bulu ladá mu ofúli amu) a, Bulu mu Bi ógyi. Ní futòdwe okwírú a, fódwe mu bi é. ²Mú su ní anidé Bulu dwe, anidé mu mblasu gyí a, mú abópubí ání anidé mu abí dwe ní. ³Ní anidé Bulu dwe á, abégyi mu mblasu. Mu mbla ámusu gyí é uma onlun. ⁴Tsúfé Bulu mu bi okugyíoku tetálí gyi tsiátó laláhesu. Aní hógyi anitòpúgyí mósú. ⁵Ma obétalí gyi tsiátó laláhesu? Ohá ání olohogyi ání Yesu gyí Bulu mu Bi ámu nkule obétalí gyi mósú.

Yesu Kristo Iwí Adánsiégýí

⁶Yesu Kristo gyí ohá ání olòtsun ntsu móa obugyato ba. Megyí ntsu nkuletò olòtsun. Olòtsun obugyato é. Oje Wankíhé amu légyí asún ánfí iwí adánsiè, ání igyi onokwali. Otamawá afunu. ⁷Ató asa légyi Yesu iwí adánsiè. ⁸Múgyí, Oje Wankíhé, ntsu pú obugya. Ató asa ánfí féé leblí toku kule. ⁹Ní ahá begyi adánsiè súná aní, anitohogyi a, múmú ilehián ání abóho Bulu klé dun. Tsúfé mu onutó légyi mu Bi ámu iwí adánsiè. ¹⁰Ohagyícha ání olòho Bulu mu Bi ámu gyi laho Bulu adánsiè ánfisu gyi mu kluntò. Alí kén ohagyícha ání omòho Bulu adánsiè ánfisu gyi dé mu afunuto wa ní. Tsúfé omòho adánsiè ámúbú Bulu légyi tsu mu Bi iwí ámusu gyi. ¹¹Adánsiè ámu gyí, Bulu lapú nkpa ání utamatá

há aní tsvn mu Bi ámuṣu. ¹²ጋhagyíጋha ání ጋbu Bulu mu Bi ámu bu nkpa ání utamatá. Alí kén ጋhagyíጋha ání ጋma Bulu mu Bi ámu má nkpa ání utamatá ní.

Asón Tráhe

¹³Mlulahጋ Bulu mu Bi ámu gyi. Mú su nde ጋwulú ání wanlín sísí mli, méni mlébi ání mlibu nkpa ání utamatá. ¹⁴Tṣá utehá anitጋwá klvn yጋ Bulu ansítጋ gyí, akúlí mu tógyítṣá igyi mu apé á, otonú aní ጋme. ¹⁵Ní anyin ání otonú aní ጋme a, múmú akúlí mu tógyítጋ á, anyin ání ጋbéha aní.

¹⁶Mú su ní ጋku owun mu ba Okristoyin dé lakpan bwe á, ጋbጋጋ mpái ha mu. Bulu ጋbéha mu nkpa. Ahá ání amú lakpan méekpa amú wá lowutጋ asón ndeblí. Lakpan ku bu unvá utekpá ጋhá wá lowutጋ. Megyí ጋhá ání ጋbwé lakpan ámu odu mbéé mlibጋጋ mpái ha. ¹⁷Lalahe kugyíku igyi lakpan, táme lakpan ku bu unvá utamakpá ጋha wá lowutጋ.

¹⁸Anyin ání ጋhá ání alabwé Bulu mu bi ጋkuku tamatsiá bwé lakpan, tsúfé Bulu mu Bi ámu togyo mu iwí. Íni su ጋbunsám tamatáli bwé mu tጋጋ.

¹⁹Anyin ání Bulu ahá angyí, táme ጋbunsám dé ጋyítጋ ahá féésú gyí.

²⁰Anyin ání Bulu mu Bi ámu laba. Alahá anulanú asón asi, méni abébi Bulu ጋnጋkwalıpu amu. Ania monyጋ anılabwé kule, ania mu Bi Yesu Kristo é anılabwé kule. Lélé á, mu nkule pé gyí Bulu ጋnጋkwalıpu pú nkpa ání utamatá ámu ni.

²¹Mú su mí abí adwepú, mlıki mli iwı wankláán ikpısúmsú.

Yohane

Ɔwulú Nyɔɔsi

¹Ani yín ání Bulu lalé, mí ɔpasua ɔhande Yohane dé ɔwulú ánfɔ wanlín sísí fúa fú abí. Ntɔdwé mli fée ɔɔkwali amuto. Megyí mí nkule pé tɔdwé mli, táme ɔhagyíɔha ání oyin ɔɔkwali amu é. ²Tsúfé ɔɔkwali amu bu anuto, ibétsiá anto brégyíbré.

³Ani Sí Bulu mua mu Bi Yesu Kristo bogyíi ani buale. Bɔwúun ani nwe, abuha ani iwilwii, ani ahá ámúú anutɔdwé aba ɔɔkwali su ámu.

Ɔɔkwali Múa Ɔdwe

⁴Ansí lehué gyi mi bréá nowun ání fú abí ámu aku buna ɔɔkwali ɔkpa ámusu, fé alú ani Sí Bulu lébláa ani. ⁵Ani yín ɔdwepú, mliha adwe aba. Megyí mbla ɔɔpwe ndewanlín sísí fú. Mbla ámúú anulébi tsú bré ámúú anulótsɔ hógyi amu ni. ⁶Ní futɔdwé Bulu á, fégyi mu mblasu. Mbla ání anulébi tsú bréá anulótsɔ hógyi gyí, adwée aba.

⁷Ahá amlépu tsɔtsɔtsɔ baba ɔyi ánfuto. Budeblí bee Yesu Kristo méln fé nyankpusa. Ahá ánfɔ gyí ahá amlépu pú Kristo alupu ámu ni. ⁸Mú su mliki wankláán, méni mli gymagyihe móɔbwe kpaali, féki mlénya mli ikóká fée.

⁹Ɔhagyíɔha ání ɔmedé Kristo atosunáhé amuto, ɔɔtsun mú ɔma yó ɔde tɔ bambá suná á, mua Bulu bumegyí kule. Táme ɔhá ání ɔde Kristo atosunáhé amuto á, mua ani Sí pú Mu Bi ámu fée bogyi kule. ¹⁰Ní ɔku ɔbá mli wá, ɔmedé Kristo atosunáhé anfi suná á, mli máhɔ mu wá mli wóyítɔ, mli mátsulá mu itsiá. ¹¹Ɔhagyíɔha ání otsúlá mu itsiá latsá mu lakpan ámúú ɔdebwe ámu bwe.

¹²Asón tsɔtsɔtsɔ bu ɪnvá tɛki nébláa mli, táme mmedékléá nówanlín mú sísí mli. Mboún nde ɔkpa kí ání néba mli wá, méni mía mɪnyɔ abétsiá asi, atɔi nya ansigyí wankláán.

¹³Fú pío tsíhé á múú Bulu lalé ámv abí behá fú itsiá.

Yohane

Ɔwulú Saasi

¹Mí ɔdwepú Gaio, ntɔdwé fú ɔɔkwali amvɔ. Mí ɔpasua ɔhande Yohane dé ɔwulú ánti wanlín sísí fú.

²Mí ɔdwepú, ndehógyiá iwɪ bu fu ɔnlɪn, tógyítɔ é una wankláán fé alía fúde fú Bulu súm. ³Ansí lehié gyi mi bréá apíó aku beba bebláa anɪ alía fude Bulu mbla ámusu gyí, pú alía funa ɔɔkwali ɔkpa ámusu. ⁴Brégyíbréá nonú alía mí abí Akristofɔ buna ɔɔkwali ɔkpa ámusu á, itehié wá mí ansigyí.

Gaio Kanfú

⁵Mí ɔdwepú, utɔ wankláán fúdeɔwe, fúde anɪ apíósú kí, títriu afɔɔ ámu. ⁶Amútɔ aku baba bebláa anɪ ɔpasua ámu alía fekɪ amúsú féé. Bɔ mbódí afusi amú ɔkpa alía íbégyi Bulu ansí é. ⁷Tsúfé Kristo su búna. Bumedeé tɔtɔ hɔɔ tsu ahá ání bumegyí Akristofɔ wá. ⁸Ilehián ání abéki ahá ánti odusu alɪ, fékɪ anɪa amúnyɔ abɔɔwe kule yó ɔɔkwali agyómá ámu.

Diotrefe mua Demetrio

⁹Nawánlín ɔwulú ku sísí mlɪ dodo, táme Diotrefe dékléá ɔɔɔwe mu iwɪ ɔpasua ɔhande. Mú su ɔmedé anɪ pubwé tɔtɔ. ¹⁰Ní nebá mlɪ wá á, nébláa mlɪ mu asɔn laláheá ɔdeblí tsú anɪ iwɪ. Múá uma ale kúráá gyí, ɔbéɛ, mumɔɔhɔ apíó ámu afɔɔ. Ɔde ahá é itin ka ɔbéɛ, bumáki amúsú, ɔde ahá ání beki amúsú é gyáa le ɔpasua ámvɔ.

¹¹Mí adwepú, mlɪmákasí mu bwehé laláhe anɪ. Mboún mlɪkasɪ yilé abwepú ámu bwehé. Ɔhagyíɔha ání ɔtɔwé yilé

á, Bulu mu bi ógyi, táme chá ání ɔ̀ɔ̀ɔ̀wé lalahɛ mú méyín Bulu.

¹²Demetrio mú á, ɔ̀hagyíɔ̀ha tetí mu ɔ̀dayilé. Mu tsiátó é idesuná ání ɔ̀ha wankláán ogyi. Mí é ntetí mu ɔ̀dayilé. Mhɔ̀yin ání mí asun blíhé igyi ɔ̀ɔ̀kwali.

Uklá

¹³Tɛ̀ki asún tsɔ̀tsɔ̀tsɔ̀ bu unvá nébláa fu, táme mmedékléá nówanlín mú sísí fú. ¹⁴Nde ɔ̀kpa kú ání imó̀ɔ̀wa ɔ̀pá kúráá néba mli wá, abétsiá así tóí.

¹⁵Bulu ɔ̀háa fú iwilwii.

Fó anyawíe féé behá fú itsiá. Nehá anɔ̀ anyawíe amuto okugyíɔ̀ku é itsiá.

Yuda ጋህሌ

Itsiáha

¹Mí Yesu Kristo osúmbi Yuda, Yakobo mu pio dé ጋህሌ áñfi wanlín sísí ahá ání aní Sí Bulu léti, ጋጋጋwé amó, Yesu Kristo dé amósó kú.^a

²Nde Bulu kokóli mbéé, ጋhíe wun mli nwe, ጋha mli iwilwii pú ጋdwe.

Afunu Ató Asunápú

³Apíó adwepú, tekí nahíé bwé agywun ání nówanlín mli ጋህሌ tsú nkpa ámú Bulu laho mía mlinyo ámu iwí. Táme ilehián ání nówanlín kókóli mli, amlipti hógyi amú Bulu lapóhá mu ahá ጋtsáwule pé ámu nwun. ⁴Tsúfé aha aku banjáin bowie mlito. Ahá áñfi adá ida ጋህሌጋጋ dodo há isubití, tsúfé butamanyá Bulu ifú. Budeblí beé, íniá Bulu tesí aní lakpan kíe aní su á, abétalí tsíá tsiátጋ laláhe. Bakósó líí aní Wíe pú aní ጋkrapú Yesu Kristo ጋkule pé ámusu.

⁵Mliyin asún áñfi féé dodo, táme ntráa kaun mli ání aní Wíe Bulu^b lékpa mu ahá dáli Egipte ጋsulósu, táme ጋma a, ጋጋጋ amúá bumጋጋ mu gyi féé tsálífwí. ⁶Mlikaun ání *Bulu-abጋጋv aku bumetsiá ጋtínéá ጋleha amú túmi ጋbéé butsiá. Mú su Bulu léha bጋwa amú ikan, butsie oklúntጋ bugyo mu asún ogyíké kጋጋጋጋጋጋጋ ámu. ⁷Sodom múa Gomorafጋ pú nkuda ání ilekafia amú é betsiá wá atsi múa ayin asún. Ali

^a 1:1 Ntéé Bulu dé amósó kú ha Kristo. ^b 1:5 Aní Wíe Yesu ntéé Yosua bu nwóló dada amu akuto.

kén Bulu léha ogyá ání itamadun lóho amú awúlu féé, pódá ahá féé olá ní.

⁸Alí nkude akúnpu anfi é butokun nkude ni. Itehá amú butobwé lakpan púkpóí amú iwí, butamanyá Bulu túmi ifú. Buteblí abususu púkpóí ɔhjá ibu numnyam é. ⁹Bulu-ɔbɔpu dehen Mikael kúráá méblí asun laláhe bréá mva Ɖbunsám bepríu Mose fúli. Tóá ɔleblí gyí, “Bulu ɔwáa iyin wa fu!” ¹⁰Táme ahá ánfí mú buteblí asun laláhe tsú tóá bumonu mú así iwí. Amú bwehé lelian mbwíá buma agywun. Múgyí tóá utehí amú é ní. ¹¹Alí ahá ámu bogyówu! Tsúfé bapú *Kain amúbú ɔlomo mu gyama ámu ɔkpa. Bakula sika yóbwé tóá *Bileam lóbwé, bakósú líí Bulusu fé Kora.^c Mú su Bulu ɔbéhu amú. ¹²Ahá ánfí butɔpú ifin da ukulebwé atogyihe amu. Ní mla amúnyc mlidé atógyí a, péli tamakítá amú. Akpapú bogyi, táme amú nkule klé butekí. Bogyi fé agyindeá utamatswie, afú tɔtsvan mú náti. Bogyi fé nyíá itamaswíé ntéé bapúlí mú, tú mú así, ulawú plíplíplíplí. ¹³Amú pélu bu nyányáa fé ntsusu-afuá iteda bobun ogbémgbesu. Bogyi fé ntsrakpabiá ina detsúun nwulótáasu keke. Amú otsiákpá gyí oklún tuun ání Bulu lélayái há amú bré féétó.

¹⁴*Adam ɔma ulíntɔ sienósítɔ obí Enok léblí amú iwí asún tswi. Ɖbéé, “Mlíki, aní Wíe mva mu abɔpu wankíhé mpím afini-afini bebá. ¹⁵Ɖbá begyi ɔyító ahá féé asún, ɔbuti ahá ání butamanyá mu ifú isu. Amú lalaheá babwé púkósú líí musu, pú mu iwí asun laláheá bablí su!”

¹⁶Ahá ánfí butɔtótí ahásu, lé ahá ulá, bwé lalahe kugyíkuá budeklé. Butotsú iwí, bun ahá kpantsapa, méni bénya tóá budeklé.

Oláda Pú Tóíkplá

¹⁷Táme apíó adwepú, mlíkain asún ání aní Wíe Yesu Kristo *sumbí ayɔpú ámu bebláa mlisu. ¹⁸Bebláa mli beé, “Nke tráhe amutɔ á, ahinlá abwepú béba. Bóbuo amú ɔwólí laláhe.” ¹⁹Bubu mlitɔ dodo. Amú dé mli nsiné yintá ní. Amú

Yuda

^c 1:11 Kora lókusú líí Mose mva mu dehen Aaronsu.

onutó agywun dé amó kpa, tsúfé Ɖɛ Wankíhé amu má amútó. ²⁰Táme apíó adwepú, mli mú á, mlpwe mli tsiátó dinka mli hógyi wankíhé amusu. Mlibo mpái Ɖɛ Wankíhé amu túmito. ²¹Mlitsia tsiátóá Bulu ɔdwe lasúná mli, bré ánfí mligyó aní Wíe Yesu Kristo ání ɔbéba bowun mli nwe, há mli nkpa ání utamatá ánfí.

²²Mliwun ahá ání asún ámu imedé amó wankí nwe. ²³Mlipri aku le ogyá ámutó, puhó amó nkpa. Mliwun aku nwe ifúsú. Mliki wankláán ání amó lalahe amu iméetsankí mli.

Bulu Kanfó Mpái

²⁴Mutéhá anutamadida. Mutélé lalahe lé aní iwí, kpá aní ba numnyam amúú ibu bomlí mu amu asi ansigyító. ²⁵Mu nkule gyí Bulu pú aní Ɖhópu. Numnyam, obú, ɔwunlín pú túmi utsún aní Wíe Yesu Kristosu utu mu. Tsú bréá ɔyí mɔkútsúa asi, bɔtu nde púya bré féé. *Amen.

Atsá Bele Súná

Yohane

1 ¹Íni gyí atsá Bulu léha Yesu Kristo léle súná mu asúmpú tsú tásá íbéba nke ánfítò wí ní. Yesu lówa *Bulu-ɔ̀bɔ̀pɔ̀ léba bele mú súná mu osúmbi Yohane. ²Yohane légyí tógyításá olowun wí adánsíe. Olegyi Bulu asún ámu pú asún ání Yesu Kristo lébláa mu fée wí adánsíe ɔ̀kɔ̀kwálísv. ³Bulu obóyulá ɔ̀há ání ɔ̀tekla mu ɔ̀nósú ɔ̀tɔ̀ípú asun wanlínhé anfi súná Kristo ɔ̀pasua ámu. Obóyulá ahá ání butonú asún ámu, gyi dinká mósú é; tsúfé mú fée bábi lafɔ̀n ta.

Kristo ɔ̀pasua Asienó Ámu Itsiáha

⁴⁻⁵Mí Yohane dé ɔ̀wulú ánfí wanlín sísí Kristo ɔ̀pasua asienásá mlibv Asia ɔ̀mátó.

ɔ̀há ámúbú oletsiá, ɔ̀bu unv, ɔ̀bélabá amu mva ɔ̀hé asienó ání bulú mu owíe obíá ansító pú Yesu Kristo bugyíi mli buale, abvha mli iwilwii. Mvgyí ɔ̀danstiyin ɔ̀kɔ̀kwálísv, ogyankpapuvá ɔ̀kɔ̀kusú tsú afúlító, ɔ̀yító awíe féesú ogyípu.

Mvɔ̀dwe áni, ɔ̀pɔ̀v mu obugya ká aní nwunsu ikɔ̀, sí aní lakpan kíe aní. ⁶Alabwé aní mu iwíe ogyíkpa pú mu igyí ahapó ání abósum mu Sí Bulu. Numnyam múa túmi íbwée mu kle bré fée! *Amen.

⁷Kí! ɔ̀na nwulótáasv ɔ̀bá! ɔ̀hagyíɔ̀ha obówun mu. Ahá ámúbú bɔ̀wɔ̀ mu pía amu kúráá bówun mu. Mu sv ɔ̀yító ahá fée bósu kúklúkú. Alí íbéba ní!

⁸Aní Wíe Bulu léblí ɔ̀bé, “Mígyí *Alfa múa Omega. Otúmípu amúbú oletsiá, ɔ̀bu unv, ɔ̀béba amu ní.”

Kristo Le Súná

⁹Mí, mli píó Yohane ni. Mía mlinyɔ dé ipian wúun Yesu pú *Bulu iwíegyi ámu su, anidé ɔkɔn nya líí kínkín. Bulu asún ɔkanda pú Kristo iwɔ asúnblí su balé mí ya Patmo ɔpu nsiné ɔsulúsu. ¹⁰Eke ɔkúá igyi anɔ Wíe eke á, Bulu Dɔhé léba misu. Nonu ɔme ku, ulɛlɛn kóklókúú fé ɔkpe ɔsáwule pé mí ɔma. ¹¹Ɖme amu ɔbéɛ, “Wanlɛn tɔ́á fudewúun wa ɔwulú́tɔ́, afɔpuya Kristo ɔpasua asienó, bugyi Efeso, Smirna, Pergamo, Tiatira, Sardi, Filadelfia pú Laodikea.”

¹²Bréá nedamlí mbée anki ɔhá ání ɔde mí asún bláa a, nowun sika pepe ɔkandíe-oyíá ɔbu abámbi asienó. ¹³Ɖha ɔkúá ɔlehan Nyankpusa-Mu-Bi ámu líí ɔkandíe-oyí ámu nsiné. Ɖɔwa ligá, ɔɔpu sika pepe ɔfé tsan mu kántó. ¹⁴Mu nwun pú mu imi féé lofulí fé opulí mpútó ntée ɔhráda. Mu ansíbi aklambi é lowankí fé ogyá mpumpi. ¹⁵Mu ayabi de ogyá kpa fé kɔ́ɔbri ání bafwí mú lé ogyátó inɔnɔ. Mu ɔme idetsulá fé ntsuá ɔdekpa yi. ¹⁶Ɖde ntsrakpabi asienó mu gyɔputɔ. Ɖdayí iya anyɔ kláklá ledalu tsu mu ɔnótó. Mu ansító ɔhíé dewankí fé ɔpawi. ¹⁷Bréá nowun mu a, nemlí bun mu ayabiasí fé ɔha wuhé, táme ɔɔpu mu gyɔpu ɔbu dínká mísú, blí ɔbéɛ, “Mánya ifú! Mígyí Ogyankpapu múa Ɖtráhe amu ni. ¹⁸Mígyí ɔkɔankpapu amúú nowu ámu ni. Ki, mbu nkpa bré féétó! Mbu túmi lowu múa afúlitɔsu.

¹⁹“Wanlɛn tɔ́á fawun ɔɔtsun, múa ɔdebá séi pú múa ɔbéba ɔma wa ɔwulú ámuɔ. ²⁰Ntsrakpabi asienó amúú fowun mí gyɔputɔ pú sika pepe ɔkandíe-oyí abámbi asienó ámu asú ní. Ntsrakpabi asienó ámu igyi ɔpasua asienó ámu abɔpu. Ɖkandíe-oyí abámbi asienó ámu é gyí ɔpasua asienó ámu.

Efeso Ɖpasua Nkla

2 ¹“Wanlɛn asún ánfɔ sɔsɔ Akristofɔ ɔpasua ání ɔbu Efeso wúluto ɔɔpu fɛɛ,^a

^a2:1 Ɖɔɔpu anfi gyí Bulu-ɔɔpuá ɔlí há ɔpasua ámu ni. ɔbu nfi múa 2:8, 12, 18; 3:1, 7, 14 étó.

“Dhá ámúó ɔde ntsrakpabi asienó mu gyɔɔpɔtɔ, ɔna sika pɛpɛ ɔkandíe-oyí abámbi asienó ámu nsuné ámu ɔbéé: ²Nyin tóá fudebwe féé. Nawun alá fuhíé fude agyómá yɔ, pú alá fude nsi wa líí kínkín. Nyin ání futamakle aha laláhe asún. Fakápú ahá ámúó bude amú iwɪ tɪ Kristo *sumbí ayɔpú ámu, wun ání afunupu bugyi. ³Fotomi wun ipian mí sv, fúmeyinkí ɔma. ⁴Táme asún kule péá mbu fú iwɪ gyí, ɔdwe utrása ma mía funyɔ ntée fúa fú aba nsuné fé gyankpapu amu. ⁵Mú sv kaun alá tɛkɪ fugyi asa fadɪda. Damli kluntɔ, afvlatsia fú atsiábi. Ní megyí ali á, néba bele fú ɔkandíe-oyí ámu lé mú aba ɔpasua atráhe amutɔ. ⁶Táme toku kuleá ibu alé fú iwɪ gyí, futamakle Nikolai abúopu bwehé laláhe amu, fé alá mí é ntamakle mú.

⁷“Dhá ání ɔbu asv onúu asvun ání *Dɛ Wankíhé amu dé ɔpasua ámu bláa asɪ. Néha dhá ání olegyi isv obégyi *Paradiso ndobítɔ oyí-abí ámúó utehá nkpa ámu.”

Smirna ɔpasua Nkla

⁸Ɖletrá bláa mi ɔbéé, “Wanlɪn asún ání sɪsɪ Akristofɔ ɔpasua ání ibu Smirna wúlutɔ ɔɔpɔ fɛɛ,

“Dhá ámúó ogyi Ogyankpapu múa Ɖtráhe, olowu lákúsú tsú afúlitɔ ámu ɔbéé: ⁹Nyin fú ipian wunhe pú ohian ání fudegyí, táme fubu ató! Nyin alá ɔpasua ámúó bude iwɪ kú beɛ, *Yudafɔ búgyi ámu bude afunu wa dínká fúsú. Megyí Yudafɔ búgyi, Ɖbunsám abúopu ɔpasua bugyi. ¹⁰Máha ipian ání íbéba fusu iwa fú ifú. Nde fú bláa, Ɖbunsám ɔbéha békutá mlitɔ akw tswɪ obu. Ɖbósw mlɪ kɪ. Bédinká fúsú nke dú. Ní lowutɔ ígyi ó á, fú mú wa ɔnɔkwali. Néha fú isvgyi-ɪpa, igyi nkpa ání itamatá.

¹¹“Dhá ání ɔbu asv onúu asvun ání Dɛ Wankíhé amu dé ɔpasua ámu bláa asɪ. Dhagyíɔha ání olegyi isv á, lowu nyɔɔsɪ amu uméɛda mu.”

Pergamo ɔpasua Nkla

¹²Ɖletrá bláa mi ɔbéé, “Wanlɪn asún ání sɪsɪ Akristofɔ ɔpasua ání ibu Pergamo wúlutɔ ɔɔpɔ fɛɛ,

“Dhá á múú ɔbu ɔdayí ɪya anyɔ kláklá ámu ɔbé: ¹³Nyin ání futsie ɔtínéá Dɔbunsám owíe obíá itsie, táme fude fú hógyito kínkínkín. Bréá bɔmɔ mí adánsie ogyípú ɔnɔkwaliɔ Antipa mlí wá unu kúráá á, fumeɓpa mí ɔma. ¹⁴Táme mú ó á, mbu fú ɪwɪ asún kpalobí kv. Mlito aku bubuo *Balaam amú olosuná Balak^b alá ɔbɔbwe Israelfɔ bɔbwe lakpan, ɔleha amú betsiá wá atsi múa ayin asún, tsíá gyi ɔkɔɔ-átɔ ámu. ¹⁵Alí kén aku bubu mlitɔá bubuo Nikolai atosunáhé ni. ¹⁶Mlɔdamli klɔntɔ. Ní megyí alí nóbofwie mlitɔ, pú mí ɔnɔtɔ ɔdayí ámu kó amú.

¹⁷“Dhá ání ɔbu asu onúu asún ání Dɔɔe Wankíhé amu dé ɔpasua ámu bláa asu.

“Dhagyícha ání olegyi ɪsu obégyi atogyihe amúú ɔɔɔɔáín ámu kv. Nétrá ha okugyíku ibwi futútúá ɔwanlín idá ɔɔɔwe dínká músú. Mu nkɔle ɔbébi dá ámu. Dhaa méebi mú tsíá mutɔ.”

Tiatira ɔpasua Nkla

¹⁸Ɔletrá bláa mi ɔbé, “Wanlun asún ání sɪsɪ Akristofɔ ɔpasua ání ɪbu Tiatira wúluto ɔɔɔɔ fɛɛ,

“Bulu mu Bi á múú mu ansíbi igyi fé ogyá ɔdandu, mu ayabiasɪ igyi fé kɔɔbrɪ ání bapúwá ogyá, plíu mú ɪwɪ ámu ɔbé: ¹⁹Nyin fú bwehé féé. Nyin fú ahádwe, fú hógyi, fú osum agyú má pú fú nsiwa líí kínkín. Nyin ání fudebi bwé dun gyankpapu amu. ²⁰Táme asún ání mbu ha fú gyí, fahá ɔtsɪ á múú butetí mu Yesebel, ɔde mu ɪwɪ tɪ ɔbé, Bulu ɔnɔsú ɔɔɔpú amu dépu mu atosunáhé mlé mí asúmpú, buɔe atsi múa ayin asún wa, buɔe ɔkɔɔ-átɔ é gyí. ²¹Nakɪ mu ansítɔ ání ɔbédamlí klɔntɔ bobuo Bulu, táme omedékléá obési mbuatɔ. ²²Mú su néda mu, wá mu ɪɔ. Obówun ipian. Ní mu ahá á múú buɔe mbua tɔ ámu é bumesi, lé ɪwɪ lé mútɔ á, néha amú béhie wun ipian. ²³Nómɔ mu abúopu amu. Akristofɔ ɔpasua féé bébi ání mígyí dhá á múú otowun ahá klɔntɔ pú amú nwuntɔ asún ámu ni. Néka okugyíku ɪkɔ mu bwehé ɔnɔ.

^b 2:14 Íni bu Numeri 22–24tɔ

24“Táme mli aha tráhe ání mlilasí mlibu Tiatira wúluto, mlimóbuo ɔtsi ámu atosunáhé amú bude mó ti ‘Ɖbunsám asun ɣáinhé’ amu mó á, mmóɔpu atọ svráhé kuku súra mli. 25Táme mlukita mí atosunáhé amú mlibu amuto kinkíinkín yófun bréá néba. 26Néha ɔhá ání olegyi tógyítósú, ɔletalí bwé mí apé yófun ɔyi ɔnómoké túmi, obégyi ɔmá féesú. 27-28Ɖbékpa amú owuntɔlusu, bwíébwíe amú blúblúblú fé abua. Obénya túmi ámú mí Sí lópuhá mí ámu odu. Nópu mu bake ɔtsrakpabi há mu, púsúná ání alagyi isu.”

29“Ɖhá ání ɔbu asu onúu asún ání Ɖɣe Wankíhé amu dé ɔpasua ámu bláa asu.”

Sardis Ɖpasua Nkla

3 1Ɖletrá bláa mi ɔbéé, “Wanlun asún ání sɔsɔ Akristofɔ ɔpasua ání ibu Sardis wúluto ɔɔpu fée,

“Ɖhá ámú ɔbu Bulu Ɖɣé asienó pú ntsrakpabi asienó ámu ɔbéé: Nyin fú bwehé fée. Fubu idá ání fuki nkpa, táme fawú fúna. 2Mú su tsinki, afowa fú atọ tráhe amu ɔwunlín, tsúfé idekléa iwu. Nawun ání fú bwehé lesian mí Bulu ansítú. 3Mú su kaun tśá bosuná fú pú múá fonusu. Gyi mósú, afudamli kluntɔ. Táme ní fumetsinkí á, nóbofwie fútó fé owikplu, fúméebi bréá néba. 4Táme aha aku bubu wúlu amutá bumókókpóí amú atadie.^d Bówa atadie futútú, mía amúnyc abénatí, tsúfé bafun. 5Néha ɔhá ání olegyi isu ɔbówa atadie futútú. Mméetsitsíi mu idá lé nkpa ɔwulú ámutɔ. Néblí mí Sí mva mu abɔpu ansítú mbée, míbú mu.

6“Ɖhá ání ɔbu asu onúu asun ání Ɖɣe Wankíhé amu dé ɔpasua ámu bláa asu.”

Filadelfia Ɖpasua Nkla

7Ɖletrá bláa mi ɔbéé, “Wanlun asún ání sɔsɔ Akristofɔ ɔpasua ání ibu Filadelfia wúluto ɔɔpu fée,

“Ɖhá ámú ɔlwankí, ɔtamawá afunu, ɔde Owíe *Dawid sáafi, ofínkí ɔhaa tamatálí fin, ofin é ɔhaa tamatálí fínkí

^c 2:27-28 Israelfɔ llu 2:8-9 ^d 3:4 Bumókókpóí amú atadie asu gyi bumókóbwé lalahe.

ámu ɔbée: ⁸Nyin fú bwehé féé. Kí, nafínkí obu yáí há fú. Ɖhaa méetalí fin mú. Nyin ání fuma ɔwunlín, táme fagyi mí atosunáhésu, fúmekpa mí ɔma. ⁹Ɖbunsám abúopu amúb bude afunu wa bée, *Yudafɔ bɔgyi ámu a, néka amú híé béba béda akpawunu fú ayabiasí. Amú féé bébi ání ntɔdwé fú. ¹⁰Fagyi mí asúnsú, fanyá klun líí kínkíínkín. Mú su nélé fú lé ipian ámúb nɔpɔsɔ ɔyítɔ ahá féé kí amutɔ. ¹¹Kí, nebá ní. Mú su kítá itó ámúb fúbu amutɔ kínkíínkín, méni ɔhaa mɔhɔ fú isɔgyí-ɔpa lé fú ibutɔ. ¹²Ɖhá ání olegyi isu á, nɔpu mu bwé mí Bulu ɔtswékpa obu ámu ɔtan. Ɖméetrá dali unu ekekekeke. Nówanlín mí Bulu idá dínká musu. Nówanlín mí Bulu wúlu, igyi Yerusalem pɔpwe amu idá dínká musu. Wúlu ámúb íbékplí tsú ɔsúsú mí wá ba amu, nówanlín mí onutó idá pɔpwe amu é dínká musu.

¹³“Ɖhá ání ɔbu asu onúu asun ání Ɖhe Wankíhé amu dé ɔpasua ámu bláa así.”

Laodikea Ɖpasua Nkla

¹⁴Ɖletrá bla mi ɔbée, “Wanlin asún ánfí sísí Akristofɔ ɔpasua ání íbu Laodikea wúlutɔ ɔbɔpu fée,

“Ɖhá ámúb butetí mu *Amen, mu sù Bulu asún féé iteba mótɔ, ogyi ɔdansiyin ɔnɔkwalipu, ɔtamawá afunu, ogyi Bulu atɔ bwehé féé nwun ámu ɔbée: ¹⁵Nyin fú bwehé féé. Fumebli ogya, fúmolwií é. Ní febli ogya ntée folwií á, tekí íbu alé. ¹⁶Táme fɔgyi bwíánbwíán, fumebli ogya, fúmolwií é. Mú alí su nótu fú tsítsá. ¹⁷Fée, atɔ onyapú fɔgyi, fúbu ató. Tɔtɔ médé fú hián, táme fuma tɔtɔ, fumeyín ání ohiáni fúgyi. Fubu nwe, fú ansíbi labwíé, fúna yayá. ¹⁸Mú su ndetɔí kplá fú mbée, pu kɔba bɔhɔ sika pepeá bafwí mú ogyátɔ mí wá. Mú ɔbéha fénya ató onutónutó ní. Ntráa nde fú bláa mbée, fubɔhɔ atadie futútú, afuputin fú péli múa fú yayá ámu. Bɔhɔ afá da fú ansíbisu, méni fówun ató. ¹⁹Ahá ání ntɔdwé á, amú ntɔwá iyin wa, bíttí amú isu. Mú su wa nsi, afudamli kluntɔ. ²⁰Kí, nlií obu-ɔnɔ, nde agoo tswí. Ní ɔku lónu mí ɔme, olefínkí há mí á, nébitíwíé mu wá, mía munyɔ abówa íbu gyi ató. ²¹Ɖhá ání olegyi isu á, néha mu obétsiá mí wá,

mí owíe obíá ámusu. Alí kén mí é negyi usu, ntsie mí Sí wá mu owíe obíá ámusu ní.

22“Ǫhá ání ɔbu asu onúu asun ání Ǫɣe Wankíhé amu dé ɔpasua ámu bláa asu.”

Ǫsósó Bulusúm

4 ¹Íni ɔma a, nelawun ató bámbá. Nowun ání obu lafínkí ɔsósó. Nelanú ɔme amúú ilegyankpá bláa mi asón ámu. Ǫme amu igyi fé ɔkpe. Ǫlebláa mi ɔbée, “Du ba nfi, mí ansuna fú tśá ilehián ání lbéba íni ɔma.” ²Bulu Ǫɣé leba mísú ɔtsáwule pé. Múá nówun a, owíe obíá ku tsie ɔsósó unu, ɔku tsie músú. ³Ǫhá amúú otsie músú ámu iwí dé ogyá kpa fé abwi wankláán kuá igyi pépe múa futútú. Mú ɔtinekú é igyi fé nyankputáa, ide ogyá kpa bomlí owíe obíá ámu fé ibwi wankláán kuá igyi fitáa ɔɔbwe.^e ⁴Owíe-mbíá advanyɔ-na itsie bomlí owíe obíá ámu. Ahande advanyɔ-na ɔɔwa atadie futútú butsie mbíá ámusu, bubun sika pepe ipa. ⁵Ínu nyankpu lówa ibi fwí bi. Odekpíe, ɔpráda deputí dálí owíe obíá ámuɔ. Ibia asienó ulí owíe obíá ámu ansító, idetsíí. Múgyí Bulu Ǫɣé asienó ámu ni. ⁶Nowun gláasi ɔpu kuá músú ide ogyá kpa fé atsufolibi, ida owíe obíá ámu ansító.

Mbwí akvá buki nkpa ana, ansíbi iduadúa amú nkpá múa ɔma féé, bobomlí owíe obíá ámu ɔbun nsiné unu. ⁷Amúót ogyankpapu gyí fé gyatá. Onyɔɔsi gyí fé ɔnantswie yínhé. Ǫsaasi ansító igyi fé nyankpusa, ɔnaasi é gyí fé oyitsu ání odefulí. ⁸Okugyíɔku bu abámba asie, ansíbi iduadúa mútó múa mú ɔma féé. Bude ulu wa ɔpa onyé bee,

“Wankí, wankí, wankí gyí aní Wíe Bulu Otúmípu.
Múlétsiá, otsie, ɔbélaba.”

⁹Mbwí ámu butɔwá ulu ámu, pú numnyam, obú múa ipán há ɔhá amúú otsie owíe obíá ámusu, omóowu ekekekeke ámu. Ní ɔɔbwe mú alí á, ¹⁰ahande advanyɔ-na ámu é bamlí bun ɔhá amúú otsie owíe obíású amu ansító súm mu. Mubúu

^e4:3 Ibwi futútú ámu dá gyí ánfí yaspa. Pépe amu dá gyí kanelia. Fitáa ɔɔbwe amu é dá gyí emerald.

unv bré féétɔ nɪ. Fówun babwíí amú owíepa ámu tswɪ obíá ámu ansítɔ blí beɛ,

11 “Anɪ Wíe pú anɪ Bulu!

Fúlehián ání abópu obú, numnyam múa túmi há, tsúfé fúlóbwe atɔ féé. Fɔbwe tógyítɔ fú apétɔ.

Mú féé ɪlaba mótɔ.”

Okúfabi Amu Létii Ɔwulú Ámu

5 ¹Ínɪ ɔma a, nowun ání ɔhá ámúú otsie owíe obíá ámu sv ámu dé ɔwulú kúntáhé mu gyɔpɪɔ. Bɔwanlín atɔ dínká mú nkpa múa mú ɔma féé, bɔpu okpin tan mú ɔnɔ tse sienɔ. ²Unv nowun *Bulu-ɔbɔpu otúmípu ɔkuá ɔdekplón futé ɔbéɛ, “Ma lɔfun ání ɔbémaín atɔ asienɔ ánfɪ, tíí ɔwulú ámu ɔnɔ?” ³Bumenya ɔhaa ɔsúsú ntée ɔsulúsv ntée ɔsulúv ayasɪ ání ɔbétalí tíí mú ɔnɔ, kla mú. ⁴Ínɪ sv nehɪɛ su, tsúfé bumenya ɔhá ání ɔɔfun, obetíí ɔwulú ámu ntée ɔbékla mú. ⁵Unv ahande amutɔ ɔkule lébláa mɪ ɔbéɛ, “Mátrá su. Kɪ, Yuda abusuantɔ Gyatá, ogyi Owíe *Dawid mu na ámu lagiɪ sv. Ɔɔfun ání ɔbémaín atɔ asienɔ ámu, tíí ɔwulú ámu ɔnɔ.”

⁶Unv nowun *Okúfabi ɔku. Ulelián ání bapú mu há igyí kɪ. Ɔlí owíe obíá ámu, akɪankpapu ana ámu pú ahande advanyɔ-na ámu nsné. Ɔbv nsiebí asienɔ pú ansíbi asienɔ. Mu ansíbi asienɔ ámu gyí ɔhé asienɔ ání Bulu tɔwá sísí ɔsulúv anfvsv ɔtínegyíɔtíne nɪ. ⁷Okúfabi amu lédalɪ ba nkpa, ɔɔbɔhɔ ɔwulú ámu lé ɔhá ámúú otsie owíe obíású amu gyɔpɪɔ. ⁸Unv mbwɪ ámúú bukɪ nkpa ana ámu pú ahande advanyɔ-na ámutɔ okugyíɔku lémlí bún Okúfabi amu ansítɔ. Okugyíɔku dé ɔsankuo pú sika pepe blanwébi ání ɔhíén bɔ mú. Bulu ahá mpái gyí ɔhíén ánfɪ. ⁹Akɪankpapu ana ámu pú ahande advanyɔ-na ámu bude ɪlv pɔpwe wa beɛ,

“Fúlɔfun ání fótsw ɔwulú ámu,

máín atɔ asienɔ ámúú ɔɔputan mú ɔnɔ ámu.

Tsúfé bɔpu fú há igyí, fɔpu fú obugya hɔ ahá há Bulu.

Fɔhɔ ahá abusuangyíabusuan, ɔblúgyíɔblú, ɔmágyíɔmá pú ɔsulúsv ahá ɔtsan-ɔtsan féétɔ.

10 Fayáí fú iwíe ogyíkpa há amú, fabwé amú fú igyí ahapú ání bétsiá há aní Bulu ámu igyí.

Bégyi iwíe ɔsulúsu.”

11 Nelaki, nonu Bulu-abɔpu tsɔtsɔɔtsɔ ɔme. Buhíe butso ání buma iklátɔ. Bobomlí owíe obíá ámu múa akɔankpapu amu pú ahande advanyɔ-na ámu. 12 Bɔpu ɔme kponkɔnkɔnkɔnti wá ɔlu beɛ,

“*Okúfabi amú bɔpuhá mu igyí ámu lófun
ha túmi, iwɔnya múa
nyánsa pú awútɔ ɔwunlín,
ɔdayilé múa numnyam pú kanfú.”

13 ɔnu nonu atɔ́a Bulu lóbwɛ féé ɔme. Múa ɔlu ɔsú múa asi, ɔsulú ayasi pú ɔputɔ féé, bude ɔlu wa beɛ,

“Kanfú, ɔdayilé, numnyam pú túmi féé
iletsiá ɔhá amú ɔtsie owíe obíású amu
pú Okúfabi amu bré féé!”

14 Mú akɔankpapu ana ámu beblí beɛ, “*Amen!” ɔnu ahande advanyɔ-na ámu bemlí bun súm Bulu mva *Okúfabi amu.

Okpin Asienó Ámu Maín

6 1 Mí ansítɔ ɔnu á, *Okúfabi amu lémaín atɔ́ asienó amú bɔputan ɔwulú ámu ɔnɔ́ amú ɔkule. ɔnu nonuá akɔankpapu ana amú ɔkule léle ɔnɔ́. Mu ɔme lelun fé ɔpráda ɔbéɛ, “Ba!” 2 Neki a, ɔponko futútú ɔku ní. Musu odunkápú amu dé ita, bobun mu owíepa. ɔɔpu ɔponko ámu kplí ba ɔsulúsu fé ɔsu ogyípuá ɔtráa ɔbá ɔkɔ ɔsá tsɔtsɔɔtsɔ, ɔtra gyi ɔsu.

3 Bréá Okúfabi amu lémaín atɔ́ nyɔɔsiá bɔputan ɔwulú ámu ɔnɔ́ á, nonuá akɔankpapu amú onyɔɔsi léblí ɔbéɛ, “Ba!” 4 ɔponko pepe ɔku lédalí ba. Beha musu ɔdunkápú ɔdayí ɔya anyɔ́ tɔntín ku. Beha mu túmi ání ɔléé iwílwii le ɔyítɔ. Mú su ɔsá leda ɔtínegyíɔtíne, ahá ɔmɔ́ aba.

5 Bréá *Okúfabi amu lémaín atɔ́ saasiá bɔputan ɔwulú ámu ɔnɔ́ á, nonuá akɔankpapu amú ɔsaasi léblí ɔbéɛ, “Ba!” Neki a, ɔponko bibi ɔku ní. Musu ɔdunkápú amu dé skéeli.

6 Inu nonu ɔme ku ledali tsu mbwi ámbú butsie nkpa ana ámutɔ ɔbéé, “Ayó olónká kule ntée umo olónká asa ibɔbwe ekewóle ikóká.^f Táme máyintá nfo múa wáun-nyí mú.”

7 Bréá Okúfabi amu lémaín ató naasiá bɔputan ɔwulú ámu ɔnó á, nonuá akiankpapu amutɔ ɔnaasi léblí ɔbéé, “Ba!” 8 Inu nowun ɔpɔnkɔ ɔkúvá mu iwi igyi fé nsúó. Mvus ɔdinkápú amu idá gyí Lowu. Afúlitɔ é buo mu. Beha amú túmi ání ní beye ɔyítɔ aku ana á, bumɔɔ iku kule. Bupúɔ ɔdayí iya anyo múa akún, ɔlɔ múa ɔsulúsu mbwikítá-atɔ mo amú.

9 Bréá Okúfabi amu lémaín ató nuusiá bɔputan mú ɔnó á, nowun Bulu asúntɔ akítápú amu ɔkláa *afɔɔdie-asubwi amu ayasi. Bulu asún ámu iwi adánsie gyí su bɔmo amú. 10 Inu bɔsura okitikítí kúklókúú beé, “Óo! Bulu Otúmípu, fú iwi lowankí, fúbu ɔɔkwali. ɔmenke fégyi ɔsulúv anfisv ahá asún, fíté aní obugya tsú aní amɔpú ámu wá?” 11 Mú ɔma a, beha amú féé ligá futútú, bebláa amú beé, butráa tsia kpalobí. Butsía yófun bréá bamó amú aba asúmpú ahógyipv amu é, amú ɔɔɔɔɔɔ lafun asa.

12 Bréá ndekú a, Okúfabi amu lémaín ató siesiá bɔputan ɔwulú ámu ɔnó. ɔsulúv lekpunkí kúklókúú, owí lebi tuun fé tati bibi, ɔtsra é lepe kɔɔ fé obugya. 13 Múv ntsrakpabi bekpakpáa bun ɔsulúsv, fé afú kpɔnkpɔɔnkpɔntɔ látsvn kpakpáa pɔntɔ-abíá umɔkúdan bun. 14 Nwulótáa lokuntá fé ɔwulú, tsú mú náti. Abv múa ɔpu nsiné ɔsulúv féé ledali mú otsiákpá. 15 Inu nowun ání ɔyítɔ awíe pú ahande pú isá ɔnó alúpú pú asikafɔ pú atúmípu, nkpábi múa iwísv atsiápú beyéɔaín abvsv abwi alato pú abwi mbótɔ. 16 Bebláa abv múa abutá ámu beé, “Mlɔkpa bun anísv, ménɔ owíe obíású otsiápú amu omóowun aní, Okúfabi amu ɔméebítí aní sv! 17 Tsúfé amú ahá svbítí eke ámu lafun. Ma ɔbétalí líú mú ɔnó?”

Bulu Ahá Mpím Lafakule Advana-na (144,000)

7 1 Inu ɔma a, nowun Bulu-abɔpu ana, bulú ɔyí afonka ana ámu féésú. Bude afú afonka ana ámutɔ kínkíínkín,

^f6:6 Ilosuná ání isá sv ató béhie wá ibiá.

méni iméetrá tsun ɔsulósu, ɔpusu ntée oyí kuku. ²Inu nowun ání Bulu-ɔbɔpu bámbá dédalí tsu owí ɔdalukpa. Ɔde Bulu Ɔkɔankpapu atáá ɔtɔpúhíe mu ahá nsu. Múú ɔɔsɔrá okitikíti kúklókúú kpólí abɔpu ana ámúú Bulu léha amú túmi ɔbée, bubéyintá ɔsulúu múa ɔpu amu. ³Bulu-ɔbɔpu amu lébláa Bulu-abɔpu ana ámu ɔbée, “Mlumáyintá ɔsulúu ntée ɔpu ntée oyí kuku, yófun bréá nɔpu ató híe mí Bulu asúmpú ɔsvkpi nsu asa.” ⁴Inu bekla ahá ámúú bapú Bulu ató hie amú nsu amu féé. Amú ɔdudɔɔ bugyi ahá mpím lafakule advana-na (144,000). Amú féé botsú Israel abusuan dúanyɔ ámutɔ. ⁵⁻⁸Behie ahá mpím dúanyɔ (12,000) nsu abusuan ámu kugyíkúú. Abusuan ámu adá gyí, Yuda, Ruben, Gad, Asa, Naftali, Manase, Simeon, Lewi, Isakar, Sebulon, Yosef pú Benyamin.

Ɔɔɔm Ání Botsú Ɔmá-ɔmátó

⁹Inu ɔma a, nowun ɔɔɔm kuá ɔhaa méetalí kla amú. Botsú ɔmágyíɔmá, abusuangyíabusuan, ɔsulósu ahá ɔtsan-ɔtsan pú ɔblígyíɔblíúú. Bulí owíe obíá ámu pú *Okúfabi amu ansító. Bɔwa ligá futútúútú, buɔe mbláa. ¹⁰Bɔsɔrá okitikíti kúklókúú beé, “Ani Bulu ámúú otsie owíe obíású pú Okúfabi amu tóho ahá nkpa!” ¹¹Inu á, Bulu-abɔpu amu féé belí bómlí owíe obíá ámu pú ahande advanyɔ-na ámu pú akɔankpapu ana ámu. Bemlí bun, pú ansító bun ɔsulótɔ owíe obíá ámu ansító, súm Bulu, ¹²blí beé, “*Amen! lkanfú, numnyam, nyánsa, ipán, obú, túmi pú ɔwunlín ibwée mu kle bré féé! *Amen!”

¹³Inu ahande amutɔ ɔkule léfuté mí ɔbée, “Amendí gyí ahá ánfí bɔwa ligá futútúútú ánfí? Nkúnú botsú?”

¹⁴Múú nebláa mu mbée, “Ɔhande, fú yín.”

Múú ɔlebláa mi ɔbée, “Ahá ánfí gyí ahá ání batsun asun wunhe kpɔnkpɔnti ámutɔ dáli ni. Amú láfwí amú atadie Okúfabi amu obugyato, ilafúlí futútúútú ní. ¹⁵Mú sú bulí Bulu owíe obíá ámu ansító, buɔe mu súm ɔpa-onyé mu ɔtswékpa inu ní. Ɔhá ámúú otsie owíe obíá ámusu é obétsiá amútó, bún amúsú. ¹⁶Akún múa ɔmewólí méetrá kítá amú, owí ntée ɔpawi é iméetrá tɔ amú. ¹⁷Tsúfé Okúfabi amúú ɔlú

Bulu owíe obíá ámu así ámu ọ́bọ́bwe amú ọ́kpapú. Obégya amú nkprá, kpá amú ya nkpa-ntsu ámu ọ́wíkpa, aní Wíe Bulu obétsitsíi amú ansí ntsú féeé.”

Okpin Sienósí Ámu Maín

8 ¹Bréá *Okúfabi amu lémaín atọ sienósíá ọ́putan ọ́wulú ámu ọ́nó á, ọ́súsú lólúá fé dọ́nhwírí-fun. ²ጎnu nowun Bulu-abọ́pu asienó ámúú bulúí mu ansító ámu. Beha amúótó okugyíọku ọ́kpe.

³Bulu-abọ́pu bámbá lébá belú *afọ́diẹ-asubwi amu ansító. Ọ́de sika pepe blanwébi aní butọ́wá ọ́híén ogyá mútó. Beha mu ọ́híén tsọ́tsọ́tsọ́, ọ́lọ́putsíá Bulu ahá mpáúto, púyédinká sika pepe afọ́diẹ-asubwi amúú iyi owíe obíá ámu ansító ámusu. ⁴Mu ọ́híén ámu ogyási letsíá Bulu ahá ámu mpáúto, kúsú tsú afọ́diẹ-asubwi ámusu yó Bulu ansító. ⁵ጎnu Bulu-abọ́pu amu lótsu ọ́híén blanwébi ámu, ọ́lele ogyá afọ́diẹ-asubwi ámusu wá mútó, fin mú dá ọ́sulúsu. ጎnu nyankpu lówa ibi fwí bi. Odekpíe, ọ́práda depútí, ọ́me ọ́tsan-ọ́tsan delíun kúklúkúú, ọ́sulúv é dekpinkí kpakpakpakpa.

Ukpe Asienó Ámu

⁶Bulu-abọ́pu asienó ámúú bude ukpe asienó ámu é beda wı́su há mú fulí.

⁷Bulu-abọ́pu gyankpapu lófulí mu ọ́kpe. Múú botsu atsufolibi múa ogyá aní obugya lefráa mú, tswı́ mú wólí ọ́sulúsu. Ní beye ọ́sulúto asa á, mútó iku kule múa músó nyí pú músó ífá féeé lọ́họ́ plíplíplíplí.

⁸Bulu-abọ́pu nyọ́ọsı́ lófulí mu ọ́kpe. ጎnu bọ́tsu wı́tọ́kú fé ibu kponkpontı́á idehó wá ọ́puto, ọ́puto yée asato ikule ledamlí obugya. ⁹Ọ́puto mbwíá buku nkpa féétó yée asato iku kule bowu, ntsusu ayibito yée asato iku kule é lobwiebwíe.

¹⁰ጎnu Bulu-abọ́pu sáásí lófulí mu ọ́kpe. Ọ́tsrakpabi kponkponkpontı́ kúá ide ogyá tsií fé obia lékpa tsú ọ́súsú beda ntsu tsunheá ibu ọ́yító féétóye asato iku kulesu. ¹¹Ọ́tsrakpabi amu dá gyí “Ọ́kítá.” ጎnu ntsu tsunhe amútyée asato iku kule lówa ọ́kítá dun ọ́kpín. Mú ọ́kítá su ahá tsọ́tsọ́tsọ́á bonu mú bowu.

¹²Ɔbɔɔpu náásí lófulí mu kle. Uwoɔ owí múa ɔtsra pú ntsrakpabitɔ yée asato iku kule. Mú fée lodun. Ínu su ɔyi kehe múa owi tahétɔ yée asato iku kule é loklun.

¹³Neki a, oyitsu ɔku défulí, odesú kuklúkúú ɔbée, “Ahá ání bétsiá ɔsulúv anfisv asa Bulu-abɔɔpu asa atráhe amu bófulí amú nkpe amu bugyówi tsenyo-tsesa!”

9 ¹Bulu-ɔbɔɔpu núúsí lófulí mu ɔkpe. Nowun ání ɔtsrakpabi lékpa tsú ɔsúsú beda ɔsulúsv, ɔɔpu ulán klúklúúklúá uma ɔka sáafi há mu. ²Múú olefinkí ulán klúklúúklú ámu ɔnɔ, ogyási ledali mótɔ fé obuntɔ. Ogyási amu ileha nsauntɔ fée ilebi tuun. ³Ínu atsantsanku bedali tsu ogyási amutɔ ba ɔsulúsv. Beha amú túmi beɛ busúra ahá fé nyankpukpíe. ⁴Bebláa atsantsanku ámu beɛ, bumápu ɔnɔ da ífá ntée nyí kuku, dun ahá ámúú Bulu nsuhíetɔ medín amú ɔsvkpi amu. ⁵Bumeha amú ɔkpa ání bumɔɔ amú, táme buhíe wa amú iwɔɔsun tsra anu kéké. Amú iwɔɔsun ámu íbwé fé alíá nyankpukpíe-surá tɔhɔ ɔsun. ⁶Ahá bóduká lowu nke ámutɔ, táme buméenya. Bóɔɔ mbódí ání bówu, táme bumóowu.

⁷Atsantsanku ámu belian mpɔnkɔá bahíhe amú há isá, tɔku idin amú nwunsu fé sika pepe ipa. Bɔwa anyánkpúsa ansítɔ. ⁸Amú nwunsu-imi bu íswí fé ɔtsi klé. Amú ayín é igyi fé gyatá klé. ⁹Bɔwa kántɔ atíntɔ ání ɔɔpu dátɔ bwé. Ní budefulí á, amú ate totsúlá fé mpɔnkɔ múa keké tsɔtsɔɔtsɔá busrí ɔyɔ́ isá. ¹⁰Bubu odú, itɔsúra fé nyankpukpíe. Beha amú túmi beɛ, bupúv amú odú ámu pilan ahá tsra anu kéké. ¹¹Ulán klúklúúklúá uma ɔka ɔbɔɔpu gyí amú owíe. Butetí mu *Hebrifo ɔblítɔ beɛ, Abadon. Griiki ɔblítɔ é butetí mu beɛ, Apolion. Mú así gyí, “Ató Oyintápú.”

¹²Asun wunhe gyankpapu lámɔ ɔnɔ á. Anyɔ tráhe é íbá.

¹³Bréá Bulu-ɔbɔɔpu síésí lófulí mu ɔkpe a, nonu ɔme ku ledali. Uledali tsu sika pepe *afɔɔɔɔ-asubwi ámu okonkí ana ámutɔ Bulu ansítɔ unv. ¹⁴Ide ɔbɔɔpu amúú ɔlɔfulí ɔkpe amu bláa ɔbée, “Sanki abɔɔpu ana ámúú beklí mántá ntsu yílé Efrate ɔnɔ ámu.” ¹⁵Bulu léla amú yái há alí bré ánfí, ofí ánfí, ɔtsra ánfí, eke ánfí pú ɔnhwírí anfi ɔbée, busánkí amú abuyɔmɔ ɔyítɔ ahátɔ yée asato iku kule fée. ¹⁶Bebláa mi ání

tsá akọpú ámu ọdudu bóbwe bíba lafanyo (200,000,000), budin mpọnkọsu. ¹⁷Nowun mpọnkọ pú amúsú adunkápú mí atowunhe amuto, bowa kántó atíntó. Aku klé lepe fé ogyá, aku klé lebi, aku é klé igyi bate-nfo. Mpọnkọ ámu nwun igyi fé gyatá klé, ogyá múa ogyási pú *atonkodu dedalu amú ọńtót. ¹⁸Alí asun wunhe aku asa, igyi ogyá, ogyási pú atonkodu amu iledalu tsu mpọnkọ ámu ọńtót, ulọmọ ọyítót ahátó yéé asato iku kule. ¹⁹Megyí amú ọńtót nkule asun wunhe túmi tedáli tsu. Ibo amú odútót é, tsúfé amú odú igyi fé iwọ, ibu nwun, itepílan ahá.

²⁰Anyánkọpúsa amúbú besian ọsulúsu, bumowu asun wunhe amuto ámu féé bekiná bumedamlí kluntó. Bumesi *ọ́nẹ laláhe múa atunkuá bapú sika pepe, sika futútú, kọ́bri, abwi múa nyí aná bwé súm. Alí ọ́nẹ laláhe pú atunku anfi butamawun atót, butamanú asún, butamanátí. ²¹Alí kén bumedamlí kluntó sí amú tsiátót laláhe; igyi ahámọ, ọkpé, atsi múa ayin asúnwa múa owi ámu é bwe ní.

Bulu-ọ́bọpọ Mwa Ọwuló Túkúrífíbi

10 ¹Ibo nelawun Bulu-ọ́bọpọ ọwunlínpú bambá ọkúá otsú ọsúsú. Agyinde lobomlí mu, nyankputáa ulan mu awunso. Mu ansítót lọwankí fé owí, mu ayabi igyi fé ọsotu ání ogyá bu mótót. ²Ọde ọwuló túkúrífíbi kúá ọletéí mótót. Mu gyọpọ yabi iyi ọpọsu, mu buna yabi é iyi ọsulúsu. ³Ọlọkplón kúklókúú fé gyatá dékpoún, ọpráda asienót ámu lọputí. ⁴Bréá ọpráda asienót ámu lọputí, mbéé anwanlín asún amúbú ọleblí ámu a, nonu ọme bámbá tsú ọsúsú. Ọme amu déblí ọbée, “Máwanlín asún amúbú ọpráda asienót ámu ọleblí ámu. Powa fú kpawunuto.”

⁵Múbú Bulu-ọ́bọpọ amúbú nowun, ọlú ọpọ múa ọsulúsu ámu lótsu mu gyọpọ ibi fúá yó ọsúsú. ⁶Ibo ọleka ọhá amúbú ọbu nkpa bré féétót ámu ntam. Múlóbwe ọsú múa asi, ọpọ múa mótót atót féé, ọleblí ọbée, “Buméetrá si tsiá! ⁷Táme bréá Bulu-ọ́bọpọ síénósí amu ọbófúlí mu ọkpé a, alí bré amuto Bulu asun ọ́nínhé amúbú ọlehie yáí ọbée, móbwe ámu ọléba mótót ní. Ọléba mótót fé alíá ọlebláa mu asúmpú, bugyi mu ọńsúsú atọpú amu.”

⁸Ἰνῷ ɔme amúb ɪde mí asún bláa tsú ɔsúsú ámu létrá bláa mi ɔbéɛ, “Yɔhɔ ɔwulú ámúb ɪlafínkí ámu le Bulu-ɔɔɔpu amúb ɔlí ɔpu múa ɔsulúsu ámu ɪbitɔ.”

⁹Mú su nɔɔɔ Bulu-ɔɔɔpu amu wá mbéɛ, ɔpús ɔwulúbí ámu ha mi. Mú ɔlebláa mi ɔbéɛ, “Hɔ, afuwí mú! ɪbɔwa fú ɔdwe débídébí fé ɔkwén, táme ɪméekanáa fú iputɔ.”

¹⁰Ἰνῷ nɔhɔ ɔwulúbí ámu lé mu ɪbitɔ, nɔwi mú. ɪɔwa mí ɔdwe débídébí fé ɔkwén, táme ɪmetepí kanáa mí iputɔ. ¹¹Mú ɔletrá bláa mi ɔbéɛ, “ɪlehián ání félablí asún ámúb ɪbéba ahá féésú ámu. ɪbéba ɔmá féé, ɔblí ɔtsan-ɔtsan ablípú pú awíé féésú, fé alí ámúb Bulu lalé súná fú ámu!”

Adansɪfɔ Abanyɔ Ámu

11 ¹Ἰνῷ ɔma a, beha mí oyíá butɔpúsúsu atú. Mú Bulu-ɔɔɔpu amu lébláa mi ɔbéɛ, “Kusu afuyosusúu Bulu ɔtswékpa obu ámu pú *afɔɔɔe-asubwi amu, afukla ɪnu asúmpú amu. ²⁻³Táme másusúu nwunsúnésú amu mú. Si ɪnu tswí, tsúfé Bulu lasí ɪnu há ahá ání bumegyí Yudaɔɔ. Alí ahá ánfí bétsatsáa wúlu wankíhé amusu tsra adwana-nyɔ (42), igyí nke ɔpím-ɔkule lafa-anyɔ aduesie (1,260). Néha mí adansɪfɔ abanyɔ bédídá akpekpe, há amú túmi, béblí mí asún ání nalé súná amú nke ámutɔ.”

⁴Amúgyí nfɔ-nyí anyɔ pú ɔkandíe-nyí anyɔ ámúb ɪlí Bulu, ogyí ɔyí féésú ogyípú amu ansítɔ ní. ⁵Ní ɔku ɔbwé agywun ání obépilán amú á, ogyá bédalí amú ɔnɔ, hɔ mu mɔ. Alí ɔhá ání odekléá obépilán amú obówu ní. ⁶Bulu adansɪfɔ ámu bubu túmiá bétalí há nyankpu omóotswie nkeá bɔpúblí Bulu asún ámu féé. Bubu túmiá bétalí há ntsu kugyíku bédamlí obugya. Bétalí lé asun wunhe kugyíku é ba ɔsulúsu brégyíbréá budeklé.

⁷Ní adansɪfɔ ánfí beblí amú asún tá á, ɔbwíkítá-atɔ amúb ɔtedalí tsu ɪlán klúklúúklúá ɪma ɔkatɔ ámu ɔbɔkɔ amú ɪsá, gyí amúsú, mɔ amú. ⁸Amú afúli bédí amú wúlu yilé brɔnusu. Butetí wúlu yilé ánfí beɛ, “Sodom múa Egyipte.”⁸ ɪnu beda

⁸ 11:8 Wúlu yilé ánfí dá onutó gyí Yerusalem. Bɔpukápú Sodom múa Egyipte, tsúfé amú bwehé laláhe ɪlɪtan aba.

amú Wíe Yesu mántá *oyikpalíhesu, mɔ ní. ⁹Ahá bótsu abusuangyíabusuan, ɔblígyíɔblí, ɔmágyíɔmá pú ɔsulúsu ahá ɔtsan-ɔtsan féétɔ ba beki afúli amu nkensá múa ifun. Buméeha ɔkpa abupula amú kúráá. ¹⁰Bulu ɔnɔsú atɔípú abanyɔ ánfu bawú su ansí bégyi ɔsulúsu atsiápu. Bégyi nke kpɔnkpɔnti, kíe aba atɔ, tsúfé Bulu ɔnɔsú atɔípú anfi bawá amú ipian kpɔnkpɔnti kɪ. ¹¹Táme nkensá múa ifun ámu ɔma a, Bulu léha ɔhé lelawíe amútsɔ, belakusú líí ayabisu. Mú su ifú lehie kítá ahá ání bowun amú. ¹²ɩnu Bulu ɔnɔsú atɔípú abanyɔ ámu bonu ɔme kpɔnkpɔnti ku tsú ɔsúsú, ilebláa amú ɔbéé, “Mludu ba nfi!” Amú alupú ámu bulí bude amú kú, agyinde lotsu amú ya ɔsúsú. ¹³ɔsulúw lékpunkí kpukpukpukpu ali bré ámutɔ kén. Ní beye wúlu amutɔ idú á, iku kule féé lobwie bun ɔsulúw gbloo. Ahá mpím-sienɔ (7,000) bowu ɔsulúkpunkí ámutɔ. Ifú lehie kítá atráhe amu. Mú su bɔwa ɔsúsú Bulu numnyam.

¹⁴Asun wunhe nyɔɔsi latsun, saasi srí íbá á.

Ɔkpe Sienɔsí

¹⁵Múú Bulu-ɔbɔpu osienɔsí lɔfulí mu ɔkpe. ɩnu ɔme akpɔnkpɔnti lelun tsu ɔsúsú beé, “Séi á, ɔyítɔ iwíegyí lamlí anu Wíe Bulu muva *Kristo, (ɔhá ání Bulu ladá mu ofúli amu) klé. Obégyi iwíe bré féé!” ¹⁶ɩnu ahande advanyɔ-na ámutú butsie amú mbíású Bulu ansítɔ ámu féé bobun, súm mu, ¹⁷blí beé,

“Ani Wíe Bulu Otúmípu, adá fú ipán.

Fúlétsiá, fúbu unu bré féé.

Tsúfé fapú fú túmi kpɔnkpɔnti ámu

fi fú iwíegyí asu!

¹⁸ɔmá-ɔmá benya ɔblɔ,

bré lafun ání fú é fénya ɔblɔ.

Bré lafun ání fégyi awupú asún.

Bré lafun ání fɔbwe yilé há fú asúmbi, bugyí fú

ɔnɔsú atɔípú amu,

pú Bulu ahá ání butenyá fú ifú,

nyebí pú ahande féé.

Bré lafun ání féhi ahá ání bamɔ ahá ɔyítɔ féé.”

Ɖbunsám méetrá ka asún dínká anɩ apíósú,
anɩ Bulu ansítɔ ɛ.

11 Bapú *Okúfabi amɩ obugya pú mu iwɩ adánsɩɛ
ámúbú

begyi amɩ gyi musu.

Bumɔdwe amú iwɩ dubidubi,
su bumenya amú lowu kúrää ífú.

12 Ínɩ su ɔsúsú pú mlá mlɩbu unu féeé
mlɩnya ansigyí.

Táme ɔsulúv muɩ ɔpu,
mligyɔwɩ ní.

Ɖbunsám laba mlɩ wá ɔblósú,
tsúfé alawun ání mu nke trá mɔtsú.”

13 Bréá bítí ámu lówun ání bafɩn mu dá ɔsulúv á, ɔɔkɩsú
kplá gya ɔtsɩ ámúbú ɔɔkwíí obí ámu. 14 Táme beha ɔtsɩ ámu
oyitsu kɔnɔkɔnɔkɔnɔntɩ abámba anyɔ, ménɩ ɔbétalí fúílí sí
bítí ámu yɔ mu otsiákpá dimbísú unu. Bulu ɔbékɩ musu unu
nfinsa múa ifun.ⁱ 15 Inu bítí ámu léfen ntsu tsunhe dáli mu
ɔnótɔ wólí ɔtsɩ ámu ɔma, ménɩ íbékítá mu nátí. 16 Táme
ɔsulúv légyí ɔtsɩ ámu buale. Ntsu ámúbú bítí ámu léfen tsu
mu ɔnótɔ ámu féeé leme wíé ɔsulúv. 17 Inu bítí ámu lénya
ɔbló ɔtsɩ ámusu, pú mu ɔbló gya mu abí atráhesu. Amúgyí
ahá ání butegyi Bulu mblasu, buɔɔ Yesu iwɩ adánsɩɛ gyí a.
18 Inu bítí ámu lési ɔɔa ɔpu amu ɔnó.^j

Mbwíkítá-atɔ Anyɔ Aku

13 1 Ínɩ ɔma a, nowun ání ɔbwíkítá-atɔ kɔnɔkɔnɔntɩ ɔku
dédali tsu ɔpu amɔvɔ ɔbá. Ɖbu nwun asienó pú nsiebí
dú. Owíepa bun nsiebí ámu kugyíkusu. Bɔwanlín dá ání
ɔɔkɩsú líí Bulusu dínká nwun ámu kugyíkusu. 2 Ɖbwɩ ámu
gyí fé dundu, táme mu ayabi lomóní, mu akuti bu iswí fé
osísré ayabi, mu ɔnó é igyi fé gyatá ɔnó. *Bítí ámu lópu mu

ⁱ 12:14 Nfinsa múa ifun igyi nke ɔpím ɔkule lafa-anyɔ aduesie
(1,260). ^j 12:18 Ínɩ bu nwólú dada amu akvɔvɔ: *Inu nesi lú ɔpu amu
ɔnó.*

túmi, iwíegýí pú ɔwunlín ku há ɔbwi ánfí. ³Nowun ání ɔlɔ kpɔnkpɔnti ku idin ɔbwi ámu nwun asienó ámuɔ kulesu. ɔlɔ ámu lómoní, íbétaalí mós mu, táme iletá, omowu. Ulowa ɔyítá ahá fée wánwan, bekplá buo mu. ⁴Bosúm búti ámu, tsúfé alapú mu túmi há ɔbwi ámu. Bosúm ɔbwi ámu é, fíté bée, “Ma lófɔn ɔbwi ánfí? Ma ɔbétaalí líí kó mu?”

⁵Bulu léha ɔbwi ámu ɔkpa ání ɔblí abususu akpɔnkpɔnti pukusu lu musu. ɔleha mu ɔkpa ání ɔbwée túmila kugyíkwá odeklé tsra advana-nyɔ (42), igyi nfinsa múa ifun ámuɔ. ⁶ɔbwi ámu lóbwií ɔnɔ́, blí abususu púkpɔ́í Bulu mva mu dá pú ahá ámuú bubu ɔsúsú, igyi mu otsiákpá amu. ⁷Bulu léha mu ɔkpa ání ɔkɔ́ Bulu ahá, ogyi amúsú. ɔleha mu ɔkpa ání ogyíi iwíe abusuangyíabusuan, ɔblígyíɔblí, ɔmágyíɔmá pú ɔsulósu ahá ɔtsan-ɔtsan féesú. ⁸ɔyítá ahá fée bósum ɔbwi ámu. Ahá ání bumóosum mu gyí ahá ání ɔɔwanlín amú adá wá *Okúfabi amúú ɔɔpohá igyi asa ɔyí lebelun amu nkpa ɔwulótá.

⁹ɔhá ání ɔbu asu onúu. ¹⁰ɔhá ání ida yaí ání békutá mu ndoun isátá a, békutá mu isátá, kpá mu náti. Ní ida yaí ání ɔku obésin ɔdayí ɔnɔ́ é á, ɔdayí ɔnɔ́ obésin. Íni su Bulu ahá butómi, abulu kínkín amú hógyito.

¹¹lnu netrá wun ɔbwi ɔku é lówɔ dalɔ ɔsulótá. ɔbu nsiebí anyɔ fé okúfabi, táme ɔlɔtɔ́í fé *búti. ¹²ɔbwi ánfí líí ɔbwi gyankpapu amu ansítá, ɔlɔɔ mu agyómá kugyíku ɔbwi gyankpapu amu túmitá. Íni léha ɔsulósu atsiápú fée bosúm ɔbwi gyankpapu amúú ɔlɔ ledinká mu, iletá, omowu ámu. ¹³ɔbwi nyɔɔsi amu lóbwé osúna akpɔnkpɔnti. ɔleha ogyá lekpa tsú ɔsúsú beda, ahá fée bowun. ¹⁴ɔlɔpɔ osúna amúú ɔlɔbwé ɔbwi gyankpapu amu ansítá ámu mlé ɔyítá ahá ɔbée, bupwée ɔkpi, ogyi fé ɔbwi gyankpapu amúú ɔwɔ mu ɔdayí tya anyɔ, omowu, ɔtráa otsie nkpa ámu. ¹⁵Bulu léha ɔbwi nyɔɔsi anfi ɔkpa ání ɔwáa ɔkpi ámu ɔnɔ́, fówun íbétaalí tóí. lnu ɔkpi ámu léha ɔbée, bumɔ́w ahá ání bumóosúm mu. ¹⁶ɔleha ání buhíe ahá fée nsu, amú gyɔpɔ íbusu ntée amú ɔsukpi; nyebí ahande, ahíánfɔ múa asikafɔ, nkpábi múa tɔwí agyípú. ¹⁷ɔhaa méetalí fé tɔtɔ ntée hɔ tɔtɔ, nkéti ɔhá

ání ɔbwɪ ámu nsuhíetɔ, igyi mu idá ntée ibi ání ulú há mu idá dɪn musu.

¹⁸Íni léhián nyánsa, méni fétalí nú ibi ámu asɪ. Ibi ámu ulú há ɔbwɪ gyankpapu amu, igyi oyin ɔku dá. Ibi ámu gyí lafasie aduesie-sie (666).

Okúfabi Amu Mva Mu Ahá

14 ¹Ínu nelawun *Okúfabi amu líí *Sionbusu. Ahá mpím lafakule advana-na (144,000) bulú mu wá. Okúfabi amu mva mu Sɪ idá dɪn amú ɔsɔkpi. ²Ínu nonu ɔme ku tsú ɔsúsú fé ntsu lábúlá, idekpa yi, ntée ɔpráda députí, ntée fé nsankuo tsɔtsɔtsɔ budɛda. ³Bude ulu ɔɔpwe ku wa owíe obíá ámu, akɪankpapu ana ámu pú ahande advanyɔ-na ámu ansítɔ. Dhaa má invá ɔbétalí súan ulu ámu ɔsulúv anfisu, nkétɪ ahá mpím lafakule advana-na (144,000) ámú Bulu laho amú nkpa tsú ɔsulúsv ámu nkule pé. ⁴Alí ahá ánfɪ gyí ahá ání amú iwɪ letɪn, bumeyín ɔtsɪ, butobuo Okúfabi amu ɔtíngyíɔtínéá ɔyɔ ní. Amú nwunsu iko ɔleka anyánkpúsa féétɔ, fé atɔ-abí gyankpapu há Bulu mva Okúfabi amu ni. ⁵Butamawá afunu, ɔlala kuku é ima amú iwɪ.

Bulu-abɔpu Abasá Asun Blíhé

⁶Ínu nelawun Bulu-ɔbɔpu ɔkuá ɔna afútɔ, ɔde *asun wankláán ámúv ibu nu bré féétɔ amu. ɔbá bebláa ɔyítɔ ahá, abusuangyíabusuan, ɔblíngyíɔblí ablípú, ɔmágyíɔmátɔ ahá pú ahá ɔtsan-ɔtsan. ⁷Bulu-ɔbɔpu amu lɔkplun blí ɔbé, “Mlɪnya Bulu ifú, amlɪwa mu numnyam, tsúfé mu asúngyíbu lafun. Mlɪsum mu. Mɔlɔbwe ɔsú múa asɪ, ɔpu múa ntsu féé!”

⁸Bulu-ɔbɔpu onyɔɔsɪ é lóbuo mu, beblí ɔbé, “*Babilon labwíé. Wúlu yilé Babilon labwíé. Tsúfé Babilon lahá ɔmá-ɔmá banu mu mbvatɔ-ntá ání utehá Bulu ɔblɔ tɔkúsú!”

⁹Bulu-ɔbɔpu saasɪ é búo amú, ɔdeblí ɔbé, “Ní ɔku lósum ɔbwɪ ámu mva mu ɔkpi ámu, há ɔbɔpu amú nsuhíetɔ hie mu ɔsɔkpi ntée mu ibi nsu a, ¹⁰alí ɔhá ámu obónu Bulu ɔblɔ-ntá, bumefráa mú asa betseí mú wá Bulu ɔblɔ-ewetɔ ní. Bulu ɔbɔpu ogyá múa *atonkodu bítí mu isu, mu abɔpu wankíhé

pú *Okúfabi amu ansító. ¹¹Amú ɪsubutí ogyá ámu ogyási bókusú yó ɔsúsú bré féé́tó. Alí ahá ámu gyí ahá ámú bosúm ɔbwi ámu pú mu ɔkpi, ɔbwi ámu nsuhíeto dun amósú ámu ni. lwi móolwií amú ekekekeke.”

¹²Íni sù ilehián ání Bulu ahá bótomí líí kínkín, gyí Bulu mblasu, wá ɔɔkwali há Yesu ni.

¹³Ínu nonu ɔme ku lótsu ɔsúsú ɔbéé, “Wanlun tswi fée, ‘Ansí bégyi ahá ání bówu aní Wíe agyómátó tsú séi púya!’”

Bulu ɔɔhé ámu ɔbéé, “Ee, ɪbu móótó. Ansí bégyi amú lélé. Béda ɔkpúnú tsú amú ipian féé́tó, tsúfé amú bwehé wankláán bóbuo amú.”

Bulu Asúngyí lwi Atowunhe

¹⁴Ínu neláki a, agyinde futútú ku ní. ɔha ɔkuá ogyi fé Nyankpusa-Mu-Bi ámu tsie agyinde ámuṣu. Obun sika pepe owíepa, ɔde tsini kláklá ku. ¹⁵Ínu Bulu-ɔbɔpu ɔku é lédalí tsu ɔsúsú Bulu ɔtswé́kpa ɪnu ba. Múó ɔɔkplón bláa ɔhá ámú ɔtsie agyindesu ámu ɔbéé, “Pú fú ɔdayí ámu tun ató-abí, tsúfé ɔsulúsu ató-abí lapé yóí. Mú tɪnbɪ lafun!” ¹⁶Mú su ɔhá ámú ɔtsie agyindesu ámu létɪnkí mu tsini amu, tun ɔsulúsu ató-abí ámu féé.

¹⁷Bulu-ɔbɔpu ɔku é lédalí tsu ɔsúsú Bulu ɔtswé́kpa obuto ɪnu. Mu é ɔde tsini kláklá ku.

¹⁸Múó Bulu-ɔbɔpu ɔkuá ɔbu túmi ogyá ámuṣu é lédalí tsu *afɔdɪe-asubwi ámu asi ba. ɔɔkplón bláa Bulu-ɔbɔpu amúó ɔde tsini ámu ɔbéé, “Pú fú tsini amu ka *wáun-abí ámu ɔkpɪtsa, tsúfé abí ámu ɪlapé.” ¹⁹Mú su Bulu-ɔbɔpu amu lótswi mu tsini amu káka ɔsulúsu wáun-abí ɔkpɪtsa féé, kpá wáun-abí ámu wá ɔtínéá butenyímé ntsu lé móótó. Íni ɪlú há Bulu ɔbló. ²⁰Wúlu amu mmuátse benyímé wáun-abí ámu. Obugya lédalí móótó, ɪdetsúɔn waa fé ntsu tsunhe. Mú ɪswító bó́bwe málu lafakule adukwe (180). Mú oklú é bó́bwe ayabi anu.

Bulu-abɔpu Pú Asun Wunhe Asienó Tráhe

15 ¹Ínu nowun osúna bámbá kuá ɪbu ifú, ɪbu wánwan ɔsúsú. Nowun ání Bulu-abɔpu asienó bude asun

wunhe asienó ání Bulu ɔbɔpɔbítí ahá ɛsu asa ɪkluntɔ bólwií mu.

²ɪnu nowun ɔpu kvá igyi fé ahuhwé, ɪlepe fé ogyá. Nowun ání ahá bulí mú ɔnɔ, bude Bulu nsankuo. Alɪ ahá ánfɪ gyí ahá ání bakɔ gyi ɔbwi gyankpapu amu mua mu ɔkpɪ ámu pú nsuhíe-ibi ámúú ɪlɪ há mu dá ámusu ní. ³Bude Bulu osúmbi Mose mua *Okúfabi amu ɪlu wa bæe,

“Anɪ Wíe Otúmípu,

fú bwehé bu ifú, ɪbu wánwan.

Fú bwehé féé igyi ɔnɔkwali, ɪda ɔkpa.

Owíeá mu iwíegyí tamamó ɔnɔ.

⁴Anɪ Wíe, ma oméenya fú ifú, wá fú numnyam?

Tsúfé fú nkule lówankí.

ɔma féé béba bosúm fú,

tsúfé falé fú yilébwe ɔwan.”

⁵ɪnu ɔma a, neki ɔsúsú, nowun ání Bulu ɔtswékpa obu, igyi *tati-obu ámúú itosúná ání Bulu bu amú wá ámu ɔnɔ ɪya. Nowun mútɔ ɔwankíkpa amu. ⁶Nowun Bulu-abɔpu asienó amúú ɔɔpu asun wunhe kpɔnkɔntɪ asienó bá amu. Bedali tsu ɔwankíkpa ɪnu. Bɔwa ɔhráda atadiéá ɪlɔwankí, ɪde ogyá kpa, ɔɔpu sika pepe ɔfé tsán. ⁷Akɪankpapu ana ámutɔ ɔkule léha Bulu-abɔpu asienó ámutɔ okugyíɔku sika blanwébi ání Buluá ɔbu ɪnu bré féétɔ ɔblɔ ɪbɔ mú dédédedé. ⁸Bulu numnyam pú mu túmi léha ogyási ɪbulá Bulu ɔwankíkpa ɪnu féé. ɔhaa métalí bítiwíe mútɔ, yɔfun bréá Bulu-abɔpu asienó ámu batséí asun wunhe asienó ámu féé wólí ɔsulúsu.

Bulu ɔblɔ Ablanwébi

16 ¹ɪnu nonu ɔme kpɔnkɔntɪ kvá ɪledali tsu Bulu ɔwankíkpa ɪnu. ɪde abɔpu asienó ámu bláa ɔbéé, “Mɪyɔ, amɪyetséí Bulu ɔblɔ ablanwébi asienó ámu wólí ɔsulúsu.”

²Mú su ɔɔpu gyankpapu lédalɪ tsu Bulu ɔtswékpa ɪnu yetseí mu kle wólí ɔsulúsu. ɪnu ahá ámúú ɔbwi ámu nsuhíetɔ ɪdɪn amúsú, bude ɔkpɪ ámu sum ámu ɪwɪ létsitsíí nɔ akpɔnkɔntɪ, ɪde amú dwíín.

³Ɔbɔɔpu nyɔɔsi létseí mu kle wá ɔputɔ. Ɔpu amu lémlí fé fúli obugya. Tógyítáá ɔbɔ ɔpu amutɔ lówu.

⁴Ɔbɔɔpu sáásí létseí mu kle wá ntsu tsunhe pú abunkpabi féétɔ. Mú féé ilemlí obugya. ⁵ɩnu nonuá *Bulu-ɔbɔɔpá ɔteku ntsusu lébláa Bulu ɔbéé, “Óo Ɔwankípá fúbu unu bré féé. Fú asún da ɔkpa ání fabítí amú usu ali. ⁶Tsúfé bamó fú ɔnósú atáípu pú fú ahá, tséí amú obugya wúlí ɔsulúsu. Mú sú fahá bapú obugya há amú fée, bunúu ni. ɩni lékanáa ha amú ní.” ⁷ɩnu nonu ɔme kvá ɩledali tsu *afɔɔɔie-asubwi ámu así ɔbéé, “Ee, aní Wíe Bulu Otúmípu, fú usbutí igyi ɔnɔkwali, ɩda ɔkpa.”

⁸Múú ɔbɔɔpu náásí létseí mu kle wúlí owí. Mú su owí ɔnó lɔwa ɔnlun, ɩleha mú ɩde ahá tɔ fé ogyá. ⁹Owí ámu ɩɔtɔ okugyíɔku. Bulu búu túmi asun wunhe anfi féésú, táme bekiná bumedamlí kluntɔ; púwá mu numnyam, mboún ɩwí bɔlwí mu.

¹⁰Onuusi létseí mu kle wúlí ɔbwi ámu owíe obíasú. Ɔbwi ámu iwíe ogyíkpa féé iloklun. ɩwɔsun su mu abúopu amu ɔbwi amú ɔdandɔ. ¹¹Táme bekiná bumedamlí kluntɔ sí amú lalahe amu féé bwe. Mboún bɔlwí ɔsúsú Bulu, ɩwɔsun ámuú budewúun amu su.

¹²Osiesi létseí mu kle wá ntsu yílé Efratetɔ. Ntsu ámu féé ɩlekpí lé mú ɔbúntɔ. ɩni léla ɔkpa há awíeá botsú owí ɔdalíkpa pú amú ɩsá akɔpú bétalí tsun ba unu. ¹³ɩnu nowun *ɔɔe laláhe asa akvá bugyi fé agyóngyo, bedali tsu *bútí ámu ɔnótɔ, ɔbwi ámu ɔnótɔ pú ɔnósú ɔtáípu ofunupu amu ɔnótɔ. ¹⁴Ɔɔe laláhe anfi bubu túmi bwé osúna akɔnkpɔnti. Bɔtsun ɔsulúsu awíe féésú, méni békpa amú féé wá abatɔ, béba ɔkɔ aní Wíe Bulu Otúmípu ɩsá eke yilé ámuú igyi mu asún ogyíké amu.

¹⁵Aní Wíe ɔbéé, “Kí, néba fé owikplu. Bulu obóyulá ɔhá ání ɔleda ɩwɔsu, alalá mu atadié yái, méni ɔméenatí yayá, péli méekítá mu.”

¹⁶Múú ɔɔe laláhe amu bekpa awíe amu yéfia ɔtunekvá butetí unu *Hebrifɔ ɔblítɔ beé, “Harmagedon.”^k

^k 16:16 *Harmagedon* así gyí, Megidobu. Bɔkɔ ɩsá tsɔtsɔɔtsɔ ɩbu ánfisu.

17 ɩnu Bulu-ɔɔɔɔpɔ síanósí létseí mu kle wá afútó. Ɖme kúklúkúú ku ledali tsu Bulu ɔtswékpa unu owíe obíá ámutɔ ɔbée, “ɩlatá!” 18 ɩnu nyankpu lówa ɩbɩ fwɩ bɩ. Odekpíe, ɔpráda deputí. Ɖme ɔtsan-ɔtsan leɩn kúklúkúú, ɔsulúv lekpinkí kpinkí kuá mú odu umókúba kɩ tsú bréá ahá beln ɔyítɔ ɔpá. 19 Wúlu yilé *Babilontɔ léye asa. Awúlu yiléá ɩbu ɔyítɔ féé ilobwiebwíe. ɩnu Bulu lékaín Babilon lakpan féésú, ɔɔɔɔpɔ mu ɔblɔ kpɔnkɔntɩ eweto-ntá ámu há mu olonu. 20 Ɖpu nsiné ɔsulúv kugyíku lófwɩ, abu é féé ɩleɩa. 21 Atsufolibi akpɔnkɔntiá mú odwintɔ bóbwe fé kílo aduenu (50) lekpa tsú nwlúlótáasu beda ahásv. Atsufolibi amu ɔnɔ ɔnlɩn sv bɔlwí Bulu.

Obu-ɔnɔ Otsiápú Kpɔnkɔntɩ Ámu

17 1 ɩnu Bulu-abɔɔpɔ abasiénɔ ámúv bekitá ablanwébi ámutɔ ɔkule léba bebláa mɩ ɔbée, “Ba, ansuna fú alíá bréá Bulu ɔbébutí obu-ɔnɔ otsiápú kpɔnkɔntɩ ámúv otsie ntsu tsɔtsɔɔtsɔsv ámu ɩsv. 2 Mva ɔyítɔ awíe féé batɔ mbva. Ɖyítɔ ahá féé banu mu mbvatɔ-ntá bú.”

3 ɩnu Ɖɩé ámu léba mɩsv, Bulu-ɔɔɔɔpɔ amu lótsu mí ya *dimbísú. Nowun ɔtsɩ ɔku tsie ɔbwikítá-atɔ pepe ɔkusv unu. Ɖbwi ámu bv nwun asienɔ pú nsiebí idú. Bɔwanlín adá ánɩ ɩlɔkusú líí Bulusv dínká mu ɩwɩ féé. 4 Ɖtsɩ ámu lówa atadiéá igyi faasv ntsu múa pépe. Ɖlɔwa abutó wulhe ɔtsan-ɔtsan, ɔde sika pepe owebi mu gyɔpɩtɔ. Akisítɔ pú mu obu-ɔnɔtsiá ifin lɔbulá mú dédéédé. 5 Bɔwanlín ɩdá kuá mú asɩ leɩaín dínká mu ɔsvkɩ beɩ, “Wúlu yilé *Babilon, obu-ɔnɔ atsiápú féé oyín. Ɖsulúsv akisítɔ féé owíe.” 6 Nowun ánɩ ɔtsɩ ámu lanu Bulu ahá obugya bú. Ahá ánfɩ bɔmɔ Yesu ɩwɩ adánsɩegyí sv ní.

Bréá nowun mu a, ɔnɔ lobwie mí. 7 Múv Bulu-ɔɔɔɔpɔ amu léfuté mí ɔbée, “Ntogyi ɔnɔ labwíe fú alí? Néle asun ɩaínhéá ɩbv ɔtsɩ ámu mva ɔbwikítá-atɔ amúv ɔbv nwun asienɔ múa nsiebí dú ámu asɩ súná fú. 8 Ɖbwi ámúv fowun amu latsiá kɩ. Ɖtráa ɔma unu séi, ɔbélabá. Táme umókwa ɔpá ɔbédalɩ tsu ɩlán klúklúúklú ámúv uma ɔka ámutɔ yɔ ɔhíkpa. Ɖsulúsv atsiápú amúv Bulu mɔwanlín amúv adá wá nkpa

owulú ámutọ tsú bréá ọyí lefi así ámu ọnọ bóbwie amú, tsúfẹ bowun ání ọbwi ámúbú oletsíá, ọtráa ọma unu ámu lalá bá.

⁹“Ínu léhián nyánsa ání bópunú mú así. Nwun asienso ámu igyi abu asienso¹ ání ọtsi ámu dé iwíe gyí mósú. ¹⁰Nwun asienso ámu ilú há awíe asienso é. Abanú bawú bọtsun, osiesi tsíe obíású séi á. Osienso sí mókúnýá ba. Ọbá á, bré kpalobí ku pé obétsíá. ¹¹Owíe okwesi gyí ọbwi ámúbú oletsíá, ọtráa ọma unu séi ámu. Abasiéno ámutọ ọkule ogyi. Mu é ọbẹhí fé mu aba ámu.

¹²“Nsiebí dú ámúbú fowun amu igyi awíe idú ání bumókúnýá tsíá obíású. Táme béyaí amú mbíású amú iwíe ogyíkpá. Amú ọbwi ámu bégyi iwíe bré itinbí. ¹³Amú fẹé bóbwe agywun kule, pú amú túmi há ọbwi ámu. ¹⁴Amú ọbwi ámu bóko *Okúfabi amu, táme Okúfabi amu obégyi amósú, tsúfẹ mugyí asító Ọsí pú awíetọ Owíe ní. Mu abúọpọ gyí ahá ámúbú Bulu latí amú, lé amú, bubu ọkọkwalí há mu amu.”

¹⁵Ínu Bulu-ọbọpọ amu lébláa mi ọbẹe, “Ntsu tsọtsọtsọ ámúbú fowun ání obu-ọnọ otsiápú ámu tsie mósú ámu ilú há ọmá-ọmá pú ọblí ọtsan-ọtsantọ ahá. ¹⁶Nsiebí dú ámúbú fowun ọbwi ámu nwunso ámu é ilú há awíe idú ání mu amúnnyọ bégyi iwíe. Amú fẹé bólu obu-ọnọ otsiápú ámu, swíí mu ató fẹé, lé mu yaya, wí mu aye, wá tráhe ogyá, ibọhọ plíplíplíplí. ¹⁷Tsúfẹ Bulu lópu agywun ánfí wá amú fẹé nwuntọ, méni bóbwe mu apé. Amú fẹé bópu amú túmi há ọbwi ámu, yófún bréá Bulu asún ámu fẹé ibéba mótó.”

¹⁸Ínu Bulu-ọbọpọ amu létrá bláa mi ọbẹe, “Ọtsi ámúbú fowun atowunhe amutọ ámu gyí wúlu yíléá ide ọsulúso awíe fẹésú gyí ní.”

Babilon Bwie

18 ¹Ínu ọma a, netrá wun Bulu-ọbọpọ ọku é dékplí tsú ọsúsú ọbá. Ọbu túmi kponkponnti. Mu numnyam dẹwankí wúlí ọsulúso. ²Ọkọkplún kúklókúú ọbẹe, “*Babilon labwíé! Wúlu yílé Babilon labwíé! Ulamí *ọje laláhe

¹17:9 Abu asienso ánfisọ Roma wúlu idin ní.

ɔtsan-ɔtsan féé ɔɲaínkpá. Ulabwé isia há mbubwi laláhe pú mbwikítá-atɔ laláhe féé. ³Tsúfé alapú mu mbuatɔ-ntá ámu dá ɔmá-ɔmá féé ɔnɔ. Mva ɔyítɔ awíe féé batɔ mbva. Ibíá agyípú féé banyá iwɪ tsú nkpa ámúb olegyi amutɔ.”

⁴Unu nelanú ɔme ku tsú ɔsúsú ɔbéé,

“Mí abí, mlile iwɪ le mutɔ!

Mlumáwa ibi mu lakpan ámutɔ,

méni mu asun wunhe amu ku méeɓa mlisu.

⁵Tsúfé mu lakpan lawɔ nwulótáa.

Mú su Bulu lakáín músú.

⁶Pu mu lalahéá alapúgyí fú ahá ka mu ɪkɔ.

Pu mu bwehé ka mu ɪkɔ tsenyɔ-tsesa.

Ɔɔpu nta kpekplé há ahá bonu.

Mú su pu múbá ibu ɔnlun dun mú aku anyɔ ha mu onu.

⁷Alagyi ɔdwe laláhe, tsú iwɪ dubi.

Mú su pu iwɪɔsin múbá asun wunhe ka mu ɪkɔ séi.

Ɔtebláa mu iwɪ ɔbéé,

‘Owíe tsihé ngyi, ntsie mí obíasú.

Megyí ɔsurapu ngyi, mmɔɔwa nwe ekekeke!’

⁸Mú su asun wunheá igyi akún, isú pú lowu bótu


mu ekewóle pé.

Bówa mu ogyá, ɔbóhɔ plíplíplíplí,

tsúfé Otúmípu anɪ Wíe Bulu gyí. Mudé mu ɪsu butí.”

⁹Ɔsulúsu awíe amúb mva amúnɔ ɔɔtɔ mbva, begyi ɔdwe laláhe amu bówun mu ogyási, su kpisíi. ¹⁰Mu ipian ámúb odewúun amu ibówa amú ifú. Mú su béliú tsútsúútsú blí beɛ, “Gyɔwɪ ní! *Babilon gyɔwɪ ní! Wúlu kpɔnkpɔnkpɔntɪ, nkáli su Bulu labítí fú ɪsu ɔtsáwɔle pé alí?”

¹¹Ɔyítɔ bíá agyípú bósu, gyi awírehɔ, tsúfé ɔhaa trá ɔma unvá ɔbóhɔ amú atɔ fehé. ¹²Mulétsiá hɔ sika pepe pú sika futútú atɔ, abwi wankláán pú abutó wɔlɪhe, ɔhráda, ago, sríki atati pú atati pepe, nyíá ibu ɔfan, atɔá ɔɔpu súrúfú-ɪse bwé, múbá ɔɔpu nyíá ibu ibíá sré, pú múbá ɔɔpu kɔɔbrɪ múbá dátɔ pú abwiá ihíé bu akíle aná féé bwé tsɔtsɔwɔtsɔ tsú amú wá. ¹³Oletsíá hɔ amú píprɪ, ɔhíén, *ohuam, apuse, ntá,



Dyító bíá agyípú atọ fẹhẹ. (Atọ Lesúnáhé 18:11)

olif-nfọ, nfúo wankláán, ayó, nnantswie, akúfa, mpọnkọ, akeké, tsíá họ ahá nkpábi kúrǎá.^m 14 Bósu blí ɓe, “Ntobí ámúú futekle amu fée ladáli fú ubi. Ató ámúú fútoṣúwá bite ámu fée lahúli fu. Fuméetrá wun mú ekekeke!” 15 Bíá agyípú amúú batsun musu nyá iwí ámu fée bélú ifúntó, tsúfẹ bude ifú nya ání bówun mu iwɔsun ámu odu. Béki mu ipian ámu, su gyi awirehọ! 16 Béblí ɓe, “Gyɔwí ní! Wúlu yilé, gyɔwí ní! Teki fuhíe fubu akíle. Atati fútútú múa pépe pú ago futedídá. Sika pepe ató múa abutóá ide ogyá kpa srasrasra futówá. 17 Atonyahé tsotsɔtsɔ ánfí fée lahúli fu ɔtsáwule pé!”

Ntsusu-yibi akanpú, mú ahande pú mútó agyómá ayɔpú pú ibíá agyípú fée bówa ifó mu wá. 18 Ní bowun mu ogyási amu a, bósurá okitikíti ɓe, “Wúlu mɔmu lófun wúlu ánfí ɔyító fée?” 19 Békpa isi wá nwuntó, gyi awirehọ, blí ɓe, “Gyɔwí ní. Wúlu yilé, gyɔwí ní! Fú nyatọ aní ntsusu ayibi awíe fée anulanyá iwí tsú. Fú iwísu ató fée lahí ɔtsáwule pé!”

^m 18:13 ahá nkpábi ntée anyánpósa-oyí múa akláa.

²⁰Ɔsúsú atsiápú fée, mɔnya ansigyí. Bulu ahá, mu *sumbí ayɔpú pú mu ɔnósú atɔípú fée, mɔnya ansigyí. Tsúfé Bulu lagi mu asún, bíttí mu usu, ɛ́tɔ́ ámú alapúgyí mli ámu su.

²¹ɔnu Bulu-ɔɔɔɔɔɔ ɔwɔnlínú ɔku lótsu ibwi kɔɔɔkɔɔnti ku, tswi wa ɔpɔtɔ. Mú ɔleblí ɔbée, “Alí Bulu ɔbɔpɔ ɔbló bwíé wúlu yilé *Babilon, ɔhaa méetrá wun mú ekekeeke ní. ²²Ɔhaa méetrá nu ɔsankuo adapú, ulɔ awapú, ɔténtɛ afulípú pú ikpe afulípú nka wúlu amɔtɔ ekekeeke. Ibi ɔnó agyómá kukɔɔku é uméetrá tsiá nu. Buméetrá kwe nfúo nu ekekeeke. ²³Ɔkandíe kuku méetrá wankí wólí nu, ɔhaa é méetrá nu okúlu múa ɔká pɔpwe ɔme nu ekekeeke. Tsúfé teki mu ibíá agyípú gyí aha kɔɔɔkɔɔnti ɔyítɔ ní. Alapú mu atóla mlé ɔyítɔ ahá fée, há bafwí!

²⁴“*Babilon brɔnusu Bulu ɔnósú atɔípú amu obugya ibun. Mɔlómɔ Bulu ahá ɔyítɔ fée ní.”

19 ¹ɔnu fée ɔma a, nonu ɔme kvá igyi fé ɔɔɔm ání budekplón kuklókúú ɔsúsú. Budeblí beɛ, “Halelúia!” Aní Bulu tɔhɔ ahá nkpa. Mu nkule búv túmi múa numnyam, ²tsúfé mu usɔbití igyi ɔnɔkwali, ida ɔkpa. Alabítí okipú kɔɔɔkɔɔkɔɔnti ámúú ɔɔpɔ mu obu-ɔnó tsiá yíntá ɔyítɔ ámu usu, alafíté mu asúmpú obugya tsú mu wá.” ³Butráa budekplón kúklókúú beɛ, “Halelúia! Wúlu amu ogyási lakúsú yɔ ɔsúsú bré féétɔ!” ⁴ɔnu ahandɛ advanyɔ-na ámu pú akɔankpaw ana ámu bemlí bun súm Bulu ámúú otsie owíe obíá ámusu, blí beɛ, “*Amen! Halelúia!”

Okúfabi Amu Ɔká Otsiáke

⁵ɔnu ɔme ku lelɔn tsú owíe obíá ámɔtɔ ɔbée, “Mli Bulu asúmpúá mɔntenjá mu ifú, nyebí ahandɛ fée, mlikanfu aní Bulu ámu!” ⁶Mú ɔma a, ɔme tsɔtsɔtsɔ lelɔn, fé ntsu búláhé détsúvɔn waa, ntée ɔpráda deputí kúklókúú ɔbée, “Halelúia! Aní Wíe Bulu Otúmípu amu dé iwíe gyí. ⁷Mliha anya ansigyí, iwí usanki aní, awa mu numnyam! Tsúfé *Okúfabi amu ɔká otsiáke lafɔn. Mu ka ámu lahíhíe iwí tá.” ⁸Beha

ⁿ 19:1 Halelúia igyi Hebrifo ɔblí. Mú asi gyí, *Kanfɔ aní Wíe Bulu!*

mu ɔkpa bɛɛ, ɔwáa ɔhráda atadiéá ɔlowankí, ide ogyá kpa. (Ohráda atadié ánfɔ ulí há Bulu ahá yilébwe.)

⁹Mú Bulu-ɔɔɔpu amu lébláa mi ɔbée, “Wanlɔn fɛɛ, ‘Bulu layúlá ahá ání alatí Okúfabi amu ɔkátsiá nke ámu asi.’” Mú ɔletrá bla mi ɔbée, “Asún ánfɔ igyi ɔɔkwali, Bulu wá itsú.”

¹⁰ɔnu nemlí bun mu ayabito, mbée ansum mu, táme ɔlebláa mi ɔbée, “Mábwe! Tsúfé Bulu osúmbi ngyi fé fúa fú apíó ámú mɔdɛ Yesu ɔwɔ adánsɛ gyí amu. Sum Bulu nkole pé!

“Tsúfé ahá ámú bude Yesu ɔwɔ adánsɛ gyí amu bubu Bulu ɔɔsú asúnblí ɔhé.”^o

Ɔɔnkɔ Futútúsú Ɖɔnkápú

¹¹ɔnu múa nówun a, ɔsúsú lafínkí. Neláki a, ɔɔnkɔ futútú ɔku líí á! Musu ɔɔnkápú amu idá gyí, “Yilé Ɖbwepú pú Ɖɔkwaliɔpu.” Otegyi asún, ɔɔkɔ isá é ɔɔkwaliɔpu. ¹²Mu ansíbi aklambi igyi fé ogya plɛnplɛn. Owíepa tsɔtsɔɔtsɔ ibun mu nwun. Ɖbu dá kuá ɔɔwanlín dínká musu, ɔhaa méyín mú tsía mɔɔ. ¹³Ɖɔwa ligá ání ɔɔwa mú obugyato. Mu idá gyí, “Bulu Asún.” ¹⁴Ɖsúsú isá akɔpú budɔn mpɔnkɔ futútúsú. Ɖɔwa ɔhráda atadiéá ɔlowankí, ide ogyá kpa bubuo mu. ¹⁵Ɖdayí ɔya anyɔ kláklááklá ku ledali tsu mu ɔɔ. Mú ɔbɔpɔsáin ɔmá-ɔmá bun ni. Ɖbɔpu owuntɔlɔn kpá amú. Bulu Otúmípu amu ɔblɔ kpɔnkɔntɔ ámu ɔbɔpɔnyímé amú fé alá butenyímé wáun-abí. ¹⁶Idá ání ɔɔwanlín dínká ɔhá ámú ɔɔn ɔɔnkɔ futútú ámu atadiɛsu pú mu obíánsú gyí, “Asítɔ Ɖsí, Awíɛɔ Owíɛ.”

¹⁷ɔnu nowun Bulu-ɔɔɔpu ɔku líí owítɔ. Ɖɔkplún kpolí mbubwi ání buna afútɔ féé ɔbée, “Mlíba! Mlíbefia Bulu ɔpúnú kpɔnkɔntɔ ámú alatswɔ ha mli ámu asi! ¹⁸Méni mlégyi awíɛ, isá ɔɔ alípu, isá akɔpú akinkín, mpɔnkɔsu adínkápu pú amú mpɔnkɔ, ɔyítɔ ahá, ɔwɔ agyípu, nkɔpábi, nyebí pú ahande féé aye.”

^o 19:10 Ntée Ɖɔkwali amú Yesu lébele ɔwan ámu téhá ahá ɔvtetálí blí Bulu asún ámu ni.

¹⁹Ἰνω nowun ání ɔbwíkítá-atɔ amu mua ɔsulósu awíe pú amú isá akɔpú fée bekpa aba bɔyɔko ɔpɔnko futútúsú ɔdinkápú amu mua mu isá akɔpú. ²⁰Táme begyi ɔbwíkítá-atɔ amusu, bekitá mua mu ɔnósú ɔtɔípú amúb ɔtɔbwé osúna akpɔnkpɔnti mu idátɔ ámu. Ofúla amu ɔlɔpumlé ahá ámúb ɔbwíkítá-atɔ amu nsuhieto din amúsú, butosúm ɔkpi ámúb bɔpwe lian ɔbwi ámu ni. Bɔtswi ɔbwi ámu mua mu ɔnósú ɔtɔípú amu wá ogyá paati kpɔnkpɔntiá ogyá múa *atonkodu ihíe detsií mótɔ. ²¹Ɖpɔnkɔsu ɔdinkápú amu lɔpu ɔdayi iya anyɔ ámúb iledali tsu mu ɔnɔ ámu mó isá akɔpú atráhe amu fée. Mbubwi amu begyi amú aye plíplíplíplí.

Bɔwa Ɖbunsám Ikan Nfi Ɖpím

20 ¹Ἰνω nowun ání Bulu-ɔbɔpu ɔku lékplí tsú ɔsúsú. Ɖde ulán klúklúúklúá uma ɔka sáafi pú ikan kpɔnkpɔnti ku. ²Ɖlekítá *búti, ogyi iwo dada amúb buteti mu Ɖbunsám ntée *Satan amu, ɔlɔwa mu ikan nfi ɔpím-ɔkule. ³Ɖlɔtswi mu wá ulán klúklúúklú ámutɔ, fin mú, wá mú ɔnɔ sáafi, méni Ɖbunsám méetrá tali mlé ɔmá-ɔmá ámu. Nfi ɔpím ámu ɔma asa béle mu kpalobi.

⁴Mú ɔma a, nowun awíe-mbíá ku. Ahá ámúb bahá amú ɔkpa ání bégyi asún ámu butsie músú. Nowun aha aku ɔkláa. Amúgyí ahá ání betun amú Yesu iwi adánsiegyí pú Bulu asún ɔkanda sɔ ní. Amú kén gyi ahá ámúb bumotsulá súm ɔbwíkítá-atɔ amu ntée mu ɔkpi ámu, bumotsulá abupu mu nsuhieto dunka amú ɔsvkpi ntée amú ibasu ní. Bulu léha amú betsinkí, amúa Kristo begyi iwíe nfi ɔpím-ɔkule amutɔ. ⁵Amú Bulu légyankpá kúsúa tsú afúlitɔ ní. (Awupú atráhe buméetsinkí, nkéti nfi ɔpím ámu ɔlatsɔn.) ⁶Bulu lóyulá mu aha agyankpapu amúb ɔlɔkúsúa tsu afúlitɔ amu. Amú mó á, lowu nyɔɔsi amu uma amúsú túmi. Bɔbwe igyí ahapú há Bulu mua Kristo, mua amúnyc bégyi iwíe nfi ɔpím-ɔkule amu.

Satansu Gyí

⁷Nfi ɔpím ámu ɔma a, béle Satan obu. ⁸Ɖbédalɔ yémlé ɔmá-ɔmá ání bubu ɔyi afunka ana, igyi Gog múa Magog

amu, méni ɔbékpa ahá tsɔtsɔtsɔɔ́ buma ukláto buo iwɪ ya isá. ⁹Nowun ání benatí tsun ɔyító fée, káfia Bulu ahá pú amú wúlu yiléá Bulu tekle, táme ogyá lekpa tsú ɔsúsú behi amú akɔpú fée plíplíplíplí. ¹⁰lnu bɔtswi ɔbunsám ámúb ɔlemlé amú ámu wá obun ání ogyá mba *atonkodu detsií mótó plenplenplento. Mba ɔbwikítá-atɔ amu pú mu ɔnósú atɔ́pú afunupu amu bétsiá iwɔsinto ɔpa onyé bré féétó.

Asúngyí Tráhe

¹¹lnu nowun owíe obíá futútú kɔnkpɔnti kvá ɔku tsie mósú. Nwulótáa mba ɔsulúv besrí sí mu, táme bumenya ɔɔaínkpá. ¹²Nowun awupú, nyebí ahande bulú owíe obíá ámu ansító. Bobwií nwulótó tswi. Bobwií nkpa ɔwulú ámu étó tswi. lnu bɔpu tóá nwulú ámu ileblí tsú awupú ámu bwehé iwɪ gyi amú asún. ¹³ɔpu léle awupúá bubu mutɔ ba. Lowu mba afúlito é bele amúá bubu amútó ba. Bulu légyi okugyíɔku asún mu bwehé ɔnó. ¹⁴lnu bɔtswi lowu mba afúlito fée wá ogyá ání itamadunto. lni gyi lowu nyɔɔsi ni. ¹⁵Bɔtswi ɔhagyíɔha ání bumowun mu idá nkpa ɔwulú ámutɔ é wá ogyá ámutɔ.

ɔsúsú Mba ɔsulúv Pɔpwe

21 ¹lnu nowun ɔsúsú mba ɔsulúv pɔpwe, tsúfé ɔsúsú mba ɔsulúv gyankpawu amu itráa ma unv. ɔpu é itráa ma unv. ²Múbú nowun wúlu wankíhé, igyi Yerusalem pɔpwe amu, idekplí tsú Bulu wá ɔsúsú íbá. Bulu léhíhé mú fé ɔtsiá bawá mu ató wankláán, oyéfia mu kulu. ³Nonu ɔme kɔnkpɔnti kvá ileln tsu owíe obíá ámu así ɔbée, “Kí! Séi mú á, Bulu otsiákpá laba anyánkpósatɔ. Obétsiá amútó, bóbwe mu ahá. Mu onutó obétsiá amútó, ɔbóbwe amú Bulu. ⁴Obétsií amú ntsú fée. Lowu ntée isú ntée ipian ntée asun wunhe kvku é iméetrá tsiá, tsúfé atɔ dada amu fée ulatsun.”

⁵Múbú owíe obíású otsiápú amu léblí ɔbée, “Kí, nde tógyító bwe pɔpwe.” Múbú ɔlelabláa mi ɔbée, “Wanln asún ánfu tswi, tsúfé mú fée íbu mótó, igyi ɔnɔkwali.” ⁶Múbú ɔletrá bla mi ɔbée “Nabwé mú fée tá. Mígyí *Alfa mba Omega,

Ogyankpapo múa Ɔtráhe. Néha ɔhá ání ɔmewúli de mu nkpa-ntsu, ɔméeka mú ɔkɔ. ⁷Nɔ́pu oyúla anfi há ɔhá ání olegyi usu. Nɔ́bwe mu Bulu, mu é ɔbɔ́bwe mí bí. ⁸Táme afúpúá beyinkí mí ɔma, ahá ání bumɔɔɔ mi gyi, mbusuo abɔpú, ahá amɔpú, mbua atɔpú, atɔ alapú, ɔkpi atswépu pú afunupu féé otsiákpá gyí ogyá paati kpɔnkpɔnti, ogyá múa *atonkodu ihíé detsíí mótɔ. Inu gyí lowu nyɔɔsi amu ni.”

Yerusalem Pɔpwe

⁹Inu Bulu-abɔpu abasiénɔ́ ámúbú bude ablanwé asienɔ́ ámúbú asun wunhe asienɔ́ tráhe ɔbɔ́ mú ámutɔ ɔkule léba bebláa mi ɔbéé, “Ba, ansuna fú ɔtsiá *Okúfabi amu ɔbá betsiá.” ¹⁰Inu ɔlekpa mí Ɔhétɔ́ ya ɔbu fúáhé kpɔnkpɔɔnkpɔnti kusu, olosuná mí Yerusalem wúlu wankíhéá idekplí tsú ɔsúsú Bulu wá ɔbá. ¹¹Bulu numnyam dewankí wólí wúlu ámusu, ihíé dewankí húnánááná fé atsufolibi, ide ogyá kpa fé ahuhwéá mú ansítɔ lɔwankí. ¹²Bɔpwe buntíi trihe fúáhé ku bómlí mú, ɔbu aklun akpɔnkpɔnti dúanyɔ. Bulu-abɔpu dúanyɔ bude aklun ámu ɔnɔ́ gyo. Bɔwanlín Israel abusuan dúanyɔ ámu adá dínká aklun amusu ɔkule-kule. ¹³Aklun asa bu owí ɔdalikpa. Asa bu owí ɔkplíwíékpá, asa bu ɔsúsú, asa é bu ayasi. ¹⁴Beyi buntíi amu dínká abwi yíléyílé dúanyɔsu. Bɔwanlín Okúfabi amu *sumbí ayɔpú amu adá dínká abwi ámusu ɔkule-kule. ¹⁵Bulu-ɔbɔpu amúbú ɔde mí asún bláa amu dé sika pepe oyíá butɔpúsúsu atɔ. Ɔbɔpúsúsu wúlu amu, mú abuntíi pú aklun ání ilobomlí mú féé. ¹⁶Wúlu amu swítɔ́ pú mú teítɔ́ féé igyi kékéé. Bréá olosusúu mú á, mú swítɔ́, mú teítɔ́ pú mú fuátɔ́ féé igyi málu ɔpím-ɔkule lafana (1,400). ¹⁷Inu olosusúu buntíi amu trítɔ́ é. Igyi ayabi lafanyɔ́ múa dúasie (216), nyankpusa atosusúhe ɔnɔ́. ¹⁸Abwiá igyi fé ahuhwé bɔpupwé abuntíi amu. Bɔpu sika pepeá tɔtɔ mefráa mú, igyi fé gláasi pwé wúlu amu. ¹⁹Bɔpu abwiá ɔbu bíá ɔtsan-ɔtsan dúanyɔ́ wá abuntíi amu ntswiasɔ. Abwi ámu adá gyí, yaspa, safiri, agate, emerad. ²⁰Onik, kanelia, krisolit, beril, topas, krisopas, yasint pú ametiste. ²¹Abutó wulhe fútútú wankláán dúanyɔ́ bɔpubwé aklun amu. Uklun amu kugyíku igyi butóbi fútútú kule. Sika

pepeá tọtọ mefráa mú, igyi fé gláasi bọpwa abronu wúlu amuto. Fétalí kí tsun mótó.

²²Mmowun Bulu ọswékpá kọkọ wúlu amuto, tsúfẹ Bulu Otúmípu amu ma *Okúfabi amu gyí Bulu ọswékpá un. ²³Wúlu amu imehián owí ntée ọtsra wankí mótó, tsúfẹ Bulu numnyam tọwánkí há mú, Okúfabi amu é gyí mú ọkandíe. ²⁴Ọmá-ọmá bénatí wúlu amu wankito. Ọyító awíe é bọpu amú numnyam ba mótó. ²⁵Buméefin mú ọnó aklun, tsúfẹ oklún ma un. ²⁶Ọmá fẹé bọpu amú numnyam pú amú obú ba mú. ²⁷Tógyítá mú iwí metun, mbusuo abọpú ntée afunupu bumóowie wúlu amuto, nkéti ahá ámúbú bọwanlín amú adá wá Okúfabi amu nkpa ọwulótó amu nkule.

Nkpa-ntsu Tsonhe

22 ¹Un Bulu-ọbọpu amu losuná mí nkpa-ntsu ámúbú ulọwankí fé ahwhé ámu. Idetsúun tsu Bulu ma *Okúfabi amu owíe obíá ámu. ²Ntsu ámu ina bronu yiléá ida wúlu amu nsuné. Nkpa-oyí ilí ntsu ámu agbemgbe anyo ámusu, itoswíe abí ọtsan-ọtsan ọtsragyítótsra. Itoswíe tsé dúanyo ofi ọkuletó. Mú afitáa é igyi afá há ọmá fẹétó ahá. ³Tógyítá Bulu lalwí mú méetsiá wúlu amuto.

Mboún Bulu ma Okúfabi amu owíe obíá obétsiá un, mu asúmpú bósum mu. ⁴Bówun mu ansító, mu ida é bédunká amú ọsokpi. ⁵Owí méetrá ta un ekekeke. Buméetrá hián ọkandíe ntée owí, tsúfẹ aní Wíe Bulu ọbówankí wúlí amúsú. Bégyi iwíe bré fẹé.

Yesu lbá

⁶Un Bulu-ọbọpu amu lébláa mi ọbée, “Asún ánti bu mótó, igyi ọnọkwali. Aní Wíe Bulu télé tóá ibéba suná mu ọnósú atọpú. Múláwá mu ọbọpu ọbée, ọbéle tóá ibéba nke ánti suna mu asúmpú.”

⁷“Kí! Imọwọ ọpá néba! Ọwulú ánti asún béba mótó. Mú su Bulu obóyulá ọhá aní olegyi mú fẹésú!”

⁸Mí Yohane lónu asún ánti, nowun mú fẹé. Bréá nonu asún ánti, nowun ató ámu é á, nemlí bun Bulu-ọbọpu amúbú

ọlele mú suná mí ámu ayabito, mbéé ansum mu. ⁹Táme ọletrá bláa mi ọbée, “Mábwe! Tsúfé Bulu osúmbi ngyi fé fúa fú apíó Bulu ọńsú atọ́pú, pú ahá á múbú bég yi asún á múbú ọ́wanlín wá ọ́wulú áńfító ámusu. Sum Bulu nkole!” ¹⁰Múbú ọ́lebláa mí ọ́bée, “Mápu atọ́ lesúnáhé anfi ńáín, tsúfé mú bábu lafun ta. ¹¹Ha lalaha ọ́wepú ọ́yọ́ mu lalahẹ́wesu. Ifintọ́ otsiá pú otsiá mu ifintọ́, yilé ọ́wepú é ọ́kita mu yilébweto. Ọ́há áńi ọ́bée, mọ́pu mu iwı há Bulu osii mu iwı ha Bulu.”

¹²Iwu Yesu lébláa mi ọ́bée, “Kı, umọ́wa ọ́pá nẹ́ba! Nebá ı́kọ́ ọ́kákpa. Néka ọ́hagyı́ha ı́kọ́ mu bwehé ọ́ń. ¹³Mıgyı́ *Alfa múa Omega. Ogyankpapu muwa Ọ́tráhe, ası Otsuápu pú ọ́ń Ọ́mọ́pú.

¹⁴“Bulu obóyulá ahá áńi bude amú atadiẹ fwi, méńi bétalı nyá ọ́kpa tsun wúlu yilé á múbú ı́bá ámu ọ́ń wıé mútọ́ yégyi nkpa-oyı́ ámu abı. ¹⁵Akıai obésin iban ámu ọ́ma. Amú gyı́; atọ́ alapú, mbua atọ́pú, ahá amọ́pú, ı́kpi atswépu pú ahá áńi butekle afunu, butọ́wá mú é féé.

¹⁶“Mı Yesu láwá mí ọ́bọ́pu mbéé, ọ́bá bebláa fu asún áńfi, afupubla Akristofọ́ ọ́pasua ámu féé. Mıgyı́ Owıe *Dawid mu na, mu atọ́ ogyı́pú pú Bake Ọ́tsrakpabi wankı́hé amu nı.”

¹⁷Iwu Bulu Ọ́ńé ámu pú ọ́ká pọ́pwe amu beblı́ be, “Ba!”

Ọ́hagyı́ha áńi onú asún áńfi ọ́blı́ ọ́bée, “Ba!”

Ọ́hagyı́ha áńi ọ́mewúli de mu ọ́bá. Ọ́hagyı́ha áńi odeklé ọ́bá, Bulu okie mu nkpa-ntsu ámu.

Itráhe

¹⁸Mı Yohane, nde ọ́hagyı́ha ọ́lá da k pákpáákpa. Mbéé, ní ọ́ku lónu atọ́ lesúnáhé ọ́wulú áńfító asún, ọ́kọ́ ku tsıa mútọ́ á, Bulu é ọ́béha asun wunheá ı́bu ọ́wulú áńfító ı́béba musu. ¹⁹Nı ọ́ku é léle tọ́ku tsú ọ́wulú áńfító á, múmú Bulu é ọ́béle mu ogyı́kpá áńi ı́bu nkpa-oyı́ ámu pú wúlu wankı́hé amúbú nọ́wanlín mú iwı asún wá ọ́wulú áńfító ámutọ́.

²⁰Ọ́há á múbú ọ́de ntóbı́ áńfi iwı adánsıe gyı́ ọ́nọ́kwalısu ámu ọ́bée, “Ee! I mọ́wa ọ́pá nẹ́ba!”

*Amen! Owıe Yesu, ba!

²¹Anı Wıe Yesu ogyı́ı́ Bulu ahá buale!

Asún Hiánhe Asi Suná

Aaron (*Aaron*)

Otsú Lewi abusuantɔ. Yakob abí dúanyɔ ámutɔ ɔkule gyí Lewi. Aaron anfi gyí ɔha gyankpapuá Bulu léyaí mu igyí ɔhapú dehen ni. Bulu léblí ɔbéɛ, Lewi abusuantɔ pé bulée Bulu igyí ahapú.

Aaron anfi mu gyama gyí Mose. Bɔkwíí amú bréá Israelfɔ bɔgyi nkpábi Egyipte ɔsulúsu. Múlétsa Mose bekpa Israelfɔ srí dáli Egyipte nkpábitɔ.

Bré kutɔ Israelfɔ aku bɔkusú líí Mose mua Aaronsu, Bulu léle súná amú ɔbéɛ, bupú Israelfɔ abusuan dúanyɔ ámu akpapú nyi yíáhé wa Bulu tati-obu ámutɔ. Ɔlebláa amú ɔbéɛ, ɔhá ání mu oyi yíáhé lóɔɔí á, mu malé ání ɔbwée amú ɔkpapú ní. Ɔyi kehe a, Aaron oyi yíáhé lóɔɔí, dan, wa ntswítswi, swie abí. Ɔletrá bláa ámu ɔbéɛ, bupú oyí ámu wa Ntam-dáka amutɔ, abupuyai Bulu tati-obu ámutɔ, ibwe osúna ha amú. (Luk. 1:5; Gyu. 7:40; Heb. 5:7, 9:4, 11:9).

Abraham (*Abraham*)

Mugyí ahógyipu féé ɔnáin. (Mugyí aha títriuá Bulu léletɔ ogyankpapu, ahá ánti gyí Yudafɔ nŋ). Bímbí ámu a, Bulu lébláa mu ɔbéɛ, méha mu ɔmá ɔɔpwe ikvá mua mu abí-aná féé bétsiá mútɔ, íbɔbwe amú ɔmá. Íni su Bulu lébláa mu ɔbéɛ, otúu dali mu ɔmátɔ, oyodunká ɔmá ɔɔpwe anfi. Olegyi Bulu asún blíhésu dáli mu ɔmátɔ, náti ní tsɔtsɔtsɔ yɔ tsútsúutsú, asa oloyówie ɔmá ámutɔ. Ɔmá ánti nde budeti beɛ Israel ni.

Bulu léka ntam há mu ɔbéɛ, ní olobu mu, gyi mu mblasu á, mɔbwe mua mu abí-aná aha títriu, méki amúsú.

Oletsiá Sara, táme mva munyo bumokwú. Behie dan asa Bulu lóbwé ofúla, ɔleha Sara lókwú. Bedinká kebi ámu idá Isak.

Bréa Isak lédan a, oletsiá ɔtsi ɔkwá butetí mu Rebeka. Rebeka lókwú atabí ayin anyɔ, bedinká amú adá Esau pú Yakob. Oma a, Bulu léha Yakob idá Israel. Mu abí-aná butetí Israelfɔ ní.

Yakob létsiá oyin ɔkule abi abanyɔ, bugyi Lea mva Rahel. ɔletrá tsiá amú asúmpú abanyɔ é, ɔlɔkwú abí dúanyɔ. Amúgyí; Ruben, Simeon, Lewi, Yuda, Isakar, Sebulon, Dan, Naftali, Gad, Aser, Yosef pu Benyamin. Mu abí dúanyɔ ámu féé ɔkwú tsɔtsɔɔtsɔ, yɔfun bréa Israelfɔ behie kléí. Amúgyí Abraham abí-aná ní.

Adam (Adam)

Adam gyí nyankpusa gyankpapvá Bulu lóbwé. ɩsı Bulu lóppwé mu. Hawa anfi lóbwé mu ka. Mva Hawanyɔ gyí aha gyankpapvá bumegyí Bulu mblasu, ɔɔbwé lakpan ní. Tsú eke amu a, anyánpúsa féé bemlí lakpan abwepú. Mu ka idá gyí Hawa.

Yesu Kristo gyí Adam ɔtráhe. Adam gyankpapu amu gyí ahá féé ɔnáin, ɔhagyíɔha tenyá nkpa tsú mutɔ ɔsulúv anfisv. Yesu Kristo gyí Adam nyɔɔsi, ɔtehá ɔhagyíɔha ání ɔlɔhɔ mu gyi ɔhétɔ nkpa.

Afɔɔɔe-asubwi (Altar)

Bímbí ámu a, Israelfɔ betsiá tɔ mbwı há Bulu igyí. Betsiá mɔ akúfa, akpaláa, nnantwie aná féé, púɔbɔ afɔɔɔe há Bulu. Abwi betre, butɔtɔ mbwı músú. Tsú Mose brésú á, igyí ahapú tɔɔbɔ afɔɔɔe ánfı Bulu tati-obu ámu wunsınésú afɔɔɔe-asubwi amusv. Mú ɔma asa buɔɔɔɔyáa Bulu ɔtswekpa afɔɔɔe-asubwi kwá ɔɔpu kɔɔbrı bwé músú. Afɔɔɔe-asubwi tükúriibiá beɔlaın sika pepe wúlí músú é iletsiá Bulu ɔtswekpa ıv. Músú igyí ahapú ámu betsiá wá ɔhıén ogyá ní.

Akasıpú (Disciple)

Amúgyí Yesu abúopu, ɔlɔhɔ Yesu gyi, bonu mu asún. Gyumagyihe ɔwulú ámutɔ á, ɔɔpu asun bambá lé Yesu

abúopu suná. Múgyí, “Yesu ahógyipu pú apió.” Mateo, Marko, Luka pú Yohane nwulú ámutóá beti amú “akasípú dúanyo” ntunekv. Amúgyí abúopu dúanyo ámutú Yesu léle ɔbéé, butsiá mu wá ámu ni. Amú kén beti sumbí ayɔpú ní, (Mat. 10:1-4). Yeki *Sumbí Ayɔpú*.

Alfa Mua Omega (*Alpha and Omega*)

Fé aliá ‘A’ igyí asúnbi gyankpapu a, Alfa gyí asúnbi gyankpapu Griiki ɔblító. Mú su ní bɔwanlín bæ, aní Wíe Yesu gyí Alfa a, ilosuná ání mugyí tógyító así otsukpá. Butetráa ti mu bæ ‘Omega’ ání igyi Griiki ɔblító asúnbi tráhe. Fé aliá ogyi tógyító así otsukpá á, alí kén ogyi tógyító ɔnómɔ ní. (Atɔle. 1:8; 21:6; 22:13).

Amen (*Amen*)

Hebri ɔblíu igyi. Mú así gyí “lɔá mútɔ.” Ní ɔku ɔbɔ mpáú tá á, mu ba totsúlá músú ɔbéé “Amen” Beti Yesu “Amen” (Atɔle. 3:14), tsúfé mugyí ɔnɔkwalpu.

Asúbɔ (*Baptism*)

Ní ɔhá ɔbɔ asú á, ilosuná ání aladámlí klvntɔ, sí lakpan bwe, alahɔ Yesu gyi ání obési mu lakpan kíé mu. Yesu móbwe lakpan, táme Asú ɔbɔpú Yohane lɔbɔ mu asú Yordan ɔbúntó asa olotsuá mu agyómá así.

Asun Wankláán (*Gospel*)

Bulu asún ání ɔɔpusísí mu ahá. Asún ámu gyí, “ɔɔpu mu Bi Yesu Kristo sísí, ɔlebeka ahá ání bɔhɔ musu gyi nwunsu ukɔ, lé amú tsú lakpan nkpábibwetɔ.”

Atonkodu (*Sulphur*)

Igyi afá ání butɔpɔbwé otua adú. Mú ogyá ɔnɔ ihíé bu ɔnlun dun ogyá kugyíku. Mú ntsu igyi fé bate-nfɔ, táme itobon kpitii.

Babilon (*Babylon*)

Igyi ɔmá kuá iletsiá bímbí ámu. Bɔkɔ Israelfɔ, kítá amú ndoun. Betsiá ɔmá ámutɔ nńí aduesienɔ. Igyi ɔmá kuá butamasúm Bulu. Babilon bu Atɔ Lɛsúnáhé ɔwulú ámutɔ.

Íntá unɔfɔ bumobu Bulu su á, ilemlí udá há ahá ání butamabú Bulu. Fíalí Roma wúlu beti alí, ntéé ɔyító ahá

ání butamabú Bulu tsiátó beti ali. Babilon ibu 1 Pe. 5:13to é, fíali Roma bude.

Beelsebul (*Beelzebul*)

Ɔhe laláhe féé owíe idá ní. Mu adá bámbá iku é gyí Ɔbunsám ntée Satan.

Bileam (*Balaam*)

Bulu Ɔnósú Ɔtáírú ogyi. Mu owíe Barak lówa ɔbéé, ɔyólwú Israelfo, ménu obégyi amúsú ní. Bileam sika ɔnsípe su, olotsulá ɔyó, mu afrímú lótoí wá mu ɔkpatɔ.

Bodobodo Matúhé Nke (*Feast of Unleavened Bread*)

Israelfo nke igyi. Butegyí mú nkensiénó, tsú ekeá bɔmó Katsun nke ɔnó. Ali nke ánfito butamagyi atóá ɔlatú. Mú butɔpúkáín alhá Yudafo ámu bedali tsú Egyipte ni. Alhá budekɔsí su bɔmɔwa bodobodotu-afá amú bodobodoto, tsíá gyo mú itu asa abuto mú.

Bulu Asun Wanlínhé (*Scripture/Old Testament*)

Igyi nwulú aduasa-kwebá (39) ání Bulu léha mu ahá bɔwanlín tswi nfí lafana (400) ɔma asa bɔkwí Yesu Kristo. Begyankpa wánlín mú Hebri ɔblító, ɔma asa bele mú así wá Griiki ɔblító. Bulu Ntam Pɔpwe anfito beti Bulu Ntam Dada nwulú ámu “Bulu Asun Wanlínhé.”

Bulu Iwíegyí (*Kingdom of God*)

Bulu iwíe ogyíkpá lú há ɔtínegyíɔtínéá Bulu nkole pé tegyi iwíe. Bulu iwíe ogyíkpá bu ɔtínegyíɔtínéá ahá bebi mu ání mgyí amú owíe. Bréá Yesu lébá a, Bulu iwíegyí ámu lébá anto nfi, tsúfé ahá babí ání Bulu gyí amú wíe. Ní Yesu oyínkí bá a, Bulu iwíegyí amu ɔbɔfun yi, ɔbéle mú ɔwan súná ahá féé.

Bulu Mbla (*The Law*)

Múgyí mbla ání Bulu lówa ání mu ahá bugyí músú abunya nkpa. Mosesú Bulu lótsun pú mbla ánfí há amú. Mú su butetí mú “Mose Mbla” ní.

Bulu Okúfabi (*Lamb of God*)

Asú Ɔbɔpú Yohane létí Yesu Kristo ɔbéé, Bulu Okúfabi. Yudafo butɔmó okúfabi púgyúra ɔha, mu iwí tetin. Kristo lótsulá bɔmɔ mu, pú mu obugya gyúra aní. Mú

su beti mu “Bulu Okúfabi” ni. (Yoh. 1:29, 36; Atɔle 5:1, 5:6, aná).

Bulu-ɔbɔpu (*Angel*)

Sumbi ayɔpú bugyi há Bulu. Ɖɔé bugyi, megyí anyánkɔ́púsa. Butamapú ansíbi wun amú, nkéti balé iwu ɔwan súná ɔha. Bulu tɔwá amú butɔyó agyómá há mu. Amú agyómá gyí Bulu abísúki. Bré ku Bulu tɔwá amú ɔbé, buyébláa ɔha asunbogya iku. Amú ɔnɔ ɔlípú gyí ɔbɔpu Mikael. Otítriu ɔku é idá gyí Gabriel. (Gyu. 12:6-11; 27:23; Heb. 1:14, aná).

Bulu Ɖnɔ́sú Ɖtɔ́pú (*Prophet*)

Musu Bulu tetsiá tsun bláa mu ahá asún, otosúná ahá Bulu ɔkpa, ɔtebláa ahá tɔ́a íbéba. Amótɔ́ aku gyí; Elia, Yona pú atráhe.

Bulu Ɖtswékpa (*The Temple*)

Igyi ɔtínéá Yudafo butosúm Bulu Yerusalem wúluto. Beye obu ámutɔ́ anyɔ, ikule igyi Ɖwankíkpa. Nyɔɔsi é igyi Ɖwankíkpatɔ́ Ɖwankíkpa. Nwunsinésú é ibu mótɔ́. Iwu gyí Yudafo Bulu Ɖtswékpa nwun, beha amú ɔkpa ání bubɔ́ afɔɔɔie kugyíku ní. Táme Yesu Kristo lowu ɔma a, Romafɔ bobwie mú. Kí máapu ání ibu ifun 631tɔ́.

Bulu Ɖtswékpa Tati-obu (*The Tabernacle*)

Bímbí ámu bréá Israelfɔ́ ámu buna dimbí ámusu ɔyɔ́ Kanaan ɔsulúsu á, Bulu lébláa Mose ɔbé, ɔbwée tati-obu títriu iku. Ɖlebláa mu alá ɔpú tati pú mbwi ɔwulú bwée mú, méni bétalí kpa mú púya ɔtínéá ɔyɔ́, bélatálí sí mú é ní bowié ɔtínéá bɔ́swí.

Tati-obu ánfutɔ́ ɔtinekuvá butetí unu Ɖwankíkpatɔ́ Ɖwankíkpa butɔ́pú Bulu Ntam Dáka ámu yái ní. Abwi pétéplé anyɔ́ amú Bulu lówanlín mu mbla-dú dínká mósú ámu, Aaron oyi yíáhé pú Mána amú Bulu léha amú betsiá gyi dimbísú unu ámu iku letsiá dáka ámutɔ́.

Yudafo atutifɔ́ ámu ɔtswe Bulu Tati-obu ánfutɔ́. Betsiá há Bulu igyí, bɔ́ afɔɔɔie aná féé unu, kpéfɔn bréá Salomo léyi Bulu Ɖtswékpa obu ámu.

Ki atɔ táanhe ání ibu ifun 516tɔ, Heb. 8:5.

Bótí (*The Dragon*)

Ogyi ɔbwi ɔkɔá buteblí mu asún ogyi fé lenke kɔ́kɔ́ɔnkɔ́ntɔ ɔhiɛ ɔbu ɔwulɔn, beti mú iwɔ. Atɔ Lésunáheto ɔwulú ámutɔ á, beblí béé Satan gyí bótí.

Dawid (*David*)

Ɔɔɔbwe Israelfɔ owíeá ɔɔɔn amú awíe atráhe. Mogyí Yisai abítɔ ɔtráhe. Akúfa ɔkɔpapú ogyi asa beyaí mu owíe. Ɔɔɔkɔ Filistifɔ isá akɔpú ɔhande Goliat mu nyebitɔ, mú mu.

Dawid anfi léhiɛ dwé Bulu. Mú su ɔɔɔwanlín ulá butɔpúkánfú Bulu tsɔtsɔɔtsɔ. Mú butetí “Israelfɔ llu” ní.

Yesu otsú Dawid abusuantɔ. Dodoɔdo, asa bɔkwí Yesu á, Bulu Ɔnɔ́sú atɔ́pú bɔɔwanlín tswi bee, “Kristo, nkpa Ɔhɔ́pɔ amú Bulu ɔbɔ́pusísí ámu obótsu Dawid abusuantɔ.” (Rom. 1:3; Atɔle. 22:16).

Dimbísú (*Wilderness*)

Igyi ɔsulúvú ání tɔtɔ tamawá alé músú. Tsúfé nyankpɔ tamatswie unv, unv uma ale há nyankpusa tsiá.

Elia (*Elijah*)

Bulu ɔnɔ́sú ɔtɔ́pú kɔ́kɔ́ɔnkɔ́ntɔ ɔku ogyi. Múlɔwa klɔn ká awíe laláhe pú ahá ání butosúm ukɔi ansítɔ Israel ɔmátɔ ní. Yudafɔ botosúsu bee, Elia obéyinkí bá bela ahá yáí asa Kristo amu ɔbéba. Asú Ɔbɔ́pú Yohane lélian Elia anfi ɔkpa tsɔtsɔɔtsɔsv. Mú su befuté mu bee, “Fúgyí Elia ní?” (Mat. 17:10-13; Mar. 9:4; Rom. 11:2-5; Yak. 5:17)

Esau (*Esau*)

Abraham mu bi Isak lɔ́kwí atabí ayin anyɔ. Beti amú Esau mva Yakob. Esau gyí ɔhande, táme eke ɔkɔá akún lekítá mu a, ɔlefe mu ikwí-dehen há mu gyama Yakob. Olotsulá ání Yakob otsúu mu hande oyúla, ɔha mu mpwúdí ogyi. Yakob abí-aná Bulu lɔ́pubwé mu ahá, megyí Esau klé. Yeki *Abraham*. (Rom. 9:10-13; Heb. 11:20; 12:16-17).

Farisifɔ (*Pharisees*)

Igyi Yudafɔ Bulusúm ɔpasua ukvá iletsiá Yesu brésú. Ɔpasua ánti begyi Mose mbla pú mbla bámbású

wankláán. Amú hógyi kínkíínkín ikule gyí, awupú bókusú tsú afúlitɔ ekekú. Betsiá kɪ iwɪ ání ɔhaa iwɪ métun dun amú. Bedunká Yesusu, bwé agywun ání bómo mu.

Griiki (Greek/Greece)

Griiki ɔmá máapu ibu ɔwulú ánfɪ ɔma, butetí unu Griisi. Atene mɔ́a Korinto awúlu igyi awúlu yilé Griisi ɔmátɔ unu. Griikifɔ bɔgyi ahá ání buyin ɔwulú, ahá butobú amú amú nyánsa su. Amú ɔblí idá gyí Griiki. Ahá ání basúan ɔwulú yɔ nkpa fée buteblí ɔblí anfi, megyí Griikifɔ ámu wule. Ibu yɔ tsútsúútsú, ɔtínegyíɔtíné ání Griikifɔ isá akɔpú bubu fée. Ahá ámúú begyankpá wanlín Bulu Ntam Pɔpwe amu fée ɔwanlín mú Griiki ɔblítɔ.

Habel (Abel)

Mɔgyí Adam mua mu ka Hawa obi nyɔɔɔ. Mu dehen Kain lómɔ mu, tsúfé Bulu lɔhɔ Habel afɔdie sí Kain klé. (Mat. 23:35; Luk. 11:51; Heb. 11:4; 12:24).

Hagar (Hagar)

Sara ɔkpábi ogyi, Abraham wóyítɔ. Bréá Sara mɔkúnyá obi kwí á, ɔleha Abraham lékle mu, ɔɔkwí obiyímbi, beti mu Ismael. Táme megyí Ismael Bulu léhie ání méha Abraham. Mú su Ismael abí-aná bumenya tɔ́a Bulu léblí há Abraham abí-aná.

ɔma-ɔma a, Sara lɔɔkwí obiyímbi, Abraham lédunká mu idá Isak. Mɔgyí obiá Bulu léhie Abraham nɪ. Sara Isak kwí ɔma a, olebenya ɔblɔ́ wá Hagar, gya mu. Hagar léyétsiá ɔtunekvá ibu mantáa Sinaibu.

Alɪ ibu ánfɪsu nfí tsɔtsɔɔtsɔ ɔma a, Bulu lébláa Mose asún, pú mu Mbla idú ámu é há mu nɪ.

Mú su beblí Galatiafɔ ɔwulú, nwun anatɔ beɛ, Hagar gyí ɔkpábiá ɔlí há Yudafo; búgyi fé nkpábi há Mose Mbla ámu, tsúfé bohogyi ání ní ɔhɔ mbla ámusu gyi a, Bulu obótsu amú ání amú asún da ɔkpa, ɔɔhɔ amú nkpa. Bumɔhɔ Bulu asúnsú gyi ání ahá ání ɔhɔ Yesu Kristo gyi gyí ahá ání amú asún da ɔkpa, Bulu ɔɔhɔ amú nkpa. Yeki Sara mua Abraham.

Hawa (Eve)

Adam mu ka ní. Bréá Bulu lɔbwe ɔyí á, mua Adam gyí anyankpusa gyankpapuá ɔɔbwe. ɔlele Adam abuntɔ-iwú,

ɔɔɔɔɔwé Hawa. Ɔma a, Ɔbunsám lébɛmlé mu, olegyi oyí-abíá Bulu lébláa amú ɔbée bumágyi. Tsú eke ámúú bekiná Bulu mbla ámusu gyí a, anyánkɔpúsa bemlí lakpan abwepú. Mva Adam abí gyí, Kain, Habel pú Set. (1 Ko. 11:3; 1 Ti. 2:13-14).

Hebri (Hebrew)

Igyi idá ání butɔpúti Yudafo, utráa igyi amú ɔblí.

Herode (Herod)

Awíe abaná beti Herode Ntam Pɔɔɔwe anfitɔ.

- (1) Herode: Owíe Herode, betrá ti mu beɛ, Otúmípu Herode, otsie obíású Yudea ɔmátɔ asa bokwí Yesu. Ɔɔɔɔ mbódí ání ɔbómɔ Yesu bréá ogyi kebi ɔɔɔwe. (Mat. 2:1-2; Luk. 1:5).
- (2) Herode Antipar: Mutsíe obíású Galilea ɔmátɔ bréá Yesu ná ɔde Bulu asún ɔkan da, ɔde ofúla akɔɔɔɔɔɔɔnti bwe ní. Mulétsiá Herodia amúú ɔleha ɔbée, bukáa Yohane nwun dúnka ulínsú há mu amu nu. Yudafo bɔɔɔ Yesu ba Herode ánfí ansítɔ, ání ogyí mu asún asa abuda mu manta oyikpalíhesu. (Mar. 6:14-29; Luk. 23:6-12).
- (3) Herode Agripa I: Ɔledunká ahá ámúú bɔhɔ Yesu gyi pú ɔpasua gyankpau amusu. Mulómɔ Yohane mu pio Yakobo. (Gyu. 12:1-23).
- (4) Owíe Herode II: Mu Paulo légyankpá dá mu asún súná asa ɔmású ogyípú lɔpu mu sísí Roma, ɔbée Kaesare ogyí mu asún ní. (Gyu. 25:13-26; 26:19, 27-32).

Hosiána (Hosanna)

Igyi asún ání butɔkplón blí púfúafua ɔha. Mú así gyí Bulu oyúla ɔhá ání ɔbá mu idátɔ, ntée bukánfu mu. (Mat. 21:9, 15; Mar. 11:9-10; Yoh. 12:13).

Idútɔ Kule (Tithe)

Yudafo betun amú ndɔɔɔ atɔ á, buteye mútɔ idú pú ukule há Bulu. Igyi ntam ání Yudafo butegyí mósú asa betakwí Yesu. Nde ulamlí Kristofɔ fée amándíé.

Igyí Ɔhapú Dehen (High Priest)

Mvtehá Bulu igyí, bɔ afɔdie mu onutó lakpan pú Israelfɔ fée lakpansu Bulu ɔtswékpa unu ní. Mu pé towíé

Ɖwankíkpatɔ Ɖwankíkpá unu yóbo afɔdiɛ. Ɖsawule pé ɔtɔyɔ́ unu ofítɔ́.

Isak (*Isaac*)

Mɔgyí obíá Bulu léhie Abraham mua mu ka Sara yáí ání méha amú ní. Mu abí gyí Esau mua Yakob. Bulu lópu atɔ wankláán ání ɔlehie há Abraham kén bláa Isak mua mu bi Yakob é.

Israel (*Israel*)

Bulu lópu ɔdá ánfɔ há Isak mu bi Yakob ání ogyi Abraham mu na. Itráa igyi ɔdá ání butɔpútí Yakob abí-aná féé. Amúgyí Israel abusuan dúanyɔ amu ní. Amú kén butetí Yudafo ntée Hebrifo ní.

Israelfɔ Ulu (*Psalms*)

Igyi Bulu asun wanlínhé amutɔ ɔfón kuá bɔwanlín ulu lafakule-adienu (150) wá mútɔ́, butɔpúkánfú Bulu. Owíe Dawid lówanlín ɔduɔɔ. Ubu Bulu Ntam Dada amutɔ.

Ulu Pepe (*Leprosy*)

Igyi ulu kuá igyi mbusuo. Ina ɔtsan há mú ánfɔ anidétɔ ulu pepe nde ánfɔ. Butelé ɔlɔpu amu wúlutɔ, ɔhaa tamapú mu gyi mba. Tsúfé fɔpú ibi da mu kpán á, ifin lada fu, nkétɔ fayógyúra iwɪ.

Iwɔtíun (*Purity*)

Yudafo amándíé ɔnɔ́ á, fɔpú ibi da fúli pú atogyihe ulu aná, ntée ulu pepe ɔlɔpú á, ifin lada fu Mose mbla ámu ɔkpasu. Ali kén igyi ní ɔtsi ɔkwíí, ntée ɔdálɔ omuá mu iwɪ metun amándíé ámu ɔnɔ́ ní. Ɖhá ání mu iwɪ létɔn gyí ɔha aní mbusuo kuku má mu iwɪ. Mubúv ɔkpa bwé osum agyúmá ɔtswékpa unu. Táme Bulu Ntam Pɔpwe amu ɔkpasu á, ali amándíé ánfɔ meklí ɔtsíá alakwíí ntée aladálɔ omuá. (2 Ko. 6:6; Efe. 5:3).

Kain (*Cain*)

Mɔgyí Adam múa Hawa obi gyankpapu. Olu su ɔlɔmɔ mu pío Habel.

Kanaan (*Canaan*)

Beti ɔsulúv amúbú Bulu lópuhá Yudafo ámu “Kanaan”. Nde unú budetɔ Palestina nu.

Kantakpatɔtsiá Nke (*Festival of Booths*)

Igyi nke kvá Israelfɔ beɛe yáí, butɔpúkáín amú natíá benatí dimbísú nfí advana (40) kéké pú alá betsiá tsíá tati-mbuto asa bowie ɔsulúv amóv Bulu léhie ání ɔbɔpohá amú ámusu.

Katsun Nke (*Passover*)

Igyi Israelfɔ atogyihe nkeá butɔpútsúa Bodobodo Mátúhé nke ámu así. Butɔpúkáín alá Bulu léle amú Egypte ɔsulúv bréá butsie nkpábitɔ. Onyé amóv ɔlele amú amú á, Bulu léha ɔmɔ akúfa, pú amú obugya kpá amú obu-ɔnɔ nyísú. Mú su lowu ɔbɔpu léka tsun amú wóyísú yómɔ Egyptefɔ wóyítɔ abi yinhé gyankpapu féé sí amú klé. Mú su butetí mú Katsun Nke ní.

Ketétíun (*Circumcision*)

Bulu lébláa Yudafo ɔbéé, butíun amú abí-aná féé keté, méní ibosúná ání mu ahá gyí amú. Mugyí lóbwe mua amónyɔ nsuné ntam ní.

Kristo (*Christ*)

Igyi Griiki ɔblí, Hebrifo butetí mú “Mesia.” Mú así gyí “Dhá ání Bulu ladá mu ofúli.” Yudafo beki ɔkpa ání Bulu ɔbɔpu dhá ání sísí, ɔbéba ɔhɔ amú nkpa. Butetí Yesu beé; “Kristo”, tsúfé ɔlele mu iwí ɔwan ání mugyí dhá ání Bulu ladá mu ofúli ní. Idá ání así anuléle wá Nkonyato ania, “Nkpa Dhɔpu”, Bulu léle mu yáí ání ɔbéba amú ní.

Kpósó (*Camel*)

Awate ɔbwí ógyi. Olekle ɔlian ɔpɔnkɔ, táme ifu yí mu ɔma. Butetsiá musu, ɔtehíé súra atɔ. Mu imi igyi sasrasa, butɔpúló tati. Kí atɔ taanhé ání ibu ifun 111tɔ, Mar. 10:25.

Lampóo Ahópu (*Tax Collector*)

Bugyi Yudafoá Roma ɔmásv ogyípú lélé Yesu brésú ání buhɔv amú aba lampóo mba tswitswi. Dhaa tamakle amú asún, butamabú amú ɔkpagyíɔkpasu é, tsúfé ahá asisípu pú awikplu bugyi.

Lewifo (*Levites*)

Yakob mu bi gyí Lewi. Mu wóyí Bulu léle yáí ání bubwée osum agyómá. Igyí ahapú féé botsú Lewi wóyítɔ.

Lot (Lot)

Abraham mu gyama Haran lókwuí Lot. Mú su Abraham mu mu bi ní. Bréá Abraham lénatí ɔ́y ɔ́sulúv amúú Bulu léka ntam ɔ́béé, ḿpohá mu amu amusu á, Lot lóbuo mu. Boyowie ɔ́sulúv amusu á, Lot léyetsiá Sodom wúlutɔ, ɔ́tínéá ahá betsiá bwé lakpan. Mú su Bulu léblí ɔ́béé, méhi wúlu amu. Bulu lówa mu abɔpu ɔ́béé buyébláa Lot ání muá mu abusuanfɔ budalí unu, asa amuhí mu. Bulu-abɔpu amu bebláa Lot beé, amótɔ ɔ́kuku mádamlí kɪ ɔ́ma bréá budedali wúlu amutɔ. Mu ka lédamlí kɪ ɔ́ma, ununu ɔ́ledamlí nfóli-sín yi ɔ́kpatɔ unu.

Mana (Manna)

Múgyí atogyiheá Israelfɔ ámu begyi bréá buna dimbí ámusu nfí advana ámu ni. ltekpá tsú ɔ́súsú nyankigyínyankɪ, butɔkúsú kpá mú, púbwé atogyihe ɔ́tsan-ɔ́tsan. Táme megyí atogyiheá butɔpúyái ɔ́yí teke músú igyi.

Maria (Mary)

Beti ahá ɔ́tsan-ɔ́tsan Maria Ntam Pɔpwe anfitɔ:

- (1) Yesu mu yin Maria;
- (2) Magdalayintse amúú Yesu légya ɔ́ɛ laláhe tsɔtsɔtsɔ lé mutɔ ámu;
- (3) Maria, otsú Betani. Mu apíó gyí Marta mua Lasaro.
- (4) Maria ání ɔ́lɔkwuí Yakobo mua Yosef. Fiale Kleopa mu ka ogyi.
- (5) Yohane Marko mu yin ání oletsiá Yerusalem. Mu wóyítɔ akasípú amu betsiá fia ni.

Melkisedek (Melchizedek)

Asón ání anyin tsu Melkisedek iwí fée gyí múá bɔwanlín wá Hebrifɔ ɔ́wulótɔ pú Genesisɔ (14:17-20). Inu beblí beé, Bulu léyái Melkisedek igyi ɔ́hapú. Bré ukutɔ á, ɔ́ɔm bekutá Abraham mu bi Lot, kpá mua mu atɔ́ fée náti. Abraham lésrí gya ɔ́ɔm amu yóko amú, ho mu bi, mu abusuanfɔ pú amú atɔ́ fée lé amú ibi. Abraham lésankí ɔ́bá á, ɔ́lɔtu Melkisedek ɔ́kpatɔ. Melkisedek léha mu bodobodo pú wáun ntá, ɔ́lɔbɔ mpái há mu ɔ́béé, Bulu

oyúla mu bré fээт́. Abraham é léha mu at́á olenya tsú isá ámutó kugyíku idút́ ikule (Heb. 7:1-3).

Mesia (*Messiah*)

Mesia igyi Hebri óblí, *Kristo* é igyi Griiki óblí. Yekí *Kristo*.

Mose (*Moses*)

Mulégya Israelfó nkpa bréá Bulu léle amó tsú Egypte ósulósu pú amó ba ósulóv amóv óleblí yaí ání óbópohá amó ámusu ní. Ínía bumohó mu gyi su á, benatí kí adimbísó nfí advana (40) kéké. Musu Bulu lótsun pú mu Mbla Idú ámu há Israelfó ní.

Mose Mbla (*Moses' Law/Pentateuch*)

Bulu Ntam Dada ówolú ámutó ówolú gyankpaw yófon nuusi amu butetí alí. Butelátí mó Ntam ntée Bulu Ntam. Itetálí líí há Bulu asún ámu é otuneku.

Mose Mbla Asunápú (*Scribes*)

Bugyí ahá ání buyin Mose mbla ámu, butosúná mó pépéépé. Amógyí ahá ání bubu labi ómá ámutó ní.

Nkpa Ání Itamatá (*Eternal Life*)

Igyi nkpa ání ní óha óhó Kristo gyi obénya. Ilosuná ání ania Bulu angyí anyawíe bré fээт́.

Nkpa hó (*Salvation*)

Itosúná Bulu ódwe pú mu nwewúun, tsúfé óleha mu Bi lébá ósulósu fé nyankpusa. Asún ámu uléblí alíá Yesu légyí mu asun wunhe fээ́sú, pú alíá ólópó mu nkpa ká nyankpusa nwunsu ikó, hó mu lé óbunsam ibutó, pú alíá ólójý ósúsú. Ólótun Óje Wankíhésú óbu aní wá alu yófon ekeá óbélayínkí bá.

Nkegyí (*Festival*)

Israelfó betsiá gyí nke tsótsótsó púkáín Bulusu. Nkeá betsiá gyí, ówanlín wá Bulu Ntam Pópwe amutó gyí:

- (1) Bulu ótswékpá púwá Bulu ibutó. Israelfó butetí mó Hanuka ntée Nkandíe nke.
- (2) Katsun Nke; Yekí *Katsun Nke*.
- (3) Bodobodo Matúhé Nke; Yekí *Bodobodo Matúhé Nke*.
- (4) Kantankpatótsiá Nke; Yekí *Kantankpatótsiá Nke*.

(5) Pentekoste Nke; Yeki *Pentekoste Nke*.

Noa (*Noah*)

Ɔlɔɔwe Bulu ɔha, oletsíá níí tsɔtsɔɔtsɔ ɔma asa Abraham lébá. Ɔlehɛ ho Bulu gyi, otonú mu asón. Bréá Bulu lébláa mu ɔbéɛ, osre dáka kpɔnkpɔnkpɔnti ámu á, olegyi dinká mósú. Mú Bulu léha nyankpu lótswíe, ntsu lɔbulá dinká ɔsulósu féé. Mú su ahá féé bowu, táme Noa muv mu ahá pú mbwíá bowie dáka ámutɔ féé benya nkpa.

Ntam-dáka (*Ark of the Covenant*)

Israelfɔ betsíá surá dáka ánfɔ náti bréá buna dimbí ámusu féé, tsúfé ulí há ntam ání iletsíá amúa Bulu nsuné. Oyí ɔɔpusré mú, ɔɔpu sika pepe píatá mú. Abwi pétéplé anyɔá Bulu lówanlín mu mbla dú dínká mósú é ibu mótɔ. Tati-obuto dáka ánfɔ tetsíá. Múa ntobiá ibu mótɔ féé iwɔ letɔn. Bréá beyi Bulu Ɔtswékpa amu tá á, ɔɔpuyáí ɔwankíkpatɔ Ɔwankíkpa mu kóún. Kɔ atɔ táanhe ání ibu ifun 518tɔ, Heb. 9:4.

Ofiakpa (*Synagogue*)

Obu ntée ɔtínéá Yudafo butefia ɔkpónú ɔdaké súm Bulu, klá Bulu asón wanlínhé amu, kásí mú. Inu igyi atɔ ɔkasíkpa há amú. Inú butɔpú amú Bulu asón nwulú yáí ní. Kɔ atɔ táanhe ání ibu ifun 56 múa 57 nsuné.

Ogyá Ɔɔvudáké (*Day of Preparation*)

Yudafo ndawótswítɔ eke síésí, igyi Fieda. Alɔ eke ámu butelá amú iwɔ pú amú ntobí yáí há ɔyi keheá igyi ɔkpónú ɔdaké Mímlɔda ámu nɔ.

Ohuam (*Myrrh*)

Oyí iku ntsu wulɔhe igyi, ibu ɔfan. Yudafo butɔpúwá tatitɔ púklí fúli asa butopúlá mu.

Okúfabi (*Lamb*)

Yeki *Bulu Okúfabi*.

Oyikpalíhe (*Cross*)

Romafo awíe amándíé igyi ání béda lakpan abwepú mántá oyikpalíhesu, mós amú. Ahá amɔpú pú ogyo atswapú butebítí isu alɔ. Igyi oyiá bapúkpalí aba. Bré ikusu á, butehá lakpan abwepu ámu butɔsúra mú ya ɔtínéá isá

akopú ámu bopu ndatobi dá amú mántá, ntée pú ofé klí amú mántá músú. Mú oma a, butotsú oyikpalíhe amu líí, lakpan abwepu ámu busian músú kpéfún bréá bawú. Ohá ání beda mántá oyikpalíhesu tehié wun iwɔsin asa otowú. Nsúpa kpɔnkpɔntı é igyi ní bedá fú mántá oyikpalíhesu, igyi Bulu ulwí é. Kristo lóho alı usbutí ánfı há anı, méni ubéha Bulu obédinkí ulwíá iletítı anı munyo nsiné lé anısu. Kı ato táanhe ání ibu ifun 440 múa 441 nsiné.

Obunsám (*Devil/Satan*)

Obunsám gyí ohe laláhe owíe pú Bulu olupú. Otémlé ahá, há amú butobwé lalahé. Otetsiá káín Yesu Kristo ahógyipu amú lalahéá babwé bɔtsun, méni bósusúu ání Bulu mókúsíkíé amú. Mu idá gyí “Satan,” ntée oyí ánfısu ogyípú.

Ohande (*Elder*)

Ntam Pɔpwe anfito á, butetí oha ohande tsun nkpa asasu:

- (1) Bulu Asun Wankláán nwulú gyankpapo ana ámutɔ á, ohande gyí Yudafɔ Bulu osúmpú dehen.
- (2) Gyumagyihe owulú ámutɔ á, amógyí ahá ání butekı opasuasɔ.
- (3) Ibu Ato Lesunáhé owulú ámutɔ é ání, “Ahande advanyɔ-na bude Bulu sım ɔsúsú.” (Atɔle. 4:4). Fétalí tsú mú é ání igyi osúna há Bulu ahá ifía.

Ohién (*Incense*)

lhíé bu ofan. Oyí ıku oma pú mu nlíntɔ ntsutɔ bútenyá mú tsú. Butowá mú ogyá.

Okpónú Odaké (*Sabbath*)

Bulu lópu nkensíé bwé oyítɔ, ɔleda okpónú eke síénósí. Mose mbla meha okpa ání Yudafɔ buyɔɔ agyúmá okpónú odaké. Bulu obéé, ayɔɔ agyúmá yí abasɔ nkensíé, apu eke síénósí da okpónú. Mú sú Yesu létɔa oha ıɔ okpónú odaké, bele mu ılá ní. Tsúfé butobú ıɔtsá ání igyi agyúmá.

Onóklí (*Fasting*)

Yudafɔ amándíé igyi ání bétsiá nke ku, buméegyí ató alu kpéfún ıbré ku. Ilosuná iwıasbá, awırehoúsú pú obú pohá Bulu.

Ɖɔɛ Laláhe (*Evil Spirit/Demon*)

Bugyi Bulu olúpu Satan abɔpu, tɛki Bulu-abɔpu bugyí, táme bréá Bulu olúpu lókusú líí Bulusu á, bobuo mu. Alá Ɖbunsám gyí á, alí mu abɔpu é bugyi ní. Butemlé ahá, yíntá amó, butetin ahá ɔkpa ání bumáhɔ Bulu gyi. Butɔbwé mu ali, méni Bulu ɔbébutí amó isu ogyá ání utamaduntɔ.

Ɖɔɛ Wankíhé (*Holy Spirit*)

Ogyi Bulu Ɖɔɛ. Ogyi Bulu fé Ɖsí mua Obí ámu. Bulu lópu mu sísí, otebetsiá ahógyiputɔ, wá amó ɔwɔnlín. Ɖtehá ɔpasua ámu tɛdan. Bulu tɔpú Ɖɔɛ Wankíhé há ahá ání butonú mu asón.

Paradiso (*Paradise*)

Griiki ɔblítɔ á, Paradiso igyi ndobííá ibu akíle. Bré ɔku á, butetí mú Eden ndobíí. Bulu lópu Adam mua Hawa yái mótɔ ɔyí asutsuábi amu. Ntam Pɔpwe ɔwulú ámutɔ á, beti Bulu wóyí bɛɛ Paradiso; igyi ɔtɔne wankláán ání Kristo ahógyipu bóyɔ amó lowu ɔma amu. (Luk. 23:43; 2 Ko. 12:3; Atɔle. 2:7).

Pentekoste Eke (*Pentecost*)

Pentekoste así gyí “Aduenu (50).” Ekeá befi Katsun Nke gyí así ɔma eke aduenusi butegyí Pentekoste Nke ání, igyi Israefɔ ayótɔn nke. Ɖtsra núúsí, igyi “Otimbɔtɔ (May)” butegyí mú. Ali eke ání Ɖɔɛ Wankíhé légyankpá kplí bá Yesu Kristo ahógyipu amusu Yerusalem ní.

Sadukifɔ (*Saducees*)

Yudafɔ igyi ahapú ɔpasua túkúrííbi kuá bubu atɔ, bubu túmi é igyi. Butɔhɔ Bulu Mbla ámusu gyí, táme butamahɔ Yudafɔ amándíé ámúbɔ bɔde mótɔ kínkíínkínsú gyi. Butamahogyi ání kusú-tsú afúlitɔ é ibu inu. Íni su amúa Farisifɔ ámu butehíé gyi aba nwéɛn.

Samariafɔ (*Samaritans*)

Igyí ɔmá ání ida Yudea pú Galilea nsúné. Amúa Yudafɔ Bulusúm, amándíé pú ɔmákpa asón ihíé igyi ɔtsan há aba. Mú su bumetepí kán.

Sara (*Sarah*)

Mu kulu gyí Abraham. Ɖledan, bwé ɔtsi-dehen asa Bulu lébláa mu ɔbéε, méha mu obiyímbi. Lélé bré ámu lófun a, ɔɔkwú obiyímbi, bétı mu Isak. Yekı *Abraham*.

Satan (*Satan*)

Ɖbunsám idá ku é ní. Yekı *Ɖbunsám*.

Salomo (*Solomon*)

Mugyí Israelfɔ owíéá oleyí Bulu ɔtswékpa kpɔnkpɔntı Yerusalem ni. Owíε Dawid lókwú mu. Mu atonyahé pú mu nyánsa su mu idá lɔyɔ tsútsú.

Sion (*Zion*)

Igyi abvá Yerusalem wúlu idın músútɔ ikule. Bré ıku butetı Yerusalem wúlu bæ Sion, bré ıku é butɔpútı Bulu wóyí. (Mat. 21:22; Yoh. 12:15; Rom. 9:33; 1 Pe. 2:6; Heb. 12:22; Atɔle. 14:1).

Sodom (*Sodom*)

Sodom wúluto Lot mu ma mu abusuan betsiá ní. Inu bumantáa Gomora wúlu. Amúa Gomorafɔ betsiá itsiátɔ laláhe. Mú su Bulu lópu ogyá hí awúlu anyɔ ámu. (Mat. 10:15; 11:23-24; Luk. 17:29; Atɔle. 11:8.) Yekı *Lot*.

Sumbí Ayɔpú (*Apostles*)

Amúgyí ahá dúanyɔ ámúú Yesu lótsı lé mu abúopu amuto, betsiá mu wá, oletsıá súná amú atú, tsıá wá amú sumbí, betsiá yɔ ntíné yéda asun wankláán ámu ɔkan mu idátɔ ámu ni. Amú ansıtɔ Yesu lówu, lákúsú tsú afúlıto. Ɖlebláa amú ɔbéε, buyɔɔ abuyebłáa ahá tıá bawun, abuda mu ıwı asun wankláán ámu ɔkan.

Beba bemlı Yesu ahógyıpu akpapú. Ɖma a, Yesu léle ıwı ɔwan súná Paulo, ɔlebláa mu é ɔbéε, ɔbwéε mu sumbí ɔyɔpú.

Akristofɔ butetı Barnaba mu ma mu aba aku é akasıpú, táme megyí Yesu léle amú.

Tati-obu (*Tent*)

Yekı *Bulu Ɖtswékpa Tati-obu*.

Wáun-abí (*Grapes/Wine*)

Wáun igyi ifla ání itoswíe abí ɔkpɔtsatɔ. Butɔpú mú abí ntsu bwé ntá. Mú ntá butetí wáun ni. Kí atɔ taanhé ání ɔbu ifun 263tɔ, Yoh. 15:5.

Yakob (*Jacob*)

Isak mva Rebeka lókwuí mu. Butetráa tí mu Israel. Múlókwuí abi dúanyɔ́a bɔbwe Israel abusuan dúanyɔ́ ní.

Yeremia (*Jeremiah*)

Bulu ɔ́nɔ́sú ɔ́tɔ́pú ogyi. Bréá Israelfɔ ɔfan butamapú obú há Bulu á, Yeremia lébláa amú ɔ́béé, budámli kɔvntɔ. Olegyankpá blí ntobí tsɔtsɔɔtsɔ́a ɔ́béba bréá Yesu ɔ́béba, asa Yesu léta ba.

Yesaia (*Isaiah*)

Bulu ɔ́nɔ́sú ɔ́tɔ́pú ɔ́kúá ɔ́lɔ́hɔ ɔ́dá ogyi. Oletsíá ɔ́sulúv ánfɔsv ɔ́bɔ́bwé fé nfí lafa-asienó (700) asa bɔkwuí Yesu Kristo. Táme Bulu lótsun musu tóí tsú Yesu Kristo ɔ́wɔ tswɔ bré tsɔtsɔɔtsɔ́a.

Yesu (*Jesus*)

ɔ́dá ánfɔ así gyí “Nkpa ɔ́hɔ́pɔ.” Yesu Kristo gyí Bulu mu Bi ání olemlí nyankpɔsa, olowu hɔ anɔ nkpa ní.

Yona (*Jonah*)

Bulu ɔ́nɔ́sú ɔ́tɔ́pú ogyi. Bré ɔ́kɔtɔ á, Bulu lówa mu Niniwe wúluá bugyi amú alupótɔ ɔ́béé, ɔ́yéda mu asún ɔ́kan, ménɔ bédamlí ɔ́kɔvntɔ. Táme Yona mékleá ɔ́bɔ́yɔ. ɔ́lɔ́kɔsú dú ntsusu-yibi pú ɔ́kpa ɔ́yɔ wúlu bámbású. Bréá bɔ́yɔ á, Bulu léle afú kpɔ́nkpɔntɔ ku fia amú. Ntsusu-yibi ámutɔ atsiápú bebi ání Yona sù Bulu dé amú ɔ́sv butí. Mú sv bele Yona wá ɔ́pɔ amutɔ, ménɔ ɔ́wɔ bólwií amú. Klemetí kpɔ́nkpɔntɔ ɔ́ku léme mu, oletsíá klemetí ámu iputɔ nkensá. Mú ɔ́ma a, ɔ́lɔ́yɔ yékpɔláí mu tswɔ ɔ́sulúv amusu, Yona lókusú laa yɔ́ Niniwe yéda Bulu asún ámu ɔ́kan ɔ́wɔ.

Yosef (*Joseph*)

Beti ahá ɔ́tsan-ɔ́tsan Yosef Ntam Pɔ́pwe anftɔ:

(1) Yosef, ogyi Yakob abí dúanyɔ́ ámutɔ bugyi Israel abusuan dúanyɔ́ ámutɔ ɔ́kule. Mu gyama gyí Benyamin.

- (2) Yosef, ogyi Maria mu kulu. Maria anfi gyí Yesu Kristo mu yin ní.
- (3) Yesu mu yin mu bi Yosef.
- (4) Yakob ɔkusu mu pio Yosef.
- (5) Arimateayin Yosef, mulóhɔ Yesu fúli púlá ní.
- (6) Yosef ání butetí mu Barsaba. (Gyu. 1:23).
- (7) Butetráa tí Barnaba Yosef. (Gyu. 4:36).

Yosua (*Joshua*)

Mose lowu ɔma a, Yosua lékpa Israelfɔ yáa Kanaan ɔsulúvá Bulu léblí yáí ɔbéé, mópuhá amúsú. Bɔkɔ ahá ámúbú butsie unv ámu, begyi amúsú. Muléye ɔsulúv amutɔ há Israel abusuan ámu féé, ilesi Lewi abusuan ání igyi igyi ahapú abusuan. Yosua lóbwe ɔkparú kpɔnkpɔnti ɔku. Ɖlekaín mu ahá ɔbéé, “Bupúv amó klun féé sum Bulu.” Muléblí ɔbéé, “Mía mí wóyí féé mú abósum Bulu” ní. (Gyu. 7:45; Heb. 4:8).

Yudafɔ (*Jews*)

Amó butetí Israelfɔ ní. Yuda gyí ɔhande Israel abí dúanyɔ ámutɔ. Yuda abusuantɔ Yesu léln.

Yudafɔ Ofiakpa (*Synagogue*)

Yekı *Ofiakpa*.

Asun Dunkáhé

Ní fudekléá fěbɪ Bulu tsía: Gyu. 14:14-17; 17:22-31; Rom. 1:18-23; 11:33-36; 1 Ko. 8:4-6; Mar. 12:29-30; Yoh. 4:23-24; 1 Ti. 1:17; 6:15-16; Heb. 4:13; 10:30-31; Yak. 1:17; 1 Pe. 1:14-17; 1 Yoh. 1:5; 4:7-12; 4:16; 2 Ko. 1:3; Yuda 24-25; Atɔle. 4:8-11; 15:3-4.

Ní fudekléá fěbɪ Bulu mv Bi Yesu Kristo tsía: Yoh. 1:1-18; Flp. 2:5-11; Kol. 1:15-20; 2:9-10; Heb. 1:1-14; Rom. 1:3-4; 2 Ko. 4:4-6; Luk. 1:26-38; Gal. 4:4-5; Mat. 16:13-17; Yoh. 5:19-29; 6:35-40; 11:25-27; 14:5-11; 17:1-5; 20:26-31; Gyu. 3:13-16; 4:10-12; 1 Yoh. 2:1-2; 5:20; Atɔle. 19:11-16.

Ní fudesusúuá Bulu tamakɪ fv: 1 Yoh. 4:9-10; Rom. 5:8; Yoh. 3:16; 1 Ti. 2:3-6; 2 Pe. 3:9.

Ní fudesusúuá fvmɔkúbwé lakpan kɪ: Rom. 3:10-12; 3:23-24; 5:12; Gal. 3:22; 1 Yoh. 1:8-10; Yoh. 3:18-20; 3:36; Gyu. 17:30-31; Kol. 3:5-10; Rom. 6:23; Gal. 6:7-8; 2 Te. 1:7-9; 1 Pe. 4:3-5; Atɔle. 20:11-15.

Ní fudesusúu fɛɛ Bulu mɔkósi fú lakpan kié fú: Gyu. 5:31; 10:43; 26:18; Efe. 1:7; Kol. 1:13-14; 2:13-14; 1 Ti. 1:15-16; Heb. 10:17-18; 1 Yoh. 1:8-10.

Ní fudekléá Yesu ɔhɔɔ fv nkpa: Yoh. 1:12; 3:15-18; 3:36; 14:6; 20:31; Gyu. 4:12; 16:30-31; Rom. 3:20-22; 10:9-10; Gal. 2:16; Efe. 2:8-9.

Ní umɔkówánkí fú ání fóbv nkpa ání utamatá: Yoh. 3:1-16; 5:19-29; 11:25-26; 14:6; 17:2-3; 20:31; Rom. 8:10-17; 2 Ko. 5:17; Efe. 2:1-6; Kol. 2:13; Tito 3:4-7; 1 Yoh. 5:11-13.

Ní fudekléá fěbɪ ání ilehián ání fóbv mpáu: Mat. 6:5-13; 7:7-11; 14:23; 18:19-20; Mar. 1:35; 11:24-25; Luk. 5:16; 6:12; 18:1-8; 21:36; Yoh. 14:13-14; 15:7; 16:23-24;

Rom. 8:26-27; 12:12; Efe. 6:18; Flp. 4:6-7; Kol. 4:2; 1 Te. 5:17; 1 Ti. 2:1-4; 2:8; 4:4-5; Heb. 4:16; 10:19-22; Yak. 1:5-8; 4:2-3; 5:13-18; 1 Pe. 4:7; 1 Yoh. 3:21-22; 5:14-15.

Ní fudekléá fubú tóá súa fóbɔ mpái á, kla mpái ánfí ahá ánfí bɔbɔ: Luk. 11:1-4; 22:32; 22:39-45; Yoh. 17:1-26; Gyu. 4:24-31; 16:25; Rom. 1:9-10; 10:1-2; 15:30-33; 2 Ko. 12:7-10; Efe. 1:15-20; 3:14-21; 6:19-20; Flp. 1:3-5; 1:9-11; Kol. 1:9-12; 4:3-4; 1 Te. 3:9-13; 2 Te. 1:11-12; 3:1-2; Heb. 5:7; 7:25.

Ní ukplán ntée asun wunhé utó fú: Rom. 8:18-25; 8:28; 8:35-37; 12:12; 2 Ko. 1:3-5; 4:16-18; Yak. 1:2-4; 1 Pe. 1:3-9; 2:19-23; 5:8-10.

Ní fudelo: Mat. 4:23-25; 9:35; 11:2-5; Gyu. 3:1-6; 8:4-8; 19:11-16; 28:8-9; 1 Ko. 12:9; 12:29-30; 2 Ko. 12:7-10; 1 Ti. 5:23; 2 Ti. 4:20; Yak. 5:14-15.

Ní fude lowu ifú nya: Yoh. 6:39-40; 11:17-27; 14:1-4; Rom. 8:38-39; 14:7-9; 1 Ko. 15:12-58; 2 Ko. 5:1-10; Flp. 1:20-24; 1 Te. 4:13-18; Heb. 2:14-15; Atɔle. 14:13; 21:1-4; 22:1-5.

Ní fudekléá fébú Okristoyin tsiátó: Yoh. 13:34-35; Rom. 12:9-13; Gal. 5:22-26; Efe. 4:25-32; Kol. 3:12-17; 1 Te. 5:12-22; Tito 2:11-14; Yak. 3:13-18; 2 Pe. 1:3-9.

Ní fudekléá fébú ání uma aleá fóbwe tɔku: Rom. 1:18-32; 1 Ko. 6:9-11; Gal. 5:19-21; Efe. 5:3-5; Kol. 3:5-10; Yak. 4:17; 1 Pe. 4:3; 1 Yoh. 2:15-17; 3:4-5.

Ní fukí ání fometsíe nkpa alá Bulu déklé: Yoh. 14:16-23; 1 Ko. 10:13; Efe. 3:20-21; Flp. 1:6; 4:13; Kol. 1:11-12; 1 Te. 5:23-24; Heb. 13:5-6; 1 Yoh. 5:3-5.

Ní fú Okristoyin bwe sv ahá budún fúsú: Mat. 5:10-12; Mar. 13:9-13; Luk. 12:4-9; Yoh. 15:18-21; 16:1-4; Gyu. 5:41; Rom. 8:35-37; 12:14, 17-21; 1 Ko. 4:11-13; 2 Ko. 4:8-12; 12:10; Flp. 1:28-29; 2 Te. 1:4-8; 2 Ti. 3:10-13; Heb. 10:32-39; 12:3-4; 1 Pe. 3:13-17; 4:12-19; Atɔle. 2:10.

Ní fukíá mehián ání fúa ahógyipu mléfia tsukole: Mat. 18:19-20; Gyu. 2:41-47; Rom. 12:4-8; Efe. 1:22-23; 4:11-16; Kol. 3:15-17; 1 Ti. 4:13; Heb. 10:24-25.

Ní ɔkv ɔpú lalahe gyi fu: Mat. 6:12-15; 18:21-35; Mar. 11:25; Luk. 17:3-4; Rom. 12:17-21; Efe. 4:31-32; Kol. 3:13.

Ní futsia okúlu ntée ɔká: 1 Ko. 7:1-16; Efe. 5:21-33; Kol. 3:18-19; Tito 2:3-5; Heb. 13:4; 1 Pe. 3:1-7; Mat. 5:31-32; 19:3-9; Luk. 16:18; Rom. 7:2-3.

Ní ide fú bwe ání fúa ɔtsiá omegyí fú tsiába mlédu: Mat. 5:27-28; Yoh. 8:2-11; Rom. 13:8-10; 1 Ko. 6:9-20; Gal. 5:19; Efe. 5:3; Kol. 3:5-6; 1 Te. 4:1-8; Heb. 13:4; Yuda 7.

Ní fubv abí: Efe. 6:1-4; Kol. 3:20-21; 1 Ti. 3:4-5.

Ní fú akwúpú butsie nkpa: Mat. 15:3-6; Efe. 6:1-3; Kol. 3:20; 1 Ti. 5:4-8.

Ní fowun ɔkvá olehián mbva: Mat. 7:12; 25:31-46; Luk. 3:10-11; 6:38; Gyu. 11:27-30; 1 Ko. 10:24; 2 Ko. 8:1-15; 9:1-15; Gal. 6:9-10; Flp. 4:14-19; Heb. 10:24; 13:1-3; 13:16; Yak. 1:27; 2:15-16; 1 Yoh. 3:16-18.

Ní ide fú bwe fé fubwé lakpan: Mat. 6:13; 26:41; 1 Ko. 10:13; Heb. 2:18; 4:14-16; Yak. 1:12-15.

Ní fabwé lakpan: Luk. 15:11-24; Rom. 6:1-23; 1 Yoh. 1:9-2:2; Yak. 4:7-10; Atɔle. 3:19-20; Heb. 12:1-2.

Ní fode ɔbonsám ntée ɔhe laláhe ifú nya: Mat. 4:1-11; 6:13; Luk. 22:31-32; Yoh. 17:14-19; Rom. 16:19-20; 1 Ko. 16:13; 2 Ko. 12:7-10; Efe. 3:20-21; 6:10-18; 1 Te. 3:5-8; 2 Te. 3:3; Yak. 4:7-8; 1 Pe. 5:8-11; 1 Yoh. 4:4; Atɔle. 12:7-12.

Ní ɔkv lahá ɔbló de fú: Gal. 5:22-23; Efe. 4:26; Kol. 3:8; 3:13; Yak. 1:19-20.

Ní iwútsú bv futɔ: Mat. 5:3-12; 18:1-5; Luk. 14:7-11; 18:9-14; Rom. 12:16; 1 Ko. 4:7; 2 Ko. 10:17-18; Efe. 4:2; Kol. 3:12-13; Yak. 4:6; 4:13-16; 1 Pe. 5:5-7.

Ní fú tótu uma anulé: Efe. 4:29; 5:4; Flp. 4:8; Kol. 3:8; 1 Ti. 4:12; Yak. 1:26; 3:9-10.

Ní ide fú bwe ání fuwá ofunu: Efe. 4:25; Kol. 3:9; 1 Pe. 3:10; Yoh. 8:44; Atɔle. 21:8; 22:15.


Ní ahá budekléá fúa amúnyc mlóbv ntá: Rom. 13:13; 1 Ko. 5:9-11; 6:9-10; Gal. 5:19-21; Efe. 5:18; 1 Ti. 3:1-3; Tito 1:7; 1 Pe. 4:3-5.

Ní fú ansí dín fú atonyahésú: Mat. 6:19-21; 6:24-34;
Luk. 12:13-21; 12:32-34; Gyu. 20:35; 1 Ti. 6:6-10; 6:17-19;
Heb. 13:5-6.


Ní ahá budekléá fvsúm ukpi: Mat. 4:10; Gyu. 17:22-31;
1 Ko. 5:11; 6:9-11; 8:1-13; 10:1-22; 2 Ko. 6:14-18;
Gal. 5:19-21; 1 Te. 1:9-10; 1 Yoh. 5:21; Atɔle. 21:8; 22:15.

Ní fudekléá fébi alá fópukítá mli nkpá agyápu:
Mat. 22:15-22; Rom. 13:1-7; 1 Ti. 2:1-4; Tito 3:1;
Heb. 13:17; 1 Pe. 2:13-17.

Bulu Ɖwékpá Yesu Kristo Brésú



Bulu Ɖwékpá Obu Amu Onutó



1. Bulu Igyíha Bodobodo Ɖpúnú
2. Ɖkandíe-oyí
3. Sika Pɛpɛ Afɔdɛ-asubwi
4. Tati
5. Bulu Ntam-dáka
6. Kerubim

